

STICHIA' DIOSE DIALU

El Nuevo Testamento
en el zapoteco de Lachixío



Liga Bíblica[®]
INTERNACIONAL

El Nuevo Testamento
en el Zapoteco de Lachixío

Liga Bíblica Internacional 5C primera edición 2010 [zpl]
Liga Bíblica Internacional versión electrónica 2010

Publicado por

©Liga Bíblica Internacional, 2010

Se permite copiar, distribuir y comunicar públicamente esta obra bajo las siguientes condiciones:

- ▶ Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- ▶ No comercial. No puede utilizar esta obra para fines lucrativos.
- ▶ Sin obras modificadas. No se puede alterar, transformar o generar una obra a partir de ésta.

PRÓLOGO

Originalmente, el Nuevo Testamento fue escrito en el idioma griego. Se ha traducido a más de 1500 idiomas de todo el mundo. ¡Ahora, también se ha traducido al zapoteco de Lachixío! En todo el mundo, millones de personas pueden leer la palabra de Dios en su propio idioma, y ahora también los zapotecos de Lachixío pueden hacerlo.

El Nuevo Testamento y el Antiguo Testamento son la palabra de Dios, lo que la gente llama la “Biblia”. El Nuevo Testamento tiene veintisiete libros; los primeros cuatro hablan de lo que hizo Jesucristo, el que sigue cuenta la historia de lo que hicieron los apóstoles, los siguientes son los libros que ellos escribieron, y el último relata lo que Jesucristo hará en el futuro. Las personas que lean la Palabra de Dios y obedezcan todo que está escrito en ella será bendecidas.

Bienaventurado el que lee y los que oyen las palabras de esta profecía, y guardan las cosas en ella escritas; porque el tiempo está cerca.

Apocalipsis 1:3 (RV95)

También es necesario que la leamos porque es eterno.

La hierba se seca y la flor se cae, mas la palabra del Señor permanece para siempre.

1ª de Pedro 1:24b y 25a (RV95)

PRÓLOGO

Bee bedichia' nú nze'ta lu libro quie'

Hasta hua'tu, Stichia' Diose nú neca Nuevo Testamento, uquiee dialu griego. Nu unga traducidue mase de tucu mili arula' dialu nú nu' diqui lu iliulabe. ¡Nu nee le'ca unga traducidue dialu eyeche quie'! Diquinea lu iliulabe huaxi millón bee bene reca rula Stichia' Diose lunú neca dialu e'cu'lla, nu nee bee bene eyeche quie' bee enu rni dialu le'ca aca beella ula beellae.

Stichia' Diose nú neca Nuevo Testamento nu cuna Stichia' Diose nú neca Antiguo Testamento necane Stichia' Diose, nú rni bee bene “Biblia”. Stichia' Diose nú neca Nuevo Testamento lu ye nú nze'ta lue neca ala cheachi libro; lu rluti tacu bee libro quie' rni bee equie cuenda' beenú uri'i Jesucristo, nu stucue rixiule'e equie cuenda' beenú uri'i bee apóstol, beelá bee neca bee libro nú uquie'e beella, nu último libro rixiule'e equie cuenda' nú xi nze'ta ri'i Jesucristo. Bee bene enu rula Stichia' Diose nu sucu' nú rnii bee nze'le ri'i Dios nú chá nze'ca lu cuenda'.

Nza nze'ca equie cuenda' bene enu rula ichi' quie' nu equie cuenda' bee bene enu riene' nú xi rnii nu cuna equie cuenda' bee bene enu rri'i casoe, nu rixiule'e nú xi nzu aca, xne nze'ta riñala tiembu nú aca bee nucua'.

Apocalipsis 1:3

Le'ca riala nú ye bee bene ulane xne leca xunga laxue.

Xne lu ichi' Stichia' Diose rni: Ye bee bene iliulabe neca xi neca bee huañi dañi, nu eluxene' beei neca xi neca quiee nú nu' lue. Ribichi huañicua' nu sana' quiee nú nu' lue; pero Stichia' Diose leca bichia nú laxue.

1 Pedro 1:24-25

Índice

San Mateo	1
San Marcos	65
San Lucas	106
San Juan	173
Los Hechos.....	220
Romanos	285
1 Corintios	314
2 Corintios	343
Gálatas.....	362
Efesios.....	372
Filipenses.....	381
Colosenses.....	388
1 Tesalonicenses	395
2 Tesalonicenses	401
1 Timoteo	405
2 Timoteo	413
Tito	419
Filemón.....	423
Hebreos.....	425
Santiago	446
1 Pedro	454
2 San Pedro.....	463
1 Juan.....	468
2 Juan.....	476
3 San Juan	478
Judas.....	480
Apocalipsis.....	483

Bedichia' nze'ca' Jesucristo nú uquie'e San Mateo

Bee bene' Jesucristo enu udetela

(Lc. 3:23-38)

1 Ca'a nze'ta nú lee bee bene'
Jesucristo enu udetela, li'inu
enu nze'ta lu familia' arre David nu
Abraham.

2 Abraham unga pa' Isaac,
nu Isaac unga pa' Jacob,
nu Jacob unga pa' Judá nu bee
bichilla.

3 Nu Judá cuna una'lla Tamar,
ulu'cu beella endu' beella enu
lee Fares nu Zara.
Fares unga pa' Esrom,
nu Esrom unga pa' Aram.

4 Aram unga pa' Aminadab,
nu Aminadab unga pa' Naasón,
nu Naasón unga pa' Salmón.

5 Salmón unga pa' Booz,
nu na'lla lee Rahab.
Booz cuna una'lla Rut ulu'cu
beella endu' beella enu lee
Obed.

Nu Obed unga pa' Isaí.

6 Isaí unga pa' arre David,
nu arre David cuna bene enu
unga una'a Urías, ulu'cu
beella tucu endu' enu lee
Salomón.

7 Nu Salomón unga pa' Roboam,
Roboam unga pa' Abías,
nu Abías unga pa' Asá.

8 Asá unga pa' Josafat
nu Josafat unga pa' Joram
nu Joram unga pa' Uzías.

9 Uzías unga pa' Jotam,
Jotam unga pa' Acaz.
Acaz unga pa' Ezequías.

10 Ezequías unga pa' Manasés,
Manasés unga pa' Amón,
nu Amón unga pa' Josías.

11 Nu Josías unga pa' Jeconías
cuna bee bichilla, tiambu cua'
neca chenu uri'i bee bene
Babilonia preso bee bene
Israel.

12 Luze'elá chenu uri'i bee bene
Babilonia preso li'ibeella,
che ulu'cu Jeconías tucu endu'
enu lee Salatiel,
nu che Salatiel unga pa'
Zorobabel.

13 Zorobabel unga pa' Abiud,
nu Abiud unga pa' Eliaquim,
Eliaquim unga pa' Azor.

14 Azor unga pa' Sadoc,
nu Sadoc unga pa' Aquim,
Aquim unga pa' Eliud.

15 Eliud unga pa' Eleazar,

nu Eleazar unga pa' Matán,
Matán unga pa' Jacob.

¹⁶ Jacob unga pa' José enu unga
niyu' María.

Nu María neca na' Jesuse nu
le'ca leenu Cristo.

¹⁷ Scua unga desde tiembu nú
uhuañi Abraham hasta tiembu nú
uhuañi arre David, uhuañi rtaa
generación bene, nu le'ca rtaa
generación bene uhuañi desde
tiembu' arre David hasta chenu uri'i
bee bene Babilonia preso bee bene
Israel. Nu le'ca rtaa generación
bene uhuañi desde nú uri'i bee
bene Babilonia preso bee bene
Israel hasta chenu uriña bichia nú
ungula Jesucristo lu iliulabe.

Chenu ungula Jesucristo

(Lc. 2:1-7)

¹⁸ Singuie unga chenu ungula
Jesucristo: María na'nu nzula
nú yuculla José, pero ante nú
yucusa'beella, nu'la endu' xla'cu
María equie poder' Espíritu Santo.
¹⁹ Nu lunú neca José bene nze'ca lá
niarqui'lla nilla nú xi seca María
a'la uri'illa elliebacu' nú tsa'nalla
María a'chi'tsia. ²⁰ Pero diquila
nú rri'illa elliebacu' nucua', che
ulube'lu tucu ángele' Diose lulla
leta xcala'lla, nu uni ángele ze'e
lulla:

—José, li'ilu enu nze'ta lu familia'
arre David, la lliquilu nú yuculu
María xne endu' enu acanuulla
equie cuenda' Espíritu Santo
acanuullanu. ²¹ Nu endu' enu
acanuulla hualeelunu Jesuse. Xne
equie cuenda'nu tsila'a ye bee bene
lachinu Israel lu stula beella.

²² Ye bee nucua' unga para nú
yalu Stichia' Diose tucu nú uni tucu
bee profeta'nu chenu unilla:

²³ Tucu una'a e'ne chu'u endu'
xla'cu nu

chenu ala endu'lla, chiu'u leenu
Emanuel,

bedichia' cua' rni: Diose nzu cuna
lia'ahua.

²⁴ Chenu uhuañi José, che uri'illa
tucu nú unibiya' ángele' Diose lulla
nú ri'illa, nu uyuculla María. ²⁵ Pero
né na'tsella María hasta nú ungula
endu' María, nu ulualee José
endu'cua' Jesuse.

Uyabi'ya bee mago Jesuse

2 Ungula Jesuse Belén, tucu
eyeche nú nchiucu' lu iliu
Judea, tiembu nú unibiya' arre
Herodes. Nu uriña bee bene enu
reca elliebacu' Jerusalén, nze'ta
beella enza rliñi bichia Jerusalén
nu neca beella magos, ² che
unidichia' beella:

—¿Cá nchiucu' arre' bee bene
Israel enu ungula? Xne desde
lachiru ulañi'la'ru nú uliñi bela'nu,
enze'e nzelarú para nú lu'curu
ula'na lunu.

³ Chenu ubene' arre Herodes
nú unibeella scua, chiqui' nzenu
arqui'lla, cuna ye bee bene
Jerusalén. ⁴ Che ubixia arre Herodes
ye bee ule'ya enu rnibiya', cuna bee
ulaxcuela enu reca ley nú udeté'
Diose lu Moisés para nú nedichia'lla
lubeella cá riala nú ala Cristo. ⁵ Che
uni beella lulla:

—Eyeche Belén nú nchiucu' lu iliu
Judea alanu, xne scua uni profeta
chenu unilla:

⁶ Li'ilu eyeche Belén nú nchiucu'
 lu iliu Judea,
 nu li'ilu la necalu tucu bee
 eyeche nú mase lle'na
 nú nchiucu' lu ye bee eyeche
 llene lu iliu Judea.
 Xne lulu chiu'u tucu bene enu
 nibiya',
 nu li'illa bi'yalla bee bene Israel
 enu neca bee benea.

⁷ Che chu ubixia a'chi arre Herodes
 bee mago cua' para nú unedichia'lla
 lubeella nú xunga itáa ulube'lu belaa
 ze'e lubeella. ⁸ Nu uxe'lalla li'ibeella
 Belén, nú unilla lubeella:

—Uquiahua ze'e, nu ri'i itáahua
 beya' nú xa neca lu cuenda' endu'
 ze'e. Nu chenu ullela'la'huanu, ye'ta
 tixiule'ehua lua para nú le'ca nua
 nza'a nze detea ula'na lunu.

⁹ Chenu ulaxu nú uni arre Herodes
 scua lubeella, chu nzuebeella. Nu
 belaa enu ulañi' beella nú uliñi
 desde nú nucua'asca' beella lachi
 beella nzuculu lubeella, nu utsuxe
 belaa cua' hasta elu nchiucu' endu'
 ze'e. ¹⁰ Chenu ulañi' bee mago
 belaa cua' ze'e, chiqui' ñia utsu
 arquib'beella, ¹¹ nu chenu uyu'u beella
 liñi ni'i ze'e, ulañi' beella endu' cuna
 na'nu María, che utsulliqui beella
 lunu nu ulu'cu beella ula'na lu endu'
 ze'e. Chu uxa'la beella ru'u bee caja
 nú nuya' beella nu lia udete' beella
 oro, cuna quiendixi, cuna mirra
 lu endu' me' ze'e. ¹² Che udixiule'e
 Diose lu xcala' beella nula benchila'
 beella lu Herodes, nu né benchila'
 beella enza enta beella.

Nzenu José cuna María Jesuse Egipto

¹³ Chenu nziala bee mago ze'e
 lachi beella, che ulube'lu tucu

ángele' Diose lu xcala' José, nu uni
 ángele ze'e lulla:

—Uzetee, uya' endu' cua' cuna
 na'nu nu uquiahua Egipto, ze'e
 cua'ahua hasta nú ixiule'a luhua.
 Xne cua'na Herodes endu'cua' para
 nú utilla li'inu.

¹⁴ Che chu uzete José, nu
 unguya'lla endu' cuna na'nu, nu
 rula' ze'e uchiu'u beella nziue
 beella enza Egipto. ¹⁵ Ze'e ucua'a
 beella hasta nú ungti arre Herodes.
 Scua unga para nú uyalu Stichia'
 Diose tucu nú uninu lu tucu profeta
 chenu uninu: “Ubixia endua enza
 Egipto.”

**Unibiya' arre Herodes nú
 ati ye bee endu' me'e**

¹⁶ Chenu uri'i Herodes beya' nú
 uzequienu bee mago ze'e li'illa,
 chiqui' uleella, nu unibiya'lla nú
 ungti ye bee endu' enu nza chiucu
 lana hasta enu me'e enu nucua'a
 Belén cuna bee eyeche abenchila'
 ze'e, xne nuya' cuendalla lunú uni
 bee mago ze'e lulla nu udetela
 chiucu lana nú ulube'lu belaa
 ze'e. ¹⁷ Scua uyalu tucu nú uquie'e
 profeta Jeremías chenu unilla:

¹⁸ Uyene tucu chii eyeche Ramá,
 nú runa' nu rixiali.

Nu Raquel neca enu runa' cua'
 equie cuenda' bee endu'nchu,
 nu lecati enu ri'i ana tsala
 arquin'chu xne ungti bea
 endu'nchu.

¹⁹ Pero chenu ungti arre Herodes,
 che ulube'lu tucu ángele' Diose lu
 José elu nucua'a beella Egipto nu
 uni ángele ze'e lulla:

²⁰ —Uzetee, uya' endu' cuna na'nu,
 nu ubenchila' zecahua Israel xne

ungutila bee enu niarqui' nú uti endu' quie'.

²¹Che chu uzetee José nu unguya'lla endu' cua' cuna na'nu nu ubenchila' beella eyeche Israel. ²²Pero chenu ungabiya' José nú Arquelao lliana' arre Herodes neca enu rnibiya' lu iliu Judea, ulliquilla nú challa enza ze'e. Pero chenu ungabiya'lla lu xcala'lla nú la challa enza Judea, che nzuella enza lu iliu Galilea. ²³Chenu uriña beella lu iliu Galilea, ucu'a beella tucu eyeche nú lee Nazaret. Scua unga para nú uyalu tucu nú uni bee profeta nú Jesuse chiulee bene Nazaret.

**Udixiule'e Juan Bautista Stichia'
Diose lubee bene**

(Mr. 1:1-8; Lc. 3:1-9, 15-17; Jn. 1:19-28)

3 Tiambu ze'e uyanzee Juan Bautista lu dañi achi lu iliu Judea udixiule'ella Stichia' Diose lubee bene. ²Nu unilla:

—Utsana' arqui'hua stulahua xne nze'ta riñala nú rnibiya' Diose.

³Equie cuenda' Juan Bautista quie', uquie'e profeta Isaías chenu unilla:

Uyene chi tucu enu juerte rixiali lu dañi achi elu la nucua'a bee bene nú rni:

“Utsu tsiñahua arqui'hua xne nze'tala li'inu enu neca Diose'ahua, utsana' arqui'hua stulahua para nú yucu arqui'hua stichia'nu.”

⁴Xucu Juan necache'e ichia tsu' camello, nu sinchiu nú riu'u xla'culla necache' iti, nu elubacu nú udaculla neca xe'chiu cuna lliña dañi. ⁵Nu bee bene Jerusalén cuna

ye bee bene lu iliu Judea nu cuna bee bene enu nucua'a axu re'cu Jordán uchiu'u beella, uya beella ubene' beella nú rni Juan. ⁶Chequie chenu uxucu' dula beella stula beella, urinza Juan li'ibeella re'cu Jordán.

⁷Pero chenu ulañi' Juan nú huaxi bee fariseo cuna saduceo uriña lulla para nú rinzalla beei, che unilla lubeei: —iLi'isihua netsiñahua xi netsiña bee be'la! ¿Ti udixiule'e luhua nú tsila'ahua lu castiya juerte nú axula nzu zeca bee bene? ⁸Uhuañi nze'cahua para nú aca chee nú neli utsana' arqui'hua stulahua, ⁹nula aca nelliñahua nú rnihua: “Li'iru nzelarlu lu familia' tuxie Abraham”, xne li'á nia luhua nú hasta bee quiee quie' nu' modo nú ri'i Diose nú aca bee familia' tuxie Abraham.

¹⁰Nu bee bene enu la zucu' Stichia' Diose tucu nú rialane, li'inu ri'inu lubeella tucu nú rri'inu bee bene aca nú la ayua' ndixilu, xiecu' benene para nú chiquine. ¹¹Li'á, rniaa luhua nú li'á rrinzahua cuna inza xineca tucu seña nú utsana' arqui'lahua stulahua, pero enu nze'ta lulá li'inu rinzanu li'ihua cuna Espíritu Santo nu cuna quii. Li'inu maselá rlu'cunu poder luquela li'á, enze'e ni' nú hua lucunu la yala xne masela neca equienlu luquela li'á. ¹²Nu tucu nú rcuii bene trigo scua ri'inu Diose bee bene. Nu bee bene enu sana' arqui' stula huañi bee nze'e elurnibiya' Diose, nu bee bene enu la tsana' arqui' stula necala nú cha beei lu quii nú leca xunga yala.

Urinza Juan Bautista Jesuse

(Mr. 1:9-11; Lc. 3:21-22)

¹³Che uchiu'u Jesuse Galilea para nú nzanu lu Juán re'cu Jordán, para

nú rinzalla li'ínu. ¹⁴Pero chenu uriñanu lu Juan lá zela Juan arinza li'ínu, nu unilla lunu:

—Li'ilu riala rinzalu li'á, ¿nu li'á la yala rinza li'ilu?

¹⁵Chequie uni Jesuse lulla:

—Uzela nú acane scua, xne mase neca nze'ca nú ria'a ye tucu nú rnibiya' Diose.

Chee uzela Juan urinza li'ínu.

¹⁶Chenu ulaxu nú urinzalla Jesuse, nu uchiu'unu lu inza, tu'natsia uya'la liñibe, nu ulañi'nu nú nze'ta laca Espíritu Santo' Diose xi naa tucu paloma equienu. ¹⁷Nu ubene tucu chii enu uni hasta liñibe:

—Li'ínu necanu lli'ñia enu chiqui' se'caa, nu ñia nzu arquia lu.

Chenu uri'i beze'lu preu Jesuse

(Mr. 1:12-13; Lc. 4:1-13)

4 Luze'elá unguya' Espíritu Santo Jesuse lu dañi achi elu la nucua'a bee bene para nú ri'i beze'lu preu li'ínu.

²Ze'e uya'na Jesuse chiu'a bichia nu chiu'a rula' nu lecalí xi udacunu nu che ulia'na'nu. ³Chequie uya beze'lu lunu para nú ri'i preu li'ínu nu uni lunu:

—Tunu neli nú necalu lli'ñi Diose, unibiya' nú aca bee quiee quie' pá aculu.

⁴Pero ucuaqui Jesuse lu beze'lu:

—Lu ichi' Stichia' Diose rni: “La neca equie cuenda'tsia pá nehuañi bee bene, sino que le'ca nehuañi bee bene lu cuenda' ye bedichia' nú rni Diose.”

⁵Che chu uyanu beze'lu li'ínu eyeche Jerusalén nu uquienui li'ínu equie indu llene Jerusalén elu mase aya, ⁶nu uni lunu:

—Tunu neli nú necalu lli'ñi Diose, utsi'qui li'ilu ca'a hasta lu yuu, xne lu ichi' Stichia' Diose rni:

Xe'la Diose bee ángele'nu para nú ri'i ucu li'ilu.

Nu na'tse beenu li'ilu para nú la ti'qui bee quiee cuchiu'lu.

⁷Che ucuaqui Jesuse lu beze'lu:

—Le'ca rni lu ichi' Stichia' Diose: “La ri'ilu preu Diose Pa liñibe.”

⁸Nu le'ca uyanu beze'lu li'ínu equie tucu dañi elu aya, nu ze'e ulube'i lunu nzie' bee eyeche nú nu' lu iliulabe cuna bee eluxene nú nu' lubee, ⁹nu uni lunu:

—Li'á liquia ye bee nucua' lulu, tunu tsulliquilu lua nu lu'culu ula'na lua.

¹⁰Nu uni Jesuse lui:

—Uquia beze'lu, xne lu ichi' Stichia' Diose rni: “Ulu'cu ula'na lu Diose'lu Pa liñibe, nu lu li'itsianu riala nú zibi'lu.”

¹¹Chequie utsa'na beze'lu li'ínu, nu uriña bee ángele' Diose uri'i elietsa lunu.

Chenu uquixie Jesuse uzete'nu Stichia' Diose lubee bene

(Mr. 1:14-15; Lc. 4:14-15)

¹²Chenu ungabiya' Jesuse nú nchiñi Juan Bautista ni'cu', che chu nzazecanu lu iliu Galilea. ¹³Pero né ya'nanu Nazaret, sino que uyanu uzucunu eyeche Capernaum, tucu eyeche nú nchiucu' ru'u inzatu' Galilea enza lu iliu nú lee Zabalón nu Neftalí.

¹⁴Scua ungae para nú uyalu tucu nú quie'e profeta Isaías chenu unilla:

¹⁵Bee bene lu iliu Zabalón nu bee bene lu iliu Neftalí, nu bee bene enu nucua'a lu iliu nú nchiucu' axu re'cu Jordán,

cuna ye beelá bee bene enu
nucua'a axu ru'u inzatu' lu
iliu Galilea elu nucua'a bee
bene enu laca bee bene
Israel.

¹⁶ Ye beella uhuañi beella tucu
nú nehuañi bee bene enu
nucua'a leta rula',
pero nee ulube'lula tucu ellie'e
lubeella,
nu ellie'e cua' udu'llie'e lu
elliebacu' beella,
li'ibeella enu lecaxi utsuquie nú
xi liqui' Diose lubeella.

¹⁷ Desde che uquixie uzete' Jesuse
Stichia' Diose bee bene nu uninu
lubeella:

—Tsana' arqui'hua stulahua xne
nze'ta riñala elurnibiya' nú rlu'cu
Diose.

**Ubixia Jesuse tacu bee bene enu
rucu bela**

(Mr. 1:16-20; Lc. 5:1-11)

¹⁸ Chenu nzedete Jesuse ru'u
inzatu' Galilea, che ulañi'nu Simón,
enu le'ca lee Pedro, cuna bichilla
Andrés, nú rdu'beella ixiu nú rucu
beella bee bela lu inza. ¹⁹ Nu uni
Jesuse lubeella:

—Te quiehua li'á para nú zeteahua
xa quiete'sa'hua bee bene para nú
aca beella bee benea luguare nú
rucuhua bee bela.

²⁰ Hora ze'e utsa'na beella ixiu nú
rucu beella bela nu chu nzuebeella
cuna li'inu. ²¹ Enza luze'elá ulañi'nu
xiucu bee bene, Jacobo nu cuna
bichilla Juan, lliana' bene enu lee
Zebedeo. Nucua'a beella liñi barco
cuna pa' beella, rquiela' beella
ixiu nú rucu beella bee bela. Nu
ubixia Jesuse beella, ²² nu hora ze'e

chu utsa'na beella barco ze'e cuna
sa'beella, nu chu nzequie beella
li'inu.

Uzete' Jesuse huaxi bee bene

(Lc. 6:17-19)

²³ Uya Jesuse ye lubee eyeche
lu iliu Galilea, nu cada tucu bee
eyeche uyu'unu liñi bee indu
uzete'nu bee bene Stichia' Diose, nu
uninu lubeella xa neca elurnibiya'
nú rlu'cu Diose nu uriyecanu bee
bene luye clasia' elichia nú seca
beella. ²⁴ Ungabiya' ye bee bene
lu iliu Siria lunú uri'i Jesuse, che
ube'tayu bee bene ze'e bee bene
enu seca huaxi clasia' bee elichia
lunu, le'ca ube'tayu beella bee bene
enu si' nú rcu cuerpo', cuna bee
bene enu seca ichia' benechiqui',
cuna bee bene enu seca ichia ziña
cuna bee bene enu la acalí tsee nu
uriyeca Jesuse ye bee bene cua'.

²⁵ Huaxi bee bene enu nucua'a
lu iliu Galilea, cuna bee bene enu
nze'ta enza lubee eyeche Decápolis,
cuna bee bene Jerusalén cuna bee
bene enu nucua'a lu iliu Judea nu
bee bene enu nucua'a stucu chú
re'cu Jordán, uyaquie li'inu.

**Uzete' Jesuse bee bene Stichia'
Diose equie tucu dañi**

5 Chenu ulañi' Jesuse ye bee
bene cua', uquienu equie
tucu dañi nu uzucunu ze'e. Che
uyetesá' bee bene'nu lunu ze'e, ² nu
uquixienu uzete'nu li'ibeella nú
uninu lubeella:

Ta bee bene enu ñia nzu arqui'

³—Ñia neca lu cuenda' bee bene
enu rri'i beya' nú chiqui' rqui'ñialla

elietsa' Diose, xne cua'a beella liñibe elu rnibiya'nu.

⁴Ñia neca lu cuenda' bee bene enu nehuana nzu arqui', xne ri'i Diose nú ñia tsu arqui'beella.

⁵Ñia neca lu cuenda' bee bene enu lle'na arqui', xne yucu beella yuu nú uni Diose nú dete'nu lubeella.

⁶Ñia neca lu cuenda' bee bene enu neca xi neca nú rlia'na' nu rebichi', scua nu' ana arqui'beella ri'ibeella tucu nú rnibiya' Diose, xne li'inu ri'inu elietsa lubeella para nú ri'ibeella tucu nú niarqui'nu.

⁷Ñia neca lu cuenda' bee bene enu rua'a arqui' bee bene, xne le'ca hua'a arqui' Diose li'ibeella.

⁸Ñia neca lu cuenda' bee bene enu lecaxi naa lu Diose, xne li'ibeella neca beella enu lañi' li'inu.

⁹Ñia neca lu cuenda' bee bene enu rcua'na nú nzuxe arqui' lusa', xne li'ibeella chiu'uleebeella lli'ñi Diose.

¹⁰Ñia neca lu cuenda' bee bene enu nehuana seca luye nú rri'inu bee bene li'ibeella equie nú rri'i beella tucu nú rnibiya' Diose, xne li'ibeella chu'u beella liñibe elu rnibiya'nu.

¹¹Ñia neca lu cuenda'hua chenu riquichi'qui' bee bene li'ihua, nu chenu xitserr'iinu bee bene li'ihua nu chenu rta' bee bene yelu clasia' bee eluquichia' li'ihua, equie nú necahua bee benea. ¹²Ñia utsu arqui'hua nu ullila'hua, xne chiqui' ñia neca nú lia liqui' Diose luhua liñibe, nu li'ihua nediya'hua nú le'ca scua uri'i condra beella bee profeta enu udetela enu uhuañi rlutila luquela li'ihua.

Ejemplu' zete cuna ellie'e

(Mr. 9:50; Lc. 14:34-35)

¹³Li'ihua necahua xi neca zete lu iliulabequie'. Pero tunu niti nú neri'i, ¿xa modo zibi' zecae che? Leca' xi zibi'i, tsi'quitsia benene nu ta' bene equiee.

¹⁴Nu le'ca li'ihua necahua xi neca ellie'e lu iliulabequie', li'ihua necahua xi neca tucu eyeche nú nchiucu' equie tucu dañi nú leca modo nú ricu a'chi'. ¹⁵Lecati quie'e quii tucu quinqué nu tsacu'lla tucu caja equiee, rqui'ña nú zucune aya para nú du'llie'e luye bee bene enu nucua'a liñi ni'i. ¹⁶Le'ca scua li'ihua, ucuahua nú huañi nze'cahua lubee bene para nú chenu lañi' beella beenú neca nze'ca rri'ihua, che nibeella bee bedichia' nze'ca equie cuenda' Pa'ahua Diose enu nzucu liñibe.

Uzete' Jesuse bee bene nú xi rni ley

¹⁷La ri'ihua elliebacu' nú uriña para nú huachua ley, ley nú udete' Diose lu Moisés urre beenú uzete' bee profeta bee bene, xne li'á uriña para nú tsalua tucu nú rni ley. ¹⁸Li'á rnia luhua nú mase fácil nú nitilu liñibe cuna iliulabe, luquelá nú rila tucu letra urre tucu punto nú nze'ta lu ley' Diose, hasta nu yalu lunú nzu nú aca. ¹⁹Enze'e bene enu la zucu' tucu bee mandamiento nú nze'ta lu ley cua', mase secalla nú la neca equie bee mandamiento cua', nu le'ca esquie tunu la zete'lla bee bene nú zucu'e, chequie li'illa lle'natsia aca neca equiella elurnibiya' Diose liñibe. Pero bene enu sucu' ye bee mandamiento nú nze'ta lu ley cua', nu sete'lla bee

bene nú zucu'e, li'illa acalla enu máse aca neca equie elurnibiya' Diose liñibe. ²⁰Enze'e nia luhua nú tunu la nehuañi nze'caláhua luquelá bee ulaxcuela enu reca ley cuna bee fariseo leca modo chu'uhua liñibe elurnibiya' Diose.

Rni Jesuse equie cuenda' nú rle bene
(Lc. 12:57-59)

²¹Li'ihua nediya'la'hua lunú uni Moisés lubee bene'ahua enu udetela: “La uti bene sa' bene, xne bene enu ruuti sa' yalalla castiya.” ²²Pero li'á nia luhua nú titse bene enu rana arqui'sa', challa lu usticia, nu le'ca titse bene enu rquiexuusa', rqui'ña nú dete bene ze'e lu usticia enu mase neca equie para nú chiulue lu cuenda'lla, le'ca titse bene enu rni bedichia' chi'qui' lusa' nzuche' nú challa lu quii ebila.

²³Enze'e, tunu nzeyulu u'na ru'u ecu'cu' Diose nu ullu'cu arqui'lu nú rlelu lu bene, ²⁴utsa'nasca' u'na'lu ze'e. Nu uquiatsalaxuhua arqui' sa'hua, che benchila'lu nu dete'lu u'na lu Diose.

²⁵Tunu nu' ti dete' cuenda li'ilu lu jueese, ante nú chahua lu jueese utsuche'xuhua nucua' diquila nú nu tiempo para nú la dete' cuendalla li'ilu lu jueese, xne tunu dete' cuenda benecua' li'ilu lu jueese che jueese dete'cuenda li'ilu lu policia para nú chalu ni'cu'. ²⁶Li'á nia lulu nú la chia'lu ni'cu' hasta nú ixiuxulu nzie' dimi nú nacu' jueese lulu.

**Uzete' Jesuse equie cuenda'
nula lu'cu niyu stucu una'a
enu la neca una'lla**

²⁷Li'ihua nediya'la'hua nú rni lu ley: “La lu'cu niyu stucu una'a

enu la neca una'i, nu la lu'cu una'a stucu niyu enu la neca niyu'nchu.” ²⁸Pero li'á nia luhua nú titse bene enu ri'yatsia lu tucu una'a nu rri'illa elliebacu' nú necha neca chenu ri'yalla lu tucu una'a, uri'ilalla dula arqui'lla lu cuenda'nchu che.

²⁹Tunu rri'i i'cululu chube nú rri'ilu dula, neca nze'calá nú uhuane nu utsi'quii istu. Xne neca nze'calá nú nitilu tucutsia i'cululu luquela nú diquinecalu chálu ebila. ³⁰Nu tunu rri'i yalu chube nú rri'ilu dula, uchie'cue nu utsi'quii istu. Xne neca nze'calá nú nitilu techu yalu luquela nú cha diquilu ebila.

**Uzete' Jesuse equie cuenda' nú
rle'esa' bene**

(Mt. 19:9; Mr. 10:11-12; Lc. 16:18)

³¹Le'ca rni lu ley: “Titse bene enu le'e una'a, rqui'ña nú hualla tucu ichi' elu rni nú ule'ella una'alla.”

³²Pero li'á nia luhua nú tunu tucu niyu le'e una'a, nula necane nú uri'i una'alla eluhuexe cuna stucu niyu, che le'ca li'illa uri'illa nú rlu'cu una'alla stucu niyu. Nu niyu enu xia tucu una'a enu lá acaxeelá ule'e niyu', rri'illa dula.

**Uzete' Jesuse nú la qui'ña nú
quie'elu Diose chenu xi rnilu
para nú chili arqui' bene**

³³Le'ca nediya'la'hua nú uni Moisés lubee bene'hua enu udetela: “Rqui'ña nú tsa'alu bene lunú unilla nú ri'illa chenu rquie'ella Diose nú ri'illa.” ³⁴Pero li'á nia luhua nula qui'ña nú quie'ehua diose'hua nú nihua ista liñibe ri'ya, para nú aca achee nú neli nú rnihua xne liñibe nzucu Diose, ³⁵nu ni' lu yuu,

xne necane elu nzu e'yanu, nu ni' eyeche Jerusalén, xne necane lachinu, li'inu enu neca arre enu mase rnibiya'. ³⁶Nu ni' la yala quie'e bene equie cuenda' lluca equie bene, xne leca modo nú ri'i bene nú aca nequichi urre aca naatsa ni' tucu ichia equiella. ³⁷Mejora uni'hua, “aahua” urre “a'a”, xne ye beela bee bedichia' nú nihua nze'tae lu cuenda' beze'lu.

**La guse'e bene nú necha neca cuna
nú necha neca**

(Lc. 6:29-30)

³⁸Le'ca ubene'la'hua bedichia' nú rni: “Enu lua i'cululu, le'ca ulua i'culu nze'e. Nu enu lua layalu, le'ca ulua laya nze'e.” ³⁹Pero li'á nia luhua: Nú la duse'ehua nú necha neca cuna nú necha neca, tunu nu' enu du' tucue xecalu chube, uzela nú du'llae stucu chú xecalu. ⁴⁰Tunu nu' bene enu rliunuu li'ilu para nú axilla lliaca'lu, uzela nú le'ca uya'lla chiamarra'lu. ⁴¹Tunu ti rri'i juersa li'ilu nú uya'lu stene'lla tucu kilometro, uya'e stucu kilometro. ⁴²Titse bene enu rnacu' tucu elietsa lulu, uri'i elietsa lulla, nula aca nechiqui'lu chenu xi ri'ñalla lulu.

Zeca bene bene enu rle lulla

(Lc. 6:27-28, 32-36)

⁴³Le'ca ubene'hua bedichia' nú rni: “Uzeca bene enu seca li'ilu nu uhuana arqui' bene enu rana arqui' li'ilu.” ⁴⁴Pero li'á nia luhua: Uzecahua bene enu rle luhua, nu ni'hua nú cha nze'ca lu cuenda' bene enu rnacu' nú la cha nze'ca lu cuenda'hua, uri'i nze'cahua lubee bene enu rana arqui' li'ihua,

una'cuhua lu Diose lu cuenda' bee bene enu riquichi'qui' li'ihua nu xitse rri'inu li'ihua. ⁴⁵Scua acahua lli'ñi Diose pa'hua enu nzucu liñibe, xne li'inu rri'inu nú rliñi bichia para yebee bene enu rri'i nze'ca nu cuna lubee bene enu la ri'i nze'ca, nu rri'inu nú rlaca quiu para bee bene enu rri'i nze'ca nu cuna lubee bene enu la ri'i nze'ca. ⁴⁶Xne tunu secatsiahua bee bene enu seca li'ihua, ¿xi ati'hua lu Diose che? Xne hasta bee bene enu rri'i cobre equie impuesto rri'i scua. ⁴⁷Nu tunu rnihua Diose lubee sa'tsiahua, lecaxi nú neca nze'ca rri'ihua, xne hasta bene enu la chulu Diose rri'i scua. ⁴⁸Aca nze'cahua tucu nú nze'ca pa'hua Diose enu nzucu liñibe.

**Xa ri'i bee bene elietsa
lu sa' bee bene**

6 Ubi'yahua nu la ri'ihua lunú neca nze'ca lubee bene para nú lañi'tsia beei lunú xa rri'ihua. Xne tunu rri'ihua scua, pa'hua Diose enu nzucu liñibe leca' xi liqui'nu luhua. ²Enze'e chenu rri'ilu elietsa lubee bene enu rqui'ña elietsa, la ti'chia dichia'lue para nú acabiya' bee bene nú xi rri'ilu, xi rri'i bee bene enu nequichia' liñibee indu cuna labe inziu para nú zucu' aya bee bene li'ibeei, pero li'á nia luhua nú nucua' neca premio' beei. ³Enze'e chenu rri'ilu elietsa lubee bene enu rqui'ña nú ri'ilu elietsa lu, la ti'chia dichia'lu nucua' lubee bene, pero ni' lu bene enu máse rquiete'lu la nilu nú rri'ilu. ⁴Mase neca nze'ca nú li'tsialu nediya'lu lunú rri'ilu, nu Pa'lu Diose enu

ri'ya lunú li'itsialu rri'ilu, li'inu liá liqui'nu premio nú rialalu.

**Uzete! Jesuse nú xa nacu' bee bene
lu Diose**

(Lc. 11:2-4)

⁵Nu chenu nacu'hua lu Diose, la ri'ihua xi rri'i bee bene enu nequichia', nú riu' arqui'beella nú nzulí beella rncu' beella lu Diose liñi bee indu, nu bee squiñia inziu para nú lañi' bee bene lunú rri'i beella. Xne li'á nia luhua lunú rri'i beella scua nucua' neca premio' beella. ⁶Pero li'ilu chenu nacu'lu lu Diose, uyu'u liñi ni'i, nu utsa'cu puerta nu una'cu' lu Diose enu nzu cuna li'ilu. Nu li'inu enu ri'ya lunú li'itsialu rri'ilu, li'inu lia liqui'nu premio nú rialalu.

⁷Chenu rncu'lu lu Diose, la nilu bee bedichia' nú la zibi' huaxi bese, xi rri'i bee bene enu la chulu Stichia' Diose. Xne seca beella nú tunu huaxi bese rni beella tucu bedichia' che máse ri'i caso Diose nú rni beella. ⁸La ri'ihua tucu nú rri'i beella, xne pa'hua Diose nediya'la' xi rqui'ñahua ante nú nacu'huane lunu. ⁹Enze'e chenu nacu'hua lu Diose uni'hua:

Pa Diose li'ilu enu nzucu liñibe,
Chiqui' riala nú lu'curu ula'na
lunú leelu.

¹⁰Nu ye'ta nú rnibiya'lu luru.

Nu aca tucu nú riu' arqui'lu lu
iliulabe, tucu nú reca liñibe.

¹¹Uli'qui' elubacu nú da'curu
yebichia.

¹²Nu uri'i perdona nú necha
rri'iru tucu nú le'ca rri'iru
perdona bee bene enu
necha rri'i luru.

¹³La zelalu nú ri'iru dula,
sino que uri'i elietsa luru para
nú la ri'i ye beenú necha
neca ana luru.

Xne li'ilu rnibiya'lu, nu li'ilu
rlu'culu poder,
poder nú leca xunga laxu.
Amén.

¹⁴Xne tunu rri'ihua perdona bee
bene enu rri'i nú necha necha luhua,
le'ca scua Pa'ahua Diose enu nzucu
liñibe ri'i perdona li'ihua; ¹⁵pero
tunu li'ihua la ri'ihua perdona bee
bene enu rri'i nú necha necha luhua,
le'ca la ri'i Diose Pa liñibe perdona
stulahua che.

**Chenu la acu bee bene equie nú
rlu'cu bene ula'na lu Diose**

¹⁶Chenu la acuhua equie nú
rlu'cuhua ula'na lu Diose, la ricu'
nehuanahua luhua tucu nú nehuana
reca lubee bene enu nequichia', rri'i
beei scua para nú lañi' bee bene
nú la acu beei equie nú rlu'cu beei
ula'na lu Diose. Pero li'á nia luhua
nú nucua'tsia necala premio' beei.
¹⁷Pero li'ilu, chenu la aculu equie
nú rlu'culu ula'na lu Diose, udi'ñi
nu uri'cu'che' equielu, ¹⁸para nú la
ri'i bee bene beya' nú la aculu lunú
rlu'culu ula'na lu Diose. Tucutsia Pa
Diose enu nzu cuna li'ilu li'itsianu
rialala acabiya'nu lunú rni li'itsialu,
nu li'inu liqui'nu premio nú rialalu.

Eluxene nú nu' liñibe

(Lc. 12:33-34)

¹⁹La la'nahua nú lu'cuhua huaxi
eluxene'hua lu iliulabe quie', elu
acu bee belala'e nu nitilue, nu chu'u
bee huana' cachi' bee. ²⁰Mejora
ucua'nahua nú ri'ihua ana eluxene

nú nu' liñibe, elu leca bee belala' para nú acune, nu le'ca lecaxi nitilu ze'e nu la chu'u bee huana' ze'e para nú cachi'i. ²¹Xne lu eluxene'hua ze'e nzu arquihua.

Ellie'e cuerpo'ahua

(Lc. 11:34-36)

²²T'culua'ahua neca xi neca ellie'e lu cuerpo'ahua, nu tunu rri'i bene lunú neca nze'ca, diqui cuerpo' bene nu' ellie'e, ²³pero tunu rri'ilu lunú necha neca, diqui cuerpo'lu neca xi neca nú nzu leta xcabe, iLeta xcabe nú naatsacabelí!

Diose nu dimi

(Lc. 16:13)

²⁴Ni' tucu moso' leca modo ri'i riña' lu chiucu patrón, xne leei lu tuculla, nu stuculla zecai, urre ri'i nze'cai lu tuculla, nu lu stuculla la ri'i nze'cai. Enze'e leca modo nú zibi'hua lu Diose nu tsu arquihua lu dimi.

Rriucu Diose bee bene'nu

(Lc. 12:22-31)

²⁵Li'á nia luhua: La chenu arquihua lunú xi acuhua cuna nú xi hue'hua para nú huañihua. Le'ca la chenu arquihua lu cuenda' xucuhua nú utuhua. Máse seca lunú nehuañi bene luquela nú racu bene, nu cuerpo' bene máse seca luquela xucu bene. ²⁶Bi'yacuruhua bee iñi enu rcuecu' liñibe. La du' beei nii nula ri'i beei ula'cu, nu la lu'cu beei elu chuche'e, pero Pa'ahua Diose enu nzucu liñibe lia rdete'nu nú racu beei. ¿Enzaláque' li'ihua nú másesca'lá secagua luquela bee iñi? ²⁷Nu le'ca esquie, ¿xie' lianú

máse chiqui' nzenu arquihua nú duñilahua lle'na la?

²⁸¿Xinu nzenu arquihua lunú xi utuhua? Ubi'yacuruhua xa rru'cu bee quie dañi, la ri'i bee riña' nu la reche'e xi utune, ²⁹pero ni' arre Salomón luye nú ñia utsuche'lla, né tsuche'lla tucu nú ñia nzuche' bee quie. ³⁰Nu tunu suche'e Diose bee huañi scua, nú nee nu'e dañi nu ye'e chiquine. ¡Enzaláque' li'ihua bee bene enu lle'natsia nzeli arqu' li'inu, nú la tsuche'nu li'ihua scua! ³¹Enze'e, la chenu' arquihua nú rnihua: “¿Xi da'cuahua nee? nu ¿xi diya'ahua? nu ¿xi utu'ahua?” ³²Xne bee bene enu la chili arqu' Diose nzenu arqu' ye bee nucua', pero li'ihua rlu'cuhua tucu pa'hua liñibe, nu li'inu nediya' nze'canu nú xi seca la'cha'hua. ³³Pero uzu'cu'hua nú rni Diose nu uri'ihua tucu nú niarqu'nu che liqui'nu ye nú seca la'cha'hua. ³⁴La chenu arquihua lu cuenda' bichia ye'e, xne ye ye'e nu' xi nzenu arqu' bee bene. Xne cada bichia nu' xi chenu arqu' bene.

La yala nú ze'ta bee bene sa'lla

(Lc. 6:37-38, 41-42)

7 Nu la ze'tahua sa'hua para nú lecati ze'ta li'ihua. ²Xne tucu nú se'tahua bee bene, le'ca scua ze'ta bee bene li'ihua, nu tucu nú rri'inuhua bee bene le'ca esquie ri'inu bee bene li'ihua. ³¿La ze'tahua beelá bee bene lunú lle'natsia rri'i beella, nzalá nú uyanu arquihua lunú llenelá falta nú rlu'cuhua? ⁴Nu tunu llenelá falta nú rlu'cuhua, ¿xa modo nihua lu stucu bene: “La neca nze'ca lunú rri'ilu scua?” ⁵Bene enu nequichia'!

Rluti uri'i tucu nú necane, che nu' modo nilu lu stucu bene la yala nú ri'ilu scua.

⁶La ri'ihua juersa bee bene enu la niarqui' ri'i caso lunú neca cuenda' Diose, para nú lecaxi ri'inu beei li'ihua. Xne tunu ri'ihua juersa beei, neca nucua' xi neca chenu si'qui bene tucu nú necachi neca lu nicu. Le'ca la ri'ihua juersa bee enu la yu' arqui' lunú neca cuenda' Diose. Xne tunu ri'ihua juersa beei, neca nucua' xi neca chenu rdu' bene tucu nú huaxi seca lu cuchi nu tse tsiaí equiee.

Na'cuhua lu Diose nu ula'nahua li'inu

(Lc. 11:9-13; 6:31)

⁷Una'cuhua lu Diose che liqui'nu lunu rnacu'hua lunu, ula'nahua li'inu nu che llela'hua li'inu, uzequiehua lunu che ri'i casonu li'ihua. ⁸Xne bene enu rnacu' nú rnacu' lunu yucu nze'ene, nu bene enu rla'na Diose llela' nze'e li'inu, nu bene enu rnacu' nu sequie lunu, ri'i casonu nze'e.

⁹¿Xie' nu' ta tucuhua enu dete' quiee acu endu' chenu nacu' endu'hua pa acu la? ¹⁰¿Urre xie' dete'hua tucu be'la acu endu'hua chenu rnacu' endu'hua bela acu endu'hua la? ¹¹Li'ihua enu la neca bene nze'ca, nu'luhua rdete'hua nú neca nze'ca lubee endu'hua, ienzaláquie' Pa'ahua Diose liñibe nú la liqui'nu nú neca nze'ca lubee bene enu rnacu' nucua' lunu!

¹²Uri'ihua lubee bene tucu nú niarqui'hua nú ri'ibeella luhua. Xne scua rnibiya' ley' Diose cuna ye beenú uquie'e bee profeta'nu.

Ru'u puerta nú nuxu' neca

(Lc. 13:24)

¹³Uyu'uhua ru'u puerta nú nuxu' neca. Xne ru'u puerta nú llene neca, nu inziu nú llene neca, nucua' neca nú ruya' li'ibee bene lu inziu nú necha neca, nu huaxi bee bene nza inziu cua'. ¹⁴Pero puerta nu inziu nú ruya' bee bene lu elunehuañi me'e nu nuxu'e, nu la huaxi bee bene enu nza inziu ze'e.

Equie cuenda' ndixi nú rayu lu aca esquie nu'lu bene xi acae

(Lc. 6:43-44)

¹⁵Le'ca ubi'yahua li'ihua lubee bene enu li'á rnibee nú neca beei profeta' Diose, nu rri'i beei nú lle'na arqui'beei, pero scuatsia rri'ibeei para nú sequienu beei bee bene, nu chiqui' necha rri'i beei. ¹⁶Pero li'ihua ri'ihua beya' nú xa neca bee bene cua', lunú rri'i beei rixiule'e núti neca beei, xne la ayu cuchiu' lube' lubee aca eche, nu la ayu higo lubee huañi eche. ¹⁷Enze'e ye bee aca nze'ca rayu ndixi nze'ca lu. Nu bee aca nu la neca aca nze'ca la ayu ndixi nze'ca lu. ¹⁸Leca modo nú ayu ndixi núla neca nze'ca lu aca nú neca nze'ca, le'ca esquie la ayu ndixi nú neca nze'ca lu aca núla neca nze'ca. ¹⁹Ye bee aca nú rayu ndixi nu la zibi' lu, rrecu'e nu riu'e lu quii. ²⁰Scua ri'ihua beya' ti neca beella equie nú rri'i beella.

La chu'u ye bee bene liñibe elurnibiya' Diose

(Lc. 13:25-27)

²¹Laca ye bee bene enu rni lua: “Detá, Detá”, chu'u liñibe elurnibiya'

Diose, sino que chu'utsia bee bene enu sucu' lunú rni Diose Pa liñibe. ²²Bichia ze'e huaxi bee bene ni lua: “Detá, Detá, li'iru uniru lunú leelu lubee bene, nu equie nú leelu uluaru bee benechiqui' arqui' bee bene nu equie nú leelu uri'iru huaxi bee milagro.” ²³Pero chequie cuaquia lubeei: “Leca xunga uyulua li'ihua, ulluna'hua lua, li'ihua bee bene enu necha uri'i.”

Ejemplu' chiucu simiendu

(Lc. 6:47-49; Mr. 1:22)

²⁴Enze'e, bee bene enu riene' stichia'a nu sucu'e, necalla xi neca tucu bene enu netsiña rreche' ni'i equie quiee. ²⁵Añinzuca nú rlaca quiu nu rlaca huaxi inza riu'u tetsu' ni'i ze'e nu reca bii, pero lá rila ni'i ze'e xne nchiucu' simiendu'e equie quiee. ²⁶Pero bene enu riene' nú rnía nu la zucu' stichia'a, li'illa necalla xi neca tucu bene enu netundu enu ureche' ni'i lu eyuxi. ²⁷Chenu rlaca quiubi, nu rlaca huaxi inza riu'u tetsu' ni'i ze'e, che uluquie ni'i ze'e. ¡Nu urilalii!

²⁸Chenu ulaxu nú uni Jesuse scua lubee bene ze'e, chiqui' uyanu arqui' ye beei xneca uzete'nu li'ibeei, ²⁹xne sete'nu beei xi sete' tucu bene enu chiqui' rlu'cu poder, nu la zete'nu xi sete' bee ulaxcuela enu reca ley.

Uriyeca Jesuse tucu bene enu seca elichia nú lee lepra

(Mr. 1:40-45, Lc. 5:12-16)

8 Chenu ulaca Jesuse equie tucu dañi, huaxi bee bene uyanala li'inu. ²Nu che uyabica tucu bene

enu seca elichia nú lee lepra lunu, che utsu lliquii lunu nu uni lunu:

—Detá, tunu chiu'u arqui'lu, nu' beya' riyecalu li'á.

³Chequie uricu' Jesuse yanu equie niyu ze'e nu uninu:

—Chiu'u arquia uyeca' nee.

Chenu uni Jesuse scua, hora ze'e uyeca' bene ze'e nu leca' xi nalla.

⁴Chequie uni Jesuse lulla:

—Uzu'cu' diaca nú nía lulu, la ixiule'elu lu ni'tucu bee bene nú uyeca'la'lu. Uquia lube'tsia li'ilu lu ule'ya, nu uya' u'na lu Diose tucu nú unibiya' ley' Moisés, para nú lañi' bee ule'ya nú uyeca'lu.

Uriyeca Jesuse moso' capitán Roma

(Lc. 7:1-10)

⁵Hora nú nzechu'u Jesuse eyeche Capernaum, uriña tucu capitán Roma lunu nu uzequiella lunu, ⁶nu unilla lunu:

—Detá, mosoa nuxu nía riti nu leca' modo tsulii, chiqui' nehuana secái nú ritii.

⁷Nu uninu lu capitán:

—Li'á nzeriyecalla.

⁸Chequie uni capitán ze'e lunu:

—Detá, la yala nú chu'ulu nía. Pero uni'tsia tucu bedichia' desde ca'a para nú yeca' mosoa, ⁹xne le'ca sucua nú rni bee bene enu rnibiya' lua, nu le'ca rlu'cua nú rnibiya'a lubee sundado. Chenu nía lu tucu beei nú cha nze'e elu cha nze'e chu nza nze'e che, nu chenu nía lu stucui nú ye'ta nze'e lua chu nze'ta nze'e che, nu chenu rnibiya'a lu mosoa nú xi ri'i nze'e, rri'i nze'ene.

¹⁰Chenu ubene' Jesuse nú uni capitán ze'e scua, chiqui' uyanu

arqui'nu nu uninu lubee bene enu nzenala li'inu:

—Li'á nia luhua nú ni' luye bee eyeche Israel lasca' chechu'a ni' tucu bene Israel enu chiqui' nzeli arqui' Diose tucu nú nzeli arqui' benequie' Diose. ¹¹Li'á nia luhua nú huaxi bee bene diqui lu iliulabe, yala cua'anu Abraham, cuna Isaac cuna Jacob liñibe elurnibiya' Diose. ¹²Pero bee bene Israel enu necadichia' nú riala nú chu'u liñibe elurnibiya' Diose li'ibeei riala chue beei eli'ya' elu natsacabe, nu ze'e una'beei cuna nú acuxa' laya beei.

¹³Chequie uni Jesuse lu capitán ze'e:

—Uquia ni'lu, nu aca tucu nú uchili arqui'lu.

Nu hora ze'e uyeca' moso' capitán ze'e.

Uri'yeca Jesuse suegra' Pedro

(Mr. 1:29-31; Lc. 4:38-39)

¹⁴Chenu uya Jesuse ni' Pedro, ulañi'nu nú nchiucu' suegra' Pedro lu luna seca xle. ¹⁵Che una'tsenu yalla, nu chu uchiu'u xle nú secalla, che uzetella nu udete'lla nú udacu beella.

Uriyeca Jesuse huaxi bee bene enu riti

(Mr. 1:32-34; Lc. 4:40-41)

¹⁶Chenu uyu'u rula', uriñayu bee bene huaxi bee bene enu nu' benechiqui' arqui' lu Jesuse, nu cuna tucu bedichia' uluanu benechiqui' arqui'beella, nu le'ca uriyecanu ye bee bene enu riti. ¹⁷Scua unga para nú uyalu tucu nú uni profeta Isaías chenu unilla: “Li'inu uyucunu elichia

nú se'ca'ahua nu unguya'nu nú nehuana se'ca'ahua.”

Bee bene enu niarqui' nú chequiee Jesuse

(Lc. 9:57-62)

¹⁸Chenu ulañi' Jesuse nú huaxi bee bene rriña lunu, che unibiya'nu lubee bene'nu nú detenunu beella stucu chu ru'u inzatu' ze'e. ¹⁹Nu che uyabica tucu ulaxcuela enu reca ley' Moises lunu, nu unilla lunu:

—Maestro, niarquia nú nzelanala li'ilu catse elu nzalu.

²⁰Che uni Jesuse lulla:

—Bee betsa rlu'cu beef' iliu'u nú neca ni'i beef', nu bee iñi rlu'cu beef' exlia'tse' beef'. Pero li'á Bene enu uxella Diose ni' elu quienchiña'a equiea la lucua.

²¹Nu stucu bene'nu enu nzenala li'inu uni lunu:

—Detá, uzela nú bi'ya paa hasta nú atinu.

²²Pero uni Jesuse lu bene ze'e:

—Utequie li'á, nu uzela nú bee bene enu la niarqui' ye'tanala li'á, cachi' bee nze'e pa'lu chenu atilla.

Uzucu' bii cuna inzatu' nú uni Jesuse

(Mr. 4:35-41; Lc. 8:22-25)

²³Chequie uyu'u Jesuse liñi barco cuna bee bene'nu, ²⁴nu diquila nú rdete beella lu inzatu' ze'e, uquixie unga tucu bii juerte nu uyu'u inza liñi barco. Pero ra'tse Jesuse nuxu liñi barco ze'e. ²⁵Che uya cua'ñi bee bene'nu li'inu nu uni beella lunu:

—iDetá, utsila'a lia'ahua! iXne nze chatse'la'ahua lu inza!

²⁶Che ucuaqinu lubeella:

—¿Xiquie nú chiqui' xiquihua?
iXinu lle'natsia nzeli arqui'hua li'á!

Chequie uzetenu nu unibiya'nu
nú acaxe bii cuna inzatu' nu hora
ze'e ungaxeli ye bee nucua' ²⁷Nu
chiqui' uyanu arqui' bee bene'nu nú
unibeella lu sa' beella:

—¿Ti neca benequie'?, nú hasta bii
cuna inzatu' sucu' nú rni nucua'.

**Uhua Jesuse bee benechiqui' arqui'
tucu bene Gadara**

(Mr. 5:1-20; Lc. 8:26-39)

²⁸Chenu uriña Jesuse stucu
chu inzatu' lu iliu' bee bene
Gadara, che chiucu bee niyu enu
seca ichia' benechiqui' uchiu'u
bee liñi pandiuñi nu uriña beei
lunu. Nu rucu beei chiqui' nelachi
bee, nu hasta nú lecati dete inziu
elu nucua'a beei. ²⁹Nu juerte
urixialibeei nú unibeei:

—¿Xinu ri'chialu li'iru Jesuse
Lli'ñi Diose? ¿Xie' uriñalu ca'a para
nú ri'ilu nú zecaru castiya'ru chenu
lasca' riña tiambu nú acane scua la?

³⁰Axu enza ze'e nucua'a huaxi
bee cuchi racu, ³¹chequie uziquie
bee benechiqui' ze'e lu Jesuse nú
unibeei lunu:

—Tunu hualu li'iru arqui' bee
benequie', ala' zelalu nú chu'uru
arqui' bee cuchi cua'.

³²Che uni Jesuse lubeei:

—Uyu'uhua che.

Chequie uchiu'u bee benechiqui'
arqui' bee bene ze'e nu uyu'u
bee arqui' bee cuchi ze'e. Che ye
bee cuchi ze'e uyecaxu'u beei nu
utsundiqui beei ru'u be'e hasta lu
inzatu', nu ze'e ungutí beei.

³³Nu bee bene enu rriucu bee
cuchi ze'e, nzexu'u beei, nu chenu

uriña beei eyeche ze'e udixiule'e
bee lubee bene ye nú unga ze'e,
cuna lunú ulle'ca bee bene enu
uyu'u benechiqui' arqui'. ³⁴Chequie
uchi'u ye bee bene eyeche ze'e uya
elu nzu Jesuse, nu chenu ulañi' beei
li'inu, uziquie beei lunu nú chiu'unu
lu iliu ze'e.

**Uriyeca Jesuse tucu bene enu neati
cuerpo'**

(Mr. 2:1-12; Lc. 5:17-26)

9 Chequie uyu'u Jesuse liñi
barco nu udetenu stucu chu
inzatu' nu uriñanu elu neca lachinu.
²Ze'e uriñayu bee bene tucu bene
enu neati cuerpo' nchiucu' lu
camiya lunu. Chenu ulañi' Jesuse
nú nzeli arqui' beei li'inu, che uninu
lu bene enu riti ze'e:

—Du' ana arqui'lu endua. Uri'ila
perdona stulalu.

³Che chiucu chuna bee ulaxcuela
enu reca ley' Moisés uri'i elliebacu':
“Benequie' necha rni lu cuenda'
Diose.” ⁴Nu lunú nediya'la' Jesuse
xi rri'i beella elliebacu', uninu
lubeella:

—¿Xinu necha rri'ihua elliebacu'?

⁵¿Ta nú mase neriña' nú aca, nú
nia: “Uri'á perdona stulalu”, urre
nú nia: “Uzetee nu utse'”? ⁶Pero
nee lubea luhua nú li'á Bene enu
uxe'la Diose rlu'cua nú rnibiya'a lu
iliulabe para nú ri'á perdona stula
bee bene.

Chequie uninu lu bene enu riti
ze'e:

—Uzetee una'tse camiya'lu nu
uquia'a ni'lu nee.

⁷Che chu uzete bene ze'e nu
nzialla enza ni'lla. ⁸Chenu ulañi'
bee bene ze'e nucua' chiqui'

ulliqui beei, nu uquixie unibeei bedichia' nze'ca lu Diose, equie nú udete'nu poder nú rlu'cunu lubee bene.

Ubixia Jesuse Mateo

(Mr. 2:13-17; Lc. 5:27-32)

⁹Chenu uchiu'u Jesuse ze'e nu nzanu, che ulañi'nu tucu bene enu lee Mateo, nzuculla elu rri'illa cubre impuesto, nu uni Jesuse lulla:

—Utequie li'á.

Che chu utsuli Mateo nu chu nzequiella li'inu.

¹⁰Chenu nzucu Jesuse lu mexa racu eta ni' Mateo, cuna beelá bee bene enu rri'i cubre impuesto nu cuna beelá bee bene enu la nehuañi tucu nú rnibiya' ley nú sucu' bee bene Israel, ye beella nucua'anu beella Jesuse lu mexa cuna bee bene'nu. ¹¹Pero chenu ulañi' bee fariseo nucua', unidichia' beei lubee bene'nu:

—¿Xinu racunuu maestro'hua bee bene enu rri'i cubre impuesto nu cuna bee bene enu rlu'cu dula?

¹²Chenu ubene' Jesuse nú unibeei scua, uninu lubeei:

—Bee bene enu la aca riti, la qui'ña bee nze'e doctor. Sino que bee bene enu riti bee nze'e rqui'ña doctor. ¹³Uquiahua nu ze'tehua xi rni lu ichi' Stichia' Diose elu rni: “Niarquia nú hua'a arqui'hua bee bene, luguare nú rliqui'hua nañi u'na lua.” Xne lá yelaa lubee bene enu la lu'cu dula sino que uriña lubee bene enu rlu'cu dula para nú che'e arqui'bee lu stula beei.

Unedichia' bee bene lu Jesuse equie nu la acu bene lunú rlu'cu bene ula'na lu Diose

(Mr. 2:18-22; Lc. 5:33-39)

¹⁴Chequie uriña bee bene' Juan Bautista lu Jesuse nu unidichia' beella lunu:

—¿Xiquie nú li'iru cuna bee fariseo, la da'curu huaxi bese equie nú rlu'curu ula'na lu Diose, nu bee bene'lu la ri'i scua?

¹⁵Che ucuquie Jesuse lubeei:

—Elu xia tucu bene, ¿xie' nu' modo nú nehuana tsu arqui' bee bene enu nezene' ze'e chenu nzu bene enu xia ze'e cuna li'ibeella la? Pero riña bichia chenu leca' bene enu xia ze'e. Chee si dete' bee bene' bene enu xia bichia nu la acu beella.

¹⁶Lecati quiela' tepedaso laquie cuqui lu tucu laquie uxu, xne riu'be laquie cuqui, nu ri'i nucua' nú tsa laquie uxu. ¹⁷Le'ca la chu'u biñu cuqui liñi iti uxu, xne tsa iti uxu, nu che nitilu biñu cuna iti. Enze'e rqui'ña nú chu'u biñu cuqui liñi iti cuqui para nú la nitilu ni'tucue.

Uriyeca Jesuse endu' Jairo cuna una'a enu uti'ya ru'u xucunu

(Mr. 5:21-43; Lc. 8:40-56)

¹⁸Chenu rnisca' Jesuse scua, uriña tucu bene enu rnibiya' liñi indu' bee bene Israel lunu, nu utsulliquilla lunu nu unilla lunu:

—Penatsia unguti endua, pero tunu ye'talu nu ricu'lu yalu equienchu huañi zecanchu che.

¹⁹Chequie nzenu Jesuse li'illa, cuna bee bene'nu. ²⁰Chequie tucu una'a enu riti, nu ungala chi'chiucu lana nú rlaca rene, uyabica di'chi

Jesuse nu uti'nch'u yanchu ru'u xucunu, ²¹xne uri'inchu elliebacu': "Tunu ti'tsia yaa ru'u xucunu, yecaa che." ²²Pero ubelleta Jesuse, nu ubi'yanu lu una'a ze'e nu uninu lunchu:

—Du' ana arqui'lu endua uyeca'la'lu xne uchili arqui'lu li'á. Nu hora ze'e uyeca'li'nchu.

²³Chenu uriña Jesuse ni' bene enu rnibiya' liñi indu' bee bene Israel ulañi'nu nú nucua'ala bee musica ze'e para nú nzeachi' endu'lla, nu chiqui' runa'nuu bee bene li'inchu, ²⁴chequie uni Jesuse lubee bene ze'e:

—Uchiu'uhua ca'a xne lá ati endu' una'a quie!, ra'tse tsianchu.

Chequie ulli'chinuu bee bene ze'e li'inu, ²⁵pero unibiya'nu nú chiu'u bee bene ze'e ele'ya!, nu chu uyu'unu liñi ni'i nu una'tsenu yanchu, nuchu uzeteenchu. ²⁶Nu ye bee luhuare enza ze'e uri'chialetse bedichia' lunú uri'inu.

**Uriyeca Jesuse chiucu
bene enu niquie'lu**

²⁷Chenu uchiu'u Jesuse ze'e, chiucu bene enu labi'ya nzenala li'inu, nu urixialibeei nú rnibeei:

—iJesuse, lliana' David uhua'a arqui' li'iru!

²⁸Chenu uyu'u Jesuse liñi ni'i, nu uyabica rucu bee bene ze'e lunu, nu unidichia'nu lubeei nú uninu:

—¿Nzelí arqui'hua nú acaa riyecaa i'culuhua la?

Che ucuauqui beei lunu:

—Aahua', nzeli arqui'ru detá.

²⁹Nu chu, uti' Jesuse yanu i'culu beei nu uninu lubeei:

—Aca Tucu nú nzeli arqui'hua.

³⁰Che uye'e i'culu beei. Nu uninu lubeei:

—La ixiule'etsiahua nucua' lu ni' tucu bene.

³¹Pero uchiu'utsia beei lunu, chu udixiule'e beei lubee bene diqui lu iliu ze'e nú uriyeca Jesuse beei.

Uriyeca Jesuse tucu bene enu la nilí

³²Chenu nziatsia bee bene enu uriyeca Jesuse i'culu, che uriñayu bee bene tucu bene enu la ni nchiñi benechiqui' arqui' lunu. ³³Nu chenu uhua Jesuse benechiqui' arqui' bene enu la ni ze'e, che uquixiei uni. Che chiqui' nzenu arqui' bee bene ze'e nú unibeei:

—iLeca xunga ulañi'ahua sa' milagro quie! leta bee bene Israel!

³⁴Pero uni bee fariseo:

—Benequie' rlua benechiqui' arqui' bee bene cuna poder beze'lu enu rnibiya' lubee benechiqui'.

Uhua'a arqui' Jesuse bee bene

³⁵Uya Jesuse lu ye bee eyeche llene cuna lu ye bee eyeche lla'na, nu cada tucua lubee eyeche cua' uyu'unu liñi bee indu uzete'nu bedichia' nze'ca' Diose lubee bene, nu uninu lubeella nú xa neca elurnibiya' Diose, nu uriyecanu elu rcu cuerpo' bee bene, nu cuna bee bene enu seca yelu clasia' elichia.

³⁶Chenu ulañi' Jesuse bee bene añi cua' uhua'a arqui'nu li'ibeella, xne nehuana nzu arqui'beella, nu lixiu nzu arqui'beella, nu nucua'a beella xi nucua'a bee sanchi enu leca' ti ri'i ucu. ³⁷Chequie uninu lubee bene'nu:

—Li'á nia nú nu' huaxi bee bene enu niarqui' yene' bedichia' nze'ca'

Diose, pero leca huaxi bee bene enu ixiule'e lubee bene. ³⁸Enze'e una'cuhua lu Dios para nú xe'lanu huaxi bee bene enu ixiule'e stichia'nu lubee bene.

Ucañi Jesuse chi'chiucu bee bene'nu

(Mr. 3:13-19; Lc. 6:12-16)

10 Chequie ubixia Jesuse chi'chiucu bee bene'nu, nu udete'nu poder lubeella para nú hua beella bee benechiqui' arqui' bee bene nu riyeca beella bee bene enu rcuu catse cuerpo', cuna ye clasia' elichia nú seca beei.

²Bee benequie' neca lu chi'chiucu apóstol' Jesuse:

Rluti,
Simón enu le'ca lee Pedro,
nu bichilla Andrés;
nu Jacobo cuna Juan, rucu
benequie' neca lliana'
Zebedeo.

³Nu le'ca ucañinu Felipe,
Bartolomé,
Tomás cuna
Mateo enu uri'i cubre bee
impuesto;
Jacobo lliana' bene enu lee Alfeo;
nu Lebeo enu le'ca lee Tadeo.

⁴Nu cuna Simón enu ullutse leta
tucu partido nú lee cananista;
nu Judas Iscariote enu udete'
cuenda Jesuse lubee bene nú
ungutinu.

**Uxe'la Jesuse bee apóstol'nu
chetixiule'e beella stichia'nu**

(Mr. 6:7-13; Lc. 9:1-6)

⁵Ante nú xe'la Jesuse chi'chiucu
bee apóstol'nu lubee bene uninu
lubeella:

—La chuehua elu nucua'a bee bene enu la neca bee bene Israel ni' lubee eyeche lu iliu Samaria; ⁶sino que uquiahua lubee bene Israel enu la chenala inziu' Dios. ⁷Uquiatixiule'ehua lubeella nú nze'ta riñala bichia nú nibiya' Dios. ⁸Riyecahua bee bene enu riti, nu ri'ihua nú huañi zeca bee bene enu ungoti, riyecahua bee bene enu seca elichia nú lee lepra, huahua bee benechiqui' arqui' bee bene. Tucu nú lia uliquia poder cua' luhua, le'ca chenu riyecahua bee bene la ri'ihua cobre.

⁹'La uya'hua cobre ni' oro ni' plata. ¹⁰Uya'hua biti, nu la uya'hua xucuhua nú che'ehua, nu la uya'hua steinza lucuhua, nula uya'hua xcachua, xne bee bene enu rri'i riña' riala nú ati'lla nú aculla.

¹¹'Chenu riñahua tucu eyeche llene urre tucu eyeche lla'na, ze'e cua'nahua ni'i tucu bene nze'ca ya'nahua nu uya'nahua ze'e hasta nú chiu'uhua eyeche ze'e. ¹²Nu chenu chu'uhua liñi ni'i bene ze'e, uni'hua Dios lubee bene enu nucua'a ze'e.

¹³Tunu bee bene liñi ni'i ze'e riala nú nzuxe arqui'beella, ria'na nú nzuxe cua' arqui'beella, pero tunu lacane para li'ibeella, benchila'e cuna li'ihua che. ¹⁴Nu tunu la yucu arqui' bee bene li'ihua tucu eyeche urre tucu ni'i, uchiu'uhua eyeche ze'e urre ni'i ze'e, nu ri'quihua yuube'cha' nú nu' cuchiu'hua, xi neca tucu seña nulá zela beella ayene' beella bedichia' nú unihua. ¹⁵Xne li'á nia luhua nu chenu hualu Dios lu cuenda' yeebe bene, masesca'la zeca bee bene eyeche cua' castiya luquela bee bene eyeche Sodoma cuna Gomorra.

**Nze'ta nú nehuana zeca
bee bene' Diose**

¹⁶Le'ca uni Jesuse lubee bene'nu: —iBi'yacuruhua! Li'á xe'la li'ihua lubee bene xi neca chenu nza bee sanchi leta bee bichiuu. Enze'e aca netsiñahua xi netsiña bee be'la nu aca lle'na arqui'hua xi neca bee paloma. ¹⁷Ubi'yahua li'ihua xne dete' cuenda bee bene li'ihua lubee usticia nu zete'che' beei li'ihua liñi bee indu. ¹⁸Nu hasta uya' beei li'ihua lubee gobernador nu lubee arre equie nú nzeli arqui'hua li'á, pero scua nu' modo ixiule'ehua stichia'a lubeei, nu lubee bene enu la neca bee bene Israel. ¹⁹Nu chenu dete' cuenda bee bene li'ihua lubee usticia, la chenu arqui'hua xi nihua urre xa nihua lubeella; xne hora nú nihua Diose liqui' bee bedichia' nú riala nihua. ²⁰Xne laca li'ihua enu ni. Espíritu Santo' Diose Pa liñibe neca enu liqui' bedichia' nú nihua. ²¹'Enta bichia nú dete' cuenda bee bene bee bichilla nú ati bee nze'e, nu le'ca dete' cuenda bee paa bee endu'lla para nú ati beei. Nu le'ca enta bichia nú ri'i condra bee endu' bee uzana' beei nu hasta nú dete' cuenda beei li'ibeella nú ati beella. ²²Nu chana arqui' ye bee bene li'ihua equie nú necahua bee benea. Pero bee bene enu tsuta' arqui' lunú nzeli arqui' li'á diqui tiambu nú nehuañilla, tsila'a Diose bee nze'e. ²³Chenu ri'i bee bene nú nehuana zecahua lu tucu eyeche equie nú necahua bee benea, uquiahua stucu eyeche, xne li'á nia luhua nu lasca' laxu chuehua lu yebee eyeche Israel chenu riña li'á Bene enu uxe'la Diose.

²⁴'Ni' tucu bene enu sete' la neca equielálla lu bene enu sete' li'illa, nu le'ca ni' tucu moso' la neca equielá lu patron'i. ²⁵Bene enu sete' rqui'ña nú aca conformella nú recalla tucu nú reca ulaxcuela'lla, nu tucu moso' rqui'ña nú aca conformei nú necai tucu nú neca patron'i. Nu li'á enu rnibiya'a luhua rni bee bene nú necaa beze'lu, ¿enzaláquie' li'ihua nú necahua bee benea ti ni bee bene nú necahua?

Ti rqui'ña nú lliqui bee bene

(Lc. 12:2-9)

²⁶'Enze'e la lliquihua bee bene. Xne ni' tucu beenú a'chi' neca la ya'nane scuatsia sin nú acabiyae, riña bichia nu acache bee nucua', le'ca ni' tucu beenú a'chi neca rri'i bee bene la ya'nane scuatsia, riña bichia nú acabiya yebee nucua'. ²⁷Lunú a'chi'tsia rnia luhua, uni'huane lu yebee bene nu lunú rnia a'chi diacahua. Juerte uni'huane. ²⁸La lliquihua bee bene enu niarqui' uti li'ihua. Pero leca modo utilla espíritu'hua. Mejora ulliquihua Diose, xne li'inu rlu'cunu poder nú nitilunu espíritu'hua cuna cuerpo'hua ebila. ²⁹'¿La huaxi seca bee iñi? Pero ni' tucu beé' la zana' beé' lu yuu tunu la zela Pa'ahua enu nzucu liñibe nú acane scua. ³⁰Nu li'ihua hasta yebee ichia equiehua nebacu' Diose. ³¹Enze'e la lliquihua. Xne mase secahua luquela nú seca huaxi bee iñi.

**Bee bene enu la tsacu' arqui' nu neca
bene' Jesuse**

(Lc. 12:8-9)

³²'Titse bee bene enu ni nú neca benea lu beelá bee bene, le'ca esquie li'á nia nú neca beella bee benea ante lu Diose Pa liñibe.

³³Pero bee bene enu ni nú laca bee benea lu beelá bee bene, le'ca esquie li'á nia nú laca beella bee benea ante lu Diose Pa liñibe.

**Rle'esa' bee bene equie cuenda'
Jesucristo**

(Lc. 12:51-53; 14:26-27)

³⁴La ri'ihua elliebacu' nú tia uriña lu iliulabe para nú ri'á nú aca tucunecatse bee bene lu sa'beei, sino equie nú chili arqui' bee bene li'á liunu sa'beei. ³⁵Bee pa liunu cuna bee endu'lla, nu bee naa liunu cuna bee xinchiu'cu nu bee llixi liunu suegra'. ³⁶Nu bee bene liñi tucu ni'i le'catsia li'ibeella chana arqui' sa' beella.

³⁷Bene enu seca pa' nu na' masesca'lá luquela li'á, leca modo aca nze'e benea, le'ca esquie enu mase seca endu' urre xinchiu'cu luquela li'á, le'ca leca modo aca nze'e benea. ³⁸Bee bene enu niarqui' ye'ta quie li'á pero la niarqui' nú nehuana zeca equie cuenda' li'á, leca modo aca bee nze'e bee benea. ³⁹Bene enu maselá seca elunehuañi nú rlu'culla lu iliulabe quie' enta bichia nú laxu nucua'; pero bene enu ati equie cuenda' li'á, lu'culla elunehuañi lu Diose.

Nu' xi ati' bee bene' Diose

(Mr. 9:41)

⁴⁰Bee bene enu ri'i caso li'ihua, rri'i caso bee nze'e li'á; nu bee bene enu rri'i caso li'á le'ca rri'i caso bee nze'e Pa liñibe enu uxe'la li'á. ⁴¹Le'ca bee bene enu rri'i caso tucu profeta equie nú neca profeta quie' enu uxe'la Diose, le'ca ati'lla

premio nú ati' profeta lu Diose. Nu bene enu ri'i caso tucu bene enu rri'i nze'ca, le'ca iguale ati'lla premio nú ati' bene enu rri'i nze'ca lu Diose. ⁴²Nu titse bee bene enu liqui' masia tucu basu inza luhua lunú necahua bee benea, li'á nia luhua nú dete' Diose premio lubee bene ze'e.

**Uxe'la Juan Bautista bee bene'lla lu
Jesuse**

(Lc. 7:18-35)

11 Chenu ulaxu nú unibiya' Jesuse lu chi'chiucu bee bene'nu nú xi che ri'i beella, che uchiu'unu nze zete'nu nu nze tixiule'enu Stichia' Diose lubee bene lubee eyeche nú nchiucu' lu iliu ze'e.

²Nu chenu nchiñi Juan Bautista ni'cu' ubene'lla luye nú rri'i Jesuse. Che uxe'lalla chiucu chuna bee bene'lla, ³para nú che nedichia' beella lu Jesuse:

—¿Li'ilu necalu Cristo enu nzu nú nze'ta la, urre lluaquieeru stucu enu enta la?

⁴Che ucuauqui Jesuse lubeella: —Uquia tixiule'ehua lu Juan Bautista lunú rlañi'hua nu lunú riene'hua. ⁵Udixiule'ehua lulla nú rlañi'la' bee bene enu nequie'lu nu bee bene enu necuxu see la bee nze'e, nu le'ca uyeca'la' bee bene enu seca elichia nú lee lepra, nu bee bene enu nenguata' riene'la', nu bee bene enu unguati uhuañi zeca bee nze'e, nu bee bene enu seca elitsi riene'la' bedichia' nze'ca' Diose nú tsila'a li'ibeei. ⁶Ñia neca lu cuenda' bee bene enu la chiecu' arqui' nú nzeli arqui' li'á.

⁷Chenu nziue bee bene' Juan enu uya lu Jesuse, che uquixie Jesuse nú uninu lubee bene ze'e equie cuenda' Juan, nu uninu lubeella: —¿Ti uya bi'yahua lu yuu achi elu la nucua'a bee bene? ¿Ti secahua nú neca bene enu uya bi'yahua, tucu etaa nú rcuñi bii la? ⁸Urre ¿xa naa bene enu uya bi'yahua? ¿Xie' uya bi'yahua tucu bene enu nutu laquie fiñu la? Li'ihua nediya'hua nú bee bene enu rutu laquie fiñu liñi palacio nucua'a beella. ⁹¿Ti uya bi'yahua che? ¿Uya bi'yahua tucu profeta la? Neli nú scua necane, pero masesca'lá neca equiella luquela tucu profeta. ¹⁰Equie cuenda' Juan quie' rni lu ichi' Stichia' Diose elu rni:

Xe'laa tucu benea cha rluti lulu, para nú reche'lla inziu'lu.

¹¹Li'á nia luhua nu luye bee bene enu nucua'a lu iliulabe lá chu'u ni' tucu bee bene enu masesca'lá neca equie tucu nú neca equie Juan Bautista. Pero bene enu menola neca equie liñibe elurnibiya' Diose nze'e mase neca equie luquela Juan.

¹²Desde bichia nú ube'ta Juan Bautista nu hasta nee, huaxi bee benechiqui' rcua'na xa modo chu'u elurnibiya' Diose. Nu bee bene enu neli rcua'na nú chu'u elu rnibiya'nu, li'ibeella neca beella enu chu'u ze'e. ¹³Ley nú udete' Diose lu Moisés cuna yebee profeta uদিနီး' beella nú xi nze'ta aca, hasta bichia nu uriña Juan, ¹⁴nu tunu li'ihua chili arquihua nú nia luhua, nú Juan neca profeta Elías enu uni bee profeta nú riña. ¹⁵Titse bee bene enu niarqui' nú yene' nú rnia, quie'e diaca nze'e.

¹⁶¿Xa nia luhua nú xa neca bee bene enu nehuañi lu iliulabe quie' nee? Li'á nia luhua nú neca beei xi neca bee endu' enu rcua'a ru'u i'ya rita nu rixiali beei lusa' beei, nú rnibeei: ¹⁷“Ungularu chí para nú ye'ehua nu né ye'ehua, nu le'ca ungtularu canción nú nehuaña se, nu né una'hua.” ¹⁸Scua necahua xne uriña Juan Bautista nú lá aculla nu le'ca la hue'lla viñu nu rnihua nú nchiñi benechiqui' arqu'i'la. ¹⁹Neequie uriña li'á Bene enu uxe'la Diose, nú racua nu rue'a biñu, nu rnihua nú racuxeta'a nu riu' arquia rue'a viñu nu rquietea bee bene enu rlu'cu dula nu cuna bee bene enu rri'i cubre impuesto para Roma. Pero yebee bene rri'i beya', li'ibeella nediya' beella nú neca nze'ca lunú rri'i Diose.

Bee eyeche nú la niarqui' zucu' Stichia' Diose

(Lc. 10:13-15)

²⁰Chequie uquixie Jesuse nú uqui'ya'nu bee bene bee eyeche elu mase uri'inu bee milagro, xne né tsana' arqu'i'beei stula beei. Nu uninu lubeei:

²¹—iCue'hua bee bene Corazín! iCue'hua bee bene Betsaida! Xne tunu eyeche Tiro cuna eyeche Sidón a aca bee milagro nú unga lachihua, xi tiembula a tsana' arqu'i' bee bene ze'e stula beei, nu le'ca a utu beei laquie natsa nu a tiqui beei tii equie beei, xi neca tucu seña nú lube' nú nehuaña nzu arqu'i'beei. ²²Pero li'á nia luhua nú bichia chenu laxu iliulabe, maselá juerte castiya zecahua luquela nú zeca bee bene eyeche Tiro cuna eyeche Sidón. ²³Nu li'ihua bee bene

eyeche Capernaum, ¿la za' arqui'hua nú riala chu'uhua liñibe? ¡Xne li'ihua riala chu'uhua hasta elu mase aquíé rqui' ebila! Xne tunu eyeche Sodoma a aca bee milagro nú unga lachihua, che pianu hasta bee bichia quie' nchiucu'sca' bee eyeche cua' che.

²⁴ Pero li'á nia luhua nú bichia chenu laxu iliulabe mase juerte castiya nú zecahua luquela castiya nú zeca bee bene eyeche Sodoma.

Tucutsia Jesuse nediya' ti neca Pa liñibe

(Lc. 10:21-22)

²⁵ Bee bichia ze'e uni Jesuse: “Pa liñibe li'ilu enu rnibiya' liñibe cuna lu iliulabe, zucu ayaa li'ilu xne ulube'lu lubee bene enu lecaxi reca, nu ucachi'lu lubee bene enu reca nu rri'i beya'.” ²⁶ Scua necane Pa liñibe, xne scua niarquí'lu nú acane.

²⁷ Uliqui' Pa Diose nú nibiya'a luye beenú nu'. Lecati nediya' ti neca Jesucristo lli'ñi Diose, Diose tsia nediya' nucua', le'ca tucutsia Jesucristo cuna bee bene enu nzeli arqui' li'inu nu'lu Diose. ²⁸ Yehua bee bene enu nellaca nzenala lunú neca bee custumbre, nu yehua bee bene enu nellaca lu stula, utehua cuna li'á nu li'á ri'á nú tsulachihua. ²⁹ Uzu'cu'hua stichia'a, nu ze'tehua nú acahua bene nze'ca enu lle'na nzu arqui' tucu nú necaa. Che ri'á nú huañi nze'cahua.

³⁰ Xne laca neriña' nú zucu'hua stichia'a nu le'ca laca neriña' nú ri'ihua lunú niarquía.

Ucha'ñi bee bene' Jesuse trigo bichia nú sulachi bee bene Israel

(Mr. 2:23-28; Lc. 6:1-5)

12 Tucu bichia nú sulachi bee bene Israel, udetenu

Jesuse bee bene'nu lu yuu elu nu' trigo, nu chequie uquixie nú ulia'na' beella nu unguxi beella tuu lu trigo nu uzu'cu beellae nu udacu beellae. ² Chenu ulañi' bee fariseo nú ucha'ñi bee bene'nu trigo, uni beella lu Jesuse:

—Bi'yacuru, bee bene'lu rri'i lunú la yala ri'i beei bichia nú sulachi bee bene.

³ Nu ucuauqui Jesuse lubeella: —¿Xie' lasca' ulahua lu ichi' Stichia' Diose elu rni nú xa uri'i David cuna bee bene enu nulla tucu bese chenu ulia'na' beella la? ⁴ Uyu'u David liñi indu' Diose nu udete' ule'ya pá nú necale'ya yalla nu udacullae nu le'ca udete'lla pá cua' udacu bee bene enu nuulla añinzuca nú bee ule'yatsia nu' modo nú acu bee pá cua'. ⁵ ¿Urre xie' lasca' ulahua lu ley nú udete' Diose lu Moisés elu rni nú laca dula lunú rri'i bee ule'ya liñi indu añinzuca núla tsulachi beella bichia nú sulachi bee bene la? ⁶ Nu li'á enu nzu cuna li'ihua, nia luhua nú masela neca equiea luquela indu. ⁷ Tunu li'ihua rri'ihua beya' xi rni lu ichi' Stichia' Diose elu rni: “Niarquia nú hua'a arqui'hua bee bene luhua nú liqui'hua u'na bee nañi lua.” Tunu rri'ihua beya' xi rni bee bedichia' cua' che lecalí xi ta'quiyahua bee bene enu la lu'cu ni' tucu equiya. ⁸ Nu li'á Bene enu uxe'la Diose le'ca rlu'cua nú rnibiya'a lu bichia nú sulachi bee bene.

Bene enu ubichicu' ya

(Mr. 3:1-6; Lc. 6:6-11)

⁹ Chenu ulaxu nú udete Jesuse ze'e uyu'unu liñi indu nú nzucu

enza ze'e. ¹⁰Nu liñi indu ze'e nzucu tucu niyu enu ubichicu' techu ya, nu lunú rcua'na bee fariseo nuxi ta'quiya beei li'inu che unedichia' beei lunu:

—¿Xie' nu' modo nú riyecalu tucu bene enu riti bichia nú sulachi bee bene la?

¹¹Chequie uni Jesuse lubeei:

—Tunu taticuhua rlu'cu tucu sanchi nu yecataí liñi tucu i'chiu bichia nú sulachi bee bene, ¿xie' la chehuahuaí bichia cua' la? ¹²Nu imasela huaxi seca tucu bene luquela tucu sanchi! Enze'e nu' modo nú ri'i bee bene nú neca nze'ca bee bichia nú sulachi bee bene.

¹³Che uninu lu niyu enu ubichicu' ya ze'e:

—Ulí yalu.

Che ulí niyu ze'e yai nu hora ze'e uyeca' yai, nu nae tucu nú naa stucu chu yai. ¹⁴Nu chenu uchiu'u bee fariseo liñi indu ze'e, uquixie beei ubedichia' beei nú xa modo ri'i beei para nú uti beei Jesuse.

Uyalu bee bedichia' equie cuenda' Jesuse

¹⁵Pero chenu uri'i Jesuse beya' nuxi niarqui' bee fariseo ze'e ri'inu li'inu uchiu'unu ze'e nzanu, nu huaxi bee bene uyaquie li'inu, nu uriyecanu ye bee bene enu riti, ¹⁶nu uninu lubeei nu la ixiule'e beei lu ni' tucu bee bene nú uriyecanu beei. ¹⁷Scua unga para nú uyalu tucu nú uni profeta Isaías chenu unilla:

¹⁸—Bi'yacuruhua li'inu necanu enu ucañia para nú zibi' lua, Li'inu enu chiqui' se'caa, nu chiqui' ñia nzu arquia lunu.

Nu xe'la Espíritu Santoa equienu, para nú ixiule'enu lubee bene iliulabe xa rnibiy'a'a.

¹⁹Nu ni' tucu bene la liununu, nula bixialínu, nu la necanu bene enu bixialí labe bee calle.

²⁰Lecaxi ri'inunu bee bene enu la nehuañi nze'ca, nu la nitilunu bee bene enu lle'natsia nzeli arqui' xi neca qui sera nú llenetsia rululá.

Hasta nú ri'inu ana nú aca elu usticia tucu nú necane.

²¹Nu nzuculu bee bene iliulabe nú li'inu tsila'anu li'ibeella.

Uni bee bene nú rlu'cu Jesuse poder nú rlu'cu beze'lu

(Mr. 3:19-30; Lc. 11:14-23; 12:10)

²²Uyayu bee bene tucu bene enu la ye'e i'culu nu la ni lu Jesuse, xne nchiñi benechiqui' arqui'i. Nu uriyecana Jesuse li'i nu uquixie nú uni nu uye'e i'cului. ²³Chequie ye bee bene ze'e chiqui' nzena arqui'beei nú unibeei:

—¿Xie' laca benecua' enu necadichia' nú nze'ta lu familia' David la?

²⁴Chenu ubene' bee fariseo nucua' unibeei:

—Beze'lu enu rnibiy'a' lubee benechiqui' neca enu udete' poder lu bene cua' nú rlualla benechiqui' arqui' bee bene.

²⁵Pero nediya' Jesuse lunú rri'i beei elliebacu', che uninu lubeei:

—Ye bee nación nu bee eyeche llene nú la neca tucunecatse rle'esa'e, le'ca scua tunu tucu famili

liñi tucu ni'i laneca tucu necatse beella rle'e sa'lla. ²⁶Le'ca scua tunu rliunu beze'lu le'catsia li'i. ¿Xneca modo nú di'ya elurnibiya' nú rlu'cui che? ²⁷Li'ihua rnhua nú rluaa bee benechiqui' arqui' bee bene cuna poder beze'lu. Pero tunu scua necane, ¿ti rdete' poder lubee bene'hua para nú rlua beei bee benechiqui' arqui' bee bene che?, le'ca nia luhua nú li'ibeei rlube' beei nú la neli nú rnhua. ²⁸Xne li'á rlua bee benechiqui' arqui' bee bene equie cuenda' Espíritu Santo' Diose, nucua' rlube' nú uriñala nú rnibiya' Diose luhua.

²⁹Xne leca modo nú chu'u bene ni'i tucu bene enu naaqui para nú cachi'i stene'lla, tunu la llica' cuxuilla. Che scua nu' modo nú cachi'i stene'lla.

³⁰Bee bene enu la nzu chua, rri'i cundra bee nze'e li'á, nu bee bene enu la ri'i elietsa lua, rca nze'e nú aca huaxilá bee benea.

³¹Enze'e nia luhua nú ri'i Diose perdona ye dula nú rri'i bee bene cuna ye bee bedichia' chi'qui' nú rni bee bene. Pero la ri'inu perdona bee bene enu rni bee bedichia' chi'qui' equie cuenda' Espíritu Santo. ³²Rri'i Diose perdona titse bee bene enu rni bedichia' chi'qui' equie cuenda' li'á, Bene enu uxe'la Diose, pero titse bene enu nechiqui' Espíritu Santo leca' perdona para bee benecua' ni' lu iliulabe quie' nu ni' liñibe.

Lunú rri'i bee bene rlube' nú xa neca bene

(Lc. 6:43-45)

³³Li'ihua nediya'hua nú aca nze'ca rayu ndixi nze'ca lue, nu

aca nú la neca nze'ca la ayu ndixi nze'ca lue, xne lu cuenda' ndixi nú rayu lu aca nu'lu bene nú xi acae. ³⁴Li'isi'hua netsiñahua xi netsiña bee be'la! ¿Xa modo nú nihua bee bedichia' nze'ca chenu li'ihua necha necahua? Bee bedichia' nú nu' arqui' bee bene enze'e rni bene. ³⁵Bene nze'ca rni bedichia' nze'ca, xne nucua' nu' arqui'lla. Nu bene enu necha neca rni bee bedichia' nú necha neca xne nucua' nu' arqui'lla. ³⁶Pero li'á nia luhua nú bichia nú hualu Diose lu cuenda' bee bene iliulabe, che ye bee bene dete' cuenda lu Diose luye bee bedichia' nú necha neca unibeei. ³⁷Xne equie cuenda' stichia' bene, scua rlube' tunu yala nú zecalla castiya nú dete' Diose lulla, nu tunu la yala zecalla castiya.

Unacu' bee fariseo lu Jesuse nú ri'inu tucu milagro

(Mc. 8:12; Lc. 11:29-32)

³⁸Chequie chiucu chuna bee fariseo cuna bee ulaxcuela enu reca ley uni lu Jesuse:

—Maestro, niarquiu'ru nú lañi'ru ri'ilu tucu milagro.

³⁹Che ucuquiu' Jesuse lubeei:

—Li'ihua bee bene enu necha rri'i nu sequienu bee bene rncu'hua nú ria'a tucu milagro, pero la ri'á ni'tucu milagro luhua, lañi'tsiahua tucu nú ulle'ca Jonás. ⁴⁰Xne tucu nú ullutse Jonás chuna bichia cuna chuna rula' xla'cu be'na', le'ca scua li'á Bene enu uxe'la Diose llutsea liñi yuu chuna bichia nu chuna rula'. ⁴¹Nu bichia chenu laxu iliulabe chenu chiu'lue lu cuenda' bee bene tiambu quie', che huañi

zeca bee bene eyeche Nínive ni nú riala bee bene cua' castiya xne bee bene eyeche Nínive uzucu'beeí nú uni Jonas chenu unilla lubeeí nú huañi beeí tucu nú niarqui' Diose. Nu li'á Jesuse enu nzu cuna li'ihua maselá neca equiea luquela Jonás. ⁴²Nu bichia chenu laxu iliulabe, chenu hualu Diose lucuenda' bee bene, chequie reina eyeche nú lee Sabá huañi zecalla nu nilla nú riala bee bene enu nucua'a nee castiya nú dete' Diose. Xne li'illa nze'talla enza mase istu, nu ube'talla para nú ubene'lla lunú reca arre Salomón, nu li'á Jesuse enu nzu cuna li'ihua, másela neca equiea luquela arre Salomón.

Chenu rebenchila' zeca benechiqui' arqui' tucu bene

(Lc. 11:24-26)

⁴³Chenu xiu'u tucu benechiqui' arqui' tucu bene, enzei bee luguare elu nebichi rcua'nai elu tsulachii, nu chenu la llela'i elu tsulachii, che rri'i elliebacu': ⁴⁴Nú rni: “Mejora benchila' zecaa arqui' bene elu uchiu'a.” Nu chenu ubenchila' zecai llela'i arqui' bene elu uchiu'i xi neca liñi tucu ni'i nú nelata, nu nelucu' nu rna nze'ca. ⁴⁵Chequie nzetucui se achi benechiqui' enu maselá necha rri'i luquela li'i, nu chu'u ye beei arqui' bene ze'e, nu che masescalá necha aca bene ze'e lunú necalla hua'tu. Le'ca scua zeca bee bene enu necha rri'i nucua'a tiambu quie'.

Na' Jesuse cuna bee bichinu

(Mr. 3:31-35; Lc. 8:19-21)

⁴⁶Rdichia' nusca' Jesuse bee bene ze'e, chenu uriña na'nu cuna bee

bichinu nucua'a eli'ya' nu niarqui' beella bedichia'nu beella li'inu. Nu lunú nucua'a beella eli'ya', ⁴⁷che uyatixiule'e tucu bene lu Jesuse nú unilla lunu:

—Nzu na'lu cuna bee bichilu eli'ya' nu niarqui' beella bedichia'nu beella li'ilu.

⁴⁸Pero uninu lu bene enu uya udixiule'e lunu:

—¿Ti neca naa, nu ti neca bee bichia'?

⁴⁹Chequie ulube'yanu lubee bene'nu, nú uninu:

—Bee benequie' neca naa cuna bee bichia. ⁵⁰Xne titse bee bene enu rri'i lunú niarqui' Diose Pa liñibe, bee nze'e neca bee bichia, cuna bee zanaa nu naa.

Uni Jesuse ejemplu' tucu bene enu nzetu' nii trigo

(Mr. 4:1-9; Lc. 8:4-8)

13 Le'ca bichia ze'e uchiu'u Jesuse ni'i elu uya'nanu nu uya zucunu ru'u inzatu'. ²Nu lunú chiqui' huaxi bee bene uyetesa' lunu, che uquienu equie tucu barco nu uzucunu liñi nu ye bee bene ucu'a lunu ru'u inzatu' ze'e. ³Nu huaxi beenú uzete'nu bee bene ze'e cuna puro bee ejemplu. Nu uninu lubeei:

—Uchiu'u tucu bene nzetu' nii, ⁴nu chenu rdu'lla nii, uzana' lle'na ebichi ze'e lu inziu, nu uriña bee iñi udacue. ⁵Lle'nae uzana' leta quiee, elu leca huaxi yuu, nu yexetsia uliñi ebichi ze'e xne la aca aquíe lu yuu. ⁶Pero chenu uliñi bichia, nu unga nele ungu'lune nu ubichii xne laca aquíe nchiñi lue lu yuu. ⁷Nu lle'na ebichi uzana' leta bee eche nu

chenu enta ru'cue, ubichii xne uri'i eche ana lue. ⁸Pero lle'na ebichi nú uzana' lu yuu ru'cu, chiqui' unguyu'e, mae unguyu' tucu ayu'u ebichi lu, nu mae unguyu' sesenta ebichi, nu mae unguyu' treinta ebichi scua unguyu' bee. ⁹Titse bee bene enu niarqui' yene' nú rnia, iquie'e diaca nze'e!

Udixiule'e Jesuse xinu uninu bee ejemplu

(Mr. 4:10-12; Lc. 8:9-10)

¹⁰Che uyabica bee bene' Jesuse lunu nu unidichia' beella lunu xinu sete'nu bee bene cuna puro bee ejemplu tsia. ¹¹Nu ucuaquinu nú uninu lubeella:

—Li'ihua uliqui' Diose nú ri'ihua beya' xneca neca lunú a'chi neca nú rnibiya'nu. Pero lubee benequie' lá dete'nu nú ri'i beella beya' nucua'. ¹²Xne bee bene enu rri'i beya' Stichia' Diose, liqui'lánu nú ri'ilá beella beya' stichia'nu, pero bee bene enu lle'natsia rri'i beya' stichia'nu, nu la la'nalla nú ri'ilálla beya' stichia'nu hasta lu lle'natsia nú rri'illa beya' la ria'lla beya' nucua'. ¹³Enze'e rnia lubeella equie cuenda' bee ejemplu tsia, xne mase ri'ya beella nu neca xi neca nula lañi' beella nu mase riene' beella pero neca xi neca nu la yene' beella. Nu la ri'i beella beya'. ¹⁴Scua rialu nú uquie'e profeta Isaías chenu unilla:

Mase riene' beei, pero la ri'i beei beya'.

Nu mase ri'ya beei,
pero neca xi neca nú la lañi'beei.

¹⁵Xne chiqui' unga nziti arqui'beei,

nu rri'i beei xi neca nú la lañi'beei,
nu xi neca nú nenguata' beei para nú la lañi'beei,
nu la yene' beei nu la ri'i beei beya',
xne la zela' beei ye'ta beei cuna li'á,
para nú ri'á perdona stula beei.

¹⁶Pero li'ihua: Ñia neca lu cuenda'hua nú rlañi'hua lunú rlañi'hua nu riene'hua lunú riene'hua. ¹⁷Xne li'á nia luhua nú huaxi bee profeta nu huaxi bee bene enu uhuañi nze'ca uniarqui' beella lañi' beella lunú rlañi'hua. Nu né lañi' beella nucua'. Le'ca uniarqui' beella yene' beella lunú riene'hua, pero né yene' beellae.

Udixiule'e Jesuse xi rni ejemplu nú uninu

(Mr. 4:13-20; Lc. 8:11-15)

¹⁸Uzu'cu' diacahua ne ixiule'a xi rni ejemplu' bene enu uya tu' nii trigo. ¹⁹Bee bene enu riene' Stichia' Diose nu la ri'i beya' xi rni, li'ibeei neca beei xi neca ebichi nú uzana' inziu, xne chu nze'ta beze'lu nu raxii Stichia' Diose nú ubene'la' beei. ²⁰Nu bee ebichi nú uzana' leta quiee, neca xi neca bee bene enu riene' Stichia' Diose nu ñia riucu arqui'beeii, ²¹pero lunú neca beei xi neca bee huañi nú leca huaxi luu la nzuta' arqui'beei chenu nehuana seca beei nu rana arqui' bee bene li'ibeei, che sana' arqui' beei Stichia' Diose nú ubene'la' beei. ²²Bee ebichi nú uzana' leta eche, neca xi neca bee bene enu riene' Stichia' Diose, pero lunú máse nzenu arqui'beei nú nu' lu iliulabe quie'

nu máse seca beei eluxene nú nu' lu iliulabequie', che ye bee nucua' rri'i nú sana' arqui'beei Stichia' Diose. Nu lecaxi zibi' nú ubene'beei Stichia' Diose che. ²³Pero bee ebichi nú ubenii lu yuu ru'cu, neca xi neca bee bene enu riene' Stichia' Diose nu rri'i beya'e, nu li'ibeella rri'i beella ana bee bene para nú chili arqui'beei Stichia' Diose, tucu nú neca bee ebichi nú unguyu' tucu ayu'u ebichi lu, nu unguyu' sesenta ebichi, nu unguyu' treinta ebichi.

**Ejemplu' bee huañi nú
nu' leta bee trigo**

²⁴Uni Jesuse stucu ejemplu lubee bene ze'e:

—Lunú xneca rnibiya' Diose neca xi neca tucu bene enu uquienii ebichi nze'ca lu yuu'; ²⁵pero diquila nú ra'tse bee bene uriña bene enu rana arqui' li'illa uquienii ebichi' huañi nu la zibi' leta bee trigo'lla, nu chu nza nze'e. ²⁶Chenu uru'cu trigo nu uliñi tuu lue, le'ca nuu bee huañi nu la zibi' ze'e nu' leta bee uru'cu.

²⁷Nu che uyatixiule'e bee moso'lla lulla, nu unibeei lulla: “Detá, lanu ebichi nze'catsia uquienu lu yuu'lu la, ¿cá uchiu'u bee huañi nú nu' leta bee trigo?” ²⁸Che uni bene enu neca stene trigo: “Tucu bene enu rana arqui' li'á uri'i nucua'.” Che uni bee moso' ze'e lulla: “¿Niarqui'lu nú nzetaxiru bee huañi nu la zibi' cua' letae la?” ²⁹Che unilla lubeei: “Mejora nú la axihuane, xne canu chenu axihuane le'ca nuu bee trigo yetsu. ³⁰Mejora nú zela'ahua nú ru'cu bee cuna trigo hasta chenu aca ula'cu'

trigo. Che nia lubee bene enu ri'i ula'cu' trigo nú rluti quiete'sa'xu beei huañi cua' nu ri'i menuxu beei para nú chiquine. Cheelá quiete' sa'beei trigo nu duche' beei trigo elu riala nú chuche'e.”

Ejemplu' ebichi mestasa

(Mc. 4:30-32; Lc. 13:18-19)

³¹Le'ca uni Jesuse stucu ejemplu lubee bene:

—Lunú xneca rnibiya' Diose neca xi neca tucu ebichi' mestasa nú rquienii tucu bene lu yuu'lla. ³²Nú masela me'e luye bee ebichi. Pero chenu rru'cue, masescalla llenee luye beelá bee huañi, nu rru'cue xi rru'cu tucu aca, hasta nú rreche' bee iñi exliatse' beei lu ellutsa'e.

Ejemplu' levadura

(Lc. 13:20-21)

³³Le'ca uni Jesuse stucu ejemplu lubee bene:

—Lunú xneca rnibiya' Diose neca xi neca levadura nú rcucha tucu una'a cuna chuna medida harina para nú tsebichi ecucu.

Xinu uzete' Jesuse puro bee ejemplu

(Mr. 4:33-34)

³⁴Ye beenú uzete' Jesuse bee bene, li'inu uzete'nu li'ibeei cuna puro bee ejemplu nu lecaxi nu lá zete'nu li'ibeei sin lu cuenda' bee ejemplu tsia. ³⁵Scua ungae para nú uyalu tucu nú uni profeta:

Nia lubee bene cuna puro bee ejemplu.

Nia lubee bene beenú a'chi' neca lubeei desde chenu ureche' Diose iliulabe.

**Udixiule'e Jesuse xi ni ejemplu'
huañi nú la zibi' nu' leta trigo**

³⁶Chenu ulaxu nú uni Jesuse lubee bene ze'e che inziue beella nu uyu'u Jesuse liñi ni'i cuna bee bene'nu, nu uni bee bene'nu lunu: —Udixiule'e luru xi rni ejemplu' bee huañi nú la zibi' nú nu' leta bee trigo.

³⁷Nu ucuaquinu lubeella nú uninu: —Bene enu udu'nii ebichi nze'ca ze'e, neca li'á Bene enu uxe'la Diose, ³⁸nu lu yuu elu uyu'u nii neca iliulabe. Nu bee ebichi nze'ca neca bee bene' Diose, nu bee huañi nu la zibi' neca bee bene enu neca bee bene' beze'lu, ³⁹nu enu rana arqui' li'á uquienii huañi nu la zibi' ze'e neca beze'lu. Nu ula'cu neca xi neca chenu laxu iliulabe, nu bee enu rri'i ula'cu neca bee ángele' Diose. ⁴⁰Nu tucu nú riete' sa' huañi nu la zibi' para nú chiquine, le'ca scua aca chenu laxu iliulabe. ⁴¹Li'á Bene enu uxe'la Diose lu iliulabe, xe'laa bee ángelea para nú huachu beenu bee bene enu necha rri'i leta bee benea, nu cuna ye bee bene enu rri'i dula. ⁴²Nu tsi'qui beenu bee bene cua' luquii liñi horno, elu una' beella nu acuxa' laya beella. ⁴³Che bee bene enu nehuañi tucu nú niarqui' Diose, aca rulusiqui' beella elurnibiya' Diose Pa liñibe xi rulusiqui' bichia. Bee bene enu niarqui' nú yene' nú rnia, quie'e diaca nze'e.

**Ejemplu' tucu nú huaxi
seca nú nuche' a'chi'**

⁴⁴Lunu xneca rnibiya' Diose neca xi neca tucu nú huaxi seca

nú nu'che' a'chi' lu tucu yuu. Nu tucu bene ullela'e nu udu'che' a'chi' zecallae elu ullela'llae, che chiqui' ñia nzu arqui'lla nze tutilla yebec stene'lla para nú tsilla yuu ze'e.

Ejemplu' perla nú huaxi seca

⁴⁵Le'ca nia luhua nú lunú xneca rnibiya' Diose neca xi neca tucu bene enu rri'i berexe nu rcua'nalla perla nú huaxi seca, ⁴⁶nu chenu ullela'lla tucu perla nú huaxi seca, che nzalla nze tutilla yebec stene'lla nú rlu'culla para nú tsilla perla ze'e.

Ejemplu' ixiu nú rucu bela

⁴⁷Le'ca scua lunú rnibiya' Diose neca xi neca tucu ixiu nú rdu' bee bene lu inzatu' nú rucu yelu clasia bee bela. ⁴⁸Nu chenu ucheela ixiu ze'e, ulua beellae ru'u inzatu', nu ze'e ucua'a beella ucañi beella bee bela enu nu' liñii, nu udu'che' beella bee bela nze'ca liñi llume, nu utsi'qui beella bee bela enu la zibi'. ⁴⁹Le'ca scua aca chenu laxu iliulabe; nze'ta bee ángele'nu para nú huachu beenu bee bene enu necha rri'i leta bee bene enu rri'i nze'ca, ⁵⁰nu tsi'qui bee ángele bee bene enu necha rri'i cua' lu quii liñi horno, elu una' beella nu acuxa' laya beella.

Ejemplu' tucu bene xene

⁵¹Nu uni Jesuse lubee bene'nu: —¿Uri'ihua beya' yebec nú unia la? Che uni beella: —Aahua', uri'iru beya'. ⁵²Chequie uni Jesuse lubeella: —Yebec ulaxcuela enu reca ley, nee rri'ila beella beya' xa neca elurnibiya'

Diose, li'ibeella neca beella xi neca tucu bene enu neca stene tucu ni'li enu nuche' beenú nuche'e nu recalla rcañilla beenú cuqui cuna beenú uxu leta ye beenú rlu'culla.

Ubenchila' Jesuse eyeche Nazaret

(Mr. 6:1-6; Lc. 4:16-30)

⁵³Chenu ulaxu nú udixiule'e Jesuse xi rni bee ejemplu cua' lubee bene, uchiu'unu ze'e nzanu ⁵⁴nu uriñanu lachinu. Che uzete'nu bee bene liñi indu eyeche ze'e. Chiqui' nzenu arqui' bee bene ze'e nú unibeei lu sa'bee:

—¿Cá unga nucua' ye nú reca nucua'? ¿Nu xneca reca nucua' rri'i nucua' bee milagro? ⁵⁵¿Xie' lanu lliana' bene enu rri'i riña' ru'u bangu nucua', nu lanu María neca na' nucua' la? ¿Nu lanu bee bichi nucua' neca Jacobo, José, Simón nu Judas la?

⁵⁶¿Nu xie' lanu eyeche quie' nucua'a bee zana nucua' la? ¿Cá unga nucua' lu ye nú chiqui' reca nucua' che?

⁵⁷Nu lá ri'i caso beei Jesuse. Che uninu lubei:

—Catse rlu'cu bee bene ula'na lu tucu profeta. Pero lachilla nu ni'lla, la lu'cu bee bene ula'na lulla.

⁵⁸Nu né ri'inu huaxi bee milagro ze'e xne né chili arqui' bee bene ze'e li'inu.

Unguti Juan Bautista

(Mc. 6:14-29; Lc. 9:7-9)

14 Timbu ze'e arre Herodes enu rnibiya' lu iliu Galilea, ubene'lla ye beenú rri'i Jesuse, ²nu unilla lubee moso'lla:

—Juan Bautista nucua', uhuañi zeca. Enze'e rlu'culla poder cua' nú rri'illa bee milagro.

³Uni Herodes scua xne li'illa unibiya'lla nú ulluna Juan nu uyaca'culla cuna cadena uyu'ulla ni'cu'. Uri'i Herodes scua equie cuenda' Herodías, enu unga una'a bichilla Felipe, ⁴xne uni Juan lu Herodes:

—La yala nú zucunuulu le'catsia una'a bichilu.

⁵Nu niarqui' Herodes nú utilla Juan, pero xiquilla bee bene, xne ye bee bene rni nú neca Juan tucu profeta.

⁶Pero chenu reca eliñi nú rellu'cu Herodes lana, che uye'e xinchiu'cu Herodías lubee bene enu nezene' lu eliñi ze'e, nu chiqui' uyu' arqui' Herodes xa uye'enchu, ⁷nu hasta uquie'ella Diöse nú dete'lla xitse nú nacu'nchu lulla. ⁸Nu na' endu' cua' uni lunchu, nú ninchu lu Herodes:

—Uli'qui' lluca equie Juan Bautista liñi tucu pliato lua.

⁹Che nehuana utsu arqui' arre Herodes, pero lunú uquie'elalla Diöse lu ye bee bene enu nezene' lu eliñi'lla nú dete'lla xitse lunú nacu'nchu, enze'e unibiya'lla lubee sundadu'lla nú ye'tayu beei nú rnacu'nchu lulla. ¹⁰Che unibiya'lla nú chiecu' bee sundadu lluca equie Juan liñi ni'cu', ¹¹nu uriñayu beei lluca equie Juan nchiucu' liñi tucu pliatu, nu udete' beei yanchu, nu chu udete'nchue ya na'nchu.

¹²Che uriña bee bene' Juan unguya' cuerpo' Juan nu uya ca'chi' beella cuerpo'lla, cheelá uyatixiule'e beella lu Jesuse lunú unga.

Udete' Jesuse nú udacu ayu' mili bee bene

(Mr. 6:30-44; Lc. 9:10-17; Jn. 6:1-14)

¹³Chenu ubene' Jesuse nú unguiti Juan, uchiu'unu ze'e nza tuculi'nu

liñi tucu barco, tucu luhuare elu lecalí tinu', para nú nzu tuculi'nu ze'e. Pero chenu uri'i bee bene beya' nú nzanu uchiu'u bee bene bee eyeche enza ze'e nzenala li'inu nu se e'ya beei nzuebeei elu riñanu. ¹⁴Chenu ulaca Jesuse equie barco, ulañi'nu nú tesquiela' huaxi bee bene nucua'a ze'e nu uhua'a arqui'nu beella, che uriyecanu bee bene enu riti nuya' beella. ¹⁵Nu chenu uchela, uyabica bee bene'nu lunu nu uni beella lunu: —Uchela nee nu ca'a neca tucu luhuare elu la nucua'a ni' tucu bee bene. Uni' lubee bene nú chue beei lubee eyeche para nú tsi beei nú acu beei.

¹⁶Nu uni Jesuse lubeella:

—La qui'ña nú yue beei, li'ihua ude'tehua nú acu beei.

¹⁷Nu uni beella lunu:

—Pero rlu'cutsiaru ayu' pa cuna chiucu bela.

¹⁸Che uni Jesuse lubeella:

—Uteyuhuane ca'a.

¹⁹Chequie unibiya'nu nú cua'a bee bene añi ze'e lu ixi xata. Nu una'tsenu lu ayu' pa ze'e cuna rucu bela nu ubi'yanu enza liñibe nu udete'nu che'tsa lu Diose. Nu chu ule'enu bee pa cua' udete'nu ya bee bene'nu para nú ritsi' beellae lu ye bee bene. ²⁰Ye bee bene ze'e udacu beei hasta nú ubela' beei, nu uquietesa'sca' beei chi'chiucu llume bee pa nú uya'na. ²¹Bee enu udacu neca casi ayu' mili puro bee niyu, sin nú bacu' bee una'a cuna bee endu'.

Utse Jesuse lu inzatu'

(Mr. 6:45-52; Jn. 6:16-21)

²²Che chu unibiya' Jesuse nú chu'u bee bene'nu liñi barco para

nú riculubeella chue beella stucu chu inzatu'. Diquila nú rninu lubee bene nú nzanu. ²³Chenu ulaxu uninu lubee bene ze'e nú nzanu, uquienu equie tucu dañi para nú nacu'nu lu Diose ze'e. Chenu uyu'lu rula' nzu tuculi'nu ze'e, ²⁴nu barco nú nza bee bene'nu istula nzae lu inzatu', nu chiqui' necha rri'inu inzatu' barco, xne chiqui' reca bii enza lu barco. ²⁵Nu elliecabe see Jesuse lu inzatu', nzanu enza lubee bene'nu. ²⁶Chenu ulañi' bee bene'nu nú senu lu inzatu', ulliqui beella nu ubixialí beella nú uni beella:

—iTucu benechiqui'!

²⁷Pero uni Jesuse lubeella:

—iUtsu naaqui arqui'hua! iLi'á nucua' la liquihua!

²⁸Chequie uni Pedro lu Jesuse:

—Detá, tunu li'ilu nucua', unibiya' nú tsea lu inzatu' nzela hasta lulu.

²⁹Che uni Jesuse lulla:

—Utee che.

Nu che chu ulaca Pedro equie barco nu uquixiella sella lu inzatu' nzalla lu Jesuse. ³⁰Pero chenu utsi'lla nú chiqui' reca bii, ulliquilla nu uquixie ratse'lla lu inzatu', nu urixialilla unilla:

—iDetá, utsila'a li'á!

³¹Hora ze'e una'tse Jesuse yalla, nu uninu lulla:

—iXinu lle'natsia nzeli arqui'lu li'á! ¿Xiquie nú uza' arqui'lu?

³²Nu chenu uquie beella equie barco, ungaxe bii. ³³Chequie beelá bee enu nchiucu' equie barco, utsulliqui beella lu Jesuse nú uni beella lunu:

—iNelíca nú li'ilu necalu lli'ñi e'cu Diose!

Uriyeca Jesuse bee bene eyeche

Genesaret

(Mr. 6:53-56)

³⁴Chequie udete beella lu inzatu' ze'e, nu uriña beella stucu chu ru'u inzatu' lu iliu nú lee Genesaret.

³⁵Nu uyu'ulu bee bene luhuare ze'e li'inu nú necanu Jesuse, nu ungabiya' ye bee bene diqui enza ze'e nú uriñanu ze'e, che uriñayu bee bene ze'e bee bene enu riti lunu.

³⁶Nu uziquie beei lunu nú zelanu nú ti'ya beei masia ru'u xucunu, nu ye bee bene enu uti'ya ru'u xucunu uyeca' beei.

Lunú rri'i nú rri'i bee bene dula

(Mr. 7:1-23)

15 Chequie uyabica chiucu chuna bee fariseo cuna bee ulaxcuela enu reca ley lu Jesuse, nu nze'ta beella enza Jerusalén, nu uni beella lunu:

²—¿Xiquie núla zucu' bee bene'lu custumbre nú utsa'na bee bene'ahua enu udetela? ¿Xiquie núla naa bee bene'lu chenu racu beei tucu nú neca custumbre?

³Che uni Jesuse lubeella:

—¿Le'ca xiquie nú sana' arqui'hua Stichia' Diose, para nú nzenalahua lunú neca custumbre'tsiahua? ⁴Xne uni Diose: “Lu'cu ula'na lu pa'lu cuna lu na'lu”, nu “Enu riquichi'qui' pa' cuna na' rqui'ña nú ati nze'e.”

⁵Pero li'ihua rnhua nú nu' modo ni bene lu pa'lla cuna lu na'lla: “Leca modo ri'a elietsa luhua, xne ye nú rlu'cua necalane u'na para Diose”, ⁶rnhua nú titse bee bene enu ni scua, la qui'ñia nú ri'i nze'e elietsa lu pa' nze'e cuna lu na' nze'e.

Scua ruachuhua Stichia' Diose, nu nzenalahua custumbre'hua. ⁷iLia rri'ihua nú nehuañi nze'cahua! Neli nú uni profeta Isafas lu cuenda'hua chenu unilla:

⁸Bee benequie' rnibeei nú rlu'cu beei ula'na lua, pero ni' teme' la lu'cu beei ula'na lua.

⁹Lecaxi sibi' nú rlu'cu beei ula'na lua, xne sete'tsia beei lunú xelatsia arqui' bee bene.

¹⁰Chequie ubixia Jesuse ye bee bene ze'e, nu uninu lubeei: —Uzu'cu' diacahua nu uri'ihua beya' nú nia luhua: ¹¹La neca nú racu bene nú rri'i, nú rri'i bene dula. Sino que bee bedichia' nú rni bene enze'e rri'i nú rri'i bene dula.

¹²Chequie uyabica bee bene' Jesuse lunu nu uni beella lunu: —¿Uri'ilu beya' nú né yu' arqui' bee fariseo bee bedichia' nú unilu la?

¹³Nu ucuaquinu lubee bene'nu nú uninu:

—Ye bee aca nú lá quieni Paa liñibe yetsu hasta lue. ¹⁴Cuala' beella, xne necatsia beella xi neca bene enu nequie'lu enu rlube' lu stucu bene enu nequie'lu nú cá enza tsella, nu tunu tucu bene enu nequie'lu rlube' stucu bene enu nequie'lu cá enza tsella, che rucu beella nu' modo nú zana' beella liñi tucu i'chiu.

¹⁵Che uni Pedro lu Jesuse: —Udixiule'e luru xi rni bee bedichia' nú unilu.

¹⁶Chequie uni Jesuse: —¿Xie' le'ca nuuhua lá ri'ihua beya' lunú unia la? ¹⁷¿Xie' la ri'ihua beya'

nú ye bee elubacu nú racu bee bene rlaeae xla'cu bee bene, nu che chu xiu'u zecae la? ¹⁸Pero bee bedichia' nú rni bee bene, xiu'u nucua' arqui' bee bene, nu bee nucua' rri'i nú rri'i bee bene dula. ¹⁹Xne liñi arqui' bene xiu'u nú necha rri'i bene elliebacu', nú ruuti bene sa'bene, nú rlu'cu niyu stucu una'a, urre rlu'cu una'a stucu niyu, nú rri'i bene eluhuexe, nú rri'i bene eluhuana', nú rni bene eluquichia', nú riquichi'qui' bene sa' bene. ²⁰Bee nucua' rri'i nú rri'i bee bene dula. Pero tunu la naa bene chenu racu bene tucu nú necha custumbre nú riala ri'i bene ante nú acu bene, la necha nucua' nú rri'i nú rri'i bee bene dula.

Uriyeca Jesuse xinchiu'cu tucu una'a Canán

(Mr. 7:24-30)

²¹Chenu uchiu'u Jesuse lu iliu Genesaret nzanu enza lu eyeche Tiro cuna lu eyeche Sidón. ²²Enza ze'e uchiu'u tucu una'a enu necha bene lu iliu Canaán lu Jesuse nu urixialinchu nú uninchu lunu:

—iDetá, lliana' David, uhua'a arqui' li'á! Bi'yacuru xinchiu'cua nchiñi benechiqui' arqui' nu chiqui' nehuana secanchu.

²³Nu né cuaquilí Jesuse lunchu. Che uyabica bee bene'nu lunu nu uziquie beella lunu nú uni beella:

—Uni' lu una'a cua' nú yanchu xne rixialinchu nze'taquienchu lia'ahua.

²⁴Che uni Jesuse lubee bene'nu: —Uxe'la Diose li'á para nú ri'itsia elietsa lubee bene Israel enu la chenala' inziu' Diose.

²⁵Pero che uyabica una'a ze'e lunu nu utsulliquinchu lunu, nú uninchu lunu:

—iDetá, uri'i elietsa lua!

²⁶Nu uni Jesuse lunchu:

—La necha nze'ca nú axi bene pá ya bee endu' nu dete' benene acu bee nicu.

²⁷Chequie uni una'a ze'e lu Jesuse:

—Neli'lu nucua' Detá, pero hasta bee nicu racu bee pá ube nú sana' liñi mexa' bene enu necha stene nicu.

²⁸Che uni Jesuse lunchu:

—iUna'a li'isi'lu chiqui' nzeli arqui'lu li'á! Aca tucu nú niarqui'lu. Nu hora ze'e, uyeca' endu'nchu.

Uriyeca Jesuse huaxi bee bene enu riti

²⁹Chenu uchiu'u Jesuse ze'e uriñanu ru'u inzatu' Galilea. Che chu uquienu equie tucu dañi nu uzucunu ze'e. ³⁰Nu uyetesa' huaxi bee bene lunu ze'e, nu uriñayu beei bee bene enu necuxu, cuna bee bene enu niquie'lu, cuna bee bene enu nemangu, cuna bee bene enu la ni, cuna bee bene enu seca huaxilá lu elichia. Uriñayu beei bee bene quie' lunu, nu uriyecanu beei.

³¹Chequie chiqui' uyanu arqui' bee bene ze'e chenu ulañi' beei nú rnila bee bene enu lani, nú uyecala' bee bene enu nemangu, nú sela bee bene enu necuxu, nú ri'yala bee bene enu niquie'lu. Nu uquixie uni beella bedichia' nze'ca lu Diose' bee bene Israel.

Udete' Jesuse nú udacu tucu mili bee bene

(Mc. 8:1-10)

³²Chequie ubixia Jesuse bee bene'nu nu uninu lubeella:

—Ru'u arquia bee benequie', xne necala chuna bichia nú nucua'a beei lua nu la uya' beei nú acu beei.

La niarquía nú xe'laa beei yue beei scuatsia ni'i beei, xne cá chiula' beei inziu.

³³Che uni bee bene'nu lunu:

—Pero ¿ca chiya'ahua nú acu ye bee bene añiquie!, luhuare quie' elu lecati nucua'a?

³⁴Nu unedichia' Jesuse lubeella, nú uninu:

—¿Xala pa rlu'cuhua?

Nu ucuaqui beella lunu:

—Rlu'curu achine cuna chiucu chuna bee bela.

³⁵Nu che chu unibiya'nu nú cua'a bee bene ze'e luyuu. ³⁶Nu una'tsenu lu achi bee pa cuna bee bela, nu udete'nu che'tsa lu Diose. Nu ule'enu bee pa ze'e udete'nu ya bee bene'nu para nú ritsi' beellae luye bee bene ze'e. ³⁷Ye bee bene ze'e udacu hasta nú ubela' beei. Nu uzucu subrasca' achi llume bee pa nú uya'na. ³⁸Bee bene enu udacu neca tacu mili bee niyu, pero la nebacu' bee una'a cuna bee endu'. ³⁹Chenu ulaxu nú uni Jesuse lubee bene ze'e nú nzalanu. Che chu uyu'unu liñi barco nu nzanu lu iliu nú lee Magdala.

Unacu' bee fariseo cuna bee saduceo nú ri'i Jesuse tucu milagro

(Mr. 8:11-13; Lc. 12:54-56)

16 Uya bee fariseo cuna bee saduceo lu Jesuse para nú ri'i beei preo li'inu. Nu unacu' beei lunu nú ri'inu tucu milagro nú lube'nu lubeei tunu neli nú nze'tanu lu cuenda' Diose.

²Che uni Jesuse lubeei:

—Bee uche chenu neluu rnaa liñibe, che rnhua: “Nú nze'ta nú ñia tsu bichia ye'e.” ³Nu bee zila'

chenu rlañi'hua nú neluu rnaa liñibe nu nu' xcabe che rnhua: “Necha tsu bichia quie', rri'ihua beya' xa neca bee seña liñibe.” ¿Xiquie nú la ri'ihua beya' xa neca lunú reca nee? ⁴Bee enu necha rri'i bee lee lecaxi chili arqui'hua nu rnacu'hua tucu milagro lua, pero leca' xi milagro lañi'la'hua ulañi'tsiahua tucu milagro nú ulle'ca Jonás. Nu chu utsa'nanu bee bene cua', nu chu nzanu.

Levadura' bee Fariseo

(Mr. 8:14-21)

⁵Chequie chenu udete beella stucu chu inzatu', uzañi' bee bene'nu a uya' beella pa acu beella.

⁶Che uni Jesuse lubeella:

—Ubi'yahua li'ihua, lu cuenda' levadura' bee fariseo cuna bee saduceo.

⁷Che uni bee bene'nu lu sa'beella:

—Uninu scua xne lá auya'ahua pá da'cua'ahua.

⁸Pero uri'i Jesuse beya' nú unibeella lu sa'beella, nu uninu lubeella:

—¿Xinu rnhua nú la lu'cuhua pá? ¡Xinu lle'natsia nzeli arqui'hua li'á! ⁹¿Xie! lasca' ri'ihua beya', nu la ellu'cu arqui'hua chenu udelea ayu'tsia pá udacu ayu' mili bee bene la? ¿Nu se xala llume pá nú uzucu subrasca' uquietesa'hua?

¹⁰¿Nu xie' le'ca la ellu'cu arqui'hua chenu udelea achi pá udacu tacu mili bee bene, nu se xala llume pá nú uzucu subra uquiete'sa'hua la?

¹¹Xiquie nú lá ri'ihua beya' nú lá nia luhua lu cuenda' pá, li'á rnia luhua nú bi'yahua li'ihua lu levadura' bee fariseo cuna bee saduceo.

¹²Che uri'i bee bene'nu beya' nú lá ninu lu cuenda' levadura, sino que uninu lubeella nú bi'ya beella li'ibeella lunú xa sete' bee fariseo cuna bee saduceo bee bene.

Uni Pedro nú neca Jesuse Cristo

(Mc. 8:27-30; Lc. 9:18-21)

¹³Chenu uriña Jesuse lu iliu Cesarea de Filipino, unedichia'nu lubee bene'nu nú uninu:

—¿Ti rni bee bene nú neca Li'á Bene enu uxe'la Diose?

¹⁴Nu ucuaqui beella lu Jesuse, nú unibeella:

—Nu' bee bene enu rni nú necalu Juan Bautista, nu le'ca nu' bee enu rni nú necalu profeta Elías, nu nu' bee enu rni nú necalu profeta Jeremías, urre stucu profeta hua'tu.

¹⁵Che uninu lubeella:

—Li'iquiehua, ¿ti rnhua nú necaa?

¹⁶Nu ucuaqui Simón Pedro lunu:

—Li'ilu necalu Cristo, Lli'ñi Diose enu nehuañi.

¹⁷Che uni Jesuse lulla:

—Ñia neca lu cuenda'lu Simón lliana' Jonás, xne ni' tucu bee bene ne ixiule'e nucua' lulu, sino que Paa enu nzucu liñibe ulube' nucua' lulu. ¹⁸Nu li'á nia nú necalu Pedro, nu rni nucua' quiee, nu equie cuenda' li'ilu aca huaxilá bee benea nu ni' eluti la ri'i ana nitilu li'ibeella. ¹⁹Li'á liquia elurnibiya' nú nze'ta enza liñibe lulu, nu lu titse enu niilu nú neca perdonala stula lu iliulabe quie', le'ca neca perdonala stula nze'e liñibe, nu bene enu niilu nú la neca perdona stula lu iliulabe quie', le'ca la neca perdona stula nze'e liñibe.

²⁰Che uni Jesuse lubee bene'nu nú la ixiule'e beella lu ni'tucu bee bene, nú li'inu necanu Cristo.

Udixiule'e Jesuse nú atinu

(Mr. 8:31-9:1; Lc. 9:22-27)

²¹Desde che uquixie Jesuse udixiule'enu lubee bene'nu nú rqui'ña nú nzanu Jerusalén. Nu bee usticia' bee bene Israel cuna bee ule'ya enu rnibiya' lubeelá bee ule'ya cuna bee ulaxcuela enu reca ley, ri'ibeei nú chiqui' nehuana zecanu. Nu udixiule'enu nú utibeei li'inu, pero bichia rriuna huañi zecanu. ²²Chequie unguya' Pedro li'inu tucu chu nu unilla lunu:

—iLa zela Diose nú acane scua! iNu la zecalu scua!

²³Che ubelleta Jesuse nu uninu lu Pedro:

—iUlluna' lua beze'lu, nu la ri'ixi'ilu lua! Xne elliebacu' nú rri'ilu la ye'ta nucua' lu Diose, rri'itsialu elliebacu' tucu nú rri'i bee bene iliulabe elliebacu'.

²⁴Che uninu lubeelá bee bene'nu: —Tunu nu'ta tucu bee bene enu niarqui' aca bee benea, la yala nú ri'illa tucu nú niarqui'tsialla, rqui'ña nú riqui'lla xitse nú nehuana zecalla nu ye'ta quiella li'á. ²⁵Xne bee bene enu masela niarqui' nú huañi lu iliulabequie' enta bichia nú nitilu nucua', pero bee bene enu ati equie nú neca beei bee benea, lu'cu bee nze'e elunehuañi nú leca xunga laxu lu Diose. ²⁶¿Lecaxi zibi' nú ri'i bee bene ana ye nú nu' lu iliulabequie', tunu nitilulla ante Diose? Xne leca modo tsibene elunehuañi' bene liñibe. ²⁷Nu Li'á Bene enu uxe'la Diose, chenu nzela stucu bese, nzela cuna poder nú rlu'cu Pa Diose nu cuna bee ángele'nu. Bichia ze'e detea lu cada tucua bee bene lunú

riala ati'lla, equie cuenda' lunú uri'iilla. ²⁸Li'á nia luhua, nú nu' bee bene enu nucua'a ca'a lá ati hasta nú lañi'beeí nú riña zeca Li'á Bene enu uxe'la Diose, nzela cuna poder nú rlu'cua para nú nibiya'a.

Uche'e nú xneca rnaa Jesuse

(Mc. 9:2-13; Lc. 9:28-36)

17 Chenu udete xu'cu bichia, che uyanu Jesuse Pedro, Jacobo nu cuna Juan enu neca bichi Jacobo uya beella equie tucu dañi elu aya, ²ze'e uche'e nú xa rnaa Jesuse lubeella. Nu chiqui' rulu siqui' lunu xi rulu ellie'e bichia, nu unga niquichua'quie' xucunu nu rulu siqui'i. ³Hora ze'e ulañi' beella nú rdichia'nu Jesuse Moisés cuna Elías. ⁴Che uni Pedro lu Jesuse:
—Detá, ineca nze'ca nú nellua'anuru li'ilu ca'a! Tunu niarqui'lu reche'ru chuna ranchu: tucue para li'ilu, stucue para Moisés nu stucue para Elías.

⁵Diqui nú rnisca' Pedro, hora ze'e ulaca tucu xcabe nú rulusiqui' utsacu' equie Jesuse cuna bee bene ze'e. Nu liñi xcabe ze'e ubene' beella tucu chii nú uni:

—Neca ninguie' Lli'ñia enu chiqui' se'caa. Nu ñia nzu arquialu, uzu'cu'hua nú rninu.

⁶Chenu ubene' bee bene' Jesuse chi cua', uzucu lliqui beella nu hasta luyuu uzi'quindiqui beella, nu chiqui' ulliqui beella. ⁷Che uyabica Jesuse lubeella, nu uti'yanu li'ibeella nu uninu lubeella:

—Utsulíhua, nu la lliquihua.

⁸Nu chenu uletsa beella lubeella ulañi' beella nú leca' tinu' ze'e, stucutsia Jesuse nzulá ze'e.

⁹Chenu enta laca beella dañi ze'e, uni Jesuse lubeella:

—La ixiule'ehua lu ni'tucu bee bene lunú ulañi'hua, hasta bichia nú huañi zeca Li'á Bene enu uxe'la Diose.

¹⁰Chequie unedichia' bee bene'nu lunu nú uni beella:

—¿Xiquie nú rni bee ulaxcuela enu reca ley nú rluti Elías rqui'ña nú riña?

¹¹Che ucuaquinu lubeella:

—Neli nú nze'ta rluti Elías para nú tsuche'lla yeene. ¹²Pero Li'á nia luhua nú ube'tala Elías, nu né chulu bee bene li'illa tucu nú riala nú a chulu beeí li'illa, nu xitse uri'ínu ye bee bene li'illa. Nu le'ca scua nehuana ri'ínu bee bene Li'á Bene enu uxe'la Diose.

¹³Che uri'i bee bene'nu beya' nú rninu lu cuenda' Juan Bautista.

Uri'iyeca Jesuse tucu endu' enu seca ichia ziñia

(Mr. 9:14-29; Lc. 9:37-43)

¹⁴Chequie chenu uriña beella elu nucua'a bee bene, uyabica tucu bene lu Jesuse nu utsulliquii lunu nú uni:

¹⁵—Detá, uhua'a arqui' endua xne secái ichia ziña nu chiqui' nehuana secái, nu huaxi bese sana'i lu quii, cuna lu inza. ¹⁶Uriñayua endua lubee bene'lu, pero lá aca beella riyeca beella li'i.

¹⁷Chequie ucuaqui Jesuse nú uninu:

—iCue'hua bee bene enu rlu'cu dula núla chili arqui'hua li'á! ¿Se xala tiambu rqui'ña nú tsunua li'ihua?, nu ¿se xalalá tiambu riquilá li'ihua? Uteyuhua endu'cua' ca'a.

¹⁸Che uqui'ya' benechiqui' uri'i Jesuse nu unibiya'nu nú chiu'ui arqui' endu' ze'e, nu hora ze'e uyeqa' endu' ze'e.

¹⁹Chenu nucua'a li'itsia Jesuse cuna bee bene'nu unedichia' beella lunu nú uni beella:

—¿Xiquie nú né acaru ahuaru benechiqui' arqui' endu' ze'e?

²⁰Che uni Jesuse lubeella:

—Xne lle'natsia nzeli arqui'hua Li'á. Li'á nia luhua nú tunu neli nzeli arqui'hua masia xi lle'na ebichi mestasa, neca lunú nzeli arqui'hua Li'á, nu' modo nihua lu dañiquie! “Ulluna' ca'a nu uquia stucu luhuare”; nu zucu' dañi nú nihua. Lecaxi aca neríña' para li'ihua tunu neli nzeli arqui'hua.

²¹Pero para nú chiu'u clasia' bee benechiqui' cua', rqui'ña nú dete'hua bichia núla acuhua, nu nacu'hua lu Diose.

Udixiule'e Jesuse bese rrucu nú atinu

(Mr. 9:30-32; Lc. 9:43-45)

²²Chenu nucua'a beella lu iliu Galilea, uni Jesuse lubee bene'nu:

—Li'á Bene enu uxe'la Diose dete' cuenda bene li'á lubee bene, ²³nu uti beei li'á, pero bichia rriuna huañi zecaa. Chenu ubene' bee bene'nu nú uninu scua chiqui' nehuana utsu arqui'beella.

Udixiu Jesuse impuesto' indu

²⁴Chenu uriña Jesuse cuna bee bene'nu eyeche Capernaum, uya bee bene enu rri'i cubre impuesto para indu llene Jerusalén lu Pedro nu unidichia' beei lulla, nu unibeei:

—¿Rixiu maestro'lu impuesto' indu la?

²⁵Che ucuaqui Pedro lubeei:

—Aahua' rixiunue.

Nu chenu uyu'u Pedro liñi ni'i elu nzu Jesuse, rlutilánu uninu lu Pedro:

—¿Xa nilu, Simón? ¿Ti riala ixiu impuesto lubee arre iliulabequie! bee bene lachilla la, o bee bene rene la?

²⁶Nu ucuaqui Pedro nú unilla lunu:

—Bee bene rene.

Nu uni Jesuse lu Pedro:

—La qui'ña nú ixiu bee bene lachilla impuesto. ²⁷Pero para nú lecati lee lua'ahua, mejora uquia ru'u inzatu', nu du'lu anzuelu'lu lue, nu bela rluti enu uculu. Liñi ru'í ulua tucu melu nú riqui' chetixiulu equie impuesto, cuendaa cuna cuenda'lu, uya'e nu uquia tixiu.

Ti máse neca equie

(Mr. 9:33-37; Lc. 9:46-48)

18 Che le'ca bee bichia ze'e, unedichia' bee bene' Jesuse lunu, nú unibeella:

—¿Ti máse neca equie elurnibiya' Diose liñibe?

²Chequie ubixia Jesuse tucu endu' utsunu labe beella, ³nu uninu lubeella:

—Li'á nia luhua nú tunu la che'e arqui'hua lu stulahua nu acahua xi neca bee endu', la chu'uhua elurnibiya' Diose liñibe. ⁴Enze'e nia nú bene enu aca lle'na arqui' xi neca arqui' endu' quie', nze'e aca enu máse aca neca equie elurnibiya' Diose liñibe. ⁵Nu titse bene enu ri'i

elietsa lu tucu endu' equie cuenda'
Li'á, lua rri'i nze'e elietsa.

**Ubi'yahua li'ihua para nú la
zana'hua lu dula**

(Mr. 9:42-48; Lc. 17:1-2)

⁶Pero titse bee bene enu ri'i nú zana' tucu endu' enu nzeli arqui' Li'á lu dula, máse neca nze'ca para bene ze'e nú llica'cu bene tucu quie molino añilla nu tsi'qui benella hasta aquee lu inzatu'. ⁷iCue' bee bene iliulabe nú nu' huaxi beenú necha neca bee nú rri'i nú rri'i bee bene dula! Siempre nu'beenú necha neca lu iliulabe, pero icue' bene enu ri'i nú ri'i stucu bene dula!

⁸Enze'e tunu ri'i yalu urre cuchiu'lu nú ri'ilu dula, mejora uchie'cu'e nu utsi'quii istu, xne máse neca nze'ca nú chu'ulu liñibe cuna tucutsia yalu nu tucutsia cuchiu'lu, luquela nú chalu cuna rucu yalu nu rucu cuchiu'lu lu quii nú leca xunga laxu. ⁹Le'ca tunu rri'i i'cululu nú rri'ilu dula, mejora uhuane nu utsi'quii istu, xne máse neca nze'ca nú chu'ulu liñibe cuna tucutsia i'cululu, luquela nú chalu luquii ebila cuna rucu i'cululu.

Ejemplu' sanchi enu uniti

(Lc. 15:3-7)

¹⁰La huachuhua ni' tucu bee endu' quie', xne nia luhua nú bee ángele enu rriucu li'ibeei nucua'a lu Diose Pa liñibe. ¹¹Xne Li'á Bene enu uxe'la Diose uriña para nú tsiala'á bee bene enu nza inziu nú necha neca.

¹²¿Neca xi neca nú tucu bene rlu'cu tucu ayu'u sanchi, nu nitilla tucuí? ¿Xie' la tsa'nasca'lla noventa

y nueve bee sanchi ze'e dañi nu che cua'nalla sanchi enu uniti la? ¹³Nu tunu llela'llaí, masesca'la ñia tsu arqui'lla nú ullela'lla sanchi enu uniti luquela noventa y nueve sanchi enu lá niti. ¹⁴Le'ca scua, pa'hua enu nzucu liñibe, la niarqui'nu nú nitilu ni' tucu bee bene enu nzeli arqui' li'inu.

Xa riala ri'i bene lu sa'lla

(Lc. 17:3)

¹⁵Tunu nu' xi necha uri'inu sa'lu li'ilu, ubedichia' rucutsiahua uni' lulla nú necha uri'illa lulu. Che tunu uri'i casolla nú unilu lulla, uri'ilálu ana nú nucua'a nze'cahua che. ¹⁶Pero tunu lá ri'i casolla nú unilu lulla, uya' chiucu chuna bee bene para nú nihua lulla. ¹⁷Nu tunu ni' nú rni bee benecua' la zucu'lla, che udixiule'e lubeelá bee bene enu nzeli arqui' Diose, nu tunu la ri'i casolla nú rni bee bene enu nzeli arqui' Diose, che lu'cu cuendatsiahualla nú necatsialla xi neca tucu bene enu la chili arqui' Diose urre xi neca tucu bene enu rri'i cubre impuesto.

¹⁸Li'á nia luhua nú titse sa'hua enu nzeli arqui' Diose enu ri'ihua perdona lu iliulabequie' le'ca neca perdonalalla liñibe, nu titse sa'hua enu nzeli arqui' Diose enu la ri'ihua perdona stula lu iliulabequie' le'ca la neca perdona stula nze'e liñibe.

¹⁹Le'ca nia luhua, nú tunu chiucuhua aca tucunecatse para nú nacu'hua xi nacu'hua lu Diose Paa liñibe lu iliulabequie', li'inu liqui'nue. ²⁰Xne elu riete'sa' chiucu chuna bee bene equie cuenda' li'á, ze'e nzua cuna li'ibeella.

²¹Che uyabica Pedro lu Jesuse nu unedichia'lla lunu, nú unilla:

—Detá, ¿xala bese rqui'ña nú ri'á perdona bee sa'a, tunu nu' xi uri'i nze'e lua? ¿Hasta achi bese la?

²²Nu ucuaqui Jesuse lulla:

—La nia nú achitsia bese. Sino que nia lulu nú hasta setenta bese siete rqui'ña nú ri'ilu perdona bee sa'lu, nucua' rni nú diqui tiambu ri'ilu perdona sa'lu.

Ejemplu' bene enu lá ri'i perdona

²³Tucu nú rnibiya' Diose neca nú rnibiya' tucu arre enu uri'i elliebacu' nú uza'la bichia nú ixiiu bee bene enu rri'i riña' lulla nú nezi'qui beei lulla. ²⁴Nu chenu uquixie arre ze'e nú rlacu'lla calu nezi'qui cada tucua bee bene lulla, che uriñayu bee bene tucu bene enu rri'i riña' lulla enu nezi'qui huaxi dimi lulla. ²⁵Nu lunú la lu'cui xi ixiiu lu arre. Che unibiya' arre ze'e nú iquii cuna una'i cuna bee endu'i, nu cuna ye bee stene'i para nú yaxu nú nezi'quii lu arre ze'e.

²⁶Che utsulliqui moso' ze'e lu arre nu uziquiei lu arre, nú uni: “Detá, ala' chiu'u arqui'lu tsuquiesca' lle'na ixiiuca ye nú nezi'quia lulu.”

²⁷Chequie uhua'a arqui' arre ze'e li'i, nu né ixiiu nú nezi'quii lu arre ze'e nu che utsana' arre li'i. ²⁸Pero chenu uchiu'u moso' ze'e lu arre, uchu'ui stucu moso' enu le'ca sibi' lu arre nu nezi'qui moso' quie' lui lle'na dimi. Che chu una'tsei añi moso' ze'e utsi'ii, nu uni: “iUdixiu nú nezi'quilu lua!” ²⁹Che utsu lliqui bene ze'e lui, nu uziquie nze'e lui nú uni nze'e: “Ala' chiu'u arqui'lu tsuquiesca' lle'na, ixiiuca ye nú

nezi'quia lulu.” ³⁰Pero né zelai atsuquiei, nu udu'i bene ze'e ni'cu' hasta nú ixiiu nze'e ye nú nezi'qui nze'e lui. ³¹Chenu ulañi' beelá bee sa'i enu rri'i riña' lu arre ze'e nucua', chiqui' ulebeei nu uyatixiule'e beei lu arre lu ye nú unga. ³²Chequie chu unibiya' arre nú ye'ta bene enu unga nezi'qui lulla, nu unilla lu bene ze'e: “iChiqui' necha rri'ilu! Li'á uri'á perdona ye nú nezi'quilu lua, xne uziquielu lua. ³³Le'ca scua li'ilu riala nú ahua'a arqui'lu sa'lu, tucu nú uhua'a arquia li'ilu.” ³⁴Nu lunú chiqui' rle arre ze'e, chequie unibiya'lla nú cha bene ze'e ni'cu' hasta nú ixiiu ye nú nezi'quii lu arre.

³⁵Chenu ulaxu nú uni Jesuse ejemplu cua', che uninu:

—Le'ca scua ri'inu Pa liñibe li'ihua tunu la ri'ihua perdona bee sa'hua diquinu' arqui'hua.

Uni Jesuse equie cuenda' nú la le'e bene una'a bene

(Mc. 10:1-12; Lc. 16:18)

19 Chenu ulaxu nú uni Jesuse scua, uchiu'unu lu iliu Galilea nu uriñanu lu iliu Judea stucu chú re'cu Jordán. ²Nu uyanala huaxi bee bene li'inu, nu ze'e uriyecanu bee bene enu riti.

³Che uyabica chiucu chuna bee fariseo lunu para nú ri'i beei preu li'inu, nu unedichia' beei lunu nú unibeei:

—¿Nu' modo nú le'e niyu una'ai equie xitse tucu nú uri'inchu la?

⁴Chequie ucuaqui Jesuse nú uninu lubeei:

—¿Xie' lasca ulahua lu ichi' Stichia' Diose elu rni, nú li'inu enu

ureche' bee bene desde nú uquixie iliulabe, “ureche'nu niyu cuna una'a la”? ⁵Le'ca uninu: “Enze'e za'na niyu pa'i cuna na'i para nú yucui una'i, che rucu beei neca beei xi neca tucutsia bene.” ⁶Scua la neca' beei chiucu bene, sino que tucutsia neca beei. Enze'e leca modo nú ri'i tucu bene nú le'esa' bee bene enu uri'i Diose nú neca tucunecatse.

⁷Che uni bee fariseo lu Jesuse: —¿Xiquie nú unibiya' Moisés nú nu' modo le'e bene una'a bene, tunu acache' tucu ichi' elu rni nú le'e sa'lla?

⁸Chequie uni Jesuse lubee fariseo: —Equie nú chiqui' nziti arqui'hua, enze'e uzela Moisés nú le'ehua una'ahua. Pero chenu uquixie iliulabe né acae scua. ⁹Nu Li'á nia luhua nú titse niyu enu le'e una'a, nu la necane nú uri'i una'alla eluhuexe cuna stucu niyu, nu yuculla stucu una'a, rri'illa dula che, nu niyu enu yucu una'a enu ule'e niyu', le'ca rri'i nze'e dula.

¹⁰Chequie uni bee bene' Jesuse lunu:

—Tunu scua necane lu cuenda' niyu cuna una'alla, nzalá nú la chia bene che.

¹¹Che uni Jesuse lubeella:

—La ye bee bene rri'i beya' nucua', sino que bee bene enu udete'tsia Diose elliebacu' nú ri'i beya' nucua' rri'i beya'e. ¹²Xne nu' bee bene enu desde nú ungula lá ala para nú chia, le'ca nu' bee bene enu la chia equie nú reca remediolla, nu nu' bee bene enu la chia lunú rri'illa elliebacu' nú mejora ixiule'ella Stichia' Diose luhuare nú chialla. Enu riqui' núla chia, la chia nze'e.

Uri'ile'ya Jesuse bee endu'

(Mr. 10:13-16; Lc. 18:15-17)

¹³Che uriñayu bee bene chiucu chuna bee endu' lu Jesuse para nú ricu'nu yanu equie beei nu nacu'nu lu Diose lu cuenda' beei, pero uqui'ya' bee bene enu uriñayu bee endu' ze'e uri'i bee bene'nu. ¹⁴Pero uni Jesuse lubee bene'nu:

—Uzelahua nú ye'ta bee endu' lua, nu la cahua nú ye'ta beei lua, xne liñibe elurnibiya' Diose neca para bee bene enu neca arqui' xi neca arqui' bee endu' quie'.

¹⁵Chenu ulaxu nú uricu'nu yanu equie bee endu' ze'e, che chu nzanu.

Ubedichia'nu tucu bene xene Jesuse

(Mr. 10:17-31; Lc. 18:18-30)

¹⁶Uya bi'ya tucu bene Jesuse nu unedichia' bene ze'e lunu nú uni:

—Maestro enu neca bene nze'ca, ¿xi nú neca nze'ca ri'á para nú lu'cua elunehuañi nú leca xunga laxu?

¹⁷Nu uni Jesuse lui:

—¿Xinú rnilu nú neca bene nze'ca? Leca ni' tucu bene nze'ca tucutsia Diose neca bene nze'ca. Pero tunu niarqu'lu lu'culu elunehuañi nú leca xunga laxu liñibe, uzu'cu' nú rni bee mandamiento.

¹⁸Che uni bene ze'e lu Jesuse: —¿Ta bee mandamiento rqui'ña nú zucua che?

Nu uni Jesuse lui:

—La utilu bene, la na'tselu stucu una'a enu la neca una'alu, nu la ri'ilu eluhuaña, nu la ta'lu eluquichia' bene, ¹⁹ulu'cu ula'na lu pa'lu cuna lu na'lu, nu uzeca sa'lu tucu nú secalu li'ilu.

²⁰Che uni bene ze'e lu Jesuse:

—Ye bee nucua' sucua hasta chenu necaa endu'; ¿neeque xilá rri'i nú zucua?

²¹Nu uni Jesuse lu bene ze'e:

—Tunu niarqui'lu nú huañilu tucu nú niarqui' Diose, uquia tuti ye beenú rlu'culu nu ude'te' dimicua' lubee bene enu seca elitsi, che lu'culu eluxene liñibe, nu chu ye'ta quielu Li'á.

²²Pero chenu ubene' bene ze'e nucua', chiqui' nehuana utsu arqui' nziai xne chiqui' xenei.

²³Chequeie uni Jesuse lubee bene'nu:

—Li'á nia luhua, nú chiqui' neriña' nú chu'u tucu bene xene liñibe elurnibiya' Diose. ²⁴Li'á nia luhua, nú mase facil nú dete tucu cameyu i'chiu echedicu, luquelá nú chu'u tucu bene xene liñibe elurnibiya' Diose.

²⁵Chenu ubene' bee bene' Jesuse nú uninu scua, chiqui' uyanu arqui' beella, nú uni beella lusa' beella:

—¿Ti nu' modo tsila'a che?

²⁶Nu ubi'ya Jesuse lubeella nu uninu lubeella:

—Para bee bene neriña' neca nucua' pero para Diose lecaxi neriña'.

²⁷Chequeie uni Pedro lu Jesuse:

—Li'iru utsa'naru ye beenú rlu'curu para nú nzela queeeru li'ilu. ¿Xi ati'ru, lu cuenda' nucua' che?

²⁸Che uni Jesuse:

—Li'á nia luhua nú chenu riña bichia nú aca necuqui yeene, nu chenu zucua'a lu xleta nú nibiya'a li'á Bene enu uxe'la Diose, li'ihua enu entanala li'á le'ca zucuhua lu chi'chiucu xleta, para nú hualuhua

lu cuenda' ye bee bene enu nze'ta lu chi'chiucu familia Israel. ²⁹Nu titse bee bene enu utsa'na ni'i, urre bichilla, urre zanalla, urre pa'lla, urre na'lla, urre una'alla, urre bee endu'lla, urre bee yu'lla equie cuenda' Li'á, ati'lla tucu ayu'u bese masela lunú utsa'nalla, nu le'ca lu'culla elunehuañi nú leca xunga laxu liñibe. ³⁰Pero huaxi bee bene enu neca equie lu iliulabe quie' nee, aca bee nze'e enu la neca equie'a bichia ze'e, nu bee bene enu la neca equie nee lu iliulabe quie', aca neca equie bee nze'e bichia ze'e.

Ejemplu' bee bene enu rri'i riña' lu uva

20 Le'ca uni Jesuse lubee bene'nu.

—Elurnibiya' Diose neca xi neca tucu bene enu rlu'cu tucu yuu llene nú nu' uva, nu sila'tu' uchiu'ulla nzecua'nalla bee moso' para nú ri'i riña' lu uva'lla. ²Nu unixulla lubee moso' ze'e nú calu ixiulla beei tebichia nu uzela beei, che uxe'lalla beei nú che ri'i beei riña' lu yu'lla. ³Cheelá uchiu'ulla nzalla tucu rquie quie' sila' nu ulañi'lla nú nucua'a chiucu chuna bee bene ru'u i'ya enu la lu'cu riña'. ⁴Che unilla lubeei: “Uquia ri'ihua riña' lu yuua elu nu' uva nu ixiucahua lunú riala yaxuhua.” Che chu nzuebeei riña'lla. ⁵Le'ca uchiua'la bene ze'e nzalla tucu rebibichia, nu le'ca esquie nza'lalla tucu rquie chuna uche, nu le'ca esquie'ala unilla lubee bene enu nucua'a ru'u i'ya enu la lu'cu riña'. ⁶Nu tucu rquie ayu' uche, uchiu'u zeca'lalla nzalla ru'u i'ya nu uchu'ulla stexcua'a

bee bene enu la lu'cu riña', nu unilla lubeei: “¿Xiquie nú debichia nucua'ahua ca'a nu la ri'ihua riña'?”
 7 Che uni bee bene ze'e lulla: “Xne lá llela'ru riña' ri'iru.” Che unilla lubeei: “Uquia ri'ihua riña' lu yuua, elu nu' uva nu ixiucahua lunú riala yaxuhua.”

8 Chenu uyu'u rula', uni patrón lu moso' enu rnibiya' lubee moso': “Ubixia bee moso' nu uquixie udixixu bee enu uriña último, nu che chu ixiulu beelá bee enu rluti uriña.”
 9 Nu chenu uriña bee moso' enu uyu'u lu riña' tucu rquie ayu' uche, ye beei uyaxu beei tucu nú rri'i bene ana tebichia.
 10 Chequie chenu uyala nú yaxu bee moso' enu uyu'u rluti lu riña', uri'i beei elliebacu' nú maselá yaxu beei, pero le'ca ye beei uyaxu beei tucu nú rri'i bene ana tebichia.
 11 Chequie chenu riaxu beei ulebeei lu patrón ze'e, 12 nu unibeei lulla: “Bee bene quie' uriña uche, nu uri'itsia beei riña' tucu hora nu udixiulu beei tucu nú rixiulu li'iru, nu li'iru uriqui'ru uri'iru riña' lube debichiallu.”
 13 Chequie ucuuqui patrón ze'e, nú unilla lu tucu beei: “Amigo, lecaxi nú necha neca uri'á lulu. Xne li'á unixua lulu nú calu ixialu tebichia. 14 Enze'e uyucu dimi'lu nu yaalu. Xne li'á niarquia nú ixia bene enu uche uyu'u lu riña' tucu nú udixia li'ilu. 15 ¿Xie' leca modo ri'á lunú niarquia cuna dimiala?, urre ¿Xie' ria arqui'lu nú rri'i nze'ca la?”
 16 Scua necane, xne bee bene enu leca tineca nee aca neca equie bee nze'e, nu bee bene enu neca equie nee la aca neca equie bee nze'e bichia ze'e. Xne

huaxi bee bene nezene' lu inziu' Diose pero la huaxi bee bene enu chenala inziu'nu.

**Udixiule'e Jesuse bese rriuna nú uti
bee bene li'inu**

(Mr. 10:32-34; Lc. 18:31-34)

17 Chenu nza Jesuse enza Jerusalén, che ubixianu lu chi'chiucu bee bene'nu tucu chú nu uninu lubeella:

18 —Nediya'la'hua nú nza'ahua enza Jerusalén elu dete' cuenda bee bene Li'á Bene enu uxe'la Diose lubee ule'ya enu rnibiya' lubeelá bee ule'ya, cuna lubee ulaxcuela enu reca ley, nu nibiya' beei nú atia.
 19 Nu dete' cuenda beei Li'á lubee bene rene para nú lli'chinu beei Li'á, nu zete'che' beei Li'á nu quie'e beei Li'á lu cruse, pero bichia rriuna huañi zecaa.

**Unacu' na' Jacobo cuna Juan tucu
faura lu Jesuse**

(Mr. 10:35-45)

20 Chequie uyabica una'a Zebedeo cuna rucu lliana' beella lu Jesuse, nu utsulliquilla lunu, nu unacu'lla tucu faura lunu. 21 Che unedichia' Jesuse lulla:

—¿Xi niarqu'i'lu?

Nu unilla lunu:

—Chenu nibiya'lu niarquia nú zucu tucu endua cue'tselu chúbe, nu stucui zucu cue'tselu chúbeca.

22 Pero uni Jesuse lubeella:

—La ri'ihua beya' lunú rnacu'hua. ¿Xie' nu' modo nú nehuana zecahua tucu nú nehuana zecaa la? ¿Xie' nu' modo riqui'hua zecahua lunú riala zecaa la?

Che uni beella lunu:

—Aahua', riqui'ru.

²³Che ucuacquinu lubeella:

—Neli nú nehuana zecahua tucu nú nehuana zecaa. Nu riqui'hua zecahua lunú zecaa. Pero enu zucu cue'tsea chúbe urre chubeca. La neca Li'á enu riala nibiya' nucua', sino que necala nucua' para bee bene enu ucañila Diose Paa liñibe.

²⁴Nu chenu ubene' se xi'i bee bene'nu nucua', ule beella lu Juan cuna lu Jacobo. ²⁵Pero ubixia Jesuse beella nu uninu lubeella:

—Li'ihua nediya'hua, nú bee bene enu rnibiya' lu iliulabe quie' rnibiya' beei lubee bene tucu nú niarqui'tsia beei, nu bee bene enu neca equie cua' rri'i beei tucu nú niarqui'tsia beei lubee bene lunú rnibiya' beei.

²⁶Pero letahua la yala nú acane scua. Sino que enu niarqui' nibiya' letahua, rqui'ña nú zibi'lla lu yehua, ²⁷nu enu niarqui' nú mase aca neca equie letahua, rqui'ña nú acalla enu zibi' luhua, ²⁸scua tucu nú uriña Li'á Bene enu uxe'la Diose, lá yela para nú zibi' bee bene lua, sino que uriña lu iliulabe para nú zibi'a lubee bene, nu equie nú atia tsila'a huaxi bee bene lu stula beei.

Uriyeca Jesuse chiucu bene enu la ye'e lu

(Mr. 10:46-52; Lc. 18:35-43)

²⁹Chenu uchiu'u Jesuse cuna bee bene'nu eyeche Jericó, nzequie huaxi bee bene li'inu. ³⁰Nu chiucu bee bene enu la ye'elu nucua'a ru'u inziu, chenu ubene' beei nú udete Jesuse ze'e, urixialibeei nú unibeei lunu:

—iDetá, lli'ñi David, uhua'a arqui' li'iru!

³¹Nu uqui'ya' beei uri'i bee bene para nú zaca beei, pero masescalá urixialibeei nú unibeei:

—iDetá, lli'ñi David, uhua'a arqui' li'iru!

³²Chequie utsuxe Jesuse nu ubixianu rucu bee bene enu la ye'elu ze'e nu uninu lubeei:

—¿Xi niarqui'hua nú ri'á luhua?

³³Che unibeei lunu:

—Detá, niarqui'ru nú ye'e i'culuru para nú lañi'ru.

³⁴Chequie uhua'a arqui' Jesuse beei, nu uti'yanu i'culu beei. Hora ze'e uye'e lubeei, nu chu nzequie beei li'inu che.

Uyu'u Jesuse Jerusalén

(Mr. 11:1-11; Lc. 19:28-40; Jn. 12:12-19)

21 Chenu nzeriñala beella axu Jerusalén, uriña beella tucu dañi nú lee Olivos, axu eyeche Betfagé, che uxe'la Jesuse chiucu bee bene'nu, ²nu uninu lubeella: —Uquiahua eyeche nú nchiucu' enza lucua'. Ze'e llela'hua tucu burro enu nequietu cuna lli'ñi. Uxe'chehua beei nu ye'tayuhua beei ca'a. ³Nu tunu nu' ti ni xi ni luhua, uni'hua lu bene ze'e nú Detá, Jesuse rqui'ñaí, nee chu nzelayuzecaru beei.

⁴Scua unga para nú uyalu tucu nú uni tucu profeta hua'tu, chenu uquie'ella:

⁵Uni'hua lubee bene eyeche llene Sión:

“Ubi'yacuruhua, nze'tala arré'hua luhua nee, nu nze'tanu xi nze'ta tucu bene enu la neca equie, nchiucu'nu equie tucu burro, tucu burro lla'na,

lli'ñi nañi enu ruya' yuhua'.”

⁶Chequie uya bee bene' Jesuse nu uri'i beella tucu nú uninu lubeella.

⁷Che uriñayu beella burro ze'e cuna lli'ñi lu Jesuse, nu uricu' beella xucu beella equie burro lla'na ze'e, nu chu uricu Jesuse equieí. ⁸Nu lunú chiqui' huaxi bee bene nucua'a ze'e, nu' beei rcua'a xucu labe inziu elu detenu, nu textcua'a beei uchiecu' bee leca lubee aca ucua'a beei labe inziu elu detenu. ⁹Che bee bene enu nzuculu, cuna bee bene enu nzequie, rixiali beei nú rnibeei:

—iÑia neca lu cuenda' li'inu enu neca Lli'ñi arre David! iChiqui' ñia neca lu cuenda' li'inu enu nze'ta lu cuenda' Pa'ahua Diose! iChe'tsalá Diose Paa enu nzucu liñibe!

¹⁰Chenu uriña Jesuse Jerusalén, ye bee bene ze'e uyacha beei nu unibeei lu sa'beei:

—¿Ti bene quie'?

¹¹Che unibeei lusa'beei:

—Profeta Jesuse nucua', enu neca bene eyeche Nazaret lu iliu Galilea.

Utiliaca' Jesuse bee bene labe ele'ya' Indu llene Jerusalén

(Mr. 11:15-19; Lc. 19:45-48; Jn. 2:13-22)

¹²Chenu uriña Jesuse labe ele'ya' indu llene Jerusalén utiliaca'nu ye bee bene enu ruti cuna ye bee bene enu si labe ele'ya' indu ze'e. Nu utelletanu bee mexa' bee bene enu xi'la dimi, cuna xleta' bee bene enu ruti bee paloma, ¹³nu uninu lubeei:

—Lu ichi' Stichia' Diose rni: “Nia chiulee ni'i elu nacu' bee bene lu Diose”, pero li'ihua uri'ihuane xi neca yube' bee huana'.

¹⁴Che liñi indu ze'e uyabica bee bene enu la ye'e i'culu cuna bee

bene enu necuxu ante Jesuse, nu uriyecanu beei. ¹⁵Pero chenu ulañi' bee ule'ya enu rnibiya' lubee ule'ya cuna bee ulaxcuela enu reca ley bee milagro nú rri'i Jesuse, nu chenu ubene' beei nú rixiali bee endu' nucua' ze'e: “iÑia neca lu cuenda' li'inu enu neca Lli'ñi arre David!”, ule beei ¹⁶nu unibeei lu Jesuse:

—¿Riene'lu nú rni bee endu' cua' la?

Che ucuaqui Jesuse lubeei:

—Aahua', rienea. Pero ¿xie' lasca' ulahua lu ichi' Stichia' Diose elu rni lu cuenda' nucua' la? Lu ichi' Stichia' Diose rni:

Uri'ilu nú bee endu' lla'na cuna bee endu' me'e enu rachi, neca bee enu ula bee canto nu zucu' aya li'ilu.

¹⁷Che uya'na beei ze'e, nu uchiu'unu nzanu eyeche Betania, nu ze'e uya'nanu rula' ze'e.

Aca higo nú ubichi

(Mr. 11:12-14, 20-26)

¹⁸Chenu uye'e lu yuu stucu bichia, ubenchila' zecanu Jerusalén, nu ulia'na'nu. ¹⁹Che ulañi'nu tucu aca higo ru'u inziu nu uyabicanu lue. Pero lá llela'nu higo lue, bee lecatsia nu'lue. Chequie uni Jesuse lu aca higo ze'e:

—iLeca' xunga ayu ndixi lulu! Hora ze'e ubichi aca higo ze'e.

²⁰Chenu ulañi' bee bene' Jesuse nucua', chiqui' uyanu arqui'beella nu unidichia' beella lu Jesuse:

—¿Xiquie nú chu ubichi aca higo cua'?

²¹Chequie uni Jesuse lubeella:

—Li'á nia luhua nú tunu nzeli arqui'hua masia teme', nu la za'

arqui'hua, la neca nú nucua'tsia ri'ihua tucu nú uri'á lu aca higo, sino que nihua lu dañiquie': "Uyetsu ca'a nu uzana' lu inzatu'", nu scua acane. ²²Nu ye nú nacu'hua lu Diose, tunu neli nzeli arqui'hua nú liqui'nu nucua', che yucuhuane.

Elurnibiya' nú rlu'cu Jesuse

(Mr. 11:27-33; Lc. 20:1-8)

²³Luze'elá uyu'u Jesuse liñi indu llene Jerusalén sete'nu bee bene, che uyabica bee ule'ya enu rnibiya' lubeelá bee ule'ya cuna bee usticia' bee bene Israel lunu, nu unibeei lunu:

—¿Ti uliqui' stichia' nú rri'ilu ye bee nucua'?, nu ¿Ti uliqui' elurnibiya' lulu?

²⁴Che uni Jesuse lubeei:

—Le'ca nedichia'a tucu luhua niarquia, tunu cuaquihua nú nedichia' luhua, che ixiule'a luhua ti uliqui' elurnibiya' nú rri'á scua. ²⁵¿Ti uxe'la Juan nú rinzalla bee bene che? ¿Diose uxe'lalla la o bee bene uxe'lalla la?

Che unibeei lusa'bee, nú unibeei:

—Tunu nia'ahua nú Diose uxe'la Juan Bautista, che ni nucua' lua'ahua: "¿Xiquie nú né chili arqui'hua nú unilla che?" ²⁶Nu le'ca leca modo nia'ahua nú bee bene uxe'la Juan, xne xiquia'ahua bee bene, xne ye bee bene nzeli arqui' nú neca Juan tucu profeta' Diose.

²⁷Che unibeei lu Jesuse:

—Labiya'ru.

Chequie uni Jesuse lubeei:

—Le'ca esquie la ixiule'a luhua ti uliqui' elurnibiya' nú rri'á scua.

Ejemplu' tucu bene enu ulu'cu chiucu lliana'

²⁸Nu uni Jesuse lubeei:

—¿Xa rri'ihua elliebacu' lunú nia luhua nee? Tucu bene ulu'cu chiucu lliana', nu unilla lu tucui: "Endu', uquia ri'i riña' lu yuua elu nu' uva." ²⁹Che ucuaqui lliana'lla lulla: "¡La niarquia cha'a!" Pero luze'elá uche'e elliebacu'i nu uyai. ³⁰Chequie uya ni' pa' beei lu stucui, tucu nú unilla lu enu rlu, nu uni lulla: "Nza'ca che." Uni, pero né chai. ³¹Neequie uni'hua, ¿ta lu rucu bee lliana'lla uri'i lunú niarquilla'?

Che unibeei lunu:

—Enu unilla lu rluti.

Chequie uni Jesuse lubeei:

—Li'á nia luhua nú bee bene enu rri'i cubre impuesto para Roma, cuna bee una'a huexe rluti bee nze'e chu'u elurnibiya' Diose liñibe luquela li'ihua. ³²Xne ube'ta Juan Bautista udixiule'e luhua nú xa huañihua, nu né chili arqui'hua nú unilla, a'laquie bee bene enu rri'i cubre impuesto para Roma cuna bee una'a huexe uchilí arqui'bee nú unilla. Pero li'ihua mase ulañi'hua bee nucua', ne che'e arqui'hua, para nú a chili arqui'hua nú unilla.

Ejemplu' bee moso' enu necha uri'i

(Mr. 12:1-12; Lc. 20:9-19)

³³Chequie uni Jesuse lubeei uzu'cu' diacahua ne nia stucu ejemplu luhua: Tucu bene uquienu bee aca uva lu yuu', nu udu'lla elu'u diqui abenchila'e, nu ureche'lla tucu elu tsi'i bee uva, le'ca ureche'lla tucu elu aya para nú aca ucu yuu elu nu' bee aca uva ze'e.

'Che udete'lla yuu cua' lle'la lu chiucu chuna bee bene enu ri'i riña' lue, nu chu nzalla istu. ³⁴Chequie

chenu uriña tiambu nú le'e beella uva, uxe'lalla chiucu chuna bee moso'lla chetucu bee uva nú rialalla. ³⁵Pero bee bene enu rri'i riña' lle'la lu yuu'lla una'tse beei bee moso' enu uxe'lalla, tucu moso' ze'e uzete'che' beei, stucu nze'e unguuti beei, nu stucui udu' beei quiee. ³⁶Che bene enu neca stene yuu ze'e, uxe'la'lalla huaxilá bee moso'lla luquela nú rlu, pero le'ca esquie uri'inu beei bee moso' cua'.

³⁷Último uxe'lalla endu'lla, xne uri'illa elliebacu': "Lu endusia lu'cu beei ula'na." ³⁸Pero chenu ulañi' beei nú nze'ta endu' bene enu neca stene yuu ze'e, che unibeei lusa'beei: "Bene quie' neca enu ya'nanu yuu quie', te utia'hua nucua' para nú ya'nanua'ahua yuu quie'." ³⁹Che una'tse beei li'i, nu uhua beei li'i lu yuu ze'e nu chu unguuti beei li'i.

⁴⁰Chequie unedichia' Jesuse lubee bene ze'e nú uninu:

—Chenu riña bene enu neca stene yuu ze'e, ¿xa rri'ihua elliebacu' nú ri'inulla bee bene ze'e enu udete'lla yuu'lla lle'la lu che?

⁴¹Che unibei lu Jesuse:

—Utila beei sin nú hua'a arqui'lla beei, nu dete'lla yuu'lla lu texcua'a bee bene, enu dete' cuenda ula'cu nú rialalla chenu aca ula'cue.

⁴²Le'ca uni Jesuse lubee fariseo:

—¿Xie' lasca' ulahua lu ichi' Stichia' Diose elu rni?

Quiee nú uhua u'na bee bene enu rreche' ni'i,

quiee quie' neca nú mase uzibi' ungache' ni'i.

Nucua' neca nú uri'i Diose, nu chiqui' nzenu arquia'ahua lunú uri'inu.

⁴³Enze'e nia luhua nú chiu'uchuhua elurnibiya' Diose liñibe nu chu'u téxcua'a bee bene luhua're'hua, bee enu neli ri'i tucu nú niarquí'nu.

⁴⁴Pero titse bee bene enu llica cuchi' cuna quiee ze'e, nehuana zecalla, nu tunu nu'ti zana' quiee cua' equie la'xulii li'illa.

⁴⁵Chenu ubene' bee ule'ya enu rnibiya' lubeelá bee ule'ya cuna bee fariseo bee ejemplu nú uni Jesuse, che uri'i beei beya' nú lu cuenda' beei uninu. ⁴⁶Chequie hora ze'e uniarqui' beei a na'tse beei li'inu, pero xiqui beei bee bene, xne nzeli arqui' bee bene nú necanu tucu profeta.

Ejemplu' tucu eluchia

(Lc. 14:15-24)

22 Chequie unilá Jesuse bee ejemplu lubeei nú uninu:

²—Elurnibiya' Diose neca xineca tucu arre enu uri'i tucu tsa'a nú uchua endu'lla. ³Nu uxe'lalla bee moso'lla para nú chetucu beei bee bene enu nezene' lu tsa'a ze'e, pero lá zela bee bene ze'e achaa.

⁴Chequie uxe'lalla xiucu xuna bee moso'lla, nu unilla lubeei:

“Uni'hua lubee bene enu nezene' lu tsa'a nú necalula nú acu bee bene. Unibiya'lá nú unguuti bee u'na' enu mase neru'cu, cuna beelá bee nañia enu mase neru'cu, nu ye bee nucua' necala, uni'hua lubeella nú ye'ta beella lu eluchia.” ⁵Pero bee bene enu nezene' lu tsa'a ze'e né ri'i caso beei nú uni bee moso' arre ze'e lubeei. Tucu bene ze'e nza nzebi'ya yuu', nu stucui nzequienu berexe', ⁶nu texcua'a beei una'tse bee moso' enu uxe'la arre ze'e, nu

uzete'che' beei bee moso' ze'e hasta nú unguuti beei bee nze'e.
 7Chequie chiqui' ule arre ze'e, nu uxe'lalla bee sundado'lla nú utibeei bee bene enu unguuti bee moso'lla, nu tsiqui' beei lachi bee bene ze'e.
 8Che unilla lubee moso'lla: “Neca listola yeene para nú aca tsa'a, pero bee enu uzene' nú ye'ta lu tsa'a la yala nú ye'ta beei. 9Uquiahua lubee calle nu ye bee bene enu lla'cahua uni'hua lubeella nú ye'ta beella lu tsa'a.” 10Chequie nzue bee moso'lla uquiete'sa' ye bee bene enu ulla'ca beei lubee calle, sia bee bene nze'ca nu sia bene enu necha rri'i, scua uche ni'i arre ze'e elu unga tsa'a.
 11'Nu chenu uyu'u arre ze'e liñi ni'i para nú lañi'lla bee bene enu nezene' lu tsa'a, che ulañi'lla tucu bene enu la nutu laquie nú rutu bene enu nezene' lu tsa'a. 12Che uni arre lu bene ze'e: “Amigo, ¿xa uyu'ulu ca'a, nu la nutulu laquie nú riala utulu lu tsa'a?” Pero lecalí xi ucuaqui bene ze'e lu arre.
 13Chequie uni arre lubee bene enu rricu' bee elubacu lu mexa: “Ulli'ca'cuhua cuchiu' benequie' cuna yai, nu utsi'quihuai eli'ya' elu necabe, elu una'i nu aculayai.”
 14Xne huaxi bee bene enu nezene', pero lle'natsia bee bene enu chu'u.

Equie cuenda' impuesto

(Mc. 12:13-17; Lc. 20:20-26)

15Chenu ulaxu nú uni Jesuse bee ejemplu. Che uchiu'u bee fariseo luhuare ze'e nu ubedichia' beei equie cuenda' nú xi nibeei lu Jesuse, para nú ninu tucu bedichia' nu xa ta' quiya beei li'inu. 16Che uxe'la bee fariseo cua' chiucu chuna bee

bene' beei lu Jesuse, cuna chiucu chuna bee bene' Herodes, nú nibeei lunu:

—Maestro, nediya'ru nú neli beenú rnilu nu neli sete'lu nú xa niarquí' Diose nú huañi bee bene, sin nú ri'i casolo nú rni bee bene, xne la bi'yalu nú xa rnaa bee bene.
 17Neequie uni' luru: ¿Neca nze'ca nú dixiuru impuesto lu arre Cesar la, o la neca nze'cae la?

18Pero uri'i Jesuse beya' nú necha neca elliebacu' beei, enze'e uninu lubeei:

—Nequichia'hua, ¿xinu rri'ihua preu li'á scua? 19Ulube'hua tucu melu nú riaxu impuesto lua.

Che chu udete' beei tucu denario yanu. 20Chenu ulañi'nu melu cua', che unedichia'nu lubeei:

—¿Tiluu nú nequie lu melu quie' nu ti lee enu nequie lue?

21Nu ucuaqui beei nú unibeei lunu:

—Arre Cesar nucua'.

Che uni Jesuse lubeei:

—Ude'tehua lu arre Cesar lunú neca cuenda' arre César, nu ude'te'hua lu Diose nú neca cuenda' Diose.

22Chenu ubene' beei nú uni Jesuse scua, chiqui' uyanu arqui'beei, che utsa'na beei li'inu nu chu nzuebeei.

Equie cuenda' nú huañi zeca bee bene enu unguiti

(Mr. 12:18-27; Lc. 20:27-40)

23Le'ca mismo bichia ze'e uya chiucu chuna bee saduceo lu Jesuse. Nu bee saduceo lachili arqui' nu huañi zeca bee bene enu unguiti. Enze'e unedichia' beei lu Jesuse nú unibeei:

²⁴—Maestro, Moisés uni nú tunu ati tucu niyu nu uya'na una'lla nu né lu'cu beella endu', che rqui'ña nú chia bichi tuxie ze'e una'a ze'e para nú lu'cu beei endu' enu aca xi neca endu' tuxie ze'e. ²⁵Leta'ahua nucua'a tucu familia enu ulu'cu achi bichi. Bichi rlu beei uyucu una'a pero ungutilla. Nu né lu'culla endu' cuna una'alla, chequeie uyucu bichi rruculla una'a ze'e. ²⁶Le'ca scua ulle'ca bichi rruca beella, cuna bichi rriuna beella, hasta nú ungu' luza' achi bichi beella. ²⁷Luze'elá, le'ca ungu' una'a ze'e. ²⁸Neequie, chenu huañi zeca bee bene enu ungu' ti, ¿ta luza' achi bee bene cua' neca niyu' una'a ze'e, xne ye beella uchua beella una'a ze'e?

²⁹Nu ucuaqui Jesuse lubee saduceo ze'e nú uninu:

—Rnihua scua xne la ri'ihua beya' Stichia' Diose nu la chuluhua xneca neca lunú rnibiya' Diose. ³⁰Xne chenu huañizeca bee bene enu ungu' ti, la yucua' bee bene sa' bee bene, nu la detea' bee bene endu' bee bene chia, sino que acatsia bee bene xi neca bee ángele' Diose liñibe. ³¹Pero equie cuenda' nú huañi zeca bee bene enu ungu' ti, ¿xie' lasca' ulahua lu ichi' Stichia' Diose elu rninu? ³²“Li'á neca Diose lu Abraham, lu Isaac cuna lu Jacob.” Nu Diose la necanu Diose lubee bene enu ungu' ti, sino que necanu Diose lubee bene enu nehuañi.

³³Chenu ubene' ye bee bene ze'e lunú uni Jesuse, chiqui' nzenu arqui'beei lunú xa sete'nu.

Mandamiento nú máse neca equie

(Mr. 12:28-34)

³⁴Chenu ungabiya' bee fariseo nú leca' xi allela arqui' bee saduceo

uni lu Jesuse, uyetesa' beei. ³⁵Nu tucu bee fariseo cua'a enu neca ulaxcuela enu reca ley. Unedichia' lu Jesuse para nú dete'i preu li'inu, nu uni lunu:

³⁶—Maestro, ¿ta mandamiento nú mase neca equie enta lu ley?

³⁷Che uni Jesuse lui:

—“Uzeca Pa'lu Diose diquinu' arqui'lu, cuna diqui lunú necalu cuna diqui nu' elliebacu'lu.”

³⁸Ninguie' neca mandamiento rlu' ti, nú mase neca equie. ³⁹Nu casi iguaelee cuna mandamiento rruca nú rni: “Uzeca sa'lu tucu nú secalu li'ilu.” ⁴⁰Enze'e titse bee bene enu sucu' rucu bee mandamiento quie' sucu'la nze'e ye nú rni ley, cuna ye nú uquie'e bee profeta.

¿Ta lubee familia nze'ta Cristo?

(Mr. 12:35-37; Lc. 20:41-44)

⁴¹Chenu neyete'sa'sca' bee fariseo luhua' ze'e, ⁴²che unedichia' Jesuse lubeei:

—¿Xa rri'ihua elliebacu' lu cuenda' Cristo? ¿Ti lu familia' nze'tanu?

Che unibeei lunu:

—Lubee familia' David nze'tanu.

⁴³Chequie uni Jesuse lubeei:

—Pero, ¿xi quie nú equie cuenda' Espíritu Santo uni David lunu, li'ilu rnibiya'lu lua? Xne uni David:

⁴⁴Diose uni lu li'inu enu rnibiya' lua:

“Uzucu cue'tsea chube, hasta nú ri'á ana nibiya'lu lubee bene enu rle lulu.”

⁴⁵¿Enze'e tunu neca Cristo endu' David, xinu rni David lunu, li'ilu rnibiya'lu lua?

⁴⁶Nu ni' tucu bee bene enu nucua'a ze'e né cuaqui ni' tucu

bedichia' lunu, nu desde bichia ze'le leca' xi unedichia' beella lunu.

Uni Jesuse nú necha rri'i bee fariseo cuna bee ulaxcuela enu reca ley

(Mr. 12:38-40; Lc. 11:37-54; 20:45-47)

23 Chequie uni Jesuse lubee bene'nu cuna lubee bene enu nucua'a ze'le:

²—Bee ulaxcuela enu reca ley cuna bee fariseo, sete' beei bee bene lunú rni ley' Moisés. ³Enze'le nia luhua nú uzu'cu'hua stichia' beei, nu ri'ihua ye nú rnibeei, pero la ri'ihua tucu nú rri'i beei, xne li'ibeei rnibeei tucu nú rnibeei pero la ri'ibeei tucu nú rnibeei. ⁴Chiqui' neriña' lunú rnibiya' beei nú ri'i bee bene, pero puro rnibiya'tsia beei nú ri'i bee bene lunú rnibeei nu ni' la niarqui' beei ri'i beei elietsa' bee bene para nú ri'i bee bene lunú niarqui' beei. ⁵Nu ye nú rri'i beei rri'itsia beei scua para nú lañi' bee bene. Nú riu' arqui'beei nú riaca'cuu tucu iti nú nu'che' Stichia' Diose tiquie beei cuna testu' xcu beei. Le'ca riu' arqui'beei nú rutu beei laquie nú stuñi luxu.

⁶Nu rle' beei nú zucu beei luhuare elu rcua'a bee bene enu mase neca equie chenu nezene' beei nú nzetacu beei lu tucu eliñi, le'ca scua rri'i beei liñi indu, ⁷le'ca riu' arqui'beei nú lu'cu bee bene ula'na lubeei chenu xa'ca bee bene li'ibeei lu inziu, nu ni bee bene ulaxcuela lubeei.

⁸'Pero li'ihua la yala nú le'hua nú ni bee bene ulaxcuela luhua xne neca tucutse li'ihua nu tucutsia ulaxcuela rlu'cuhua nu li'inu necanu Cristo. ⁹Nu la nihua pa lu

ni'tucu bee bene iliulabe enu laca pa'hua, xne tucutsia Paa rlu'cuhua, nu li'inu nzucunu liñibe. ¹⁰Le'ca la le'hua nú ni bee bene luhua nú necahua enu rnibiya', xne nu' tucutsia enu rnibiya' nu li'inu necanu Cristo. ¹¹Nu bene enu mase neca equie letahua, rqui'ña nú zibi'lla luhua. ¹²Xne bene enu sucu' aya le'catsia li'i aca lle'na nze'e, nu enu reca lle'na arqui' zucu' aya bee bene nze'e.

¹³'iCue'hua bee ulaxcuela enu reca ley nu bee fariseo, xne la ri'ihua tucu nú rnihua!, nu la zelahua nú ri'i bee bene beya' xariala ri'i beei para nú aca beei bee bene' Diose. Nu ni' li'ihua la la'nahua nú acahua bene' Diose, nu rcahua nú aca bee bene enu niarqui' nú aca bee bene' Diose.

¹⁴'iCue'hua, bee ulaxcuela enu reca ley nu bee fariseo, xne la ri'ihua tucu nú rnihua!, xne raxihua ni'i bee una'a zaqui, nu para nú ni bee bene nú necahua bee bene nze'ca, che xee rnacu'hua lu Diose. Enze'le yalahua castiya nú mase fuerte.

¹⁵'iCue'hua bee ulaxcuela enu reca ley nu bee fariseo, xne la ri'ihua tucu nú rnihua! Xne diqui lu iliulabe rla'nahua bee bene enu chu'u chu'hua, nu chenu uri'ilahua ana tucu bene, chiucu bese masela rri'ihualla lli'ñi beze'lu luquela li'ihua.

¹⁶'iCue'hua, xne la ri'ihua beya' nu niarqui'hua nú zete'hua bee bene!, nu rnihua: “Tunu nu' ti rni istá indu Jerusalén ri'ya, lecaxi neca nú ni bene scua, pero bene enu rni equie cuenda'

oro nú necache' liñi indu llene Jerusalén, rqui'ña nú ri'illa tucu nú unilla.” ¹⁷ ¡Xala netunduhua nu niquie'luhua! ¿Ta nú mase neca equie oro nú necache' liñi indu la, urre indu la? Xne indu rri'i nú necale'ya oro ze'e. ¹⁸ Nu le'ca rnihua: “Nú lecaxi neca tunu rni bene, nú rnilla istá ru'u ecu'cu ri'ya, pero tunu rnilla istá u'na nú nchiucu' ru'u ecu'cu ri'ya, rqui'ña nú ri'illa tucu nú unilla.” ¹⁹ ¡Xala netunduhua nu niquie'luhua! ¿Ta nú máse neca equie u'na la?, urre ¿Ecu'cu nú rri'i nú necale'ya u'na la? ²⁰ Enze'e bene enu rni ista ecu'cu ri'ya, nu la necane equie cuenda' ecu'cutsia le'ca necane luye nú nchiucu' lue. ²¹ Nu le'ca esquie bene enu rni nú ista indu ri'ya, nu la necane nú indutsia ri'ya le'ca ri'ya Diose Paa liñibe enu nzu presencia' liñi indu. ²² Le'ca esquie bene enu rni nú istá liñibe ri'ya, le'ca rnilla nú ri'ya Diose nu le'ca rnilla nú ri'ya xleta elu nzucunu. ²³ ¡Cue'hua bee ulaxcuela enu reca ley, nu bee fariseo, xne la ri'ihua tucu nú rnihua! Li'ihua rdete'hua diezmo bee huañi nu lee menta, anís nu cumiñu lu Diose tucu nú rnibiya' ley, pero la zucu'hua lunú mase neca equie rnibiya' ley nú ri'ihua. La ri'ihua tucu nú necane lubee bene, la hua'a arqui'hua bee bene nu la tsu tenilí arqui'hua lunú nzeli arqui'hua Diose. Nucua' riala nú ri'ihua, sin nú tsana' arqui'hua nú rdete'hua diezmo lu Diose. ²⁴ ¡Li'ihua necahua xi neca enu nequie'lu xne niarqui'hua nú zete'hua bee bene nu ni' li'ihua la acahua, nu

ri'yahua li'ihua nú la ri'ihua dula nú lle'natsia neca! ¡Nu la bi'yahua li'ihua nú rri'ihua dula nú mase necha neca! ¡Tucu nú rni bee bene: Ri'yahua li'ihua nú la aquihua seruchi' pero riaquihua cameyu!

²⁵ ¡Cue'hua bee ulaxcuela enu reca ley nu bee fariseo, xne la ri'ihua tucu nú rnihua! Li'ihua necahua xi neca bee vaso cuna bee pliato nú leca xinaa di'chi, xne rlube' nú necahua bene nze'ca pero liñi arqui'hua nu' nú neyi' rcua'ahua nu rcachi'hua.

²⁶ Li'ihua bee fariseo neca xi neca nú niquie'luhua: Rluti che'exu arqui'hua lunú necha rri'ihua, che lube' nú neli rri'i nze'cahua.

²⁷ ¡Cue'hua bee ulaxcuela enu reca ley nu bee fariseo, xne la ri'ihua tucu nú rnihua! xne necahua xi neca eluhua nú nequichi netsuu nú ñia naa tetsu'e. Pero liñi ache nu' bee arta' bene nguti cuna ye beenú necha rnaa. ²⁸ Scua necahua, xne ante lubee bene rlube' nú nze'cahua. Pero liñi arqui'hua ache nu' nú necha neca nu chiqui' nequichia'hua.

²⁹ ¡Cue'hua bee ulaxcuela enu reca ley cuna bee fariseo! ¡Xne la ri'ihua tucu nú rnihua! Li'ihua rreche'hua equie eluhua' bee profeta nu suche'hua equie eluhua' bee bene enu uhuañi tucu nú niarqui' Diose, ³⁰ nu rnihua: “Tunu uhuañia'ahua tiembu nú uhuañi bee bene'ahua enu udetela, lá aria'ahua elietsa' beella nú autia'ahua bee profeta enu unguiti beella.” ³¹ Lunú rnihua scua, rri'ihua beya' nú necahua lli'ñi bee bene enu unguiti bee profeta. ³² ¡Neequie ula'xuhua,

uri'ihua lunú uquixie uri'i bee
bene'hua enu udetela!

³³¡Necha rri'ihua! ¡Li'i sihua
netsiñahua xi netsiña bee be'la!
¿Xa modo tsila'ahua lu castiya nú
nzu zecahua ebila? ³⁴Nee xe'la
bee profeta, cuna bee bene enu
chiqui' reca, nu bee ulaxcuela enu
zete' li'ihua Stichia' Diose. Pero nu'
beella enu utihua nu nu' beella enu
quie'ehua lu cruse, nu beelá beella
zete'che'hua liñi bee indu'hua, nu
tiliaca'hua beella cada eyeche.
³⁵Enze'e li'ihua ricu' equiehua rene'
bee bene enu uri'i nze'ca lu Diose
bee enu ungutí, desde rene' Abel
enu uhuañi tucu nú niarquí' Diose
nu hasta rene' Zacarías lliana' bene
enu lee Berequías Zacarías enu
ungutihua enza ru'u indu elu siqui'
bene nañi u'na lu Diose. ³⁶Li'á nia
luhua nú bee bene enu nehuañi
nee, li'ibeei zecabeei castiya equie
cuenda' yebee nucua'!

Unguna' Jesuse equie cuenda' eyeche Jerusalén

(Lc. 13:34-35)

³⁷Nu uni Jesuse:
—iBee bene Jerusalén, bee bene
Jerusalén, li'ihua ruutihua bee
profeta, nu rdu'hua quiee bee Bene
enu uxe'la Diose luhua! ¡Huaxi bese
uniarquía nú quietesa'ahua xi rri'i
lli'ti chenu rquiete'saí bee ti'ñi'í
riu'u liñi cuacaí, pero né zelahua!
³⁸Enze'e nia luhua nú enta bichia
nú tsana' arquí' Diose lachihua.
³⁹Le'ca nia luhua nú leca' bichia nú
lañi'la'hua li'á hasta nú riña bichia
chenu nihua: “Chiqui' ñia neca lu
cuenda' li'ínu enu nze'ta lu cuenda'
Pa'ahua Diose liñibe.”

Udixiule'e Jesuse nú rila indu llene Jerusalén

(Mc. 13:1-2; Lc. 21:5-6)

24 Chenu uchiu'u Jesuse liñi
indu llene Jerusalén nu
nzanu, che uyabica bee bene'nu
lunu, para nú lube' beella lunu
beelá bee ni'i nú necache' indu ze'e.
²Che uninu lubeella:
—Rlañi'hua indu quie' scua nee.
Pero li'á nia luhua nú nze'ta bichia
nú la ya'na' ni' stucu quiee quie'
equie sa'e. Yeene rilae.

Xi seña aca chenu enta laxu iliulabe

(Mc. 13:3-23; Lc. 21:7-24; 17:22-24)

³Che uya Jesuse cuna bee bene'nu
equie dañi Olivos, nu chenu
nzucunu ze'e, che uyabica bee
bene'nu lunu nu unibeella lunu:
—Niarqui'ru nú ixíule'elu luru.
¿Xunga aca nucua'? Nu ¿xi seña
aca chenu enta zecalu stucu bese?,
nu ¿xi seña aca chenu nze'ta laxu
iliulabe?

⁴Che uni Jesuse lubeella:
—Ubi'yahua li'ihua para nú lecati
zequienu li'ihua. ⁵Xne nze'ta huaxi
bee bene enu ni nú nze'ta beei
equie cuenda' li'á, nu nibeei luhua:
“Li'á necaa Cristo”, nu scua zequienu
beei huaxi bee bene. ⁶Pero li'ihua
yene'hua nú reca xuu urre nú aca
xuu, la lliquihua xne scua nzu nú
acane, pero lasca' riña nú laxu
iliulabe. ⁷Xne liunu tucu nación
cuna stucu nación, nu liunu tucu
ubiernu cuna stucu ubiernu, nu aca
biña, nu aca xú huaxi bee luhua
lu iliulabe. ⁸Ye nucua' neca nú
apenatsia quixie nú nehua zeca
bee bene.

⁹'Che dete' cuenda bee bene li'ihua lubee bene enu ri'i nú nehuana zecahua, nu utibeei li'ihua, nu le'ca esquie ye bee bene iliulabe chana arqui' li'ihua nú necahua bee benea. ¹⁰Chenu aca bee nucua' huaxi bee bene tsana' arqui' nú nzeli arqui'beella li'á, nu chana arqui'sa' beella, nu dete' cuenda beella sa' beella lubee usticia. ¹¹Le'ca nze'ta huaxi bee bene enu lia ni nú neca beei profeta' Diose. Nu zequienu beei huaxi bee bene. ¹²Nu equie nú chu'u huaxi nú necha neca lu iliulabe, huaxi bee bene la zeca' beella sa'beella. ¹³Pero bene enu la tsana' arqui' nú nzeli arqui' li'á diqui tiambu nú nehuañilla, tsila'a Diose bee nze'e. ¹⁴Nu bee bedichia' nze'ca' Diose nú riene'hua nee ri'chia letsee luye bee bene iliulabe, para nú acabiya' yeebe benene che laxu iliulabe.

¹⁵Tucu nú uquie'e profeta Daniel chenu unilla: Chenu lañi'hua nú nchiucu' nú nechahua rnaa liñi indu Jerusalén luhuafe elu necachi neca, enu rula ichi' quie' riala ri'i beya' xi rnií, ¹⁶chequie bee bene enu nucua'a lubee eyeche lu iliu Judea, rqui'ña nú yecaxu'u beella enza dañi. ¹⁷Nu bene enu nchiucu' equie ni'i, la ria'lla ana nú chu'ulla liñi ni'lla para nú na'tsella stene'lla; ¹⁸nu bene enu nzu dañi, la benchila'lla ni'lla para nú chetuculla xuculla. ¹⁹iCue' bee una'a enu nu' endu' xla'cu cuna bee una'a enu nuu endu' enu rachi bee bichia ze'e! ²⁰Una'cuhua lu Diose para nú la aca bee nucua' chenu neca tiambu iqui, urre bichia nú sulachi bee bene; ²¹xne bichia ze'e

chiqui' nehuana zeca bee bene, nu lasca'lí zeca bee bene scua desde nú uquixie iliulabe, nu leca' xunga aca scua stucu bese. ²²Tunu la tsuxe Diose beenú aca tiambu ze'e, lecati tsila'a; pero tsuxenu bee nucua' xne secanu bee bene'nu enu ucañinu.

²³'Chequie tunu bichia ze'e nu' bee bene enu ni luhua: "Bi'yacuruhua ca'a nzu Cristo", urre "Bi'yacuruhua, zelu' nzunu", la chili arqui'hua nú ni beei luhua. ²⁴Xne nze'ta bee bene enu ni nú neca Cristo, urre bee enu lia ni nú neca profeta' Diose nu ri'ibeei bee milagro cuna beelá beenú ri'i nú chiqui' chenu arqui' bee bene para nú zequienu beei bee bene, nu tunu nu' modo hasta bee bene enu ucañila Diose zequienu beei. ²⁵Udixiule'exulá luhua lunú aca. ²⁶Enze'e, tunu nu' bee bene enu ni luhua: "Bi'yacuruhua Cristo nzu lu dañi achi cua'", la chahua ze'e, urre tunu ni bee bene luhua: "Bi'yacuruhua, Cristo, nzu liñi ni'i cua'", la chili arqui'hua nucua'. ²⁷Xne scua tucu nú ria'la lee nú rdu'llie'e desde elu rliñi bichia nu hasta enza ratse' bichia, scua aca chenu riña zecaa li'á Bene enu uxe'la Diose. ²⁸Nu tucu nú reca chenu riete' sa' bee ulabichi tucu luhuafe, elu nuxu nañi ati scua aca bichia ze'e.

Chenu nze'ta zeca Bene enu uxe'la Diose

(Mr. 13:24-37; Lc. 21:25-33; 17:26-30, 34-36)

²⁹'Pero bee bichia ze'e chenu udetela nú nehuana ulle'ca bee bene, cabeli lu bichia, nu la du'lliea' ellie' guu, nu zana' bee belaa enu

nchiucu' liñibe lu yuu, nu yebec
 nú nu' liñibe cuñi. ³⁰Chequie
 lañi' bee bene seña nú nzela enza
 liñibe, li'á Bene enu uxe'la Diose,
 nu ye bee bene iliulabe chiqui'
 una' chenu lañi' beei nú nzela li'á
 Bene enu uxe'la Diose leta xcabe
 liñibe, nu tu'na rulu siqui' nzela
 cuna ye poder nú rlu'cua. ³¹Nu
 xe'la bee ángelea nu juerte bixia
 bee trompeta para nú quiete'sa'
 beenu bee bene enu ucañilá diqui
 lu iliulabe.

³²Ulu'cu cuendahua ejemplu' aca
 higo: Chenu enta ye' ellutsa lue,
 cuna leca lue, nediya'la'hua nú enta
 riñala tiambu tsibee. ³³Le'ca scua
 chenu lañi'hua nú recalá bee nucua',
 uri'ihua beya' nú nzula nú riña zeca
 li'á Bene enu uxe'la Diose. ³⁴Li'á
 nia luhua nú yebec nucua' aca ante
 nú ati bee bene enu nehuañi tiambu
 quie'. ³⁵Liñibe cuna iliulabe nitilu,
 pero stichia'a la dete nú yalu yeene.

³⁶Pero lecati ri'i beya' xi bichia
 nu xi hora nú aca yebec nucua', nu
 ni' bee ángele liñibe, nu ni' Lli'ñi
 Diose la ri'i beya' xunga aca bee
 nucua'. Tucutsia Diose Pa liñibe
 nediya' xunga aca bee nucua'.

³⁷Tucu nú unga tiambu nú
 uhuañi Noe, le'ca esquie aca
 bichia chenu riña zeca li'á Bene
 enu uxe'la Diose. ³⁸Xne tiambu
 ze'e, ante nú xe'la Diose quia'ntsa'
 lu iliulabe, racu bee bene nu rue'
 beei, nu uchía beei, nu udete' beei
 xinchiu'cu beei uchía, scua uri'ie bee
 bene hasta bichia nú uyu'u Noe liñi
 barco; ³⁹nu chenu la za'lí arqui' bee
 bene uquixie ulaca tucu quia'ntsa'
 nu unguya' inza ye bee bene nu
 scua ungitibeei. Le'ca scua aca

chenu riña zeca li'á Bene enu uxe'la
 Diose. ⁴⁰Nu bichia ze'e chiucu niyu
 enu nucua'a dañi, tuculla nza nu
 stuculla ria'na. ⁴¹Le'ca chiucu una'a
 enu riuu, tuculla nza nu stuculla
 ria'na.

⁴²Enze'e ucua'a tsiñahua xne
 la ri'ihua beya' xi bichia nzela
 zecaa, li'á enu rnibiya' luhua.
⁴³Pero li'ihua nediya'hua nú tunu
 tucu bene nediya' xi hora rula'
 riña huana' chu'u ni'lla cachi'
 stene'lla, la a'tsella nu la zelalla
 nú chu'u huana' ni'lla cachi'
 stene'lla. ⁴⁴Enze'e, rqui'ña nú le'ca
 ucua'a tsiñahua xne chenu la za'lí
 arqui'hua, riña zeca li'á Bene enu
 uxe'la Diose.

**Moso' enu rri'i nze'ca nu moso' enu
 la ri'i nze'ca**

(Lc. 12:41-48)

⁴⁵¿Uri'ihua xi rri'i tucu moso' enu
 uya'na ucu ni'i patron', uya'nanulla
 ye bee moso' para nú dete'lla nú
 acu beei hora nú riala nú acu beei?
⁴⁶Ñia neca lu cuenda' moso' enu
 rri'i tucu nú rialane chenu riña
 patron'lla. ⁴⁷Li'á nia luhua, nú
 patron'cua' tsa'nalla lu moso' cua'
 nú bi'ya nucua' ye stene'lla. ⁴⁸Pero
 tunu moso' ze'e necha rri'illa, nu
 ri'illa elliebacu' nú rle'elá benchila'
 patron'lla enu rnibiya' lulla, ⁴⁹nu
 quixiella nú liunulla bee moso', nu
 acunulla nu hue'nnulla bee uniqui',
⁵⁰chequie riña patron'lla tucu bichia
 nú la ri'ilílla elliebacu' nú riñalla, nu
 tucu hora nú la ri'illa beya', ⁵¹nu che
 chiqui' juerte dete' patron'lla castiya
 li'illa, nu xe'la patron'lla li'illa elu
 nzue bee bene enu necha rri'i. Elu
 una'lla nu acu layalla.

Ejemplu' chi'i bee una'a e'ne'

25 'Le'ca uni Jesuse stucu ejemplu lubee bene'nu: Para nú chu'u bene liñibe elurnibiya' Diose, huaxi bee bene zeca tucu nú ulle'ca chi'i bee una'a e'ne' enu nuya' quinqué nzetsuquiee novio. ²Ayu' beenchu lá ri'i elliebacu' xi rqui'ña nu sayu' beenchu uri'i elliebacu' xi qui'ña. ³Bee enu lá ri'i elliebacu' xi qui'ña, unguya'tsia beenchu quinqué' beenchu pero né uya'lá beenchu aceite para nú chu'ulá liñi quinqué' beenchu, ⁴pero sayu' bee enu uri'i elliebacu' nú xi qui'ña, unguya' beenchu quinqué' beenchu nu le'ca unguya'lá beenchu aceite para nú chu'ulá liñi quinqué' beenchu. ⁵Nu lunú rle'e nú riña novio, una'tse cala' ye beenchu, nu uda'tse beenchu. ⁶Nu che tucu ulela' rula', ubene tucu chi nú fuerte uni: “iNze'tala novio; uquia cha'caluhualla!” ⁷Che uzetee ye bee una'a ze'e, nu uquixie beenchu nú utsuche' beenchu quinqué' beenchu. ⁸Nu sayu' beenchu enu lá auya' aceite uni beenchu lu sayu' sa'beenchu enu nuya' tsiña aceite: “Ala' chiu'u arqui'hua uli'quihua lle'na aceite'hua chu'u liñi quinqué'ru, xne enta yalala quinqué'ru.” ⁹Pero bee enu nuya' tsiña aceite ucuaqui: “La chiu'u arqui'ru liqui'rune, xne tunu liqui'rune la riqui'i ni' para li'iru nu ni' para li'ihua. Nzala nú uquiahua elu riqui' nu ze'e tsihuane tsi'hua aceite'hua elu riqui'.” ¹⁰Pero diquila nú nze tsi' beenchu aceite' beenchu, uriña novio. Che uyu'utsia

ayu' beenchu enu nucua'a tsiña lu eluchia, cuna novio, nu chu uyacu' ru'u puerta. ¹¹Luze'elá uriña sayu' bee una'a ze'e, nu uni beenchu: “iDetá, detá, ala' uxa'la ru'u puerta chu'uru!” ¹²Pero ucuaquilla lubeenchu: “Nia luhua nú la xa'lane xne la chuluahua.”

¹³Chequie uni Jesuse lubee bene ze'e:

—Ucua'a tsiñahua, xne la ri'ihua beya' xi bichia nu xi hora riña zeca Li'á Bene enu uxe'la Diose.

Ejemplu' dimi

(Lc. 19:11-27)

¹⁴'Le'ca uni Jesuse stucu ejemplu lubee bene'nu: Elurnibiya' Diose neca xi neca nú uri'i tucu bene enu nza istu, pero ante nú challa ubixiaxulla bee moso'lla para nú tsa'nalla dimi'lla lubeei.

¹⁵'Lu tucu moso' ze'e udete'lla ayu' mili, nulu stucui udete'lla chiucu mili, nulu stucui udete'lla tucu mili. Scua udete'lla yabeei tucu nú aca cada tucua beei ri'inu beei berexe. Cheelá nzalla istu. ¹⁶Moso' enu uyucu ayu' mili bexu, uri'inui dimi cua' berexe nu uri'i ana se sayu' mili bexu mase. ¹⁷Le'ca scua uri'i moso' enu uyucu chiucu mili, uri'i berexe cuna dimi cua', nu uri'i ana se xiucu mili mase. ¹⁸Pero moso' enu uyucu tucu mili, uduche' a'chi'i dimi' patron ze'e liñi tucu i'chiu nú uda'ñii lu yuu.

¹⁹Chequie xee tiambu uya patrón' bee moso' cua', che ubenchila' zecalla nu uquixiella unacu'lla cuenta' dimi'lla. ²⁰Nu rlutila uya moso' enu uyucu ayu' mili lulla, nu udete' cuendai ayu' mili bexu'lla nu

cuna se sayu' mili bexu lli'ñine, che uni moso' ze'e lu patron'i: "Detá, li'ilu uliqui'lu ayu' mili bexu ya nu nguie se sayu' mili bexu lli'ñine nú uri'á ana dete cuenda yaalu." ²¹ Che uni patron'i lui: "Neca nze'ca nú uri'ilu, necalu tucu bene nze'ca. Nu uri'ilu tucu nú necane, nu lunú uri'ilu tucu nú necane lu lle'na nú uliquia lulu, nee tsa'nalá huaxilá nú tsa'na lulu. Uyu'u nu ñia utsu arqui' cuna li'á." ²² Chela uriña moso' enu uyucu chiucu mili bexu, nu uni lulla: "Detá, uliqui'lu chiucu mili bexu ya, nu nguie se xiucu mili bexu lli'ñine nú uri'á ana dete cuenda yalu." ²³ Che uni patron'i lui: "Neca nze'ca nú uri'ilu, necalu tucu bene nze'ca. Nu uri'ilu tucu nú necane nu lunú uri'ilu tucu nú necane lu lle'na nú uliquia lulu, nee tsa'nalá huaxilá nú tsa'na lulu. Uyu'u nu ñia utsu arqui' cuna li'á."

²⁴ Pero chenu uriña moso' enu uyucu tucu mili bexu, uni lu patron'i: "Detá, li'á nediyaá nú la lu'cu arqui'lu bee bene, nu riuculu ula'cu elu lá ri'ilu riña' nu rri'ilu ula'cu elu lá du'lu nii. ²⁵ Enze'e ulliquia, nu uya'a uduche' a'chia'a dimi'lu luyuu. Pero nguie dimi'lu dete cuenda nee." ²⁶ Che uni patron'i lui: "Necalu tucu moso' enu necha rri'i nu nebichiu. Tunu nediya'lu nú riucua'a ula'cu nú lá ri'á riña'lu nu rri'á ula'cu elu lá du'a nii, ²⁷ ¿xiquie nú né du'lu dimia banco? Nu chenu benchila'a ayucua'a dimia cuna lli'ñine."

²⁸ Che uni patron ze'e lubee bene enu nucua'a ze'e: "Uxihua tucu mili bexu cua' ya benecua', nu ude'te'huane ya bene enu nzenela

chi'i mili bexu. ²⁹ Xne bene enu rlu'culane ati'la' nze'e huaxiláe, nu hasta nú lu'cu sobralae, pero bene enu lle'natsia nú rlu'cu, hasta lu lle'na nú rlu'culla yetsu yalla. ³⁰ Nu moso' enu la zibi' quie', uluahuai eli'ya' elu necabe nzu, nu ze'e una'i nu acuxa' layai."

Chenu hualu Jesuse lu cuenda' ye bee bene iliulabe

³¹ Chenu nze'ta zeca Bene enu uxe'la Diose nze'tanu cuna poder nú rlu'cunu, nu cuna ye bee ángele'nu para nú zucunu lu xleta elu nibiya'nu. ³² Nu ye bee bene iliulabe yete'sa' lunu, nu huachunu beella letasa' beella, xi rri'i bene enu rriucu bee sanchi nú rluachulla sanchi leta bee chipa. ³³ Nu bee bene enu neca bee bene'nu cua'anu bee nze'e chube'nu nu bee bene enu laca bee bene'nu cua'anu bee nze'e chubeca'nu. ³⁴ Che li'inu enu neca arre ninu lubee bene enu nucua'a chube'nu: "Utehua yehua bee enu uri'i le'yala Pa liñibe. Nu uyu'uhua liñibe elu rnibiya'nu elu utsuche'lanu para li'ihua desde chenu uquixie iliulabe. ³⁵ Xne chenu ulia'naa uliqui'hua nú udacua, nu chenu ubichia uliqui'hua nú ungüa'a, nu chenu unzea xi enze bene rene, uliqui'hua elu uya'naa. ³⁶ Nu chenu leca' xucua uliqui'hua xucua, nu chenu unga ritia ube'ta bi'yahua li'á, nu chenu ullutsea ni'cu' ube'ta bi'yahua li'á." ³⁷ Che ni bee bene enu uri'i nze'ca ze'e: "Detá, ¿xunga ulañi'ru nú ulia'na'lu nu uliqui'ru nú udaculu? Nu ¿xunga ulañi'ru nú ubichi'lu nu uliquiru nú ungüe'lu? ³⁸ Nu ¿xunga ulañi'ru nú unzelo xi unzee bene rene, nu uliqui'ru elu uya'nalu? nu ¿xunga

ulañi'ru nú leca' xuculu, nu uliqui'ru xuculu? ³⁹¿Nu xunga ulañi'ru nú ritilu nu ubela bi'yaru li'ilu?, nu ¿xunga ulañi'ru nú netselu ni'cu' nu ubela bi'yaru li'ilu?” ⁴⁰Nu li'inu enu neca arre, cuaquinu nú ninu: “Li'á nia luhua nú ye nú uri'ihua elietsa lu tucu bee benea mase nú lecati neca nze'e, neca xi neca nú lua uri'ihua elietsa.”

⁴¹Che ninu lubee bene enu nucua'a chubeca: “Ulluna'hua lua, li'ihua enu necha uri'i, uquiahua lu quii nú leca xunga yala elu neca para beze'lu cuna bee ángele'i. ⁴²Xne chenu ulia'naa, né liqui'hua nú acua, nu chenu ubichia, né liqui'hua xi ahua'a; ⁴³nu chenu unzea xi enzee tucu bene rene né liqui'hua elu aya'naa, nu chenu leca' xucua né liqui'hua xucua nu chenu ungaritia, nu le'ca ullutsea ni'cu' né ye'ta bi'yahua li'á.” ⁴⁴Chequie ni bee bene ze'e lunu: “Detá, ¿xunga ulañi'ru nú ulia'na'lu nu ubichi'lu, nu uya nzeelu xi enzee tucu bene rene, urre xunga ulañi'ru nú uzecala'cha'lu xuculu, urre ungaritilu, urre xunga ulañi'ru nú ullutselu ni'cu', nu ne ri'iru elietsa lulu?” ⁴⁵Che cuaquinu lubee bene ze'e: “Li'á nia luhua, luye nú né ri'ihua para nú ari'ihua elietsa lubee benea mase nú lecati neca nze'e, le'ca neca xi neca nú lua né ri'ihua elietsa.” ⁴⁶Nu bee bene quie' chaa lu castiya nú leca xunga laxu, nu bee bene enu uri'i nze'ca lu'cu elu nehuañi nú leca xunga laxu liñibe.

Uri'i bee bene elliebacu' xa modo utibeei Jesuse

(Mr. 14:1-2; Lc. 22:1-2; Jn. 11:45-53)

26 Chenu ulaxu uni Jesuse scua lubee bene, che uninu lubee bene'nu:

²—Li'ihua nediya'hua nú xiucutsia bichia rri'i nú aca eliñi baxcu, nu li'á Bene enu uxe'la Diose dete' cuenda bene li'á lubee bene para nú quie'e beei li'á lu cruse.

³Chequie bee ule'ya enu rnibiya' lubeelá bee ule'ya, cuna bee ulaxcuela enu reca ley nu cuna bee usticia' bee bene Israel, uyetesa' beei ru'u ele'ya ni'i ule'ya Caifás enu rnibiya' lubeelá bee ule'ya. ⁴Nu ze'e ubedichia' beei nú xa modo zequienu beei Jesuse para nú na'tse beei li'inu nú uti beei li'inu. ⁵Pero unibeei lusa'bee:

—La ria'ahua scua diqui nú reca eliñi para nú la tsu reche bee bene.

Tucu una'a udu' perfume equie Jesuse

(Mr. 14:3-9; Jn. 12:1-8)

⁶Chenu nzu Jesuse eyeche Betania, ni' Simón enu ri'chia bene leproso, ⁷che uriña tucu una'a lunu nu nuya'nchu tucu frasco perfume nú chiqui' huaxi seca, nu udu'nchue equienu chenu nzucunu lu mexa. ⁸Chenu ulañi' bee bene' Jesuse nucua', ulee beella nu unibeella lusa'beella:

—¿Xinu uti'chianchu perfume cua' scua? ⁹Ala' a'la aiqui perfumecua' para nú ri'inchu elietsa lubee bene enu seca elitsi.

¹⁰Nu chenu ubene' Jesuse nú uni beella, che uninu:

—¿Xinu rlehua lu una'a quie'?

Nu lunú uri'inchu lua neca nze'cae.

¹¹Xne bee bene elitsí siempre nucua'a letahua, pero li'á la tsua siempre letahua. ¹²Nu lunú udu' una'a quie' perfume equiea, neca nucua' nú nzuche'la cuerpoa chenu

achi'a. ¹³Li'á nia luhua nu catse lu iliulabe elu ixiule'e bee bene bedichia' nze'ca' Diose, le'ca nibee bene nú uri'ínu una'a quie' li'á, para nú ellu'cu arqui' bee bene li'inchu.

Udete' cuenda Judas Jesuse

(Mr. 14:10-11; Lc. 22:3-6)

¹⁴Che tucu lu chi'chiucu bee bene'nu enu lee Judas Iscariote, uya lubee ule'ya enu nrnibiya' lubeela bee ule'ya, ¹⁵nu uni Judas lubeella: —¿Calu liqui'hua para nú dete cuendaa Jesuse luhua che?

Che udete'beella alalichi'i melu plata yai. ¹⁶Nu desde bichia ze'e ucua'na Judas xneca modo dete' cuendai Jesuse lubee ule'ya.

Último exee nú udacunu Jesuse bee bene'nu

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷Bichia xee eliñi baxcu chenu racu bee bene Israel pa nú la chu'u levadura equie, che uyabica bee bene' Jesuse lunu, nu unibeella lunu: —¿Cá niarquiu'lu nú nzereche'ru nú da'cuxe'ahua reché baxcu?

¹⁸Chequie uninu lubeella: —Uquiahua Jerusalén, nzucu tucu bene enu nihua lu: “Singuie rni Maestro: Nze'ta riñala hora'nu, nu niarquiu'nu nú acuxenunu bee bene'nu exee baxcu ni'lu.”

¹⁹Che uri'i bee bene'nu tucu nú unibiya'nu nú ri'i beella, nu ureche' beella nú acuxee beella reché baxcu.

²⁰Chenu uyu'u rula', uzucu Jesuse lu mexa cuna chi'chiucu bee

bene'nu, ²¹nu diquila nú racuxee beella, uninu lubeella:

—Nia luhua nú tucuhua dete' cuenda li'á para nú atia.

²²Che chiqui' nehuana utsu arqui'beella nu uquixie unedichia' tucua tucua beella lunu, nu unibeella lunu:

—Detá, ¿li'á nze'e la?

²³Nu ucuaqui Jesuse lubeella: —Enu se'e pa le'ca liñi pliato elu se'a pa nze'e neca enu dete' cuenda li'á lubee bene enu uti li'á. ²⁴Neli nú li'á Bene enu uxela Diose, rqui'ña nú zecaa tucu nú rni lu ichi' Stichia' Diose; pero icue' bene enu dete' cuenda li'á! Máse neca nze'ca lu cuenda' bene ze'e nú né alaxulla.

²⁵Chequie Judas enu dete' cuenda li'ínu, uni lunu:

—Maestro, ¿li'á nze'e la?

Che uni Jesuse lui:

—Ahua', li'ilu nze'e.

²⁶Diquila nú racu beella, una'tse Jesuse tucu pa nu udete'nu che'tsa lu Diose, nu chu ule'enu pa ze'e udete'nu ya beella, nu uninu lubeella: —Udacuhua pa quie', ningui'e' neca cuerpoa.

²⁷Che chu una'tsenu tucu copa biñu, nu udete'nu che'tsa lu Diose nu chu udete'nu copa cua' ya beella, nu uninu lubeella:

—Uhue' yehua biñu quie', ²⁸xne neca nucua' renea nú ri'chia chenu atia para nú tsila'a huaxi bee bene iliulabe, xne equie cuenda' nú atia ya'la tucu inziu cuqui nú ri'i Diose perdona stula bee bene. ²⁹Pero nia luhua nú la hua'a biñu nú necache'e uva ni' stucu bese, hasta bichia nú hua'anuahua biñu cuqui liñibe elurnibiya' Diose.

**Udixiule'e Jesuse nú ni Pedro nú la
chululla li'ínu**

(Mr. 14:26-31; Lc. 22:31-34; Jn. 13:36-38)

³⁰Chenu ulaxu ungula beella canto lu Diose, che chu nzuebeella dañi nú lee Olivos. ³¹Che uni Jesuse lubeella:

—Yehua tsana' arqui'hua li'á rula' quie', tucu nú rni lu ichi' Stichia' Diose elu rni: “Utia bene enu rriucu bee sanchi, nu ri'chialetse beeí.”

³²Pero chenu huañi zecaa, rlutilaa nza'a Galilea, cheelá riñahua ze'e.

³³Chequie uni Pedro lu Jesuse:

—Añinzuca nú tsana' arqui' yebeella li'ilu. Pero li'á la tsana arquia li'ilu.

³⁴Che uni Jesuse lu Pedro:

—Nia lulu nú nee rula' quie' ante nú bixia tiula, unilalu chuna bese núla chululu li'á.

³⁵Pero uni Pedro lunu:

—Mase nú atia cuna li'ilu, la cachia nú nu'lua li'ilu.

Nu le'ca scua uni ye beelá bee bene'nu lunu.

**Unacu' Jesuse lu Diose tucu luhuare
elu lee Getsemaní**

(Mr. 14:32-42; Lc. 22:39-46)

³⁶Che uriña Jesuse cuna bee bene'nu tucu luhuare nú lee Getsemaní, nu uninu lubeella:

—Ucua'ahua ca'a, diquila nú nzenacua lu Diose inchiu'.

³⁷Che chu nzenunu Pedro cuna rucu lliana' Zebedeo, nu uquixie nú chiqui' nehuana nzu arqui'nu hasta nú lixiua' nzu arqui'nu, ³⁸nu uninu lubeella:

—Chiqui' nehuana nzu arquia hasta nú se'ca nú atia, ya'nasca'hua ca'a, nu ucua'a naahua cuna li'á.

³⁹Che chu nza Jesuse lle'na enza lu ze'elá, nu utsu lliquinu hasta nú uti'nu tequienu lu yuu, nu unacu'nu lu Diose nú uninu:

—Paa, tunu nu' modo utsila'a li'á lunú nehuana enta zecaa, pero la acatsia tucu nú niarquia, acatsia tucu nú niarquí'lu.

⁴⁰Chenu ubenchila' zecanu elu nucua'a bee bene'nu, ulluna'nu beella nú ra'tse beella, nu uninu lu Pedro:

—¿Xie' lá riqui'hua acua'anahua masia tucu hora cuna li'á la?

⁴¹Ucua'a nahua nu una'cuhua lu Diose para nú la ri'i beze'lu ana luhua. Xne li'isihua chiqui' nu' ana arqui'hua nú ri'ihua tucu nú neca nze'ca, pero la riqui' cuerpo'hua.

⁴²Bese rrucu nú uya na'cunu lu Diose uninu:

—Paa, tunu leca modo nu la zeca lunú nehuana nzu nú zecaa, acatsia tucu nú niarquí'lu che.

⁴³Chenu ubenchila' zecanu elu nucua'a beella, ulañi'nu nú ra'tsea'la beella stucu bese xne uri'i cala' ana lubeella. ⁴⁴Nu utsa'nanu beella ze'e nu uya na'cu'nu lu Diose bese rriuna cuna bee bedichia' nú unilanu. ⁴⁵Chenu ubenchila'nu elu nucua'a beella, uninu lubeella:

—¿Xie' ra'tsesca'hua nu sulachisca'hua la? Nu li'á Bene enu uxe'la Diose, uriñala hora nú dete' cuenda bene li'á lubee bene enu necha rri'i. ⁴⁶Uzetehua ne cha'ahua nee, xne axula nze'ta enu dete' cuenda li'á.

Una'tse bee bene Jesuse

(Mr. 14:43-50; Lc. 22:47-53; Jn. 18:2-11)

⁴⁷Rdichia'nusca' Jesuse bee bene'nu chenu uriña Judas, enu

neca tucu lu chi'chiucu bee bene'nu, uriñayui huaxi bee bene enu nuya' espada cuna acarute lunu. Nu una'tse beei Jesuse xne unibiya'la bee ule'ya enu rnibiya' lubeela bee ule'ya cuna bee usticia Israel nú acane scua. ⁴⁸Nu Judas enu udete' cuenda Jesuse unilai lubee bene ze'e xa ri'i chenu dete' cuendai li'inu, nu uni lubeella:

—Nee enu acua bichiu' xeca, nze'lla nu nze'e na'tsehua.

⁴⁹Chequie chenu uriña Judas ze'e uya bicai lunu nu uni:

—iMalune, Maestro! Nu chu udacui bichiu' xecanu.

⁵⁰Che uni Jesuse lu Judas:

—Amigo, uri'i lunú nze'talu ri'ilu.

Che chu una'tse bee bene ze'e Jesuse para nú uya' beei li'inu.

⁵¹Che tucu bee bene enu nzunu Jesuse ze'e uhua espada' nu uchiecu'lla tucu diaca moso' ule'ya enu rnibiya' lubee ule'ya. ⁵²Chequie uni Jesuse lulla:

—Udu'che' espada'lu xne ye bee bene enu rri'i xu cuna espada, le'ca cuna espada atilla. ⁵³¿Xie' la ri'ilu beya' nú nu' modo nacua lu Paa liñibe, nu chu xe'lanu huaxi mili bee ángele'nu enu ri'i elietsa lua la?

⁵⁴Pero tunu ri'á scua, ¿xneca modo yalu tucu nú nequie lu ichi' Stichia' Diose elu rni nú scua riala zecaa?

⁵⁵Che chu uninu lubee bene ze'e:

—¿Xinu nze'tahua cuna espada nu cuna acarute para nú uya'hua li'á xi neca tucu huana'? Ye ye'e nzua letahua uzetehua Stichia' Diose liñi indu llene Jerusalén, nu né na'tsehua li'á. ⁵⁶Pero ye bee nucua' unga para nú yalu tucu nú nequie lu ichi' Stichia' Diose nú uquie'e bee profeta.

Chequie ye bee bene'nu utsana' arqui'beella li'inu nu uyecaxu'u beella nzuebeella.

Nzu Jesuse lubee usticia

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷Che bee bene enu una'tse Jesuse unguya' beei li'inu ni'i Caifás, ule'ya enu rnibiya' luye bee ule'ya, ze'e neyete'sa' bee ulaxcuela enu reca ley cuna bee usticia' bee bene Israel. ⁵⁸Nu istu istu nzequie Pedro Jesuse hasta ru'u ni'i ule'ya ze'e, nu chenu uriña Pedro ru'u ni'i ule'ya ze'e uzuculla leta bee bene enu rriucu ze'e para nú lañi'lla xi ri'inu bee benecua' Jesuse.

⁵⁹Chequie bee ule'ya enu rnibiya' lubee ule'ya, nu cuna ye bee usticia ucua'na beella xa modo ta' beella eluquichia' Jesuse para nú atinu.

⁶⁰Pero lá llela' beella xi eluquichia' ata' beella li'inu añinzuca nú huaxi bee bene uni nú la neli contra li'inu, che luze'elá uriña xiucu bene enu le'ca uni nú la neli contra li'inu, ⁶¹nu unibeei:

—Benequie' uni: “Li'á aca chila indu' Diose nu reche' zecane lu chunatsia bichia.”

⁶²Chequie utsuli ule'ya enu rnibiya' lu ye bee ule'ya nu unilla lu Jesuse:

—¿Xiquie nú lecalí xi cuaquilu? ¿Xi nucua' rnibeei lu cuenda'lu?

⁶³Pero lecalí xi ucuaquí Jesuse. Che uni ule'ya ze'e lunu:

—Equie cuenda' Diose enu nehuañi, uni'i nú neli neca lua tunu li'ilu necalu Cristo li'ñi Diose.

⁶⁴Che ucuaquí Jesuse nú uninu:

—Li'á nze'e. Nu le'ca nia luhua nú lañi'hua li'á Bene enu uxe'la

Diose nú nzucua'a cue'tsenu chúbe, li'ínu enu rlu'cu ye poder, nu le'ca lañi'hua nú nzela liñi xcabe enza liñibe.

⁶⁵Chenu ubene' ule'ya ze'e nucua' che utsalla xuculla, nu unilla:

—Lu Diöse rni nucua' bedichia' nú necha necha, ¿xinu la'na'lá'ahua testigo? Li'ihua ubene'lá'hua bee bedichia' nú necha necha uni nucua' lu Diöse. ⁶⁶¿Xa nihua nee?

Che ucuaqui bee bene ze'e nú unibeei:

—Riala nú ati nucua'.

⁶⁷Che utsuxene beei lunu nu udiñi beei li'ínu, nu nu' beei enu udichiue lunu. ⁶⁸Nu unibeei lunu:

—Tunu li'ilu necalu Cristo, iuni' ti udiñi li'ilu!

Uni Pedro nú la chululla Jesuse

(Mc. 14:66-72; Lc. 22:56-62; Jn. 18:15-18, 25-27)

⁶⁹Diquila nú nzucu Pedro ru'u eli'ya' ni'i ule'ya ze'e, che uyabica tucu criada' ule'ya ze'e lu Pedro, nu uninchu lulla:

—Se'ca nú le'ca nuulu enzenuulu Jesuse enu necha bene lu iliu Galilea.

⁷⁰Pero utsacu' arqui' Pedro nú nu'lulla Jesuse lubee bene ze'e, nu unilla:

—La ri'á beya xi rnilu.

⁷¹Che chu nza Pedro enza ru'u puerta eli'ya' ze'e, nu ze'e ulañi' stucu criada li'illa nu uninchu lubee bene enu nucua'a ze'e:

—Le'ca nuu benecua' enzenu Jesuse bene eyeche Nazaret.

⁷²Chequie utsacu' arqui' zeca Pedro stucu bese nú la chululla Jesuse, nu uquie'ella Diöse nú unilla:

—La chulua benecua'.

⁷³Nu luzel'etsia bee bene enu nucua'a ze'e uyabica beei lu Pedro, nu unibeei lu Pedro:

—Ache nze'ca rlube' nú necalu tucu bene' bene cua', xne rdichia'lu tucu nú rdichia' beei.

⁷⁴Pero utsuta' Pedro nú unilla:

—Dete' Diöse castiya li'á tunu la nia nú neli necha la chulua bene cua'.

Nu che hora ze'e ubixia tucu tiula.

⁷⁵Che ullu'cu' arqui' Pedro lunú uni Jesuse lulla: “Ante nú bixia tiula unilálu chuna bese nú la chululu li'á.” Che chu uchiu'u Pedro ru'u eli'ya' ze'e nu chiqui' unguna'lla nú nehuana nzu arqui'lla.

Uyayu bee bene Jesuse lu Pilato

(Mr. 15:1; Lc. 23:1-2; Jn. 18:28-32)

27 Chenu uye'e lu yuu, uyetesa' ye bee ule'ya enu rnibiyá' lubee ule'ya cuna bee usticia Israel nu unga tucu necatse stichia' beella nú xa modo ri'i beella para nú ati Jesuse. ²Che ullica'cu beella Jesuse unguya' beella lu gobernador Poncio Pilato.

Xa unguiti Judas

³Nu Judas enu udete' cuenda Jesuse, chenu ulañi'i nú necala nú atinu chiqui' necha ulle'cai, nu uya de'te cuenda zecai ala llich'i melu plata lubee ule'ya enu rnibiyá', cuna lubee usticia Israel, ⁴nu uni lubeella:

—Uri'á dula xne udete cuendaa tucu bene enu lecaxi uri'i para nú ati.

Nu ucuaqui beella lu Judas:

—¿La biya'ru enze'e? ¡Necatsiahua' cuenda'lu!

⁵Chequie uya utsi'qui Judas bee melu ze'e liñi indu llene Jerusalén, nu chu uya tsi'i añii nu ungutii.

⁶Che uquiete'sa' bee ule'ya enu rnibiya' bee melo ze'e, nu uni beella lusa' beella:

—Leca modo dua'ahua melu quie' liñi alcancia elu nu' dimi u'na, xne necane melo nú uyaxu nú ati tucu bene.

⁷Che chu unga tucu necatse stichia' beella nú tsi beella tucu yuu elu rlua bee bene yuu nú recache' exqui'ñia cuna dimi ze'e, para nú aca ze'e pandiuñi elu achi' bee bene rene. ⁸Enze'e hasta nee lee yuu ze'e, yuu rene. ⁹Scua uyalu tucu nú uni profeta Jeremías chenu unilla: “Uyucu bee bene ala llich'i' melo plata (precio nú uni bee bene Israel nú secanu), ¹⁰nu cuna melo cua' utsi beella tucu yuu elu rlua bene yuu nú recache'e exqui'ñia, tucu nú uni Diose lua nú acane.”

Unedichia' Pilato lu Jesuse

(*Mr. 15:2-5; Lc. 23:3-5; Jn. 18:33-38*)

¹¹Chenu uyayu bee bene Jesuse lu gobernador Poncio Pilato, che unedichia'lla lu Jesuse, nú unilla: —¿Li'ilu necalu arre' bee bene Israel la?

Che uni Jesuse lulla:

—Ahua', tucu nú unilu scua necane.

¹²Nu chenu rta'quiya bee ule'ya enu rnibiya' lubee ule'ya cuna bee usticia' bee bene Israel li'inu, lecalí xi ucuaquinu. ¹³Che uni Pilato lunu:

—¿Xie' la yene'lu ye beenú rni cundra bee benecua' lu cuenda'lu la?

¹⁴Pero ni' tucu bedichia' né cuaqui Jesuse lu pilato, che chiqui' nzenu arqui'lla.

Unibiya' bee bene nú ati Jesuse

(*Mr. 15:6-20; Lc. 23:13-25; Jn. 18:38-19:16*)

¹⁵Nu bee bichia ze'e reca eliñi baxcu neca costumbre' Poncio Pilato nú rla'alla tucu bene enu nchiñi ni'cu', tatse tucu bene enu nacu' bee bene nu la'a. ¹⁶Le'ca bee bichia ze'e nchiñi tucu bene enu lee Barrabás ni'cu', nu ye bee luhuare nediya'la' bee bene ti necalla. ¹⁷Nu chenu neyete'sa'la bee bene ze'e, unedichia' Pilato lubeella nú unilla: —¿Ta bene enu niarqui'hua nú la'a: Barrabás la?, urre ¿Jesuse enu rni bee bene nú neca Cristo la?

¹⁸Uni Pilato scua xne uri'illa beya' nú equie nú riatsia arqui'beella enze'e ude'te' cuenda beella Jesuse lulla.

¹⁹Chenu uzucu Pilato elu rnibiya'lla nu rlualulla lu cuenda' Jesuse, uriña tucu resuna' una'alla lulla nú uninchu lulla: “La ri'chialu benecua' xne lecaxi equiya rlu'culla, xne necha uni xcala'a rula' quie' lu cuenda'lla.”

²⁰Pero bee ule'ya enu rnibiya' lubeelá bee ule'ya cuna bee usticia' bee bene Israel udu' beella arqui' bee bene enu nucua'a ze'e nú nacu' beei lu Pilato nú la'alla Barrabás, nu ati Jesuse. ²¹Chequie unia'la Pilato lubeei:

—¿Ta lu rucu beella niarqui'hua nú la'a che?

Che uni bee bene ze'e lulla:

—Ula'a Barrabás.

²²Nu uni Pilato lubeella:

—¿Nu xi ri'inua Jesuse enu rni bee bene nú neca Cristo?

Che uni ye beella:

—iUquie'e nucua' lu cruse!

²³Nu uni Pilato lubeella:

—Pero ¿xi nú necha neca uri'illa?

Che stucua'la urixialibeella nú uni beella:

—iUquie'e nucua' lu cruse!

²⁴Chenu uri'i Pilato beya' nú laria'lla ana tsulla lubee bene ze'e sino que maselá rixialibeei, che unibiya'lla nú ye'tayu tucu bene inza, nu unalla ante lu ye bee bene ze'e, nú unilla:

—Lecaxi culpaa nú ati bene cua', necatsia nucua' cuenda'hua.

²⁵Che uni ye bee bene ze'e lu Pilato:

—iNeca nucua' culpa'ru cuna bee lli'ñiru, nú ati benecua'!

²⁶Chequie ula'a Pilato Barrabás, nu chu unibiya'lla nú zete'che' bee sundado Jesuse, nu udete' cuendalla li'inu lubee sundado para nú quie'e beei li'inu lu cruse.

²⁷Che unguya' bee sundado ze'e Jesuse liñi palacio' gobernador, elu uyetesa' ye beei lunu. ²⁸Che ulua beei xucunu, nu ungotu beei li'inu tucu laquie neluu, ²⁹nu ureche'e beei tucu ellu'ñi nú necache' eche uzucu' beei equienu, le'ca uzucu' beei tucu bara yanu chube. Che chu utsulliqui beei lunu nu xitse uri'chia beei li'inu nú unibeei lunu:

—iHuañi arre' bee bene Israel!

³⁰Nu le'ca utsuxene beei lunu, nu mismo bara nú udete' beei yanu unguxi beei yanu udu'bee equienu. ³¹Chenu ulaxu nú xitse uri'inu beei li'inu, ulua zeca beei laquie neluu nú ungotu beei li'inu, nu ungotu

zeca beei nú necaca xucunu li'inu. Che unguya' beei li'inu para nú quie'e beei li'inu lu cruse.

Uquie'e beei Jesuse lu cruse

(Mr. 15:21-32; Lc. 23:26-43; Jn. 19:17-27)

³²Chenu nzenu beei Jesuse nú quienu lu cruse ulla'ca beei tucu bene eyeche Cirene, enu lee Simón, che unibiya' bee sundado ze'e lulla nú uya'lla cruse' Jesuse.

³³Nu chenu uriña beei tucu luhuae nú lee Gólgota, nu rni nucua' Lluca equie bene nguti.

³⁴Ze'e udete' beei biñu nú nucha inza nú nelá güe'nu, pero chenu uti'ñia'nue, né zelanu agüe'nue.

³⁵Chenu ulaxu nú uquie'e bee sundado ze'e Jesuse lu cruse, urita beei tucu rifa equie xucunu para nú ritsi'bee xucunu lu sa'bee. Scua uyalu tucu nú uquie'e tucu profeta lu ichi' Stichia' Diose elu rni: “Ita bee sundado tucu rifa equie xucua bi'ya ta beei ri'i anae.” ³⁶Che chu ucua'a beei ze'e para nú ri'iucu beei li'inu. ³⁷Nu equie cruse'nu uquie'e beei tucu letrero nú rni xinu uquie'e beei li'inu lu cruse. Nu letrero ze'e rni: “Neca ninguie' Jesuse arre' bee bene Israel.”

³⁸Le'ca uquie'e bee sundado ze'e chiucu huana' lu tucua cruse, tucu nze'e cue'tsenu chube nu stucu nze'e cue'tsenu chubeca. ³⁹Nu bee bene enu udete lunu ze'e, uri'qui equie beei nu rnibeei bee bedichia' nú necha neca lunu, ⁴⁰nu rnibeei lunu:

—Manú unilu nú chilalu indu llene Jerusalén nulu chunatsia bichia reche' zecalue, utsila'a li'ilu nee. Tunu neli'ilu nú necalu lli'ñi Diose, ulaca lu cruse cua'.

⁴¹Le'ca scua bee ule'ya enu rnibiya' lubeelá bee ule'ya cuna bee ulaxcuela enu reca ley, cuna bee fariseo nu cuna bee usticia Israel, uni beella huaxi bee bedichia' nú necha necha lunu, nu unibeella lusa'beella:

⁴²—Utsila'a nucua' bee bene, pero laca nucua' tsila'a nucua' li'i nucua'. Tunu necha nucua' arre' bee bene Israel, chu laca nucua' lu cruse nu che chili arquia'ahua nucua'.

⁴³Nzelí arqui' nucua' Diose, nee tsila'a Diose nucua' tunu secanu nucua', xne rni nucua' nú necha nucua' lli'ñi Diose.

⁴⁴Nu hasta bee huana' enu nequie lu stucu cruse cue'tsenu unibeei bee bedichia' nú necha necha lunu.

Chenu ungutí Jesuse

(Mr. 15:33-41; Lc. 23:44-49; Jn. 19:28-30)

⁴⁵Chenu unga rrebichia ucabelí diquineca lu iliulabe, hasta rquie chuna uche. ⁴⁶Nu rquie chuna uche ze'e, urixiali Jesuse nu uninu:

—Elí, Elí, ¿lama sabactani?, rni bedichia' cua': Diosea, Diosea, ¿xinu utsana' arqui'lu li'á?

⁴⁷Chenu ubene' bee bene enu nucua'a ze'e nú uninu scua, che unibeei lusa'beei:

—A'a rixialla profeta Elías.

⁴⁸Che chu uyaxu'u tucu beei nu ucuacha nze'e tucu esponja lu inza vinagre, nu uzucu'li lli'i tucu ixí, nu uti'i esponja cua' ru'u Jesuse para nú güe'nu inza vinagre cua'. ⁴⁹Pero texcua'a beei enu nucua'a ze'e uni:

—La ri'inululla scua bi'ya se nze'ta Elías tsila'a li'illa.

⁵⁰Che juerte urixiali Jesuse stucu bese, nu chu ungutinu.

⁵¹Chequie hora ze'e utsa cortina llene nú nzi'quinala liñi indu llene Jerusalén, nu utsa arli'tillune hasta aya nu hasta aquíe. Nu unga xuú lu iliulabe nu ule'e bee quielaa,

⁵²nu uya'la bee eluhua nu uhuañi zeca huaxi bee bene enu nzeli arqui' Diose, bee enu ungutí. ⁵³Che uchiu'u beella liñi eluhua lulá nú uhuañi Jesuse, nu uyu'u beella Jerusalén. Nu ze'e ulañi' huaxi bee bene li'ibeella.

⁵⁴Che capitán cuna beelá bee sundadu'lla enu rriucu Jesuse, chenu ulañi' beella nú reca xú nu cuna ye beenú reca, chiqui' ulliqui beella nu unibeella lusa' beella:

—iNeli nú necha benequie' Lli'ñi Diose!

⁵⁵Nu huaxi bee una'a enu uyaquie Jesuse desde Galilea enu uri'i elietsa lunu nucua'a beenchu istu ze'e ri'ya beenchu lunú reca. ⁵⁶Leta bee una'a quie' nzu María Magdalena, cuna María na' Jacobo nu José, nu cuna na' bee lliana' Zebedeo.

Chenu uhuachi' Jesuse

(Mr. 15:42-47; Lc. 23:50-56; Jn. 19:38-42)

⁵⁷Chenu uyu'u rula', uríña tucu bene xene enu lee José, necalla bene eyeche Arimatea, nu le'ca uyanzenulla Jesuse. ⁵⁸Nu uyalla lu Pilato uyana'culla cuerpo' Jesuse. Che unibiya' Pilato nú dete' cuenda bee sundado cuerpo' Jesuse lulla, ⁵⁹nu chu una'tsella cuerpo' Jesuse nu utelallanu tucu sávana nú lecaxi naa ⁶⁰nu che uya ca'chi'lla cuerpo' Jesuse liñi tucu eluhua cuqui nú necha stene'lla, nú uda'nilla liñi tucu quielaa, nu utsacu'lla tucu

quiee llene ru'u eluhua ze'e nu chu nziälla. ⁶¹Ru'u eluhua ze'e nzucu María enu neca bene eyeche Magdalena cuna stucu María.

Uriucu bee sundado ru'u eluhua' Jesuse

⁶²Chenu uye'e lu yuu bichia nú sulachi bee bene uya bee ule'ya enu rnibiya' lubee ule'ya cuna bee fariseo lu Pilato, ⁶³nu uni beella lu Pilato:

—Detá, nchiucu' arqui'ru nú chenu nehuañisca' bene enu nequichia' cua', uni nucua' nú detetsia chuna bichia huañizeca nucua' lu eluti. ⁶⁴Enze'e unibiya' nú aca ucu ru'u eluhua cua' hasta nú za' chuna bichia para nú la cha bee bene' nucua' rula' che cachi' cuerpo' nucua', nu ni bee bene' nucua' lubee bene nú uhuañi zeca nucua' stucu bese. Xne tunu ri'i bee bene' nucua' scua che masescalá aca llene eluquichia' cua' luquela eluquichia' nú uni nucua' rluti.

⁶⁵Che chu uni Pilato lubeella:

—Nucua'acua bee sundado. Para nú ri'i ucue. Uya'hua beei nu utsa'cuta'hua ru'u eluhua ze'e.

⁶⁶Che nzuebeella, nu utsacu'ta' beella ru'u eluhua ze'e, nu chu utsa'na beella bee sundado rriucue.

Chenu uhuañi zeca Jesuse nú ungutinu

(Mr. 16:1-8; Lc. 24:1-12; Jn. 20:1-10)

28 Chenu udete bichia nú sulachi bee bene, nu chenu uye'e lu yuu zila' domingo. Che uyabi'ya María Magdalena cuna stucu María ru'u eluhua' Jesuse. ²Che tu'natsia unga tucu xú nú

juerte, xne ulaca tucu ángele' Diose enza liñibe nu uyabica ángele ze'e ru'u eluhua nu uyucunu quiee nú nacu' ru'u eluhua ze'e, nu uzucunu equiee, ³nu rulu siqui' ángele ze'e xi rulusiqui' lee chenu ria'lane, nu xucunu niquichiu a'quie'e xi nequichi iqui. ⁴Chenu ulañi' bee sundado enu rriucu ru'u eluhua ze'e ángele cua', chiqui' unga tse'tse' beei nú ulliqui beei, nu uzana' beei lu yuu xi uzana' benenguti. ⁵Che uni ángele cua' lubee una'a cua': —La lliquihua. Li'á nediyaá nú rla'nahua Jesuse, enu uquie lu cruse. ⁶Pero leca'nu ca'a, xne uhuañi zecanu lu eluti tucu nú uninu. Utebi'yacuruhua elu uricu cuerpo'nu ne lañi'hua, ⁷nu nee chu uquia tixiule'exuhua lubee bene'nu: “Nú uhuañi zecanu lu eluti, nu rlutilánu nzanu lu iliu Galilea, luquela li'ihua nu ze'e lañi'huanu.” Nucua'tsia neca nú rixiule'a luhua.

⁸Chequie uchiu'u beella ru'u eluhua ze'e, nu xexu'u beella nzuella nzetixiule'e beella lubee bene'nu. Diquitse xiqui beella nu le'ca ñia nzu arqui'beella. ⁹Chenu nzuebeella ulube'lu Jesuse lubeella inziu nu uninu lubeella. Che uyabica beella lunu nu ulu'cu beella ula'na lunu, nu uchi'chi beella cuchi'nu, ¹⁰nu uninu lubeella:

—La lliquihua. Uquia tixiule'ehua lubee benea nú cha beella lu iliu Galilea, nu ze'e lañi' beella li'á.

Lunú uni bee sundado

¹¹Diquila nú nzubee bee una'a ze'e, le'ca nzubee chiucu chuna bee sundado eyeche ze'e nzetixiule'e beei lubee ule'ya enu rnibiya' lubeelá bee ule'ya

luye nú unga. ¹²Che bee ule'ya enu rnibiya' cua' uyabedichia'nu beei bee usticia' bee bene Israel para nú tucu ricuche'tse stichia' beella, nú xi ri'i beella nu che udetel' beella huaxi dimi ya bee sundado, ¹³nu uni beella lubebe sundado ze'e:

—Uni'tsiahua nú rula' chenu ra'tsehua ube'ta bee bene' Jesuse ucachi' cuerpo'nu. ¹⁴Che tunu acabiya' gobernador nucua', li'icaru niru lulla para nú lecaxi ri'inulla li'ihua.

¹⁵Che una'tse bee sundado dimi, nu uri'i beei tucu nú unibeella lubebei nú ri'i beei. Nu eluquichia' cua' nzeli arqui' bee bene Israel hasta bichia quie'.

Lunú unibiya' Jesuse nú ri'i bee bene'nu

(Mr. 16:14-18; Lc. 24:36-49; Jn. 20:19-23)

¹⁶Che nzubee ye chetu'cu bee bene' Jesuse lu iliu Galilea, equie

dañi elu unilanu lubeella nú chue beella. ¹⁷Nu chenu ulañi' beella Jesuse ulu'cu beella ula'na lunu, añinzuca nú nu' beella la chili arqui' nú necanu Jesuse. ¹⁸Che uyabica Jesuse lubeella nu uninu lubeella:

—Uliqui' Diose ye poder lua para nú nibiya'a liñibe cuna luyuu iliulabe. ¹⁹Enze'e uquiahua diqui lu iliulabe uze'te'hua bee bene stichia'a para nú aca beei bee benea. Nu urinzahua beei equie nú lee Pa liñibe, cuna equie cuenda' lli'ñinu nu cuna equie cuenda' Espíritu Santo, ²⁰nu uze'te'hua bee bene nú zucu' beei ye nú unilaa luhua. Nu nia luhua nú ye bee bichia nzua cuna li'ihua, hasta chenu laxu iliulabe. Amén.

Bedichia' nze'ca' Jesucristo nú uquie'e San Marcos

**Chenu uzete' Juan Bautista bee bene
Stichia' Diose**

(Mt. 3:1-12; Lc. 3:1-9, 15-17; Jn. 1:19-28)

1 Singuie uquixie bedichia'
nze'ca' Jesucristo, Lli'ñi Diose.

²Hua'tu uhuañi tucu profeta enu
lee Isafás enu uquie'e lunú uni
Diose, nu uni Diose:

Xe'laa tucu benea cha rluti lulu,
para nú tsu tsiñialla bee
bene nú zucu' bee bene
stichia'lu.

³Lu tucu dañi achi elu la nucua'a
bee bene
yene' bee bene chi benequie' nú
nilla:

“Utsu tsiñahua arqui'hua
xne nze'ta li'inu enu neca
Diose'ahua.

Utsana' arqui'hua stulahua
para nú yucu arqui'hua
stichia'nu.”

⁴Uza' bee bedichia' quie' chenu
ube'ta Juan urinzalla bee bene
unga nucua' lu tucu dañi achi elu la
nucua'a bee bene, nu unilla:

—Uche'ehua arqui'hua lu stulahua
nu uzu'cu'hua nú rni Diose, para
nú ri'i Diose perdona li'ihua che
rinzahua.

⁵Chequie uchiu'u huaxi bee bene
lubee iliu Judea cuna bee bene
eyeche llene Jerusalén uriñabeei
lu Juan para nú yene'beeí nú rnilla.
Che uxucu'dulabeei stulabeei nu
urinza Juan li'ibeei re'cu Jordán.

⁶Xucu Juan necache' ichiatsu'
camello nu sinchiu nú riu'u
xla'culla necache' iti, nu elubacu
nú udaculla neca xe'chiu cuna lliña
dañi. ⁷Udixiule'ella lubee bene ze'e
nú unilla:

—La le'e nú nze'ta tucu bene
enu chiqui' nibiya' luquela li'á, ni'
nú hua lucunu la yala xne neca
equielánu lua. ⁸Li'á rrinza li'ihua
cuna inza, pero li'inu rinzanu
li'ihua cuna Espíritu Santo.

Chenu urinza Juan Bautista Jesuse

(Mt. 3:13-17; Lc. 3:21-22)

⁹Bee bichia ze'e uchiu'u Jesuse
eyeche Nazaret nú nchiucu' lu iliu
Galilea. Che uriñanu lu Juan nu
urinza Juan li'inu re'cu Jordán.

¹⁰Chenu uchiu'u Jesuse lu inza,
ulañi'nu nú uya'la liñibe nu nze'ta
laca Espíritu Santo equienú. Xi
neca tucu paloma. ¹¹Nu uyene
tucu chii enza liñibe nu uni chii
ze'e:

—Li'ilu necalu lli'ñia nu chiqui' se'ca li'ilu nu ñia nzu arquia lulu.

Chenu uri'i beze'lu preu Jesuse

(Mt. 4:1-11; Lc. 4:1-13)

¹²Cheelá uri'i Espíritu Santo nú nza Jesuse lu tucu dañi achi elu la nucua'a bee bene. ¹³Ze'e uya'nanu chiu'a bichia si rula' elu nucua'a bee ña'ni dañi, che uri'i beze'lu preu li'inu para nú la zucu'nu nú rni Diose. Pero né ri'i beze'lu ana lunu cheelá uri'ña bee ángele' Diose lunu nu uzibi' bee ángele ze'e lunu.

Chenu uquixie Jesuse nú uzete'nu bee bene

(Mt. 4:12-17; Lc. 4:14-15)

¹⁴Chenu netse Juan ni'cu' uya Jesuse lubee eyeche lu iliu Galilea, nu udixiule'enu bedichia' nze'ca lubee bene nú xa neca lunú rnibiya' Diose. ¹⁵Singuie uninu lubee bene ze'e:

—Uriñala bichia nú ucuaqui u'na Diose hua'tu. La acaxea' nú enta nú nibiya' Diose lu iliulabe quie'. Enze'e utsana' arqui'hua stulahua nu uchili arqui'hua bedichia' nze'ca' Diose.

Ubixia Jesuse tacu bee bene enu rucu bee bela para nú aca beella bee bene'nu

(Mt. 4:18-22; Lc. 5:1-11)

¹⁶Chenu udete Jesuse ru'u inzatu' Galilea ulañi'nu Simón cuna bichii Andrés nú si'qui beei ixiu nú rucu bela lu inzatu' ze'e xne neca beei enu rucu bela. ¹⁷Chequie uninu lubeei:

—Utequiehua li'á para nú zeteahua nú nihua lubee bene

para nú aca beei benea luhuare nú rucuhua bee bela.

¹⁸Hora ze'e utsa'na beei ixiu nú rucu bela nu chu nzequie beei li'inu che. ¹⁹Lle'natsia enza lu ze'e ulañi' Jesuse Jacobo cuna Juan neca beei lliana' tucu bene enu lee Zebedeo. Nucua'a beei liñi barco' beei rquiela' beei ixiu nú rucu bela. ²⁰Nu ubixia Jesuse li'ibeei, che utsa'na beei pa' beei cuna bee mozo' beei liñi barco nu chu nzuebeei cuna li'inu.

Chenu uri'iyeca Jesuse tucu bene enu seca ichia' benechiqui'

(Lc. 4:31-37)

²¹Chenu uri'ña beella cuna Jesuse eyeche Capernaum. Bichia nú sulachi bee bene Israel, uyu'unu liñi indu' beella nu uquixienu uzete'nu bee bene ze'e. ²²Chiqui' nzenu arqui' bee bene ze'e lunú sete'nu xne sete'nu bee bene xi neca tucu bene enu chiqui' rnibiya' nu bee ulaxcuela enu reca ley' Moisés la zete' beei scua. ²³Liñi indu ze'e nzucu tucu niyu enu nchiñi benechiqui' arqui', nu rixiali niyu ze'e nú rni:

²⁴—¿Xinu rri'chialu li'iru Jesuse bene eyeche Nazaret? ¿Uriñalu para nú nitilulu li'iru la? Nu'lua li'ilu nú necalu bene' Diose nu la lu'culu dula.

²⁵Chequie uri'inu nú uqui'ya' benechiqui' nu uninu:

—iUzaca nu uchiu'u arqui' niyu quie'!

²⁶Che utsi'qui benechiqui' niyu ze'e lu yuu, nu uri'i ichia ziñia lu niyu ze'e. Nu chiqui' juerte rixalii nu chu uchiu'i arqui' niyu ze'e. ²⁷Che

ye bee bene enu nucua'a ze'e uyanu arqui'beeí nú unibeei lu sa'beeí:

—¿Xi nucua'? Nú, ineché'e sete' nucua' lia'ahua chiqui' rnibiya' nucua' hasta bee benechiqui' sucu' nú rni nucua'!

²⁸Scua yexetsia uri'chia bedichia' diqui lu iliu Galilea lunú uri'i Jesuse.

Uri'iyeca Jesuse suegra' Pedro

(Mt. 8:14-15; Lc. 4:38-39)

²⁹Chequie chenu uchiu'u beella liñi indu ze'e. Nzenu Jesuse, Jacobo cuna Juan ni' Simón cuna Andrés.

³⁰Ze'e nuxu suegra' Simón nu secalla xlee. Chequie chenu uriña Jesuse ze'e, udixiule'e beeí lunu nú ritilla.

³¹Chequie uyabicanu elu nuxulla nu una'tsenu yalla nu uletsanu li'illa. Hora ze'e uchiu'u xlee nú secalla. Che udete'lla nú udacu beella.

Uri'iyeca Jesuse huaxi bee bene enu riti

(Mt. 8:16-17; Lc. 4:40-41)

³²Chenu uhuatse' bichia nu enta chu'u rula'. Uquixie bee bene nú uriñayu beeí ye bee bene enu riti cuna bee bene enu nchiñi benechiqui' arqui' lu Jesuse.

³³Uyetsa' ye bee bene eyeche ze'e ru'u ni'i elu nzucunu. ³⁴Uri'iyeca Jesuse bee bene enu riti ye luu bee elichia nú seca beeí, cuna nú uhuanu bee benechiqui' arqui' bee bene. Pero né zelanu nú ani bee benechiqui', xne nu'lu beeí li'inu.

Uzete' Jesuse Stichia' Diose lubee bene lu iliu Galilea

(Lc. 4:42-44)

³⁵Chenu lá ye'e lu yuu nu necabesca' nzu uzetee Jesuse nu

uchiu'unu eyeche ze'e nu nzanu tucu luhuare elu lecalí ti nu' para nú nacu'nu lu Diose ze'e. ³⁶Chequie uya Simón cuna beelá bee bene enu neyete'i nu uyacua'na beeí Jesuse. ³⁷Chenu ullela' beeí li'inu, unibeeí lunu:

—Huaxi bee bene rcua'na li'ilu.

³⁸Che uninu lubeeí:

—Cha'ahua lubee eyeche axu ca'a para nú le'ca ixiule'a Stichia' Diose lubee bene cua' xne enze'e uriña.

³⁹Che udixiule'enu Stichia' Diose lubee bene liñi bee indu' bee bene Israel diqui lu iliu Galilea. Nu uhuanu benechiqui' arqui' bee bene.

Uri'iyeca Jesuse tucu bene enu ulle'ca elichia nú lee lepra

(Mt. 8:1-4; Lc. 5:12-16)

⁴⁰Tucu bichia uriña tucu niyu enu seca elichia nú lee lepra lu Jesuse nu utsu lliquii lunu nu uni:

—Tunu laca arqui'lu nu' beya' nú ri'iyecalu li'á.

⁴¹Chequie chiqui' uhua'a arqui' Jesuse niyu ze'e nu uricu'nu yanu equiei nu uninu:

—Niarquia nú yeca'lu, uyeca' nee.

⁴²Chenu uninu scua, hora ze'e uyeca'i elichia nú secái nu leca' xi nai. ⁴³Che udu' nziunu li'i nu uninu lui:

⁴⁴—Nia lulu nú la ixiule'elu nucua' lu ni' tucu bee bene nú xa uyeca'lu. Lu ule'yatsia uquiatiixiule'e nú uyeca'la'lu. Che dete'lu tucu u'na lu Diose tucu nú unibiya' Moisés, para nú ri'i bee bene beya' nú uyeca'la'lu.

⁴⁵Pero chenu nzia niyu ze'e, né tsacu' arqui'i. A'la mase udixiule'i lu titse bee bene nú xa uri'iyeca Jesuse li'i. Enze'e leca modo nú

achu'u Jesuse lu ni' tucu bee eyeche ze'e. Enze'e enzetsianu dañi elu leca' ni'i bee bene. Pero uyasca' huaxi bee bene bee eyeche diqui abenchila' ze'e elu nzucunu.

Chenu uri'iyeca Jesuse tucu bene enu neati cuerpo'

(Mt. 9:1-8; Lc. 5:17-26)

2 Xiucu xuna bichia lu ze'e, uyu'u zeca Jesuse eyeche Capernaum nu ungabiya' bee bene ze'e nú nzucunu tucu ni'i. ²Che yexetsia uyetesá' huaxi bee bene ru'u ni'i elu nzucunu ze'e, nu uchee liñi ni'i ze'e, ni' ru'u puerta la aca' riña beelá bee bene, nu udixiule'enu Stichia' Diose lubee bene ze'e. ³Ze'e uriñayuu tacu bene enu nuya' tucu niyu enu neati cuerpo'. ⁴Pero né ri'i beei ana nú a riña beei hasta lu Jesuse, xne nucua'a huaxi bee bene liñi ni'i ze'e. Enze'e uxalla beei equie ni'i ze'e, nu cuna camilla ulaca beei niyu enu riti ze'e hasta elu nzu Jesuse. ⁵Chenu ulañi' Jesuse nú nzeli arqui'beei li'inu, che uninu lu niyu enu riti ze'e nu uninu:

—Niyu uri'á perdona stulalu nee.

⁶Pero ze'e nucua'a bee ulaxcuela enu reca ley' Moisés nu uri'i beei elliebacu' nú unibeei: ⁷“¿Ti neca nucua'? Nú rni nucua' tucu nú neca nucua' Diose. Xne tucutsia Diose rri'i perdona xtula bee bene.” ⁸Pero hora ze'e uri'i Jesuse beya' lunú rri'i beei elliebacu'. Enze'e uninu lubeei:

—¿Xinu uri'ihua elliebacu' scua?

⁹¿Ta nú mase nerriña' nú aca nú nia lulla: “Uri'á perdona xtulalu”, urre nia lulla: “Uzetee, nu una'tse camiya'lu nu uquia'a”? ¹⁰Pero

nee lubea luhua nú li'á Bene enu uxe'la Diose rlu'cua nú rnibiya'a lu iliulabe, para nú ri'á perdona stula bee bene.

Uni Jesuse lu niyu enu riti ze'e:

¹¹—Nia lulu nú uzetee nu una'tse camiya'lu nu uquia'a ni'lu nee.

¹²Hora ze'e uyeca' niyu ze'e nu una'tsei camilla'i nu chu uchiu'i liñi ni'i ze'e. Ulañi' ye bee bene enu nucua'a ze'e nucua' nu unibeei bedichia' nze'ca lu Diose. Nu chiqui' uyanu arqui' ye bee benecua' lunú ulañi' beei nu unibeei.

—Lasca' lañia'hua ni' tucu bese lunú ulañia'hua nee.

Ubixia Jesuse tucu bene enu lee Leví

(Mt. 9:9-13; Lc. 5:27-32)

¹³Cheelá nza zeca Jesuse ru'u inzatu' Galilea. Ze'e uyetesá' huaxi bee bene lunu nu uzete'nu li'ibeei.

¹⁴Chenu udetenu ze'e, ulañi'nu Leví necai lliana' tucu bene enu lee Alfeo. Leví quie' nzucui elu rri'i cubre equie bee impuestos lubee bene nu uninu lui:

—Ute quie li'á.

Nu chu utsuli Leví nu nzai cuna li'inu.

¹⁵Chenu nzucu Jesuse lu mexa liñi ni'i Leví, cuna bee bene'nu udacununu huaxi bee bene enu rri'i cubre equie bee impuestos cuna bee bene enu la nehuañi tucu nú rnibiya' ley' Moisés, xne nzequie huaxi bee bene cua' li'inu. ¹⁶Chequie nucua'a chiucu chuna ulaxcuela enu reca ley' Moisés cuna bee fariseo enu ulañi' nú racunuu Jesuse bee benecua'. Che unibeei lubee bene'nu:

—¿Xinu racunuu maestro'hua cuna bee bene enu rri'i cubre equie

bee impuesto? ¿Cuna bee bene enu la nehuañi tucu nú rnibiya' ley' Moisés?

¹⁷Chenu ubene' Jesuse nucua', uninu lubee bene cua':

—Bee bene enu la aca riti, la zecala'cha' bee nze'e tucu doctor. Pero bee bene enu riti, rqui'ña bee nze'e tucu doctor. Enze'e nzela nee, para nú bixia bee bene nú che'e arqui'bee' lu dula nú rlu'cu beei. Lá yela lubee bene enu rri'i elliebacu' nú la lu'cu dula.

Udixiule'e Jesuse xa neca equie cuenda' chenu la acu bee bene lunú rlu'cu beei ula'na lu Diose

(Mt. 9:14-17; Lc. 5:33-39)

¹⁸Tucu bichia udete' bee bene' Juan Bautista cuna bee fariseo bichia nú né acu beella equie nú rlu'cu beella ula'na lu Diose, nu uri'ña chiucu chuna bee bene lu Jesuse nu unibee' lunu:

—Udete' bee bene' Juan cuna bee fariseo bichia nú né acu beella equie nú rlu'cu beella ula'na lu Diose. ¿Xiquie nú la ri'i bee bene'lu scua?

¹⁹Chequie ucuaqui Jesuse lubee bene ze'e nú uninu:

—¿Xie' la acu bee bene enu nezene' lu tucu tsa'a chenu xia tucu bene chenu nzucusca' bene enu xia ze'e la? Lunú nzusca' bene enu xia ze'e. Enze'e rqui'ña nú acu bee bene ze'e. ²⁰Pero ri'ña bichia chenu la nzua' bene enu xia cuna bee bene. Che si dete' beella bichia nú la acu beella equie nú rlu'cu beella ula'na lu Diose.

²¹'Lecati quiela' tucu laquie uxu cuna tele'e laquie cuqui xne chenu

uxu' laquie cuqui ri'i nú tsa'a laquie uxu. ²²Le'ca la chu'u biñu cuqui liñi iti uxu xne ri'i biñu cuqui cua' nú tsa'a iti uxu, che nitilu biñu cua' la cuna iti uxu. Enze'e rqui'ña nú chu'u biñu cuqui liñi iti cuqui.

Unguxi bee bene' Jesuse tuu lu trigo bichia nú sulachi bee bene Israel

(Mt. 12:1-8; Lc. 6:1-5)

²³Tucu bichia nú sulachi bee bene, udetenu Jesuse bee bene'nu lu yuu elu nu' trigo nu uquixie bee bene'nu unguxi beella tuu lu trigo.

²⁴Chequie unibee fariseo lu Jesuse: —Bi'yacuru, ¿xiquie nú rri'i bee bene'lu lunú la yala ri'i beella bichia nú sulachi bee bene?

²⁵Pero uni Jesuse lubeei:

—¿Xie' lasca' ulahua elu rni nú xa uri'i David cuna bee bene enu nuulla tucu bese chenu ulia'na' beella la? ²⁶Tiembu nú unga Abiatar ule'ya, enu rnibiya' lubee ule'ya uyu'u David liñi indu' Diose nu udaculla pá nú necale'ya lu Diose. Añinzuca nú ule'yatsia nu' modo nú acu pá cua'. Pero udete'lla pácua' udacu bee bene enu nuulla.

²⁷'Ureche' Diose bichia nú sulachi bee bene, pero lá reche'enu bichia cua' para nú nehuaña zeca bee bene bichia cua'.

²⁸'Li'á Bene enu uxe'la Diose le'ca rlu'cua nú rnibiya'a lu bichia nú sulachi bee bene.

Uri'iyeca Jesuse tucu bene enu ubichicu' ya

(Mt. 12:9-14; Lc. 6:6-11)

3 Stucu bese chenu uyu'u Jesuse liñi tucu indu' bee bene Israel. Ze'e nzucu tucu niyu enu ubichicu'

tucu chú ya. ²Chequie bee bene enu nucua'a ze'e. Nucua'a tsi'ña beei tunu ri'iyeca Jesuse niyu ze'e bichia nú sulachi beei, para nú scua xana bitsi beei lu cuenda'nu. ³Che uni Jesuse lu niyu enu ubichicu' ya ze'e, nu uninu:

—Utsuli lubee bene cua' nee.

⁴Nu uninu lubee bene ze'e:

—¿Xi riala ri'i bee bene bichia nú sulachi bee bene? ¿Nú neca nze'ca la urre nú necha neca la? ¿Tsila'a bene nú la ati tucu bene la, urre tsana' arqui' bene nú ati tucu bene la?

Pero lecaxi ucuaqui bee bene ze'e.

⁵Chequie ubi'yanu lubee bene ze'e nu chiqui' uleenu cuna nú chiqui' nehuana utsu arqui'nu xne la hua'a arqui'beei bee bene, nu uninu lu niyu enu ubichicu' ya ze'e:

—Ulí yalu nee.

Nu chu ulí niyu ze'e yai nu hora ze'e uyeca' yai. ⁶Pero chenu uchiu'u bee fariseo ze'e, uyete sa' beei cuna bee bene' Herodes nu uri'i beei elliebacu' xneca ri'i beei para nú uti beei Jesuse.

Chenu nucua'a huaxi bee bene ru'u inzatu' Galilea

⁷Chequie chu nza Jesuse cuna bee bene'nu ru'u inzatu' Galilea, nu nzequie huaxi bee bene li'inu, bee bene Galilea cuna bee bene Judea, ⁸cuna bee bene Jerusalén, cuna bee bene Idumea, cuna bee bene enu nucua'a stucu chú re'cu Jordán, cuna bee bene enu nucua'a lu iliu Tiro, cuna bee bene enu nucua'a lu iliu Sidón, uya huaxi bee benequie' lunu, xne unga biya'beei nú rri'inu bee milagro nú chiqui' neca equie.

⁹Enze'e uninu lubee bene'nu, nú tsu tsiña beella tucu barco para nú chu'unu liñi barco ze'e, para nú la ta'cu bee bene li'inu. ¹⁰Xne uri'iyecanu huaxi bee bene. Enze'e ye bee bene enu riti uricuya beei lunu, para nú ti' beei ya beei li'inu.

¹¹Chequie bee bene enu nchiñi benechiqui' arqui' chenu ulañi' beei Jesuse, utsulliqui beei lunu nu urixialibeei nú unibeei:

—iNecalu Lli'ñi Diose!

¹²Pero unibiya' Jesuse lubee benechiqui' nú la ixiule'e beei nú ti necanu lubee bene.

Chenu ucañi Jesuse chi'chiucu bee apóstol'nu

(Mt. 10:1-4; Lc. 6:12-16)

¹³Cheelá uquie Jesuse equie tucu dañi, nu ubixianu bee bene enu niarqui'nu nú cha cuna li'inu nu uyabica bee benequie' lunu.

¹⁴Che ucañinu leta bee bene ze'e, chi'chiucu bene para nú chenu bee benequie' li'inu, cuna nú xe'lanu li'ibeella para nú chetixiule'e beella Stichia' Diose lubee bene.

¹⁵Udete'nu nú rnibiya'nu lubeella para nú ri'iyeca beella bee bene enu riti cuna nú lua beella benechiqui' arqui' bee bene. ¹⁶Bee ningiue' neca chi'chiucu bee bene enu ucañi Jesuse tuculla lee

Simón enu le'ca uhualenu,

Pedro.

¹⁷Stuculla lee Jacobo, nu stuculla lee Juan, neca rucu benequie' lliana' bene enu lee Zebedeo.

Uhualee Jesuse rucu lliana' Zebedeo, Boanerges, nu rni nucua' bee lli'ñi beziyu'.

- ¹⁸ Le'ca ucañi Jesuse Andrés,
Felipe,
Bartolomé,
Mateo,
Tomás,
Tadeo,
Simón, enu ulletse leta tucu
partido nú lee cananista,
¹⁹ cuna Judas Iscariote enu udetel'
cuenda Jesuse.

**Uni bee bene nú ulu'cu Jesuse lunú
rnibiya' beze'lu**

(Mt. 12:22-32; Lc. 11:14-23; 12:10)

²⁰Chenu ulaxu nú ucañinu
ch'i'chiucu bee benecua' uriñayunu
li'ibeella ru'u tucu ni'i, ru'u ni'i
ze'le stucua'la bese uyetesa' huaxi
bee bene lubeella. Hasta nú né
llu'cha'nu acununu cuna bee
bene'nu. ²¹Chenu ungabiya' bee
sa'a Jesuse nú reca ze'e. Nzetucu
beella li'inu leta bee bene ze'e, xne
rni bee bene nú secanu ichia loco.

²²Pero bee ulaxcuela enu reca ley'
Moisés, nze'ta beei enza Jerusalén
nu unibeei lusa'beei:

—Benequie' rlua benechiqui'
arqui' bee bene cuna poder nú
rlu'cu beze'lu enu rnibiya' lubee
benechiqui'.

²³Che ubixia Jesuse li'ibeei nu
uninu lubeei:

—¿Xa modo nú hua beze'lu le'ca
sa' bee beze'lu? ²⁴Tucu ubiernu
enu rle'e sa'a siempre rliunu sa'a
beei nu tunu rliunu sa'beei, laxu nú
rnibiya' ubiernu quie' che. ²⁵Le'ca
esquie bee bene tucu ni'i tunu liunu
sa'a beella laxu bee bene quie' che.
²⁶Le'ca esquie tunu tiliaca' beze'lu
le'ca sa' beze'lu ulaxu nú rnibiya'
beze'lu che.

²⁷Nu lecati aca chu'u ni' tucu
bene enu naaqui para nú cachi' beei
stene'lla, tunu la llica'cuxu beei
li'illa. Scua si ri'i beei ana nú cachi'
beei stene'lla che.

²⁸Ixiule'a luhua nú ye bee dula
nú rri'i bee bene, nu' perdona' bee
dula cua'. Le'ca nu' perdona' ye bee
bedichia' chi'qui' nú rni bee bene.
²⁹Pero tatse bee bene enu nichiqui'
lu Espíritu Santo, leca' perdona
para bee benecua'. Nzuquietsia beei
castiya' beei nú leca xunga laxu.

³⁰Uni Jesuse scua xne unibeei nú
nchiñi benechiqui' arqui'nu.

**Chenu uni Jesuse nú ti neca na'nu
cuna bichinu cuna zananu**

(Mt. 12:46-50; Lc. 8:19-21)

³¹Hora ze'e uriña na' Jesuse,
cuna bee bichinu elu nzunu. Pero
uya'natsia beella eli'ya' nu uni
beella lubee bene enu nucua'a ze'e
nú nibeei lu Jesuse para nú ye'tanu
rixia beella. ³²Nu unibeei bene enu
nucua'a abenchila' lunu:

—Nzu na'lu cuna bee bichilu eli'ya'
rla'na beella li'ilu.

³³Pero uninu lubeei:

—¿Ti neca naa nu ti neca bee
bichia?

³⁴Chequie ubi'yanu lubee bene enu
nucua'a diqui abenchila'nu nu uninu:

—Ca'a nucua'a bee bichia cuna
naa. ³⁵Puese tatse bene enu sucu'
lunú riu' arqui' Diose, neca bene
ze'e bichia cuna zanaa cuna naa.

**Chenu uni Jesuse ejemplu' tucu bene
enu nzetu' nii**

(Mt. 13:1-9; Lc. 8:4-8)

4 Stucu bese uquixie Jesuse
sete'nu bee bene ru'u inzatu'

Galilea. Lunú uyetesa' huaxi bee bene lunu, enze'e uyu'unu liñi tucu barco nú nzu lu inzatu' ze'e, nu chu uzucunu liñii, diqui nú nucua'a ye bee bene ru'u inzatu' ze'e. ²Che uzete'nu huaxi bee ejemplu lubee bene ze'e. Chenu uzete'nu bee bene uninu lubeei:

³—Uquie'e diacahua ninguie'.

Tucu bichia uchiu'u tucu niyu nzetu' nii lu yu'lla. ⁴Chenu rdu' niyu quie' nii uzana' lle'na ebichi lu inziu nu chu ulaca bee iñi udacue. ⁵Lle'na ebichi uzana' leta quiee, elu leca huaxi yuu. Enze'e yexetsia uliñi ebichi quie' xne leca huaxi yuu ze'e. ⁶Pero chenu unga nelee uri'i be' bichia nú ungu'lune. Lunú la aca aquié nzene lue enze'e ubichii. ⁷Lle'na ebichi uzana' leta aca eche, chenu uru'cu aca eche. Nézela aca eche cua' nú aru'cue enze'e né ayue. ⁸Pero ebichi nú uzana' lu yuu nze'ca, uru'cu nze'cae nu chiqui' ñia unguyu'e. Texcua'a bee ebichi cua' unguyu' ala llich'i ebichi nu texcua'e unguyu' sesenta ebichi nu texcua'e unguyu' tucu ayu'u ebichi.

⁹Le'ca uni Jesuse lubee bene ze'e: —Tatse bene enu niarqui' nú yene' nú rnia quie'e diaca nze'e che.

Udixiule'e Jesuse xinu uninu bee ejemplu

(Mt. 13:10-17; Lc. 8:9-10)

¹⁰Chequie chenu uya' nasca lle'na bee bene cuna Jesuse cuna chi'chiucu bee bene'nu, unidichia' beei lunu:

—Xa rni bee ejemplu nú uninu.

¹¹Che ucuaquinu nu uninu lubeei: —Li'ihua uliqui' Diose nú ri'ihua beya' xa neca nu rnibya'nu lunú

lasca' ri'ihua beya'. Pero bee bene enu la chili arqui' Diose, setea li'ibeei puro tsia ejemplu. ¹²Xne mase ri'ya beei, nu mase riene' beei. Pero leca xunga ri'i beei beya'. Scua la benchila' arqui'beei lu Diose, nu la ri'inu perdona stula beei che.

Udixiule'e Jesuse nú xneca neca ejemplu nú uninu

(Mt. 13:18-23; Lc. 8:11-15)

¹³Le'ca uni Jesuse lubeei:

—¿Xie' la ri'ihua beya' xa neca lunú rnia scua la? ¿Xa ri'ihua beya' beela bedichia' nú niilá luhua che? ¹⁴Bene enu udu'u nii neca xi neca tucu bene enu rixiule'e Stichia' Diose lubee bene, ¹⁵nu nu' bee bene enu riene' Stichia' Diose, pero la zela beze'lu nú chenala beei Stichia' Diose. Neca bee bene quie' xi neca ebichi nú uzana' ru'u inziu. ¹⁶Texcua'a bee bene neca xi neca ebichi nú uzana' leta quiee. Riene' beei Stichia' Diose nu ñia uyucu arqui'beei. ¹⁷Pero li'ibeei neca beei xi neca ebichi nú leca huaxi luu. Chequie chenu si'i beei lunú seca beei, urre chenu se'ta bee bene li'ibeei sana' arqui'beei Stichia' Diose. ¹⁸Texcua'a bee bene neca xi neca ebichi nú uzana' leta aca eche, riene' beei Stichia' Diose. ¹⁹Pero máse nzenu arqui'beei lunú nu' lu iliulabe. Sequienu beei le'catsia li'ibeei, xne niarqui' beei nú lu'cu beei yeene. Chequie chenu nchiñi ye bee nucua' elliebacu' beei, sana' arqui' beei nú riene' beei Stichia' Diose. Lecaxi zibi' nú ubene' beei Stichia' Diose che. ²⁰Pero nu' bee bene enu riene' Stichia' Diose, cuna nú sucu' beei nú rni, li'ibeei neca

beeí xi neca ebichi nú uzana' lu yuu nze'ca. Texcua'a beeí chenu rixiule'e beeí Stichia' Diose lubee bene rri'i beeí ana huaxi bee bene. Neca beeí xi neca ebichi nú unguyu' ala llich'i ebichi urre xi neca ebichi nú unguyu' sesenta ebichi urre xi neca ebichi nú unguyu' tucu ayu'u ebichi.

Chenu udixiule'e Jesuse ejemplu' quinqué

(Lc. 8:16-18)

²¹Le'ca uni Jesuse lubeei:

—¿Leca modo nú du' llie'e tucu quinqué, tunu tsacu' bene tucu caja equiee, urre tsu benene liñi luna? Rqui'ña, nú zucu quinqué cua' elu ayaa, para nú du' llie'e diqui luhua. ²²Le'ca scua, ni' tucu beenú a'chi neca la ya'na nucua' scuatsia riña nú aca che ye bee nucua', nu ni' tucu beenú a'chi' neca la ya'na nucua' scuatsia riña nú acabiya' ye bee nucua'. ²³Tatse bee bene enu niarquí' nú yene' nú rnia quie'e diaca nze'e che.

²⁴Le'ca uni Jesuse lubeei:

—Uri'ihua elliebacu' equie bee bedichia' nú riene'hua. Xne tunu rri'ihua caso Stichia' Diose. Le'ca liqui'nu nú maselá ri'ihua beya' stichia'nu. ²⁵Xne bee bene enu rri'i beya' Stichia' Diose riña nú maselá ri'i nze'e beya' stichia'nu pero bee bene enu lle'natsia rri'i beya' Stichia' Diose, cuna nu la ri'i caso beeí stichia'nu. Hasta lunú uri'í beeí beya' lle'na niti nucua' arqui'beeí.

Uni Jesuse tucu ejemplu nú xa enta ru'cu tucu ebichi

²⁶Le'ca uni Jesuse lubeei:

—Elurnibiya' Diose, neca xi neca nú secaa tucu bene chenu nze tu'lla nii lu yu'ulla. ²⁷Xne mase ra'tse bene quie' rula' nu bichia rri'illa riña'. Bichia si rula' rliñi ebichi cuna nú enta ru'cue, pero la ri'illa beya' xa enta ru'cue. ²⁸Xne li'i yuu ze'e rri'i nu enta ru'cu ebichi, rluti rliñi nu recae huañi, cheelá enta tuu lue nu cheelá rayue. ²⁹Nu chenu necane ula'cu, che xiecu' bee benene xne necala tiambu nú yete' sa'e.

Uni Jesuse tucu ejemplu' ebichi' mestaza

(Mt. 13:31-32; Lc. 13:18-19)

³⁰Le'ca uni Jesuse lubeei:

—¿Xa nia luhua para nú ri'ihua beya' xa neca lunú rnibiya' Diose? ¿Nu xi lubea luhua para nú ri'i nze'cahua beya' xa necane?

³¹Ixiule'a luhua xa neca nú rnibiya' Diose. Necane xi neca ebichi' mestaza. Ebichi quie' chenu riu'e lu yuu, me'elae lu ye bee ebichi nú nu' lu iliulabe. ³²Pero chenu uyu'u niila ebichi cua', chequie enta ru'cue nu máse rru'cue lu ye bee huañi hasta bee iñi nu' modo nú rreche'e beeí exlia'tse' beeí lu ellutsa lue cuna nú sulachi beeí lu xca'la'e.

Xinu uzete' Jesuse puro bee ejemplu

(Mt. 13:34-35)

³³Scua uzete' Jesuse Stichia' Diose lubee bene. Uninu huaxi bee ejemplu, hasta lunú uri'itsia beeí beya'. ³⁴Siempre uninu bee ejemplu chenu uzete'nu bee bene. Pero chenu nzu li'itsianu cuna bee bene'nu udixiule'enu lubeella xa neca lunú uninu lubee bene scua.

Uzucu' bii cuna inzatu' nú uni Jesuse*(Mt. 8:23-27; Lc. 8:22-25)*

³⁵Le'ca bichia ze'e chenu uyu'u rula' uni Jesuse lubee bene'nu nu uninu:

—Cha'ahua stucu chu inzatu'quie'.

³⁶Che utsa'na bee bene'nu bee bene ze'e nu uyu'u beella liñi barco cuna Jesuse. Le'ca nza texcua'a bee barco cuna li'ibeella. ³⁷Chequie unga tucu bii juerte lu inzatu' nu utsuli lu inza ze'e nu uquixie uyu'e hasta liñi barco' beella. ³⁸Pero ra'tse Jesuse nuxunu enza rqui' barco ze'e nu necu'cunu tucu almohada. Che ucua'ñi beella li'inu nu uni beella lunu:

—iMaestro! ¿Xinu la ri'i casolo lunú se'ca'ahua nzee chatse'ahua lu inza?

³⁹Chequie uzetee Jesuse nu utsuxenu bii, nu uninu lu inzatu' ze'e:

—iAca xee!

Nu chu unga xee bii cuna inzatu' ze'e. ⁴⁰Cheelá uninu lubee bene'nu:

—¿Xinu chiqui' xiquihua?
¿Xie'lasca' chili arqui'hua li'á la?

⁴¹Pero chiqui' ulliqui beella nu unidichia' beella lusa' beella:

—¿Ti neca niyu quie' nú hasta bii cuna inzatu' sucu' nú rni nucua'?

**Chenu uhua Jesuse benechiqui'
arqui' tucu bene eyeche nú lee
Gadara**

(Mt. 8:28-34; Lc. 8:26-39)

5 Chenu uriña beella stucu chü inzatu' ze'e, lu yu'u bee bene eyeche Gadara. ²Hora nú uchiu'u Jesuse liñi barco ze'e uyacha'calu tucu niyu enu nchiñi benechiqui'

arqui' li'inu, uchiu'u niyu quie' liñi pantiuñi. ³Xne siempre nehuañi niyuquie' leta bee eluhua' bee bene nguti. Nu lecati ri'i ana lui, mase nú ullica'cuu bee bene li'i cuna cadena. ⁴Huaxi bese ullica'cuu bee bene cadena yai cuna cuchiu'i, pero chu uchiecu'i cadena nu unga pedasue, nu lecati ri'i ana lui. ⁵Bichia si rula' enzei leta bee eluhua' bee bene nguti cuna liñi dañi, rixialii nu uchiecu'i li'i cuna quiee. ⁶Pero chenu ulañi'i Jesuse, nú entanu istusca' chequie xexu'i nze cha'calu li'inu, nu chu utsulliquii lunu. ⁷Che juerte urixialii nu uni:

—¿Xinu riu'ulu cuna li'á Jesuse lliñi Diose liñibe? Ziquia lulu nú la du'lu nú nehua zecaa.

⁸Uni niyucua' scua, xne rnila Jesuse nú rninu:

—iBenechiqui' uchiu'u arqui' niyu cua'!

⁹Chequie unidichia' Jesuse lu niyu ze'e nú uninu:

—¿Ti leelu?

Che ucuaqui niyu ze'e:

—Li'á lea Legión xne huaxi necaru.

¹⁰Chiqui' uziquiee niyu ze'e lu Jesuse, para nú la xe'lanu bee benechiqui' ze'e enza istu luhua ze'e. ¹¹Axu dañi ze'e nucua'a huaxi bee cuchi enu racu bee huañi. ¹²Chequie uziquiee bee benechiqui' ze'e lu Jesuse nú unibeei, uzela nú chu'uru arqui' bee cuchi cua'. ¹³Che uzela Jesuse nú uchiu'u bee benechiqui' arqui' niyu ze'e, nu uyu'u beei arqui' bee cuchi. Neca bee cuchi quie' tucu chiucu mili beel. Nu uyecaxu'u beel nu utsundiqui beel ru'u quiee laa nu uzana' beel hasta lu inza nu chu unguuti beel lu inza ze'e.

¹⁴Hora ze'e uyecaxu'u bee bene enu rriucu bee cuchi ze'e nzetixiule'e beei lubee bene eyeche ze'e cuna lu ye bee bene enza ze'e lunú unga. Che uyabi'ya huaxi bee bene lunú unga ze'e. ¹⁵Chenu uriña bee bene ze'e elu nzu Jesuse, ulañi' beei nú uyeca'la' niyu enu ulletse benechiqui' arqui' cuna nú nutulai xucui nzucui ze'e. Nu chiqui' ulliqui bee bene ze'e. ¹⁶Che bee bene enu ulañi' nú xa unga lu niyu enu ulletse benechiqui' arqui' cuna nú xa unga lubee cuchi, udixiule'e beei nucua' lu beelá bee bene. ¹⁷Chequie uquixie beei nú uziquiee beei lu Jesuse para nú chiu'unu lu iliu'beei.

¹⁸Chenu nze chu'u Jesuse liñi barco uyabica niyu enu ulletse benechiqui' arqui' lunu, nu uziquiei lunu para nú chenunu li'i. ¹⁹Pero né zela Jesuse nú chenunu niyu ze'e nu uninu lui:

—Uya'a ni'ilu para nú zucunulu bee bene'lu, nu ixixiule'elu lubeei lu ye nú uri'i Diose cuna li'ilu, nu cuna nú uhua'a arqui'nu li'ilu.

²⁰Chequie chu nza niyu ze'e, nu uquixiei udixiule'i lubee bene lu iliu Decápolis, lu ye nú uri'i Jesuse lui. Che ye bee bene ze'e uyanu arqui' lu cuenda' nucua'.

Uri'yeca Jesuse tucu una'a cuna endu' bene enu lee Jairo

(Mt. 9:18-26; Lc. 8:40-56)

²¹Chenu uriña zeca Jesuse stucu chu inzatu' ze'e liñi barco, uyetesa' huaxi bee bene lunu ze'e. Che uya'nanu ru'u inzatu' ze'e.

²²Chequie uriña tucu bene enu rnibiya' liñi indu' bee bene Israel lunu, leella Jairo. Chenu ulañi'lla

Jesuse utsu lliquilla lunu. ²³Nu chiqui' uziquieella lunu nú unilla lunu:

—Mero ati endua chaa nee ricu'lu yalu equie endua para nú yeca'nchu nu la atinchu.

²⁴Che nzeno Jesuse li'illa enza ni'lla nu nzequiee huaxi bee bene li'inu hasta nú uta'cu bee bene li'inu ze'e. ²⁵Leta bee bene ze'e nza tucu una'a enu riti, ungala chi'chiucu lana nú rlaca rene li'inchu. ²⁶Chiqui' nehuana ulle'ca una'a quie' nu uyanchu lu huaxi bee doctor, hasta nú ula'xunchu ye bee stene'nchu ungüitinchu. Pero né aca bee doctor a ri'yeca li'inchu, a'la mase rri'i elichia'nchu. ²⁷Enze'e chenu ubene' una'a quie' lu cuenda' Jesuse, che uyabicanchu di'chinu leta bee bene nu uti'nchu yanchu tsu' xucunu.

²⁸Xne uri'inchu elliebacu': "Tunu ti'yaa tsu' xucunu, scua yecaa uri'inchu elliebacu'." ²⁹Hora ze'e utsuxee nú rlaca rene li'inchu nu utsi'nchu nú uyeca'la'nchu. ³⁰Che uri'i Jesuse beya' nú uriyecanu tucu bene cuna poder'nu, nu ubelletanu ubi'yanu lubee bene ze'e nu uninu:

—¿Ti uti' yaa tetsu' xucua'?

³¹Nu uni bee bene' Jesuse lunu:

—Nediya'lu nú nucua'a huaxi bee bene ca'a rta'cu li'ilu: ¿Xinu rndichia'lu nú tii uti' yaa tsu' xuculu?

³²Pero ri'yasca' Jesuse diqui abenchila'nu para nú lañi'nu tii uti'yaa tsu' xucunu. ³³Chequie chiqui' reca tse'tse una'a ze'e nú xiquinchi xne nediya'nchu lunú uri'inchu, nu uyabicanchu lu Jesuse, che chu utsu lliquinchi lunu, nu uninchi ye nú ulle'canchu lunu.

³⁴Che uni Jesuse lunchu:

—Endua lunú uchili arqui'lu li'á enze'e uyeca'lu, uquia'a nu la lliquilu uyeca'li'lu elichia nú ulle'calu nee.

³⁵Rniscala Jesuse lu una'a ze'e chenu uriña bee bene enu nucua'a ni'i Jairo nu unibeei lu Jairo:

—Unguutila endu'lu nee. La nia'lu lu maestro.

³⁶Pero chenu ubene' Jesuse lunú uini bee bene ze'e. Che uninu lu Jairo:

—La lliquilu uchilitsia arqui' li'á.

³⁷Pero né zela Jesuse a chaa bee bene ze'e cuna li'inu ni' Jairo. Nzenutsianu Pedro, cuna Jacobo cuna Juan bichi Jacobo. ³⁸Chenu uriña beella ni'i Jairo, ulañi' Jesuse nú nixi bee bene nu rixiali beei cuna nú runa' beei. ³⁹Chequie uyu'u Jesuse liñi ni'i Jairo nu uninu lubee bene ze'e:

—¿Xinu nixihua cuna nú runa'hua? Né ati endu' quie' ratse tsianchu.

⁴⁰Pero ulli'chinuu bee bene ze'e li'inu, nu unibiya'nu nú chiu'u ye bee bene ze'e eli'ya', nu uyu'u nutsianu pa' endu' ze'e cuna na'nchu cuna bee bene'nu elu nchiucu'nchu. ⁴¹Che una'tse Jesuse ya endu' ze'e, nu uninu lunchu:

—Talita, cumi —rni bedichia' quie': Endu', nia lulu nú, uzetee nee.

⁴²Hora ze'e uzetee endu' ze'e nu utseenchu, nza endu' quie' chi'chiucu lana, che chiqui' uyanu arqui' yeebe bene ze'e nucua'. ⁴³Pero unibiya' Jesuse nú la ixiu'e beella lu ni' tucu bee bene nú ungae scua. Le'ca unibiya'nu nú dete' beella nú acu endu' cua'.

Chenu ubenchila' Jesuse eyeche Nazaret

(Mt. 13:53-58; Lc. 4:16-30)

6 Chequie uchiu'u Jesuse ze'e, nu ubenchila'nu lachinu cuna

bee bene'nu. ²Chenu uriña bichia nú sulachi bee bene uquixie Jesuse nú sete'nu bee bene liñi indu' bee bene Israel, che ye bee bene enu riene' nú rninu, chiqui' uyanu arqui'beei nu unibeei lu sa'beei:

—¿Cá unga nucua' huaxi nú sete' nucua' scua? ¿Nu cá uhua nucua' nú reca elliebacu' nucua' scua cuna bee milagro nú rri'i nucua'? ³¿La nu nucua' neca enu rri'i riña' ru'u bangu nu neca nucua' lliana' María, nu neca bichi nucua' Jacobo, cuna José, cuna Judas cuna Simón la? ¿Le'ca esquie nucua'a bee zana nucua' eyeche quie'?

Enze'e lá chili arqui'beei li'inu.

⁴Che uninu lubee bene ze'e:

—Catse rlu'cu bee bene ula'na lu tucu profeta. Pero la lu'cu bee bene lachilla ula'na lulla, cuna bee bene ni'illa cuna bee sa'lla.

⁵Enze'e né aca a ri'inu huaxi milagro lachinu uricu'tsianu yanu equie chiucu chuna bee bene enu riti nu uri'iyecanu bee bene ze'e.

⁶Chiqui' uyanu arqui' Jesuse, nú né chili arqui' bee bene lachinu li'inu.

Che chu uyanu bee eyeche axu ze'e nu uzete'nu bee bene ze'e.

Uxe'la Jesuse chi'chiucu bee bene'nu nze tixiu'e'e xa neca nú rnibiya' Diose

(Mt. 10:5-15; Lc. 9:1-6)

⁷Chequie ubixia Jesuse chi'chiucu bee bene'nu, nu uxe'lanu chiucua chiucua beella. Nu udete'nu poder lubeella para nú aca beella hua beella bee benechiqui' arqui' bee bene. ⁸Che unibiya'nu nú lecaxi uya' beella para lu inziu, la uya' beella biti nu la uya' beella pá nú

acu beella nu la uya' beella dimi, uya'tsia beella tucutsia xca beella.

⁹Cuna lucutsia beella nú niquie'e beella nu cuna xucu beella nú nutu tsia beella. ¹⁰Le'ca uni Jesuse lubeella:

—Chenu riñahua ni'i tucu bene uya'natsiahua ni'i bene ze'e hasta nú chiu'uhua eyeche ze'e. ¹¹Tunu tucu eyeche la yucu arqui' bee bene li'ihua cuna nú la niarqui'bee yene' beei nú rnhua, uchiu'uhua eyeche ze'e nu ri'quihua yuu be'cha' nú nu' cuchiu'hua, xi neca tucu seña nú lá zucu'bee nú unihua. Ixiule'a luhua nú bichia chenu dete' bee bene cuenda lu Diose másela dete' Diose castiya lubee bene cua' lunú dete'nue lubee bene eyeche Sodoma cuna Gomorra.

¹²Che chu nzue bee bene'nu nu nzetixiule'e beella lubee bene nú che'e arqui' bee bene lu cuenda' stulabeei.

¹³Le'ca uhua beella huaxi bee benechiqui' arqui' bee bene cuna nú udu' beella aceite equie bee bene enu riti nu uri'iyeca beella bee bene ze'e.

Xa unga chenu ungu ti Juan Bautista

(Mt. 14:1-12; Lc. 9:7-9)

¹⁴Chequie ubene' arre Herodes nú chiqui' rni bee bene lu cuenda' Jesuse, catse bee luhua ze'e. Nu uni Herodes:

—Pia nú Juan Bautista uhuañi zeca nee, enze'e rlu'culla poder nú rri'illa bee milagro scua.

¹⁵Pero textcua'a bee bene rni:

—Neca nucua' profeta Elías.

Nu textcua'a bee bene rni:

—Neca nucua' tucu bee profeta hua'tu.

¹⁶Chenu ubene' arre Herodes nucua' unilla:

—Juan Bautista nucua' li'á unibiya'a nú uru'u lluca equiella nu uhuañi zecalla nee.

¹⁷Uni Herodes scua xne unibiya'lla nú ulluna Juan nu uyaca'cuulla cuna cadena nu uyu'ulla ni'cu' equie cuenda' Herodías una'a Felipe bichi Herodes. Pero uyucu Herodes una'a Felipe bichilla. ¹⁸Nu unilá Juan lu Herodes:

—La neca nze'ca nú yuculu una'a bichilu.

¹⁹Chequie chiqui' uhuana arqui' Herodías Juan, nu niarqui'nchu nú útinchu li'illa pero leca modoe.

²⁰Xne nediya' Herodes nú neca Juan tucu bene enu neli rri'i tucu nú necane cuna nú necalla tucu bene enu nehuañi nze'ca lu Diose, enze'e ulliqui Herodes Juan. Nu né zelalla nú ri'i Herodías lunú niarqui'nchu lu Juan, nu añinzuca nú chiqui' riu' arqui'lla lunú rni Juan pero la ri'illa beya' xa ri'illa.

²¹Pero chenu uriña bichia nú uyu'u modo nú niarqui' Herodías nú ri'inchu, unga nucua' chenu ullu'cu arre Herodes lana, chequie uri'i arre Herodes tucu eliñi'lla nu udete'lla nú udacu bee bene enu rnibiya' cuna bee bene enu rnibiya' lubee sundado, cuna beelá bee bene enu neca equie lubee bene Galilea.

²²Che uyu'u xinchiu'cu Herodías elu reca eliñi ze'e nu chu uye'enchu. Chiqui' uyu' arqui' Herodes cuna bee bene enu nezene' ze'e nú xa

uye'enchu nu uni arre Herodes ze'e lunchu:

—Una'cu' tatse lunú niarquí'lu lua, nu li'á liquine.

²³Chequie uquie'e arre Herodes diose'lla nú dete'lla lunchu lunú nacu'nchu mase arli'ti lunú rnibiya'lla lu. ²⁴Nu chu uchiu'unchu eli'ya' nu unidichia'nchu lu na'nchu Herodías nú uninchu:

—¿Xi nacua lu arre quie'?

Che uni na'nchu Herodías:

—Una'cu' lluca equie Juan Bautista.

²⁵Nu yexetsia uyu'u zecanchu elu nzucu arre Herodes nu uninchu lulla:

—Niarquia nú nee inza liqui'lu lu tucu pliatu lluca equie Juan Bautista.

²⁶Che chiqui' nehuana utsu arqui' arre Herodes. Pero lu nú uquie'elalla diose'lla lu ye bee bene enu nezene' ze'e, leca' modo nú acaalla lunú unacu'nchu. ²⁷Chequie unibiya' arre Herodes lu tucu sundado nú ye'tayui lluca equie Juan Bautista. ²⁸Nu chu nza sundado ze'e liñi ni'cu' nu uchiecu'i lluca equie Juan uricu'i lu tucu pliatu nu unguya'i nu udete'i yanchu nu chu udete'nchue ya na'nchu Herodías.

²⁹Chequie chenu ubene' bee bene enu uyaquie Juan nucua', uya beei uya tucu beei cuerpo' Juan nu ucachi' beei cuerpo'lla liñi tucu eluhua.

Udete' Jesuse nú udacu ayu' mili bee bene

(Mt. 14:13-21; Lc. 9:10-17; Jn. 6:1-14)

³⁰Cheelá chenu ubenchila' chi'chiucu bee bene' Jesuse,

udixiule'e beella lunu lu ye nú uri'i beella cuna nú uzete' beella bee bene. ³¹Nu uni Jesuse lubee bene'nu:

—Uteehua, ne cha'ahua tucu luhuaire elu lecati nu' para nú tsulachia'ahua ze'e lle'na.

Uninu scua xne huaxi bee bene rriña lunu nu xiu'u beei nziue beei hasta nú né llu'cha acununu bee bene'nu. ³²Che uyu'u Jesuse cuna bee bene'nu liñi tucu barco nu nzuebeella tucu luhuaire elu lecalí ti nu'. ³³Pero ulañi' huaxi bee bene nú uchiu'u barco' beella nza nu uyu'ulu bee bene cua' li'ibeella. Che uchiu'u ye bee bene eyeche ze'e nu nzue e'ya tsia beei nu uriña rlutia'la beei elu riña Jesuse cuna bee bene'nu. ³⁴Chenu ulaca Jesuse liñi barco ze'e ulañi'nu nú nucua'ala huaxi bee bene ze'e. Chiqui' uhua'a arqui'nu li'ibeei xne neca beei xi neca bee sanchi enu lecati ri'i ucu nu uquixienu nú uzete'nu li'ibeei huaxi bee bedichia'. ³⁵Chenu unga uchee, uyabica bee bene' Jesuse lunu nu uni beella:

—Ucheela nee, nu leca ni'tucu ni' bee bene ca'a. ³⁶Uni'i lubee benecua' nú yue beei lubee ranchu cuna lubee eyeche axu ca'a, para nú tsii beei lle'na nú acubeei.

³⁷Pero uni Jesuse lubee bene'nu:

—Li'ihua de'tehua nú acu bee bene quie'

Che uni bee bene'nu lunu:
—¿Pero xie' che tsia'hua chiucu ayu'u dimi denario pá, acu bee bene quie' la?

³⁸Chequie uni Jesuse lubeella:

—¿Xala pá rlu'cuhua? Uya bi'yahua xala pá nu'.

Chenu uri'i beella beya' nú xala pá nu' uni beella lunu:

—Nu' ayu' pá cuna chiucu bela.

³⁹Che unibiya' Jesuse nú cua'a bee bene ze'e texcua'a texcua'a beei lu ixi xata niye'e ze'e.

⁴⁰Chequie ucua'a tucu ayua tucu ayua beei luhuare ze'e nu ucua'a se cincuenta se cincuenta beei.

⁴¹Nu una'tse Jesuse ayu' pá ze'e cuna rucu bela ze'e nu ubi'yanu enza liñibe nu udete'nu che'tsala lu Diose, nu chu ule'enu ayu' pá ze'e cuna rucu bela ze'e udete'nu ya bee bene'nu para nú ritsi' beella bee pá cua' cuna bee bela lu ye bee bene ze'e. ⁴²Udacu ye bee benecua' hasta nú ubela' beei. ⁴³Nu urichesca' beella chi'chiucu llume bee pedaso bee pá cuna bee pedaso bee bela enu uya'na lunú udacu beei. ⁴⁴Leta ye bee bene enu udacu ze'e nucua'a ayu' mili bee niyu.

Utsee Jesuse lu inzatu'

(Mt. 14:22-27; Jn. 6:16-21)

⁴⁵Chequie unibiya' Jesuse nú uyu'u bee bene'nu liñi barco para nú chu chue beella stucu chú inzatu' elu nchiucu' eyeche nú lee Betsaida. Pero uya'nasca'nu ze'e para nú ninu lubee bene enu nucua'a ze'e nú nzanu. ⁴⁶Chenu ulaxu nú uninu lubee bene ze'e nú nzanu, che chu nzanu tucu dañi nu unacu'nu lu Diose ze'e. ⁴⁷Pero chenu uyu'u rula', nzusca' Jesuse dañi ze'e. Nu nzala barco' bee bene'nu labe inzatu', ⁴⁸chenu ulañi'nu nú chiqui' neriña' tsenuu bee bene'nu barco' beella xne reca bii enza lubeella. Che uchiu'unu ellicabe ze'e nu utsenu lu inzatu'

ze'e, nu uri'inu tucu nú nze detenu lubeella. ⁴⁹Pero chenu ulañi' bee bene'nu nú seenu nze'tanu lu inzatu' ze'e, uri'i beella elliebacu' nú necanu tucu arma' bene ungu'ni nu urixialibeella. ⁵⁰Xne ulañi' ye beella li'inu nu ulliqui beella, pero chu uninu lubeella:

—iUtsu naaqui arqui'hua li'á nucua' la lliquihua!

⁵¹Che uyu'u Jesuse liñi barco' beella nu chu unguaxee bii. Chiqui' uyanu arqui' bee bene'nu nucua'.

⁵²Xne ni'lá ri'i beella elliebacu' equie milagro nú uri'inu chenu uritsi'nu bee pá lubee bene lunú nacu'sca' nchiñi elliebacu' beella.

Uri'iyeca Jesuse bee bene enu riti eyeche Genesaret

(Mt. 14:34-36)

⁵³Chequie udete beella stucu chú inzatu' ze'e nu uriña beella lu iliu Genezaret nu ullica'cuu beella barco' beella ru'u inzatu' ze'e. ⁵⁴Hora chenu uchiu'u beella liñi barco' beella uyu'ulu bee bene Jesuse. ⁵⁵Che uya bee bene ze'e nu udixiule'e beei lubee bene diqui bee luhuare enza ze'e, nu uquixie bee bene uyayu bee bene, bene enu riti nchiucu' lu camiya elu riene' beei nú nzu Jesuse. ⁵⁶Catse elu uya Jesuse sianu necane bee eyeche lla'na urre necane bee eyeche llene urre necane bee ranchu udixiu bee bene cua' bee bene enu riti elu udete Jesuse. Chequie uziquie bee bene enu riti ze'e lunu nú zelanu nú ti'yabeei masia ru'u xucunu; nu ye bee bene enu uti'ya ru'u xucu Jesuse uyeca' bee bene ze'e.

Lunú rri'i nú rri'i bee bene dula

(Mt. 15:1-20)

7 Tucu bichia uyabica bee fariseo cuna bee ulaxcuela enu reca ley' Moisés lu Jesuse, nze'ta bee benequie' enza Jerusalén. ²Chequie chenu ulañi' bee benecua' nu nu' chiucu chuna bee bene' Jesuse enu ne naa chenu udacu beella tucu nú neca costumbre' bee ulaxcuela cua', che uze'ta bee benecua' bee bene' Jesuse. ³(Xne nzequie bee fariseo cuna bee bene Israel costumbre' bee bene' beei enu udetela, nú la acu beei tunu la naa beei ya beei huaxi bese.

⁴Le'ca chenu ubenchila' beei nú uya beei ru'u i'ya la acu beei tunu la naa beei ya beei, tucu nú neca costumbre' beei. Le'ca nzequie beei huaxilá bee costumbre' beei, nú xa rquiee beei bee vaso cuna bee situ cuna bee exquiñia nú necache' icu' cuna luna nú ra'tse beei.) ⁵Enze'e unidichia' bee fariseo cuna bee ulaxcuela enu reca ley' Moisés lu Jesuse nú unibeei:

—¿Xinu la chequiee bee bene'lu tucu nú neca bee costumbre' bee benea'ahua enu udetela, xinu la naa bee bene'lu yabeei chenu racu beei tucu nú riala nú ri'i beei?

⁶Chequie ucuaqui Jesuse lubee benecua' nú uninu:

—Rri'ihua tucu nú rlube'hua nú rri'i nze'cahua, pero lia rri'ihua nucua'. Neli neca nú uni profeta Isaías chenu uquie'ella lunú uni Diose lu cuenda'hua nú uninu:

Bee benequie' rri'i beei tucu nú chiqui' rlu'cu beei ula'na lua, pero istu nzu rqui'beei lua.

⁷Lecaxi zibi' nú rnibeei nú rlu'cu beei ula'na lua,
xne sete' beei bee bene tucu nú necatsia elliebacu' bee bene.

⁸Li'ihua sana' arqui'hua Stichia' Diose para nú nzequiehua bee costumbre'tsia' bee bene nú xa rquiehua bee situ cuna bee vaso cuna beelá nú neca xi neca bee nucua'.

⁹Le'ca uni Jesuse lubeei:

—Sana' arqui'hua Stichia' Diose para nú sucu'tsiahua nú neca bee costumbre'hua. ¹⁰Nu uni Moisés: “Lu'cu bee bene ula'na lu pa'lla cuna lu na'lla”, nu “Bee bene enu ri'ña nú zeca pa' cuna nú zeca na' ati bene ze'e che.” ¹¹Pero li'ihua rnihua nú nu' modo ni tucu bene lu pa'lla cuna lu na'lla: “Leca modo nú ri'á elietsa luhua, xne ye lunú rluca neca nucua' Corbán” (rni bedichia' Corbán nú necala nucua' cuenda' Diose). ¹²Che rnihua nú bee bene enu rni scua la qui'ña nú ri'i nze'e elietsa lu pa' nze'e cuna lu na' nze'e. ¹³Scua neca nú la zucu'hua Stichia' Diose, xne nzequiehua bee costumbre'hua nu sete'hua bee sa'hua nu rri'ihua huaxilá beenú neca scua.

¹⁴Che ubixia Jesuse bee bene, nu uninu lubeei:

—Uquie'e diacahua nu uri'ihua beya' lunú rnia: ¹⁵La ri'i bee bene dula equie cuenda' nú racu bee bene, pero rri'i bee bene dula lunú xiu'u ru'u bee bene, cuna lunú rri'i bee bene, nucua' neca nú rri'i nú rlu'cu bee bene dula. ¹⁶Tatse bee bene enu niarqui' nú yene' nú rnia, quie'e diaca nze'e nucua' che.

¹⁷Chenu utsa'na Jesuse bee bene ze'e nu uyu'unu liñi tucu ni'i nu

unidichia' bee bene'nu lunu nú xa neca lunú uzete'nu scua. ¹⁸Che uninu lubeella:

—¿Xie' le'ca nuuhua ne ri'ihua beya' lunú unia scua la? ¿Xie' la ri'ihua beya' nú la ri'i bee bene dula equie cuenda' nú racu bee bene, ¹⁹xne lunú racu bee bene la chu'u nucua' liñi arqui' bee bene riu'utsia nucua' xla'cu bee bene nu chu xiu'u zecae?

Scua udixiule'enu nú ye bee elubacu la ri'i bee nucua' nú rlu'cu bee bene dula. ²⁰Le'ca uni Jesuse lubeei:

—Lunú xiu'u ru'u bee bene cuna lunú rri'i bee bene, nucua' neca nú rri'i nú rri'i bee bene dula. ²¹Xne liñi arqui' bee bene rliñi nú necha nchiñi elliebacu' bee bene nú rri'i bee bene eluhuexe cuna nú rri'i bee bene eluhua' cuna nú ruuti sa'a bee bene, ²²cuna nú rlu'cu niyu stucu una'a urre rlu'cu una'a stucu niyu, cuna nú rle' bee bene lu'culla stene' sa'alla, cuna nú rri'i bee bene nú necha neca, cuna nú sequienu bee bene sa'a bee bene, cuna nú rlu'cu bee bene bee vicio, cuna nu rlea arqui' bee bene lu sa'a bee bene, cuna nú rni bee bene eluquichia', cuna nú ruti' bee bene, cuna nú rri'i bee bene beenú la zibi'. ²³Ye beenú necha neca cua' nze'ta liñi arqui' bee bene nu rri'i bee nucua' nú rri'i bee bene dula.

Xa utsu tenelí arqui' tucu una'a enu la neca bene Israel Jesuse

(Mt. 15:21-28)

²⁴Chenu uchiu'u Jesuse ze'e nú nzanu lu iliu Tiro cuna lu iliu Sidón, che uyu'unu liñi tucu ni'i

xne la niarquí'nu nú acabiya' bee bene nú nzucunu ze'e, pero ne acá nú acachi'lunu ze'e. ²⁵Xne luego chu ubene' tucu una'a nú nzucunu ze'e nu uyanchu elu nzucunu, xne rlu'cunchu tucu xinchiu'cunchu enu nchiñi benechiqui' arqui' nu chu utsu lliquinchu lunu. ²⁶La neca una'a quie bene Israel, necanchu bene Sirofenicia. nu uziquienchu lu Jesuse para nú huanu benechiqui' arqui' xinchiu'cunchu. ²⁷Pero uni Jesuse lu una'a ze'e:

—Uzela nú acuxu bee endu' xne la neca nze'ca nú axi bene pá ru'u bee endu' dete' bene acu bee nicu.

²⁸Che uninchu lunu:

—Neli'lu nú unilu scua. Pero hasta bee nicu racu pá ubee nú sana' ru'u endu' liñi mexa.

²⁹Chequie uni Jesuse lunchu:

—Uni nze'calu nú unilu scua, uquia'a ni'lu uchiu'ula benechiqui' arqui' xinchiu'culu nee.

³⁰Chenu uriñanchu ni'inchu ulañi'nchu xinchiu'cunchu nuxu lu luna, pero uchiu'ula benechiqui' arqui'nchu che.

Chenu uri'iyeca Jesuse tucu bene enu localí ni nu nenguata'

³¹Che uchiu'u zeca Jesuse lu iliu Tiro nu udetenu eyeche Sidón cuna bee eyeche lu iliu Decápolis nu uriñanu ru'u inzatu' Galilea. ³²Ze'e uriñayuu bee bene tucu niyu enu nenguata' lunu cuna nú la ni nze'cai nu unacu' bee bene ze'e lunu nú ricu'nu yanu equiei. ³³Chequie unguya' Jesuse niyu ze'e tucu chú, nu udu'nu cuene yanu liñi rucu diacai nu uti'nu xenenu lu lu'chii. ³⁴Che ubi'yanu enza liñibe nu utsii arqui'nu nú uninu:

—¡Efata! —rni bedichia' quie':
 ¡Uya'la! ³⁵Hora ze'e, uya'la rucu
 diaca niyu ze'e nu uyeca' lu'chii nu
 uquixie uni nze'cai. ³⁶Nu unibiya'
 Jesuse nú la ixiule'e bee bene ze'e
 lu ni' tucu bee bene lunú unga ze'e,
 pero añinzuca nú unibiya' Jesuse
 nú la ni bee bene nucua' a'la mase
 uni bee bene nucua'. ³⁷Chiqui'
 uyanu arqui' bee bene ze'e, nu
 unibeei:

—Ñia neca lu ye nú rri'inu hasta
 nú rri'inu nú uye'e diaca bene enu
 nenguata' nu rri'inu nú rni bene
 enu la aca nii.

**Chenu udete' Jesuse nú udacu tacu
 mili bee bene**

(Mt. 15:32-39)

8 Tucu bichia uyetesa' zeca
 huaxi bee bene lu Jesuse
 nu lecaxi lu'cu beei acu beei, che
 ubixia Jesuse bee bene'nu nu uninu
 lubeella:

²—Ru'u arquia bee benequie',
 xne nucua'a labeei chuna bichia
 cuna li'á nu lecaxi lu'cu beei ca'a
 acu beei. ³Tunu xe'laa beei nú yue
 beei enza ni' beei nu la acu beei nu'
 modo nú chiula' beei lu inziu xne
 nu' beei enu nze'ta enza istu.

⁴Chequie ucuaqui bee bene'nu nu
 uni beella lunu:

—¿Cá chiu'u nú acu bee benequie'
 ca'a luhuare elu lecalí ti nu'?

⁵Che unidichia' Jesuse lubeella
 nú uninu:

—¿Xala pá rlu'cuhua?

Nu ucuaqui beella:

—Rlucuru achine.

⁶Chequie unibiya' Jesuse nú cua'a
 bee bene ze'e lu yuu nu una'tsenu
 achi pá ze'e, nu udete'nu che'tsalá

lu Diose equie cuenda' pá cua', nu
 chu udete'nue ya bee bene'nu para
 nú ritsi' beellae lubee bene ze'e.
⁷Le'ca rlu'cu bee bene'nu lle'na
 bee bela nu udete'nu che'tsalá lu
 Diose equie cuenda' bela ze'e, nu
 unibiya'nu nú ritsi' bee bene'nu
 bee bela cua' lubee bene ze'e. ⁸Ye
 bee bene ze'e udacu beei hasta nú
 ubela' beei nu uzucu sobrasca' achi
 llume bee pedaso nú uya'na udacu
 beei. ⁹Neca tucu tacu mili bee bene
 enu udacu ze'e nu chu uni Jesuse
 lubee bene ze'e nú nzanu. ¹⁰Che
 chu uyu'u Jesuse liñi barco cuna
 bee bene'nu nu nzuebella lu iliu
 Dalmanuta.

**Unacu' bee fariseo tucu milagro lu
 Jesuse**

(Mt. 16:1-4; Lc. 12:54-56)

¹¹Ze'e uriña bee fariseo nu
 uquixie beei rnixuu beei cuna
 Jesuse, para nú ri'i beei preo li'inu,
 che unacu'beei nú ri'inu tucu
 milagro nú lube' nú nze'tanu lu
 cuenda' Diose. ¹²Nu hasta aquíé
 utsii arqui' Jesuse nú uninu:

—¿Xi nú niarqui'hua nú ri'á tucu
 milagro? Neli nia luhua nú la ri'á ni'
 tucu milagro luhua.

¹³Chequie utsa'nanu bee bene ze'e
 nu uyu'u zecanu liñi barco cuna
 bee bene'nu nu chu nzuebella
 stucu chú inzatu'.

**Rri'i nú sete' bee fariseo tucu nú rri'i
 levadura**

(Mt. 16:5-12)

¹⁴Uzañi' bee bene' Jesuse a uya'
 beella nú acu beella nuya'tsia
 beella tucu pá liñi barco ze'e. ¹⁵Che
 uni Jesuse lubeella:

—Ubi'yahua li'ihua, lu levadura' bee fariseo cuna levadura' Herodes.

¹⁶Nu uquixie beella uni beella lusa'beella:

—Uninu scua xne la lu'cua'ahua pá.

¹⁷Pero uri'i Jesuse beya' lunú rni beella, nu uninu lubeella:

—¿Xi nú rnhua nú la lu'cuhua pá? ¿Xie' lasca'lí ri'ihua beya' la? ¿Xie' ni' teme' la ri'ihua beya' la?

¹⁸Nzucu i'culuhua pero pianu la lañi'hua, nzucu diacahua pero pianu la yene'hua ¿Xie' la llucu' arquihua, ¹⁹chenu uritsia ayu' pá lu ayu' mili bee bene la? ¿Nu xala llume lunú uzucu sobra uquiete'sa'hua?

Nu ucuaqui beella:

—Chi'chiucune.

²⁰Che uni Jesuse lubeella:

—Chenu uritsia achi pá lu tacu mili bee bene, ¿xala llume uri'ichehua lunú uquiete'sa'hua?

Nu ucuaqui beella:

—Achi llumene.

²¹Chequie uninu lubeella:

—¿Xie' lasca' ri'ihua beya' nee la?

**Uri'iyeca Jesuse tucu
bene enu niquie'lu**

²²Chenu uriña beella eyeche Betsaida, uriñayu bee bene tucu niyu enu niquie'lu lu Jesuse, nu uziquie bee bene ze'e lunu nú ti'nu yanu lu niyu ze'e. ²³Che una'tse Jesuse ya niyu ze'e nu unguya'nu li'i ru'u eyeche ze'e. Nu uti'nu xenenu i'cului, nu uricu'nu yanu equiei nu unidichia'nu lui tunu ri'yalaí lle'na.

²⁴Nu uquixie nú ri'ya, niyu ze'e nu uni:

—Rlaña bee bene nú sebeeí. Pero rnaa beei xi rnaa aca.

²⁵Chequie uti' zeca Jesuse yanu i'cului, nu uninu lui nú bi'yai tucutsia luhuare nu uquixie nú ulañi' nze'ca'i yeene. ²⁶Che uni Jesuse lu niyu ze'e nú yai enza ni'i, nu unibiya'nu nú la chu'i eyeche ze'e cuna nú la ixiule'i lu ni' tucu bee bene nú xa uyeca i'cului.

**Uni Pedro nú neca Jesuse Cristo enu
uxe'la Diose**

(Mt. 16:13-20; Lc. 9:18-21)

²⁷Lu lá bee nucua', nza Jesuse cuna bee bene'nu lubee eyeche lu iliu Cesarea de Filipo. Chenu nzuebeella lu inziu, unidichia' Jesuse lubee bene'nu nú uninu:

—¿Ti rni bee bene nú necaa?

²⁸Chequie ucuaqui beella nú uni beella:

—Nu' bee bene enu rni nú necalu Juan Bautista, nu nu' bee bene enu rni nú necalu profeta Elías, nu nu' bee bene enu rni nú necalu tucu bee profeta hua'tu.

²⁹Che uninu lubeella:

—Li'i quiehua, ¿ti rnhua nú necaa?

Nu ucuaqui Pedro nú unilla:

—Li'ilu necalu Cristo enu uxe'la Diose.

³⁰Pero unibiya' Jesuse nú la ni beella nú ti necanu lu ni' tucu bee bene

**Udixiule'e Jesuse nú úti bee bene
li'inu**

(Mt. 16:21-28; Lc. 9:22-27)

³¹Chequie uquixienú udixiule'enu lubee bene'nu nú uninu:

—Li'á Bene enu uxe'la Diose chiqui' nze'ta nú nehuana zecaa, cuna nú la yu' arqui' bee usticia' bee bene Israel li'á, ni'bee ule'ya enu rnibiya' lu beelá bee ule'ya ni'bee ulaxcuela enu reca ley' Moisés, úti bee benecua' li'á, pero bichia rriuna huañi zecaa.

³²Chiqui' neli udixiule'e nze'canu lubeella lu cuenda' nucua'. Chequie unguya' Pedro li'ínu tucu chu ze'e nu unilla lunu nú la nia'nu scua.

³³Che ubelleta Jesuse nu ubi'yanu lubee bene'nu, nu uqui'ya' Pedro uri'ínu, nú uninu lulla:

—iUlluna' lua beze'lu! Xne elliebacu' nú rri'ilu scua la ye'ta nucua' lu Diose, rri'i tsialu elliebacu' tucu nú neca elliebacu' bee bene iliulabe.

³⁴Chequie ubixia Jesuse bee bene'nu cuna beelá bee bene enu nucua'a ze'e, nu uninu lubeei:

—Tunu nu' bee bene enu niarqui' nú aca benea, la ri'illa tucu nú necatsia elliebacu'lla, rqui'ña nú riqui'lla beenú nehuana zecalla che chu ye'ta quieella li'á. ³⁵Xne bee bene enu niarqui' másela lunú nehuañi lu iliulabe quie' enta bichia nú nitilu nucua', pero bee bene enu ati equie nú neca beei benea cuna equie nú uzucu'beei nú rni Stichia' Diose, lu'cu nze'e nú huañi nze'e lu Diose. ³⁶Lecaxi zibi' nú ri'i bee bene ana ye lunú nu' lu iliulabe, tunu unitilulla lu Diose. ³⁷Xne leca modo, nú tsi bee bene nú huañilla liñibe. ³⁸Tunu tu' tucu bene li'á cuna nú rni stichia'a lubee bene enu rlu'cu dula, cuna nú la chequiee beei inziu' Diose le'ca Li'á Bene enu uxe'la Diose tua bee benecua'

chenu riña zecaa cuna lunú rnibiya' Pa liñibe cuna bee ángele'nu.

9 Le'ca uni Jesuse lubee bene ze'e nú uninu:

—Ixiule'a luhua nú nu'hua enu nucua'a ca'a lá atisca' hasta nú lañi'hua poder' Diose cuna lu ye nú recanu.

Ulube' Jesuse ellie'e nú rlu'cunu lu chuna bee bene'nu

(Mt. 17:1-13; Lc. 9:28-36)

²Chenu udete xu'cu bichia, che unguya' Jesuse Pedro, cuna Jacobo cuna Juan. Equie tucu dañi llene, ze'e uche'e nú rnaa Jesuse lubeella.

³Nu chiqui' uyu'ullie'e xucunu nu unga niquichia'quie'e nu lecati aca quié laquie nú niquichiu scua lu iliulabequie!. ⁴Hora ze'e ulañi' beella nú rdichia'nu Jesuse, Elías cuna Moisés enu uhuañi hua'tu.

⁵Nu uni Pedro lu Jesuse:

—Maestro, ineca nze'ca nú nellua'hua ca'a! Para nú reche'eru chuna ranchu: tucue para li'ilu, nu stucue para Moisés, nu stucue para Elías.

⁶Uni Pedro scua xne chiqui' xiqui' beella, nu la ri'illa beya' xi unilla.

⁷Hora ze'e, ulaca tucu xcabe nú udu' xca'la' equie beella. Nu liñi xcabe ze'e, ubene' beella tucu chi nu uni chi ze'e:

—Neca nucua' lli'ña enu chiqui' se'caa, uzu'cu'hua lunú rninu.

⁸Che ubi'ya beella diqui' abenchila' ze'e, nu leca' tinu' ze'e stucu li'tsia Jesuse nzu ze'e.

⁹Chenu enta laca beella dañi ze'e, uni Jesuse lubeella nú la ixiule'e beella lu ni'tucu bee bene lunú ulañi' beella ze'e, hasta bichia nú

huañi zeca Li'á Bene enu uxe'la Diose.

¹⁰Chequie li'itsia beella nediya' beella nucua', añinzuca nú rnidichia' beella lu sa'a beella xa neca equie nú huañi zecanu. ¹¹Nu unidichia' beella lu Jesuse nú unibeella:

—¿Xi nú rni bee ulaxcuela enu reca ley' Moisés nú enta rluti Elías?

¹²Che ucuaquinu lubeella:

—Neli nú nze'ta rluti Elías, para nú tsúche'ella yeene. ¿Nu xinu rni lu ichi' Stichia' Diose nú chiqui' nehuana zeca li'inu enu uxe'la Diose cuna nú nibee bene nú lecati necanu? ¹³Pero nia luhua nú ube'tala Elías, nu uri'i bee bene ye nú niarquibeei lulla, tucu nú niquie lu ichi' Stichia' Diose nú zecalla.

Uhua Jesuse benechiqui' arqui' tucu endu' niyu

(Mt. 17:14-21; Lc. 9:37-43)

¹⁴Chequie chenu ubenchila' beella elu nucua'a beelá bee bene' Jesuse, ulañi' beella nú nucua'a huaxi bee bene ze'e, cuna bee bene'nu nu rni xuu chiucu chuna bee ulaxcuela enu reca ley' Moisés lubee bene'nu ze'e. ¹⁵Chenu ulañi' bee bene ze'e nú nze'ta Jesuse, chiqui' uyanu arqui'bee nu xexu'u beei uya ni'bee malune lunu. ¹⁶Che unidichia' Jesuse lubee bene'nu nú uninu:

—¿Xi rdichia'nuhua bee benecua'?

¹⁷Nu ucuaqui tucu bene leta bee bene enu nucua'a ze'e nú unilla:

—Maestro, ca'a nzelayua endua lulu, xne secái ichia' benechiqui' nu rri'i benechiqui' nu la nii. ¹⁸Catse elu nzu endua, si'qui benechiqui' li'i

lu yuu nu xiu'u lliña ru'i, cuna nú tu'na racu xa'layai cuna nú xungai. Unia lubee bene'lu nú huabeella benechiqui' arqui' endua pero né aca beella.

¹⁹Chequie ucuaqui Jesuse nú uninu:

—iChiqui' nziti arqui'hua nu la chili arqui'hua li'á! ¿Se xala tiambu rqui'ña nú tsunua li'ihua? ¿Nu xa riquilá cuna li'ihua? Uteyuhua endu' cua' ca'a.

²⁰Che uriñayu bee bene endu' ze'e lu Jesuse. Pero chenu ulañi' benechiqui' Jesuse, uri'i benechiqui' tucu ichia ziña lu endu' ze'e, nu uzana'i lu yuu nu nzendulai nu xiu'u lliña ru'i. ²¹Chequie unidichia' Jesuse lu pa' endu' ze'e:

—¿Hasta xunga seca endu'lu scua? Nu ucuaqui pa' endu' ze'e:

—Hasta chenu lle'nai secái scua.

²²Huaxi bese utsi'qui benechiqui' endua luquii cuna lu inza, para nú atii. Enze'e tunu nu' modo nú acalu uri'i elietsa luru, nu uhua'a arqui' li'iru.

²³Che uni Jesuse:

—¿Xinú rnilu tunu acaa? iYeene acane para bee bene enu chili arqui' li'á!

²⁴Chequie urixiali pa' endu' ze'e nú unilla:

—Chili arquia li'ilu. iUri'i elietsa lua para nú chililá arquia li'ilu!

²⁵Chenu ulañi' Jesuse nú riete'sa'lá huaxi bee bene ze'e, che uqui'ya' benechiqui' ze'e uri'inu, nu uninu lui:

—Benechiqui' enu rri'i nú la nii bene cuna nú rri'i nú nenguata' bene, nibiya'a nú chiu'ulu arqui' endu' quie' nu la benchila'lu stucu bese arqui'i.

²⁶Chequie ubixialí benechiqui' ze'e, nu uri'i ichia ziñia lu endu' ze'e. Nu chu uchiu'i arqui' endu' ze'e, utsa'nai endu ze'e xi neca tucu bene enu ungu'ti, che uni bee bene nú ungu'tila endu' cua' nee. ²⁷Pero chu una'tse Jesuse ya endu' ze'e, nu uletsanui nu chu utsulii.

²⁸Che uyu'u Jesuse cuna bee bene'nu liñi ni'i, nu unidichia' beella lunu:

—¿Xinu né acaru ahuaru benechiqui' arqui' endu' cua'?

²⁹Nu ucuaqui Jesuse lubeella:

—Para nú chiu'u clasia' benechiqui' cua' rqui'ña nú dete'hua bichia nú la acuhua nu nacu'hua lu Diose.

**Udixiule'e Jesuse bese rru'cu nú úti
bee bene li'inu**

(Mt. 17:22-23; Lc. 9:43-45)

³⁰Chenu uchiu'u beella ze'e, udete beella lu iliu Galilea. Pero la niarqui' Jesuse nú acabiya' bee bene nú udete beella enza ze'e, ³¹xne rixiule'etsianu lubee bene'nu nú uninu lubeella:

—Li'á Bene enu uxe'la Diose dete' cuenda bee bene li'á lubee bene, para nú úti beei li'á, pero acatsia bichia rriuna huañi zecaa.

³²Lá ri'i bee bene'nu beya' lunú uninu scua, nu ulliqui' beella a nacu' dichia' beella lunu.

**Udixiule'e Jesuse nú ti mase neca
equie**

(Mt. 18:1-5; Lc. 9:46-48)

³³Chenu uriña beella Capernaum. Uriña beella tucu ni'i, che unedichia' Jesuse lubee bene'nu: —Xi rdichia'hua chenu nzela'ahua lu inziu.

³⁴Pero ne cuaqui beella, xne chenu enta beella lu inziu unibeella lu sa'a beella nú taa beella enu máse neca equie. ³⁵Chequie uzucu Jesuse, nu ubixianu chi'chiucu bee bene'nu nu uninu lubeella:

—Tunu nu'ta tucuhua enu niarqui' nú aca neca equie letahua, rqui'ña nú aca nze'e tucu bene enu lecati neca cuna nú zibi' nze'e lu yehua.

³⁶Nu chu una'tsenu tucu endu' utsunu labe beella, nu uchi'chinu endu' ze'e nu uninu lubeella:

³⁷—Tatse bee bene enu ri'i elietsa lu tucu endu' equie cuenda' li'á, neca xi neca nú rri'i nze'e elietsa lua, nu la ri'illa elietsa lu li'itsia, le'ca rri'illa elietsa lu li'inu enu uxe'la li'á.

**Bene enu la ni cundra lia'ahua nze'e
nzu chu'ahua**

(Mt. 10:42; Lc. 9:49-50)

³⁸Che uni Juan lu Jesuse: —Maestro, ulañi'ru tucu bene rlua benechiqui' arqui' tucu bene equie nú recalú, pero ucaru nú ri'illa scua xne la acalla bene leta'ahua.

³⁹Chequie ucuaquinu nú uninu: —La cáhua nucua', xne bene enu rri'i milagro equie nú recaa la ze'ta nze'e li'á. ⁴⁰Bene enu lani condra lia'ahua, nzu nze'e chua'ahua. ⁴¹Tatse bee bene enu liqui' masia tucu basu inza luhua lunú necahua bene! Cristo, neli nia luhua nú yucu bene ze'e lunú dete' Diose lulla.

**Ubi'yahua li'ihua para nú la
zana'hua lu dula**

(Mt. 18:6-9; Lc. 17:1-2)

⁴²Tatse bene enu ri'i nú ri'i tucu bene dula enu apenatsia nzeli arqui' li'á, máse neca nze'ca lu cuenda' bene ze'e nú quie'e bene tucu quiee

molino añilla nu tsi'qui bee bene li'illa lu inzatu'. ⁴³Tunu rri'i yalu nú rri'ilu dula, mejora uchie'cu'e, máse neca nze'ca nú chu'ulu liñibe cuna tucutsia yalu, tunu chu'ulu ebila cuna rucu yalu, elu leca modo nú yala quii. ⁴⁴Ze'e la ati bee berecu', cuna nú leca xunga yala quii ze'e. ⁴⁵Tunu rri'i cuchiu'lu nú rri'ilu dula, mejora uchie'cu'e xne máse neca nze'ca nú chu'ulu liñibe cuna tucutsia cuchiu'lu, tunu chu'ulu ebila cuna rucu cuchiu'lu elu leca modo nú yala quii. ⁴⁶Elu la ati bee berecu' nu leca xunga yala quii ze'e. ⁴⁷Le'ca tunu rri'i i'cululu nú rri'ilu dula, mejora uhuane, xne máse neca nze'ca nú chu'ulu liñibe cuna tucutsia i'cu'lulu, nú chu'ulu ebila cuna rucu i'cu'lulu, ⁴⁸elu la ati bee berecu' nu leca xunga yala quii ze'e. ⁴⁹Tucu nú sibi' zete nú riu'e equie elubacu le'ca esquie sibi' nú nehua zeca bee bene enu nzeli arquí' li'á. ⁵⁰Zete neca nze'cae; pero tunu niti nú neri'i, ¿xa ri'ihua para nú aca zecae tucu nú necane para nú zibi'i? Uri'ihua tucu nú neli neca para nú la zecahua xi neca zete nú la zibi', nu uhuañi nze'cahua cuna bee sa'hua.

Udixiule'e Jesuse nú la le'e niyu una'lla nu la le'e una'a niyu'lla

(Mt. 19:1-12; Lc. 16:18)

10 Che uchiu'u Jesuse Capernaum nu uyanu lu iliu Judea cuna stucu chú re'cu Jordán. Ze'e uyetesa' zeca huaxi bee bene lunu, nu uquixienu sete'nu li'ibeei tucu nú neca costumbre'nu nú rri'inu. ²Che uyabica chiucu chuna bee fariseo lu Jesuse, para nú ri'i

bee preo li'inu, nu unidichia' beei lunu tunu nu' modo le'e tucu niyu una'i.

³Chequie ucuaqui Jesuse nú uninu lubeei:

—¿Xa unibiya' Moisés nú ri'ihua?

⁴Nu unibeei lunu:

—Uni Moisés nú nu' modo le'e tucu niyu una'i tunu acache' tucu ichi' elu rni nú ule'e sa'beeí.

⁵Che uni Jesuse lubeei:

—Uni Moisés nú acane scua xne chiqui' nziti arquí'hua. ⁶Pero chenu uquixie Diose ureche' yeene, “ureche'nu niyu cuna una'a”. ⁷“Enze'e chenu uyucu niyu tucu una'a tsa'nai pa'i cuna na'i, para nú huañii cuna una'tsiai. ⁸Che rucu beeí aca beeí xi neca tucutsia bene.” Scua la neca beeí xi neca chiucu bene necatsia beeí tucu bene.

⁹Enze'e la qui'ña nú le'e bene lunú uri'i Diose nú uyetesa'.

¹⁰Chenu uyu'u beella liñi tucu ni'i, unidichia' zeca bee bene! Jesuse lunu equie nú uninu scua lubebe fariseo. ¹¹Nu uni Jesuse lubeella:

—Tatse niyu enu le'e una'a nu yucui stucu una'a, rri'i dula.

¹²Le'ca esquie tunu le'e tucu una'a niyunchu nu yucunchu stucu niyu, rri'inchu dula.

Chenu uri'ile'ya Jesuse bee endu'

(Mt. 19:13-15; Lc. 18:15-17)

¹³Uyayu bee bene bee endu' lu Jesuse, para nú ricu'nu yanu equie bee endu', pero uqui'ya' bee bene enu ube'tayu bee endu' ze'e uri'i bee bene'nu. ¹⁴Chenu ulañi' Jesuse nucua', uleenu nu uninu:

—Utsana'hua nú ye'ta bee endu' lua, nu la cáhua nú ye'ta beeí lua,

xne lunú rnibiya' Diose neca para bee bene enu neca xi neca bee endu' quie'. ¹⁵Ixiule'a luhua tunu la chili arqui' bene lunú rnibiya' Diose xi nzeli arqui' tucu endu, la chu'u bene cua' lunú rnibiya' Diose.

¹⁶Che uchi'chinu bee endu' ze'e, nu uricu'nu yanu equie beei nu uri'ile'yanu li'ibeei.

Ubedichia'nu Jesuse tucu bene xene

(Mt. 19:16-30; Lc. 18:18-30)

¹⁷Chenu uchiu'u Jesuse nú nzanu, uriña xu'u tucu niyu lunu, nu utsulliqui lunu nu unidichia'i:

—Maestro enu neca bene nze'ca, ¿xi rqui'ña ri'á para nú lu'cua elunehuañi nú leca xunga laxu liñibe?

¹⁸Chequie ucuaqui Jesuse nú uninu:

—¿Xinu rnilu nú neca bene nze'ca? Leca ni'tucu bene nze'ca tucutsia Diose neca bene nze'ca.

¹⁹Nediya'la'lu bee mandamiento: “La útilu bene, nu la lu'culu stucu una'a, la ri'ilu eluhuaña', la ta'lu eluquichia' bene, nu la zequienúlu bene, lu'culu ula'na lu pa'lu cuna lu na'lu.”

²⁰Che ucuaqui niyu ze'e nú uni:

—Maestro, ye bee nucua' sucua hasta chenu neca endu'.

²¹Chequie ubi'ya Jesuse lu niyu ze'e nu uzecanu, nu uninu lui:

—Pero rri'itsia tucu nú ri'ilu nee, uquia tuti ye beenú rlu'culu nu dete'lu dimi cua' lubee bene enu seca elitsi. Nu scua lu'culu eluxene liñibe. Nu chu ye'talu cuna li'á mase ulle'calu lunú ulle'calu.

²²Chenu ubene' niyu ze'e nucua', chiqui' utsu nehuana arqui'i nziai,

xne necai tucu bene enu chiqui' xene.

²³Che ubi'ya Jesuse luye bee bene ze'e, nu uninu lubee bene'nu:

—iChiqui' neriñá nú chu'u bee bene xene lunú rnibiya' Diose!

²⁴Chiqui' uyanu arqui' bee bene'nu nu uninu scua, pero uni zecanu lubeella stucu bese nú uninu:

—Bee lliana'a, itucu bene enu mase nchiñi arqui' lubee eluxene', chiqui' neriña' nú chu'ulla lunú rnibiya' Diose! ²⁵La aca neriña' nú dete tucu camello tucu i'chiu' eche dicu, luquela nú chu'u tucu bene xene lunú rnibiya' Diose.

²⁶Pero chenu ubene' bee bene'nu nucua', masescalá uyanu arqui'beella, nu unidichia' beella lu sa'beella:

—¿Ti ri'i Diose perdona, che?

²⁷Chequie ubi'ya Jesuse lubeella nu uninu lubeella:

—Para bee bene neriña' neca nucua', pero para Diose la neriña' neca nucua', xne yeene recanu rri'inu.

²⁸Che uni Pedro lu Jesuse nú unilla:

—Utsa'naru ye nú rlu'curu, para nú nzela quieeru li'ilu.

²⁹Nu ucuaqui Jesuse nú uninu:

—Ixiule'a luhua nú tatse bene enu tsa'na ni'i, urre bichilla, urre zanalla, urre pa'lla, urre na'lla, urre niyu'lla, urre una'lla, urre bee endu'lla, urre bee yu'lla, equie cuenda' li'á cuna equie cuenda' bedichia' nze'ca' Diose, ³⁰yucu bene ze'e lu iliulabe quie' tucu ayu'u bese mase lunú utsa'nalalla, tunu necane ni'lla, urre bichilla,

urre zanalla, urre na'lla, urre bee endu'lla, urre bee yu'lla, añinzuca nú tsi'lla lunú zecalla, pero yuculla bee nucua' nu lu'culla elunehuañi nú leca xunga laxu liñibe. ³¹Pero huaxi bee bene enu chiqui' neca equie nee, aca bee nze'e enu lecati neca, nu bee bene enu lecati neca, aca bee nze'e enu chiqui' aca neca equie.

**Udixiule'e Jesuse bese rriuna nú úti
bee bene li'inu**

(Mt. 20:17-19; Lc. 18:31-34)

³²Chenu nzuebeella enza Jerusalén, nzuculu Jesuse lubee bene'nu. Nu chiqui' nzenu arquí'beella, nú nzanu Jerusalén, pero beelá bee bene enu nzequie li'inu, chiqui' xiqui beella. Che ubixia Jesuse chi'chiucu bee bene'tsianu, nu udixiule'enu lubeella lunú zecanu. ³³Nu uninu lubeella: —Nediya'hua nú nza'ahua enza Jerusalén nee, ze'e li'á Bene enu uxe'la Diose dete' cuenda bee bene li'á lubee ule'ya enu rnibiya' lu beelá bee ule'ya, cuna lubee ulaxcuela enu reca ley' Moisés nu nibiya' bee benequie' nú atia, cuna nú dete' cuenda bee bene cua' li'á lubee bene enu la neca bee bene Israel. ³⁴Che lli'chinu bee bene li'á, cuna nú zete'che' beei li'á, cuna nú tsuxene beei lua, cuna nú úti beei li'á, pero acatsia bichia rriuna huañi zecaa.

**Unacu' Jacobo cuna Juan tucu faura
lu Jesuse**

(Mt. 20:20-28)

³⁵Chequie uyabica Jacobo cuna Juan lu Jesuse, neca beella lliana' Zebedeo, nu unibeella lu Jesuse:

—Maestro, niarqui'ru nú ri'ilu tucu faura nú nacu'ru lulu.

³⁶Nu ucuaqui Jesuse lubeella:

—¿Xi niarqui'hua nú ri'á luhua?

³⁷Nu uni beella:

—Niarqui'ru nú liqui'lu nú zucu tucuru cue'tselu chubee cuna nú zucu stucuru cue'tselu chubeca chenu quixie nú nibiya'lu.

³⁸Pero ucuaqui Jesuse lubeella:

—La ri'ihua beya' lunú rnacu'hua.

¿Xie' riqui'hua nehuana zecahua tucu nú nehuana zeca la? ¿Nu xie' zelahua atihua tucu nú atia la?

³⁹Nu ucuaqui beella lunu:

—Riqui'ru nucua'.

Che uninu lubeella:

—Neli nú nehuana zecahua tucu nú nehuana zecaa nu atihua tucu nú atia. ⁴⁰Pero lunú ti zucu cue'tsea chúbee cuna cue'tsea chúbeca la lu'cua cuendaa nú liquia nucua' luhua, xne necatsia nucua' para bee bene enu rialane.

⁴¹Chenu ubene' se xi'i bee bene'nu nucua', ulee beella lu Jacobo cuna lu Juan. ⁴²Che ubixia Jesuse li'ibeella, nu uninu lubeella: —Nediya'hua nú bee bene enu rnibiya' lu iliulabe rnibiya' beei tucu nú niarqui'tsia beei, nu bee bene enu chiqui' neca equie scua rri'i beei lubee bene tucu nú niarqui'tsia beei, equie nú rnibiya' beei. ⁴³Pero letahua la yala nú acane scua. Enu niarqui' nú nibiya' luhua, rqui'ña nú zibi' nze'e lu yehua. ⁴⁴Tatsehua enu niarqui' nú mase aca neca equie letahua, rqui'ña nú aca nze'e xi neca muso' lu yehua. ⁴⁵Xne ni' li'á Bene enu uxe'la Diose né yela para nú zibi' bee bene lua, ubela para nú zibia'a

lubee bene cuna nú atia para nú
ixiua stula huaxi bee bene.

**Uri'yieca Jesuse tucu bene enu lee
Bartimeo**

(Mt. 20:29-34; Lc. 18:35-43)

⁴⁶Chequie uriña Jesuse cuna
bee bene'nu eyeche Jericó. Chenu
nzechiu'u beella eyeche cua', cuna
huaxilá bee bene, che nzucu tucu
niyu enu niquie'lu ru'u inziu ze'e
rnacu'i carida nu Bartimeo leei,
necai lliana' tucu bene enu lee
Timeo. ⁴⁷Chenu ubene'i nú axula
enta Jesuse bene eyeche Nazaret,
uquixiei urixialii nú uni:

—iJesuse enu neca lliana' David,
uhua'a arqui' li'á!

⁴⁸Huaxi bee bene rri'i nú rqui'ya'i
para nú zacai, pero a'la mase
rixialii nú uni:

—iLliana' David, uhua'a arqui' li'á!

⁴⁹Chequie utsuxe Jesuse, nu
uninu lubeella:

—Ubixiahua benecua' nú ye'talla.

Che ubixia beella niyu enu
niquie'e lu ze'e, nu unibeella lui:

—Ñia utsu arqui', nu utsuli, xne
rixianu li'ilu nee.

⁵⁰Nu chu utsi'quii llu'chai, rtsatsai
uyabicaí lu Jesuse. ⁵¹Chequie
unidichia' Jesuse nú uninu lui:

—¿Xi niarqui'lu nú ri'á lulu?

Nu ucuaqui niyu enu niquie'lu
ze'e nú uni:

—Maestro, niarquía nú ri'ilu nú
ya'la nú bi'ya zecaa.

⁵²Che uni Jesuse lui:

—Nu' modo nú yalu nee, uyeca'la'lu
equie nú utsu tenelí arqui'lu lua.

Hora ze'e uye'e lu niyu enu
niquie'lu ze'e, nu chu nzequieí
Jesuse lu inziu nú nzanu.

Uyu'u Jesuse eyeche Jerusalén

(Mt. 21:1-11; Lc. 19:28-40; Jn. 12:12-19)

11 Chenu nzeriña beella axu
Jerusalén, elu nchiucu' bee
eyeche nú lee Betfagé cuna Betania,
e'ya dañi nú lee Olivos, uxe'la
Jesuse chiucu bene'nu, ²nu uninu
lubeella:

—Uquiahua eyeche axu nú
nchiucu' enza lua'ahua, chenu
riñahua eyeche cua', ze'e nequietu
tucu burro, enu lasca' ricu bee bene.
Uxe'chehuaí nu ye'ta yuhuaí ca'a.
³Tunu nu' enu nedichia' luhua xi nu
xe'chehuaí, uni'hua lu bene ze'e nú
Jesuse enu rnibiya' luru rqui'ñanuí
nu nee chu nzela yuzecaruí.

⁴Chequie nzuebeella, nu ullela'
beella elu nequietu tucu burro ru'u
inziu, axu ru'u puerta' tucu ni'i, nu
chu uxe'che beellaí.

⁵Texcua'a bee bene enu ulañi'
nucua' ze'e unidichia'beei lubee
bene! Jesuse nu unibeei:

—¿Xi rri'ihua ca'a? ¿Xi nú
xe'chehua burro cua'?

⁶Che ucuaqui beella lubee bene
ze'e tucu nú uni Jesuse lubeella nú
nibeella, esquie uzela bee bene ze'e
nú unguya' beella burro ze'e. ⁷Che
uriñayu beella burro ze'e lu Jesuse.
Nu uricu' beella xucu beellaequieí,
nu chu uricu Jesuse equieí ⁸Le'ca
ucua'a huaxi bee bene xucu beei lu
inziu elu detenu, nu texcua'a beei
uchiecu' leca ucua'a beei lu inziu
elu detenu.

⁹Chequie bee bene enu nzuculu
lunu cuna bee bene enu nze'taqueie
li'inu, rixiali beei nú unibeei:

—iChiqui' neca equie nú rri'i
Diose! iChe'tsalá Diose equie

cuenda' li'inu enu nze'ta lu cuenda' Diose! ¹⁰iChe'tsalá Diose equie cuenda' li'inu enu nze'ta nú nibiya', tucu nú unibiya' arre David bene'ahua enu udetela! iChiqui' neca equie nú rri'i Diose li'inu enu nzucu liñibe!

¹¹Che uyu'u Jesuse eyeche Jerusalén nu uyu'unu liñi indu llene Jerusalén. Chenu ulaxu nú ubi'yanu ye nú nu' ze'e chu nzanu eyeche Betania cuna chi'chiucu bee bene'nu, xne ucheela bichia ze'e.

Uni Jesuse nú bichi aca higuera

(Mt. 21:18-19)

¹²Bichia rruccu, chenu nze chiu'u beella eyeche Betania, uquixie nú uliana' Jesuse. ¹³Istu ulañi'nu tucu aca higuera nu nu' leca niye'e lue, nu chu uyabicanu lue tunu ca nu' higo lue acunu, pero leca ndixi lue nu'tsia leca lue, xne la aca tiambu nú rayue. ¹⁴Chequie uni Jesuse lu aca higuera ze'e:

—iLeca' xunga acu bene ndixi nú rayu lulu!

Ubene' bee bene'nu nú uninu scua.

Utiliaca' Jesuse bee bene enu ruti cuna bee bene enu sii labe ele'ya' indu Jerusalén

(Mt. 21:12-17; Lc. 19:45-48; Jn. 2:13-22)

¹⁵Chenu uriña beella eyeche Jerusalén, uyu'u Jesuse ru'u ele'ya' Indu llene Jerusalén nu uquixien uuanu bee bene enu ruti cuna bee bene enu sii ze'e. Nu utelletanu mexa' bee bene enu xi'la dimi cuna nú utsi'quinu xleta' bee bene enu ruti bee paloma ze'e, ¹⁶né zelanu nú achu'u nulá bee bene stene' beei

ru'u ele'ya' indu ze'e. ¹⁷Che uquixie Jesuse nú uzete'nu bee bene, nu uninu lubeei:

—Lu ichi' Stichia' Diose rni: “Nia neca elu chiu'ulee elu nacu' ye bee bene iliulabe lu Diose”; pero li'ihua rri'ihua nia xineca yube' elu rcua'a bee huana'.

¹⁸Chenu ubene' bee ule'ya enu rnibiya' lu beelá bee ule'ya cuna bee ulaxcuela enu reca ley' Moisés nucua', uquixie rla'na beei xa modo útibeei Jesuse xne xiqui beei li'inu lunú rri'inu, xne chiqui' nzenu arqui' ye bee bene lunú sete'nu li'ibeei. ¹⁹Pero chenu nze'ta chu'u rula', uchiu'u Jesuse cuna bee bene'nu eyeche Jerusalén.

Ubichila aca higuera

(Mt. 21:20-22)

²⁰Stucu bichia sila' udete beella elu nzucu aca higuera ze'e, nu ulañi' beella nú ubichi aca ze'e hasta luue. ²¹Chequie ullu'cu arqui' Pedro, nu unilla lu Jesuse:

—Maestro, ubi'yacuru, ubichila aca higuera nú unilu nú bichi.

²²Nu ucuaqui Jesuse nú uninu: —Uchili arqui'hua Diose. ²³Xne neli nia luhua, nú tatse bene enu ni lu dañi quie': “iUlluna' ca'a nu uzana' lu inzatu'!” tunu la za' arqui'lla chenu nilla scua, aca nú unilla scua che. ²⁴Enze'e nia luhua nú ye nú nacu'hua lu Diose, nu uchili arqui'hua nú liqui'nu nucua' che yucuhane. ²⁵Chenu rnacu'hua lu Diose, tunu nu' tucu bene enu rleehua lu uri'ihua perdona li'illa, para nú le'ca esquie Diose Pa'ahua enu nzucu liñibe ri'inu perdona li'ihua equie cuenda' stulahua.

²⁶Xne tunu la ri'ihua perdona bee bene, le'ca la ri'i Diose Pa'ahua enu nzucu liñibe perdona li'ihua equie cuenda' stulahua.

Equie nú rnibiya' Jesuse

(Mt. 21:23-27; Lc. 20:1-8)

²⁷Chenu uriña beella eyeche Jerusalén. Diqui nú enzee Jesuse liñi Indu llene Jerusalén, uriña bee ule'ya enu rnibiya' lu beelá bee ule'ya lunu, cuna bee ulaxcuela enu reca ley' Moisés cuna bee usticia' bee bene Israel, ²⁸nu unidichia' beei lunu:

—¿Ti uliqui' elu usticia nú rri'ilu scua? ¿Nu ti uliqui' elu rnibiya' nú rri'ilu scua?

²⁹Che ucuaqui Jesuse nú uninu: —Le'ca nidichia'a luhua tucu bedichia' tunu cuaquihua nucua', che ixiule'a luhua ti uliqui' elurnibiya' nú rri'á scua. ³⁰¿Ti uxe'la Juan Bautista? ¿Uxe'la Diosella la urre uxe'la bee benella la? Ucuquihua nee.

³¹Che uquixie beei nú ubedichia'nu sa'beei nú unibeei:

—Tunu nia'ahua nu Diose uxe'la Juan Bautista, che ni nucua': “¿Xinu né chili arqui'hua li'illa che?”

³²¿Leca modo nú nia'ahua nú bene uxe'la li'illa?

Unibeei scua xne xiqui beei bee bene, xne ye bee bene nzeli arqui' nú unga Juan tucu profeta enu neli udixiule'e Stichia' Diose. ³³Nu ucuaqui beei lu Jesuse:

—La ri'iru beya' ti uxe'lalla.

Che ucuaqui Jesuse nú uninu lubeei:

—Le'ca la ixiule'a ti uliqui' elurnibiya' nú rri'á scua che.

Ejemplu' bee bene enu lixiu uri'i riña' lu tucu bene

(Mt. 21:33-46; Lc. 20:9-19)

12 Chequie uquixie Jesuse nú uninu puro bee ejemplu lubee bene ze'e. Nu uninu:

—Tucu niyu uquienii bee aca uva lu yu'lla nu udu'lla elu' diqui abenchila'e, nu ureche'ella tucu elu tsi'illa bee uva, nu ureche'ella tucu elu ayaa zucu bene enu ri'i ucu yeene.

'Che udete'lla yuu ze'e lle'la lubee bene, enu ri'i riña' lue, nu chu nzalla enza istu zuculla. ²Chequie chenu uriña tiembu nú aca ula'cu bee uva, uxe'la niyu ze'e tucu moso'lla nze tucu lunú rialalla.

³Pero una'tse bee bene ze'e moso' ze'e, nu udiñi beei li'illa nu uxe'la beei li'illa scuatsia. ⁴Che uxe'la bene enu neca stene' yuu ze'e stucu moso'lla lubee bene ze'e, pero moso' ze'e uti'qui beei cuna nú udiquichi'qui' beei li'illa. ⁵Uxe'lalla stucu moso'lla lubee bene ze'e, pero moso' quie' unguuti beei. Huaxi bee moso' uxe'lalálalla, texcua'a bee moso' quie' uzete'che' beei nu texcua'a beella unguuti beei.

⁶Chequie bene enu neca stene yuu ze'e, rri'itsia nú xe'lalla lliana'lla, enu chiqui' secaalla. Xne uri'illa elliebacu' nú unilla: “Neli nzu arquia nú lu'cu bee benecua' ula'na lu lliana'a.” ⁷Pero uni bee bene ze'e lu sa'beei: “Bene quie' neca enu ya'nanu yuu quie', té utia'ahua li'i, para nú ya'na nua'ahua yuu quie!” ⁸Che una'tse beei lliana' bene enu neca stene yuu ze'e, nu unguuti beei lliana'lla

nu utsi'qui beei lliana'lla stucu luhware.

⁹Nu unidichia' Jesuse nú uninu:

—¿Xa rri'ihua elliebacu' nú ri'i bene enu neca stene yuu ze'e? Puese nia luhua nú nze'talla nu útilla bee benecua' nu dete'lla yu'lla lu textcua'a bee bene.

¹⁰¿Xie' lasca' ulahua lu ichi' Stichia' Diose elu rni?

Quiee nú uhua u'na bee bene enu rreche'e ni'i,
quiee quie' neca nú mase uzibi'
ungache' ni'i ze'e.

¹¹Nucua' neca nú uri'i Diose, nu chiqui' nzenu arqui'ru nucua'.

¹²Chequie chenu ubene' bee bene enu rnibiya' lunú uni Jesuse scua, niarqui'beei nú na'tse beei li'inu para nú chánu ni'cu', pero lunú xiqui beei bee bene utsana' beei li'inu nu chu nzuebeei.

Unidichia' bee bene lu cuenda' bee impuesto

(Mt. 22:15-22; Lc. 20:20-26)

¹³Che uxella bee bene, enu rnibiya' ze'e chiucu chuna bee fariseo cuna chiucu chuna bee bene' Herodes lu Jesuse, para nú la'na beei xa modo ninu tucu bedichia' para nú nu' modo ri'i condra beei li'inu. ¹⁴Chenu uriña bee benequie' lu Jesuse unibeei lunu:

—Maestro, nediya'ru nú rnilu nú neli neca, nu la ri'ilu caso nú xa neca bee bene, xne lulu neca tucu necatse bee bene. Nu neli sete'lu bee bene lunú rnibiya' Diose nú xa huañi bee bene. Enze'e rnidichia'ru lulu. ¿Neca nze'ca nú dixiuru impuesto lu arre César la?, urre ¿la

neca nze'cae la? ¿Dixiuru la urre la dixiuru la?

¹⁵Pero uri'i Jesuse beya', lunú lia unitsia beei scua, nu uninu lubeei: —¿Xi nú rri'ihua preo li'á scua? Uli'quihua tucu melu para nú lañine.

¹⁶Che uriñayuu bee bene ze'e tucu melu lu Jesuse, nu uninu lubeei:

—¿Tiluu nzucu lu melu quie' nu ti lee enu nzucu lue?

Nu ucuaqui beei nú unibeei lunu: —Lu arre César.

¹⁷Chequie ucuaqui Jesuse nú uninu:

—Ude'te'hua lunú neca cuenda' César lu César, nu ude'te'hua lunú neca cuenda' Diose lu Diose.

Nu chiqui' uyanu arqui'beei chenu ucuaquinu scua.

Chenu unidichia' bene nú huañi zeca bee bene enu ungu

(Mt. 22:23-33; Lc. 20:27-40)

¹⁸Che uya textcua'a bee saduceo lu Jesuse. Xne rnibeei nú la huañi zeca bee bene enu ungu lu unidichia' beei lunu:

¹⁹—Maestro, rni ley' Moisés nú tunu ati tucu niyu nu utsa'nalla una'alla nu né lu'cu beella endu', che yucu bichi tuxie ze'e una'a zaqui ze'e, para nú lu'cu beei endu' enu neca xi neca endu' tuxie ze'e.

²⁰Ucua'a achi bichi bene, bichi ru beei uyucu una'a, pero ungu'illa, nu né lu'cu una'lla endu'. ²¹Chequie uyucu bichi rruca beei una'a zaqui ze'e, pero le'ca esquie ungu'illa, nu né lu'cu una'a ze'e endu'lla, le'ca esquie ulle'ca bichi rriuna beei.

²²Scua unga lu achi beei, uyucu

bee una'a ze'e, pero ni' tucu beei né lu'cu beei endu' cuna una'a ze'e, che unguti una'a ze'e. ²³Puese chenu huañi zeca bee bene enu unguti, lu achi bichi beei, ¿ta beei neca niyu' una'a cua' xne lu achi bichi beei uyucu beei una'a cua'?

²⁴Nu ucuaqui Jesuse lubeei nú uninu:

—Lixiu nchiñi elliebacu'hua, xne la acahua Stichia' Diose nu la chuluhua xa neca lunú rnibiya' Diose. ²⁵Xne chenu huañi zeca bee bene enu unguti, la yucua' bee bene sa' bee bene nu leca' eluxia ze'e. Acatsia bee bene xi neca bee ángele liñibe. ²⁶Equie nú huañi zeca bee bene enu unguti, ¿xie' lasca' ulahua lu libro' Moisés elu rni nú ulañi'lla tucu aca nú riqui la? Ze'e ubene'lla chii Diose nú uninu: “Li'á neca Diose, lu Abraham, cuna lu Isaac, cuna lu Jacob.” ²⁷iEnze'e nia luhua núla necanu Diose lubee bene enu unguti! Necanu Diose' bee bene enu nehuañi. Xne para li'inu ye bee bene nehuañi. Chiqui' lixiu nchiñi elliebacu'hua.

Mandamiento nú máse neca equie

(Mt. 22:34-40)

²⁸Chenu ubene' tucu bee ulaxcuela enu reca ley' Moisés nú ucuaqui nze'ca Jesuse, lubee benecua' uyabicaí lu Jesuse nu unidichia'i lunu:

—¿Ta mandamiento nú máse neca equie?

²⁹Che ucuaqui Jesuse nú uninu:

—Mandamiento nú máse neca equie rni: “Ubene'hua bee bene Israel, li'inu enu neca Diose'ahua tucutsia necanu. ³⁰Uzeca li'inu

enu neca Diose'lu diquinu' arqu'lu, cuna diquinu' lunú necalu, cuna diquinu' elliebacu'lu cuna diqui nu' juerza'lu.” Ninguie' neca mandamiento nú máse neca equie. ³¹Nu mandamiento rruca neca: “Zecalu sa'lu tucu nú secalu li'ilu.” Lu rucu bee mandamiento quie', leca stucu mandamiento nú máse neca equie.

³²Chequie ucuaqui ulaxcuela enu reca ley' Moisés ze'e nú uni:

—Maestro, uni nze'calu. Nú unilu scua. Neli nú unilu nú nu' tucutsia Diose, leca' stucu Diose. ³³Nu zeca bee bene li'inu diquinu' arqu'lla, cuna diquinu' elliebacu'lla cuna diquinu' juerza'lla, cuna diqui nu' lunú necalla, nu zeca bee bene sa' bene tucu nú secalla li'illa, ninguie' neca nú máse seca lu ye bee u'na nú rdete' bee bene lu Diose.

³⁴Chenu ulañi' Jesuse nú ucuaqui nze'ca ulaxcuela enu reca ley' Moisés uninu lui:

—La nzulu istu para nú chu'ulu lunú rnibiya' Diose.

Che leca' ti alaca arqu' a nacu'dichia'lá lunu.

¿Ti neca bee bene' Cristo enu udetela?

(Mt. 22:41-46; Lc. 20:41-44)

³⁵Chenu sete' Jesuse bee bene liñi indu llene Jerusalén, unidichia'nu lubeei nú uninu:

—¿Xinu rnibee ulaxcuela enu reca ley' Moisés nú neca Cristo lli'ñi David? ³⁶Nu le'ca li'i David unilla bedichia' quie', tucu nú udete' Espíritu Santo lulla nú unilla:

Diose uni lu li'inu enu rnibiya' lua:

“Uzucu cue'tsea chúbée,
hasta nú ri'á nú nibiya'lu lubeé
bene enu rlee lulu.”

³⁷¿Enze'e tunu neca Cristo, Ili'ñi David, xinu rni David li'inu lunu?
Ye bee bene enu nucua'a ze'e ñia yuy' arqui'beeí lunú uninu.

**Uni Jesuse nú necha rri'i bee
ulaxcuela enu reca ley' Moisés**

(Mt. 23:1-36; Lc. 11:37-54; 20:45-47)

³⁸Chenu uzete' Jesuse bee bene uninu lubeéi:

—Ubi'yahua li'ihua lubeé
ulaxcuela enu reca ley' Moisés, xne riu' arqui'beeí nú rutu beeí xucu nze'ca beeí, cuna nú riu' arqui'beeí nú lu'cu bee bene ula'na lubeéi lu inziu, ³⁹nu rla'na beeí nú sucu beeí lu xleta nú máse neca equie liñibe indu, le'ca scua rri'i beeí sucu beeí elu máse neca equie chenu nze tacu beeí. ⁴⁰Le'ca raxi beeí ni'i bee una'a zaqui, rri'ibeeí nú xee rnacu' beeí lu Diose, para nú ri'i bee bene elliebacu' nú neca beeí bene nze'ca pero máse dete' Diose castiya lubeéi.

U'na nú udu'u tucu una'a zaqui

(Lc. 21:1-4)

⁴¹Tucu bese chenu nzucu Jesuse liñi indu llene Jerusalén axu elu nchiucu' bee alcancia elu rdu' bee bene u'na, ulañi'nu nú rdu' bee bene u'na liñibe alcancia ze'e. Le'ca huaxi bee bene xene rdu' beeí huaxi dimi liñibe alcancia ze'e.

⁴²Che uriña tucu una'a zaqui elitsí ze'e, nu udu'nchu chiucu melu nú lle'natsia seca liñi tucu bee alcancia ze'e. ⁴³Nu chu ubixia Jesuse bee bene'nu, nu uninu lubeella:

—Neli nia luhua nú u'na nú udu' una'a zaqui elitsí quie' maselá seca nucua' lunú udu' beelá bee bene.

⁴⁴Xne yebee bene rdu'tsia beeí lunú sucu sobra equie dimi'beeí, pero una'a zaqui quie', añinzuca nú secancho elitsi udu'nchu ye nú neca dimincho liñi alcancia ze'e, nu añinzuca nú nucua'tsia neca nú rlu'cunchu.

**Udixiule'e Jesuse nú rila indu llene
Jerusalén**

(Mt. 24:1-2; Lc. 21:5-6)

13 Chenu uchiu'u Jesuse liñi indu llene Jerusalén, che uni tucu bene'nu lunu:

—iMaestro, ubi'yacuru chiqui' ñia rnaa bee quiee quie' cuna ni'i llene quie'!

²Chequie ucuaqui Jesuse nú uninu:

—Tucu nú rlañi'lu ni'i llene quie', riña bichia nú la ya'na' ni' stucu quiee quie' equie sa'e yeene rilae.

Xi seña aca chenu enta laxu iliulabe

(Mt. 24:3-28; Lc. 21:7-24; 17:22-24)

³Che chu nzuebeella lu tucu dañi nú lee Olivos nzucu dañi quie' enza rna lu indu llene Jerusalén, chenu uzucu Jesuse equie dañi ze'e, che uyabica Pedro cuna Jacobo cuna Juan cuna Andrés nu unidichia' li'itsia beella lunu nú unibeella:

⁴—Udixiule'e luru, ¿xunga aca bee nucua'? ¿Nu xa neca bee seña nú lube' nú nzula nú aca ye bee nucua'?

⁵Chequie ucuaqui Jesuse lubeella nú uninu:

—Ubi'yahua li'ihua, para nú lecati zequienu li'ihua. ⁶Xne nze'ta huaxi

bee bene enu ni nú nze'ta beei equie cuenda' li'á nu nibeei luhua: “Li'á neca Cristo”; nu scua zequienu beei huaxi bee bene.

⁷ Pero li'ihua chenu yene'hua nú reca xuu urre rni bee bene nú enta nú aca xuu, la lliquihua xne scua nze'ta nú acane, pero la laxusca' iliulabe. ⁸ Xne liunu tucu nación cuna stucu nación, nu liunu tucu país cuna stucu país, cuna liunu texcua'a bee bene enu rnibiya', cuna texcua'a bee bene enu rnibiya', nu aca xú cuna nú aca biña huaxi bee luhuare lu iliulabe. Nucua' neca nú apenatsia uquixie lunú enta nehuana zeca bee bene.

⁹ Pero ubi'yahua li'ihua xne dete' cuenda bee bene li'ihua lubee usticia, cuna nú zeteche' beei li'ihua liñi bee indu, nu dete' cuenda beei li'ihua lubee gubierno cuna lubee arre equie nú nzeli arqui'hua li'á, pero scua nu' modo nú nihua lubeei equie cuenda' li'á. ¹⁰ Xne rqui'ña nú ixiule'exu bee bene bedichia' nze'ca' Diose lu ye bee bene iliulabe, ante nú laxu iliulabe. ¹¹ Nu chenu dete' cuenda bee bene li'ihua lubee usticia, la chenu arqui'hua lunú xa nihua, uni'tsiahua bee bedichia' nú liqui' Diose nú nihua xne laca li'ihua enu ni hora ze'e, Espíritu Santo neca enu ni hora ze'e. ¹² Enta bichia chenu dete' cuenda bee bene le'ca bichi beei para nú atilla, nu dete' cuenda bee pa' bee bene endu'lla, le'ca dete' cuenda bee endu' bee pa' beei cuna na'beei para nú atilla. ¹³ Ye bee bene iliulabe chana arqui' li'ihua equie nú necahua bee benea; pero bene enu tsuta' arqui'

lua hasta bichia chenu laxu yeene, benequie' tsila'a Diose.

¹⁴ Chenu lañi'hua nú nzucu tucu cosa chi'qui' liñi indu llene Jerusalén, tucu nú uni profeta Daniel hasta hua'tu, (bee bene enu rula ichi' quie', uri'ihua beya') nú bee bene enu nucua'a Judea, rqui'ña nú yeca xu'u bee bene ze'e enza dañi. ¹⁵ Nu bee bene enu nchiucu' equie ni'i bichia ze'e, la llu'cha' lacalla para nú chu'ulla liñi ni'illa na'tsella stene'lla. ¹⁶ Nu bene enu nzu dañi, la benchila'lla ni'lla para nú ye'ta chiya'lla xuculla. ¹⁷ iCue'e bee una'a enu nu' endu' xla'cu, cuna bee una'a enu nuu bee endu' enu rachi bichia ze'e! ¹⁸ Una'cu'hua lu Diose nú la aca bee nucua' chenu neca tiambu nú nucuaa. ¹⁹ Xne chiqui' nehuana zeca bee bene bichia ze'e, hasta chenu ungache' iliulabe lá aca bee nucua' scua, nu leca' xunga acalá bee nucua' scua ni' stucu bese. ²⁰ Tunu la tsuxe Diose nú reca bee bichia ze'e, la tsila'a ni' tucu bee bene; pero tsuxe Diose nú reca bee bichia ze'e, equie cuenda' nú secanu bee bene'nu cuna nú ucañinu li'ibeei para li'inu.

²¹ Tunu bee bichia ze'e nu' enu ni luhua: “Ubi'yacuruhua ca'a nzucu Cristo”, urre “Ni bee nze'e ubi'yacuruhua nguiee nzucu Cristo”, la chili arqui'hua nucua'. ²² Xne nze'ta huaxi bee bene enu ni nú li'ibeei neca beei Cristo, urre nibeei nú li'ibeei neca beei bee profeta' Diose, ri'i beei huaxi bee milagro, cuna huaxilá beenú chenu arqui' bee bene, para nú scua zequienu beei bee bene nu rri'i beei elliebacu'

tunu nu' modo hasta bee bene enu ucañi Diose, zequienu beei. ²³Enze'e nia luhua, nú ubi'yahua li'ihua, xne udixiule'exulá ye bee nucua' luhua.

**Nze'ta zeca li'inu Bene enu uxe'la
Diose**

(Mt. 24:29-35, 42-44; Lc. 21:25-36)

²⁴'Pero bee bichia ze'e, chenu udetela nú nehuana ulle'ca bee bene cabelí lu bichia, nu la du'llea' ellie' guu, ²⁵nu zana' bee belaa enu nchiucu' liñibe lu yuu cuna cuñi ye beenu nchiucu' liñibe. ²⁶Chequie lañi' bee bene iliulabe, Bene enu uxe'la Diose, nú tu'na rulu siqui'nu nze'tanu liñi xcabe cuna ye poder nú rlu'cunu. ²⁷Che xe'lanu bee ángele'nu diqui lu iliulabe para nú quiete'sa' beenu, ye bee bene' Diose catse elu nucua'a beella.

²⁸'Ulu'cuhua cuenda lunú nia luhua, chenu riye' ellutsa lu aca higuera, cuna nú enta ye' leca e'ne' lue, nediya'hua nú enta riñala tsibee che. ²⁹Le'ca scua chenu lañi'hua nú recala ye bee nucua' uri'ihua beya' nú axula nzu lunú nze'ta aca tucu nú unia luhua. ³⁰Ixiule'a luhua nú acaxu ye bee nucua', ante nú ati bee bene enu nehuañi nee. ³¹Iliulabe cuna liñibe nitilu bee nucua' pero stichia'a la dete nú yalu yeene.

³²'Pero lecati ri'i beya' xi bichia nu xi hora nú aca ye bee nucua', nu ni'bee ángele liñibe nu ni' Lli'ñi Diose la ri'i beya' nucua', nediya'tsia Diose Pa liñibe nucua'.

³³'Enze'e nia luhua nú ubi'yahua li'ihua nu utsu tsiñiahua cuna nú una'cuhua lu Diose, xne la ri'ihua

beya' xunga aca bee nucua'. ³⁴Aca nucua' xi neca chenu xiu'u bene tucu biaji. Ante nú chiu'ulla rnilla xi riña' ri'i bee moso'lla. Le'ca unibiya'lla nú tsu tsiña bene enu rriucu ru'u puerta ni'lla. ³⁵Le'ca esquie li'ihua, ucua'a tsiñahua, xne la ri'ihua beya' xunga nu xiura nzelaa, tunu nzelaa chenu nze'ta chu'u rula', urre tunu necane ulela' rula' urre tunu necane ellicabe chenu rixia tiula urre sila'. ³⁶Enze'e ucua'a tsiñahua xne ca tu'natsia riña'a, nu la niarquia nú lluna li'ihua nú la ri'ihua tucu nú riala nú ri'ihua. ³⁷Nu lunú rnia luhua nee, rnia lu ye bee bene: Uhuañihua tucu nú riala nú huañihua, iucua'a tsiñahua para bichia ze'e!

**Ucua'na bee bene enu rlee lu Jesuse
xa modo na'tse beei li'inu**

(Mt. 26:1-5; Lc. 22:1-2; Jn. 11:45-53)

14 Rri'itsia xiucu bichia nú aca eliñi baxcu, chenu racu bee bene Israel pá nú la chu'u levadura equie, che bee ule'ya enu rnibiya' lubee ule'ya cuna bee ulaxcuela enu reca ley' Moisés, rla'na beei xa modo zequienu beei Jesuse para nú na'tse beei li'inu nu úti beei li'inu. ²Che unibeei:

—Pero la ria'ahua scua diqui nú reca eliñi, para nú la tsu reche bee bene.

**Udu'u tucu una'a perfume equie
Jesuse**

(Mt. 26:6-13; Jn. 12:1-8)

³Chequie chenu nzu Jesuse eyeche Betania ni'i Simón enu ulle'ca elichia nú lee lepra, chenu nzucu Jesuse lumexa racunu, uriña

tucu una'a nuya' tucu frasco nú
achee nu' perfume nú huaxi secaa,
xne necache'e puro nardo, nu chu
uxa'lanchu frasco ze'e nu udunchu
perfume ze'e equie Jesuse. ⁴Che
bee bene enu nucua'a ze'e ulee beei
nú unibeei lu sa'beei:

—¿Xinu uti'chianchu perfume cua'
scua? ⁵Ala' aiqui perfume cua' tucu
chuna ayu'u dimi denario para nú
ari'inchu elietsa lubee bene enu
seca elitsi, nu uqui'ya' una'a ze'e
uri'i beei.

⁶Pero uni Jesuse lubeei:

—La ri'chiahua li'inchu; ¿xinu
rqui'yanchu rri'ihua? Xne lunú
uri'inchu lua, neca nze'ca nucua'.
⁷Bee bene elitsi siempre nucua'a
cuna li'ihua, nu nu' modo ri'ihua
elietsa lubeei xitse bichia. Pero
li'á la tsua'a cuna li'ihua diqui
tiambu. ⁸Una'a quie' uri'inchu lunú
unganchu, udu'xulanchu perfume
cua' cuerpoa para nú necalane
bichia chenu achi'a. ⁹Ixiule'a luhua,
nú diqui lu iliulabe elu ixiule'e bee
bene bedichia' nze'ca' Diose, le'ca
ni bee bene lunú uri'i una'a quie'
lua para nú ellu'cu' arqui' bee bene
lunú uri'inchu lua.

**Uya de'te' cuenda Judas Jesuse lubee
bene enu niarqui' úti li'inu**

(Mt. 26:14-16; Lc. 22:3-6)

¹⁰Chequie uya Judas Iscariote enu
neca lu chi'chiucu bee bene' Jesuse,
lubee ule'ya enu rnibiya' lubee lá bee
ule'ya para nú dete' cuendai Jesuse
lubeei. ¹¹Chenu ubene' bee ule'ya
ze'e nucua', ñia utsu arqui'beei nu
unibeei nú dete' beei dimi ya Judas,
che uquixie Judas ucua'ana xa modo
dete' cuendai Jesuse lubeei.

Exee nú udacunu Jesuse bee bene'nu

(Mt. 26:17-29; Lc. 22:7-23; Jn.

13:21-30; 1 Co. 11:23-26)

¹²Chequie bichia nú uquixie nú reca
eliñi chenu racu bee bene Israel pá nú
la chu'u levadura equie, chenu le'ca
ruuti bee bene tucu sanchi eliñi baxcu
ze'e che unidichia' bee bene'nu lunu:

—¿Cá niarqui'lu nú nze reche'ru
nú da'cuxe'ahua reché baxcu?

¹³Che uxe'la Jesuse chiucu
bene'nu nu uninu lubeella:

—Uquiahua eyeche Jerusalén, ze'e
lla'cahua tucu niyu enu nuya' tucu
ere'e inza nu chu chequiehua li'illa.

¹⁴Elu chu'u bene ze'e, nihua lu bene
enu neca stene ni'i ze'e: “Singuie
rni Maestro: ¿Ca nzucu cuarto elu
acuxeenua bee benea reché baxcu
quie'?” ¹⁵Che lube' bene ze'e tucu
cuarto elu ayaa nú nzu che'ela liñi,
ze'e reche'hua nú da'cuxe'ahua.

¹⁶Chequie nzuebeella eyeche
llene ze'e, nu ullela' beella tucu nú
uninu lubeella nu ureche'e beella
nú acuxee beella reché baxcu.

¹⁷Chenu uyu'u rula' uriñayuu
Jesuse chi'chiucu bee bene'nu ze'e.

¹⁸Diqui nú nucua'a beella lu mexa
racu beella uni Jesuse lubeella:

—Ixiule'a luhua nú tucuhua enu
racunu li'á dete'cuenda li'á lubee
bene enu uti li'á.

¹⁹Chequie nehuana utsu arqui'beella,
nu unidichia' tucua tucua beella lunu:

—¿Li'á nze'e la?

Nu uni stucu beella:

—¿Li'á nze'e la?

²⁰Nu ucuaqui Jesuse lubeella:

—Tucu lu chi'chiucuhua enu
se'e pá le'ca liñi pliato elu se'a pá
nze'ella.

²¹Neli nú li'á Bene enu uxe'la Diose, zecaa tucu nú rni lu ichi' Stichia' Diose; pero ¿cue'e bene enu dete' cuenda li'á? Máse neca nze'ca lu cuenda' bene ze'e nú né aláxulla lu iliulabe quie'.

²²Diqui nú racu beella, una'tse Jesuse tucu pá nu udete'nu che'tsa lu Diose nu chu ule'enu pá ze'e udete'nu yabeella nu uninu:

—Udacuhua pá quie', ningüie' neca cuerpoa.

²³Che una'tsenu tucu copa viñu, chenu ulaxu nú udete'nu che'tsa lu Diose, che chu udete'nu vaso cua' ya beella nu ungue' ye beella biñu cua'. ²⁴Nu uninu lubeella:

—Biñu quie' neca renea nú ri'chia chenu atia para nú tsila'a huaxi bee bene, xne equie cuenda' nú atia ya'la tucu inziu cuqui nú lu'cu bee bene nú xa ri'i Diose perdona li'ibeei. ²⁵Ixiule'a luhua nú leca' xunga hue'elá biñu nú necache' uva, hasta bichia nú hua'a biñu cuqui elu rnibiya' Diose.

Uni Jesuse nú ni Pedro nú la chululla li'inu

(Mt. 26:30-35; Lc. 22:31-34; Jn. 13:36-38)

²⁶Chenu ulaxu nú ungula beella tucu canto lu Diose, chu nzuebeella dañi nú lee Olivos. ²⁷Che uni Jesuse lubeella:

—Yehua tsana' arqui'hua li'á rula' quie'; tucu nú nequie lu ichi' Stichia' Diose elu rni: “Utia bene enu rriucu bee sanchi, nu ri'chia letse beéi.”

²⁸Pero chenu huañi zecaa rltia nza'a Galilea, cheela riñahua ze'e.

²⁹Chequie uni Pedro lu Jesuse:

—Añinzuca nú tsana' arqui' ye beella li'ilu, pero li'á la tsana arquia li'ilu.

³⁰Nu ucuaqui Jesuse lu Pedro nú uninu:

—Ixiule'a lulu nú rula' quie' ante nú bixia tiula chiucu bese, unilalu chuna bese nú la chululu li'á.

³¹Pero unila Pedro nú uni:

—Mase atia cuna li'ilu, la cachia nú nu'lua li'ilu.

Le'ca scua uni ye beella.

Uya na'cu' Jesuse lu Diose tucu luhuare elu lee Getsemaní

(Mt. 26:36-46; Lc. 22:39-46)

³²Chenu uriña beella tucu luhuare elu lee Getsemaní uni Jesuse lubee bene'nu:

—Ucua'asca'hua ca'a, nze nacutsia lu Diose.

³³Che unguya'tsianu Pedro cuna Jacobo cuna Juan, nu uquixie nú chiqui' nehuana nzu arqui'nu, hasta nú lixiua' nzu arqui'nu. ³⁴Nu uninu lubeella:

—Chiqui' nehuana nzu arquia, hasta nú se'ca nú atia, uya'nasca'hua ca'a nu la a'tsehua.

³⁵Che chu nza Jesuse lle'na enza lu ze'e, nu utsulliquinu hasta nú uti'nu tequieenu lu yuu, nu unacu'nu lu Diose tunu nu' modo nú la zecanu lunú enta zecanu.

³⁶Chenu rnacu'nu lu Diose uninu:

—Paa, yeene recalú rri'ilu; utsila'a li'á lunú chiqui' juerte enta nú zecaa, pero la acane tucu nú niarquia, uri'itsia tucu nú niarquiu'lu.

³⁷Che chu nza Jesuse elu uya'na chuna bene'nu nu ulluna'nu li'ibeella nú ra'tse beella nu uninu lu Pedro:

—Simón, ¿xie' ra'tselu la? ¿Xie' né riqui'lu azucu naalu masia tucu hora la? ³⁸Uzucunahua, nu

una'cuhua lu Diose para nú la ri'i beze'lu ana luhua, xne nu' ana arqui'hua nú ri'ihua nú neca nze'ca, pero la riqui' cuerpo'hua.

³⁹Chequie nza zeca Jesuse, nze nacu'nu lu Diose nu uninu lu Diose tucu nú uninu bese rluu. ⁴⁰Chenu ubenchila' zecanu elu uya'na chuna bene'nu ulluna'nu li'ibeella nú stucua'la bese ra'tse beella, xne chiqui' riu'u cala' lubeella nu lá ri'i beella beya' xi cuaqui beella lunu.

⁴¹Bese rriuna chenu ubenchila'nu elu nucua'a beella uninu lubeella:

—¿Xie' ratsesca'hua nu sulachi sca'hua la? Pero uhuahua cala' cua' luhua, xne li'á Bene enu uxe'la Diose uriñala hora nú dete' cuenda bene li'á lubee bene enu rri'i dula.

⁴²Uzetehua ne cha'ahua. Nze'ta bicala bene enu dete' cuenda li'á nee.

Chenu una'tse bee bene Jesuse

(Mt. 26:47-56; Lc. 22:47-53; Jn. 18:2-11)

⁴³Rniscalá, Jesuse cuna li'ibeella chenu uriña Judas enu unga tucu lu chi'chiucu bee bene'nu, uriña yui huaxi bee bene enu nzene espada cuna bee acarute. Nú nze'ta na'tse beei Jesuse lunú unibiya' bee ule'ya enu rnibiya' lubee ule'ya cuna bee ulaxcuela enu reca ley' Moisés cuna nú rnibiya' bee usticia' bee bene Israel. ⁴⁴Chequie Judas enu udete' cuenda Jesuse lubee bene ze'e, unilai lubee bene ze'e nú uni lubeella:

—Bene enu acua tucu bichiu' xeca, nze'e na'tsehua nu chiuca uya'hua li'illa. ⁴⁵Nu chenu uriña Judas lu Jesuse uyabicaí lunu nú uni:

—Maestro, Maestro.

Nu chu udacui tucu bichiu' xecanu. ⁴⁶Che una'tse bee bene ze'e Jesuse nu unguya' beei li'inu.

⁴⁷Pero tucu bee bene' Jesuse enu nzu ze'e uhualla espada nu uchiecu'lílla diaca tucu bene enu neca moso' ule'ya enu rnibiya' lu ye bee ule'ya. ⁴⁸Nu uni Jesuse lubee bene ze'e:

—¿Xinu entahua cuna espada cuna acarute para nú na'tsehua li'á xineca tucu huana'? ⁴⁹Ye bichia nzua cuna li'ihua liñi indu llene Jerusalén elu uzetea Stichia' Diose nu né na'tsehua li'á ze'e. Pero scua acane para nú yalu nú rni Stichia' Diose.

⁵⁰Che ye bee bene' Jesuse uyecaxu'u beella nu utsana' arqui'beella li'inu.

⁵¹Chequie nzequie tucu niyu e'ne' Jesuse nu nutui tucutsia sámana. Pero chenu una'tse bee bene ze'e li'i, ⁵²chu uchiu'u xqui' xu'i liñi sámana, nú nutui nu e'cu etui uyecaxu'i nzai.

Uyayu bee bene Jesuse lubee usticia' bee bene Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Che uyayu bee bene ze'e Jesuse lu ule'ya enu rnibiya' lu ye bee ule'ya, nu uyetesá' ye bee ule'ya enu rnibiya' lubee ule'ya, cuna bee usticia' bee bene Israel cuna bee ulaxcuela enu reca ley' Moisés. ⁵⁴Nu istu istu uyaquie Pedro Jesuse hasta ru'u ni'i ule'ya enu rnibiya' luye bee ule'ya, nu chu uzucu Pedro ru'u quii cuna bee bene enu rriucu ru'u ni'i ule'ya ze'e.

⁵⁵Bee ule'ya enu rnibiya' lubee ule'ya cuna ye bee usticia' bee

bene Israel, ucua'na beella xi ricu' quiya beella Jesuse para nú scua nu' modo nú utibeella li'inu. Pero né llela' beella xi aricu' quiya beella li'inu. ⁵⁶Xne añinzuca nú huaxi eluquichia' uricu' quiya beella Jesuse, pero urene uni tucu beella nu urene uni stucu beella. ⁵⁷Chequie utsuli chiucu chuna beella nu uricu' quiya beella tucu eluquichia' Jesuse nu unibeella:

⁵⁸—Li'iru ubene'ru nú uni nucua': Li'á nitilua indu llene Jerusalén nú ureche'e bee bene, nu chunatsia bichia reche'a stucu indu nú lá reche' bee bene.

⁵⁹Pero ni' scua la neca tucu necatse lunú rni beella urene urene uni beella.

⁶⁰Che utsuli ule'ya enu rnibiya' lu ye bee ule'ya labe bee bene enu nucua'a ze'e nu unidichia'lla lu Jesuse:

—¿Xinu la cuaquilílu? ¿Xie' neli neca nú rnibeei lulu scua la?

⁶¹Pero la nili Jesuse nu né cuaquilínu che unidichia' zeca'la ule'ya ze'e lunu:

—¿Xie' li'ilu necalu Cristo lli'ni Diose liñibe la?

⁶²Che ucuaqui Jesuse nú uninu:

—Li'á nze'e nu lañi'hua li'á Bene enu uxe'la Diose nú nzucua'a cue'tse Diose chúbee li'inu enu chiqui' reca yeene, nu le'ca lañi'hua nú nzela liñi xcabe enza liñibe.

⁶³Chenu ubene' ule'ya ze'e nucua'a, che utsalla xuculla nu unilla:

—¿Xinu la'nala'ahua testigo nee?

⁶⁴Ubene'la'hua nú xa uni nucua'a bedichia' nú necha neca lu Diose; ¿xa nihua nee?

Chequie uni ye bee bene ze'e nú ati Jesuse.

⁶⁵Xiucu xuna beei utsu xene lunu nu utsacu' beei lunu nu udiñi beei li'inu nu unibeei lunu:

—iUni'ti udiñi li'ilu!

Che bee sundado enu rriucu indu llene Jerusalén le'ca uxutse beei nda'gu lunu.

Utsacu' arqui' Pedro nú la chululla Jesuse

(Mt. 26:69-75; Lc. 22:56-62; Jn. 18:15-18, 25-27)

⁶⁶Chenu uzucu Pedro ru'u eli'ya' ni'i ule'ya enu rnibiya' luye bee ule'ya, che uriña tucu criada' ule'ya ze'e. ⁶⁷Chenu ulañi'nchu nú nzucu Pedro ru'u quii ze'e ubi'yanchu lulla nu uninchu lulla:

—Le'ca nuulu enzenuulu Jesuse bene eyeche Nazaret.

⁶⁸Pero ucachi' Pedro nú unilla: —La chu'lua benecua', nu la ri'á beya' xi rnilu.

Che uchiu'u Pedro ze'e nu utsulla ru'u puerta nu chu ubixia tiula.

⁶⁹Chenu ulañi' zeca criada ze'e Pedro stucu bese, che uquixienchu nú uninchu lubee bene enu nucua'a ze'e:

—Le'ca nuu nucua' neca nucua' tucu bene' Jesuse.

⁷⁰Pero ucachi' zeca Pedro nú la chululla Jesuse. Che lu ze'e tsia unia'ala bee bene enu nucua'a ze'e lu Pedro:

—Che rlube' nú necalu tucu bene' benecua', xne necalu bene Galilea nu rdichia'lu tucu nú rdichia'bee.

⁷¹Che uquixie Pedro nú utsuta'lla lu stichia'lla nú unilla: Dete' Diose castiya li'á tunu la nia nú neli neca.

—¡La chulua bene enu rnhua!

⁷²Hora ze'e ubixia tiula stucu bese nu ullu'cu arqui' Pedro lunú uni Jesuse lulla: “Ante nú bixia tiula chiucu bese, unilálu chuna bese nú la chululu li'á.”
Chenu ullu'cu arqui' Pedro nucua' uquixiella nú runa'lla.

Chenu uyayu bee bene Jesuse lu Pilato

(Mt. 27:1-2, 11-14; Lc. 23:1-5; Jn. 18:28-38)

15 Chenu uye'e lu yuu uyetesa' bee ule'ya enu rnibiya' lubee ule'ya cuna bee usticia' bee bene Israel cuna bee ulaxcuela enu reca ley' Moisés cuna bee usticia enu mase rnibiya' ubedichia' beella nú xa ri'i beella. Che ullica'cuu beella Jesuse nu udete' cuenda beella li'inu lu Pilato. ²Che unidichia' Pilato lu Jesuse:

—¿Necalu Arre' bee bene Israel la?

Nu ucuaqui Jesuse nú uninu:

—Li'á nze'e.

³Equie nú huaxi nú rricu'quiya bee ule'ya enu rnibiya' lubee ule'ya li'inu. ⁴Enze'e unidichia' Pilato lu Jesuse stucu bese:

—¿Xinu la cuaquilílu? Ubi'yacuru huaxi nú rni bee bene lu cuenda'lu.

⁵Pero lecaxi ucuaqui Jesuse, che chiqui' uyanu arqui' Pilato.

Unibiya' bee bene nú ati Jesuse

(Mt. 27:15-31; Lc. 23:13-25; Jn. 18:38-19:16)

⁶Cada chenu reca eliñi baxcu, rla'a Pilato tucu bene enu nchiñi ni'cu', tatse enu nacu' bee bene nú la'a. ⁷Bee bichia ze'e nchiñi Barrabás ni'cu' cuna beelá bee bene enu neyete'i, xne unguuti beei bee bene chenu uliunu beei bee bene'

gobierno. ⁸Chenu uyetesa' bee bene para nú nibeei lu Pilato nú ri'lla tucu nú neca costumbre'lla, ⁹che uni Pilato lubeei:

—¿Niarqui'hua nú la'a Arre' bee bene Israel la?

¹⁰Uni Pilato scua xne uri'lla beya' nú equie nú ria arqui' bee ule'ya enu rnibiya' lubee ule'ya, enze'e udete' cuenda beei Jesuse lulla.

¹¹Pero bee ule'ya enu rnibiya' lubee ule'ya udu'beei arqui' bee bene ze'e para nú ni bee bene ze'e lu Pilato nú la'alla Barrabás. ¹²Chequie unidichia' Pilato lubeei:

—¿Xi niarqui'hua nú ri'ina enu rnhua nú neca arre' bee bene Israel?

¹³Nu ucuaqui beei nú urixialibeei:

—¡Uquie'e nucua'a lu cruse!

¹⁴Nu uni Pilato lubeei:

—Pero ¿ta nú necha neca uri'i nucua'?

Nu masesca'lá juerte ubixialí beei:

—¡Uquie'e nucua' lu cruse!

¹⁵Chequie lunú niarqui' Pilato nú ya'na nze'calla lubeei, ula'alla Barrabás. Nu unibiya'lla nú uzete'che' bee sundado Jesuse, nu chu udete' cuendalla li'inu lubee sundado para nú quie'e beei li'inu lu cruse.

¹⁶Unguya' bee sundado ze'e Jesuse labe eli'ya' ru'u palacio, elu uyetesa' ye bee sundado. ¹⁷Che unguutu beei tucu laquie morado Jesuse, nu ureche'e beei tucu ellu'ñi' nú necache'e eche uzucu' beei equienu. ¹⁸Nu uquixie beei nú rixiali beei lunu:

—¡La laxua' nú nehuañi Arre' bee bene Israel!

¹⁹Chequie udu'beei tucu ixi' equienu, nu utsu xene beei lunu,

cuna nú utsu lliqui beei lunu, xi neca nú chiqui' rlu'cu beei ula'na lunu. ²⁰Chenu ulaxu nú xitse uri'ínu beei li'ínu, uhuabeei laquie morado nú nutunu nu ungotu beei nú neca xucunu li'ínu, che unguya' beei li'ínu para nú quieenu lu cruse.

Uquie'e bee bene Jesuse lu cruse

(Mt. 27:32-44; Lc. 23:26-43; Jn. 19:17-27)

²¹Chequie chenu nzeyu beei Jesuse, ulla'ca beei tucu bene eyeche Cirene enu lee Simón necalla pa' Alejandro cuna Rufo nze'talla enza dañi. Che uri'i bee sundado juerza li'illa para nú uya'lla cruse' Jesuse.

²²Nu chu unguya' beei Jesuse tucu luhuare elu lee Gólgota, nu rni nucua': lluca equie bene nguti. ²³Nu udete' beei biñu nú nucha inza nú nelaa nú lee mirra, para nú hue'nue pero lá hue'nue. ²⁴Chequie uquie'e bee sundado ze'e li'ínu lu cruse. Nu urita beei tucu rifa equie cuenda' xucunu bi'ya tane ri'i cada tucua beei ana.

²⁵Rquie quie' sila' uquie'e beei Jesuse lu cruse. ²⁶Equie cruse'nu uquie'e beei tucu letrero nú rixiule'e xi nú uquie'e beei li'ínu lu cruse, cuna nú rni lu letrero ze'e nú necanu: “Arre! bee bene Israel.” ²⁷Le'ca uquie'e beei chiucu huana' lu tucua cruse, tucu nze'e cue'tsenu chúbee nu stucu nze'e cue'tsenu chubeca. ²⁸Scua uyalu lunú rni lu ichi' Stichia' Diose nú rni: “Ubacu' beei li'ínu leta bee bene enu necha rri'i.”

²⁹Chequie bee bene enu udete ze'e unibeei huaxi bedichia' nú necha neca lunu, cuna nú rcuñi

beei equie beei xi'chinu beei li'ínu nú rnibeei:

—iManú! Rnilu nú chilalu indu llene Jerusalén nu lu chunatsia bichia reche' zecalue, ³⁰utsila'a li'ilu nu ulaca lu cruse cua'.

³¹Le'ca bee ule'ya enu rnibiya' lubee ule'ya cuna bee ulaxcuela enu reca ley Moisés, unibeei huaxi bedichia' nú necha neca lunu nu unibeei:

—Utsila'a nucua' bee bene, pero la aca nucua' tsila'a nucua' li'i nucua'. ³²iTunu neca nucua' Cristo puese láca Cristo enu neca arre' bee bene Israel lu cruse para nú laña'ahua, che chili arquia'ahua nucua'!

Hasta bee huana' enu nequie lu cruse cuna li'ínu rnibeei bedichia' nú necha neca lunu.

Chenu ungoti Jesuse

(Mt. 27:45-56; Lc. 23:44-49; Jn. 19:28-30)

³³Chenu unga rrebichia ucabeli diqui neca lu iliulabe hasta rquie chuna uche. ³⁴Hora ze'e chenu unga rquie chuna uche juerte urixiali Jesuse nú uninu:

—Eloi, Eloi, ¿lama sabactani? — rni bedichia'cua': Diosea, Diosea, ¿xinu utsana' arqui'lu li'á?

³⁵Chenu ubene' chiucu chuna bee bene enu nucua'a ze'e nucua', che unibeei:

—Uquie'e diacahua rixialla profeta Elías.

³⁶Che uyaxu'u tucu beei nu ucuacha nze'e tucu esponja lu inza vinagre nu uzucu'i lli'i tucu aca nu uti'i esponja cua' ru'u Jesuse para nú hue'nu inza vinagre cua' nu uni: —Utsana'hua li'illa bi'ya se nze'ta laca Elías li'illa lu cruse.

³⁷ Pero juerte urixiali Jesuse nu ungutinu. ³⁸ Chequie laquie llene nú neru'cu nzi'qui liñi indu llene Jerusalén, utsa arli'ti'llune hasta aya nu hasta aquí. ³⁹ Che capitañi enu rnibiya' lubee sundado ulañi'i nú xa ungoti Jesuse lunú nzui ze'e nu uni:

—Neli nú neca benequie' Lli'ñi Diöse.

⁴⁰ Le'ca istu nucua'a chiucu chuna bee una'a ri'ya, leta bee una'a quie' nzu María Magdalena, cuna Salomé cuna María enu neca na' Jacobo enu ri'chia bene Jacobo enu lle'na, cuna José. ⁴¹ Bee una'a quie' uyaquie Jesuse cuna nú uri'i beenchu elietsa lunu chenu nzunu Galilea. Le'ca ze'e nucua'a huaxilá bee una'a enu uyaquie li'inu hasta Jerusalén.

Chenu uhuachi' Jesuse

(Mt. 27:57-61; Lc. 23:50-56; Jn. 19:38-42)

⁴² Bichia nú rri'iluxu bee bene Israel ye nú qui'ña beella neca bichia xee nu sulachi beella. Bichia ze'e chenu enta chu'u rula', ⁴³ uríña José bene eyeche Arimatea. Ungalla tucu bee usticia lubee bene Israel, nu rlu'cu bee bene ula'na lulla. Le'ca nzuquiella nú lañi'lla lunú rnibiya' Diöse, nu uyu'u valuru'lla unacu'lla cuerpo' Jesuse lu Pilato. ⁴⁴ Chequie chiqui' uyanu arqui' Pilato chenu ubene'lla nú ungotila Jesuse, nu chu ubixialla capitañi para nú ri'illa beya' tunu neli nucua'.

⁴⁵ Chenu uni capitañi ze'e nú neli nú ungotila Jesuse, che uzela Pilato nú unguya' José cuerpo'nu. ⁴⁶ Chequie uya José

utsii tucu sabana fiño nu chu ulacalla cuerpo' Jesuse lu cruse nu utelalla sabana ze'e cuerpo'nu nu uya ca'chi'lla cuerpo'nu liñi tucu eluhua elu neda'ñila liñi tucu quiee nu utsacu'lla ru'u eluhua ze'e cuna tucu quiee llene. ⁴⁷ María Magdalena cuna María na' José ulañi' beenchu elu uhuachi' cuerpo' Jesuse.

Uhuañi zeca Jesuse nú ungutinu

(Mt. 28:1-10; Lc. 24:1-12; Jn. 20:1-10)

16 Chequie chenu udete bichia nú sulachi bee bene Israel, María Magdalena, cuna Salomé, cuna María na' Jacobo, uya tsi' beenchu perfume para nú du' beenchu perfume cua' cuerpo' Jesuse. ² Nu chenu uye'e lu yuu zila' domingo silatu' uya beenchu ru'u eluhua' Jesuse, chenu enta liñi bichia. ³ Chenu nzue beenchu lu inziu uni beenchu lu sa'beenchu: —¿Ti yucu quiee llene nú nacu' ru'u eluhua' Jesuse nee?

⁴ Pero chenu ubi'ya beenchu ulañi' beenchu, nu la nacua' quiee llene ze'e ru'u eluhua. ⁵ Chenu uyu'u beenchu liñi eluhua ze'e, ulañi' beenchu, nú nzucu tucu niyu e'ne' chubee ru'u eluhua ze'e, nutui tucu laquie niquichi nú stuñi, nu ulliqui beenchu. ⁶ Che uni lubeenchu:

—La lliquihua. Nediya nú rla'nahua Jesuse bene eyeche Nazaret enu uquiee lu cruse. Pero uhuañi zecanu nú ungutinu. Leca'nu ca'a. Ubi'yacuruhua elu uricu cuerpo'nu. ⁷ Nee uquia tixiule'ehua lu Pedro cuna lu beelá bee bene' Jesuse nú rlutinu nzanu Galilea, cheela riñahua ze'e; nu

lañi'hua li'inu ze'e tucu nú uninu luhua.

⁸Chequie yexetsia uchiu'u bee una'a quie' liñi eluhua ze'e, nu reca tse'tse beenchu xiqui beenchu. Nu lecati lu udixiule'e beenchu lunú unga ze'e, equie nú xiqui beenchu.

Ulube'lu Jesuse lu María Magdalena

(Jn. 20:11-18)

⁹Domingo sila' chenu uhuañi zeca Jesuse nú ungotinu, rlutilá ulube'lunu lu María Magdalena enu uhuanu achi benechiqui' arqui'.
¹⁰Che uya tixiule'enchu lubee bene enu uyanzenu Jesuse, nu nehuaana nzu arqui'beella cuna nú runa' beella equie cuenda' li'inu. ¹¹Pero chenu ubene' beella nú nehuañi Jesuse cuna nú ulañi' María Magdalena li'inu, né chili arqui'beella nucua'.

Chenu ulube'lu Jesuse lu chiucu bene'nu

(Lc. 24:13-35)

¹²Lu ze'e lá ulube'lu Jesuse lu chiucu bee bene'nu enu nza enza dañi, pero urene ulube'lunu lubeella. ¹³Che uyatixiule'e bee bene quie' lubeelá bee bene'nu, pero ni' nú uni beella né chili arqui' beelá bee bene'nu.

Lunú unibiya' Jesuse nú ri'i bee bene'nu

(Mt. 28:16-20; Lc. 24:36-49; Jn. 20:19-23)

¹⁴Lu ze'elá ulube'lu Jesuse lu chetu'cu bee bene'nu, chenu

nucua'a beella lu mexa. Uqui'ya' beella uri'inu, xne nziti arqui'beella equie nú la chili arqui'beella lunú unibee bene enu ulañi'la' li'inu nú uhuañi zecanu nú ungotinu.

¹⁵Chequie uninu lubeella:

—Uquiahua diqui lu iliulabe nu udixiule'ehua bedichia' nze'ca' Diose lu ye bee bene. ¹⁶Nu bene enu chili arqui' bedichia' nze'ca' Diose cuna nú rinzalla tsila'a Diose li'illa, pero bene enu la chili arqui' Stichia' Diose la tsila'a Diose li'illa lu castiya'lla. ¹⁷Nu bee seña quie' lu'cu bee bene enu chili arqui' Stichia' Diose. Equie nú lea hua beella bee benechiqui' arqui' bee bene. Le'ca nibeella stucu dialu rene nú la ni beella. ¹⁸Nu tunu na'tse beella be'la cuna yaa beella; nu tunu hue' beella nú nucha veneno, lecaxi zeca beella; nu le'ca chenu ricu' beella ya beella equie bee bene enu riti yeca' bee bene ze'e.

Uquie Jesuse liñibe

(Lc. 24:50-53)

¹⁹Chequie chenu ulaxu nú uni Jesuse lubeella, chu uquieenu liñibe nu uzucunu cue'tse Diose chubee. ²⁰Che uchiu'u beella nú nze tixiule'e beella bedichia' nze'ca' Diose lubee bene diqui bee luhua. Nu uri'i Jesucristo elietsa lubeella, uri'inu bee milagro para nú ri'i bee bene beya' nú neli neca Stichia' Diose nú sete' beella. Amén.

Bedichia' nze'ca' Jesucristo nú uquie'e San Lucas

Ca'a enta bee bedichia' nú
uquie'e San Lucas lu Teófilo

1 Huaxi bee bene uri'i luchia
nú uquie'e xcua'a beella nú xa
unga leta'ahua, ²tucu nú uze'te' bee
bene lia'ahua, li'ibeella enu ulañi'
xa unga hasta chenu uquixie Jesuse
nú udixiule'enu Stichia' Diose, nu
le'ca li'ibeella uri'i beella elietsa nú
udixiele'e beella stichia'nu lubee
bene. ³Le'ca ucua'naa para nú uri'á
beya' lunú neli neca nú xa unga
hasta chenu uriña Jesuse lu iliulabe.
Teófilo enu chiqui' neca equie neca
nze'ca para li'á nú quie'e xcua'a bee
ninguie' lulu, ⁴para nú ri'i nze'calu
beya' lu ye nú neli neca uzete' bee
bene li'ilu.

Udixiule'e tucu ángele' Diose
nú ala Juan Bautista

⁵Chenu unga Herodes arre lu
iliu Judea, uhuañi tucu ule'ya enu
lee Zacarías, li'illa ullutsella leta
textcua'a bee ule'ya enu unibiya'
Abías lu, nu una'a Zacarías lee
Elisabet, necalla enu nze'ta lubee
bene' tuxie Aarón enu unga ule'ya.
⁶Zacarías cuna una'lla uhuañi
beella tucu nú neli neca lu Diose,

nu uzucu' beella ley' Diose, hasta
nú lecati udu' culpa' beella. ⁷Pero
né lu'cu beella endu', xne neca
Elisabet bíchi nu unguxula rucu
beella.

⁸Tucu bichia uyala textcua'a bee
ule'ya para nú zibi' beella lu Diose,
leta bee ule'ya quie' nchiñi Zacarías.
⁹Chequie tucu nú neca costumbre'
bee ule'ya ze'e, ucañi beella bi'ya
ta beella ya'na enu du' llene
quiendixí ru'u ecu'cu elu necachi
neca liñi indu llene Jerusalén, nu
uyala Zacarías nú chu'ulla liñi indu
ze'e para nú du'lla llene quiendixí
ru'u ecu'cu ze'e. ¹⁰Diqui nú rdu'lla
llene quiendixí ru'u ecu'cu ze'e, ye
bee bene rnacu' beella lu Diose
labe eli'ya' indu ze'e. ¹¹Hora ze'e
ulube'lu tucu ángele' Diose lu
Zacarías, chúbee ru'u ecu'cu elu
rdu'lla llene quiendixí. ¹²Chenu
ulañi' Zacarías ángele ze'e, chiqui'
ulliquilla nu lá ri'illa beya' xa ri'illa.
¹³Che uni ángele ze'e lulla:
—Zacarías, la lliquilu, ubene'la'
Diose lunú rnacu'lu lunu, li'ilu
cuna una'alu Elisabet lu'cuhua
tucu endu', enu hualeehua Juan.
¹⁴Chiqui' ñia tsu arqui'lu, nu le'ca
esquie ñia tsu arqui' huaxi bee bene

chenu ala endu' ze'e. ¹⁵Xne endu'lu aca tucu bene llene lu Diose. La hue'lla biñu nu la hue'lla ni' tucu nú rri'i nú xuchi' bee bene. Ante nú alalla chiqui' nzula Espíritu Santo cuna li'illa. ¹⁶Ri'illa nu huaxi bee bene Israel che'e arqui'beei lu stula beei nú benchila' beei lu inziu' Diose, li'inu enu neca Diose' beei. ¹⁷Juan quie' cha rluti lu li'inu enu nze'ta, nu xe'la Diose nú huañi Espíritu Santo cuna Juan nu lu'culla nú recalla tucu nú ulu'cu profeta Elías, ri'illa nú huañi nze'ca bee paa cuna bee lli'ñilla para nú la cua'a xuulla. Le'ca zete'lla bee bene enu nziti arqui' para nú zucu' beei yeene, scua ri'illa nú cua'a tsiña bee bene para nú yucu arqui'beei li'inu enu nze'ta.

¹⁸Che uni Zacarías lu ángele ze'e:
—¿Xa modo aca tucu nú rnilu?
Xne unguxulá nu le'ca esquie unaa.

¹⁹Nu ucuaqui ángele ze'e:
—Li'á neca ángele enu lee Gabriel, nu sibia'a lu Diose, li'inu uxe'lanu li'á para nú nzelayua bee resuna nze'ca quie' lulu. ²⁰Pero nee, equie nú la chili arqui'lu lunú unia lulu, yacu' nú rnilu, hasta nú yalu nú unia lulu, che ya'la zeca nú nilu.

²¹Diqiu' nú reca bee nucua', bee bene enu nucua'a ru'u eli'ya' indu ze'e nucua'a quiee beella nú chiu'u Zacarías nu nzenu arqui'beella xi nú rle' Zacarías liñi indu ze'e.

²²Chenu uchiu'u Zacarías liñi indu ze'e la aca'lla nilla, che uri'i beella beya' nú nu' nú ulube' Diose lulla, nu rri'itsialla seña lubeella xne la nia'lla.

²³Chequie chenu ulaxu bee bichia nú uzibi' Zacarías liñi indu ze'e chu

nzialla ni'illa. ²⁴Cheela bee bichia ze'e, uyu'u endu' xla'cu una'alla Elisabet, nu diqui ayu' uu né chiu'a'lla ni'illa, nu uri'illa elliebacu' nú unilla: ²⁵“Uri'i Diose lua scua, para nú la tsequichia' bee bene li'á.”

Tucu ángele' Diose udixiule'e nú ala Jesuse

²⁶Chenu uza' xu'cu uu, uxe'la Diose ángele enu lee Gabriel lu tucu eyeche nú lee Nazaret nú nchiñi lu iliu Galilea. ²⁷Para nú nze bi'ya ángele quie' tucu una'a e'ne enu lee María, li'illa nzula nú yuculla tucu niyu enu lee José, nze'ta José quie' lubee bene' tuxie arre David. ²⁸Chequie uyu'u ángele ze'e liñi ni'i elu nzucu María nu uni ángele quie' lulla:

—iMalune María, li'ilu enu ucañila Diose! Nzu Diose Paa liñibe cuna li'ilu, nu uri'i le'yalanu li'ilu lu ye bee una'a.

²⁹Chenu ulañi' María ángele ze'e, chiqui' uyanu arqui'lla bee bedichia' nú uni ángele cua', nu le'ca uri'illa elliebacu' nú xa neca bee bedichia' cua'. ³⁰Chequie uni zeca ángele ze'e lulla:

—María, la lliquilu, xne ucañila Diose li'ilu nu uri'inu nú cha nze'ca lu cuenda'lu. ³¹Nee chu'u tucu endu' xla'culu, nu chenu ala endu' quie' hualeelunu Jesuse. ³²Li'inu lu'cunu nú chiqui' recanu, nu hualee bee bene li'inu Lli'ñi Diose liñibe, le'ca ri'i Diose liñibe nú acanu arre, tucu nú unga David arre, bene'nu enu udetela, ³³para nú nibiya'nu lubee bene Israel diqui tiambu. Nu leca xunga laxu nú rnibiya'nu.

³⁴Che uni María lu ángele ze'e:

—¿Xa modo nú aca nucua' scua, nu la nzucu'nua ni' tucu niyu?

³⁵Nu ucuaqui ángele ze'e lu María:

—Lu'culu endu' cua' equie cuenda' Espíritu Santo, hora ze'e lunú reca Diose liñibe du'nu xca'la' equielu tucu nú rdu' xcabe xca'la' equie bee bene. Enze'e endu' enu lu'culu leca xunga ri'ínu dula nu hualee bee bene li'ínu Lli'ñi Diose liñibe. ³⁶Le'ca enta nú lu'cu sa'lu Elisabet tucu endu', añinzuca nú ungxulalla, li'illa enu rni bee bene nú leca' modo nú lu'cu endu' pero necala xu'cu uu nú nu' endu' xla'culla. ³⁷Xne leca ni' tucu nú neriña' para Diose.

³⁸Chequie uni María lu ángele ze'e:

—Nzua para nú zibia'a lu Diose, ri'ínu tucu nú niarquiu'nu cuna li'á. Chenu ulaxu nú uni María scua, chu nzia ángele ze'e che.

Chenu uyabi'ya María Elisabet

³⁹Bee bichia ze'e, uchiu'u María nza lu tucu eyeche nú nchiucu' dañi lu iliu Judea, ⁴⁰nu chenu uyu'u María liñi ni' Zacarías unilla malune lu Elisabet. ⁴¹Chenu ubene' Elisabet nú uni María malune lulla, ucuñi endu' enu nu' xla'cu Elisabet, scua chiqui' uya'na Espíritu Santo cuna Elisabet. ⁴²Chequie, juerte uni Elisabet lu María:

—iUri'i le'yala Diose li'ilu lu ye bee una'a, le'ca uri'i le'yala Diose endu'lu enu nzu nú ala! ⁴³¿Ti necaa nú nze'ta bi'ya na' Diosea li'á?

⁴⁴María chenu unilu malune lua, ucuñi endu' enu nu' xla'cua equie nú ñia nzu arqui'nu. ⁴⁵iNeca nze'ca

nú uchili arqui'lu María, xne yalu tucu nú uni Diose lulu!

⁴⁶Chequie uni María:

Chiqui' rnia bedichia' nze'ca lu Diose.

⁴⁷Ñia nzu arquia lu Diose enu tsila'a li'á.

⁴⁸Xne ubi'yanu caa nzua, añinzuca nú necatsia tucu bene enu sibi' lunu, nu hasta nee nu diqui tiambu ni bee bene nú ñia nza nze'cae lu cuendaa.

⁴⁹Xne uri'i Diose enu reca yeene huaxi nú neca nze'ca lua. iNu Santo neca nú leenu!

⁵⁰Nu la tsuxe Diose nú rlu'cu arqui'nu ye bee bene enu rlu'cu ula'na lunu.

⁵¹Huaxi nú uri'ínu equie nú recanu.

Nu ulliti'nu elliebacu' bee bene enu nelliña.

⁵²Le'ca ungxu Diose nú rnbiya' bee bene enu rnbiya', nu udete'nu nú reca bee bene enu lle'na arqui'.

⁵³Udete'nu lunú secala'cha' bee bene enu seca elitsi nu lecaxi udete'nu lubee bene xene.

⁵⁴Uri'ínu elietsa lubee bene Israel, enu neca bene'nu, nu lá zañi'nu nú ulu'cu arqui'nu li'ibeella.

⁵⁵Tucu nú uninu lubee benea'hua enu udetela lu Abraham cuna lubee bene enu nze'ta lu Famili'lla.

Nu leca xunga tsana' arqui'nu li'ibeella.

⁵⁶Uya'na María ni'i Elisabet tucu chuna uu, cheela nzia María ni'lla.

Chenu ungula Juan Bautista

⁵⁷Chequie chenu uza' bichia nú ungula endu' Elisabet, ungula tucu endu' niyu'lla. ⁵⁸Che bee besiñu'lla cuna bee sa'lla uya bi'ya beella li'illa nu ñia utsu arqui'beella, xne uri'i beella beya' nú ñia uhua'a arqui' Diose li'illa. ⁵⁹Chenu uza' endu' ze'e xunu bichia, uya beella para nú quie seña elu necachi'nu, tucu nú rquie seña bee niyu enu neca bee bene Israel. Nu niarqui' beella nú achiu'ulee endu ze'e Zacarías tucu nú lee pa'nu. ⁶⁰Pero uni na'nu lubee bene ze'e:

—La chiu'uleenu scua. Juan chiu'uleenu.

⁶¹Che uni beella lulla:

—¿Xinú chiulee endu'lu Juan nu ni' tucu bee sa'hua la lee Juan?

⁶²Chequie cuna seña unidichia' beella lu pa' endu' ze'e, para nú ri'i beella beya' xa niarqui'lla nú chiu'lee endu'lla. ⁶³Nu unacu' pa' endu' ze'e tele'e ala para nú quie'ella lu ala xa chiu'ulee endu'lla, nu uquie'ella lu ala ze'e: “Juan chiu'leenu.” Chiqui' uyanu arqui' bee bene ze'e nú uri'illa scua. ⁶⁴Hora ze'e uya'la zeca nú uni Zacarías, nu unilla bedichia' nze'ca lu Diose. ⁶⁵Chequie ye bee besiñu' beella chiqui' uyanu arqui'beella, nu ye bee bene bee eyeche nú nchiucu dañi Judea ubene' beella lunú ungae scua. ⁶⁶Ye bee bene enu ungabiya' nucua' unibeei lu sa'bee: —¿Xi nze'ta nú aca endu' cua'? Xne che rlube' nú nzu Diose cuna endu' cua'.

Bee bedichia' nú uni Zacarías lu Diose

⁶⁷Chequie Zacarías pa' endu' ze'e, chiqui' nzu Espíritu Santo cuna

li'illa, nu uquixiella unilla bedichia' nú uliqui' Diose nú unilla:

⁶⁸¡Che'tsalá Diose liñibe li'inu enu neca Diose lubee bene Israel, xne uriñanu para nú tsila'anu lia'ahua enu neca bee bene'nu!

⁶⁹Uxe'la Diose lu'ahua tucu enu chiqui' reca para nú tsila'a lia'ahua, necanu enu nze'ta lubee bene' arre David enu uzibi' lu Diose.

⁷⁰Scua neca nú ucuaqui u'na Diose hasta hua'tu tucu nú udixiule'e bee profeta'nu enu uhuañi nze'ca lunu:

⁷¹Nu tsila'anu lia'ahua lubee bene enu rlee lua'ahua cuna lubee bene enu rana arqui' lia'ahua,

⁷²cuna nú hua'a arqui'nu bee bene'ahua enu udetela nu la zañi'nu lunú ucuaqui u'nanu.

⁷³Ninguie' neca nú ucuaqui u'na Diose lu Abraham bene'ahua enu udetela:

⁷⁴Nú tsila'anu lia'hua lubee bene enu rlee lua'ahua, para nú aca'ahua zibia'ahua lunu nu la lliquia'ahua,

⁷⁵para nú huañia'ahua tucu nú niarqui'nu, cuna nú ria'ahua tucu nú neli neca lunu, diqui tiembu lunú nehuañia'ahua.

⁷⁶Nu li'ilu endua, chiu'uleelu profeta' Diose liñibe, xne li'ilu cha rlutilu, para nú tsúche'lu inziu nú riña li'inu.

⁷⁷Nu ixiule'elu lubee bene para nú ri'i beella beya' nú xa ri'i

Diose perdona stula beella
cuna nú tsila'anu li'ibeella.

⁷⁸Xne seca DiOSE'ahua lia'ahua
cuna nú uhua'a arqui'nu
lia'ahua,
enze'e xe'lanu Lli'ñinu xi neca
ellie' bichia lua'ahua,
⁷⁹para nú xa'lanu elliebacu' bee
bene enu nchiñi arqui' lunú
necha neca,
cuna lubee bene enu nza lu
inziu nú nze nitilu beei,
nu lube'nu lia'ahua para nú
huañia'ahua tucu nú riala
nú huañia'hua lunu.

⁸⁰Ube'taru'cu endu' Zacarías cuna
nú naaqui utsuta' arqui'lla lunú
neca cuenda' DiOSE, nu uhuañilla lu
dañi achi elu la nucua'a bene, desde
bichia nú uquixiella nú udixiule'ella
Stichia' DiOSE lubee bene Israel.

Chenu ungula Jesuse

(Mt. 1:18-25)

2 Bee bichia ze'e, unibiya' arre
César Augusto nú sucu ichi
ye bee bene iliulabe. ²Nu bese rlu
nú uzucu ichi bee bene che neca
Cirenio gobernador lu iliu Siria.
³Chequie ye bee bene rqui'ña nú
nza beella lachi beella para nú zucu
ichi beella ze'e.

⁴Enze'e, uchiu'u José eyeche
Nazaret, nú nchiñi lu iliu Galilea,
nu uyalla lu iliu Judea eyeche Belén,
elu ungula tuxie arre David, xne
lubee famili' tuxie arre David nze'ta
José. ⁵Uya José eyeche Belén para
nú zucu ichilla cuna María, enu
nzula nú yuculla nu nu'la endu'
xla'cu María. ⁶Chequie diqui nú
nucua'a beella eyeche Belén, uriña
bichia nú ala endu' María. ⁷Ze'e

ungula endu' rlu'lla liñi ni' bee nañi
nu utelalla tucu laquie li'inu nu
chu udixiulla li'inu liñi tucu cajón
elu riu'u nú racu bee nañi, xne leca'
luhuare elu ya'na beella liñi ni' elu
ria'na bee bene.

Uni ángele' DiOSE lubee bene enu rriucu bee sanchi

⁸Axu eyeche Belén ze'e nucua'a
chiucu chuna bene enu rriucu bee
sanchi nu ria'na beella dañi rula
cuna bee sanchi. ⁹Che tu'natsia
ulube'lu tucu ángele' DiOSE lubeella,
nu udu'llie'e ellie'e DiOSE diqui
abenchila' beella, nu chiqui' ulliqui
beella. ¹⁰Nu uni ángele ze'e lubeella:

—La lliquihua, xne uriñayua
tucu resuna nze'ca luhua, nu equie
cuenda' resuna quie' tsu nze'ca
arqui' ye bee bene. ¹¹Nee lachi
David ungula tucu enu tsila'a
li'ihua, necanu Cristo, enu rlu'cu
nú rnibiya'. ¹²Nu para nú chuluhua
endu' quie', llela'hua li'inu liñi ni'i
bee nañi nebelanu tucu laquie nu
nchiucu'nu liñi tucu cajón elu riu'u
nú racu bee nañi.

¹³Hora ze'e ulube'lu huaxilá bee
ángele liñibe elu nzu ángele ze'e,
nu rni bee ángele cua' bedichia'
nze'ca lu DiOSE nú uni beenu:

¹⁴¡Che'tsalá DiOSE enu nzucu
liñibe!

¡Chu'u nú nzuxee lu iliulabe,
para bee bene enu rri'i
tucu nú riu' arqui'nu!

¹⁵Chequie chenu uquie bee ángele
ze'e liñibe, bee bene enu rriucu bee
sanchi ze'e uni beella lusa'beella:
—Chaahua eyeche Belén, che
bi'ya'ahua lunú unga ze'e tucu nú
udixiule'e DiOSE Pa liñibe lua'ahua.

¹⁶Nu yexetsia nzuebeella nu ullela' beella María cuna José liñi ni' bee nañi cuna endu' me' ze'e, nu nchiucu'nu liñi tucu cajón elu riu'u nú racu bee nañi. ¹⁷Chenu ulañi' beella nucua', uni beella lunú udixiule'e ángele lubeella equie cuenda' endu' ze'e, ¹⁸che uyanu arqui' ye bee bene enu ubene' lunú uni bee bene enu rriucu bee sanchi. ¹⁹Pero uduche'tsia María ye bee bedichia' cua' arqui'lla, cuna nú rri'illa elliebacu' lu cuenda' nucua'. ²⁰Chequie chenu ubenchila' bee bene enu rriucu bee sanchi chiqui' ñia nzu arqui' beella rdete' beella che'tsa lu Diose, cuna nú rni beella bedichia' nze'ca lunu lu ye nú ulañi' beella cuna nú ubene' beella, xne unga ye tucu nú udixiule'e ángele lubeella.

**Chenu unguya' José cuna María
Jesuse liñi indu llene Jerusalén**

²¹Chenu uza' xunu bichia nú ungula Jesuse uquie seña elu necachi'nu, tucu nú rquie seña elu necachi' bee niyu enu neca bee bene Israel, nu uhualee beella li'inu Jesuse, tucu nú udixiule'e ángele lu María ante nú chu'unu xla'culla.

²²Chenu uza' bee bichia nú uri'i María tucu nú rnibiya' ley' Moisés nú rri'i bee una'a chenu rala endu' beenchu, che unguya' beella Jesuse liñi indu llene Jerusalén lu Diose Paa liñibe. ²³Uri'i beella scua, xne rni ley' Diose: “Ye bee endu' niyu enu neca endu' rlu necala beei para Diose.”

²⁴Che uyayu beella u'na lu Diose tucu nú rnibiya' ley' Diose, chiucu cu'cu urre chiucu paloma.

²⁵Tiambu ze'e uhuañi tucu bene eyeche Jerusalén enu lee Simeón.

Ungalla tucu bene nze'ca, nu chiqui' rlu'culla ula'na lu Diose nzuquieella lañi'lla bene enu tsila'a bee bene Israel. Nu nzu Espiritu Santo cuna li'illa, ²⁶equie cuenda' Espiritu Santo ungabiya' Simeón nú la atisca'lla hasta nú lañi'lla Cristo, enu xe'la Diose enu rlu'cu nú rnibiya'. ²⁷Le'ca udu' Espiritu Santo arqui' Simeón nú uyalla liñi indu llene Jerusalén. Nu chenu uyanu pa' Jesuse li'inu cuna na'nu li'inu liñi indu ze'e para nú uya ri'i beella tucu nú rnibiya' ley' Moisés nú ri'i bee bene, ²⁸che una'tse Simeón Jesuse nu uchi'chilla li'inu nu unilla bedichia' nze'ca lu Diose, nú unilla:

²⁹Diose Paa liñibe nu' modo zelalu nú atia leca' xi chenuarquia nee,

xne uza'la lunú ucuaqui u'nalu lua.

³⁰Nee si ulañilá bene enu tsila'a li'iru nee,

³¹li'inu necanu, enu uxe'lalu lu ye bee bene iliulabe,

³²Li'inu necanu xi neca ellie'e nú xa'la elliebacu' bee bene enu la neca bee bene Israel.

Nu chiqui' aca neca equienu lubee bene'lu enu neca bee bene Israel.

³³Chiqui' uyanu arqui' José cuna María na' Jesuse chenu ubene' beella lunú uni Simeón scua equie cuenda' Jesuse. ³⁴Chequie uri'i le'ya Simeón beella, nu unilla lu María, na' Jesuse:

—Ixiule'a lulu María nú utsula Diose endu' quie', nú huaxi bee bene Israel la chili arqui' li'inu, nu le'ca huaxi bee bene chili arqui' li'inu, nu uriñanu para nú zete'nu

bee bene xa niarquí' Diose nú huañi beei, pero huaxi bee bene la yucu arquí' li'ínu. ³⁵Nu scua ri'ínu beya' xa neca elliebacu' cada tucua bee bene. Pero li'ilu María xi neca chenu rdete tucu espada arquí' tucu bene scua tsi'lu chenu aca bee nucua'.

³⁶Le'ca liñi indu ze'e nzucu tucu una'a enu neca profeta. Li'illa leella Ana, nu necalla xinchíu'cu Fanuel enu nze'ta lu famili' Aser, ungxulalla. Nu chiquí' nere'ne'lla chenu uchiälla nu uzucunulla niyu'lla achi lana, ³⁷nu ungala ochenta y cuatro lana nú uya'na zaquilla. Ni' tucu bichia la dete seella indu, ye bichia nzuculla liñi indu rnacu'lla lu Diose, nu rdete'lla bichia nú la aculla equie nú rlu'culla ula'na lu Diose. ³⁸Chenu rdichia'nu María Simeón, hora ze'e uriña Ana, chenu ulaxu nú udete'lla che'tsa lu Diose uquixiella nú unilla equie cuenda' Jesuse lu ye bee bene enu nzuquie nú riña bene enu tsila'a Jerusalén.

Chenu ubenchila' zeca José cuna María eyeche Nazaret

³⁹Chequie chenu ulaxu nú urí'i José cuna María lu ye nú rnibiya' ley' Diose, ubenchila' zeca beella lachi beella Nazaret nú nchiucu' lu iliu Galilea. ⁴⁰Diqui nú nze'ta ru'cu Jesuse, nze aca naaquinu cuna nú chiquí' reca elliebacu'nu nu chiquí' urí'ile'ya Diose li'ínu.

Chenu ullela Jesuse liñi indu llene Jerusalén

⁴¹Za'lana se José cuna María eliñi baxcu eyeche Jerusalén. ⁴²Chenu

uza' Jesuse chi'chiucu lana, uya ye beella Jerusalén, tucu nú neca costumbre' beella nú see beella eliñi baxcu ze'e. ⁴³Pero chenu ubenchila' beella nú ulaxu eliñi ze'e, né ri'i José cuna María beya' nú uya'na Jesuse Jerusalén. ⁴⁴Urí'i beella elliebacu' nú tia nze'tanu leta bee bene, nu utsela beella tucu bichia lu inziu, pero chenu ucua'na beella li'ínu leta bee bene' beella, cuna leta bee bene enu nu'lu beella, ⁴⁵né llela' beella li'ínu leta bee bene ze'e. Che ubenchila' zeca beella Jerusalén nze la'na beella li'ínu.

⁴⁶Chenu udete chuna bichia ullela' beella li'ínu liñi indu llene Jerusalén, nzucunu leta bee ulaxcuela enu reca ley' Moisés, nu sucu' diacanu nú rni beella nu rdichia'nunu beella. ⁴⁷Che ye bee bene enu riene' nú rninu, chiquí' uyanu arquí'beella lunú chiquí' recanu, nu le'ca nzenu arquí'beella lunú xa ucuaquinu lubeella.

⁴⁸Chenu ulañi' José cuna María li'ínu, uyanu arquí'beella, nu uni María na'nu lunu:

—Endua, ¿xinu urí'ilu scua? Pa'lu cuna li'á chiquí' nzenu arquí'ru rla'naru li'ilu.

⁴⁹Che ucuaqui Jesuse lubeella: —¿Xinu rla'nahua li'á? ¿Xie' la ri'ihua beya' nú rqui'ña nú ri'á riña' paa la?

⁵⁰Pero lá ri'i beella beya' xinu uninu scua.

⁵¹Che ubenchila'nunu li'ibeella eyeche Nazaret, nu uzucu'nu ye nú rni beella, pero María na'nu uduche'tsiälla ye bee nucua' arquí'lla. ⁵²Nu nze'ta ru'culá

Jesuse cuna nú chiqui' nze aca
elliebacu'nu, nu ñia nzu arqui'
Diose lunu. Le'ca ñia nzu arqui' bee
bene lunu.

**Udixiule'e Juan Bautista Stichia'
Diose**

(Mt. 3:1-12; Mr. 1:1-8; Jn. 1:19-28)

3 Chenu unga chiñu' lana nú
rnibiya' arre Tiberio César
diqui lu iliulabe, che neca Poncio
Pilato gobernador Judea, nu neca
Herodes gobernador Galilea, nu
bichilla Felipe neca gobernador
Iturea cuna lu iliu Traconite, nu
Lisancias neca gobernador Abilinia.
²Chequie Anás cuna Caifás unga
ule'ya enu mase rnibiya' lu beelá
bee ule'ya. Bee bichia ze'e uni
Diose lu Juan lliana' Zacarías lu
dañi achi elu la nucua'a bee bene.
³Nu uya Juan lu ye bee eyeche nú
nchiucu' axu re'cu Jordán, nu unilla
lubee bene nú che'e arqui' bee bene
lu stula beei cuna nú rinza beei,
para nú ri'i DiOSE perdona li'ibeei.
⁴Scua uyalu tucu nú uquie'e profeta
Isaías hua'tu, xne li'illa uquie'ella
nucua' nú rni:

Lu tucu dañi achi elu la nucua'a
bee bene, riene tucu chii
bene nu rixialilla nú nilla:

“Utsu tsiñahua arqui'hua xne
nze'ta li'inu enu neca
Diose'ahua;
utsana' arqui'hua stulahua
para nú yucu arqui'hua
stichia'nu.

⁵Utsuche' nze'cahua arqui'hua
tucu nú reca teriallu tucu
erlu,
nu utsana' arqui'hua elullña
cuna eluruti' tucu nú reca

teriallu elu neca loma cuna
dañi,
ubenchila' arqui'hua lu inziu'
Diose tucu nú rlí inziu nú
nerenguie,
nu utsuche' nze'cahua arqui'hua
tucu nú neca inziu nú
necache' nze'ca.

⁶Chequie ye bee bene iliulabe
lañi' li'inu enu tsila'a bee
bene, enu xe'la DiOSE.”

⁷Chenu uriña bee bene para nú
rinza Juan li'ibeei unilla lubeei:
—iLi'i sihua netsiñahua xi netsiña
bee be'la! ¿Ti udixiule'e luhua
nú tsila'ahua lu castiya juerte nú
nzula? ⁸Uhuañi nze'cahua para nú
acachee nú neli nú uche'e arqui'hua
lu stulahua, nu la nihua: “Li'iru
necaru enu nze'ta lubee bene' tuxie
Abraham”; xne nia luhua nú hasta
bee quiee quie' aca DiOSE ri'i nú aca
bee bene' tuxie Abraham. ⁹Pero
bee bene enu la nehuañi nze'ca
tucu nú rnibiya' DiOSE, ri'inu lubeei
tucu nú rri'inu bee bene aca ndixi
chenu la ayua' ndixí lue. Xiecu' beei
aca ze'e nu siqui' beei lu quii.

¹⁰Chequie unidichia' bee bene lu
Juan:

—¿Xi riala ri'iru che?

¹¹Nu ucuaqui Juan lubeei:

—Enu rlu'cu chiucu xucu,
dete'nze'e tucue utu bene enu la
lu'cune, nu enu nu' nú racu dete'
nze'e lle'nae lubee bene enu seca
la'cha'e.

¹²Le'ca uriña chiucu chuna bee
bene enu rri'i cubre impuestos lu
Juan para nú rinza Juan li'ibeei, nu
unidichia' beei lu Juan:

—Maestro, li'iquieru ¿xi riala
ri'iru?

¹³Che uni Juan lubeei:

—La ri'ihua cubre maselá lunú riala rri'ihua cubre.

¹⁴Le'ca unidichia' chiucu chuna bee sundado lu Juan:

—¿Nu li'iquieru xi riala ri'iru?

Nu uni Juan lubeei:

—La axihua stene' bee bene, nu la ta'hua eluquichia' bee bene enu lecaxi uri'i para nú nu' xi liqui' beei luhua, nu uri'ihua conforme lunú riauxtsiahua.

¹⁵Bee bene ze'e niarquí' beei nú

ala' ri'ixu beei beya' tunu neca Juan Cristo, ¹⁶pero uni Juan lubeei:

—Li'á rrinza li'ihua cuna inza. Pero nze'ta li'inu enu rinza bee bene cuna Espíritu Santo nu cuna quii. Li'inu necanu enu chiqui' nibiya' luquelá li'á, nu ni' nú hua lucunu la yala xne neca equielánu lua. ¹⁷Tucu nú rcui bee bene trigo, scua ri'inu lubee bene, bee bene enu nehuañi tucu nú rialane, dete'nu nú huañi bee bene ze'e elu rnibiya'nu, nu bee bene enu la nehuañi tucu nú rialane, xe'lanu li'ibeei lu quii nú leca xunga yala.

¹⁸Scua neca nú uni Juan lubeei, nu cuna huaxilá bee bedichia' nze'ca unilla bezete' lubeei, nu udixiule'ella bedichia' nze'ca' Diose lubeei. ¹⁹Le'ca uqui'ya' arre Herodes uri'i Juan, xne nzucunu Herodes Herodías una'a bichilla Felipe, cuna equie huaxilá beenú necha neca uri'i Herodes.

²⁰Pero Herodes luhuaire nú zucu'lla lunú uni Juan, uri'i Herodes stucu nú necha neca: Nú udu'lla Juan ni'cu'.

Urinza Juan Bautista Jesuse

(Mt. 3:13-17; Mr. 1:9-11)

²¹Chequie chenu urinza Juan bee bene, le'ca urinzalla Jesuse, diqui

nú rnacu' Jesuse lu Diose uya'la liñibe. ²²Nu ulaca Espíritu Santo equienu xi neca tucu paloma, nu ubene tucu chii enza liñibe nu uni chii ze'e:

—Li'ilu necalu Lli'ñia nu chiqui' se'ca li'ilu nu ñia nzu arquia lulu.

Bee bene' Jesuse enu udetela

(Mt. 1:1-17)

²³Nza Jesuse tucu ala llich'i lana chenu uquixienu uzete'nu Stichia' Diose lubeee bene.

Nu nzeli arqui' bee bene nú unga Jesuse xi neca lli'ñi José.

Nu unga José, lli'ñi Elí,

²⁴Elí unga lli'ñi Matat, Matat unga lli'ñi Leví, Leví unga lli'ñi Melqui, Melqui unga lli'ñi Jana, Jana unga lli'ñi José,

²⁵José unga lli'ñi Matatías, Matatías unga lli'ñi Amós, Amós unga lli'ñi Nahum, Nahum unga lli'ñi Esli, Esli unga lli'ñi Nagai.

²⁶Nagai unga lli'ñi Maat, Maat unga lli'ñi Matatías, Matatías unga lli'ñi Semei, Semei unga lli'ñi José, José unga lli'ñi Judá.

²⁷Judá unga lli'ñi Joanán, Joanán unga lli'ñi Resa, Resa unga lli'ñi Zorobabel, Zorobabel unga lli'ñi Salatiel, Salatiel unga lli'ñi Neri.

²⁸Neri unga lli'ñi Melqui, Melqui unga lli'ñi Adi, Adi unga lli'ñi Cosam, Cosam unga lli'ñi Elmodam, Elmodam unga lli'ñi Er.

²⁹Er unga lli'ñi Josué, Josué unga lli'ñi Eliezer,

Eliezer unga lli'ñi Jorim,
 Jorim unga lli'ñi Matat.
³⁰ Matat unga lli'ñi Leví,
 Leví unga lli'ñi Simeón,
 Simeón unga lli'ñi Judá,
 Judá unga lli'ñi José,
 José unga lli'ñi Jonán,
 Jonán unga lli'ñi Eliaquim,
³¹ Eliaquim unga lli'ñi Melea,
 Melea unga lli'ñi Mainán,
 Mainán unga lli'ñi Matata,
 Matata unga lli'ñi Natán,
³² Natán unga lli'ñi David,
 David unga lli'ñi Isaí,
 Isaí unga lli'ñi Obed,
 Obed unga lli'ñi Booz,
 Booz unga lli'ñi Salmón,
 Salmón unga lli'ñi Naasón,
³³ Naasón unga lli'ñi Aminadab,
 Aminadab unga lli'ñi Aram,
 Aram unga lli'ñi Esrom,
 Esrom unga lli'ñi Fares,
 Fares unga lli'ñi Judá,
³⁴ Judá unga lli'ñi Jacob,
 Jacob unga lli'ñi Isaac,
 Isaac unga lli'ñi Abraham,
 Abraham unga lli'ñi Taré,
 Taré unga lli'ñi Nacor,
³⁵ Nacor unga lli'ñi Serug,
 Serug unga lli'ñi Ragau,
 Ragau unga lli'ñi Peleg,
 Peleg unga lli'ñi Heber,
 Heber unga lli'ñi Sala,
³⁶ Sala unga lli'ñi Cainán,
 Cainán unga lli'ñi Arfaxad,
 Arfaxad unga lli'ñi Sem,
 Sem unga lli'ñi Noé,
 Noé unga lli'ñi Lamec,
³⁷ Lamec unga lli'ñi Matusalén,
 Matusalén unga lli'ñi Enoc,
 Enoc unga lli'ñi Jared,
 Jared unga lli'ñi Mahalaleel,
 Mahalaleel unga lli'ñi Cainán,

³⁸ Cainán unga lli'ñi Enós,
 Enós unga lli'ñi Set,
 Set unga lli'ñi Adán,
 Adán unga lli'ñi Diose.

Chenu uri'i beze'lu preo Jesuse

(Mt. 4:1-11; Mr. 1:12-13)

4 Chiqui' nzu Espíritu Santo cuna Jesuse, chenu uchiu'nu re'cu Jordán, nu unguya' Espíritu Santo li'inu lu tucu dañi achi elu la nucua'a bee bene. ²Ze'e uya'nanu chiu'a'a bichia cuna rula', nu né acunu ye bee bichia ze'e. Che ulia'na'nu nu uri'i beze'lu preo li'inu. ³Chequie uni beze'lu lunu: —Tunu neli nú necalu Lli'ñi Diose, unibiya' nú aca quiee quie' pá.

⁴Nu ucuaqui Jesuse lu beze'lu: —Lu ichi' Stichia' Diose rni: “La huañi bee bene lu cuenda' pá tsia, le'ca huañi bee bene lunú neca Stichia' Diose.”

⁵Che uyanu beze'lu li'inu equie tucu dañi elu ayaa, nu hora ze'e ulube' beze'lu lunu nzie' bee nación iliulabe, ⁶nu uni beze'lu lunu:

—Liquia lulu ye elurnibiya' nú nu' lubee nación quie' cuna ye bee eluxene nú nu' lue. Xne ye bee nucua' neca stenea, nu detea bee nucua' lu enu niarquía. ⁷Tunu tsu lliquilu lua nu chiqui' lu'culu ula'na lua, che ye bee nucua' aca stene'lu. ⁸Pero ucuaqui Jesuse nú uninu: —Lu ichi' Stichia' Diose rni: “Ulu'cu ula'na lu tucutsia Diose Pa liñibe, nu tucutsia lunu zibi'lu.”

⁹Chequie uyanu beze'lu li'inu eyeche Jerusalén, nu uquienuu beze'lu li'inu equie indu llene Jerusalén nu uni lunu: —Tunu neli nú necalu Lli'ñi Diose, utsana' li'ilu hasta ca'a nu hasta

lu yuu. ¹⁰Xne rni lu ichi' Stichia' Diose:

Xe'la Diose bee ángele'nu para nú ri'i ucu beenu li'ilu.

¹¹Cuna nú na'tse beenu li'ilu, para nú la ti'qui bee quíee cuchiu'lu.

¹²Che ucuaqui Jesuse lu beze'lu:

—Le'ca rni lu ichi' Stichia' Diose: “La ri'ilu preo Diose Pa liñibe.”

¹³Chequie chenu né llela' beze'lu xa ri'i preo Jesuse, utsana'i li'inu lle'na tiambu.

**Chenu uquixie Jesuse nú uzete'nu
bee bene**

(Mt. 4:12-17; Mr. 1:14-15)

¹⁴Ubenchila' zeca Jesuse lu iliu Galilea, nu chiqui' nzu lunú reca Espíritu Santo cuna li'inu, cuna nú chiqui' rni bee bene lu cuenda'nu ye bee luhuare ze'e. ¹⁵Sete'nu bee bene liñi indu' bee bene Israel cada bee luhuare, nu rni nze'ca bee bene lu cuenda'nu.

Chenu ubenchila' Jesuse eyeche Nazaret

(Mt. 13:53-58; Mr. 6:1-6)

¹⁶Uya Jesuse eyeche Nazaret, elu ube'ta ru'cunu. Chequie bichia nú sulachi bee bene Israel, uyu'unu liñi indu' beella tucu nú neca costumbre'nu, nu utsulínu nu ungulanu lu ichi' Stichia' Diose. ¹⁷Udete' beella ichi' nú uquie'le profeta Isaías yanu, nu chenu uxa'lanu lu ichi' ze'e uxa'lanu tucu luhuare elu rni:

¹⁸Nzu Espíritu' Diose Pa liñibe cuna li'á,
xne uri'i le'yalanu li'á para nú
ixiule'a bedichia' nze'ca'
Diose lubee bene elitsi;
uxe'lanu li'á para nú ri'á elietsa
lubee bene enu nehuana
nzu arqui',

cuna nú ixiule'a lubee bene nú
xa tsila'a beei lu dula nú
rnbiya' lubeei,
cuna nú ri'iyecaa iculu bee bene
enu niqie'lu,
cuna nú ri'á elietsa lubee bene
enu nehuana seca.

¹⁹Nu para nú ixiule'a lubee bene nú uriñala bichia nú tsila'a Diose bee bene enu rcua'na nú zucu' nú rniu.

²⁰Che chu utsacu' Jesuse lu ichi' ze'e, nu udete' cuendanue ya bene enu rri'i elietsa liñi indu ze'e nu chu uzucunu. Pero ye bee bene enu nucua'a liñi indu ze'e ri'yalí beei lunu. ²¹Nu uquixienu nú uninu, lubeei:

—Bichia quie' uyalu lunú rni lu ichi' Stichia' Diose nú ubene' inza'hua.

²²Chequie ye bee bene ze'e uni nze'ca beei lu cuenda' Jesuse, nu chiqui' nzenu arqui'beei nú ñia uninu bee bedichia' nze'ca lubeei. Nu unidichia' beei lu sa'beei:

—¿Lanú nucua' neca lli'ñi José la?

²³Nu uni Jesuse lubeei:

—Nediyaá nú nihua lua bedichia' nú rni: “Doctor uri'iyeca le'catsia li'ilu.” Nu le'ca nihua: “Lunú ubene'ru nú uri'ilu eyeche Capernaúm, uri'i le'ca scua lachilu ca'a nee.”

²⁴Chequie unilá Jesuse lubeei:

—Nia luhua nú ni'tucu profeta la yucu nze'ca arqui' bee bene lachilla li'illa. ²⁵Li'á nia luhua, nú tiambu nú uhuañi profeta Elías, ucua'a huaxi bee una'a zaqui diqui bee lu iliu Israel, chenu né laca quiu chuna lana arula' nu unga biñia diqui bee luhuare enza ze'e. ²⁶Pero

né xe'la Diose Elías, para nú ri'lla elietsa lu tucu una'a zaqui Israel, uxe'la tsianu Elías para nú ri'lla elietsa lu tucu una'a zaqui eyeche Sarepta, axu eyeche Sidón. ²⁷Le'ca ucua'a huaxi bee bene Israel enu ulle'ca elichia nú lee lepra tiambu nú unga Eliseo profeta, pero né ri'iyecalla ni' tucu bee bene cua', uriyeca tsialla Naamán, enu neca bene Siria.

²⁸Chenu ubene' ye bee bene enu nucua'a liñi indu ze'e bedichia' cua', chiqui' ulee beei. ²⁹Nu chu utsuli beei nu uhua beei Jesuse eyeche ze'e, nchiucu' eyeche ze'e equie tucu dañi, che unguya' beei li'inu ru'u eyeche ze'e para nú nze tsi'qui beei li'inu hasta quierquie. ³⁰Pero udetetsia Jesuse labe beei nu chu nzanu.

**Chenu uriyeca Jesuse tucu bene enu
seca ichia' benechiqui'**

(Mr. 1:21-28)

³¹Che uya Jesuse eyeche Capernaúm nú nchiucu' lu iliu Galilea, nu ze'e uzete'nu bee bene Satu' bichia nú sulachi beei. ³²Chiqui' nzeno arquí' bee bene lunú xa uzete'nu li'ibeei, xne uninu lubeei xi rni tucu bene enu chiqui' rnibiya'.

³³Liñi indu ze'e nzucu tucu niyu enu nchiñi benechiqui' arquí', nu juerte urixiali niyu ze'e nú uni:

³⁴—iUtsana' li'iru! Jesuse bene eyeche Nazaret. ¿Xinu ri'chialu li'iru? ¿Nze'talu para nú nitilulu li'iru la? Nu'lua li'ilu nú necalu Bene' Diose nu la lu'culu dula.

³⁵Chequie uqui'ya' benechiqui' ze'e uri'i Jesuse nú uninu:

—iUzaca nu uchiu'u arquí' niyu quie! Che utsi'qui benechiqui' niyu ze'e lu yuu ante lu ye bee bene, nu chu uchiu'i arquí' niyu ze'e nu né ri'chia'i niyu ze'e che. ³⁶Ye bee bene ze'e chiqui' uyanu arquí'beei nú unibeei lu sa'beei:

—¿Xi bedichia' neca bee nucua'? Chiqui' reca benequie' nu rnibiya'lla nú chiu'u bee benechiqui'. iNu xiu'u beei!

³⁷Nu diqui bee luhuare enza ze'e uni bee bene lu cuenda' Jesuse.

**Chenu uriyeca Jesuse suegra' Simón
Pedro**

(Mt. 8:14-15; Mr. 1:29-31)

³⁸Chequie chenu uchiu'u Jesuse liñi indu chu nzanu ni'i Simón. Nu riti suegra' Simón, nu chiqui' nu'lla xlee, che uzequiee beella lu Jesuse para nú ri'yecanu li'illa. ³⁹Nu uya bica Jesuse elu nuxulla nu unibiya'nu nú chiu'u xlee ze'e, nu chu uchiu'u xlee nú nu'lla. Hora ze'e uzetella, nu udete'lla nú udacu beella.

**Chenu uriyeca Jesuse huaxi bene
enu riti**

(Mt. 8:16-17; Mr. 1:32-34)

⁴⁰Chenu uhuatse' bichia, ye bee bene enu rlu'cu bee bene enu riti lu ye bee clasia' bee elichia nú seca beei uyanu beella li'ibeei lu Jesuse, nu uricu'nu yanu equie cada tucua beei, nu scua uriyecanu li'ibeei. ⁴¹Le'ca leta bee bene enu riti ze'e huaxi beei uchiu'u bee benechiqui' arquí'beei, nu urixialibeei nú unibeei:

—iLi'ilu necalu Lli'ñi Diose!

Pero uqui'ya' bee benechiqui' uri'i Jesuse nu lá zelanu nú anibeei, xne nediyabeei nú li'inu necanu Cristo.

**Chenu uzete! Jesuse Stichia! Diose
lubee bene lu iliu Galilea**

(Mr. 1:35-39)

⁴²Chenu uye'e lu yuu, uchiu'u Jesuse eyeche ze'e nu nzanu tucu luhuare elu lecati nu!. Pero ucua'na bee bene li'inu, nu uriña beei elu nzucunu. Nu unibeei lunu nú la chanu, ⁴³pero uninu lubeei:

—Le'ca rqui'ña nú nzetixiule'a lunú xa neca elurnibiya' Diose lubee bene stucu eyeche, xne enze'e uxe'la Diose li'á.

⁴⁴Scua unzee Jesuse udixiule'enu Stichia' Diose liñi bee indu lubee bene lu iliu Galilea.

**Chenu uri'i Jesuse milagro nú ulluna
huaxi bee bela**

(Mt. 4:18-22; Mr. 1:16-20)

5 Tucu bese chenu nzu Jesuse ru'u inzatu' Genesaret, uriña huaxi bee bene lunu xne niarquí' beei nú yene' beei Stichia' Diose nu hasta nú uta'cu beei Jesuse. ²Nu ulañi' Jesuse chiucu barco ru'u inzatu' ze'e. Nu nelata liñii xne bee bene enu rucu bela ulacala beei equiee xne rquie beei ixíu nú rucu beei bela. ³Che uyu'u Jesuse liñi tucu bee barco ze'e, neca tucu barco ze'e barco' Simón, nu unacu'nu lu Simón nú laca quieella barco ze'e lle'na enza lu inzatu' ze'e. Nu uzucunu liñi barco ze'e nu uquiexienú sete'nu bee bene.

⁴Chenu ulaxu nú uninu lubee bene ze'e, uninu lu Simón:

—Uya' barco quie' elu mase aquíe lu inzatu' quie', nu du'hua ixíu lu inza para nú ucuhua bee bela.

⁵Nu ucuaqui Simón lu Jesuse:

—Maestro, diquillu rula' quie' rucu'ru bela nu ni' tucuí lá ri'iru ana alluna, pero tunu rnílu nú du'uru ixíu nú rucu'ru bela lu inza scua ri'á che.

⁶Chenu udu' beella ixíu nú rucu beella bela lu inza, uducu beella huaxi bee bela hasta nú uquixie nú saa ixíu ze'e. ⁷Chequie uri'i beella seña lu sa' beella enu nucua'a liñi stucu barco, para nú ri'i bee nze'e elietsa lubeella. Che uya beella nu urichee beella rucu barco ze'e bee bela hasta nú lle'natsia achatse' bee barco ze'e lu inza.

⁸Chenu ulañi' Simón Pedro nú unga scua utsu lliquilla lu Jesuse nu unilla lunu:

—iLa yala nú tsua lulu Jesuse, xne necaa bene enu rlu'cu dula!

⁹Unilla scua xne chiqui' uyanu arqui'lla cuna beelá bee sa'lla nú huaxi bee bela uducu beella.

¹⁰Le'ca uyanu arqui' Jacobo cuna Juan, enu neca bee lliana' Zebedeo, nu neca beella mbañeru' Simón. Pero uni Jesuse lu Simón:

—La lliquilu xne hasta nee quixiélu nú nilu lubee bene para nú aca beei bee benea luhuare nú ruculu bela.

¹¹Che uhua beella barco' beella ru'u inzatu' ze'e, nu utsa'na beella ye bee nucua' ze'e nu chu nzenu beella Jesuse.

**Uri'iyeca Jesuse tucu bene enu
ulle'ca elichia nú lee lepra**

(Mt. 8:1-4; Mr. 1:40-45)

¹²Tucu bichia nzu Jesuse tucu eyeche, nu uriña tucu bene enu seca elichia nú lee lepra lunu, chenu ulañi'lla li'inu, utsu lliquilla

lunu hasta nú uti'lla tequieella lu yuu, nu uziquieella lunu nú unilla:

—Detá, Jesuse tunu laca arqui'lu nu' beya' nú ri'iyecalu li'á.

¹³Che uricu' Jesuse yanu equie niyu ze'e, nu uninu:

—Niarquia nú yeca'lu.

iUyeca' nee! Hora ze'e uyeca' niyu ze'e. ¹⁴Nu uni Jesuse lulla:

—La ixiule'elu lu ni'tucu bee bene nú xa uyeca'lu, lu ule'yatsia uquia tixiule'e nú uyeca'la'lu. Che dete'lu tucu u'na lu Diose tucu nú rnibiya' ley' Moisés, para nú ri'i ye bee bene beya' nú uyeca'la'lu.

¹⁵Pero cada bichia masela uri'chia bee bedichia' lunú rri'i Jesuse, nu riete' sa' huaxi bee bene para nú riene' beei lunú rrinu cuna nú rri'iyecanu li'ibeei lubee elichia nú seca beei. ¹⁶Nu nza Jesuse bee luhuare elu lecalí ti nu' para nú rncacu'nu lu Diose.

Chenu uri'iyeca Jesuse tucu bene enu neati be'la'

(Mt. 9:1-8; Mr. 2:1-12)

¹⁷Tucu bichia chenu sete! Jesuse bee bene, ze'e nucua'a chiucu chuna bee fariseo cuna bee ulaxcuela enu reca ley' Moisés nze'ta beella diqui lu iliu Galilea, cuna lu iliu Judea cuna lu eyeche Jerusalén. Ulube' Jesuse lubeella nú rluca'nu poder' Diose, nu rriyecanu bee bene enu riti. ¹⁸Che uriñayuu chiucu chuna bee bene tucu niyu enu neati be'la' nchiucu' lu camilla, niarqui' beei nú chu'unuu beei niyu quie' liñi ni'i hasta lu Jesuse. ¹⁹Pero leca modo chu'nuu beei niyu quie' liñi ni'i ze'e xne nucua'a huaxi bee bene ze'e. Che uquie beei equie ni'i

ze'e nu uxa'la beei equiee, nu ulaca beei niyu enu riti ze'e labe bee bene elu nzu Jesuse. ²⁰Chenu ulañi' Jesuse nú nzeli arqui'beei li'inu, uninu lu bene enu riti ze'e:

—Lliana'a uri'á perdona stulalu nee.

²¹Che bee ulaxcuela enu reca ley' Moisés cuna bee fariseo uquixie beella uri'i beella elliebacu' nú uni beella: “¿Ti neca nucua' nú rni nucua' nú neca nucua' Diose? Xne tucutsia Diose reca rri'i perdona stula bee bene.”

²²Pero uri'i Jesuse beya' lunú xa rri'i beella elliebacu' nu uninu lubeella:

—¿Xinu rri'ihua elliebacu' scua?

²³¿Ta nú mase neriña' nú aca: “Nú nia lu niyu quie' uri'á perdona stulalu”, urre nia lulla: “Uzetee nu utse'”? ²⁴Pero nee lubea luhua nú li'á Bene enu uxe'la Diose rlu'cua nú rnibiya'a lu iliulabe para nú ri'á perdona stula bee bene.

Che uni Jesuse lu niyu enu riti ze'e:

—Nia lulu nú uzetee una'tse camiya'lu nu uquia'a ni'lu.

²⁵Hora ze'e utsuli niyu ze'e lu ye bee bene nu chu una'tsella camilla nú uriculla lu, nu chu nziälla enza ni'lla nu chiqui' udete'lla che'tsa lu Diose. ²⁶Ye bee bene enu nucua'a ze'e chiqui' uyanu arqui'beei nú unibeei bedichia' nze'ca lu Diose, nu chiqui' ulliqui beei nú unibeei: —Bichia quie' ulañia'ahua tucu milagro nú lasca' lañia'ahua.

Chenu ubixia Jesuse tucu bene enu lee Leví

(Mt. 9:9-13; Mr. 2:13-17)

²⁷Lulá bee nucua' uchiu'u Jesuse eyeche ze'e, nu ulañi'nu tucu bene

enu rri'i cubre bee impuesto leella Leví. Nzuculla elu rixiu bee bene bee impuesto. Nu uninu lulla:

—Utequie li'á.

²⁸Nu chu utsuli Leví, nu utsa'nalla ye bee stene'lla nu nzequieella Jesuse.

²⁹Chequie uri'i Leví tucu eliñi llene ni'lla para Jesuse, nu nucua'a huaxi bee bene enu rri'i cubre bee impuesto cuna huaxilá bee bene, enu nucua'anu beella lu mexa. ³⁰Pero bee fariseo cuna bee ulaxcuela enu reca ley' Moisés, uquixie beella nú se'ta beella bee bene' Jesuse, nu uni beella:

—¿Xinu racunuhua nu rue'nuhua bee bene enu rri'i cubre bee impuesto cuna bee bene enu rlu'cu dula?

³¹Nu ucuaqui Jesuse lubeella:

—Bee bene enu la aca riti la qui'ña bee nze'e doctor, pero bee bene enu riti rqui'ña bee nze'e doctor. ³²Lá yela lubee bene nze'ca, pero uri'ña lubee bene enu rlu'cu dula, para nú che'e arqui'beei lu cuenda' stula beei.

Udixiule'e Jesuse xa neca equie cuenda' chenu la acu bee bene lunú rlu'cu bee bene ula'na lu Diose (Mt. 9:14-17; Mr. 2:18-22)

³³Che uni beella lu Jesuse:

—Bee bene' Juan Bautista cuna bee fariseo huaxi bese lá acu beella, equie nú rlu'cu beella ula'na lu Diose nu le'ca chiqui' rnauc' beella lu Diose. ¿Xiquie nú racutsia bee bene'lu nu rue'tsia beella?

³⁴Nu ucuaqui Jesuse lubeella:

—¿Xie' nu' modo nú nihua lubee bene enu nezene' lu tucu tsa'a chia,

nu la acu beei chenu nucua'a beei cuna niyu enu xia la? ³⁵Pero riña bichia chenu la nzua' bene enu xia ze'e cuna bee bene, che si dete' beella bichia nú la acu beella, equie nú rlu'cu beella ula'na lu Diose.

³⁶Le'ca uninu lubeella:

—Lecati chiecu' te pedazo laquie cuqui para nú quiela'lla lu tucu laquie uxu. Xne tunu ri'i bee bene scua, ri'i laquie cuqui nú mase tsa' laquie uxu, le'ca la ya'na nze'ca laquie cuqui lu laquie uxu. ³⁷Le'ca la chu'u biñu cuqui liñi iti uxu, xne ri'i biñu cuqui nú tsa' iti uxu, che nitilu biñu cua' cuna iti. ³⁸Enze'e rqui'ña nú chu'u biñu cuqui liñi iti cuqui para nú la nitilu rucune. ³⁹Nu ni' tucu bene enu rue' biñu uxu la yu' arqui' biñu cuqui, xne rnibeei: “Máse neca nze'ca biñu uxu.”

Chenu unguxi bee bene' Jesuse túu lu trigo bichia nú sulachi bee bene

Israel

(Mt. 12:1-8; Mr. 2:23-28)

6 Tucu bichia nú sulachi bee bene Israel udetenu Jesuse bee bene'nu lu yuu elu nu' trigo nu uquixie bee bene'nu unguxi beella túu lu trigo, nu uzu'cu beella ebichi'i liñi ya beella nu udacu beellae. ²Chequie unidichia' chiucu chuna bee fariseo lubeella:

—¿Xinu rri'ihua lunú la yala ri'ihua bichia nú sulachi bee bene?

³Nu ucuaqui Jesuse:

—¿Xie' lasca' ulahua elu rni nú xa uri'i David cuna bee bene enu nuulla tucu bese chenu ulia'na beella la? ⁴Uyu'u David liñi indu' Diose nu udete' ule'ya pá nú necale'ya yalla, nu udacullae nu

le'ca udete'lla pá cua' udacu bee bene enu nuulla, añinzuca nú bee ule'yatsia nu' modo acu bee pá cua'.

⁵Le'ca uni Jesuse lubeella:

—Nu li'á Bene enu uxe'la Diose, le'ca rlu'cua nú rnibiya'a lu bichia nú sulachi bee bene.

Uri'iyeca Jesuse tucu bene enu ubichicu' ya

(Mt. 12:9-14; Mr. 3:1-6)

⁶Stucu bichia nú sulachi bee bene uyu'u Jesuse liñi tucu indu' bee bene Israel, nu uquixienu uzete'nu bee bene. Ze'e nzucu tucu niyu enu ubichi cu' ya chubee. ⁷Chequie bee ulaxcuela enu reca ley' Moisés cuna bee fariseo, nucua'a tsi'ña beella tunu ri'iyeca Jesuse bene ze'e bichia nú sulachi beella, para nú scua lu'cu beella xa ricu' quiya beella li'inu. ⁸Pero li'inu nediya'la'nu xi elliebacu' rri'i beella, che uninu lu bene enu ubichicu' ya:

—Utsuli nu utsu labe quie'.

Nu chu utsuli bene cua' nu uya tsulla ze'e. ⁹Chequie uni Jesuse lubeella:

—Nidichia'a tucu luhua: ¿Xi riala ri'i bee bene bichia nú sulachi bee bene? ¿Nú neca nze'ca la urre nú necha neca la? ¿Tsil'a bene nú la ati tucu bene la urre tsana' arqui' bene nú ati tucu bene la?

¹⁰Nú chu ubi'ya Jesuse lu ye bee bene enu nucua'a ze'e nu uninu lu niyu ze'e:

—Ulí yalu.

Che uri'i niyu ze'e scua nu uyeca' yaalla. ¹¹Pero nu' bee bene enu nucua'a ze'e, chiqui' ulee beei nu uquixie beei uníbeei lu sa' beei nú xa ri'i condra beei Jesuse.

Chenu ucañi Jesuse chi'chiucu bee apóstol'nu

(Mt. 10:1-4; Mr. 3:13-19)

¹²Bee bichia ze'e uya Jesuse dañi nu unacu'nu lu Diose, nu diquillu rula' unacu'nu lu Diose ze'e.

¹³Chenu uye'e lu yuu ubixianu ye bee bene'nu nu ucañinu chi'chiucu beella, nu uhua leenu li'ibeella apóstoles. ¹⁴Bee benequie' neca enu ucañinu:

Simón enu le'ca uhualeenu

Pedro,

Andrés bichi Simón,

Jacobo,

Juan,

Felipe,

Bartolomé,

¹⁵Mateo,

Tomás,

Jacobo lliana' bene enu lee

Alfeo;

Simón enu ullutse leta tucu

partido nu lee cananista;

¹⁶Judas bichi Jacobo;

nu cuna Judas Iscariote, enu

udete' cuenda Jesuse.

Chenu uzete' Jesuse huaxi bee bene cuna nú uriyecanu bee bene

(Mt. 4:23-25)

¹⁷Chequie ulaca Jesuse dañi ze'e cuna bee apóstol'nu nu ucua'axe beella lu tucu lichi cuna huaxi bee bene enu nzequie li'inu; cuna huaxilá bee bene enu nze'ta diqui bee luhua lu iliu Judea, cuna bee bene Jerusalén cuna bee bene enu nze'ta ru'u inzatu' eyeche Tiro cuna Sidón. Ube'ta bee benequie' para nú ubene' beei lunú rni Jesuse cuna nú uri'iyecanu li'ibeei lubee elichia

nú seca beei. ¹⁸Le'ca uri'iyecanu bee bene enu nchiñi bee benechiqui' arqui'. ¹⁹Ye bee bene ze'e niarqui' beei ti'ya beei Jesuse, xne rri'iyecanu ye beei cuna poder nú rlu'cunu.

Lunú ri'i nú ñia nzu arqui' bene nu lunú ri'i nú nehuana nzu arqui' bene

(Mt. 5:1-12)

²⁰Che ubi'ya Jesuse lubee bene'nu nu uninu lubeella:

—Ñia nza lu cuenda'hua li'ihua enu neca bene elitsi, xne rialahua elurnibiya' Diose.

²¹Ñia nza lu cuenda'hua li'ihua enu rlia'na' nee, xne riña bichia nú aca neela'hua, nu ñia nza lu cuenda'hua li'ihua enu runa' nee, xne riña bichia nú llila' arqui'hua.

²²Ñia nza lu cuenda'hua chenu rana arqui' bee bene li'ihua, cuna chenu rtiliaca' bee bene li'ihua cuna chenu rquiexuu bee bene li'ihua, cuna chenu rluachú bee bene li'ihua xi neca beenú lecaxi zibi' equie nú nzeli arqui'hua li'á Bene enu uxe'la Diose. ²³Chiqui' ñia utsu arqui'hua chenu rri'inu bee bene li'ihua scua, xne li'ihua lu'cuhua tucu premio nú llene neca liñibe, xne le'ca scua uri'inú bee bene' bee benecua' bee profeta' Diose.

²⁴Pero cue'hua bee bene xene, xne ulu'culahua nú ñia utsu arqui'hua.

²⁵Cue'hua bee bene enu neela' nee, xne enta nú lia'na'hua. Cue'hua bee enu xi'chi nee, xne enta nú una'hua nu nehuana tsu arqui'hua.

²⁶Nu cue'hua bee bene enu riu' arqui' nú sucu' aya bee bene li'ihua,

xne le'ca scua uzucu' aya bee bene'ahua hua'tu bee profeta enu né ni tucu nú neli neca.

Rqui'ña nú zeca bee bene bene enu rlee lulla

(Mt. 5:38-48; 7:12)

²⁷Pero li'ihua enu riene' lunú rnia, nia luhua: Uzecahua bee bene enu rlee luhua, nu uri'i nze'cahua lubee bene enu rana arqui' li'ihua, ²⁸uni'hua nú cha nze'ca lu cuenda' bee bene enu ri'ña nú zecahua, nu una'cuhua lu Diose equie cuenda' bee bene enu rquiexuu li'ihua. ²⁹Tunu nu' enu du' tucue lulu, ude'te' stucu chú lulu du'lla stucue, nu tunu nu' enu raxi chamarra'lu le'ca utsana' nú uya'lla cuna lliaca'lu. ³⁰Titse enu rnacu' xi rnacu' lulu ude'te' nucua' lulla, nu enu raxi stene'lu la nacu' quiyalue. ³¹Uri'ihua lubee bene tucu nú niarqui'hua nú ri'i beei luhua.

³²Tunu secatsiahua bee bene enu seca li'ihua, lecaxi sibi' nucua', xne hasta bee bene enu necha neca rri'i scua. ³³Nu tunu rri'i nze'catsiahua lubee bene enu rri'i nze'ca luhua, lecaxi sibi' nucua' xne hasta bee bene enu necha neca rri'i scua. ³⁴Tunu sana'tsiahua dimi lubee bene enu nzu arqui'hua nú ixiuca dimi'hua lecaxi zibi' nucua'. Xne hasta bee bene enu necha neca sana' beei dimi lubee bene enu nzu arqui'beei nú ixiuca dimi' beei. ³⁵Pero li'ihua rqui'ña nú zecahua bee bene enu rlee luhua, nu ri'i nze'cahua lubeei. Tsana'hua nú rnacu' beei nu la tsuquiehua nú liqui' beei xi liqui' beei luhua equie bee nucua'. Scua máse huaxi eluxene nú ati'hua liñibe nu le'ca scua acahua

lli'ñi Diose liñibe, xne li'inu le'ca rri'i nze'canu lubee bene enu ni' lle'na la dete' che'tsa lunu, cuna lubee bene enu necha necha. ³⁶Uhua'a arqui'hua bee bene tucu nú rua'a arqui' Diose Pa liñibe li'ihua.

La yala nú ze'ta bee bene sa'lla

(Mt. 7:1-5)

³⁷'La ze'tahua nu la ta'quiyahua bee bene eluquichia' para nú la ri'inu bee bene li'ihua scua. Uri'ihua perdona bee bene para nú le'ca ri'i Diose perdona li'ihua. ³⁸Ude'te'hua lubee bene lunú secala'cha' beei, nu Diose liqui'nu luhua lunú secala'cha'hua. Li'inu másela liqui'nu luhua lunú dete'hua. Xne li'inu liqui'nu luhua tucu nú dete'hua lubee bene.

³⁹Le'ca uni Jesuse lubeella:

—Li'ihua nediya'hua nú tucu bene enu niquie'lu leca modo nú chenala stucu bene enu le'ca niquie'lu, xne rucu beella nu' modo nú zana' beella tucu ichiu. ⁴⁰Ni' tucu enu sete' la acalla másela tucu nú reca ulaxcuela'lla, tunu riqui'lla la'xulla lunú sete'lla, che acalla tucu nú reca ulaxcuela'lla.

⁴¹'La ze'talu bee bene bee falta nú lle'natsia nú rri'i beei, mejora uyanutsia arqui' bee falta llene nú rri'ilu. ⁴²Nu tunu llenelá necha bee falta nú rri'ilu, ¿xa modo nilu lu bene nú la necha nze'ca nú rri'ibeei? iBene enu niquichia'! Rluti uri'i lunú riala nú ri'ilu, che nu' modo nilu lu bene nú la necha nze'ca nú rri'ibeei.

Equie cuenda' ndixi nú rayu lu aca esquie nu'lu bene xi acae

(Mt. 7:17-20; 12:33-35)

⁴³'Leca aca nze'ca nú ayu ndixi nú la zibi' lu, le'ca leca aca nú la zibi' nú

ayu ndixi nze'ca lu. ⁴⁴Cada aca nu'lu bee bene ndixi nú rayu lue. La ayu higo lu aca eche, le'ca la ayu uva lubee huañi dañi. ⁴⁵Bene nze'ca rni bee bedichia' nze'ca, xne nucua' necha nú nu' arqui'lla, nu bene enu necha necha rnilla bee bedichia' nú necha necha. Xne nucua' necha nú nu' arqui'lla. Xne hasta liñi arqui' bene xiu'u nú rnilla.

Ejemplu' chiucu simiendo

(Mt. 7:24-27)

⁴⁶'¿Xinu rnihua lua, “Detá, Detá” nu la ri'ihua tucu nú rnia? ⁴⁷Nia luhua xa necha bene enu nze'ta lua, nú riene'lla lunú rnia, nu sucu'lla stichia'a: ⁴⁸Li'lla necalla xi necha tucu bene enu ureche'e tucu ni'i. Rluti uda'ñilla aquíe lu yuu hasta nú uriñalla elu nu' quiee, che uquixiella uricu'lla simiendu lu quiee ze'e. Chenu ulaca huaxi inza mase uyu'e tsu' ni'i ze'e, pero ni' teme' lá cuñi ni'i ze'e, xne nchiucu' simiendu'e lu quiee. ⁴⁹Pero bene enu riene' lunú rnia nu la zucu'lla stichia'a, li'lla necalla xi necha tucu bene enu rreche' tucu ni'i nu la reche'lla simiendu'e. Chequie chenu ulaca huaxi inza nu uyu'e tsu' ni'i ze'e, hora ze'e uluquiee nu leca' modo nú acache' zecae.

Chenu uri'iyeca Jesuse moso' capitán romano

(Mt. 8:5-13)

7 Chenu ulaxu nú uni Jesuse lubee bene, chú nzanu eyeche Capernaum. ²Ze'e uhuañi tucu capitán romano, nu ulu'culla tucu moso'lla enu chiqui' secalla, nu riti moso' quie', nu steme'tsia rri'i nú atii. ³Chenu ubene' capitán ze'e lu cuenda' Jesuse, uxe'lalla chiucu

chuna bene uxu enu neca equie lubee bene Israel, para nú chábeella nu ziquiee beella lu Jesuse nú chanu ri'iyecanu moso' capitán ze'e. ⁴Uya bee benequie' elu nzu Jesuse nu chiqui' uziquiee beella lunu nú uni beella lunu:

—Riala nú ri'ilu elietsa lu Capitán quie'. ⁵Xne secalla bee bene Israel, nu le'ca uri'illa elietsa nú ungache' indua'ahua.

⁶Chequie nza Jesuse cuna li'ibeella, pero chenu nze riña beella axu ni'i capitán ze'e, uxe'lalla chiucu chuna bene enu rquiete'lla para nú ni beella lu Jesuse:

—Detá, Jesuse mase la riñalu hasta ru'u nia xne la neca equiea para nú chu'ulu nia. ⁷Enze'e lá niarquia nú achela'na li'ilu, pero unibiya'tsia hasta elu nzulu para nú yeca' mosoa. ⁸Xne le'ca sucua stichia' bee bene enu rnibiya' lua, nu le'ca sucu' bee sondadua stichia'a. Chenu nia lu tucui nú chai chu nzai, nu chenu nia lu stucui nú ye'tai chu nzetai, nu chenu nia lu mosoa nú xi ri'illa chu rri'illa lunú nia lulla.

⁹Chenu ubene' Jesuse nucua', chiqui' uyanu arqui'nu stichia' capitán ze'e, nu ubi'yanu lubee bene enu nzequie li'inu nu uninu lubeei:

—Nia luhua nú ni' eyeche Israel lasca' lllé tucu bene enu nzeli arqui' tucu nú nzeli arqui' benequie'.

¹⁰Chequie chenu ubenchila' bee bene enu uxe'la capitán ze'e ni'illa, ulañi' beella nú uyeca'la' moso'lla.

Uri'i Jesuse nú uhuañi zeca lliana' tucu una'a enu ungti niyu'

¹¹Cheela chu nza Jesuse cuna bee bene'nu cuna huaxilá bee bene tucu

eyeche nú lee Naín. ¹²Chenu uriñanu axu ru'u eyeche ze'e, ulañi'nu nú nze cachi' bee bene tucu bene nguti. Neca bene nguti quie' lliana' tucu una'a enu ungti niyu', nu tucu li'itsialla necalla lliana' una'a ze'e. Nu huaxi bee bene eyeche ze'e nzenulla nze cachi' beella lliana'lla.

¹³Chenu ulañi' Jesuse una'a cua', uhua'a arqui'nu li'illa nu uninu lulla: —La una'lu.

¹⁴Chequie uyabica Jesuse, nu uti'nu yanu tsu' camiya' bene nguti ze'e nu chu ucu'a'axe bee bene enu nuya' li'illa. Nu uni Jesuse lu bene nguti ze'e:

—Niyu e'ne', li'á nia lulu: ¡Uzeteel!

¹⁵Nu chu uzuculí bene nguti ze'e nu uquixiei nú rdichia'i. Nu chu udete' cuenda Jesuse li'i lu na'i.

¹⁶Chenu ulañi' bee bene ze'e nucua', ye beei ulliqui beei nu uquixie beei unibeei bedichia' nze'ca lu Diose, nú unibeei:

—Tucu profeta enu chiqui' reca uriña lua'ahua.

Le'ca unibeei:

—Uriñala Diose para nú ri'inu elietsa lubee bene'nu.

¹⁷Diqiu lu iliu Judea, cuna ye bee eyeche enza ze'e ungabiya' bee bene lunú uri'i Jesuse.

Uxe'la Juan Bautista chiucu bee bene'lla lu Jesuse

(Mt. 11:2-19)

¹⁸Ungabiya' Juan ye beenú unga scua, xne udixiule'e bee bene enu nzequie li'illa nucua' lulla. Chequie ubixia Juan chiucu bee bene'lla, ¹⁹nu uxe'lalla li'ibeei nú nedichia' beei lu Jesuse tunu li'inu necanu Cristo enu nzu nú nze'ta, urre

rqui'ña nú nzuquiee beella stucu enu rene. ²⁰Chequie bee bene enu uxe'la Juan uya beei elu nzu Jesuse nu unibeei lunu:

—Uxe'la Juan Bautista li'iru para nú nidichia'ru lulu tunu li'ilu necalu Cristo enu nzu nú nze'ta, urre nellua'aquieeru stucu enu rene.

²¹Hora ze'e uri'iyeca Jesuse huaxi bee bene enu riti, nu uhuano benechiqui' arqui' bee bene, le'ca uri'iyecanu i'culu huaxi bee bene enu niquie'lu. ²²Che uni Jesuse lubeei:

—Uquiahua nu udixiule'ehua lu Juan lunú ulañi'hua cuna lunú ubene'hua. Uni'hua lulla nú ri'yala bee bene enu niquie'lu, nu seela bee bene enu necuxu, nu le'ca uyeca'la' bee bene enu seca elichia nú lee lepra, nu riene'la bee bene enu nenguata', nu bee bene nguti uhuañi zeca, nu bee bene elitsi riene'la' beei bedichia' nze'ca' Diose para nú tsila'a beei. ²³iNu ñia nza lu cuenda' bee bene enu la tsana' arqui' nú nzeli arqui' li'á!

²⁴Chenu nzia bee bene enu uxe'la Juan, chu uquixie Jesuse nú uninu lubee bene equie cuenda' Juan, nu uninu lubeei:

—¿Ti rri'ihua beya' nú neca bene enu uyabi'yahua lu dañi achi elu la nucua'a bee bene? ¿Nzelí arqui'hua nú necalla xi neca tucu etaa nú rcuñi bi la? ²⁵Urre, ¿xa rnaa bene enu uyabi'yahua? ¿Necalla tucu bene enu nutu laquie fiñu la? Nediya'hua nú bee bene enu rutu laquie fiñu nehuañi nze'ca beella nu liñi bee ni'i nze'ca nucua'a beella.

²⁶Enze'e, ¿Ti uyabi'yahua che? ¿Tucu profeta la? Pero nia luhua, nú

li'ihua uyabi'yahua tucu bene enu másela neca equie lunú neca tucu profeta. ²⁷Juan Bautista quie' neca enu rni lu ichi' Stichia' Diose elu rni:

Xe'la tucu bene enu cha rluti lulu, para nú tsúche'lla inziu nú riñalu.

²⁸Nia luhua nú lu ye bee bene iliulabe,

lá chiu'u ni' tucu bene enu máse neca equie tucu nú neca equie Juan Bautista, pero añinzuca nú necane scua, bene enu lle'natsia neca equie elurnibiya' Diose, li'illa másela neca equiella luquela Juan.

²⁹Ye bee bene cuna bee enu rri'i cubre equie bee impuesto chenu ubene'beei lunú uni Juan, urinzalla li'ibeei, xne uri'ibeei beya' nú rri'i Diose tucu nú rialane, ³⁰pero bee fariseo cuna bee ulaxcuela enu reca ley' Moises, né zela beella nú arinza Juan li'ibeella, nu scua uhuachu beei lunú niarqui' Diose ri'inu li'ibeei. ³¹Che unilá Jesuse lubeei:

—¿Xa nia luhua nú xa neca bee bene enu nehuañi lu iliulabe quie' nee? ¿Ti neca tucu nú neca beei?

³²Nia luhua: Nú li'ibeei neca beei xi neca bee endu' enu rita ru'u i'ya nu rixiali beei lu sa'beei nú rnibeei: “Chenu unglaru chii para nú ye'ehua né ye'ehua. Nu chenu unglaru canción nú nehuaña se né una'hua.” ³³Scua necahua, xne ube'ta Juan Bautista nu li'illa la aculla pá, nú la hua'lla biñu, nu rnihua nú nchiñi benechiqui' arqui'lla. ³⁴Nee quie uriña li'á Bene enu uxe'la Diose, nú racua pá

nu rue'a biñu, nu rnihua nú racu xeta'a nu riu' arquia rua'a biñu nu rquietea bee bene enu rri'i dula cuna bee bene enu rri'i cubre equie bee impuesto. ³⁵Pero ye bee enu rri'i beya', li'ibeella nediya' beella nú neca nze'ca lunú rri'i Diose.

Chenu uya Jesuse ni'i Simón enu neca tucu fariseo

³⁶Tucu bee fariseo uzene' Jesuse nú chanu para nú acununu li'illa ni'lla, che uya Jesuse ni'lla nu uzucunu lu mexa, ³⁷chequie tucu una'a huexe enu nzucu eyeche ze'e, chenu ubene'nchu nú nze tacuxe Jesuse ni'i fariseo ze'e, che unguya'nchu tucu frasco perfume nú chiqui' huaxi seca. ³⁸Nu runa'nchu uzucunchu lu Jesuse, nu uquienchu cuchiu'nu cuna inza nú runa'nchu. Nu ucui'chinchu cuchiu'nu cuna ichia equienchu, nu chu utsuluru'nchu cuchiu'nu nu udu'nchu perfumee. ³⁹Chenu ulañi' fariseo ze'e nucua', uri'i elliebacu': "Tunu neli nú neca benequie' tucu profeta, ri'illa beya' ti neca una'a enu rti'ya li'illa nu xa nehuañinchu, xne necanchu tucu una'a enu rri'i dula." ⁴⁰Che uni Jesuse lu fariseo ze'e:

—Simón, nia tucu nú nia lulu.

Nu ucuaqui fariseo ze'e:

—Uni'i Maestro.

⁴¹Nu uni Jesuse lulla:

—Tucu bene utsana' dimi lu chiucu bene, tucu lu nze'e utsana'lla quiniento denario, nu lu stuculla utsana'lla cincuenta denario. ⁴²Pero rucu bee benequie' né ri'i beei ana aixiu beei dimi cua' lulla, che unilla lubeei nú la ixiaua'

beei dimi cua' lulla. Neequie uni'i, ¿Ta lu rucu bee benecua' máse seca li'illa?

⁴³Nu ucuaqui Simón:

—Pianu bene enu huaxilá nezi'qui lulla.

Nu uni Jesuse lulla:

—Scua necane.

⁴⁴Che ubi'ya Jesuse lu una'a ze'e, nu uninu lu Simón:

—Bi'yacuru una'a quie' chenu uriña ni'ilu né liqui'lu inza para nú quia cuchiu'a, pero una'a quie' uquie cuchiu'a cuna inza nú unguna'nchu nu ucui'chinchue cuna ichia equienchu. ⁴⁵Né tsuluru'ulu li'á, pero li'inchu desde nú uyu'a ca'a la tsuxenchi nú suluru'nchu cuchiu'a. ⁴⁶Né du'lu perfume equiea, pero li'inchu udu'nchu perfume cuchiu'a. ⁴⁷Enze'e nia lulu, equie nú chiqui' seca una'a quie' li'á, neca perdonala ye stulanchu. Pero bene enu si' nú la lu'cu huaxi dula, bene ze'e lle'natsia secalla li'á.

⁴⁸Nu chu uninu lu una'a ze'e:

—Uri'ilá perdona bee stulalu nee.

⁴⁹Chequie bee bene enu nucua' cuna li'inu ze'e, uquixie beei nú unidichia' beei lu sa'beei:

—¿Ti neca benequie', nú hasta bee dula rri'illa perdona?

⁵⁰Pero uni Jesuse lu una'a ze'e:

—Neca perdona bee stulalu, xne uchili arqui'lu li'á, uquia nze'ca nee.

Bee una'a enu uri'i elietsa lu Jesuse

8 Lulá bee nucua', uya Jesuse lu huaxi bee eyeche llene cuna lubee eyeche lla'na, uzete'nu nu udixiule'enu xa neca lunú rnibiya' Diose. Nu uyanunu ye

chi'chiucu bee bene'nu. ²Le'ca chiucu chuna bee una'a enu uhanu bee benechiqui' arqui' cuna bee enu uri'iyecanu bee elichia nú seca beenchu, uyabeenchu cuna li'ínu. Leta bee una'a cua' nchiñi María enu le'ca lee Magdalena, li'inchu necanchu enu uhanu achi benechiqui' arqui'. ³Le'ca uya Juana, una'a bene enu lee Chuza, nu Chuza quie' unga enu uri'iucu stene' arre Herodes, le'ca uya Susana cuna huaxilá bee una'a enu uri'i elietsa lunu cuna xitse lunú rlu'cu beenchu.

**Uni Jesuse ejemplu' tucu bene enu
nzetu' nii**

(Mt. 13:1-9; Mr. 4:1-9)

⁴Huaxi bee bene uchiu'u bee eyeche nu uyabi'ya beei Jesuse. Nu chenu uyetesa' huaxi bee bene lunu, che uninu tucu ejemplu lubeella:

⁵—Tucu bichia uchiu'u tucu niyu nze tu' nii lu yu'lla. Chenu rdu'lla nii lu yu'lla, uzana' lle'na ebichi inziu nu uta' bee bene equiee, nu chu udacu bee iñii. ⁶Lle'na ebichi uzana' leta quiee, chenu uliñi bee ebichi ze'e ubichi bee xne la nu' ucu luyuu ze'e. ⁷Lle'na ebichi ze'e uzana' leta bee eche, nu equiee nú tucutse uliñi bee uri'i bee huañi eche ana lu ebichi ze'e. ⁸Lle'na ebichi uzana' lu yuu nze'ca, chenu uru'cu ebichi quie', chiqui' unguyu'e, hasta tucu ayu'u ebichi unguyu' lu cada tucuae. Chenu uni Jesuse scua, che chiqui' juerte uninu lubeei:

—i'atse bene enu niarquiu' nú yene' lunú rnia, quie' diaca nze'e!

**Udixiule'e Jesuse xinu uninu bee
ejemplu**

(Mt. 13:10-17; Mr. 4:10-12)

⁹Chequie unidichia' bee bene' Jesuse lunu, xi rni ejemplu nú uninu. ¹⁰Nu uninu lubeella:
—Diose uliqui'la nú rri'ihua beya' nú a'chi neca lunú rnibiya'nu. Pero lu beela bee bene puro tsia bee ejemplu rnia lubeei, xne mase ri'ya beei, pero neca xi neca nú la lañi' beei, nu mase riene' beei pero la ri'i beei beya' nucua'.

**Chenu udixiule'e Jesuse xa neca
ejemplu nú uninu**

(Mt. 13:18-23; Mr. 4:13-20)

¹¹'Ninguie' neca nú rni ejemplu cua': Ebichi ze'e neca xi neca Stichia' Diose. ¹²Nu ebichi nú uzana' inziu neca xi neca bee bene enu riene' Stichia' Diose, pero chu nze'ta taxi beze'lu Stichia' Diose arqui'beei para nú la chilli arqui'beei Stichia' Diose, nu la tsila'a beei. ¹³Ebichi nú uzana' leta bee quiee neca xi neca bee bene enu riene' Stichia' Diose cuna nú ñia riucu arqui'beei, pero la tsuta' arqui'beei lue. Nzelí arqui'beei Stichia' Diose lle'na tiambu, pero chenu xitse rri'chia bee bene li'ibeei rtu' beei nu chu sana' arqui' beei Stichia' Diose. ¹⁴Ebichi nú uzana' leta huañi eche neca xi neca bee bene enu riene' Stichia' Diose, pero lle'naa lle'naa sana' arqui'beei stichia'nu, xne máse nzenu arqui'beei bee eluxene cuna beenú nu' lu iliulabe, scua la ri'i beei tucu nú niarquiu' Diose nú ri'i beei. ¹⁵Pero ebichi nú uzana' lu yuu

nze'ca neca xi neca bee bene enu riene' Stichia' Diose, nu nzequiee beella tucu nú rialane nu nzuta' arqui'beella lue, nu equie nú nzuta' arqui' beella scua, rri'i beella tucu nú niarqui' Diose.

Udixiule'e Jesuse ejemplu' quinqué

(Mt. 4:21-25)

¹⁶Lecati quie'e quii tucu quinqué nu tsacu'lla equiee urre tsullae liñi luna, rqui'ña nú quie quii nu zucune elu aya para nú du'llie'e lu ye bee bene enu chu'u ze'e. ¹⁷Le'ca scua, ni' tucu beenú a'chi neca la ya'na nucua' scuatsia, riña nú acachee ye bee nucua', nu ni' tucu beenú neca a'chi' la ya'na nucua' scuatsia riña nú acabiya' ye bee nucua'.

¹⁸Enze'e uquie'e diacahua, xne bee bene enu nzeli arqui' Diose tucu nú rialane, cada bichia máse nzuta' arqui'bee lu stichia'nu, pero bee bene enu la chili arqui' Stichia' Diose tucu nú rialane, riña bichia nú la chilia' arqui'bee li'inu.

Uni Jesuse nú ti neca xi neca na'nu cuna bichinu cuna zananu

(Mt. 12:46-50; Mr. 3:31-35)

¹⁹Chenu uya na' Jesuse cuna bee bichinu elu nzunu, nu né aca ariña beella hasta elu nzunu, xne nucua'a huaxi bee bene ze'e. ²⁰Che uya tucu bene enu udixiule'e lu Jesuse, nu unilla lunu:

—Na'lu cuna bee bichilu nucua'a beella eli'ya', nú niarqui' beella nú ni beella lulu.

²¹Che uni Jesuse lubee bene ze'e:

—Bee bene enu sucu' Stichia' Diose nu rri'i tucu nú riu' arqui'nu,

li'ibeella neca beella xi neca naa cuna bee bichia.

Chenu uzucu' bii cuna inzatu' nú uni Jesuse

(Mt. 8:23-27; Mr. 4:35-41)

²²Tucu bichia uyu'u Jesuse cuna bee bene'nu liñi barco, nu uninu lubeella:

—Chahua stucu chú inzatu' quie'.

Nu chu nzuebeella. ²³Diqui nú nze dete beella lu inzatu', uda'tse Jesuse, nu uquixie tucu bii juerte lu inzatu' ze'e. Che uquixie nú uyu'u inza liñi barco' beella hasta nú nze chatse'la barco' beella lu inzatu' ze'e. ²⁴Chequie uya cua'ñi beella Jesuse, nu unibeella lunu:

—iMaestro! iMaestro! iNze chatse'ahua lu inza quie'!

Che chu uzetee Jesuse, nu unibiya'nu lu bii cuna lu inzatu' nú aca xeene, nu chu ungaxe ye bee nucua', nu unga chii. ²⁵Chequie uni Jesuse lubee bene'nu:

—¿Cá nza nú nzeli arqui'hua li'á?

Pero li'ibeella chiqui' ulliqui beella, nu uyanu arqui'beella nu uquixie beella unidichia' beella lu sa'beella:

—¿Ti neca benecua' nú rnibiya'lla lu bii cuna lu inzatu' nu sucu' bee nucua' stichia'lla?

Chenu uhua Jesuse benechiqui' arqui' tucu bene eyeche Gadara

(Mt. 8:28-34; Mr. 5:1-20)

²⁶Che uriña beella stucu chú inzatu' Galilea, lu iliu Gadara.

²⁷Chenu uchiu'u Jesuse liñi barco uyabica tucu bene Gadara lunu. Necala huaxi tiambu nú nchiñi benechiqui' arqui' benecua', la

utua'i xucui nu la zucua'i ni'i, enzetsiai leta bee eluhua' bee bene nguti. ²⁸Chenu ulañi'i Jesuse, utsu lliqiii lunu nu urixialii nú uni:

—¿Xinu ri'chialu li'á Jesuse Lli'ñi Diose liñibe? Zequiaa lulu nú la ri'ilu nú nehuana zecaa.

²⁹Uni benecua' scua xne rnibiya'la Jesuse lu benechiqui' nú chiu'i arqui' bene ze'e. Huaxi bese una'tse benechiqui' ze'e li'i, nu ullica'cuu bee bene cadena yai cuna cuchiu'i para nú la chai ni' tucu bee luhuare, pero uchiecu'i cadena ze'e, nu rlua benechiqui' ze'e li'i bee luhuare elu la nucua'a bee bene.

³⁰Che unidichia' Jesuse lu niyu ze'e: —¿Ti leelu?

Nu ucuaquii:

—Legión lea.

Uni scua xne huaxi bee benechiqui' neca enu nchiñi arqui'i.

³¹Nu uziquiee bee benechiqui' ze'e lu Jesuse, nú la xe'lanu li'ibeei ebila. ³²Nu lunú nucua'a huaxi bee cuchi liñi dañi ze'e racu, che unacu' bee benechiqui' ze'e lu Jesuse nú chu'u beei arqui' bee cuchi ze'e, nu uzelanu. ³³Chequie uchiu'u bee benechiqui' arqui' bene ze'e nu uyu'u beei arqui' bee cuchi, nu uyecaxu'u beei nu utsundiqui beei ru'u quieelaa nu uzana' beei hasta lu inzatu' nu uni'chi chii beei lu inza ze'e, nu ungu' beei.

³⁴Bee bene enu rri'iu'cu bee cuchi ze'e chenu ulañi' beei lunú unga scua, uyecaxu'u beei nú nzetixiule'e beei lubee bene eyeche ze'e cuna lubee bene enu nucua'a dañi. ³⁵Che uchiu'u bee bene ze'e nu uyabi'ya beei lunú unga ze'e. Chenu uriña beei elu nzu Jesuse, ulañi' beei

bene enu uchiu'u bee benechiqui' arqui' nú nzucui tucu chú lu Jesuse, nu nutulai xucui nu uyecala'la'i lunú ulle'cai, che chiqui' ulliqui bee bene ze'e. ³⁶Nu bee bene enu ulañi' lunú unga ze'e, udixiule'e beei lunú xa uyecala' niyu enu ullutse bee benechiqui' arqui'. ³⁷Enze'e, ye bee bene lu iliu Gadara uquixie beei nú uziquie beei lu Jesuse para nú chiu'unu ze'e, xne chiqui' xiqui beei. Che uyu'u Jesuse liñi barco nu chu nzanu. ³⁸Ante nú chanu bene enu uchiu'u bee benechiqui' ze'e arqui', uzequie lu Jesuse nú chenu li'inu, pero uni Jesuse nú ya'nai, nu uninu lui:

³⁹—Ubenchila' ni'ilu, nu uquiatixiule'e luye nú uri'i Diose lulu.

Che chu nzai nu udixiule'i lu ye bee bene eyeche ze'e lunú uri'iyeca Jesuse li'i.

Chenu uri'iyeca Jesuse tucu una'a cuna endu' bene enu lee Jairo

(Mt. 9:18-26; Mr. 5:21-43)

⁴⁰Chenu ubenchila' zeca Jesuse stucu chú inzatu', chiqui' ñia nzu arqui' bee bene uya cha'calu beei li'inu, xne ye beei nucua'a quie beei li'inu. ⁴¹Chequie uriña tucu bene enu lee Jairo lu Jesuse, neca Jairo quie' enu rnibiya' liñi indu' bee bene Israel. Nu utsu lliquilla lu Jesuse nu uziquieella lunu para nú chanu ni'lla, ⁴²xne rlu'culla tucutsia endu'lla, nu nzanchu chi'chiucu lana, nu steme'tsia rri'i nú atinchu. Chenu nza Jesuse enza ni' Jairo nzequie huaxi bee bene li'inu, hasta nú uta'cu bee bene li'inu.

⁴³Leta bee bene ze'e nza tucu una'a enu riti, nu necala

chi'chiucu lana nú rluca rene li'lla, nu ula'xulalla ye bee stene'lla unguítilla nú uyaxu bee doctor, pero ni' tucu beei né ri'iyeca beei li'lla. ⁴⁴Che uyabica una'a quie' di'chi Jesuse nu uti'lla yalla ru'u xucunu, hora ze'e utsuxe nú rluca rene li'lla.

⁴⁵Nu unidichia' Jesuse lubee bene:

—¿Ti uti'ya li'á?

Nu uni yebee lunu nú né ti'ya beei li'ínu, che uni Pedro cuna beelá bee sa'lla lunu:

—Maestro, huaxi bee bene rta'cu lia'ahua nu chuquie' churquie si'ña beei lia'ahua, nu rnidichia'sca'lu:

“¿Nú ti uti'ya li'ilu?”

⁴⁶Pero uni Jesuse lubeella:

—Nu' enu uti'ya li'á, xne uri'á beya' nú uri'iyeca tucu enu uri'iyeca cuna nú reca.

⁴⁷Chenu uri'i una'a ze'e beya' nú uri'ínu beya', che chu uyabicalla nu recatse'tsella utsulliquilla lu Jesuse. Nu uxucu' dulalla luye bee bene xinu uti'yalla ru'u xucunu, cuna nú xa uyeca'lla. ⁴⁸Che uni Jesuse lulla:

—Xinchiu'cua equie nú uchili arqui'lu li'á enze'e uyeca'lu. Uquia'a nze'ca nee.

⁴⁹Rdichia'nusca' Jesuse una'a ze'e, chenu uri'ña tucu bee bene! Jairo nu unilla lu Jairo:

—Ungutila endu'lu. La ri'i xia'lu lu Maestro nee.

⁵⁰Pero chenu ubene' Jesuse nucua' uninu lu Jairo:

—La lliquilu, uchilitsia arqui'lu li'á yeca' endu'lu.

⁵¹Chequie chenu uri'ña Jesuse ni'i Jairo, lá zelanu nú achu'ununu beelá bee bene, yu'unutsianu

Pedro, cuna Jacobo, cuna Juan cuna pa'nchu cuna na'nchu liñi ni'i ze'e. ⁵²Ye bee bene runa', nu nehuana nzu arqui'beei equie cuenda'nchu, pero uni Jesuse lubei:

—La una'hua. Lá ati endu' quie', ra'tsetsianchu.

⁵³Pero ulli'chinu beei li'ínu, xne nediya' beei nú unguutilanchu.

⁵⁴Che chu una'tse Jesuse yanchu, nu juerte uninu lunchu:

—iEndu', uzetee!

⁵⁵Nu uhuañi zecanchu, nu hora ze'e uzeteenchu nu unibiya' Jesuse nú dete' beella nú acunchu.

⁵⁶Chequie chiqui' uyanu arqui' pa'nchu cuna na'nchu nucua'. Pero uni Jesuse lubeella nú la ixiule'e beella lu ni' tucu bee bene lunú ungae scua.

Uxe'la Jesuse chi'chiucu bee bene'nu nzetixiule'e xa neca lunú rnibiya' Diose

(Mt. 10:5-15; Mr. 6:7-13)

9 Uquiete'sa' Jesuse chi'chiucu bee bene'nu, nu udete'nu poder lubeella para nú hua beella ye clasia' bee benechiqui' arqui' bee bene cuna nú ri'iyeca beella bee bene enu riti. ²Uxe'lanu li'ibeella para nú ixiule'e beella xa neca lunú rnibiya' Diose, cuna nú ri'iyeca beella bee bene enu riti. ³Nu uninu lubeella:

—Lecaxi uya'hua para inziu, ni' xcagua ni' biti, ni' pá nu acuhua, ni' dimi, ni' xucuhua para nú che'ehua la uya'hua. ⁴Tatse ni'i bee bene elu riñahua, uya'natsiahua ni'i ze'e, hasta nú chiu'uhua eyeche ze'e. ⁵Nu tunu nu' tucu eyeche elu la zela

bene nú ya'nahua ni'lla, uchiu'uhua eyeche ze'e nu ri'quihua yuu be'cha' nú nu' cuchiu'hua xi neca tucu seña nú lá yucu arqui'beei Stichia' Diose.

⁶Chequie uchiu'u beella nu nzuebeella cada tucua eyeche udixiule'e beella bedichia' nze'ca' Diose lubee bene, nu uri'iyeca beella bee bene enu riti.

Ulle'ca Herodes nú uhuañi zeca Juan Bautista

(Mt. 14:1-12; Mr. 6:14-29)

⁷Chenu ubene' arre Herodes ye bee milagro nú rri'i Jesuse, la ri'illa beya' ti necanu. Xne nu' bee bene enu rni nú uhuañi zeca Juan Bautista. ⁸Nu nu' bee bene rni nú profeta Elías ulube'lu. Nu nu' bee bene rni nú necanu tucu bee profeta hua'tu enu uhuañi zeca. ⁹Pero uni Herodes:

—Li'á unibiya'a nú uru'u lluca equie Juan Bautista. ¿Ti benecua' nú rienea nú rri'illa huaxi bee milagro scua?

Nu chiqui' niarqui' Herodes nú lañi'lla Jesuse.

Udete' Jesuse nú udacu ayu' mili bee bene

(Mt. 14:13-21; Mr. 6:30-44; Jn. 6:1-14)

¹⁰Chenu ubenchila' bee apóstol' Jesuse, udixiule'e beella lunu beenú uri'i beella. Che unguya'nu beella tucu luhuare elu la nucua'a bee bene axu eyeche Betsaida. ¹¹Pero chenu uri'i bee bene beya', chu nzequie beei li'inu. Nu uya cha'calu Jesuse li'ibeei nu udixiule'enu lubeei xa neca nú rnibiya' Diose, nu uri'iyecanu bee bene enu riti.

¹²Chenu nze cheela, uyabica chi'chiucu bee bene' Jesuse lunu nu uni beella lunu:

—Uni' lubee benequie' nú yue beei para nú chetsulachi beei nu chéla'na beei nú acu beei lubee eyeche axu ca'a, xne elu nellua'ahua ca'a lecalí xinu'.

¹³Pero uni Jesuse lubeella:

—Li'ihua ude'tehua nú acubeei.

Nu ucuaqui beella lunu:

—Rlu'cutsiaru ayu' pá cuna chiucu bela. Mejora chatsia'ahua nú acu ye bee benequie'.

¹⁴Neca tucu ayu' mili bee niyu ze'e. Pero uni Jesuse lubee bene'nu:

—Uni'hua lubeei nú cua'a cincuenta cincuenta beei cada tucu luhuare.

¹⁵Scua uri'i beella, nu chu ucua'a ye bee bene ze'e. ¹⁶Chequie una'tse Jesuse ayu' pá ze'e cuna chiucu bela ze'e, nu ubi'yanu enza liñibe nu udete'nu che'tsa lu Diose, nu ule'enu bee pá ze'e cuna bee bela ze'e nu udete'nu nucua' lubee bene'nu para nú ritsi' beellae lubee bene ze'e. ¹⁷Ye bee bene ze'e udacu beei hasta nú ubela' beei. Chenu ulaxu nú udacu beei, uquietesa'sca' beella chi'chiucu llume bee pedaso bee pá le'e cuna bee bela lunú uya'na udacu beella.

Uni Pedro nú Jesuse neca Cristo enu uxe'la Diose

(Mt. 16:13-19; Mr. 8:27-29)

¹⁸Tucu bichia chenu unacu' li'itsia Jesuse lu Diose nzununu bee bene'nu ze'e. Che unidichia'nu lubeella:

—¿Ti rni bee bene nú necaa?

¹⁹Nu ucuaqui beella lunu:

—Nu' bee bene rni nú necalu Juan Bautista. Nu le'ca nu' bee bene rni nú necalu profeta Elías, nu le'ca nu'

bee bene rni nú necalu tucu bee profeta hua'tu enu uhuañi zeca.

²⁰Che uninu lubeella:

—¿Nu li'iquieehua ti rnihua nú necaa?

Nu ucuaqui Pedro lunu:

—Li'ilu necalu Cristo enu uxe'la Diose.

Udixiule'e Jesuse nú uti bee bene li'inu

(Mt. 16:20-28; Mr. 8:30-9:1)

²¹Pero uni Jesuse lubeella nú la ixiule'e beella nucua' lu ni' tucu bee bene. ²²Nu uninu lubeella:

—Li'á Bene enu uxe'la Diose chiqui' nehuana zecaa, nu lee bee usticia' bee bene Israel lua, cuna bee ule'ya enu rnibiya' lubee ule'ya, cuna bee ulaxcuela enu reca ley' Moisés, uti beei li'á, pero bichia rriuna huañi zecaa stucu bese.

²³Che uninu lu ye bee bene:

—Tunu nu' bee bene enu niarqui' nú aca benea, la yala nú ri'itsialla tucu nú necatsia elliebacu'lla. Nu ye bichia riqui'lla lubee nú xi zecalla equie nú necalla benea, nu chu ye'ta quieella li'á. ²⁴Xne bee bene enu másela niarqui' huañi lu iliulabe quie' enta bichia nú laxu nucua'. Pero bene enu ati equie nú necalla benea, lu'culla elunehuañi lu Diose. ²⁵Lecaxi zibi' nú ri'i bene ana ye beenú nu' lu iliulabe, tunu le'ca li'itsialla nze nitilulla li'illa.

²⁶Tunu nu' bene enu tu' li'á cuna stichia'a, le'ca li'á Bene enu uxe'la Diose tua li'illa chenu nzela nú necaa arre cuna lunú rnibiya' paa cuna lunú rnibiya' bee ángele'nu.

²⁷Ixiule'a luhua nu nu' bee bene enu nucua'a ca'a lá atisca', hasta

nú lañi' beei xa neca lunú rnibiya' Diose.

Ulube' Jesuse ellie'e nú rlu'cunu lu chuna bene'nu

(Mt. 17:1-8; Mr. 9:2-8)

²⁸Chenu udete xi neca tucu xmana nú uni Jesuse bee bedichia' cua', uyanu equie tucu dañi unacu'nu lu Diose, nu unguya'nu Pedro, cuna Jacobo, cuna Juan.

²⁹Pero diqui nú rnacu' Jesuse lu Diose uche'e xa rnaa lunu, nu chiqui' unga niquichiu xucunu nu tu'na rulu siqui'i. ³⁰Nu ulube'lu chiucu niyu enu rdichia'nu li'inu ze'e. Bee bene ze'e neca Moisés cuna Elías. ³¹Nu chiqui' rulu siqui' beella nu rdichia'nu beella Jesuse equie nú atinu nu nehuana zecanu eyeche Jerusalén. ³²Añinzuca nú chiqui' riu'u cala' lu Pedro cuna lubee sa'lla, pero né a'tse beella, nu ulañi' beella nú rulu siqui' Jesuse cuna rucu bene enu nzununu ze'e.

³³Chenu leca' rucu benecua' elu nzu Jesuse, uni Pedro lunu: —Maestro, ineca nze'ca nú nellua'ahua ca'a para nú reche'ru chuna ranchu, tucue para li'ilu nu stucue para Moisés, nu stucue para Elías!

Pero la ri'i Pedro beya' xinu rnilla scua. ³⁴Diqui nú rnilla scua, ulaca tucu xcabe nú utsacu' equie beella, nu ulliqui beella chenu nchiñi beella liñi xcabe ze'e. ³⁵Nu liñi xcabe ze'e uyene tucu chii enu uni:

—Benequie' neca Lli'ñia enu chiqui' se'ca, uzu'cu'hua stichia'nu.

³⁶Chenu ulaxu nú ubene' beella chi enu uni ze'e, ulañi' beella nú stucu li'i Jesuse nzunu ze'e nu né

nilí beella. Bee bichia ze'e ni' tucu leca tilu udixiule'e beella lunú ulañi' beella.

Chenu uhua Jesuse benechiqui' arqui' tucu endu'

(Mt. 17:14-21; Mr. 9:14-29)

³⁷Chenu uye'e lu yuu stucu bichia, nú ulaca beella equie dañi ze'e, huaxi bee bene uchiu'u uya cha'calu Jesuse. ³⁸Chequie tucu bene enu nze'ta leta bee bene ze'e urixialii nú uni:

—Maestro, ubi'yacuru endua, tucutsia li'i necai endua. ³⁹Nu nchiñi benechiqui' arqui' nu rri'i nze'e nú rixialii, nu secai ichia ziña nu xiu'u lliña ru'i, rti'qui benechiqui' cua' li'i nu la tsana' nucua' li'i. ⁴⁰Uzequieelá lubee bene'lu nú hua beella benechiqui' cua' arqui' endua, pero lá aca beella.

⁴¹Nu ucuaqui Jesuse nú uninu: —iCue'hua bee bene enu rlu'cu dula nú la chili arqui'hua li'á! ¿Se xala tiambu rqui'ña nú tsunua li'ihua nu xa riquilá li'ihua? Uteyuu endu'lu ca'a.

⁴²Pero chenu nzebica endu' ze'e lu Jesuse, utsi'qui benechiqui' li'i lu yuu nu ulle'ca zecai ichia ziña stucu bese, pero unibiya' Jesuse lu benechiqui' nú chiu'i arqui' endu' ze'e nu uri'iyecanu li'i, che udete' cuendanu li'i lu pa'i.

⁴³Ye bee bene enu nucua'a ze'e chiqui' uyanu arqui'bee chenu ulañi' beei lunú llene neca nú reca Diose.

Udixiule'e Jesuse bese rrucu nú uti bee bene li'inu

(Mt. 17:22-23; Mr. 9:30-32)

Diqui nú nzeno arqui'bee lunú rri'i Jesuse, uninu lubee bene'nu:

⁴⁴—Uquie'e nze'ca diacahua lunú nia luhua nu la zañi'hua nucua'. Li'á Bene enu uxe'la Diose dete' cuenda bee bene li'á lubee bene enu rnibiya'.

⁴⁵Pero lá ri'i bee bene'nu beya' lunú rninu, xne lasca' dete'nu nú rri'i beella beya', nu le'ca xiqui beella nedichia' beella lu Jesuse xi rni lunú uninu.

Ti mase neca equie

(Mt. 18:1-5; Mr. 9:33-37)

⁴⁶Chequie uquixie bee bene'nu nú rni beella lusa'beella nú tá beella neca enu máse neca equie. ⁴⁷Pero uri'i Jesuse beya' lunú xa rri'i beella elliebacu' nu una'tsenu tucu endu' utsunu elu nzunu, ⁴⁸nu uninu lubeella:

—Tatse bene enu ri'i elietsa lu endu' quie' equie cuenda' li'á, neca xi neca nú rri'i nze'e elietsa lua, nu tatse bee bene enu rri'i caso li'á, le'ca rri'i caso nze'e bene enu uxe'la li'á. Enze'e enu máse lecati neca letahua, neca nze'e enu máse neca equie.

Bene enu la ni cundra lia'ahua nzu nze'e chua'ahua

(Mr. 9:38-40)

⁴⁹Chequie uni Juan lunu: —Maestro, ulañi'ru tucu bene enu rlu'ca benechiqui' arqui' bee bene equie nú leelu, pero uniru lulla nu la ria'lla scua xne la acalla bene leta'ahua.

⁵⁰Pero uni Jesuse lubeella: —La cáhua nucua', xne enu la ri'i cundra lia'ahua nzu nze'e chu'ahua.

Uqui'ya' Jacobo cuna Juan uri'i Jesuse

⁵¹Chenu nze'ta riña bichia nú nzia Jesuse liñibe, che utsu naaqui

arqui'nu nu nzanu Jerusalén.

⁵²Uxe'lanu bee bene enu uriculu para nú chue beei tucu eyeche nú nchiucu' lu iliu Samaria para nú cua'na beei elu ya'na beella ze'e.

⁵³Pero lá zela bee bene eyeche ze'e aya'nanu eyeche ze'e, xne uri'i beei beya' nú nzanu Jerusalén. ⁵⁴Chenu ulañi' Juan cuna Jacobo nucua', che uni beella lunu:

—Detá Jesuse, ¿niarqui'lu nú nibiya'ahua nú laca quii enza liñibe para nú la'xue bee bene cua' tucu nú uri'i profeta Elías la?

⁵⁵Chequie ubi'ya Jesuse lubeella, nu uqui'ya' beella uri'inu nú uninu lubeella:

—¿Xie' la ri'ihua beya' nú lu beze'lu nze'ta nú rnihua scua la?

⁵⁶Xne li'á Bene enu uxe'la Diose, lá yela para nú ri'á nú ati bee bene, nzela para nú tsila'a li'ibeei lu dula. Che chu nzuebeella stucu eyeche.

**Bee bene enu niarqui' chequiee
Jesuse**

(Mt. 8:19-22)

⁵⁷Diqui nu nzuebeella inziu, uni tucu niyu lu Jesuse:

—Niarquia nu nzela quiea li'ililu catse elu nzalu.

⁵⁸Che ucuauqui Jesuse lui:

—Bee betsa rlu'cuí bee iliu'lu nú neca ni'í nu bee iñi rlu'cuí exlia'tse'í, pero li'á Bene enu uxe'la Diose ni' elu quiee nchiña' equiea la lucua.

⁵⁹Nu uni Jesuse lu stucu bene:

—Utequiee li'á.

Pero ucuauqui lunu:

—Uzela nú bi'ya paa hasta nú atinu nu che chu nzela quiea li'ililu.

⁶⁰Che uni Jesuse lui:

—Utsa'na pa'lu cuna bee bene enu neca xi neca bene enu ungu'ti, pero li'ililu uquia tixiule'e xa neca elurnibiya' Diose.

⁶¹Nu uni stucu bene lu Jesuse:

—Niarquia nú nzelanala li'ililu, pero rluti uzela nú nze tixiule'exua lubee benea.

⁶²Pero uni Jesuse lui:

—Bene enu nzene ya acaratu nu belletalla enza di'chilla, leca modo nú cha neli excu'lla. Le'ca esquie bee bene enu niarqui' nú ye'ta quiee li'á, tunu la che'e arqui'beella lunú xa nehuañi beella, leca modo nú aca beella bee bene' Diose.

**Chenu uxe'la Jesuse
setenta bee bene'nu**

10 Lulá bee nucua', ucañi Jesuse setenta bee bene'nu, nu uxe'lanu chiucua chiucua beella nú riculu beella lunu, nú chue beella lubee eyeche cuna lubee ranchu elu chanu. ²Nu uninu lubeella:

—Neli nú nucua'a huaxi bee bene enu niarqui' yene' Stichia' Diose, pero leca huaxi bee bene enu zete' li'ibeei. Enze'e una'cu'hua lu Diose para nú xe'lalánu bee bene enu zete' li'ibeei. ³Uquiahua, li'á xe'la li'ihua xi neca chenu nza bee sanchi leta bee bichiu. ⁴La uya'hua biti, nú nu' stene'hua ni' dimi, ni' steinza lucuhua nu la cua'a xehua lubee bene lu inziu. ⁵Chenu riñahua ni' i tucu bene, rluti uri'ihua saluda' bene ze'e nú nihua lulla: “Diose liqui' nú nzuxe arqui'hua.” ⁶Nu tunu ni' i ze'e nucua'a bee bene enu riala nú nzuxe arqui' ria'na nú nzuxecua' cuna bee bene ze'e che,

pero tunu la yala bee bene ni'i ze'e nucua', benchila' zeca nucua' cuna li'ihua. ⁷Uya'natsiahua ni'i ze'e, nu la ya'nahua ni'i por ni'i bee bene, udacuhua nu hue'hua lunú liqui' beella luhua, xne bee bene enu rri'i riña' rqui'ña nú aculla. ⁸Chenu riñahua tucu eyeche elu zela bee bene nú ria'nahua, udacuhua nú liqui' beei luhua, ⁹uriyecahua bee bene enu riti nucua'a ze'e, nu uni'hua lubeei: "Nze'ta riñala lunú rnibiya' Diose luhua." ¹⁰Pero tunu riñahua tucu eyeche elu la zela bee bene nú ria'nahua, uchiu'hua lu inziu nu nihua lubeei: ¹¹"iHasta yuu be'cha lachihua nú uquie cuchiu'ru uri'quiru xi neca tucu seña nú né yucu arqui'hua Stichia' Diose! Pero uri'ihua beya' nú nze'ta axula lunú rnibiya' Diose luhua." ¹²Nia luhua nú bichia nú laxu iliulabe, bee eyeche elu lá zela bee bene, nú aya'nahua, zeca beei castiya nú mase juerte, lunú zeca bee bene enu ucua'a eyeche Sodoma.

Bee eyeche nú la niarqui' bee bene chili arqui' stichia' Jesuse

(Mt. 11:20-24)

¹³iCue'hua bee bene eyeche Corazín! iNu cue'hua bee bene eyeche Betsaida! Xne tunu eyeche Tiro cuna eyeche Sidón aca bee milagro nú unga lachihua, xi tiambu achili arqui' bee bene ze'e Stichia' Diose, nu le'ca autu beei laquie natsa para nú lube' nú nehuana nzu arqui'beei nu aricu' beei tí equie beei xi neca seña nú uche'e arqui'beei lu stula beei. ¹⁴Pero bichia chenu laxu iliulabe, másela juerte castiya nú zecahua

lunú zeca bee bene eyeche Tiro cuna eyeche Sidón. ¹⁵Le'ca esquie li'ihua bee bene Capernaum, la ri'ihua elliebacu' nú riala chu'uhua liñibe xne li'ihua rialahua hasta elu mase aquíe rqui' ebila.

¹⁶Nu chu ubilyanu lubee bene'nu nu uninu:

—Bene enu rri'i caso lunú rnhua, rri'i bee nze'e caso li'á, nu bene enu rluachu li'ihua li'á rluachu nze'e, nu bene enu rluachu li'á rluachu nze'e Diose enu uxe'la li'á.

Ubenchila' zeca setenta bee bene' Jesuse enu uxe'lanu

¹⁷Chenu ubenchila' zeca setenta bee bene' Jesuse enu uxe'lanu lubee eyeche, chiqui' ñia nzu arqui'beella nu necachi uni beella lunu:

—iDetá, hasta bee benechiqui' sucu' stichia'ru chenu rniru lunú leelu!

¹⁸Nu uni Jesuse lubeella:

—Nelí'hua nucua', li'á ulaña nú xi neca chenu ria'la lee esquie uniti lunú rnibiya' beze'lu. ¹⁹Li'á uliquia lunú rnibiya'a luhua, para nú mase nú ta'hua equie bee be'la cuna equie bee nañi lliqui, nu le'ca para nú ri'ihua ana lunú rnibiya' beze'lu, nu lecaxi zecahua. ²⁰Pero la llila' arqui'hua nú sucu' bee benechiqui' stichia'hua, mejora ullila'hua nú nzucu ichila nú leehua lu ichi' liñibe.

Ñia nzu arqui' Jesuse

(Mt. 11:25-27; 13:16-17)

²¹Hora ze'e chiqui' ñia utsu arqui' Jesuse equie cuenda' Espíritu Santo, nu uninu:

—Paa li'ilu enu rnibiya' liñibe cuna lu iliulabe, zucu ayáa li'ilu xne

uzete'lu bee bene enu lecaxi reca lunú ucachi'lu lubee bene enu reca cuna lubee bene enu rri'i beya'. Paa scua ungae, xne scua riu' arqui'lu nú acane.

²²Uliqui'la Diose Pa liñibe ye nú nibiya'a lu ye beenú nu'. Lecati nediya' ti neca Jesucristo Lli'ñi Diose, Diose tsia nediya' nucua', le'ca tucutsia Jesucristo cuna bee bene enu nzeli arqui' li'inu nu'lu Diose.

²³Chequie ubi'yanu lubee bene'nu, nu uninu lu li'itsia beella:

—Ñia nza lu cuenda' bee bene enu rlañi' lunú rlañi'hua, ²⁴xne nia luhua nú huaxi bee profeta cuna bee arre uniarqui' beella nú lañi' beella lunú rlañi'hua, pero né lañi' beella nucua'. Nu uniarqui' beella nú yene' beella nú riene'hua pero né yene' beella nucua'.

Ejemplu' tucu bene nze'ca eyeche Samaria

²⁵Che utsuli tucu ulaxcuela enu reca ley' Moisés nu unilla lu Jesuse para nú ri'illa preo li'inu:

—Maestro, xi riala ri'á para nú lucua elunehuañi nú leca xunga laxu liñibe.

²⁶Nu ucuaqui Jesuse lulla:

—¿Xi rni ley' Moisés? ¿Nu xa rri'ilu beya' nú rni?

²⁷Chequie uni ulaxcuela ze'e, rni ley:

—“Uzeca li'inu enu neca Diose'lu diquinu' arqui'lu, cuna diquinu' lunú necalu, cuna diquinu' juerzalu, cuna diquinu' elliebacu'lu, nu uzeca bee bene tucu nú secalu li'ilu.”

²⁸Che uni Jesuse lulla:

—Ucuaqui nze'calu, tunu ri'ilu scua, lu'culu eluhuañil'flu liñibe.

²⁹Pero ulaxcuela ze'e niarqui'lla nú ya'na nze'calla lunú unidichia'lla lu Jesuse, che unilla lunu:

—¿Ta bene zecaa tucu nú se'ca li'á che?

³⁰Chequie uni Jesuse tucu ejemplu lulla:

—Tucu bene Israel uchiu'ulla eyeche Jerusalén nu nzalla eyeche Jericó, che una'tse bee huana' li'illa inziu nu udiñi' beei li'illa, nu ucachi' beei ye bee stene'lla hasta xuculla. Nu utsa'na beei li'illa xi neca tucu bene enu ungueti. ³¹Che ude te tucu ule'ya inziu ze'e, pero chenu ulañi' ule'ya ze'e nú nuxu bene ze'e, ude te chechulla nu chu nzalla. ³²Le'ca enza ze'e ude te tucu levita enu rri'i elietsa lubee ule'ya, nu chenu ulañi' levita cua' nú nuxu bene ze'e, ude te chechulla nu chu nzalla. ³³Chequie ude te tucu bene Samaria inziu ze'e, chenu ulañi'lla bene enu nuxu lu inziu ze'e, uhua'a arqui'lla bene ze'e.

³⁴Nu chu uyabicalla elu nuxu bene ze'e nu uri'illa remedio elu nedi'qui bene ze'e cuna aceite cuna biñu, nu ullica'cuulla elu nedi'qui bene ze'e cuna laquie. Nu chu uricu'lla bene ze'e equie burru'lla nu unguya'lla bene ze'e elu neca posada, ze'e ubi'yalla bene ze'e. ³⁵Chenu uye'e lu yuu stucu bichia nú rquiene bene Samaria nú nzi'alla, che udixiulla lu bene enu neca stene posada lunú seca chiucu bichia riña' bene nu unilla lu bene ze'e: “Ubi'ya benequie', tunu ri'ilu huaxilá gasto lu cuenda'lla, li'á ixigua nucua' chenu benchila' zecaa.”

³⁶Che uni Jesuse lu ulaxcuela enu reca ley' Moisés: ¿Taa lu chuna bee bene enu ude te lu inziu ze'e uzeca bene enu udiñi' bee huana'?

³⁷Nu ucuaqui ulaxcuela ze'e nú unilla:

—Bene enu uhua'a arqui' bene ze'e.

Che uni Jesuse lulla:

—Uquia nu scua uri'i lu stucu bee bene.

**Chenu uya Jesuse ni'i
Marta cuna María**

³⁸Diqui nú nze ri'i Jesuse seidu inziu'nu uriñanu tucu eyeche, ze'e uyanu ni'i tucu una'a enu lee Marta. ³⁹Marta quie' rlu'cunchu tucu belanchu enu lee María, nu uzucu María lu Jesuse para nú yene'nchu lunú rninu. ⁴⁰Pero Marta chiqui' rliala'nchu rri'inchu beenú rri'inchu, nu uyabicanchu lu Jesuse nu uninchu lunu:

—Detá, ¿Xie' la chenu arqui'lu nú tucutsia li'á utsa'na belaa ye bee riña' nú ri'á la? Ala' uni'i lunchu nú ri'inchu elietsaa.

⁴¹Nu ucuaqui Jesuse lunchu nú uninu:

—Marta, Marta, chiqui' nzenu arqui'lu lu huaxi bee riña'lu, ⁴²pero nu' tucu nú máse neca equie. Maria ucañi nú máse neca equie, nu lecati caa nucua' lunchu.

**Chenu uzete' Jesuse nú xa nacu' bee
bene lu Diose**

(Mt. 6:9-15; 7:7-11)

11 Tucu bese chenu rnacu' Jesuse lu Diose tucu luhuare, nu chenu ulaxu nú unacu'nu lu Diose, tucu bee bene'nu uni lunu:

—Detá Jesuse, uze'te' li'iru xa nacu'ru lu Diose, tucu nú uzete' Juan Bautista bee bene, enu uyaquie li'illa.

²Che uni Jesuse lubeella:
—Chenu nacu'hua lu Diose uni'hua:

Pa'ru Diose, li'ilu enu nzucu liñibe,
chiqui' riala nú lu'curu ula'na lunú leelu.

Nu ye'ta lunú rnibiya'lu luru.
Aca lunú riu' arqui'lu lu iliulabe quie' tucu nú reca liñibe.

³Uli'qui' nú da'curu ye bichia.

⁴Uri' perdona stularu,
xne li'iru le'ca rri'iru perdona
bee bene enu rri'i nú necha neca luru.

La tsana'lu li'iru nú ri'iru dula,
uri'i elietsa luru para nú la ri'iru ye beenú necha neca.

⁵Le'ca uni Jesuse lubeella:

—Te zucua'ahua tunu tucuhua rlu'cu tucu bene enu rquiete'hua, nu riña nze'e ulela' rula' ni'hua nu ni nze'e: “Ala' zelalu utsana' chuna pá chenua, ⁶xne uriña inza tucu bene enu rquietea nia, nu nze'talla enza istu nu lecalí xi lucua detea aculla.” ⁷Nu cuaqui bene ze'e liñi ni'lla nú nilla: “La ri'ixi'ilu lua nacu'la nia, ra'tselá nu ra'tsela bee endua leca modo nú zetea para nú biquia lunú rnacu'lu.” ⁸Pero nia luhua, añinzuca nú la zeteella para nú dete'lla lunú rnacu' bene enu rquiete'lla, pero ri'illa juerza nú zeteella para nú dete'lla ye nú secala'cha' bene ze'e para nú la ri'ixia' nze'e lulla. ⁹Enze'e nia luhua: Una'cuhua lu Diose che liqui'nu luhua lunú rnacu'hua. Ula'nahua li'inu, che llela'hua li'inu. Uziquieehua lunu nu una'cuhua

lunu che ri'i casonu li'ihua. ¹⁰Xne bene enu rnacu' nú rnacu' lunu riucu nze'ene, nu enu rla'nae xela' nze'ene, nu enu siquiee nu rnacu' lunu rri'inu caso nze'e.

¹¹'Tunu nu'hua enu neca paa, ¿Xie' dete'hua tucu quiee lu endu'hua chenu rnacu' nze'e pá la? ¿Urre xie' dete'hua tucu be'la lu nze'e chenu rnacu' nze'e beela la? ¹²¿Urre xie' dete'hua tucu alacrán chenu rnacu' nze'e tucu artabechiu la? ¹³Tunu li'ihua enu necha rri'i, recahua rdete'hua beenú neca nze'ca lubee lli'ñihua, iPero másela rliqui' Pa'ahua enu nzucu liñibe Espiritu Santo lubee bene enu rnacu' lunu!

Uni bee bene nú rlu'cu Jesuse lunú rnibiya' beze'lu

(Mt. 12:22-30; Mr. 3:19-27)

¹⁴Chenu ulua Jesuse benechiqui' enu uri'i nú lá nia' tucu bene, nu chenu uchiu'u benechiqui' cua' arqui' bene ze'e, uquixie nú rnilla. Che chiqui' uyanu arqui' bee bene nucua', ¹⁵pero nu' bee bene enu uni:

—Benequie' rlua benechiqui' arqui' bee bene cuna lunú rnibiya' beze'lu enu rnibiya' lubee benechiqui'.

¹⁶Stucu beei unacu' tucu milagro liñibe lunu para nú ri'i beei beya' tunu neli nú Diose uxe'la li'inu.

¹⁷Pero li'inu nediya'la'nu xi rri'i beei elliebacu' nu uninu lubeei:

—Tatse bee gobierno enu la neca tucu necatse rle' sa'beei, le'ca esquie bee bene tucu ni'i tunu la neca tucu necatse beei rle' sa'beei. ¹⁸Le'ca esquie tunu le'ca li'i beze'lu ri'i condrai bee benechiqui', ¿xa di'ya nú rnibiya'i che? Rnia

nucua' luhua, xne rnihua nú rluua benechiqui' arqui' bee bene cuna lunú reca beze'lu. ¹⁹Pero tunu scua necane, ¿ti rliqui' lunú reca bee bene'hua rlua beella benechiqui' arqui' bee bene che? Nia luhua nú le'ca li'ibeella rni beella nú necha rri'ihua elliebacu'. ²⁰Xne li'á rlua bee benechiqui' arqui' bee bene equie nú reca Diose, nucua' rlube' nú nzula lunú rnibiya' Diose cuna li'ihua.

²¹'Tucu bene enu naaqui nu rlu'culla nú acanu' li'illa para nú ri'iuculla ni'lla, leca modo nú cachi' bee bene stene'lla. ²²Pero tunu nze'ta stucu bene enu naaquilá lulla, che ri'i nze'e ana lulla nu axi nze'e lunú rlu'culla, nú rri'illa elliebacu' nú acanu' li'illa, nu le'ca axi nze'e ye bee stene'lla.

²³'Bene enu la nzu chua rri'i condra nze'e li'á, nu bene enu ri'i nú la quiete' bee bene li'á, rri'i nze'e nú rle'e sa' bee bene.

Xa rri'i bee benechiqui' chenu rebenchila' zecai arqui' bee bene

(Mt. 12:43-45)

²⁴'Chenu xiu'u tucu benechiqui' arqui' tucu bene, enzei bee luhuare elu nebichi rla'nai elu tsulachii. Nu chenu la llela'i elu tsulachii, che rri'i elliebacu': "Mejora benchila' zecaa elu uchiu'a." ²⁵Nu chenu benchila' zecai, llela'i arqui' bene elu uchiu'i xi neca liñi tucu ni'i nú nelucu' nu rnaa nze'cae. ²⁶Chequie nze tucui se achi benechiqui' enu másela necha rri'i luquela li'i, nu chu'u ye beei arqui' bene ze'e. Che masesca'lá necha aca bene ze'e lunú necalla hua'tu

Lunú neli rri'i nú ñia nzu arqui' bene

²⁷Diqui nú rni Jesuse bedichia' cua', leta bee bene ze'e ubixialí tucu una'a nu unilla:

—iÑia nza lu cuenda' una'a enu ullaana li'ilu nu uri'i ru'cu li'ilu!

²⁸Pero ucuaqui Jesuse nú uninu: —iMaselá ñia neca lu cuenda' bee bene enu riene' Stichia' Diose nu sucu' nú rninu!

Bee bene enu necha rri'i unacu' tucu milagro lu Jesuse

(Mt. 12:38-42; Mr. 8:12)

²⁹Ulla'ca'la huaxi bee bene elu nzu Jesuse, nu uquixienu uninu lubeei:

—Bee bene enu nucua'a lu iliulabe quie' necha rri'i beei nu rnacu' beei tucu milagro lua, pero la ria'a ni'tucu milagro lubeei, xne nediya'la'beei milagro nú unga lu profeta Jonás. ³⁰Tucu nú unga Jonás tucu seña lubee bene Nínive, le'ca scua li'á Bene enu uxe'la Diose aca tucu seña lubee bene enu nucua'a nee. ³¹Bichia chenu laxu iliulabe, chenu hualu Diose lu cuenda' bee bene, chequie una'a enu unibiya' lu iliu nú lee sabá huañi zecalla nu nilla nú riala bee bene enu nucua'a nee castiya nú dete' Diose. Xne li'illa uchiu'ulla enza istu, nu ube'talla para nú ubene'lla lunú reca arre Salomón. Nu li'á Jesuse enu nzu cuna li'ihua, másela neca equia luquela arre Salomón. ³²Le'ca huañi zeca bee bene enu ucua'a eyeche Nínive bichia chenu laxu iliulabe, chenu hualu Diose lu cuenda' bee bene enu nehuañi nee, nu ni bee bene

Nínive nú bee bene enu nehuañi nee riala beei castiya nú dete' Diose. Xne bee bene eyeche Nínive uzucu'beei nú uni Jonás chenu unilla lubeei nú huañi beei tucu nú niarqui' Diose. Nu li'á Jesuse enu nzu cuna li'ihua másela neca equiea luquela Jonás.

Tucu ejemplu' ellie'e

(Mt. 5:15; 6:22-23)

³³Lecati quie'e quii tucu quinqué nu tsullae elu a'chi', urre tsacu'lla tucu caja equiee. Pero zucune elu ayaa para nú du' llie'e lubee bene enu chu'u ze'e. ³⁴I'culua'ahua neca xi neca ellie'e lu cuerpo'ahua, tunu rria'ahua lunú neca nze'ca diqui cuerpo'ahua nu' ellie'e. Nu tunu rri'ahua nú necha neca, diqui cuerpo'ahua neca xi neca tucu elu natsacabe. ³⁵Ubi'ya li'ilu para nú la chenu i'cululu li'ilu inziu nú necha neca. ³⁶Tunu la ri'i cuerpo'ahua ni' teme' nú necha neca, che neca cuerpo'ahua xi neca tucu qui' quinqué nú rdu'llie'e.

Uni Jesuse nu bee fariseo cuna bee ulaxcuela enu reca ley' Moisés necha rri'i beei

(Mt. 23:1-36; Mr. 12:38-40; Lc. 20:45-47)

³⁷Chenu ulaxu nú uni Jesuse lubeei, tucu fariseo uzene' Jesuse para nú chanu acununui eta ni'i. Chenu uyu'unu liñi ni'i chu uzucunu lu mexa. ³⁸Nu chiqui' uyanu arqui' fariseo ze'e nú ne naa Jesuse ante nú acunu tucu nú neca costumbre' beei. ³⁹Pero uni Jesuse lui:

—Li'ihua necahua xi neca bee vaso cuna bee pliato nú neyequie

di'chi, xne rlube' nú neca nze'cahua di'chiquie pero liñirquie nu' nú necha neca nu ncahua huana'.

⁴⁰ ¡Chiqui' nziti arqui'hua! ¿Xie' la ri'ihua beya' nú le'ca li'i Diose enu ureche' be'la'hua ureche' arqui'hua la? ⁴¹ Uri'ihua elietsa lubee bene enu lecalí xi lu'cu, para nú scua lube' nú neli nze'cahua.

⁴² ¡Cue'hua bee fariseo!, li'ihua rdete'hua diezmo bee huañi nú neca menta, cuna rruda nu ye nú racu bee bene. Rdete'hua nucua' lu Diose tucu nú rnibiya' ley nú riala ri'ihua, pero la ri'ihua tucu nú neli neca lubee bene, nu la ri'i casohua eluseca' Diose. Uri'ihua caso elu seca'nu nu la tsana'hua nú dete'hua lunú rdete'hua lunu.

⁴³ ¡Cue'hua bee fariseo!, xne riu' arqui'hua sucuhua liñi indu lu xleta elu sucu bee bene enu mase neca equie, nu riu' arqui'hua nú chiqui' lu'cu bee bene ula'na luhua ante huaxi bee bene.

⁴⁴ ¡Cue'hua bee ulaxcuela enu reca ley' Moisés cuna bee fariseo, xne la ri'ihua tucu nú rnihua! Li'ihua ncahua xi neca bee eluhua nú la lañi' bee bene, nu la ri'i beei beya' chenu rta' beei equie bee eluhua ze'e.

⁴⁵ Nu ucuaqui tucu ulaxcuela enu reca ley' Moisés nú uni:

—Maestro, chenu rnilu bee bedichia' cua' le'ca nuu luru rnilu scua la.

⁴⁶ Pero uni Jesuse lubei:
—¡Le'ca cue'hua bee ulaxcuela enu reca ley' Moisés! Xne rnibiya'hua nú ri'i bee bene lunú neriaña' ri'i beei, nu ni' teme' la niarqui'hua ri'ihua elietsa lubei para nú ri'i beei tucu nú niarqui'hua.

⁴⁷ ¡Cue'hua! Xne suche'hua equie bee eluhua' bee profeta enu unguuti bee bene'hua hua'tu. ⁴⁸ Scua rri'i bee bene beya' nú neca tucu necatsehua lunú uri'i bee bene'hua hua'tu. Li'ibeei unguuti beei bee profeta ze'e, nu li'ihua ureche' nze'cahua equie bee eluhua' beella.

⁴⁹ Enze'e equie nú reca Diose uninu: “Li'á xe'la bee profeta cuna bee apóstoles, nu úti bee bene texcua'a beella, nu ri'i condra bee bene téxcua'a beella.”

⁵⁰ Chequie bee bene enu nehuañi nee, dete' Diose castiya li'ibeei equie cuenda' rene' bee profeta nú uri'chia hasta chenu uquixie iliulabe. ⁵¹ Hasta rene' Abel nu hasta rene' Zacarías enu unguuti beei labe eli'ya' indu llene Jerusalén. Nia luhua nú bee bene enu nehuañi nee, li'ibeei ixiu beei equie nú unguuti bee bene' beei bee benecua'.

⁵² ¡Cue'hua bee ulaxcuela enu reca ley' Moisés!, xne la zelahua nú ri'i bee bene beya' xa riala ri'i beei para nú aca beei bee bene' Diose, nu ni' li'ihua la ri'ihua nú acahua bee bene' Diose, nu rcahua nú aca bee bene enu niarqui' nú aca bee bene' Diose.

⁵³ Chenu uni Jesuse bee bedichia' cua', bee ulaxcuela enu reca ley' Moisés cuna bee fariseo chiqui' ulee beei lunu, nu uquixie beei unidichia' beei huaxi nú unidichia' beei lunu. ⁵⁴ Uri'i beei preo li'inu para nú llela' beei tucu nú ricu'quiya beei li'inu.

Uzete' Jesuse nú la neca nze'ca nú aca niquichia' bee bene

12 Diquila nú nucua'a beella esquie uyetesa' huaxi mili bee bene ze'e, nu equie nú huaxi beei rta'cu sa'beei. Chequie uquixie Jesuse uninu rluti lubee bene'nu:

—Ubi'yahua li'ihua lu levadura' bee fariseo, rni nucua' nú ubi'yahua li'ihua xne la ri'i beei tucu nú rnibeei. ²Xne ni' tucu nú a'chi neca la ya'na nucua' scuatsia, riña nú acachee ye bee nucua', nu ni' tucu beenú a'chi neca la ya'na nucua' scuatsia, riña nú acabiya' ye bene nucua'. ³Enze'e ye bee bedichia' nú unihua elu necabe nzu, yene' bee bene bee bedichia' cua' lu ellie'e, nu bee bedichia' nú a'chi' unihua liñi ni'ihua, nu' bene enu bixialí bedichia' cua' ante lu ye bee bene.

Ti rqui'ña nú lliqui bee bene

(Mt. 10:26-31)

⁴Li'ihua bee bene enu rquietea, nia luhua nú la lliquihua bee bene enu niarqui' nú uti li'ihua. Xne titse bee bene nu' modo nú uti cuerpo'hua, pero espíritu'hua lecati ri'chia ⁵Pero nia luhua nú ti rqui'ña nú lliquihua: Ulliquihua Diose, xne li'inu rlu'cunu nú rnibiya'nu nu chenu uyuculanu nú nehuañihua, li'inu recanu xe'lanu espíritu'hua ebila. Enze'e ulliquihua li'inu.

⁶Li'ihua nediya'hua nú bee iñi enu rcuecu' la zeca bee' huaxi, pero Diose la zañi' ni' tucu bee'. ⁷Nu li'ihua hasta ye bee ichia equiehua nebacu' Diose. Enze'e la lliquihua, xne másela secagua lunú seca huaxi bee iñi.

Bee bene enu la tsacu' arqui' nú neca bene' Jesuse

(Mt. 10:32-33; 12:32; 10:19-20)

⁸Li'á nia luhua nú titse bene enu ni lubee bene nú necalla benea, le'ca esquie li'á Bene enu uxe'la Diose nia lubee ángele'nu nú

necalla benea. ⁹Pero bene enu ni lubee bene nú la acalla benea, le'ca esquie li'á nia lubee ángele' Diose nú la necalla benea.

¹⁰Nu' perdona' titse bene enu ni condra li'á Bene enu uxe'la Diose, pero bene enu ni condra lu Espíritu Santo. Leca' perdona para bene ze'e.

¹¹Chenu uya' bee bene li'ihua liñi bee indu, urre lubee juece, urre lubee usticia, la chenu arqui'hua xa cuaquihua lubeella cuna nú xa nihua. ¹²Xne chenu riña hora nú nihua, Espíritu Santo neca enu du' arqui'hua xanihua.

Equie cuenda' eluxene

¹³Tucu bene enu nza leta bee bene ze'e uni lu Jesuse:

—Maestro, uni' lu bichiaa nú liqui'i rencia nú rialaa.

¹⁴Nu ucuaqui Jesuse lui:

—Niyu, ¿ti uni lulu nú neca juece urre tucu enu ritsi' bee stene'hua?

¹⁵Le'ca uninu lubeei:

—Ubi'yahua li'ihua para nú la le'hua eluxene nú la lu'cuhua, xne lecaxi zibi' eluxene nú rlu'cu bee bene, nu bee eluxene cua' la neca nucua' nú liqui' nú nehuañi bee bene.

¹⁶Chequie uni Jesuse tucu ejemplu lubeei:

—Uhuañi tucu bene xene, nu chiqui' unguyu' nú unguyu' lu yu'lla. ¹⁷Nu uquixie uri'lla elliebacu' nú rnilla: “¿Xa ri'á nee? La lucua elu duche'a ula'cua.” ¹⁸Che unilla: “Nediyalá xa ri'á, chila bee ni'i elu rduche'a bee ula'cua, nu reche'a bee ni'i nú llenelá. Ze'e duche'a bee ula'cua cuna ye beenú rlu'cua. ¹⁹Nu nia lu le'catsia li'á:

Nee sí rlu'culu huaxi ula'cu para huaxi lana, utsulachi nu udacu nu uhue' nu ñia utsu arqui'lu.” ²⁰ Pero uni Diose lulla: “Niyu chiqui' netundulu, nee rula' quie' atilu, nu beenú nu'che'elu, ¿ti ya'nanu beec nucua' che?” ²¹ Scua seca bene enu rduche' eluxene' para li'itsia, pero lu Diose lecaxi lu'culla.

Rriucu Diose bee bene'nu

(Mt. 6:25-34)

²² Che uni Jesuse lubee bene'nu: —Li'á nia luhua, nú la chenu arqui'hua nú xi acuhua para nú nze nehuañihua, le'ca la chenu arqui'hua nú xi utuhua. ²³ Nú nehuañi bene máse seca lunú racu bene, nu cuerpo' bene máse seca lu xucu bene. ²⁴ Ubi'yacuruhua bee bieca. La du' beel' nii nu la quiete' sa'beel' ula'cu, nu la lu'cu beel' elu chuche' ula'cu' beel', pero Diose lia rdete' nú racu beel'. Enzaláquie' li'ihua másela secagua lunú seca bee iñi. ²⁵ Nu le'ca, ¿xie' equie' nú tematsia chenu arqui' bene nú xeelá huañilla la? ²⁶ Nu tunu ni' nucua' la aca bene ri'illa, ¿xiquie' nú nzenu arqui' bene equie' nú xi aculla cuna beelá beenú xa nze nehuañilla che?

²⁷ Ubi'yacuruhua xa rru'cu bee quie' dañi, la ri'i bee riña', nu la reche' bee laquie. Pero ni' arre Salomón lá tsuche'lla tucu nú nzuche' bee quie' añinzuca nú chiqui' utsuche'ella. ²⁸ Enze'e, tunu bee huañi dañi suche' Diose nee, nu ye'e tsia nzula nu chiquine, ienza láquie' li'ihua nú la liqui'nu lunú utuhua, bene enu lle'na tsia nzeli arqui' Diose bee lee! ²⁹ Enze'e la chenzehua nu la chenu arqui'hua

nú xi acuhua cuna nú xi hue'hua. ³⁰ Xne bee bene enu la chili arqui' Diose, li'ibeei neca beei enu nzenu arqui' bee nucua'. Pero li'ihua rlu'cuhua tucu pa'hua enu nzucu liñibe, nu li'inu nediya'la'nu lunú secala'cha'hua. ³¹ Pero uzelahua nú nibiya' Diose luhua che liqui'nu ye beenú secala'cha'hua.

Equie cuenda' eluxene liñibe

(Mt. 6:19-21)

³² Bee benea, la lliquihua laca huaxihua, pero Pa'ahua Diose ñia nzu arqui'nu liqui'nu lunú rnibiya'nu luhua. ³³ Utihua lunú rlu'cuhua, nu uri'ihua elietsa lubee bene enu seca elitsi. Ucu'a'nahua nú ri'ihua ana eluxene liñibe nú leca xunga laxu, elu la chu'huana' ni' bee belala'. ³⁴ Xne elu nu'che'e eluxene'hua ze'letsia nzu elliebacu'hua.

Rqui'ña nú cua'a tsiña bee bene

³⁵ Ucu'a tsiñahua, nu uri'ihua tucu nú riala ri'ihua. ³⁶ Uri'ihua tucu nú rri'i bee moso' enu nucua'aquiee chenu benchila' patron'beei, nú nzalla lu tucu tsa'la para nú chu xa'la beei ru'u puerta chenu chichilla ru'u puerta. ³⁷ Ñia neca lu cuenda' bee moso' enu nucua'a naa nu nucua'a quiee nú benchila' patron' beei. Xne nia luhua nú le'ca li'i patron' beei cua'a li'ibeei lu mexa nu chu che'ella xuculla para nú dete'lla nú acu beei. ³⁸ Ñia neca lu cuenda' beei tunu lluna' patron' beei li'ibeei nú nucua'a naa beei, mase nú riñalla ulela' rula' urre riñalla elliecabee. ³⁹ Le'ca uri'ihua beya', tunu nediya'

tucu bene nú xiura riña huana'
ni'illa, la zelalla nú chu'u huana'
ze'e cachi' bee stene'lla. ⁴⁰Le'ca
ucua'a tsiñahua xne li'á Bene enu
uxe'la Diose, riñaa chenu la ri'ihua
elliebacu' nú riñaa.

**Equie cuenda' bene enu sa'alu
stichia' cuna bene enu la tsa'alu
stichia'**

(Mt. 24:45-51)

⁴¹Chequie unidichia' Pedro lu
Jesuse nú unilla:

—¿Unilu ejemplu cua' lu li'tsiaru
la? u ¿Unilu nucua' lu ye bee bene
la?

⁴²Nu uni Jesuse:

—Unia ejemplu cua' lu titse bene
enu sa'alu stichia' nu rri'illa tucu
nú rialane. Tucu nú rri'i tucu
moso' enu ria'nanuu ni'i patron'
para nú dete'lla nú acu beelá bee
moso' chenu riña hora nú acu
bee nze'e. ⁴³Ñia neca lu cuenda'
moso' enu rri'i tucu nú rialane
chenu riña zeca patron'lla. ⁴⁴Xne
nia luhua nú tsa'na patrón ze'e ye
bee stene'lla para nú ya'na cuenda'
moso' ze'e bee nucua'. ⁴⁵Pero tunu
ri'i moso' ze'e elliebacu' nú rle'lá
nú riña patrón'lla, che quixiella
nú xitserinulla beelá bee moso'
cuna bee criada. Nu quixiella
nú acutsialla cuna nú hue'tsialla
hasta nú lluchi'lla, ⁴⁶chequie riña
patrón'lla tucu bichia nú la zucu'lla,
nú riña patron ze'e tucu hora nú la
ri'lla beya'. Che chiqui' juerte dete'
patrón ze'e castiya li'illa, nu xe'la
patron ze'e li'illa elu riala bee bene
enu la zucu' nú rni bee bene.

⁴⁷Xne moso' enu nediya' nú xa
niarqui' patrón'lla nú ri'illa pero

la tsu tsiñalla, nu le'ca la zucu'lla
stichia' patrón'lla, li'illa rialalla
castiya nú chiqui' juerte. ⁴⁸Pero
moso' enu la ri'i beya' xa niarqui'
patrón' nú ri'i, nu rri'illa tucu nú
yalalla castiya'lla, zecalla castiya'lla
pero menola. Enze'e bene enu lia
udete' Diose huaxi lunú recalla,
rqui'ña nú máse ri'illa lunú udete'
Diose lunú recalla. Le'ca esquie
bene enu lia udete' Diose nú rnibiya'
rqui'ña nú máse ri'illa equie nú
udete' Diose nu rnibiya'lla.

**Rle'esa' bee bene equie cuenda'
Jesuse**

(Mt. 10:34-36)

⁴⁹Li'á nzela lu iliulabe xi neca tucu
quii, nu ala' recala lunú nzu nú aca.
⁵⁰Nze'ta nú chiqui' nehuana zecaa
nu nzula nú zeca scua, inu desde nee
chiqui' nehuana nzu arquia hasta
nú yalu ye bee nucua'! ⁵¹La ri'ihua
elliebacu' nú tia uriña lu iliulabe
para nú ri'á nú aca tucunecatse
arqui' bee bene lu sa' beei. Xne
equie nú chili arqui' bee bene li'á
le'e sa' bee bene cuna bee bene enu
la chili arqui' li'á. ⁵²Xne desde nee
elu nucua'a ayu' bene liñi tucu ni'i,
liunu chunalla cuna chiuculla, nu
liunu chiuculla cuna chunalla. ⁵³Bee
paa ri'i condrala bee lli'ñilla, nu bee
lli'ñilla ri'i condra li'ibeella. Le'ca
esquie bee naa ri'i condra beella
xinchiu'cu beella nu xinchiu'cu
beella ri'i condra li'ibeella, nu bee
suegra ri'i condrala bee llixilla, nu
bee llixilla ri'i condra li'ibeella.

Xa neca seña' bee tiambu

(Mt. 16:1-4; Mr. 8:11-13)

⁵⁴Chequie uni Jesuse lubee bene:

—Chenu rlañi'hua nú rliñi xcabe enza ratse' bichia, che rnihua nú laca quiu nu rlaca quiu. ⁵⁵Nu chenu rlañihua nú xiu'u bii enza sur, che rnihua nú aca nelee nu esquie recae. ⁵⁶Bene enu niqichia' bee lee. Rri'ihua beya' xa neca bee seña liñibe cuna lu iliulabe, nu ÷xiqie nú la ri'ihua beya' xa neca lunú reca nee?

Ucua'nahua nú tsuxe arqui'hua lu bene enu rlee luhua

(Mt. 5:25-26)

⁵⁷ ÷Xiqie nú la ri'ihua elliebacu' le'ca li'itsiahua ta nú neca nze'ca riala nú ri'i bene? ⁵⁸ Tunu nu' enu nze dete' cuenda li'ilu lubees usticia, nu lla'calu li'illa labe inziu chenu nzalálu lubees usticia ucua'na nú tsúche'lu nucua' cuna li'illa ante nú riñalu lubees usticia. Xne tunu riñalu lu enu hualue lu cuenda'lu, che dete' cuenda nze'e li'ilu lubees sundado nu du' beei li'ilu ni'cu'. ⁵⁹ Li'á nia lulu, nú la chiu'ulu ni'cu' hasta nú ixiulu ye nú nacu' juece lulu.

Rqui'ña nú tsana' arqui' bee bene stula beei nu chequiee beei inziu' Diose

13 Bee bichia ze'e, uya chiucu chuna bee bene lu Jesuse, nu ubedichia'nu beei li'inu nú xa unibiya' Pilato nú ungti chiucu chuna bee bene Galilea, nu ucuchalla rene' bee benecua' cuna rene' bee nañi enu ungti beei xi neca u'na lu Diose.

² Nu uni Jesuse lubeei:

—La ri'ihua elliebacu' nú bee bene Galilea cua', equie nú másela rlu'cu

beei dula lu ye bee bene Galilea enze'e ulle'ca beei scua. ³ Li'á nia luhua nú la acane scua, nu tunu la tsana' arqui'hua stulahua, le'ca nitiluhua che. ⁴ Le'ca la ri'ihua elliebacu' nú ye chiñu' chechuna bee bene enu ungti chenu uzana' torre nú lee Siloé equie beei, másela rlu'cu beei dula lubeelá bee bene enu nucua'a eyeche Jerusalén. ⁵ Pero nia luhua nú la acane scua. Tunu la tsana' arqui'hua stulahua le'ca nitiluhua.

Ejemplu' tucu aca higo nú lá ayu

⁶ Chequie uni Jesuse tucu ejemplu lubeei:

—Tucu bene ulu'cu tucu aca higo lu yu'lla, nu uyabi'yalla tunu nu' higo lu aca ze'e, pero né llela'lla ni' tucu higo lu aca ze'e. ⁷ Nu unilla lu bene enu rriucu lu yuu ze'e: “Ubi'yacuru necala chuna lana seidu nú nzela cua'na higo lu aca quie', pero leca xunga xela ni' tucu higo lue. Mejora uchie'cu'e xne rri'ixi'itsiae lu yua.” ⁸ Pero bene enu rriucu yuu ze'e necachi ucuaquilla nú unilla: “Detá, utsa'nasca'e lana quietsia, li'á le'a yuu rqui'i nu du'a abonoe, ⁹ bi'ya se tunu scua ayu ndixí lue, nu tunu la ayu ndixí lue, che chu chiecune.”

Uriyeca Jesuse tucu una'a enu nzucu lu'u tetsu' bichia nú sulachi bee bene Israel

¹⁰ Tucu bichia nú sulachi bee bene Israel, chenu sete' Jesuse Stichia' Diose liñi tucu indu' bee bene Israel, ¹¹ ze'e nzucu tucu una'a, nu necala chiñu'chechuna lana nú ritilla. Tucu benechiqui' uri'i nú nzucu

tucu lu'u tetsu'lla nu leca modo nú lílla. ¹²Chenu ulañi' Jesuse li'lla ubixianu li'lla nu uninu lulla:

—Una'a, uyeca'la'lu lu elichia nú secalu nee.

¹³Chequie uricu'nu yanu equiella nu hora ze'e ulí tetsu'lla, nu uquixiella unilla bedichia' nze'ca lu Diose. ¹⁴Pero chiqui' ulee bene enu rnibiya' liñi indu ze'e, nú uri'iyeca Jesuse una'a ze'e bichia nú sulachi bee bene, nu uni bene ze'e:

—Nu' xu'cu bichia para nú ri'i bee bene riña', bee bichia cua' ye'tahua para nú yeca'hua, pero la ye'tahua bichia nú sulachi bee bene.

¹⁵Chequie ucuaqui Jesuse nú uninu:

—Li'ihua necahua bene enu nequichia', xne li'ihua rri'ihua riña' bichia nú sulachi bee bene. ¿Xie' la la'ahua u'nahua, urre burro'hua para nú hue'í inza bichia nú sulachi bee bene la? ¹⁶Nu una'a quie' nze'ta lu famili' tuxie Abraham, nu necala chiñu' chechuna lana nú uri'i beze'lu nú secalla elichia cua', ¿xie' leca modo nú ri'iyecaa una'a quie' bichia nú sulachi bee bene la?

¹⁷Chenu uninu bee bedichia' cua', ye bee bene enu ulee lunu chiqui' utu' beei. Pero beelá bee bene ñia utsu arqui'beei equie ye bee milagro nú uri'inu.

Chenu uni Jesuse ejemplu' ebichi' mestaza

(Mt. 13:31-32; Mr. 4:30-32)

¹⁸Le'ca uni Jesuse lubeei:

—¿Xa nia luhua para nú ri'ihua beya' xa neca lunú rnibiya' Diose urre xi lubea luhua para nú ri'i nze'cahua beya' xa necane?

¹⁹Necane xi neca tucu ebichi' mestaza nú rquienii bene lu yu'lla, nu rru'cue hasta nú recae xi neca tucu aca llene, nu rreche'e bee iñi exlia'tse' beei lu ellutsa lue.

Uni Jesuse ejemplu' levadura

(Mt. 13:33)

²⁰Le'ca unilá Jesuse lubeei:

—¿Xa nia luhua para nú ri'ihua beya lunú rnibiya' Diose? ²¹Necane xi neca levadura nú rcucha tucu una'a chuna medida harina, xne añinzuca nú teme'tsia levadura pero rri'i nú sebichi ye ecucu harina ze'e.

Uni Jesuse equie cuenda' puerta nú nuxu' neca

(Mt. 7:13-14, 21-23)

²²Chenu nza Jesuse enza Jerusalén, uzete'nu bee bene lubee eyeche cuna lubee ranchu elu udetenu. ²³Che necachi unedichia' tucu bene lunu:

—¿Detá, lle'natsia bee bene enu tsila'a la?

Nu ucuaquinu:

²⁴—Uri'ihua juerza nú chu'uhua ru'u puerta elu nuxu', xne nia luhua nú nu' huaxi bee bene enu niarqui' nú chu'u ze'e, pero la ri'i beei ana nú chu'u beei ze'e. ²⁵Xne chenu tsulí bene enu neca lluana' ni'i ze'e para nú tsacu'lla ru'u puerta, nu li'ihua enu uya'na nucua'a eli'ya' chichihua ru'u puerta nu nihua: “Uxa'la ru'u puerta para nú chu'uru.” Pero li'lla nilla luhua: “La ri'á beya' cá enza nze'tahua.” ²⁶Chequie quixiehua nú nihua: “Li'iru uda'curu nu udiya'ru cuna li'ilu, nu uzete'lu li'iru lachiru.” ²⁷Pero

li'illa nilla luhua: “Unilá luhua nú la ri'á beya' ca enza nze'tahua. iUlluna'hua lua ca'a li'ihua enu necha rri'i!” ²⁸Ze'e una'hua nu acuxa' layahua, chenu lañi'hua Abraham, cuna Isaac, cuna Jacob cuna ye bee profeta' Diose enu nucua'a elu rnibiya'nu, nu li'ihua uya'nahua eli'ya'. ²⁹Xne nze'ta bee bene diqui lu iliulabe, bee bene enu nze'ta enza norte, cuna bee bene enu nze'ta enza sur, cuna bee bene enu nze'ta enza este, cuna bee bene enu nze'ta enza oeste, para nú cua'a beei acu beei elurnibiya' Diose. ³⁰Chequie huaxi bee bene enu la neca equie nee, aca bee nze'e enu aca neca equie bichia ze'e, nu bee enu neca equie nee, aca bee nze'e enu la aca neca equie bichia ze'e.

**Unguna' Jesuse equie cuenda'
eyeche Jerusalén**

(Mt. 23:37-39)

³¹Hora ze'e uriña chiucu chuna bee fariseo lu Jesuse nu unibeei lunu:

—Uquia enza rene, xne niarqui' arre Herodes uti li'ilu.

³²Pero ucuaquinu lubeei:

—Uquiahua nu uni'hua lu enu sequienu cua': “Ubi'yacuru nee nu ye'e, li'á rlua bee benechiqui' arqui' bee bene cuna nú rri'iyeca bee bene enu riti, nu detetsia ye'e la'xua.”

³³Pero rqui'ña nú nze ri'á seidu inziua nee nu ye'e nu detetsia ye'e, xne leca modo nú ati tucu profeta stucu eyeche enza rene lu eyeche Jerusalén.

³⁴Bee bene Jerusalén, bee bene Jerusalén, li'ihua ruutihua bee profeta, nu rdu'hua quiee bee Bene

enu uxe'la Diose luhua. Huaxi bese uniarquia nú quietesa'ahua tucu nú rquiete'sa' lli'ti ti'ñi'í liñi cuacaí pero né zelahua. ³⁵Enze'e nia luhua nú enta bichia nú tsana' arqui' Diose lachihua. Le'ca nia luhua nú leca' bichia nú lañi'hua li'á, hasta nú riña bichia nú nihua. Ñia nze'ta li'ínu enu nze'ta equie cuenda' Pa'ahua Diose.

**Uri'iyeca Jesuse tucu bene
enu nu' quii diqui be'la'**

14 Tucu bichia nú sulachi bee bene Israel, uya Jesuse udacucheca ni'i tucu fariseo enu rnibiya', nu texcua'a beei nucua'a tsi'ña li'ínu. ²Chequie lunu ze'e, nzu tucu niyu enu nu' quii diqui be'la'. ³Nu unidichia' Jesuse lubee ulaxcuela enu reca ley Moisés cuna lubee fariseo nu uninu:

—¿Nu' modo ri'iyeca tucu bene enu riti bichia nú sulachi bee bene la? urre ðleca modue la?

⁴Pero lecalí xi ucuaqui beella, chequie uricu'nu yanu equie niyu enu riti ze'e, nu uri'iyecanu li'i nu uninu lui nu yai. ⁵Chequie uninu lubee fariseo:

—Tunu zana' tucu burro'hua urre tucu u'na'hua liñi tucu i'chihu bichia nú sulachi bee bene, ¿xie' la chehuahuaí hora ze'e la? ⁶Pero lecaxi ullela arqui'beella acuaqui beella lunu.

Bee bene enu nezene' eluxia bene

⁷Chenu ulañi' Jesuse nú rla'na bee bene enu nezene' lu tsa'a ze'e elu neca equie cua'a beei. Che uninu lubeei:

⁸—Chenu sene' bene li'ilu chalu lu tsa'a chia, la zuculu

luhuare elu mase neca equie, xne tunu riña stucu bene enu nezene' enu masela neca equie lulu, ⁹che bene enu uzene' rucuhua, nze'talla nu nilla lulu: “Ude'te' elu nzuculu zucu benequie'.” Chequie ya'na netúlu tsulílu luhuare ze'e, nu zuculu hasta último xleta. ¹⁰Enze'e chenu sene' tucu bene li'ilu lu tsa'a zucu lu xleta nú nzu hasta último, para nú chenu nze'ta bene enu uzene' li'ilu nu nilla lulu: “Amigo, utee ca'a zuculu elu máse neca equie.” Nu scua zucu' aya beei li'ilu lubee bene enu nucua'a lu mexa cuna li'ilu. ¹¹Xne enu sucu' aya le'catsia li'i, aca lle'na nze'e, nu enu reca lle'na zucu' aya bee bene li'illa.

¹²Chequie uni Jesuse lu bene enu uzene' li'inu:

—Chenu sene'lu bee bene nú acucheca beei urre nú acuxee beei, la zene'lu bee bene enu rquiete'lu, ni' bee bichilu, ni' bee famili'lu, ni' bee besiñu'lu enu neca xene. Xne le'ca tucu bichia zene' beella li'ilu ni' beella, nu scua ixiu beella lunú udacu beella ni'lu. ¹³Mejora chenu rri'ilu tucu eliñi, zene'lu bee bene enu seca elitsi, cuna bee bene enu neca mangu, cuna bee bene enu necuxu, cuna bee bene enu niquie'lu. ¹⁴Che ñia nza lu cuenda'lu, xne añinzuca nu la gusea' beei nucua' lulu. Pero Díose neca enu guse'e nucua' lulu bichia nú huañi zeca bee bene enu neli uri'i tucu nú necane lu Díose.

Ejemplu tucu exee nú neca equie

(Mt. 22:1-10)

¹⁵Chenu ubene' tucu bene enu nzucu lu mexa cuna Jesuse nucua', unilla lunu:

—Ñia nza lu cuenda' bene enu riala acu pá elurnibiya' Díose.

¹⁶Che uni Jesuse lui:

—Tucu niyu uri'illa elliebacu' nú dete'lla tucu exee llene para nú acu xee bee bene, nu uzene'lla huaxi bee bene. ¹⁷Chequie chenu uriña hora' exee, uxe'la bene ze'e moso'lla nze ni lubee bene enu uzene'lla para nú ye'ta beei xne necalula exee. ¹⁸Pero ye bee bene ze'e uquixie beei nú unacu' beei disculpa lulla nu uni tucui: “Uni'i lu benecua' nú ri'illa disculpa li'á, xne apenatsia utsia tucu yuu nu rqui'ña nú nzebi'yane.” ¹⁹Stucui uni: “Apenatsia utsia ayu' inza u'na', nu rqui'ña nú nze ri'á preo beei bi'ya xa rri'i beei riña'. Uni' lu benecua' nú ri'illa disculpa li'á.” ²⁰Stucui uni: “Li'á apenatsia uchíaa. Enze'le leca modo nú tsea nee.” ²¹Chenu ubenchila' moso' ze'e udixiule'ella lu patrón'lla ye lunú unga. Chequie ulee patrón' ze'e, nú unilla lu moso'lla: “Uquia yexetsia lu eyeche cua' lubee inziu llene cuna lubee inziu lla'na, uteyuu bee bene enu seca elitsi, cuna bee bene enu neca mangu, cuna bee bene enu necuxu, cuna bee bene enu niquie'lu.” ²²Chenu ulaxu nú uri'i moso' ze'e scua, necachi unilla lu patrón'lla: “Uri'ilá tucu nú unibiya'lu nú ri'á, pero nu'sca' luhuare elu cua'a bee bene.” ²³Che uni patrón' ze'e lu moso'lla: “Uquia lubee calle cuna

lubee inziu. Uri'i Juerza bee bene enu lla'calu ze'e, nú ye'ta beei nia para nú cheene. ²⁴Xne nia lulu nú ni' tucu bee bene enu rluti uzenea la acu exee nú uri'ilua."

**Xa zeca bee bene enu nzenala stichia'
Jesucristo**

(Mt. 10:37-38)

²⁵Huaxi bee bene uyaquie Jesuse, nu ubelletanu nú uninu lubeei:

²⁶—Tunu nu' enu niarqui' nú ye'ta quie li'á, rqui'ña nú másela zecalla li'á lunú secalla pa'lla, na'lla, una'alla, endu'lla, bichilla, zanalla, nu rqui'ña nú másela zecalla li'á lunú secalla lunú nehuañilla. Tunu la ri'illa scua leca modo nú acalla benea. ²⁷Nu bene enu entaquie li'á nu la niarqui'lla nú nehuana zecalla equie cuenda' li'á, leca modo nú acalla benea. ²⁸Tunu tucuhua niarqui' nú reche'e tucu ni'i nze'ca, ¿xie' la zuculla nu rluti ri'illa elliebacu' calu yalu gasto nú acache' ni'i ze'e nu tunu riqui' dimi'lla la'xulla reche'ellae la? ²⁹Xne tunu reche'tsialla puro simiendu' ni'i nu la la'xulla reche'ella diquine, che ye bee bene enu lañi' nucua' tsequichia' li'illa, ³⁰nu ni bee bene: "Benequie' uquixie rreche' ni'i pero lá la'xulla a reche'ellae xne la riqui' dimi'lla." ³¹Nu tunu tucu arre niarqui' ri'i xuu cuna stucu arre, ¿xie' la zuculla rluti ri'illa elliebacu' tunu riqui' chi'i mili bee sundado'lla ri'i xuu cuna ala mili bee sundado' stucu arre la? ³²Pero tunu ri'illa beya' nú la ri'illa ana lu arre ze'e, chequie ante nú riña arre ze'e lulla, xe'lalla chiucu chuna bee bene'lla para nú ni bee nze'e lu arre

ze'e nú tsuxee xuu para nú scua huañi beei sin xuu. ³³Le'ca esquie tatse bene enu la tsa'na ye bee stene'lla nú rlu'culla, leca modo nú acalla benea.

Chenu rniiti nú neri' zete

(Mt. 5:13; Mr. 9:50)

³⁴'Zete neca nze'cae. Pero tunu niti nú neri'i, ¿xa sibi' zecae stucu bese che? ³⁵La zibi'i ni' nú ri'chiane leta yuu nu ni' nú acane abono, ti'chiatsia bee benene. Enu niarqui' nú yene', quie'e diaca nze'e.

**Ejemplu' tucu bene enu ullela' zeca
sanchi'**

(Mt. 18:10-14)

15 Ye bee bene enu rri'i cubre equie bee impuesto cuna bee bene enu rlu'cu dula, uyabica beei lu Jesuse para nú yene' beei lunú rminu. ²Chequie bee fariseo cuna bee ulaxcuela enu reca ley' Moisés, uquixie beei nú se'ta beei Jesuse nú unibeei:

—Benequie' rquiete' bee bene enu rri'i dula nu racunulla bee benecua'.

³Che uni Jesuse ejemplu quie' lubeei:

⁴—Tunu nu' tátucuhua rlu'cu tucu ayu'u sanchi nu nitihua tucui, ¿xie' la tsa'nasca'lla noventa y nueve bee sanchi ze'e dañi nu che cua'nalla sanchi enu uniiti hasta nú llela'llaí la? ⁵Nu chenu ullela'llaí, ñia nzu arqui'lla uricu'llaí añilla. ⁶Chequie chenu riñalla ni'lla quiete'sa'lla bee bene enu rquiete'lla cuna bee besiñu'lla, nu nilla lubee bene ze'e: "Ñia utsu arqui'hua cuna li'á, xne ullelalá sanchia enu uniti." ⁷Nee nia luhua, nú le'ca scua nu' nú ñia

nzu arqui' li'i beenu enu nucua'a liñibe chenu tsana' arqui' tucu bene stulalla luquela se noventa y nueve bee bene enu neli neca enu la qui'iña nú che'e arqui' lu stula.

Ejemplu' tucu una'a enu ullela' zeca' dimi'

⁸Le'ca esquie tunu tucu una'a enu rlu'cu chi'i melu plata nu nitilla tucue, ¿xie' la quie'ella quii nu lucu'lla liñi ni'lla nu cua'nalla dimi'lla xuxuu hasta nú llela'llae la? ⁹Nu chenu llela'lla dimi'lla, quiete'sa'lla bee una'a enu rquiete'lla cuna bee besiñu'lla, nu nilla lubee nze'e: “Ñia utsu arqui'hua cuna li'á xne ullelalá dimia nú unitia.” ¹⁰Nee nia luhua, le'ca scua ñia nzu arqui' bee ángele' Diose liñibe chenu tsana' arqui' tucu bene stulalla.

Ejemplu' tucu bene enu uri'i perdona lliana'

¹¹Le'ca uni Jesuse stucu ejemplu lubeei:
—Tucu bene ulu'cu chiucu lliana', ¹²chequie uni lliana'lla enu lle'nalá lulla: “Paa uli'qui' rencia nú rialaa.” Nu chu uritsi' pa' beei bee rencia'lla lu rucu beei. ¹³Xiucu xuna bichia lu ze'e lliana'lla enu lle'nalá ungiiti ye bee rencia nú uyucui. Che unguya'i dimi cua' nzai enza istu elu ula'xui yeene, xne uri'i ye nú niarqui'i. ¹⁴Pero chenu ulaxu dimi'i unga biñia elu nzucui, nu uquixie nú uri'i falta nú acui. ¹⁵Nu chu uya na'cui riña' ri'i ni' tucu bene enza ze'e, nu uxe'la bene ze'e li'i nú ri'i ucuí bee cuchi enza dañi. ¹⁶Nu equie nú chiqui' rlia'na'i ala' nú

raculai beenú racu bee cuchi nú secái, pero lecati udete' nú udacui. ¹⁷Chequie uri'i elliebacu' nú uni: “iNi' paa nucua'a huaxi bee moso' nu hasta nú sucu sobra nú racu beei, nu li'á nzucua'a ca'a ya mero atia nú rlia'naa! ¹⁸Nee benchila' zecaa ni' paa nu nia lunu: Paa, uri'ila dula lu Diose nu uri'ila dula lulu, ¹⁹la yala' nú nilu lua nú neca lliana'lu. Uri'itsia lua xi neca tucu moso'lu.” ²⁰Chequie uyu'u nziui nu ubenchila' zecai ni' pa'i.

’Pero chenu nze'tasca'i istu ulañi' pa'i li'i, nu uhua'a arqui'lla li'i. Che uyaxu'ulla ucha'calulla li'i, nu uchi'chilla li'i nu udaculla bichiu' xecai. ²¹Nu chu uni lu pa'i: “Paa uri'ila dula lu Diose, nu uri'ila dula lulu, la yala' nú nilu lua nú neca lliana'lu.” ²²Pero chu uni pa'i lubee moso'lla: “Yexetsia uquia chiya'hua laquie nú máse rnaa nze'ca utu'hua lliana'a, nu udu'hua tucu bi'i cuenei nu quie'ehua subatu cuchiu'i.

²³Nu uteyuhua tucu becerro enu máse neru'cu nu útihuaí para nú da'cua'ahuaí, nu ri'ahua tucu eliñi. ²⁴Xne para li'á unguila lliana'a ninguie', nu uhuañi zecai. Uniiti, pero ullela zecai.” Nu uquixie beella nú rri'i beella eliñi'i.

²⁵Diqiu nú nucua'a beella esquie, lliana' rlu'lla nzusca'i dañi. Chequie chenu ubenchila'i nú nze'ta riñai axu ni'beella, chenu ubene'i nú rula bee musica nu rie'e beella, ²⁶Chequie ubixiai tucu moso' ni'beella nu unidichia'i lu nze'e nú xi reca ni' beella. ²⁷Nu uni moso' ze'e lui: “Nú ubenchila' zeca bichilu nu unibiya' pa'lu nú unguiti becerro enu máse neru'cu

xne uriña nze'cai nu uriña naaqui.”

²⁸Pero chiqui' ulee lliana' rlu'lla nze'e nu la zelai chu'i ni'i, che chu uchiu'u pa'i uya ziquie lui para nú chu'i. ²⁹Che uni lu pa'i: “Li'ilu nediyalu xala lana rri'á riña' cuna li'ilu, nu leca xunga unga nzitia lulu, nu leca xunga ubiqui'lu masia tucu chipa lla'na para nú ri'á tucu eliñi cuna bee enu rquietea. ³⁰Pero nee nú uriña lliana'lu ninguie', enu uya la'xu dimi'lu cuna bee una'a huexe. Para li'i sí unibiya'lu nú ungutí becerro enu máse neru'cu.”

³¹Che uni pa'i lui: “Lliana'a li'ilu nzuculu cuna li'á ye bichia, nu ye nú rlucua neca stene'lu. ³²Pero nee rquiñña nú aca tucu eliñi cuna nú ñia tsu arquia'ahua, xne para li'á neca xi neca nú ungutí bichilu nu nee uhuañi zecai, unitii, nu ullela' zeca'ahuai.”

Ejemplu' tucu moso' enu né ri'i nze'ca

16 Le'ca uni Jesuse lubee bene'nu:

—Uhuañi tucu bene xene, nu ulu'culla tucu moso'lla enu uya'nanu ye bee stene'lla, cheela uyatixiule'e bee bene lulla nú lia rla'xu moso' ze'e ye bee stene'lla. ²Nu chu ubixialla moso' ze'e nu unilla lui: “¿Xa neca lunú rni bee bene lu cuenda'lu scua? Uli'qui' cuenda beenú rri'ilu, xne la liquia'a riña' ri'ilu.” ³Chequie uquixie moso' ze'e nú rri'i elliebacu': “¿Xa ri'á nee nu la liquia' patrón'a riña' ri'á? Leca juerzaa para nú ri'á riña' dañi, nu rtua nú nacua caridad. ⁴Nediyala xa ri'á para nú nu' ti yucu li'á ni'i chenu la lu'cua'a riña'.”

⁵Che ubixiai tucua tucua bene enu nezi'qui lu patrón'i, nu uni lu enu uriña rluti: “¿Calu nezi'quilu lu patrón'a?” ⁶Nu ucuaqui bene ze'e nú unilla: “Li'á nezi'quia tucu ayu'u barrili aceite de olivo.” Che uni moso' ze'e lulla: “Nguie ichi' nú udu'lu firma uzucu nu yexetsia uche'e lunú nezi'quilu, nu uzu'cu' ichitsia nú nezi'quilu cincuenta barrili aceite.” ⁷Nu unedichia'i lu stucu bene ze'e: “¿Calu nezi'quilu lu patrón'a?” Nu uni bene ze'e lui: “Tucu ayu'u medida trigo.” Che uni lu bene ze'e: “Nguie ichi' nú udu'lu firma. Uche'e lunú nezi'quilu nu uzu'cu' ichitsia nú nezi'quilu ochenta medidae.” ⁸Chequie chiqui' uyanu archi' patrón ze'e nú netsiña moso' enu necha neca esquie lunú uri'i. Neli nú mase netsiña bee bene enu la chequie inziu' Diose cuna bee sa'beeí, luquelá bee bene enu nzequie inziu' Diose.

⁹Enze'e nia luhua: “Nú uqui'ñahua bee eluxene nú rlu'cuhua lu iliulabe quie' para nú ri'ihua elietsa lubee bene, nu scua nu' enu yucu li'ihua elu huañilíhua chenu laxu bee stene'hua.”

¹⁰Bene enu rri'i tucu nú rialane cuna lu lle'natsia nú ria'nanulla, le'ca rri'illa tucu nú rialane cuna lu huaxi nú ria'nanulla, nu bene enu la ri'i tucu nú rialane cuna lu lle'na tsia nú ria'nanulla, le'ca la ri'illa tucu nú rialane cuna lu huaxi nú ria'nanulla. ¹¹Nee le'ca scua tunu la ri'ihua tucu nú rialane cuna lubee eluxene nú nu' lu iliulabe quie', ¿ti lu'cu confianza luhua cuna bee eluxene nú nu' liñibe che? ¹²Nu tunu la ri'ihua tucu nú rialane cuna

lunú la neca bee stene'hua, ¿ti liqui' luhua lunú rialahua che?

¹³Ni' tucu moso' leca modo ri'i riña' lu chiucu patrón, xne leei lu tuculla, nu stuculla zecai, urre ri'i nze'cai lu tuculla, nu lu stuculla la ri'i nze'cai. Enze'e leca modo nú zibi'hua lu Diose nu tsu arqui'hua lu dimi.

¹⁴Nu lunú máse rle' bee fariseo dimi, chequie chenu ubene' beei nú uni Jesuse scua uquixie beei nú uze'ta beei li'inu. ¹⁵Nu uni Jesuse lubeei:

—Li'ihua rri'ihua nú necahua xi neca bene nze'ca lubee bene. Pero Diose nu'lu xa nchiñi arqui'hua. Mase rri'ihua ana nú nzeli arqui' bee bene nú necahua enu neca equie, pero lu Diose lecati necahua.

**Equie cuenda' ley' Moisés
cuna lunú rnibiya' Diose**

¹⁶Hasta chenu ube'ta Juan Bautista. Nu'la ley' Moisés cuna bee bedichia' nú uquie'e bee profeta, pero hasta che uquixie nú udixiule'e bee bene nú xa neca lunú rnibiya' Diose, nu huaxi bee bene rri'i juerza nú chu'u elu rnibiya'nu.

¹⁷Másela fácil nú nitilu liñibe nu lu yuu, pero la dete nú yalu ni' tucu bedichia' nú nze'ta lu ley' Diose.

**Udixiule'e Jesuse nú la le'e niyu
una'i nu la le'e una'a niyu'nchu**

(Mt. 19:1-12; Mr. 10:1-12)

¹⁸Tunu tucu niyu le'i una'i nu yucui stucu una'a, ri'i dula, nu le'ca tunu yucu tucu bene una'a enu ule'e niyu', le'ca ri'i nze'e dula che.

Bene xene cuna Lázaro

¹⁹Uhuañi tucu bene xene nu chiqui' utsuche'ella cuna bee laquie

fiñu nú ñia rnaa nu ye bichia rri'illa nú neca xi neca tucu eliñi ni'illa, equie nú chiqui' necalla bene xene nu racu nze'calla. ²⁰Le'ca uhuañi tucu bene elitsi enu lee Lázaro, nu diqui be'la'lla nchiucu' bechu' nú ruchulu nu suculla ru'u ni' bene xene ze'e. ²¹Niarqui' Lázaro cua' nú aculla masia bee ube nú sana' liñi mexa' bene xene ze'e, nu hasta bee nicu rriña rñie'e lu beechu' nú nchiucu' li'illa. ²²Chenu uriña bichia nú ungti Lázaro, nu ungtuya' bee ángele' Diose li'illa liñibe elu nzucu Abraham. Nu le'ca ungti bene xene ze'e, nu ucachi' bee bene li'illa. ²³Diqui nú nehuana seca bene xene ze'e nchiñi ebila, uletsai lui nu istu ulañi'i Lázaro nzu cuna Abraham.

²⁴Nu urixialii nú uni: “iPaa Abraham, uhua'a arqui' li'á! Uxe'la Lázaro nú cuachai lli'i cuene yai para nú ye'tai nu ri'i nú a'la' lu'chia, xne chiqui' nehuana se'ca nchiñia lu quii quie'.”

²⁵Pero ucuaqui Abraham lu bene xene nú unilla: “Lli'ñia ullu'cu arqui' nú chiqui' ñia uhuañilu lu iliulabe, nu Lázaro nehuana uhuañi. Pero nee rialai elu ñia tsu arqui'i, nu li'ilu rialalu elu nehuana zecalu.” ²⁶Nu le'ca nia lulu: “Nú arli'ti' nu' tucu errubee llene. Enze'e ni' tucu bee enu nucua'a ca'a leca modo nú dete elu nzulu, nu ni' tucu bee enu nucua'a elu nzulu leca modo nú ye'ta ca'a.”

²⁷Chequie uni bene xene ze'e: “Ziquia lulu paa Abraham, uxe'la Lázaro ni' paa, ²⁸xne rluca ayu' bichia, para nú ixuile'ella lubeei nú la ye'ta beei ca'a elu chiqui' nehuana seca bene.”

²⁹Che uni Abraham lui: “Li'ibeei rlu'cu beei bee ichi' nú uquie'e Moisés cuna beenú uquie'e bee profeta, mejora nú ri'i beei caso lunú niquie lubee ichi' cua!”

³⁰Nu ucuaqui bene xene ze'e: “Leca modoe paa Abraham, pero tunu huañi zeca tucu bene enu unguiti, nu lube'lu nze'e lubeei, che si tsana' arqui'beei stula beei.”

³¹Pero uni Abraham lui: “Tunu la ri'i beei caso stichia' Moisés cuna stichia' bee profeta, le'ca la chili arqui'beei mase nú huañi tucu bene enu unguiti.”

Ubi'yahua li'ihua para nú la zana'hua lu dula

(Mt. 18:6-7, 21-22; Mr. 9:42)

17 Uni Jesuse lubee bene'nu: —Siempre nu' beenú rri'i nú rri'i bee bene dula, pero icue' bene enu ri'i nú ri'i stucu bene dula!

²Máse neca nze'ca para bene ze'e nú llica'cuu bene quie molino añilla nu tsi'qui beei li'illa lu inzatu', luhuare nú ri'illa nú sana' bene lu dula enu apenatsia uyalí arqui' li'á.

³iUbi'yahua li'ihua!

'Tunu nu' ta tucu enu rri'i dula, uri'ihua nú qui'yalla, nu tunu che'e arqui'lla lu dula nú uri'illa, uri'ihua perdona li'illa. ⁴Mase achi bese tucu bichia ri'illa urre nilla bee nú necha neca lulu, nu tunu achi bese le'ca entalla nu nilla lulu uri'i perdona li'á: “La ri'á scua stucu bese.” Rqui'ña nú ri'ilu perdona li'illa.

Uri'i elietsa luru para nú tsu tenelilá arqui'ru lu Diose

⁵Chequie uni bee bene' Jesuse lunu:

—Uri'i elietsa luru para nú tsu tenelilá arqui'ru lu Diose.

⁶Nu ucuaqui Jesuse lubeella:

—Tunu nzu tenelí arqui'hua masia lle'na xi neca ebichi' mestaza, nu' modo nihua lu aca llene sicómoro quie': “Axi li'ilu ca'a nu uzucu lu inzatu’”, che zucu' aca cua' nú rnihua.

Lunú riala ri'i tucu esclavo

⁷Tucu ejemplu necane, tunu tucuhua rlu'cu tucu bene enu neca esclavo luhua, nu riña nze'e nú uya ungu'na nze'e u'na' urre uya nze'e ucu nañi, ¿xie' nihua lu nze'e: “Uyu'u nu uzucu para nú acuxelu”? ⁸Pero a'la nihua lu bene ze'e: “Uche'e xuculu nu ureche'e nú acuxea nu ye'ta yulue lua, diqui nú racua nu rua'a hasta nú la'xua nú acua. Che nu' modo nú aculu nu hue'lu.” ⁹Pero la dete'hua masia che'tsa lu bene ze'e, xne rri'itsiai lunú unibiya'hua lui nú ri'i. ¹⁰Le'ca esquie li'ihua, chenu la'xuhua nú ri'ihua ye nú unibiya' Diose nú ri'ihua, chequie nihua: “Necaru moso' enu la zibi', xne uri'itsiaru lunú neca cuenda'ru nú ri'iru.”

Uri'iyeca Jesuse chi'i bene enu seca elichia nú lee lepra

¹¹Chenu nza Jesuse eyeche Jerusalén, udetenu lu iliu Samaria cuna lu iliu Galilea. ¹²Nu chenu nze chu'unu tucu eyeche lla'na, uyacha'calu chi'i bee niyu enu seca elichia nú lee lepra li'inu, pero istu ucua'axe beei lunu, ¹³nu urixialibeei nú unibeei lunu:

—iMaestro, Jesuse, uhua'a arqui' li'iru!

¹⁴Chenu ulañi' Jesuse li'ibeei, uninu lubeei:

—Uquiahua ne lañi' bee ule'ya li'ihua.

Pero diquila nú nzuebeei uyeca' beei elichia nú seca beei. ¹⁵Chequie tucu beei, chenu uri'i nze'e beya' nú uyeca'la' nze'e, ubenchila' nze'e nu ubixialii nú uni bedichia' nze'ca lu Diose. ¹⁶Nu utsulliquii lu Jesuse hasta nú udi' tequiei lu yuu para nú udete'i che'tsa lunu, nu necai bene Samaria. ¹⁷Che uni Jesuse:

—¿Xie'lanú chi'i neca bene enu uriyeca la? ¿Ma sequie beei? ¹⁸¿Xie' bene rene quie'tsia ubenchila' para nú ni bedichia' nze'ca lu Diose la?

¹⁹Che uni Jesuse lui:

—Utsuli, nu uquia'a nee. Uyeca'la'lu xne uchili arqui'lu li'á.

Xariña lunú rnibiya' Diose

(Mt. 24:23-28, 36-41)

²⁰Unidichia' bee fariseo lu Jesuse xunga riña lunú rnibiya' Diose, nu ucuaquinu lubeella:

—Lunú rnibiya' Diose la neca nucua' nú lañi'hua chenu riñane.

²¹Lecati ni: “Nú ca'a nzu lunú rnibiya' Diose”, urre “nguié nzuee”; xne lunú rnibiya' Diose nzula letahua nee.

²²Nu uninu lubee bene'nu:

—Riña bichia nú niarquihua nú lañi'hua li'á Bene enu uxe'la Diose masia tucu bichia pero la lañia'hua li'á. ²³Mase nu' bee bene enu ni luhua: “Ca'a nzucunu”, urre “nguié nzucunu”, pero la chequiehua beei.

²⁴Xne tucu nú neca chenu ria'la le nu riu'u llie'e enzichiu' enzerquie, le'ca scua aca chenu riña zeca li'á Bene enu uxe'la Diose. ²⁵Pero rluti

rqui'ña nú chiqui' nehuana zecaa, nu huachu bee bene enu nucua'a nee li'á.

²⁶Tucu nú unga tiambu nú uhuañi Noé, le'ca scua aca bichia chenu riña zeca li'á Bene enu uxe'la Diose.

²⁷Xne tiambu ze'e, udacutsia bee bene nu ungue'tsia beei, nu uchia beei nu udete'beei xinchiu'cu beei uchía, hasta nú uriña bichia nú uyu'u Noé liñi barco llene nú ureche'ella, nu uquixie nú ulaca tucu quiu juerte nu ungutí ye beei.

²⁸Le'ca scua unga chenu uhuañi tucu bene enu lee Lot lu iliulabe: udacutsia bee bene nu ungue'tsia beei, cuna nú ruti beei nu si beei, nu rdu' beei nii nu rreche'e beei bee ni'i. ²⁹Pero chenu uchiu'u Lot eyeche Sodoma, uquixie nú ulaca quii enza liñibe cuna azufre, nu ungutí ye beei. ³⁰Le'ca scua aca chenu riña zeca li'á Bene enu uxe'la Diose.

³¹Bichia nú aca bee nucua', bee bene enu nchiucu' equie ni'i la llucha' chu'u beei liñi ni'i beei para nú na'tse beei stene' beei, nu bee bene enu nucua'a dañi la llucha' benchila' beei ni'beei para nú uya'beei stene'beei. ³²Ullu'cu' arqui'hua xa ulle'ca una'a Lot. ³³Bene enu máse niarquí' nú huañi lu iliulabe quie' riña bichia nú laxu nucua', pero bene enu ati equie cuenda' li'á lu'culla eluhuañililla liñibe.

³⁴Li'á nia luhua nú rula' ze'e elu nucua'a chiucu bene lu tucu luna, tuculla uya nu stuculla ria'na. ³⁵Nu elu nucua'a chiucu una'a riu, tuculla uya nu stuculla ria'na. ³⁶Nu elu nucua'a chiucu niyu dañi, tucui uya nu stuculla ria'na.

³⁷Chenu ubene' bee bene'nu
nucua' uni beella lunu:
—¿Cá aca bee nucua'?
Nu ucuaqui Jesuse lubeella:
—Elu nuxu tucu nañi enu ungti
ze'e riete' sa' bee ulabichi.

**Ejemplu' tucu una'a enu
unguti niyu' cuna juece**

18 Uni Jesuse tucu ejemplu
lubee bene'nu para nú
sete'nu li'ibeella nu uninu rqui'ña
nú nacu' beella lu Diose, nu la llaca'
beella. ²Che uninu nú lu beella:
—Tucu bene enu unga juece tucu
eyeche nu la lliquilla Diose nu la
ri'i casolla bee bene. ³Nu le'ca
eyeche ze'e nzucu tucu una'a enu
unguti niyu', nu nzanchu lu juece
ze'e rnacu'nchu nú ri'i juece ze'e
elietsa lunchu para nú dete'lla
castiya lu bene enu rlee lunchu.
⁴Pero xee né ri'i caso juece ze'e
una'a ze'e, nu chu uri'i juece ze'e
elliebacu' nú unilla: “Añinzuca
nú la lliquia Diose nu la ri'i caso
bee bene, ⁵pero una'a quie' la
tsuxenchu nú ri'i xi'inchu lua,
mejora ri'á elietsa lunchu para
nú la ye'ta'nchu ante nú laxu
paciencia.”

⁶Nu chu uni Jesuse lubeella:
—Scua uni juece enu necha necha
ze'e. ⁷Enze'e, ¿xie' la ri'i caso Diose
bee bene'nu enu ucañinu chenu
rnacu' beella lunu bichia si rula' la?
Nu, ¿xie' le'nu para nú ri'inu elietsa
lubeella la? ⁸Li'á nia luhua nú
ri'inu elietsa lubeella sin nú le'nu.
Pero chenu riña zeca li'á Bene enu
uxe'la Diose, la ri'á beya' tunu llelá
bee bene enu nzeli arqui' Diose lu
iliulabe.

**Ejemplu' tucu fariseo cuna bene
enu uri'i cubre impuesto**

⁹Uni Jesuse stucu ejemplu para
bee bene enu si' nú necha beei bene
nze'ca, nu rluachu beei beelá bee
bene, nu uninu:

¹⁰—Uya chiucu niyu liñi Indu
llene Jerusalén unacu' beei lu
Diose: tucui necha fariseo, nu stucui
neca enu rri'i cubre impuestos. ¹¹Nu
nzulí fariseo ze'e rnacu'i lu Diose
nú uni: “Che'tsalu Diose Pa liñibe,
xne la necaa xi necha stucu bee bene,
xi necha bee bene enu rri'i eluhua'na',
xi necha bee bene enu necha rri'i,
xi necha bee bene enu rlu'cu stucu
una'a, nu la necaa ni' xi necha
benequie' enu rri'i cubre impuesto.
¹²Chiucu bese liñi tucu xmana
rdetea bichia nú la acua equie
nú rlu'cua ula'na lulu Diose, le'ca
rdetea diezmo equie dimi nú rri'á
ana.” ¹³Pero bene enu rri'i cubre
impuesto istu utsui nu né ri'i nú
aletsai lui enza liñibe, nu xutse tsiai
yai latsai nu uni: “iDiose Pa liñibe
uhua'na arqui' li'á, xne necha bene
enu rlu'cu dula!” ¹⁴Li'á nia luhua nú
bene enu rri'i cubre bee impuesto
uri'ila Diose perdona li'illa chenu
nzi'alla ni'lla, pero fariseo ze'e né
ri'i Diose perdona li'illa, xne bene
enu sucu' aya le'catsia li'i lecati
neca nze'e lu Diose. Pero bene enu
reca lle'na arqui', li'illa necalla enu
máse seca lu Diose.

Uri'ile'ya Jesuse bee endu'

(Mt. 19:13-15; Mr. 10:13-16)

¹⁵Le'ca uyayu bee bene bee endu'
elu nzu Jesuse para nú ricu'nu
yanu equie beei. Pero chenu ulañi'

bee bene'nu nucua', uri'i beella nú uqui'ya' bee bene enu uyayu bee endu' ze'e lunu. ¹⁶Pero ubixia Jesuse li'ibeella nu uninu lubeella: —Uzelahua nú ye'ta bee endu' lua nu la cáhua nucua', xne lunú rnibiya' Diose neca para bee bene enu neca xi neca bee endu' quie'. ¹⁷Xne li'á nia luhua nú bene enu la chili arqui' lunú rnibiya' Diose xi neca tucu endu', leca modo nú chu'ulla elurnibiya' Diose.

Uni tucu bene xene lu Jesuse

(Mt. 19:16-30; Mr. 10:17-31)

¹⁸Tucu bene enu rnibiya' unidichia' lu Jesuse nú unilla: —Maestro, enu neca bene nze'ca, ¿xi rqui'ña ri'á para nú lucua elunehuañi nú leca xunga laxu liñibe?

¹⁹Nu uni Jesuse lui:

—¿Xinu rnilu nú neca bene nze'ca? Leca ni' tucu bene nze'ca, tucutsia Diose neca bene nze'ca.

²⁰Nediya'lá'lu bee mandamiento: “La útilu bene, nu la lu'culu stucu una'a, nu la ri'ilu eluhuaña, nu la ta'lu eluquichia' stucu bene, ulu'cu ula'na lu pa'lu cuna lu na'lu.”

²¹Che uni bene ze'e lu Jesuse:

—Ye bee nucua' sucua hasta chenu lle'na.

²²Chenu ubene' Jesuse nucua', uninu lui:

—Pero rri'i tucu nú ri'ilu nee. Uti ye bee stene'lu, nu ude'te' dimi cua' lubee bene enu seca elitsi. Scua lu'culu eluxene liñibe. Nu chu ye'ta quieelu li'á.

²³Pero chenu ubene' bene ze'e nucua', chiqui' nehuana utsuu arqui'i, xne chiqui' xenei. ²⁴Chenu

ulañi' Jesuse nú chiqui' nehuana nzu arqui'i, che uninu:

—iChiqui' neriña' nú chu'u bee bene xene elurnibiya' Diose! ²⁵Máse facil nú dete tucu camello i'chiu' echedicu, luqela nú chu'u bee bene xene elurnibiya' Diose.

²⁶Pero bee bene enu ubene' nú uni Jesuse scua, unibeei lunu:

—¿Ti nu' modo tsila'a che?

²⁷Nu ucuaqui Jesuse lubeei:

—Nu' nú neriña' neca para bee bene iliulabe, pero para Diose leca ni' tucu nú neriña'.

²⁸Chequie necachi uni Pedro lunu:

—Li'iru utsa'naru ye beenú rlu'curu para nú nzela quieeru li'ilu.

²⁹Nu ucuaqui Jesuse nú uninu:

—Li'á nia luhua nú titse bene enu tsa'na ni'i, urre una'a, urre bichi, urre pa', urre na, urre lli'ñi, para nú ri'illa lunú rnibiya' Diose, ³⁰li'illa másela yuculla nú liqui' Diose lulla lu iliulabe quie' nu le'ca luculla elunehuañi nú leca xunga laxu liñibe.

Udixiule'e Jesuse bese rriuna nú úti bee bene li'inu

(Mt. 20:17-19; Mr. 10:32-34)

³¹Ubixia Jesuse chi'chiucu bee bene'nu tucu chú nu uninu lubeella:

—Nee cha'ahua Jerusalén elu yalu tucu nú uquie'e bee profeta lu cuenda' li'á Bene enu uxe'la Diose.

³²Dete' cuenda bee bene li'á lubee bene rene, nu tsequichia' beei li'á, ni beei huaxi bedichia' nú necha neca lua nu tsúxene beei lua. ³³Iñi beei li'á nu úti beei li'á, pero bichia rriuna huañi zecaa.

³⁴La ri'ilí bee bene'nu beya' lunú uninu, nu la ri'i beella beya' xa

neca nú rninu, xne uninu tucu nú leca modo ri'i beella beya'.

Uri'iyeca Jesuse tucu bene enu niquie'lu eyeche Jericó

(Mt. 20:29-34; Mr. 10:46-52)

³⁵Chenu nze riña Jesuse axu eyeche Jericó, nzucu tucu niyu enu niquie'lu ru'u inziu rnacu' carida, ³⁶chenu ubene'i nú rdete huaxi bee bene inziu ze'e unidichia'i xi reca.

³⁷Che uni bee bene lui nú Jesuse bene eyeche Nazaret rdete lu inziu ze'e, ³⁸nu ubixialí nú uni:

—iJesuse lli'ñi David uhua'a arqui' li'á!

³⁹Bee bene enu nzuculu rqui'yalla rri'i beei para nú zacalla, pero másela ubixialilla nú unilla:

—iLli'ñi David uhua'a arqui' li'á!

⁴⁰Chequie utsuxee Jesuse nu unibiya'nu nú ye'tayuu bee bene li'illa lunu. Chenu uriñalla axu lunu unidichia'nu lulla:

⁴¹—¿Xi niarqui'lu nú ri'á lulu?

Nu ucuaqui niyu enu niquie'lu ze'e nu necachi unilla lunu:

—Niarquia nú ye'e i'culua nu bi'ya zecaa.

⁴²Nu uni Jesuse lulla:

—Ri'yalálu nee, nu uyeca'la'lu xne uchili arqui'lu li'á.

⁴³Hora ze'e chu uye'e i'culu niyu ze'e, nu nzequiei Jesuse nu uni bedichia' nze'ca lu Diose. Nu ye bee bene enu ulañi' nú unga scua, le'ca unibeei bedichia' nze'ca lu Diose.

Jesuse cuna Zaqueo

19 Uyu'u Jesuse eyeche Jericó, nu chu udetenu eyeche ze'e.

²Ze'e nzucu tucu bene xene enu lee Zaqueo nu rnibiya'lla lubee bene

enu rri'i cubre impuesto. ³Niarqui' Zaqueo quie' nú chululla Jesuse, pero leca modo nú lañi'lla li'inu xne nze'tanala huaxi bee bene li'inu, nu nerungulla. ⁴Enze'e uyecaxu'lla nu uricululla, para nú lañi'lla Jesuse, chequie uquiella lu tucu aca nú lee sicómoro axu elu detenu. ⁵Chenu udete Jesuse ze'e, ubi'yanu enzeya nu uninu lulla:

—Zaqueo yexetsia ulaca, xne nee ria'na ni'lu.

⁶Che yexetsia ulaca Zaqueo, nu ñia nzu arqui'lla nú uriña Jesuse ni'lla. ⁷Chenu ulañi' bee bene nú uriñanu ni'i Zaqueo, ye beei uquixie beei nú se'ta beei Jesuse nu rnibeei xinú nzanu ya'nanu ni' bene enu rlu'cu dula. ⁸Nu utsuli Zaqueo nu necachi unilla lu Jesuse:

—Ubi'yacuru, ritsia arli'ti' lunú rluca lubee bene enu seca elitsi. Nu tunu nu' bene enu uri'á cubre de mase lu, nee detea lulla tacu bese mase lunú ucachia lulla.

⁹Che uni Jesuse lulla:

—Bichia quie' uriña nú tsila'a bee bene enu nucua'a ni' Zaqueo, xne uchili arqui'lla Diose, li'illa necalla enu mero nze'ta lu famili' tuxie Abraham. ¹⁰Nu li'á Bene enu uxe'la Diose, nzela para nú la'na bee bene enu nza inziu nú necha neca, nu tsila'a li'ibeei lu dula.

Ejemplu' chi'i melu

(Mt. 25:14-30)

¹¹Bee bene enu riene' lunú rni Jesuse, uninu tucu ejemplu lubeei, xne axula nzunu Jerusalén, nu li'ibeei rri'i beei elliebacu' nu hora ze'e nze riñala lunú rnibiya' Diose.

¹²Nu uninu lubeei:

—Uhuañi tucu niyu enu nze'ta lu tucu famili enu chiqui' necha equie, nu nzalla istu stucu nación para nú yuculla nú nibiya'lla, nú acalla arre nu chu benchila' zecalla para nú nibiya'lla lachilla. ¹³Ante nú chiu'ulla, ubixialla chi'i bee moso'lla nu udete'lla lu cada tucua beei tucu dimi nú huaxi seca, nu unilla lubeei: “Uri'ihua berexe cuna dimi cua' hasta chenu benchila' zecaa.” ¹⁴Pero bee bene lachilla, chiqui' rana arqui'beei li'illa, nu uxe'la beei texcua'a bee bene nzequie li'illa nu uya ni' beei lubee bene elu nzalla nú la niarqui'beei nú aca bene cua' arre lubeei.

¹⁵Pero uya'nalla nú ungalla arre, nu ubenchila' zecalla lachilla. Chenu uriñalla ubixialla bee moso'lla enu udete'lla dimi'lla ya para nú ri'illa beya' calu uri'i cada tucua beei ana. ¹⁶Moso' enu rluti uya uni lulla: “Detá, dimi nú uliqui'lu lua, uri'i ana chi'i bese mase lunú necane.” ¹⁷Nu uni arre ze'e lulla: “Uri'i nze'calu, tucu nú rialane. Nu lunú uri'ilu tucu nú rialane cuna lu lle'na nú utsa'na lulu, nee liquia lulu nú nibiya'lu lu chi'i eyeche.”

¹⁸Chenu uya moso' rrucu unilla lu arre ze'e: “Detá, dimi nú uliqui'lu ya uri'i ana ayu' bese mase lunú necane.” ¹⁹Le'ca esquie uni arre ze'e lu benecua': “Li'ilu nibiya'lu lu ayu' eyeche.”

²⁰Nu uya stucu moso' lulla nu uni nze'e lulla: “Detá, nguie dimi'lu. Uduche'ne liñi tucu panitu, ²¹xne ulliquia li'ilu nú la hua'a arqui'lu bee bene, nu riuuculu lunú né tsa'nalu, nu riuuculu ula'cu elu la du'lu nii.”

²²Chequie uni arre ze'e lui: “Moso' enu necha necha, equie nú unilu scua enze'e rialálu castiya'lu. Tunu nediya'lu nú la hua'a arquia bee bene nu riuucua lunú né tsa'na nu riuucua ula'cu elu la ri'á riña', ²³bueno che, ¿xiquie nú né du'lu dimia banco para nú chenu ubenchila' zecaa ayucu'ne cuna lli'ñine?” ²⁴Nu chu uni arre ze'e lubee bene enu nucua'a ze'e: “Axihua melu cua' yai, nu udete'huane ya bene enu nzene chi'i.”

²⁵Che necachi uni bee benecua' lu arre ze'e: “Pero li'illa rlu'culalla chi'i melu.”

²⁶Nu ucuaqui arre ze'e: “Li'á nia luhua nu bene enu rlu'culane, rqui'ña nú yuculá nze'ene; pero bene enu rlu'cu lle'natsiae, hasta lu lle'na nú rlu'culla ducu' enze'e yalla. ²⁷Nu bee bene enu rlee lua nu la niarqui' beei nu aca arre, uteyuhua bee nze'e ca'a, nu útihua beei lua.”

Uyu'u Jesuse eyeche Jerusalén

(Mt. 21:1-11; Mr. 11:1-11; Jn. 12:12-19)

²⁸Chenu ulaxu nú uni Jesuse ejemplu cua', uri'inu seidu nú nzanu enza Jerusalén. ²⁹Nu chenu uriñanu axu eyeche Betfagé cuna Betania axu dañi nú lee Olivos, che uxe'lanu chiucu bee bene'nu, ³⁰nu uninu lubeella:

—Uquiahua eyeche nú nchiucu' enza lucua'. Nu chenu riñahua ze'e llela'hua tucu burro enu niquietu enu lasca'lí ricu bene. Uxe'chehuai' nu ye'tayuhuai'. ³¹Tunu nu' enu nedichia' luhua xinu xe'chehuai', uni'hua lu bene ze'e nú Detá, Jesuse enu rnibiya' luru uni nú uya'ruii.

³²Che uyaa bee bene'nu nu uri'i beella tucu nú uninu lubeella. ³³Nu chenu xe'che beella burro ze'e, bee lluaana'í unidichia' lubeella:

—¿Xinu xe'chehua burro cua'?

³⁴Nu ucuaqui beella:

—Xne Detá, Jesuse rni nú uya'ruií.

³⁵Che unguya' beella burro ze'e elu nzu Jesuse, nu uricu' beella xucu beella equieíí nu uricu Jesuse equieíí. ³⁶Nu ucua'a bee bene xucu beei labe inziu elu udetenu. ³⁷Nu chenu uquixie nú nze laca beella equie dañi nú lee Olivos, ye bee bene enu nzequie Jesuse uquixie beei nú urixialibeei xne chiqui' ñia nzu arqui'beei, nu unibeei bedichia' nze'ca lu Diose, equie ye bee milagro nú ulañi' beei nú uri'ínu.

³⁸Nu unibeei:

—iÑia nze'ta arre, li'ínu enu nze'ta lu cuenda' Pa'ahua Diose! iNu' nú nzuxe liñibe che'tsa Diose enu nzucu liñibe!

³⁹Chequie bee fariseo enu nze'ta leta bee bene enu nzequie li'ínu unibeei lunu:

—Maestro, uqui'ya' bee bene enu nze'taqueie li'ilu nú la bixialí beei scua.

⁴⁰Pero ucuaqui Jesuse lubeei:

—Nia luhua tunu zaca beei, bee quie neca nú bixialí scua.

⁴¹Chequie chenu uriña Jesuse axu eyeche Jerusalén, chenu ulañi'nu eyeche cua' unguna'nu equie cuenda' eyeche cua', ⁴²nu uninu:

—iBee bene eyeche Jerusalén, ala' masia bichiaquie' uri'ihua beya' ti liqui' nú nzuxe arqui'hua! Pero a'chi neca nucua' luhua nee, nu la lañi'huane. ⁴³Riña bichia nú reche'e bee bene enu rlee luhua muro diqui

abenchila' lachihua, nu diqui bee luhuare ri'i condra bee bene li'ihua, ⁴⁴nu úti beei li'ihua. Che nitilu beei lachihua, nu la tsa'na beei ni' stucu quiee equie sa'e, xne né ri'ihua caso Diose chenu ube'ta bi'yanu li'ihua.

Utiliaca' Jesuse bee bene labe ele'ya' Indu llene Jerusalén

(Mt. 21:12-17; Mr. 11:15-19; Jn. 2:13-22)

⁴⁵Lulá bee nucua', uriña Jesuse labe eli'ya' Indu llene Jerusalén, nu uquixienu uluanu bee bene enu ruti cuna bee bene enu sii ze'e, ⁴⁶nu uninu lubeei:

—Lu ichi' Stichia' Diose rni: “Nia neca para nú nacu' bee bene lu Diose”, pero li'ihua rri'ihuane xi neca yube' elu rcua'a bee huana'.

⁴⁷Ye bichia uzete' Jesuse bee bene liñi indu llene Jerusalén, pero bee ule'ya cuna bee ulaxcuela enu reca ley' Moisés cuna bee usticia eyeche ze'e, rla'na beei xa modo úti beei li'ínu. ⁴⁸Pero la llela' beei xa modo úti beei li'ínu, xne ye bee bene chiqui' sucu' diaca lunú sete'nu.

Elurnibiya' nú rlu'cu Jesuse

(Mt. 21:23-27; Mr. 11:27-33)

20 Tucu bichia diqui nú sete' Jesuse bedichia' nze'ca' Diose lubee bene liñi Indu llene Jerusalén. Che uriña bee ule'ya enu rnibiya' lubee ule'ya cuna bee ulaxcuela enu reca ley' Moisés, cuna bee usticia Israel lunu, ²nu unidichia' beella lunu:

—Uni' luru, ¿ti uliqui' elu usticia nú rri'ilu scua? Nu ¿ti uliqui' elurnibiya' nú rri'ilu nucua'?

³Che ucuaqui Jesuse lubeei:

—Le'ca nidichia'a tucu luhua. Ucuauquihua lua nee: ⁴¿Ti uxe'la

Juan para nú rinzalla bee bene?
¿Diose uxe'la li'illa la urre bee bene
la?

⁵Pero uquixie beei nú
ubedichia'nu sa'beei nu rnibeei:
—Tunu nia'ahua nú DiOSE uxe'la
Juan Bautista, che ni nucua'
lua'ahua: “¿Xiquie nú la chili
arqui'hua nú rnilla che?” ⁶Nu le'ca
leca modo nú nia'ahua nú bee
bene uxe'la li'illa, xne úti bee bene
lia'ahua cuna quiee, xne ye bee
bene nzeli arqui' nú Juan Bautista
unga tucu profeta' DiOSE.

⁷Che ucuaqui beei nú la ri'i beei
beya' ti uxe'la Juan nú rinzalla bee
bene. ⁸Nu uni Jesuse lubeei:
—Le'ca la ixiule'a luhua ti uliqui'
elurnibiya' nú rri'á bee nucua'.

Ejemplu' bee moso' enu necha uri'i

(Mt. 21:33-44; Mr. 12:1-11)

⁹Nu chu uquixie Jesuse uninu
lubee bene ejemplu quie':
—Tucu niyu uquienii bee aca uva
lu yu'lla nu chu udete'lla yu'lla
lle'la lubee bene, nu nzalla enza
istu zuculla. ¹⁰Chenu uriña tiambu
nú aca ula'cu uva, uxe'lalla tucu
moso'lla nzetucu lunú rialalla. Pero
udiñi bee bene ze'e moso' cua' nu
scuatsia uxe'la beei li'i. ¹¹Chequie
uxe'la bene enu neca stene yuu ze'e
stucu moso'lla, pero le'ca esquie
udiquichi'qui' beei nze'e nu udiñi
beei nze'e, nu scuatsia uxe'la beei
li'i. ¹²Nu uxe'la bene ze'e stucu
moso'lla, pero udiñi beei moso' ze'e
nu uti'qui beei li'i, nu uhua beei li'i
lu yuu ze'e.

¹³Chequie uni bene enu neca
stene yuu ze'e: “¿Xa ri'á nee? Xe'la
endua enu chiqui' se'ca, tia a'la li'i

lu'cu bee bene cua' ula'na.” ¹⁴Pero
chenu ulañi' bee bene ze'e endu'lla
unibeei lu sa' beei: “Li'i neca enu
ya'nanu yuu quie', te útia'ahua li'i
para nú ya'nanua'ahua yuu quie'.”
¹⁵Nu uhua beei li'i lu yuu ze'e,
nu ungtuti bee bene ze'e li'i. Che
unidichia' Jesuse lubee bene enu
rdichia'nunu:

—¿Xa rri'ihua elliebacu' nú ri'i
bene enu neca stene yuu ze'e cuna
bee bene ze'e? ¹⁶Puese nia luhua nú
nze'talla nu útilla bee bene ze'e, nu
dete'lla yu'lla lu stucu bee bene.

Chenu ubene' beei nucua',
unibeei:

—iAla' la acane scua!

¹⁷Pero ubi'ya Jesuse lubeei nu
uninu:

—Tunu la acane scua, ¿xinu rni lu
ichi' Stichia' DiOSE elu rni?:

Quiee nú uhua u'na bee bene
enu rreche'e ni'i,

quiee cua' neca nú máse uzibi'
ungache' ni'i ze'e.

¹⁸Titse bene enu llica cuchiu' cuna
quiee cua' nehuana zeca bene ze'e,
nu tunu zana' quiee cua' equie bene,
la'xulí li'illa che.

Unedichia' bee bene equie cuenda' bee impuesto

(Mt. 21:45-46; Mr. 22:15-22; Mr. 12:12-17)

¹⁹Bee ule'ya enu rnibiya' lubee
ule'ya cuna bee ulaxcuela enu reca
ley' Moisés. Hora ze'e niarqui' beei
na'tse beei Jesuse, xne uri'i beei
beya' nú lunú uninu scua neca
nucua' contra li'ibeei, pero ulliqui
beei bee bene. ²⁰Che uxe'la beei
bee bene nze tsi'ña li'inu, nu rri'i
bee bene quie' tucu nú neca beei
bene nze'ca, para nú rla'na beei

nú ni Jesuse tucu bedichia' nú ri'i nú dete' cuenda beei li'inu lu gobernador Roma. ²¹Nu unidichia' beei lunu, nú unibeei:

—Maestro, li'iru nediya'ru nú rnilu nu rri'ilu tucu nú rialane, nu rri'ilu tucunecatse lu ye bee bene, nu neli sete'lu bee bene nú xa niarqui' Diose nú huañi bee bene. ²²Uni' luru: ¿Neca nze'ca nú dixiuru bee impuesto lu gobernador Roma la?, ¿urre la neca nze'cae la?

²³Pero chu uri'i Jesuse beya' nú lixiu neca elliebacu' beei, nu uninu lubeei:

²⁴—Ulube'hua tucu melu lua. ¿Tiluu nú nzucu lue, nu ti nombre' nequie lue?

Nu ucuaqui beei:

—Neca nucua' arre César.

²⁵Che uni Jesuse lubeei:

—Ude'te'hua nú neca stene' César lu César, nu ude'te'hua nú neca stene' Diose lu Diose.

²⁶Nu lá llela' beei xi aricu'quiya beei li'inu lu ye nú uninu lubee bene. Nzenutsia arquibeei lunú xa ucuaquinu lubeei, nu leca' xi unibeei.

Chenu unidichia' bee bene equie nú huañi zeca bee bene enu unguti

(Mt. 22:23-33; Mr. 12:18-27)

²⁷Cheela uya chiucu chuna bee Saduseo lu Jesuse. Bee saduceo quie' la chili arquibeei nú huañi zeca bee bene enu unguti. Enze'e unibeei lunu:

²⁸—Maestro, ley' Moisés rni tunu ati tucu niyu nu tsa'nalla una'alla nu lá lu'cu beei endu', che yucu bichi tuxie ze'e una'alla para nú lu'cu beella endu' enu neca xi neca

endu' tuxie ze'e. ²⁹Nu ucua'a achi bichi tucu bene, bichi rluu beei uyucu una'a, pero ungutilla nu né lu'cu beella endu'. ³⁰Chequie uyucu bichi rruco beei una'a ze'e, pero le'ca ungutilla nu né lu'cu beella endu'. ³¹Le'ca uyucu bichi rriuna beei una'a ze'e, nu scua uyucunchu lu achi bichi beei, nu ye beei unguti beei nu né lu'cu beei endu' cuna una'a ze'e. ³²Cheela, le'ca unguti una'a ze'e. ³³Enze'e bichia nú huañi zeca bee bene enu unguti, ¿ta lu achi bee benecua' neca niyu' una'a ze'e, xne ye beei uchía beei cuna li'inchu?

³⁴Nu uni Jesuse lubeei:

—Lu iliulabe quie' xia bee bene nu rdete' beei xinchu'cu beei para nú chia. ³⁵Pero bee bene enu riala nú lu'cu stucu elu nehuañi nú necuqui, li'ibeella enu huañi zeca, niyu si una'a la chia' beella. ³⁶Xne la atia' beella, acatsia beella xi neca bee ángele' Diose nu aca beella lli'ninu, equie nú uhuañi zeca beella. ³⁷Li'iru nediya'ru nú huañi zeca bee bene enu unguti, xne hasta Moisés uni tucu parte lu ichi' Stichia' Diose elu rni nú ulañi'lla aca nú riqui. Nu lu ichi' ze'e rni nú li'inu necanu Diose' Abraham cuna Isaac, cuna Jacob. ³⁸iNu Diose la necanu Diose' bee bene enu unguti, li'inu necanu Diose' bee bene enu nehuañi, xne para li'inu ye bee bene nehuañi!

³⁹Chequie chiucu chuna bee ulaxcuela enu reca ley' Moisés unibeei lunu:

—Uni nze'calu Maestro.

⁴⁰Nu né laca' arquibeei a nacu' dichia'lá beei lunu.

¿Ta lubee famili nze'ta Cristo?

(Mt. 22:41-46; Mr. 12:35-37)

⁴¹Pero uni Jesuse lubeei:

—¿Xinu rni bee bene nú neca Cristo lli'ñi David? ⁴²Nu le'ca li'i David uni lu libro Salmos:

Diose uni lu li'inu enu rnibiya' lua:

“Uzucu cue'tsea chubee,

⁴³hasta nú ri'á ana nú nibi'ya'lu lubee bene enu rle lulu.”

⁴⁴Enze'e tunu Cristo neca lli'ñi David, ¿xi'quie nú rni David lunu Li'ilu rnibi'ya'lu lua?

Uni Jesuse nú necha rri'i bee ulaxcuela enu reca ley' Moisés

(Mt. 23:1-36; Mr. 12:38-40; Lc. 11:37-54)

⁴⁵Ye bee bene uquie'e diaca chenu uni Jesuse lubee bene'nu:

⁴⁶—Ubi'yahua li'ihua lubee ulaxcuela enu reca ley' Moisés, xne riu' arqui'beeí nú enzee beei cuna xucu fiñu beei, nu le'ca riu' arqui'beeí nú lu'cu bee bene ula'na lubeei labe inziu. Nu liñi bee indu rla'na beei nú zucu beei lubee xleta nú máse neca equie, le'ca scua rri'i beei elu nze tacu beei eta. ⁴⁷Le'ca raxi beei ni'i bee una'a enu ungu'ni niyu', nu para nú ni bee bene nú neca beei bene nze'ca, xee rnacu' beei lu Dios. Pero li'ibeei yala beei casti'ya nú mase fuerte.

U'na nú udu'u tucu una'a zaqui

(Mr. 12:41-44)

21 Chenu ulañi' Jesuse nú rdu' bee bene xene u'na liñi alcancia liñi Indu llene Jerusalén, ²le'ca esquie ulañi'nu tucu una'a enu ungu'ni niyu' nu secalla elitsi,

nu udu'lla chiucu melu nú me' liñi alcancia ze'e. ³Che uni Jesuse lubee bene'nu:

—Li'á nia luhua nú máse sibi' u'na nú udu'u una'a zaqui elitsi quie' lunú sibi' u'na nú udu'u beelá bee bene. ⁴Xne ye bee bene rdu'tsia beei lunú sucu sobra equie dimi' beei, pero una'a quie' añinzuca nú secalla elitsi udu'lla ye dimi'lla liñi alcancia añinzuca nú nucua'tsia rlu'culla.

Udixiule'e Jesuse nú rilá Indu llene Jerusalén

(Mt. 24:1-2; Mr. 13:1-2)

⁵Chiucu chuna bee bene rdichia' beei equie cuenda' bee quiee nú ñia rnaa necache' Indu llene Jerusalén, cuna equie cuenda' beenu huaxi seca nú lia rdetel' bee bene para nú suche'e. Nu uni Jesuse lubeei:

⁶—Riña bichia nú ye nú rlañi'hua nee, pero ni' stucu quiee la ya'na'e equie sa'e, yeene rilae.

Xi seña aca chenu enta laxu iliulabe

(Mt. 24:3-28; Mr. 13:3-23)

⁷Nu unidichia' bee bene lunu:

—Maestro, ¿xunga aca bee nucua'? Nu ¿xi seña lube' nú nzula nú aca bee nucua'?

⁸Chequie uni Jesuse lubeei:

—Ubi'yahua li'ihua para nú lecati zequienu li'ihua. Xne nze'ta huaxi bee bene enu ni luhua nú nze'ta beei equie cuenda' li'á, nu ni beei: “Li'á neca Cristo”; urre “Nze'ta axula bichia nú riñanu.” Pero la chili arqui'hua lunú nibeei. ⁹Nu chenu yene'hua nú reca xuu nu rliu bee bene, la lliquihua xne rluti bee nucua' acaxu ante nú laxu iliulabe,

pero la neca lu cuenda' nucua' nú ulaxu iliulabe.

¹⁰Nu unilá Jesuse lubeei:

—Tucu nación liunu cuna stucu nación, nu bee gobierno liunu cuna stucu gobierno. ¹¹Nu aca bee xú nu juerte, nu aca biña, nu aca bee elichia diqui lu iliulabe, nu lañi' bee bene beenú nelliqi rnaa liñibe.

¹²'Pero ante nú aca ye bee nucua', na'tse bee bene li'ihua, nu xitse ri'ínu beei li'ihua nu ri'ibeei nú nehuana zecahua, uya' beei li'ihua liñi bee indu para nú chiu'ulue lu cuenda'hua. Du' beei li'ihua ni'cu' nu cheyubeei li'ihua lubee arre cuna lubee gobierno para nú chiu'ulue lu cuenda'hua equie nú nzeli arqui'hua li'á. ¹³Pero scua nu' modo nú nihua stichia'a lubeei.

¹⁴La qui'ña nú chenu arqui'hua, nu la qui'ña ri'ihua elliebacu' xa cuaquihua lubee bene ze'e, ¹⁵xne li'á liquia elliebacu' luhua cuna bee bedichia' nú nihua. Ni' tucu bee enu rlee luhua la riqui' beei nú yene' beei bedichia' cua', nu le'ca leca modo ni condra beei li'ihua. ¹⁶Pero li'ihua riña bichia nú hasta bee pa'hua cuna bee na'hua cuna bee bichihua cuna bee famili'hua cuna bee bene enu rquiete'hua dete' cuenda beei li'ihua, nu nu'hua enu uti bee bene. ¹⁷Nu ye bee bene iliulabe chana arqui'beei li'ihua, equie nú necahua bee benea.

¹⁸Pero ni' tucu ichia equiehua la nitihua equie bee nucua'. ¹⁹Utsuta' arqui'hua lu stichia'a para nú chu'uhua liñibe elu huañilshua.

²⁰'Chenu lañi'hua nú nucua'a bee sundado diqui abenchila' eyeche Jerusalén, uri'ihua beya' nú nzula

nú laxu eyeche ze'e. ²¹Chequie bee bene enu nucua'a bee eyeche Judea, rqui'ña nú yecaxu'u beei enza dañi, nu bee bene enu nucua'a eyeche Jerusalén, rqui'ña nú chiu'u beei eyeche cua', nu bee bene enu rri'i riña' enza ru'u eyeche la benchila' beei eyeche ze'e. ²²Xne bee bichia ze'e dete' Diose castiya bee bene para nú yalu ye tucu nú niquie lu ichi' Stichia' Diose. ²³i'Pero cue' bee una'a enu nu' endu' xla'cu cuna bee una'a enu nuu bee endu enu rachi bichia ze'e! Xne chiqui' nehuana zeca bee bene, nu yala bee bene eyeche ze'e tucu castiya nú juerte. ²⁴Texcua'a beei ati lu xuu, nu texcua'a beei uya' bee bene preso diqui lu iliulabe, nu bee bene rene nibiya' Jerusalén, hasta nú yalu bichia nú tsana' Diose nú nibiya' beei ze'e.

Chenu nze'ta zeca li'ínu Bene enu uxe'la Diose

(Mt. 24:29-35, 42-44; Mr. 13:24-37)

²⁵'Chequie lañi' bee bene seña lu bichia cuna lu uu cuna lubee belaa, nu lu iliulabe la ria' bee bene beya' xi ri'i beei, nu lliqui beei xne chiqui' juerte lliche inzatu' lunú cuñine. ²⁶Hasta nú chiula' bee bene equie nú lliqui beei chenu ri'i beei elliebacu' lunú aca lu iliulabe quie', nu hasta beenú nu' liñibe cuñi. ²⁷Chequie lañi' bee bene iliulabe Bene enu uxe'la Diose, nú tu'na rulu siqui'nu nze'tanu liñi xcabe cuna ye nú rlu'unu. ²⁸Chenu quixie nú aca bee nucua', udu'hua ana arqui'hua nu uletsahua luhua, xne axula uriña bichia nú tsila'ahua lunú nehuana zecahua.

²⁹Le'ca uni Jesuse lubeei ejemplu quie':

—Ubi'yacuruhua aca higo, urre tatse stucu bee aca. ³⁰Chenu lañi'hua nú riyel' leca e'ne' lubee aca, li'ihua rri'ihua beya' nú nze'ta axula nú aca nelee. ³¹Le'ca esquie, chenu lañi'hua nú uquixiela nú aca bee nucua', ri'ihua beya' nú nze'ta axula lunú rnibiya' Diose.

³²Li'á nialuhua nú ye bee nucua' aca ante nú ati ye bee bene enu nehuañi tiembu quie'. ³³Liñibe cuna iliulabe laxu, pero stichia'a la dete nú yalue.

³⁴Ubi'yahua li'ihua para nú la ri'i bee bicio ana luhua nu la ri'i úniqui ana luhua nu la acu xe'tahua nu la ri'ihua nú chenu arqui'hua nú xa huañihua para nú chenu benchila' zecaa, la aca bichia ze'e nu tu'natsia llunahua. ³⁵Xne scua aca bichia ze'e para lu ye bee bene iliulabe. ³⁶Ucua'a tsiñahua, nu ye bichia una'cu'hua lu Diose para nú nu' modo tsila'ahua lu ye beenú aca lu iliulabe, nu para nú scua nu' modo riñahua lu Bene enu uxe'la Diose.

³⁷Bichia uzete' Jesuse bee bene liñi indu llene Jerusalén, nu rula' nzanu ria'nanu dañi nú lee Olivos. ³⁸Nu ye bee bene se sila' liñi Indu Jerusalén cua' para nú riene' beei lunú rminu.

Uri'i bee bene elliebacu' xa modo na'tse beei Jesuse

(Mt. 26:1-5, 14-16; Mr. 14:1-2, 10-11; Jn. 11:45-53)

22 Chenu nze'ta axula eliñi baxcu, chenu racu bee bene pá nú la chu'u levadura equie,

²chequie bee ule'ya enu rnibiya' lubee ule'ya cuna bee ulaxcuela enu reca ley' Moisés, rla'na beei xa modo úti beei Jesuse, xne xiqui beei bee bene.

³Nu uyu'u beze'lu arqui' Judas Iscariote, li'i necai tucu lu chi'chiucu bee bene' Jesuse. ⁴Che uya Judas lubee ule'ya enu rnibiya' lubee ule'ya cuna lubee bene enu rnibiya' liñi indu, nu uni lubeella nú xa dete' cuendai Jesuse lubeella. ⁵Che chiqui' ñia utsu arqui'beella chenu ubene' beella nucua', nu uni beella nú dete' beella dimi yai. ⁶Nu uzelai, che uquixiei nú ucua'nai xa modo dete' cuendai Jesuse chenu la ri'i bee bene beya'.

Exee nú udacunuu Jesuse bee bene'nu

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷Chenu uriña bichia liñi baxcu nú racu bee bene Israel pá nú la nucha levadura, cuna chenu riñi bene tucu sanchi lla'na xi neca u'na lu Diose. ⁸Chequie uxe'la Jesuse Pedro cuna Juan, nú uninu lubeella:

—Uquiahua nu ureche'hua exee nú da'cuxe'ahua reché baxcu.

⁹Nu unidichia' beella lunu nú uni beella:

—¿Cá niarqui'lu nú ri'ilurune?

¹⁰Che uni Jesuse lubeella:

—Chenu chu'uhua eyeche Jerusalén, ze'e lla'cahua tucu niyu enu nuya' tucu ere'e inza, uquia quieehualla hasta ni'i elu chu'ulla, ¹¹nu uni'hua lu bene enu neca stene ni'i ze'e: “Singuie rni Maestro, ¿Cá nzucu cuarto elu acuxénua bee benea reché baxcu?” ¹²Che lube'

bene ze'e tucu cuarto elu ayaa nú nzu che'ela liñi. Ze'e reche'ehua nú da'cuxe'ahua.

¹³Chequie uya beella nu ullela' beella tucu nú uni Jesuse lubeella, nu ureche'e beella nú acuxee beella reché baxcu.

¹⁴Chenu uriña hora, uzucu Jesuse cuna bee apóstol'nu lu mexa. ¹⁵Che uni Jesuse lubeella:

—iChiqui' niarquía nú acuxenuahua rula' baxcu quie' ante nú enta nú chiqui' nehuana zecaa! ¹⁶Xne li'á nia luhua nú leca' bichia nú acunu zeca li'ihua lu iliulabe quie' stucu bese, nu hasta elurnibiya' Diose acunu zeca li'ihua.

¹⁷Che una'tsenu tucu copa biñu, nu chenu ulaxu nú udete'nu che'tsa lu Diose, uninu:

—Una'tsehua biñu quie' nu uhue'huane nu uri'tsi'huane lubee sa'hua. ¹⁸Xne li'á nia luhua nú leca' bichia nú hua'a biñu hasta bichia nú riña lunú rnibiya' Diose.

¹⁹Chequie una'tsenu pá, nu chenu ulaxu nú udete'nu che'tsa lu Diose, ule'enu pá ze'e nu udete'nue yabeella, nu uninu:

—Pá quie' neca cuerpoa nú detecuendaa chenu atia equie cuenda' li'ihua. Nu chenu ri'ihua scua, uri'ihuane equie nú nchiucu' arqui'hua li'á.

²⁰Le'ca scua uri'inu cuna copa biñu chenu ulaxu nú udacuxee beella, nu uninu:

—Biñu quie' neca renea nú ri'chia chenu atia para nú scua ya'la tucu inziu cuquí nú nu' modo ri'i Diose perdona bee bene.

²¹'Pero nee enu dete' cuenda li'á nchiucu' ya lu mexa elu nchiucu'

yaa. ²²Pero li'á Bene enu uxe'la Diose, rqui'ña nú zecaa lunú nzu nú zecaa, pero icue'e bene enu dete' cuenda li'á para nú atia!

²³Chequie uquixie beella nú unidichia' beella lu sa'beella, ta beella neca enu dete' cuenda li'inu.

Ti mase neca equie

²⁴Che uquixie beella nú uni beella lu sa'beella nú ta beella neca enu mase neca equie. ²⁵Pero uni Jesuse lubeella:

—Lu iliulabe quie' bee arre chiqui' juerte rnibiya' beei lubee bene lachi beei, nu bee enu rnibiya' rni bee bene nú rri'i beei tucu nú rialane lubee bene. ²⁶Pero li'ihua la yala nú ri'ihua scua, enu máse neca equie letahua, rqui'ña nú aca nze'e enu lecati neca, nu enu rnibiya' rqui'ña nú aca nze'e xi neca tucu enu sibi'. ²⁷Lu iliulabe quie' sucu bee patrón lu mexa, nu bee moso' sibi' lubeei. Pero leta'ahua la acane scua, xne li'á nzua cuna li'ihua xi neca tucu enu sibi' luhua.

²⁸'Li'ihua necahua enu siempre nzu cuna li'á bee bichia nú nehuana ulle'caa. ²⁹Enze'e liquia luhua lunú rnibiya'a, tucu nú uliqui' paa lunú rnibiya'nu lua, ³⁰nu acuhua lu mexa elu nibiya'a nu le'ca zucuhua lu xleta para nú hualuhuane lu cuenda' ye bee bene enu nze'ta lu chi'chiucu famili' bee bene Israel.

Uni Jesuse nú ni Pedro nú la chululla li'inu

(Mt. 26:31-35; Mr. 14:27-31; Jn. 13:36-38)

³¹Le'ca uni Jesuse:

—Simón, Simón, ubi'yacuru, xne unacu'la beze'lu li'ihua lua para

nú ri'inui li'ihua tucu nú rri'inu bene trigo chenu rcuillae. ³²Pero uziquieelá lu Diose lu cuenda'lu para nú la tsana'arqui'lu nú nzeli arqui'lu li'á. Nu chenu chili zeca arqui'lu li'á stucu bese, uri'i elietsa lubee sa'lu para nú tsuta' arqui'beella lunú nzeli arqui' beella li'á.

³³Chequie uni Pedro lunu:

—Detá, nzua para nú cha'a ni'cu' cuna li'ilu, nu hasta nú atia cuna li'ilu.

³⁴Nu uni Jesuse lulla:

—Li'á nia lulu Pedro, nú rula' quie', ante nú bixia tiula, li'ilu unilálu chuna bese nú la chululu li'á.

Axula nzu lunú zeca Jesuse

³⁵Che uni Jesuse lubeella:

—Chenu uxe'la li'ihua né uya'hua ni' tucu bolsa, ni' dimi ni' stucu para lucuhua, ¿nu xie' nu' nú uri'i falta li'ihua la?

Nu uni beella:

—Lecaxi uri'i falta li'iru.

³⁶Chequie uninu lubeella:

—Pero nee enu rlu'cu dimi nu rlu'cu biti, rqui'ña nú uya' nze'e nucua'. Nu enu la lu'cu espada, uti nze'e xucu nze'e para nú tsi nze'e tucue. ³⁷Xne rqui'ña nú yalu tucu nú niquiee lu ichi' Stichia' Diose equie cuenda' li'á elu rni: “Nu ubacu' bee bene li'inu leta bee bene enu necha rri'i.” Ye nú nequie lu ichi' Stichia' Diose equie cuenda' li'á, rqui'ña nú yalu nucua'.

³⁸Chequie uni beella lunu:

—Ca'a rlu'curu chiucu espada.

Nu ucuaquinu lubeella:

—Cuna nucua'tsia zibi' qui'ña'ahua.

Chenu unacu' Jesuse lu Diose tucu luhuare elu lee Getsemani

(Mt. 26:36-46; Mr. 14:32-42)

³⁹Nu chu uchiu'u Jesuse nu nzanu dañi nú lee Olivos tucu nú neca costumbre'nu, nu nziquie bee bene'nu li'inu. ⁴⁰Chenu uri'ña beella dañi ze'e uninu lubeella:

—Una'cuhua lu Diose, para nú la ri'i beze'lu ana luhua.

⁴¹Che uchiu'u chunu lubeella nu nzanu xi neca tucu nú si'qui bene tucu quiee, nu chu utsulliquinu ze'e nu unacu'nu lu Diose. ⁴²Nu uninu:

—Paa, tunu laca arqui'lu, utsila'a li'á lunú nehuana enta zecaa. Pero la ri'ilu tucu nú niarquia, uri'itsia tucu nú niarquiu'lu.

⁴³Che ulube'lu tucu ángele' Diose li'ñibe lunu, nu udu' nze'e juerza'nu.

⁴⁴Nu chenu chiqui' nehuana secanu, másela juerte rnacu'nu lu Diose, nu sana' inza nú suinzanu hasta lu yuu xi neca tucu gota réne.

⁴⁵Chenu utsulínu elu unacu'nu lu Diose, nzanu lubee bene'nu nu ulluna'nu li'ibeella nú ra'tse beella, xne néhuana nzu arqui'beella. ⁴⁶Nu uninu lubeella:

—¿Xinu ra'tsehua? Uzetehua nu unacu'hua lu Diose para nú la ri'i beze'lu ana luhua.

Chenu una'tse bee bene Jesuse

(Mt. 26:47-56; Mr. 14:43-50; Jn. 18:2-11)

⁴⁷Rniscalá Jesuse lubeella, chenu uri'ña huaxi bee bene. Nu enu lee Judas, enu unga tucu bee bene'nu, li'i nzucului lu ye bee bene ze'e, nu chu uyabicaí lu Jesuse para nú udacuí bichiu' xecanu. ⁴⁸Nu uní Jesuse lui:

—Judas, ¿xie' cuna tucu bichiu'tsia dete' cuendalu li'á Bene enu uxe'la Diose la?

⁴⁹Che bee bene enu nucua'a cuna Jesuse, chenu ulañi' beella nú reca, necachi uni beella lunu:

—¿Detá, huaru espada para nú liunu'ahua li'ibeei la?

⁵⁰Chequie tucu bee bene'nu uchiecu' diaca chubee tucu moso' ule'ya enu rnibiya' lubeelá bee ule'ya. ⁵¹Pero uni Jesuse lubeella:

—Necane nee, utsana'hua beei.

Che uti'nu yanu diaca bene ze'e nu uri'iyecanue. ⁵²Nu chu uninu lubee ule'ya enu rnibiya' lubee ule'ya, cuna lubee bene enu rnibiya' lubee bene enu rri'i ucu Indu llene Jerusalén, cuna lubee usticia' bee bene Israel, enu uriña nú uya' li'inu:

—¿Xinu nze'tahua cuna espada nu cuna acarute para nú uya'hua li'á xi neca tucu huana'? ⁵³Ye bichia nzua cuna li'ihua liñi Indu llene Jerusalén nu ne na'tsehua li'á, pero nee uriña hora nú rnibiya' beze'lu luhua.

Uni Pedro nú la chululla Jesuse

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴Nu chenu una'tse beei Jesuse, unguya' beei li'inu ni'i ule'ya enu rnibiya' lu beelá bee ule'ya, nu istu nzequie Pedro li'inu. ⁵⁵Che ucua'a bee bene quii labe eli'ya' ze'e, nu ucua'a beei ru'u quii ze'e, nu le'ca uzucu Pedro cuna li'ibeei ze'e. ⁵⁶Nu chenu ulañi' tucu criada li'illa nú nzuculla ru'u quii ze'e, ri'yalinchu lulla nu uninchu:

—Le'ca nuu bene quie' enzee cuna Jesuse.

⁵⁷Pero ucachi' Pedro nú unilla lu una'a ze'e:

—La chulua nucua'.

⁵⁸Sterratutsia, chenu ulañi' stucu bene ze'e li'illa, che uni lulla:

—Le'ca nuulu necalu tucu sa' beella.

Pero ucuaqui Pedro nú unilla:

—A'a déta, laca bene'lla.

⁵⁹Chenu udete xi neca tucu hora, uni stucu bene lulla:

—Neli nú le'ca nuu bene quie' enzee cuna Jesuse, xne necalla bene Galilea.

⁶⁰Nu ucuaqui Pedro:

—La ri'á beya' xi rnilu.

Hora nú rni Pedro scua ubixia tiula.

⁶¹Che ubelleta Jesuse nu ubi'yanu lu Pedro, nu ullu'cu arqui'lla lunú uni Jesuse lulla: “Ante nú bixia tiula unilalu chuna bese nú la chululu li'á.”

⁶²Nu chu uchiu'u Pedro ru'u eli'ya' ze'e, nu chiqui' unguna'lla.

Utsequichia' bee bene Jesuse

(Mt. 26:67-68; Mr. 14:65)

⁶³Bee bene enu rriucu Jesuse, udiquichi'qui' beei li'inu, nu udiñi beei li'inu. ⁶⁴Utsacu' beei lunu, nu udiñi beei li'inu nu unibeei lunu:

—iUri'i beya' ti udiñi li'ilu!

⁶⁵Nu unibeei huaxilá bee bedichia' nú necha neca lunu.

Chenu uyayu bee bene Jesuse lubee usticia' bee bene Israel

(Mt. 26:59-66; Mr. 14:55-64; Jn. 18:19-24)

⁶⁶Chenu uye'e lu yuu stucu bichia, uyetesa' bee usticia' bee bene Israel cuna bee ule'ya enu rnibiya' lubee ule'ya, cuna bee ulaxcuela enu reca ley' Moisés, nu uyayu beei Jesuse elu nucua'a yebee usticia' beei.

Ze'e unidichia' beei lunu:

⁶⁷—Uni' luru, ¿li'ilu necalu Cristo enu uxe'la Diose la?

Nu ucuaqui Jesuse lubeei:

—Tunu nia luhua nú li'á neca Cristo enu uxe'la Diose, la chili arqui'hua li'á. ⁶⁸Nu tunu nedichia'a luhua la cuaquihua, nu le'ca la la'ahua li'á. ⁶⁹Pero desde nee Bene enu uxe'la Diose zucunu cue'tse Diose chubee enu rnibiya' lu yeene.

⁷⁰Chequie unidichia' ye beei lu Jesuse:

—¿Li'ilu necalu Lli'ñi Diose la?

Nu ucuaqui Jesuse lubeei:

—Scua necane li'á nze'e.

⁷¹Che unibeei:

—¿Para qué nú la'nala'ahua máse bee testigo nee? Nu le'ca lia'ahua ubene'ahua lunú uni nucua' scua.

Uyayu bee bene Jesuse lu Pilato

(Mt. 27:1-2, 11-14; Mr. 15:1-5; Jn. 18:28-38)

23 Che utsuli ye beei, nu uyayu beei Jesuse lu Pilato.

²Ze'e uquixie beei nú rricu' quiya beei li'inu eluquichia', nu unibeei:

—Ulluna'ru benequie' nú sequienu nucua' bee bene lachia'ahua. Nu rni nucua' nú la qui'ña dixiu'ahua bee impuesto lu gobernador César, nu le'ca rni nucua' nu neca nucua' Cristo cuna arre.

³Nu unidichia' Pilato lunu:

—¿Li'ilu necalu arre' bee bene Israel la?

Nu ucuaqui Jesuse nú uninu:

—Li'á nze'e.

⁴Che uni Pilato lubee ule'ya enu rnibiya' lubee ule'ya, cuna lu ye bee bene:

—La llelaa ni' tucu falta nú uri'i benequie'.

⁵Pero li'ibeei máse juerte unibeei:

—Nucua' sequienu ye bee bene cuna lunú sete' nucua'. Uquixie nucua' nú rri'i nucua' scua desde Galilea, nu le'ca scua rri'i nucua' ca'a Judea.

Chenu uyayu bee bene

Jesuse lu Herodes

⁶Chequie chenu ubene' Pilato nucua', unidichia'lla lubeei tunu neca Jesuse bene lu iliu Galilea.

⁷Nu chenu unibeei nú necanu bene Galilea, uxe'la Pilato li'inu lu

arre Herodes enu rnibiya' lu iliu Galilea, xne bee bichia ze'e nzucu

Herodes Jerusalén. ⁸Chenu ulañi'

arre Herodes Jesuse chiqui' ñia utsu arqui'lla, xne hasta hua'tu

niarquillla nú lañi'lla li'inu. Nu ubene'la'lla nú rni bee bene lu

cuenda'nu, nu nzuquiella nú ri'inu tucu milagro. ⁹Huaxi nú

unidichia'lla lu Jesuse, pero lecaxi ucuaquinu. ¹⁰Le'ca ze'e nucua'a

bee ule'ya enu rnibiya' lubee ule'ya, cuna bee ulaxcuela enu reca

ley' Moisés, nu la tsuxe beei nú rricu'quiya beei li'inu eluquichia'.

¹¹Chequie arre Herodes cuna bee sundado'lla chiqui' necha uri'inu

beei Jesuse, nu ungotu beei li'inu laquie fiñu nú rutu bee arre, nu xitse

uri'chia beei li'inu, nu chu uxe'la zeca arre Herodes li'inu lu Pilato.

¹²Bichia ze'e uyu'u nú uquiete' arre Herodes Pilato, pero ante nú aca bee

nucua', rlee beella lu sa' beella.

Unacu' bee bene nú ati Jesuse

(Mt. 27:15-26; Mr. 15:6-15; Jn. 18:39-19:16)

¹³Chequie unibiya' Pilato nú uyete sa' bee ule'ya enu rnibiya' lubee

ule'ya cuna bee usticia' bee bene Israel, cuna ye bee bene yeche.

¹⁴Nu unilla.

—Li'ihua uriñayuhua benequie', nu unihua nú sequienulla bee bene. Pero ante lu yehua unidichia'a lulla nu la llelaa ni' tucu nú xi uri'illa, tucu nú rnhua lu cuenda'lla. ¹⁵Nu le'ca esquie arre Herodes. Enze'e uxe'la zecalla benequie' lua.

Ulañi'hua nee nú la lu'culla ni'tucu equiya nú uri'illa para nú atilla.

¹⁶Nee detea castiya li'illa, nu chu la'a li'illa.

¹⁷Bee bichia liñi baxcu ze'e rla'a Pilato tucu bene tucu nú neca costumbre' beei. ¹⁸Pero ye beei uquixie beei urixialibeei nú unibeei:

—iAti benecua! iNu ula'a Barrabás!

¹⁹Barrabás quie' unibiya' bee usticia nú uyu'i ni'cu' equie nú uliunui bee usticia eyeche Roma nu uliunuu bee benecua' eyeche Jerusalén, cuna equie nú unguuti bene. ²⁰Niarqui' Pilato nú la'alla Jesuse, nu uni zecalla lubeei stucu bese, ²¹pero máse juerte urixialibeei nú unibeei:

—iUquie'e nucua' lu cruse!

iUquie'e nucua' lu cruse!

²²Bese rriuna uni Pilato lubeei:

—Pero ¿ta nú necha neca uri'i nucua' che? La llela ni' tucu nú xi uri'i nucua' para nú yala nú ati nucua', detea castiya nucua' nu che la'alla.

²³Pero máse urixialibeei nú unibeei lu Pilato nú quie'ella Jesuse lu cruse. Equie nú urixiali bee benecua' scua cuna bee ule'ya enu rnibiya' lubee ule'ya, enze'e

uri'i beei ana nú unga lunú niarqui' beei. ²⁴Che ulaca arqui' Pilato nú ri'illa tucu nú niarqui' beei. ²⁵Scua uri'illa tucu nú niarqui' bee bene ze'e, ula'alla Barrabás enu uyu'u ni'cu' equie nú uri'i xuu cuna nú unguuti bene, nu udete' cuendalla Jesuse lubeei para nú ri'i beei lunú niarqui' beei cuna li'inu.

Chenu uquie'e bee bene Jesuse lu cruse

(Mt. 27:32-44; Mr. 15:21-32; Jn. 19:17-27)

²⁶Chenu unguya' beei Jesuse para nú quienu lu cruse, unibeei lu tucu bene eyeche Cirene, enu lee Simón. Nu nze'talla enza dañi, nu unibeei nú ri'illa elietsa'nu uya'lla cruse'nu nu chequiella li'inu.

²⁷Huaxi bee bene uyaquie li'inu, nu huaxi bee una'a runa' nu rixiali beenchu xne ru'a arqui' beenchu li'inu. ²⁸Pero ubi'ya Jesuse lu beenchu nu uninu:

—Bee una'a Jerusalén, la una'hua lu cuenda' li'á, una'hua equie cuenda' li'ihua cuna lu cuenda' bee lli'ñihua. ²⁹Xne nze'ta bichia nú ni bee bene: “Ñia nza lu cuenda' bee una'a enu lá lu'cu bee endu', cuna bee una'a enu la chu'u endu' xla'cu, cuna bee una'a enu lá ri'i ru'cu bee endu'.” ³⁰Chequie quixie bee bene nú ni beei lubee dañi: “iUzana'hua equieru!”, nu ni beei lubee loma: “iUca'chi'hua li'iru!” ³¹Nu tunu li'á rri'inu beei scua, ¿enza laquie' li'ihua nú la ri'inu bee bene li'ihua scua?

³²Le'ca nzeyu beei chiucu huana' para nú quie'e beei bee nze'e lubee cruse, cuna Jesuse. ³³Chenu uriña beei luhuare elu lee calabera,

uquie'e beei Jesuse lu cruse cuna rucu bee huana' ze'e lu tucua cruse. Tucu nze'e uquie'e beei cue'tsenu chúbee, nu stucu nze'e cue'tsenu chúbeca. ³⁴Nu chenu rquie'e beei Jesuse lu cruse uninu:

—Paa, uri'i perdona bee benequie' xne la ri'i beei beya' lunú rri'i beei. Che urita bee sundado tucu rifa para nú uritsi' beei xucunu lu sa' beei. ³⁵Nu nucua'a bee bene ri'ya ze'e, nu hasta bee usticia utsequichia' beei Jesuse, nu unibeei lunu:

—Utsila'a nucua' stucu bee bene, puese tsila'i li'i nee, tunu neli nú necai Cristo enu ucañi Diose.

³⁶Le'ca xitse uri'inuu bee sundado ze'e li'inu, nu uyabica beei lunu nu uдете' beei vinagre para nú güe'nu. ³⁷Nu unibeei lunu:

—iTunu li'ilu necalu arre' bee bene Israel, utsila'a le'catsia li'ilu!

³⁸Nu niquie tucu letrero equie cruse'nu, cuna bedichia' griego cuna latín, cuna hebreo, nú rni: “Benequie' neca arre' bee bene Israel.”

³⁹Tucu bee huana' enu niquie lú cruse uni bedichia' nú necha neca lu Jesuse:

—iTunu li'ilu necalu Cristo, utsila'a li'ilu nu utsila'a li'iru!

⁴⁰Pero stucui uri'i nú uqui'ya'i nu uni lusa'i:

—¿Xie' la lliquilu Diose añinzuca nú le'ca secalu castiya cua'la?

⁴¹Neli nú riala ze'ca'a castiya quie', xne scua riala nú rixiu'a beenú uri'á, pero benequie' lá ri'i ni' tucu nú necha neca.

⁴²Nu uni lu Jesuse:

—Jesuse, ullu'cu' arqui' li'á chenu quixie nú nibiya'lu.

⁴³Che uni Jesuse lui:

—Li'á nia lulu, nú nee bichiaquie' nzulu cuna li'á liñibe.

Chenu unguți Jesuse

(Mt. 27:45-56; Mr. 15:33-41; Jn. 19:28-30)

⁴⁴Chenu unga rebibichia, diqui lu iliulabe ucabelí hasta rquiechuna uchee. ⁴⁵Ucabe lu bichia, nu utsaa arli'ti'lluu cortina nú nzi'qui liñi Indu llene Jerusalén. ⁴⁶Nu juerte urixiali Jesuse nú uninu:

—iPaa, yalu tsa'na espíritu!

Chenu uninu scua, chu unguținu.

⁴⁷Chenu ulañi' capitañi enu rnibiya' lubee sundado romano lunú unga, che uni bedichia' nze'ca lu Diose nú uni:

—Neli nú né ri'i benequie' ni' tucu nú necha neca.

⁴⁸Ye bee bene enu nucua'a ze'e, chenu ulañi' beei nú ungae scua, chu nziue beei nu xutse beei ya beei latsa beei. ⁴⁹Pero ye bee bene enu nu'lu Jesuse, cuna bee una'a enu uyaquiee li'inu desde Galilea, istu ucua'a beella ubi'ya beella lu ye nú unga scua.

Chenu uhuachi' Jesuse

(Mt. 27:57-61; Mr. 15:42-47; Jn. 19:38-42)

⁵⁰Uhuañi tucu bene enu neca bene nze'ca, nu uri'illa tucu nú rialane lu Diose. Li'illa leella José. Nu lachilla lee Arimatea, nú nchiñi lu iliu Judea, nu ungalla tucu bee usticia' bee bene Israel. ⁵¹José quie' nzuquiee lunú rnibiya' Diose. Enze'e la nzulla chú' bee usticia enu unibiya' nú unguți Jesuse.

⁵²Chequie uyaalla unilla lu Pilato para nú unacu'lla cuerpo' Jesuse lu Pilato. ⁵³Chenu ulaxu nú ulacalla

cuerpo' Jesuse lu cruse, che utelalla tucu sabana fiñu cuerpo'nu, nu uyaca'chi' beella cuerpo'nu liñi tucu eluhua nú neda'ñi liñi tucu quíee, elu lasca' achi' bee bene.

⁵⁴Bichia ze'e neca bichia xee nú sulachi bee bene Israel, nu steme'tsia rri'i nú quixíee bichia nú sulachi bee bene chenu uyaca'chi' beella Jesuse.

⁵⁵Bee una'a enu uyaquíee Jesuse desde Galilea, uya beella nu ulañi' beella eluhua' Jesuse, nu le'ca ulañi' beella xa uricu cuerpo'nu ze'e. ⁵⁶Nu chenu ubenchila' beella, ureche' beella perfume nú ñia rlia cuna unguento. Nu chu utsulachi beella bichia nú sulachi bee bene Israel, tucu nú rnibiya' ley.

Chenu uhuañi zeca Jesuse nú ungutinu

(Mt. 28:1-10; Mr. 16:1-8; Jn. 20:1-10)

24 Domingo sila' stucu bichia, uya bee una'a ze'e ru'u eluhua' Jesuse, nu unguya' beella perfume nú ureche' beella, nu le'ca yanu beella xiucu xuna bee una'a. ²Chenu uriña beella ze'e, ulañi' beella nú udocu'la quíee llene nú uyacu' ru'u eluhua ze'e. ³Nu uyu'u beella liñi eluhua ze'e, pero né lle'la' beella cuerpo' Jesuse. ⁴Hora ze'e chenu xiqui beella nu la ri'i beella beya' xa ri'i beella, ulañi' beella chiucu niyu enu nzulí axu lubeella, nutu bee nze'e laquie nú rulu siqui'. ⁵Nu lunú chiqui' ulliqui beella uzi'qui ndiqui beella hasta lu yuu, nu uni bee niyu ze'e lubeella: —¿Xinu rla'nahua tucu bene enu nehuañi leta bee bene nguti? ⁶Leca'nu ca'a, xne uhuañi zecanu.

Ullu'cu arqui'hua lunú uninu luhua chenu nzusca'nu Galilea. ⁷Uninu luhua nú li'ínu Bene enu uxe'la Diose, rqui'ña nú dete cuendanu lubee bene enu rri'i dula para nú quíe'e beei li'ínu lu cruse, nu acatsia bichia rriuna huañi zecanu.

⁸Che ullu'cu' arqui'beella bedichia' nú uni Jesuse lubeella, ⁹nu chenu nzia beella nú uchiu'u beella ru'u eluhua ze'e udixiule'e beella ye nú ulañi' beella lu se chetu'cu bee bene'nu cuna lu beelá bee bene. ¹⁰María Magdalena, cuna Juana, cuna María na' Jacobo, cuna beela bee una'a, neca beella enu uyayu resuna cua' lubee apóstol'nu. ¹¹Pero né chili arqui'beella lunú uni bee una'a cua', xne seca beella nú lia rnitsia beella nucua'.

¹²Pero xexu'u Pedro uyabi'ya ru'u eluhua ze'e, nu chenu ubi'yalla liñi, ulañi'tsialla sabana nú ubelanu nchiucu' ze'e, nu ubenchila'lla nu chiqui' nzeno arqui'lla lunú ulañi'lla nu unga scua.

Lunú unga lu inziu Emaús

(Mr. 16:12-13)

¹³Le'ca bichia ze'e, chiucu bene' Jesuse nzuebeella lu eyeche nú lee Emaús, eyeche cua' neca tucu chetu'cu kilómetro para Jerusalén. ¹⁴Chenu nzuebeella lu inziu rdichia' beella lu ye nú unga. ¹⁵Diqui' nú rdichia' beella, uyabica Jesuse lubeella nu uquixienu nú nzenunu li'ibeella. ¹⁶Añinzuca nú ri'ya beella lunu, pero la zela Diose nú luego chulu beella li'ínu. ¹⁷Nu unidichia' Jesuse lubeella:

—¿Xi equie rdichia'hua diqui' nú nze'tahua inziu? Nu xinu nehua

nzu arquí'hua. ¹⁸Tucu beella enu lee Cleofas, ucuahui:

—Ye bee bene nediyá' lunú unga eyeche Jerusalén bee bichiaquie'. ¿Xie' li'itsialu enu uzucu Jerusalén lá ri'ilu beya' lunú unga ze'e la?

¹⁹Nu unidichia'nu lubeella:

—¿Xi unga che?

Nu uni beella lunu:

—Lunú uri'ínu bee bene Jesuse enu neca bene eyeche Nazaret, li'ínu unganu tucu profeta enu chiqui' reca lunú uri'ínu cuna bee bedichia' nú uninu lu Diose, cuna lubee bene. ²⁰Nu bee ule'ya enu rnibiyá' lubee ule'ya cuna bee usticia'ru, udete' cuenda beella li'ínu para nú atinu nu uquie'e beella li'ínu lu cruse. ²¹Li'iru nzu arquí'ru nú li'ínu a tsila'anu bee bene Israel. Pero nee necala bichia rriuna nú unga ye bee nucua'.

²²Añinzuca nú texcua'a bee una'a enu nucua'a cuna li'iru uchiiqui beella li'iru, xne nee zila' quie' uya beella ru'u eluhua'nu, ²³nu lunú néllela' beella cuerpo'nu, ubenchila' beella nu uni beella nú ulube'lu bee ángele lubeella, uni bee ángele cua' lu beella nú nehuañi Jesuse. ²⁴Che uya chiucu chuna bee sa'ru uyabi'ya ru'u eluhua ze'e, nu ulañi' beella tucu nú uni bee una'a ze'e, pero né lañi' beella Jesuse.

²⁵Nu uni Jesuse lubeella:

—iChiqui' lle'natsia rri'ihua beya', nu rle'e nzeli arquí'hua ye bee nú uni bee profeta hasta hua'tu!

²⁶¿Xie' la qui'ña nú nehuaña zeca Jesucristo ye bee nucua' nu cheelá zucunu liñibe la?

²⁷Che uquixienu udixiule'enu xi rni ye nú niquite lu ichi' Stichia'

Diose lu cuenda'nu. Uquixienu cuna bee libro nú uquie'e Moisés, nu chu uquixia'lanu cuna ye bee libro nú uquie'e bee profeta.

²⁸Chenu uri'ña beella eyeche nú nza beella, uri'i Jesuse tucu nú nzalanu enza lu ze'e. ²⁹Pero uri'i beella juerza li'ínu nú ya'nanu cuna li'ibeella, nu uni beella lunu:

—Uya'na cuna li'iru, xne ucheela nu enta chu'ula rula'.

Che uyu'u Jesuse nu uya'nannu li'i beella. ³⁰Nu chenu nzucunu lu mexa cuna li'ibeella una'tsenu pá, nu chenu ulaxu nú udete'nu che'tsa lu Diose, che ule'enu pá ze'e nu udete'nue udacubeellae. ³¹Hora ze'e ulle'ca beella xi neca nú uya'la i'culu beella nu uyulu beella li'ínu, pero tu'natsia unitinu lubeella.

³²Nu uni beella lu sa'beella:

—Enze'eca nú chenu nzelayua'a li'ínu lu inziu ñia utsi'a chenu uninu nú xa rni lunú rni lu ichi' Stichia' Diose.

³³Chequie le'ca hora ze'e, chu uyu'unziu beella nu ubenchila' beella eyeche Jerusalén, elu neyete' sa' sechetu'cu bee bene'nu cuna beelá bee sa' beella.

³⁴Nu uni bee bene enu nucua'a ze'e lu rucu beella:

—Neli nú uhuañi zeca Jesuse, xne ulube'lulanu lu Simón.

³⁵Nu chu udixiule'e rucu bene ze'e lubeella lunú unga chenu nzuebeella lu inziu, cuna nú xa uyu'lu beella Jesuse chenu ule'enu pá.

Chenu ulube'lu Jesuse lubee bene'nu

(Mt. 28:16-20; Mr. 16:14-18; Jn. 20:19-23)

³⁶Rdichia'sca' beella lunú unga, chenu ulube'lu Jesuse lubeella, nu uninu lubeella:

—La lliquihua ñia utsu arquihua.

³⁷Chiqui' ulliqui beella nu le'ca uyanu arquibeella, xne uri'i beella elliebacu' nú ulañi' beella tucu espíritu' bene enu ungui. ³⁸Pero uni Jesuse lubeella:

—¿Xinu xiquihua? nu ¿xinu sa' arquihua? ³⁹Ubi'yacuruhua bee yaa cuna bee cuchiu'a. Li'á ninguie', una'tsehua li'á nu ubi'yahua lua xne tucu espíritu la acane arta cuna be'la tucu nú rlañi'hua li'á nee.

⁴⁰Chenu uninu scua, che ulube'nu bee yanu cuna bee cuchiu'nu lubeella. ⁴¹Pero lá chilisca' arquibeella nu li'inu lunú ñia nzu arquí' beella cuna nú nzenu arquibeella, che uninu lubeella:

—¿Rlu'cuhua lle'na nú acua la?

⁴²Nu chu udete' beella tele'e bela enu uyi'i cuna tele'e lliña, ⁴³che una'tsenu bela ze'e cuna lliña ze'e nu udacunue ante lubeella. ⁴⁴Nu uninu lubeella:

—Lunú ulle'ca ye bee nucua' unia luhua chenu nzusca'a cuna li'ihua. Nu rqui'ña nú yalu ye beenú niquie lu ichi' Stichia' Diose equie cuendaa nú nequie lu libro' Moisés, cuna lu libro' bee profeta, cuna lu libro salmos.

⁴⁵Nu uxa'lanu elliebacu' beella para nú uri'i beella beya' lunú rni Stichia' Diose. ⁴⁶Che uninu lubeella:

—Lu ichi' Stichia' Diose rni nú chiqui' nehuana zeca Cristo, nu acatsia bichia rriuna huañi zecanu leta bee bene nguti. ⁴⁷Nu desde Jerusalén quixie bee bene ixiule'e stichia'a cuna diqui lu iliulabe, nú rqui'ña nú tsana' arquí' bee bene stula beei, nu chili arquí'beei li'á para nú ri'i Diose perdona li'ibeei. ⁴⁸Li'ihua ulañi'hua ye bee nucua', nu ixiule'ehua lubee bene bee nucua'. ⁴⁹Nu li'á xe'la luhua lunú ucuaqui u'na paa. Pero uya'nasca'hua ca'a eyeche Jerusalén hasta nú yucuhua lunú rnibiyá' Diose nú nze'ta liñibe.

Chenu uquie Jesuse liñibe

(Mr. 16:19-20)

⁵⁰Che uchiu'u Jesuse cuna li'ibeella eyeche Jerusalén, nu unguya'nu li'ibeella axu Betania, nu uletsanu yanu nu uri'i le'yanu li'ibeella. ⁵¹Diqui nú rri'ile'yanu li'ibeella, uyatsanu nu uquienu liñibe. ⁵²Chequie chenu ulaxu nú udete' beella ula'na lunu, chiqui' ñia nzu arquí'beella ubenchila' beella eyeche Jerusalén. ⁵³Nu ye bichia nucua'a beella liñi Indu llene Jerusalén nu rni beella bedichia' nze'ca lu Diose, nu rdete' beella che'tsa lunu. Amén.

Bedichia' nze'ca' Jesucristo nú uquie'e San Juan

Ube'ta Lli'ñi Diose lu iliulabe

1 Ante nú quixie iliulabe nzula tucu enu neca bedichia', nu li'inu nzulanu cuna Diose nu necanu Diose. ²Li'inu enu neca bedichia' nzulanu cuna Diose ante nú quixie iliulabe. ³Ye beenú nu' equie cuenda' li'inu ungache' bee nucua'. Nu ni'tucu bee lunú nu' lá acache' tunu leca li'inu. ⁴Li'inu rlu'cunu elunehuañi, nu elunehuañicua' neca ellie'e para lu yebée bene iliulabe. ⁵Nu ellie'e cua' rdu'llie'e lubee bene mase nú necabe nzu elliebacu'beeí, pero lá ri'i nú natsacabecua' ana lu ellie'ecua'.

⁶Uhuañi tucu bene enu lee Juan, enu ucañi Diose, ⁷para nú ungalla enu udixiule'e equie cuenda' ellie' Diose nu li'illa udixiule'ella nucua' para nú chili arqui' yebée bene ellie'e cua'. ⁸Pero la aca Juan ellie' Diose, ungatsialla enu ube'tatixiule'e lubee bene equie cuenda' ellie'ecua'. ⁹Xne enu mero neca ellie'ecua', rdu'llie'enu elliebacu' yebée bene iliulabe, nu ube'talanu lu iliulabe quie'.

¹⁰Li'inu ube'tanu lu iliulabe, nu añinzuca nú equie cuenda' li'inu

ungache' iliulabe, pero né zela bee bene iliulabe achu'lubeei li'inu tucu nú riala nú achu'lubeei li'inu. ¹¹Ube'tanu lubee bene lachinu, nu né ri'ibeei caso li'inu. ¹²Pero yebée bene enu uri'i caso li'inu cuna nú uyalí arqui' li'inu, li'inu uri'inu nú neca beella lli'ñi Diose. ¹³Nu neca beella lli'ñi Diose, nu la necane equie cuenda' nú neca beella lli'ñi bene iliulabe, urre nú niarqui' bene urre rri'i bee bene elliebacu' nú lu'cu bene endu' sino que lunú nzel'la arqui'beella li'inu neca beella lli'ñinu.

¹⁴Li'inu enu neca bedichia' unganu bene, nu uhuañinu lu iliulabe cuna lia'ahua, llene neca eluseca'nu, uninu puro nú neli neca. Li'iru ulañi'ru lunú rnibiya'nu nu uyucunu elurnibiya', xne li'itsianu necanu Lli'ñi e'cu Diose. ¹⁵Chenu udixiule'e Juan equie cuenda' li'inu lubee bene, li'illa unilla:

—Jesuse quie' neca enu unia chenu unia luhua nú enu nze'ta lulá máse neca equienú luquela li'á, xne hasta hua'tu nzulanu luquela li'á.

¹⁶Chiqui' llene neca eluseca'nu lua'ahua, yebichia riucua'ahua ye eluxene'nu nú rliqui'nu luyea'ahua.

¹⁷Equie cuenda' Moisés uliqui' Diose ley'nu lua'ahua. Pero equie cuenda' Jesucristo uri'i nze'ca'ahua beya' xa neca eluseca'nu lua'ahua, nu uria'ahua beya' ta nú neli neca. ¹⁸Ni'tucu bene leca xunga ulañi' Diose, tucutsia Lli'ñinu enu nzucu cuna li'inu ulube' lua'ahua xa neca Diose.

Juan Bautista udixiule'e equie cuenda' Jesucristo

(Mt. 3:11-12; Mr. 1:7-8; Lc. 3:15-17)

¹⁹Chequie desde Jerusalén bee usticia' bee bene Israel, uxe'la beella bee ule'ya cuna chiucu chuna bee bene Levitas para nú uya beella lu Juan Bautista unidichia' beella nú ti necalla. ²⁰Nu li'illa unilla ye nú neli neca lubeella, nu unilla:

—Li'á la neca Cristo.

²¹Che unidichia' zeca beella lu Juan:

—¿Ti necalu che? ¿Li'ilu necalu Elías la?

Nu ucuaquilla:

—Laca bene ze'e.

Nu unibeella lulla:

—¿Urre li'ilu necalu profeta enu nzu nú nze'ta la?

Nu ucuaquilla lubeella:

—Laca bene ze'e.

²²Nu unibeella lulla:

—¿Ti necalu che? Xne rqui'ña nú nzeyuru resuna lubee bene enu uxe'la li'iru. ¿Udixiule'e luru ti necalu?

²³Chequie uni Juan lubeella:

—Li'á neca tucu enu juerte rixiali lu tucu dañi achi elu lecati nucua'a: “Ulihua inziu' Diose Pa liñibe” —tucu nú uni profeta Isaías hasta hua'tu.

²⁴Chequie bee bene enu uxe'la bee fariseo para nú nzebedichia'nu Juan, ²⁵nú unedichia' beella lu Juan:

—Tunu lcalu Cristo, ni' Elías, ni' profeta enu nzu nú nze'talá, ¿xiquie nú rrinzalu bee bene che?

²⁶Che ucuaqui Juan nú unilla lubeella:

—Li'á rrinza bee bene cuna inza, pero letahua nzu tucu enu lasca' chuluhua, ²⁷nu li'inu necanu enu nze'ta lulá, nu ni' nú hua lucunu la yalaa, xne li'inu maselá neca equienu luquela li'á.

²⁸Yebee nucua' unga tucu luhuare elu lee Betábara, stucu chú re'cu Jordán, elu urinza Juan bee bene.

Jesuse neca Cordero' Diose

²⁹Chenu uye'e luyuu stucu bichia, ulañi' Juan nú nze'tabica Jesuse elu nzulla, nu unilla:

—iUbi'yacuruhua, benequie' neca Cordero' Diose enu chila stula bee bene iliulabe! ³⁰Equie cuenda' li'inu unia luhua chenu unia: “Lulá nze'ta tucu bene enu másela neca equie lua, xne hasta hua'tu nzulanu luquela li'á.” ³¹Ni' li'á lá ri'á beya' nú li'inu necanu enu nzu nú nze'ta, pero li'á uriña para nú rinza bee bene cuna inza para nú chulu bee bene Israel li'inu.

³²Le'ca uni Juan lubeei:

—Li'á ulaña nú ulaca Espíritu Santo enza liñibe xi neca tucu paloma equienu. ³³Añinzuca nú lá chulua li'inu, pero enu uxe'la li'á para nú rinza bee bene cuna inza, li'inu uniu lu: “Chenu lañi'lu nú laca Espíritu Santo equie tucu bene nu ya'nane equiella, li'illa necalla

enu rinza bee bene cuna Espiritu Santo.” ³⁴Li'á ulañilánu, nu nediya nze'ca nú li'ínu necanu Lli'ñi Diose.

**Bee bene enu rluti unga
bee bene' Jesuse**

³⁵Chenu uye'e lu yuu stucu bichia, nzu zeca'la Juan ze'e cuna chiucu bee bene'lla. ³⁶Chenu ulañi'lla nú nzedete Jesuse ze'e, chequie unilla: —iUbi'yacuruhua! Benequie' neca Cordero' Diose.

³⁷Chenu ubene' rucu bene' Juan nucua', che nzequie beella Jesuse. ³⁸Nu chenu ubelleta Jesuse, ulañi'nu nú nze'taquie beella li'ínu, nu uninu lubeella:

—¿Xi rla'nahua?

Nu ucuaqui beella:

—Maestro, ¿cá nzuculu?

³⁹Che ucuaqui Jesuse lubeella:

—Utehua para nú lañi'hua.

Chequie uya beella nu ulañi' beella elu nzucunu, nu uya'nanu beella li'ínu ze'e bichia ze'e, xne necala tucu rquietacu uchee.

⁴⁰Tucu lu rucu bene' Juan enu uyaquie Jesuse, enu ubene' lunú uni Juan, li'i necai Andrés bichi Simón Pedro. ⁴¹Andrés quie' rluti uya la'nai bichi Simón Pedro nu uni lulla:

—Ullela'la'ru Mesías —nu rni bedichia' cua' Cristo.

⁴²Chequie Andrés unguya' Simón elu nzu Jesuse, nu che ulañi' Jesuse li'illa nu uninu:

—Li'ilu necalu Simón, lliana' Jonás, pero nee chiu'uleelu Cefas — nu rni bedichia' cua' Pedro.

Ubixia Jesuse Felipe cuna Natanael

⁴³Chenu uye'e luyuu stucu bichia uri'ila Jesuse elliebacu' nú nzanu

Galilea, nu ulla'canu Felipe nu uninu lulla:

—Utequie li'á.

⁴⁴Felipe quie' neca bene eyeche Betsaida, elu le'ca neca lachi Andrés cuna Pedro. ⁴⁵Nu che uya la'na Felipe Natanael, nu unilla lui: —Ullela'la'ru bene enu rni Moisés lu libro ley, le'ca li'illa enu uni bee profeta enu uquie'e Stichia' Diose. Li'ínu necanu Jesuse lli'ñi José bene eyeche Nazaret.

⁴⁶Che ucuaqui Natanael:

—¿Xie' nu' bene nze'ca eyeche Nazaret la?

Nu uni Felipe lulla:

—Utecuru ne lañi'lu.

⁴⁷Chenu ulañi' Jesuse nú nze'ta Natanael, uninu:

—Ca'a nze'ta tucu bene enu neli neca bene Israel, enu la zequiee.

⁴⁸Chequie unidichia' Natanael lunu:

—¿Xaquie nu'lulu li'á?

Nu ucuaqui Jesuse lulla:

—Ante nú bixia Felipe li'ilu chenu nzulu rqui' tucu aca higuera, che ulaña li'ilu.

⁴⁹Nu uni Natanael lunu:

—Maestro, ili'ilu necalu Lli'ñi Diose, li'ilu necalu arre Israel!

⁵⁰Che ucuaqui Jesuse nú uninu: —Li'ilu nzeli arquí'lu li'á lunú unitsia lulu nú ulaña li'ilu rqui' tucu aca higuera. Pero nze'ta nú huaxilá nú lañi'lu luquela nú ulañi'lalu.

⁵¹Le'ca uni Jesuse lulla:

—Li'á nediyanze'ca nú li'ihua lañi'hua nú na'la liñibe, nu le'ca lañi'hua bee ángele' Diose, nú rquiee beenu nu rlaca beenu equie Bene enu uxe'la Diose lu iliulabe.

Eluchia nú unga eyeche Caná

2 Bichia rriuna, unga tucu eluchia eyeche Caná nú nchiucu' lu iliu Galilea. Nu le'ca nzu na' Jesuse ze'e, ²nu le'ca uzene' bee bene Jesuse cuna bee bene'nu nu uya beella lu eluchia ze'e. ³Chenu ulaxu biñu, che uni na' Jesuse lunu:

—La lucua' beella biñu.

⁴Nu ucuaqui Jesuse:

—¿Xinu rnilu nucua' lua naa?

Lasca' riña hora nú ri'á lunú riala nú ri'á.

⁵Pero María na' Jesuse chu unilla lubee bene enu rri'i elietsa ze'e:

—Uri'ihua ye nú ninu luhua.

⁶Nu ze'e nucua'a xu'cu etsu quiee, nú riuche' inza rqui'ña bee bene Israel para nú lecaxi naa beei tucu nú neca costumbre' beei, nu riu'u como tucu ayu'u litro inza liñi cada tucua bee etsu ze'e. ⁷Chequie uni Jesuse lubee bene enu rri'i elietsa ze'e:

—Uri'ichehua bee etsuquie' inza.

Nu chenu uchela bee etsu, ⁸uni Jesuse lubeei:

—Nee uhuahua lle'nae, ude'te'hua lubee bene enu nuya' cuenda' eliñi.

Nu scua uri'i beei.

⁹Nu bene enu nuya' cuenda eliñi ze'e uri'illa preo inza nú unga biñu, nu lá ri'illa beya' cá enza uchiu'e, nediya'tsia bee bene enu rri'i elietsa ze'e nucua', xne li'ibeei uya chiya'beeii, che ubixia bene enu nuya' cuenda eliñi ze'e niyu enu xia, ¹⁰nu unilla lui:

—Ye bee bene rluti rritsi'beeii biñu nze'ca, nu chenu ungue'la bee bene huaxi biñu cua', cheelá rritsi'beeii

biñu nú la neca nze'ca. Pero li'ilu udu'che'elu biñu nze'ca quie' para nú rritsi'lue hasta neelá.

¹¹Nucua' neca milagro rluti nú uri'i Jesuse, uri'inu milagro quie' eyeche Caná nú nchiucu' lu iliu Galilea, scua ulube'nu poder nú rlu'cunu nu uchili arqui' bee bene'nu li'inu.

¹²Chenu ulaxu nú unga nucua' che nzanu eyeche Capernaum, cuna na'nu, cuna bee bichinu cuna bee bene'nu, nu ze'e ucua'a beella chiucu chuna bichia.

Utiliaca' Jesuse bee bene labe ele'ya' indu llene Jerusalén

(Mt. 21:12-13; Mr. 11:15-18; Lc. 19:45-46)

¹³Lunú axula nzu baxcu eliñi' bee bene Israel, che uya Jesuse eyeche Jerusalén. ¹⁴Nu labe ele'ya' indu llene Jerusalén ze'e ulañi'nu bee bene enu ruti bee u'na', cuna bee sanchi, cuna bee paloma, cuna bee bene enu nucua'a lu mexa xi'la dimi' bee bene. ¹⁵Chenu ulañi' Jesuse nucua', che ureche'nu tucu chicuete nú neca tuu para nú uhuanu ye bee bene cuna bee u'na' beella, cuna bee sanchi' beella ru'u ele'ya' indu ze'e, nu utsi'quinu dimi' bee bene enu xi'la dimi, nu utelletanu mexa' beei. ¹⁶Che uninu lubee bene enu ruti bee paloma:

—iUhuahua bee nucua' ca'a! iLa ri'ihua ni'i paa xi neca tucu i'ya!

¹⁷Chequie ullu'cu arqui' bee bene'nu lu ichi' Stichia' Diose elu rni: “Hasta nú atia la tsana arquia nú recanua ni'lu.”

¹⁸Che uni bee bene Israel lu Jesuse: —¿Xi milagro lube'lu luru para nú ri'iru beya' nú rlu'culu nu rnibiya'lu nú rri'ilu scua?

¹⁹Nu ucuaqui Jesuse lubeei:
—Uchilahua induquie', nu lu
chunatsia bichia reche' zecane.

²⁰Chequie uni bee bene Israel ze'e
lunu:

—Cuarenta y seis lana ule' bee
bene nú ureche'e beei indu quie',
¿nu li'ilu rnilu nú lu chunatsia
bichia reche' zecalue la?

²¹Pero li'inu rninu lu cuenda'
cuerpo'nu chenu uninu lu cuenda'
indu ze'e. ²²Enze'e chenu uhuañi
zeca Jesuse nú ungutinu, ullu'cu'
arqui' bee bene'nu lunú uninu, nu
uchili arqui'beella stichia'nu nu
le'ca uchili arqui' beella lunú niquie
lu ichi' Stichia' Diose.

Nu'lu Jesuse ye bee bene

²³Diqui nú nzucu Jesuse eyeche
Jerusalén eliñi baxcu, huaxi bee
bene uyalí arqui' li'inu chenu
ulañi' beei bee milagro nú uri'inu.

²⁴Pero la chili arqui' Jesuse lunú
rnibeei, xne nu'lu nze'canu xa neca
elliebacu'beei. ²⁵La qui'ñanu nú nu'
enu ni lunu nú xa neca bee bene,
xne li'inu nu'lu nze'canu xa neca
elliebacu' ye bee bene.

Jesuse cuna Nicodemo

3 Uhuañi tucu fariseo enu lee
Nicodemo, li'illa ungalla usticia
lubee bene Israel. ²Nu uyabi'yalla
Jesuse tucu rula', nu unilla lunu:

—Maestro, li'iru nediya'ru nú Diose
uxe'la li'ilu para nú zete'lu li'iru,
xne lecati aca ri'i sa' bee milagro nú
rri'ilu tunu la nzu Diose cuna li'illa.

³Nu uni Jesuse lulla:

—Li'á rixiule'e nze'ca lulu, nú enu
la ala zeca stucu bese leca modo
chu'u nze'e elurnibiya' Diose.

⁴Che uni Nicodemo lunu:

—Pero ¿xa modo nú ala zeca tucu
bene enu unguxula? ¿Xie' nu' modo
nú chu'u zeca tucu bene xla'cu
na'lla nu ala zecalla la?

⁵Nu ucuaqui Jesuse lulla:

—Li'á rixiule'e nze'ca lulu, nú enu
la rinza nu la nzu Espíritu Santo
cuna li'i leca modo chu'u nze'e
liñibe elurnibiya' Diose. ⁶Ye bee
bene chenu ralalla, necatsialla bene
lu iliulabe quie'. Pero bee bene enu
nehuañi cuna Espíritu Santo, equie
cuenda' Espíritu Santo rlu'cula
beella stucu elunehuañi. ⁷La zeca
lullie'lu equie nú unia lulu chenu
unia lulu: “Rqui'ña nú ala zeca
bee bene.” ⁸Xne tucu nú reca bii
catse bee luhuare, nu mase riene'lu
chenu reca bii, pero ni'la ri'ilu beya'
cá enza nze'tae, urre cá enza nzae.
Scua neca Espíritu Santo luye bee
bene enu nzu cuna Espíritu Santo.

⁹Che uni Nicodemo lunu:

—¿Xa modo nú acahua' scua?

¹⁰Nu ucuaqui Jesuse:

—¿Li'ilu, nú necalu ulaxcuela
lubee bene Israel, nu la ri'ilu beya'
bee nucua' la? ¹¹Li'á rnia lulu, nú
li'iru rniru lunú nediya'ru nu lunú
ulañi'la'ru. Pero li'ihua la chili
arqui'hua lunú rniru. ¹²Tunu la
chili arqui'hua chenu rnia luhua
equie cuenda' beenú nu' lu iliulabe
quie'. ¿Xa chili arqui'hua chenu
rnia luhua equie cuenda' beenú nu'
liñibe?

¹³Lecali ti uya liñibe tucutsia enu
nze'ta enza liñibe, nu li'inu necanu
Bene enu uxe'la Diose. ¹⁴Nu tucu
nú uquie'e Moisés tucu be'la enu
necache' icu' lu tucu aca lu dañi
achi, le'ca esquie Bene enu uxe'la

Diose quie'e bee bene li'inu lu cruse, ¹⁵para nú ye bee bene enu chili arqui' li'inu, la nitilu beella, nu lu'cu beella elunehuañi nú leca xunga laxu lunu.

Seca Diose bee bene iliulabe

¹⁶'Equie nú chiqui' seca Diose bee bene iliulabe, uxe'lanu Lli'ñi e'cunu lu iliulabe para nú ye bee bene enu chili arqui' li'inu la nitilubeei, sino que lu'cu beei elunehuañi nú leca xunga laxu lunu. ¹⁷Xne né xe'la Diose Lli'ñinu lu iliulabe para nú dete'nu castiya bee bene, sino que ube'tanu para nú tsila'anu bee bene.

¹⁸'Bene enu chili arqui' Lli'ñi Diose, la zeca' nze'e castiya' Diose. Pero enu la chilí arqui' li'inu, zeca nze'e castiya xne la chili arqui' nze'e Lli'ñi e'cu Diose. ¹⁹Bee bene enu la chili arqui' li'inu zeca bee nze'e castiya, xne nee nú uriñanu lu iliulabe li'inu enu neca ellie' Diose, li'ibeei máse riu' arqui'beei inziu nú necha neca, xne rri'i beei puro lunú necha neca. ²⁰Xne ye bee enu rri'i nú necha neca, la yu'lí arqui'beei ellie'e cua', nu la chebica beei lue para nú la ya'lalu lunú necha neca rri'ibeei. ²¹pero bee bene enu nehuañi tucu nú rialane lu Diose, li'ibeella nzequie beella ellie'nu para nú acachee nú rri'i beella lunú niarqui' Diose.

Juan Bautista cuna Jesuse

²²Chenu udete nú unga bee nucua', uya Jesuse cuna bee bene'nu lu iliu Judea, ze'e ucu'a beella chiucu chuna bichia nu urinza bee bene'nu bee bene. ²³Le'ca tucu eyeche nú lee Enón,

axu eyeche nú lee Salim, ze'e uri'nza Juan bee bene xne nu' huaxi inza ze'e, nu nza bee bene para nú rinza beei ze'e. ²⁴Nucua' unga chenu lasca' chu'u Juan ni'cu'.

²⁵Chequie chiucu chuna bee bene' Juan cuna textcu'a'a bee bene Israel, uquixie beei nú rni xuu beei lu sa'beei equie cuenda' nú xa rnaa nze'ca beei lu Diose. ²⁶Nu uya ni' bee bene' Juan lulla:

—Maestro, bene enu nzunuulu stucu chú re'cu Jordán, li'illa enu unilu luru, rrinzalla bee bene nu ye beei nzequie beei li'illa.

²⁷Che uni Juan lubeei:
—Lecati aca lu'cu elurnibiya' nú ri'illa scua tunu la dete' Diose nucua' lulla. ²⁸Li'ihua ubenela'hua nú unila luhua nú la neca Cristo, necatsia enu uriña rluti para nú ixiule'a lu cuenda'nu. ²⁹Lu tsa'a chia nzu niyu enu xia cuna una'a enu xialla, nu bene enu rquiete' niyu enu xiacua' enu nzu cuna li'illa, chiqui' ñia nzu arqui'lla chenu riene'lla nú uquixie nú rni niyu enu xia. Nee le'ca scua chiqui' ñia nzu arquia equie cuenda' li'inu. ³⁰Li'inu chu nzeaca neca equielánu, nu li'á chu nzelacalá lunú neca equia luquela li'inu.

Enu nze'ta enza liñibe

³¹'Enu nze'ta enza liñibe li'inu necanu enu rnibiya' lu yeene. Pero bee bene iliulabe necatsialla bee bene iliulabe, nu rnitsialla beenú nu' lu iliulabe, pero li'inu enu nze'ta enza liñibe li'inu necanu enu rnibiya' lu yeene. ³²Nu li'inu rninu lunú ulañi'la'nu cuna lunú ubene'la'nu. Pero lecati nzeli arqui'

lunú rninu. ³³Tunu nu' enu nzeli arqui' stichia'nu, scua rlube'lla nú neli neca Stichia' Diose. ³⁴Enu nze'ta lu cuenda' Diose, li'inu rninu Stichia' Diose xne chiqui' uдете' Diose Espíritu Santo lunú. ³⁵Diose secanu Lli'nínu, nu uдете' cuendanu yeene lu Lli'nínu para nú nibiya'nu lu yeene. ³⁶Nu tatse enu chili arqui' Lli'nínu, li'illa rlu'culla elunehuañi nú leca xunga laxu, pero enu la niarqui' chili arqui' Lli'nínu la lu'culla elunehuañi cua' sino que rialalla casti'ya' Diose.

**Ubedichia'nu Jesuse
tucu una'a Samaria**

4 Uri'i bee fariseo beya' nú nu' huaxilá bee bene' Jesuse, nu le'ca rrinzalánu bee bene luquelá Juan, ²añinzuca nu la neca mero Jesuse enu rrinza bee bene, sino que bee bene'nu neca enu rri'nza bee bene. ³Chenu uri'i Jesuse beya' bee nucua', uchiu'unu lu iliu Judea, nu nzanu lu iliu Galilea.

⁴Pero chenu nzanu lu iliu Galilea, rqui'ña nú detenu enza lu iliu Samaria. ⁵Nu uriñanu tucu eyeche nú lee Sicar, nú nchiucu' lu iliu Samaria axu lu yuu nú uдете' Jacob lu lliana'lla José. ⁶Ze'e nzucu tucu tsu nú rni bee bene tsu' Jacob, nu lunú ullacala' Jesuse nú seenu, chequie uzucunu ru'u tsu ze'e tucu rebibichia.

⁷Hora ze'e uriña tucu una'a Samaria ru'u tsu ze'e nú nze'ta chiya'lla inza nu uni Jesuse lulla:
—I'ña lle'na inza lulu hua'a.

⁸Nu bee bene'nu nzuela beella eyeche ze'e nzetsii beella nú acu beella.

⁹Nu lunú la quiete' bee bene Israel bee bene Samaria, chequie ucuaqui una'a ze'e lu Jesuse:

—Li'á neca bene Samaria, nu ¿xie'lanu bene Israel necalu nu rnacu'lu inza lua la?

¹⁰Nu uni Jesuse lulla:

—Tunu rri'ilu beya' lunú niarqui' Diose nú liqui'nu lulu, nu rri'ilu beya' tineca enu rnacu' inza lulu. Li'ilu nacu'lu inza lua, nu li'á liquia inza nú rliqui' elunehuañi lulu.

¹¹Chequie uni una'a ze'e lu Jesuse:

—Detá, lecaxi uya'lu para nú hualu inza, nu chiqui' aquíé tsuquie', ¿cá chiya'lu inza nú rliqui' elunehuañi? ¹²Tsuquie' neca nú utsa'na Jacob bene'ru enu udetela luru, nu le'ca inza cua' ungue'lla cuna bee endu'lla cuna bee nañi'beella. ¿Xie' másela neca equielu lulla la?

¹³Nu uni Jesuse lulla:

—Ye bee bene enu rue' inza quie', bichi' zeca' beei stucu bese, ¹⁴pero bee enu hue' inza nú detea, leca' xunga bichi' nze'e. Xne inza nú detea lulla liñii liñi arqui'lla xi neca tucu elu la tsuxe rliñi inza, nu lu'culla elunehuañi nú leca xunga laxu.

¹⁵Nu uni una'a ze'e lunu:

—Detá, uli'qui' inza cua' lua para nú la bichia'a stucu bese, nu la yela'a ru'u tsuquie' huaa inza.

¹⁶Che uni Jesuse lulla:

—Uquia tucu niyu'lu nu chu ye'ta zecalu.

¹⁷Nu ucuaqui una'a ze'e lunu:

—La lu'cua niyu.

Che ucuaqui Jesuse nú uninu lulla:

—Neli rnilu nú la lu'culu niyu,
¹⁸xne uchialálu cuna ayu' niyu, nu
 nee niyu enu nzucunulu la nechialu
 cuna li'i. Enze'e neli lunú unilu
 scua.

¹⁹Chenu ubene' una'a ze'e nucua',
 che unilla lunu:

—Detá, rri'á beya' nú li'ilu necalu
 tucu profeta' Diose. ²⁰Bee bene'ru
 enu udetela ulu'cu beella ula'na lu
 Diose equie dañi quie', pero li'ihua
 enu neca bee bene Israel rnihua nú
 eyeche Jerusalén neca elu lu'cu bee
 bene ula'na lu Diose.

²¹Nu ucuaqui Jesuse:

—Una'a, uchili arqui' nú rnia,
 nú riña bichia nú lu'cu bee bene
 ula'na lu Diose Pa liñibe sin nú
 ye'ta beella equie dañi quie', nu
 ni' la qui'ña' nú chue beella eyeche
 Jerusalén. ²²Li'ihua la ri'ihua beya'
 ti rlu'cuhua ula'na lu. Pero li'iru
 nediya'ru ti rlu'curu ula'na lu, xne
 lubee bene Israel nze'ta enu tsila'a
 bee bene. ²³Nu nee horaquie',
 uriñala bichia nú ye bee bene enu
 neli rlu'cu ula'na lu Diose, lu'cu
 beella ula'na lunu tucu nú rialane
 equie cuenda' Espíritu Santo. Xne
 scua niarqui' Diose Pa liñibe nú
 ri'i bee bene enu rlu'cu ula'na lunu.
²⁴Diose necanu Espíritu, nu bee
 enu rlu'cu ula'na lunu rqui'ña' nú
 neli lu'cu beella ula'na lunu equie
 cuenda' Espíritu Santo.

²⁵Chequie uni una'a ze'e lu Jesuse:

—Li'á nediya' nú nze'ta Mesías
 (enu le'ca lee Cristo), nu chenu
 riñanu, li'inu ixiule'enu yeene
 lua'ahua.

²⁶Nu uni Jesuse lulla:

—Li'á neca Cristo enu rnilu, nu
 li'inu necanu enu rdichia'nulu nee.

²⁷Hora ze'e uriña bee bene'nu, nu
 nzenu arqui'beella nú rdichia'nunu
 tucu una'a. Pero ni' tucu beella né
 nedichia' beella lunu xi niarqui'
 una'a ze'e, urre xi rdichia'nunu
 li'inchu. ²⁸Chequie utsa'na una'a
 ze'e ere'nchu ru'u tsuu ze'e nu
 nzanchu eyeche ze'e elu uya
 ni'nchu, lubee bene:

²⁹—Utehua ne lañi'hua tucu bene
 enu uni lua lu ye beenú uri'á. ¿Xie'
 la necalla Cristo la?

³⁰Che uchiu'u beei eyeche ze'e nu
 uyabeei elu nzu Jesuse. ³¹Diquila
 nú nza una'a ze'e eyeche ze'e, uni
 bee bene' Jesuse lunu:

—Maestro, udacu lle'na nú aculu.

³²Pero uninu lubeella:

—Li'á rlu'culá tucu elubacu nú
 acua, núla chuluhua.

³³Nu uquixie bee bene'nu
 unidichia' beella lu sa'beella:

—¿Xie' nu'ti ube'tayula nú
 udacunu la?

³⁴Chequie uni Jesuse lubeella:

—Elubacua neca nú rri'á lunú
 niarqui' Diose enu uxe'la li'á, nu
 tsalua lunú uninu lua nú ri'á.

³⁵Li'ihua rnihua: “Rri'isca'lá se
 stacu guu para nú aca ula'cu.” Pero
 li'á nia luhua: Nú uletsahua luhua
 nu ubi'yacuruhua lubee yuu, nú
 necala bee para nú aca ula'cu lubee.

³⁶Nu bene enu rquietesa' ula'cu
 riuculla lunú rialalla equie riña'
 nú rri'illa. Nu bee ula'cu nú rri'illa
 necalane para elu nu' elunehuañi
 nú leca xunga laxu, nu scua bene
 enu rdu' nii nu bene enu rri'i ula'cu
 tucutse ñia nzu arqui'beella. ³⁷Neli
 lunú rni bee bene: “Urene enu rdu'
 nii nu stucu enu rri'i ula'cu.” ³⁸Li'á
 uxe'la li'ihua para nú ri'ihua ula'cu

elu né ri'ihua riña', urene enu uri'i riña', nu li'ihua uyari'ihua ula'cu elu uri'i beella riña'.

³⁹Huaxi bee bene lu iliu Samaria ze'e uchili arqui'beei Jesuse lunú uni una'a ze'e lubeei, chenu uninchu lubeei: "Unilanu lua luye nú uri'á." ⁴⁰Enze'e chenu uriña bee bene lu iliu Samaria ze'e elu nzu Jesuse, uziquie beei lunu nú ya'nanu cuna li'ibeei. Nu uya'nanu cuna li'ibeei chiucu bichia. ⁴¹Nu huaxilá bee bene uchili arqui'beei li'inu, chenu ubene'beei lunú rninu. ⁴²Chequie unibeei lu una'a ze'e: —Nee laneca lunú unitsialu luru nzeli arqui'ru li'inu, sino que li'i e'curu ubene'la'ru lunú rninu, nu nediya' nze'caru nú li'inu necanu Cristo enu tsila'a bee bene iliulabe.

Uriyeca Jesuse lliana' tucu bene enu rri'i riña' lu arre

⁴³Chenu udete rucu bichia ze'e, uchiu'u Jesuse lu iliu Samaria nu nzanu enza Galilea. ⁴⁴Xne le'ca li'inu uninu, nú ni' tucu profeta la lu'cu bee bene ula'na lulla lachilla. ⁴⁵Pero chenu uriñanu lu iliu Galilea, uyucu nze'ca bee bene lu iliu ze'e li'inu, xne le'ca nu beei uya beei eliñi baxcu Jerusalén nu ulañi' beei ye bee milagro nú uri'inu lu eliñi ze'e.

⁴⁶Chequie uya zeca Jesuse eyeche Caná nú nchiucu' lu iliu Galilea, elu uri'inu nú unga inza biñu. Nu eyeche Capernaum ze'e nzucu tucu bene' arre enu riti lliana'. ⁴⁷Chenu ungabiya' bene' arre ze'e nú uriña Jesuse Galilea, nu uchiu'unu lu iliu Judea. Che uyalla elu uriña Jesuse nu uziquiella lunu nú chánu

riyecanu lliana'lla enu yamero ati.

⁴⁸Nu uni Jesuse lulla:

—Li'ihua la chili arqui'hua li'á tunu la lañi'hua tucu seña, urre bee milagro nú rri'á.

⁴⁹Pero ucuaqui bene' arre ze'e nú unilla:

—Detá, yexetsia uchaa ante nú ati lliana'a.

⁵⁰Chequie uni Jesuse lulla:

—Ubenchila' ni'lu, nzucu nze'cala lliana'lu.

Nu uchili arqui' bene ze'e lunú uni Jesuse, nu chu nziiala enza ni'illa. ⁵¹Diquila nú nziiala, uyacha'calu bee moso'lla li'illa nu unibeei lulla:

—Nzucu nze'cala lliana'lu.

⁵²Chequie unidichia'lla lubeei nú xiura uquixie nú uzucu nze'ca lliana'lla, nu unibeei lulla:

—Neca' tucu rqi tucu uchee uchiu'u xle'i.

⁵³Che uri'i bene ze'e beya' nú hora ze'e neca chenu uni Jesuse lulla: "Nzucu nzecala lliana'lu", nu uchili arqui'lla cuna ye bee bene ni'lla Jesuse.

⁵⁴Nucua' neca milagro rruccu nú uri'i Jesuse lu iliu Galilea, chenu ubenchila'nu nú uyanu lu iliu Judea.

Uri'iyeca Jesuse tucu bene ru'u estanque Betesda

5 Chenu udete nú unga bee nucua' che unga tucu eliñi' bee bene Israel, nu uya Jesuse eyeche Jerusalén. ²Nu Jerusalén axu ru'u puerta nú lee bee sanchi, nzucu tucu estanque llene nú lee Betesda cuna dialu hebreo, nu rlu'cune ayu' curdure. ³Nu liñi

bee curdure ze'e nucua'a huaxi
 bee bene enu riti, bee bene enu
 niquie'lu, bee bene enu necuxu,
 bee bene enu neati be'la'. Nucua'a
 quiebeeí nú cuñi lu inza nú nu' liñi
 estanque ze'e. ⁴Xne nu'tsia nu'tsia
 chenu rluca tucu ángele' Diose
 rcuñi inza ze'e. Chequie bene enu
 rluti riu'u lu inza ze'e chenu rcuñi
 lue, chu riega' bene ze'e, lu xitse
 lubee elichia nú secalla. ⁵Nu leta
 bee bene enu riti ze'e netse tucu
 niyu enu necala treinta y ocho lana
 nú riti. ⁶Chenu ulañi' Jesuse li'i
 nú nuxui ze'e, nu uri'ínu beya' nú
 hua'tula riti, che unidichia'nu lui:

—¿Niarqui'lu nú yeca'lu la?

⁷Nu ucuaqui bene enu riti ze'e
 lunu:

—Detá, lecati lucua para nú du'
 li'á lu inzaquie' chenu rcuñine,
 cada chenu niarquía nú chu'a lu
 inzaquie', stucu bene rluti chu riu'u
 lue.

⁸Chequie uni Jesuse lui:

—Uzete, una'tse camiya'lu nu utse'!

⁹Hora ze'e uyeca'i, nu una'tsei
 camiya'i nu uquixiei nú utsei. Pero
 bichia ze'e neca bichia nú sulachi
 bee bene, ¹⁰che uni bee bene Israel
 lu bene enu uyeca' ze'e:

—Bichia quie' neca bichia nú
 sulachi bee bene, leca modo nú
 uya'lu camiya'lu nee.

¹¹Nu ucuaqui bene ze'e:

—Bene enu uri'yeca li'á, li'illa
 unilla lua: “Una'tse camiya'lu nu
 uquia'a.”

¹²Nu unidichia' beeí lui:

—¿Ti uni lulu: “Una'tse camiya'lu
 nu uquia'a”?

¹³Pero la ri'i bene ze'e beya' ti
 uri'yeca li'i, xne uyu'u Jesuse leta

huaxi bee bene enu nucua'a ze'e.

¹⁴Luze'elá uchu'u zeca'la Jesuse
 bene ze'e liñi indu llene Jerusalén,
 nu uninu lui:

—Uri'i beya', nú uyeca'la'lu, la
 ria'lu dula para nú la zeca'lu stucu
 nú maselá lunú ulle'calu.

¹⁵Chequie chu nza bene ze'e
 nu uyatixiule'i lubee bene Israel,
 nú Jesuse neca enu uri'yeca li'i.

¹⁶Enze'e uquixie beeí nú rcua'na
 beeí xa na'tse beeí Jesuse para
 nú úti beeí li'ínu, xne rri'ínu bee
 milagrocua' bichia nú sulachi bee
 bene. ¹⁷Pero uni Jesuse lubeeí:

—Pa Diose siempre rri'ínu lunú
 riala ri'ínu, enze'e le'ca rri'á tucu
 nú rri'ínu.

¹⁸Enze'e máse niarquí' bee bene
 Israel útibeeí Jesuse, la necane
 equietsia beenú rri'ínu bichia nú
 sulachi bee bene, le'ca necane
 equie nú rri'ínu nú reca igualenu
 Diose, chenu rninu nú neca Diose
 mero Pa'nu.

Elurnibiya' nú rlu'cu Lli'ñi Diose

¹⁹Chequie uni Jesuse lubeeí:

—Li'á neli ixíule'a luhua, nú Lli'ñi
 Diose lecaxi ri'i tuculi'nu, li'ínu
 rri'ínu lunú rlañi'nu nú rri'i Pa'nu.
 Xne ye nú rri'i Diose le'ca esquie
 rri'i Lli'ñinu. ²⁰Xne seca Diose
 Lli'ñinu nu sete'nu Lli'ñinu ye nú
 rri'ínu, nu másesca'lá lube'lánu
 huaxi beenú llenesca'lá lu Lli'ñinu,
 nú máselá chenu arqui'hua. ²¹Xne
 tucu nú rri'i Diose nú rehuañi zeca
 bee bene enu ungu'ti nu rdete'nu
 elunehuañi' beeí, le'ca scua Lli'ñinu
 rdete' elunehuañi lu enu niarquí'nu
 nú dete'nue. ²²Nu la hualu Diose
 lu cuenda' bee bene, sino que

utsa'nanu lu Lli'ninu nú hualue lu cuenda' bee bene, ²³para nú lu'cu ye bee bene ula'na lu Lli'ñi Diose tucu nú rlu'cu beei ula'na lunu. Nu enu la lu'cu ula'na lu Lli'ninu, le'ca la lu'cu nze'e ula'na lu Pa'nu enu uxe'la li'inu.

²⁴Li'á neli rnia luhua: Nú bene enu sucu' stichia'a, cuna nú chili arqui' nze'e Diose, li'inu enu uxe'la li'á, li'illa rlu'culalla elunehuañi nú leca xunga laxu lu Diose. Chequie la yala'lla castiya' Diose, xne la neca'lla xi neca bene enu ungu' lu Diose, li'illa rlu'culalla elunehuañi lunu.

²⁵Le'ca neli rnia luhua nú nze'tala hora, nu nee hora quie', neca chenu bee bene enu neca xi neca bee bene enu ungu' lu Diose, yene' beei chii Lli'ñi Diose, nu bee bene enu zucu' stichia'nu, lu'cu beella elunehuañi lu Diose. ²⁶Xne tucu nú rlu'cu Diose elunehuañi, le'ca scua udete'lanu sa' elunehuañicua' lu Lli'ninu, ²⁷nu le'ca udete'lanu elurnibiya' lu Lli'ninu para nú hualunue lu cuenda' bee bene iliulabe, xne li'inu necanu Bene enu uxe'la Diose lu iliulabe. ²⁸La chenu arqui'hua lunú rnia luhua, xne riña bichia chenu ye bee bene nguti, yene' beei chi Lli'ñi Diose ²⁹nu chiu'ubeei liñi eluhua'beei. Nu bee enu uri'i tucu nú niarqui' Diose, huañi beei para nú lu'cu beei elunehuañi cuna li'inu. Pero bee bene enu necha uri'i, le'ca huañi beei para nú yala beei castiya nú riala beei.

**Lunú rlube' nú rlu'cu
Jesuse lunú rnibiya'nu**

³⁰Nu li'á lecaxi ri'á lunú necatsia elliebacu' e'cua. Li'á rlualua lu

cuenda' bee bene tucu nú rnibiya' paa, nu rri'á elu usticia tucu nú rialane, xne la ri'á tucu nú necatsia elliebacua, sino que rri'á tucu nú niarqui' Paa enu uxe'la li'á. ³¹Tunu le'catsia li'á rnia lu cuenda' li'á, lecaxi zibi' stichia'a che. ³²Pero stucu enu rni lu cuenda' li'á, nu nediya nze'ca nú neli neca lunú rni nze'e lu cenda' li'á. ³³Li'ihua uxe'lahua bee bene enu uya nedichia' lu Juan, nu li'illa unilla puro nú neli neca luhua. ³⁴Añinzuca nú la qui'ña nú ni zecaa luhua lunú uni bene lu cuendaa, pero nia luhua lunú uni Juan para nú tsila'ahua. ³⁵Juan unga xi neca tucu quii nú rdu'llie'e, nu li'ihua chiqui' ñia utsu arqui'hua nu uri'ihua caso lunú uzete'lla li'ihua lle'na tiambu. ³⁶Pero li'á másela huaxi nú lubea luhua luquela' nú uzete' Juan li'ihua lu cuenda' li'á. Xne lunú uni Pa Diose nú ri'á neca lunú rri'á nee para nú neli acachee nú Diose uxe'la li'á. ³⁷Nu le'ca Paa enu uxe'la li'á, uninu equie cuenda' li'á, añinzuca nú leca xunga ubene'hua chiinu nu lá lañi'hua li'inu. ³⁸Nu le'ca lá zucuhua stichia'nu, enze'e la chili arqui'hua bene enu uxe'lanu. ³⁹Li'ihua chiqui' sete' nze'cahua lu Stichia' Diose chenu rulahuane, xne nzuquiehua nú scua lu'cuhua elunehuañi nú leca xunga laxu liñibe, nu añinzuca nú le'ca li'i lu ichi' Stichia' Diose rni lu cuenda' li'á, ⁴⁰pero li'ihua la zelahua chili arqui'hua li'á para nú lu'cuhua elunehuañicua'.

⁴¹Li'á la la'na nú zucu' ayaa bee bene li'á. ⁴²Nu nediya nze'ca nú li'ihua la zecahua Diose. ⁴³Li'á

uriña lu cuenda' Pa; nu lá ri'i casohua li'á, pero tunu nze'ta stucu bene enu nze'ta lu cuenda' li'itsia, a'la nze'e si ri'i casohua.

⁴⁴¿Xa modo nú chili arqui'hua li'á, tunu li'ihua máse rla'nahua nú zucu' ayaa beelá bee sa'hua li'ihua, luhuare nú la'nahua nú ya'na nze'cahua lu tucutsia li'inu enu neca Diose che? ⁴⁵La ri'ihua elliebacu' nú tia li'á xanabitsia lu cuenda'hua lu Diose, xne enu xanabitsi lu cuenda'hua neca Moisés, enu nzuquiehua nú ri'i elietsa luhua. ⁴⁶Xne tunu li'ihua neli uchili arqui'hua lunú uni Moisés, le'ca chili arqui'hua li'á, xne equie cuenda' li'á uquie'e Moisés lu ichi' Stichia' Diose.

⁴⁷Pero tunu la chili arqui'hua lunú uquie'e Moisés, ¿xa chili arqui'hua lunú rnía luhua che?

Udete' Jesuse nú udacu ayu' mili bee bene

(Mt. 14:13-21; Mr. 6:30-44; Lc. 9:10-17)

6 Chenu udete nú unga bee nucua', nza Jesuse stucu chú inzatu' Galilea, elu le'ca lee Tiberias. ²Huaxi bee bene uyanala li'inu, xne ulañi'beei bee milagro nú rri'inu, chenu uri'iyecanu bee bene enu riti. ³Che uquie Jesuse equie tucu dañi elu uzucunu cuna bee bene'nu. ⁴Nu bee bichia ze'e axula nzu eliñi baxcu, eliñi nú rri'i bee bene Israel. ⁵Chenu uletsa Jesuse lunu ulañi'nu nú nze'ta riña huaxi bee bene lunu, che uninu lu Felipe:

—¿Cá chetsia'ahua nú acu ye bee benequie' nee?

⁶Pero unitsia Jesuse scua lu Felipe bi'ya xi cuaquii, xne

nediyala'nu lunú ri'inu. ⁷Chequie ucuaqui Felipe:

—Pero ni' chiucu ayu'u denario pá la riqui' nú acu beei masia te pedasoae.

⁸Che uni stucu bene'nu enu lee Andrés, bichi Simón Pedro:

⁹—Ca'a nzu tucu endu' niyu enu nuya' ayu' pá cebada cuna chiucu bela, pero ¿xa riqui' nucua' para lu huaxi bee benequie'?

¹⁰Chequie uni Jesuse lubeella: —Uni'hua lu ye beei nú cua'a beei.

Nu lunú nu' ixi xata ze'e ucua'a yebeei ze'e, nulu yebee bene enu nucua'a ze'e neca tucu ayu' mili puro bee niyutsia. ¹¹Che una'tse Jesuse bee pá ze'e, nu chenu ulaxu nú udete'nu che'tsa lu Diose, udete'nue ya bee bene'nu nu uritsi' beellae luye bee bene enu nucua'a ze'e. Le'ca esquie uri'inu cuna bee bela, udete'nu calutse nú uniarqui'beei acubeei nu udacu beei hasta elu ubela' beei. ¹²Chenu ubela' beei uni Jesuse lubee bene'nu:

—Uquiete' sa'hua bee pedaso nú uya'na, para nú la nitilu ni'teme'e.

¹³Chequie uquietesa' beellae, nu uriche beella chi'chiucu llume bee pedaso bee pá nú uya'na lu ayu' pá ze'e. ¹⁴Chenu ulañi' bee bene ze'e milagro llene nú uri'i Jesuse, che unibeei:

—Neli nú li'inu necanu profeta enu nzu nú nze'ta lu liililabe.

¹⁵Pero chu uri'i Jesuse beya' nu niarqui' beei nú uya' beei li'inu ala juerza para nú ri'i beei nú acanu arre, enze'e chu nzanu elu aya equie dañi ze'e, para nú zucu tuculi'inu ze'e.

Utse Jesuse lu inzatu'*(Mt. 14:22-27; Mr. 6:45-52)*

¹⁶Chenu uyu'u rula', ulaca bee bene' Jesuse ru'u inzatu'. ¹⁷Nu uyu'u beella liñi tucu barco nu uquixie beella rdete beella lu inzatu' ze'e para nú riña beella eyeche Capernaum. Nu ucabelila, nu lasca' benchila' Jesuse. ¹⁸Che uquixie nú unga tucu bii juerte, nu uquixie nú chiqui' riatsaya inzatu' ze'e. ¹⁹Chenu nzala beella tucu ayu' urre xu'cu kilometro, ulañi' beella nú see Jesuse lu inzatu' ze'e nu nzebicanu enza lu barco' beella, nu ulliqui beella. ²⁰Pero uninu lubeella: —iLi'á ninguie!, la lliquihua! ²¹Nu chiqui' ñia nzu arqui'beella uyucu beella li'inu liñi barco, nu chu uriña beella elu nzuebeella.

Ucua'na bee bene Jesuse

²²Chenu uye'e lu yuu stucu bichia, bee bene enu nucua'a stucu chu inzatu' ze'e uri'ibeei beya' nú nzue bee bene' Jesuse liñi tucu barco nú tuculi' nzu ze'e, pero né chaa Jesuse cuna li'ibeella. ²³Che chiucu chuna bee barco nú nze'ta enza eyeche Tiberias, uriña bee axu elu udacu bee bene pá chenu ulaxu nú udete' Jesuse che'tsa lu Diose. ²⁴Chequie chenu ulañi' bee bene ze'e nú leca' Jesuse nu ni' bee bene'nu ze'e, che uyu'u beei liñi bee barco ze'e nzuebeei eyeche Capernaum nze cua'na beei li'inu.

Jesuse neca pá nú rliqui' elunehuañi

²⁵Chenu uriña beei stucu chú inzatu' ze'e, ulluna' beei Jesuse nu unidichia' beei lunu:

—Maestro, ¿xunga uriñalu ca'a?

²⁶Nu ucuaqui Jesuse lubeei:

—Nediya nze'caa nú rla'nahua li'á, la necane equie bee milagro nú ulañi'hua nú uri'á, li'ihua rla'nahua li'á equie nú udacuhua hasta nú ubela'hua. ²⁷La chenu arqui'hua equie bee elubacu nú rlxu, sino que uyanu arqui'hua equie bee elubacu nú rliqui' elunehuañi nú leca xunga laxu lu Diose. Nu elunehuañi cua' neca nú rliqui' Bene enu uxe'la Diose lu iliulabe quie!, nu ucañila Diose li'inu para nucua'.

²⁸Chequie unidichia' beei lunu:

—¿Xi rqui'ña ri'iru para nú ri'iru lunú niarqui' Diose nú ri'iru?

²⁹Nu ucuaqui Jesuse lubeei:

—Lunú niarqui' Diose nú ri'ihua, necane nú chili arqui'hua Bene enu uxe'lanu lu iliulabe.

³⁰Che unibeei lunu:

—¿Xi seña lube'lu luru para nú chili arqui'ru li'ilu? ¿Nu xi milagro rri'ilu? ³¹Bee bene'ahua enu udetela udacu beella maná chenu ucua'a beella lu dañi achi elu la nuca'a bee bene, tucu nú rni lu ichi' Stichia' Diose elu rni: “Nú Diose udete' pá nú ulaca enza liñibe udacu beella.”

³²Chequie uni Jesuse lubeei:

—Li'á neli ixiule'a luhua nú la neca Moisés enu uliqui' pá nú ulaca enza liñibe, Pa neca enu rliqui' mero pá liñibe. ³³Xne pá nú rliqui' Diose, li'inu ube'tanu enza liñibe nu rliqui'nu elunehuañi' bee bene iliulabe.

³⁴Nu unibeei lunu:

—Detá, ye bichia uli'qui' pá cua' luru.

³⁵Che uni Jesuse lubeei:

—Li'á neca pá nú rliqui' elunehuañi. Nu enu ye'ta cuna li'á leca' xunga lia'na' nze'e. Nu enu chili arqui' li'á, leca' xunga bichi' nze'e. ³⁶Pero tucu nú unilá luhua, añinzuca nú ulañi'la'hua li'á pero la chili arqui'hua li'á. ³⁷Ye bee bene enu uxe'la Paa lua, nze'ta bee nze'e cuna li'á, nu bee bene enu nze'ta lua, la luachua bee nze'e. ³⁸Xne li'á nzela desde liñibe para nú ri'á tucu nú niarqui' Pa Diose enu uxe'la li'á, nu lá yela para nú ri'á tucu nú niarquitsia. ³⁹Nu Pa enu uxe'la li'á, lunú niarqui'nu necane nú ye bee bene enu uxe'lanu lua la nitia ni' tucu beei, sino que ri'á nú huañi zeca beei chenu ri'i Diose elu usticia'nu. ⁴⁰Xne Pa Diose niarqui'nu nú ye bee bene enu zela nú chili arqui' Lli'ñinu, lu'cu beella elunehuañi nú leca xunga laxu cuna li'inu. Nu li'á ri'á nú huañi zeca beella chenu ri'i Diose elu usticia'nu.

⁴¹Che uquixie bee bene Israel nú uze'ta beei Jesuse, equie nú uninu: “Li'á neca pá nú ulaca enza liñibe.”

⁴²Nu unibeei:

—¿Xie' lacanú nucua' neca Jesuse lliana' José la? Lia'ahua nu'lu'ahua pa' nucua' cuna na' nucua'. Nu ¿xinu rni nucua' nú ulaca nucua' enza liñibe?

⁴³Chequie uni Jesuse lubeei:

—Utsana'hua nú se'tahua li'á lusa'hua. ⁴⁴Lecati aca ye'ta lua, tunu la xe'la Diose nze'e lua. Li'inu enu uxe'la li'á, nu li'á ri'á nú huañi zeca nze'e chenu ri'i Diose elu usticia'nu. ⁴⁵Lu libro nú uquie'e bee profeta' Diose rni: “Diose zete' ye bee bene.” Enze'e ye bee enu riene'

stichia'nu, nu reca lunú sete'nu, li'ibeella nze'ta beella cuna li'á.

⁴⁶Ni' tucu lecati lasca' lañi' Diose, enu uxe'latsia Diose lu iliulabe ulañi'la' li'inu. ⁴⁷Neli rnia luhua nú enu nzeli arqui' li'á, rlu'cula nze'e elunehuañi nú leca xunga laxu lu Diose. ⁴⁸Li'á neca pá nú rliqui' elunehuañi. ⁴⁹Bee bene'hua enu udetela udacu beella maná lu dañi achi elu la nucua'a bee bene, nu añica nú ungutí beella; ⁵⁰pero li'á rnia luhua equie cuenda' pá nú ulaca enza liñibe, nu bene enu acune la atia'lla. ⁵¹Li'á neca pá nú nehuañi nú ulaca enza liñibe, nu enu acu pá quie', lu'culla elunehuañi nú leca xunga laxu lu Diose. Nu pá nú rliquia necane cuerpoa. Li'á detene para nú lu'cu bee bene iliulabe elunehuañi.

⁵²Chequie uquixie bee bene Israel ze'e nú unixuu beei lu sa'beei, nú unibeei:

—¿Xamodo aca benecua' liqui' nucua' cuerpo' nucua' da'cua'ahua?

⁵³Che uni Jesuse lubeei:

—Li'á neli nia luhua nú tunu la acuhua cuerpo' Bene enu uxe'la Diose nu tunu la hue'hua rene'nu la lu'cuhua elunehuañi che. ⁵⁴Pero enu acu cuerpoa nu hue' renea, lu'cu nze'e elunehuañi nú leca xunga laxu lu Diose, nu li'á ri'á nú huañi zeca nze'e chenu ri'i Diose elu usticia'nu. ⁵⁵Xne cuerpoa neca elubacu nú neli neca, nu renea neca nú neli neca nú hue' bee bene. ⁵⁶Nu bene enu acu cuerpoa nu hue' renea, li'illa nehuañilla cuna li'á, nu li'á nehuañia cuna li'illa. ⁵⁷Pa liñibe enu uxe'la li'á rlu'cunu elunehuañi, nu li'á nehuañia equie

cuenda' li'inu. Le'ca esquie enu racu cuerpoa lu'cu nze'le elunehuañi lu Diose equie cuenda' li'á. ⁵⁸Li'á rnia equie cuenda' pá nú ulaca enza liñibe. Nu la neca pá quie' xi neca maná nú udacu bee bene'hua enu udetela, xne añinzuca nú udacu beellae ungui beella, pero bene enu acu páquie' lu'cu nze'le elunehuañi nú leca xunga laxu lu Diose.

⁵⁹Bee nucua' neca nú uzete' Jesuse bee bene liñi indu Capernaum.

Bee bedichia' nú rliqui' elunehuañi nú leca xunga laxu

⁶⁰Chenu ubene' beei lunú uzete' Jesuse li'ibeei huaxi bee bene enu nzequie li'inu unibeei:

—Chiqui' neríña' nú ri'ahua beya' xa neca nú rni stichia'nu. ¿Ti aca ri'i caso lunú rninu?

⁶¹Chenu uri'i Jesuse beya' lunú rnibeei, che uninu lubeei:

—¿Xie' rcuu arquí'hua lunú unia scua la? ⁶²¿Xa ri'ihua tunu lañi'hua nú quie zeca Bene enu uxe'la Diose elu nzucunu hua'tu?

⁶³Equie cuenda'tsia Espíritu Santo rlu'cu bene elunehuañi nú leca xunga laxu, lecaxi aca bene ri'illa le'catsia li'illa. Nu equie cuenda' Espíritu Santo nze'ta bee bedichia' nú unilá luhua, nu equie cuenda' bee bedichia' cua' rlu'cu bene elunehuañi. ⁶⁴Pero nu'sca'hua enu la chili arquí' li'á.

Uni Jesuse scua xne nediya' nze'ca'nu desde ante nú taa bee bene enu la chili arquí' li'inu, nu ta bene enu dete' cuenda li'inu. ⁶⁵Nu le'ca uninu lubeei:

—Enze'le unia luhua nú lecati aca ye'ta lua, tunu la xe'la Pa liñibe nze'le lua.

⁶⁶Desde bichia ze'le, huaxi bee bene enu uyaquie Jesuse chu utsana' arquí'beei li'inu, nu nechenzenua'beei li'inu. ⁶⁷Chequie uni Jesuse lu ye chi'chiucu bee bene'nu:

—¿Le'ca nuhua niarquí'hua chuehua la?

⁶⁸Pero ucuaqui Simón Pedro lunu nú unilla:

—Detá, ¿tilu nza'aru che? Xne stichia'lu neca nú nze'ta yuu elunehuañi nú leca xunga laxu lu Diose. ⁶⁹Li'iru nzelíla arquí'ru li'ilu, nu nediya'la'ru nú necalu Cristo Lli'ñi Diose enu nehuañi.

⁷⁰Chequie uni Jesuse lubeella: —Añinzuca nú li'á ucañia lu ye chi'chiucuhua, pero nu' tucuhua enu neca beze'lu.

⁷¹Uni Jesuse scua, equie cuenda' Judas lliana' Simón Iscariote, xne Judas quie' neca enu udete' cuenda li'inu, añinzuca nú necai tucu lu chi'chiucu bee bene'nu.

Lá chili arquí' bee bichi Jesuse li'inu

7 Lulá bee nucua', uya Jesuse lu iliu Galilea. Lá niarquí'nu achaanu lu iliu Judea, xne bee bene cua' rla'na beei li'inu para nú úti beei li'inu. ²Pero lunú nze'ta axula eliñi' bee bene Israel, chenu rcua'a beella liñi bee ranchu. ³Che uni bee bichi Jesuse lunu:

—La ya'nalu ca'a, uquia lu iliu Judea, para nú le'ca lañi' bee bene'lu enu nucua'a ze'e bee milagro nú rri'ilu. ⁴Xne chenu niarquí' bene nú ri'i bee bene beya'

lunú rri'illa, la yala nú ri'illa nucua' a'chi'. Nee lunú rri'ilu bee milagro cua', uri'i nucua' ante lu ye bee bene iliulabe.

⁵Uni bee bichi Jesuse scua xne ni' li'ibeei la chili arqui'bee li'inu.

⁶Chequie uni Jesuse lubeei:

—Lasca' riña horaa, pero para li'ihua xitse hora neca nze'ca.

⁷Leca modo chana arqui' bee bene iliulabe li'ihua, pero li'isia rana arqui'bee, xne rixiule'a lubeei nú necha neca lunú rri'i beei.

⁸Uquiahua lu eliñi cua', xne la cha'sca'a, xne lasca' riña hora nú cha'a.

⁹Chenu ulaxu nú uninu scua lubeei, uya'nanu Galilea.

**Uya Jesuse eliñi nú rcua'a
bee bene liñi rancho**

¹⁰Lulá nú nzue bee bichi Jesuse lu eliñi ze'e, cheelá nzanu para nú lecati ri'i beya' nú le'ca nunu nzanu lu eliñi ze'e. ¹¹Nu bee bene Israel rla'na li'inu lu eliñi ze'e, nu unibeei: —¿Cáche nzu bene ze'e?

¹²Leta huaxi bee bene enu uya lu eliñi ze'e, yelu nú rnibeei lu cuenda'nu. Nu' beei enu rni: “Ñia nze'canu”; nu nu' beei enu rni: “La ri'i nze'canu, sino que sequienunu bee bene.” ¹³Pero ni' tucu beei né ni beei lu cuenda'nu ante luye bee bene, xne xiqui beei bee usticia Israel.

¹⁴Chenu unga arula'la nú reca eliñi ze'e, uyu'u Jesuse liñi indu llene Jerusalén, nu uquixienu nú uzete'nu bee bene. ¹⁵Che bee bene Israel chiqui' nzenu arqui'bee nú unibeei: —¿Xa reca nucua' huaxi beenú reca nucua' nu lecati uzete' li'i nucua'?

¹⁶Chequie uni Jesuse lubeei:

—La zetea li'ihua lunú necatsia elliebacua, sino que nze'ta nucua' lu Diose enu uxe'la li'á. ¹⁷Tunu nu' enu niarqui' nú ri'i tucu nú niarqui' Diose, li'illa ri'illa beya' tunu nú setea li'ihua nze'tae lu Diose, urre necane nú necatsia elliebacua.

¹⁸Enu sete' lunú necatsia elliebacu', li'illa rri'illa scua para nú zucu' aya bee bene li'illa. Pero bene enu rla'na nú zucu' aya bee bene Diose enu uxe'la li'inu, rnilla lunú neli neca, nu la zequienulla bee bene.

¹⁹Añinzuca nú utsa'na Moisés ley luhua, pero ni' tucuhua, la zucu' nú rnibiya' ley. ¿Nu xinu niarqui'hua nú útihua li'á?

²⁰Chequie ucuaqui bee bene ze'e lunu nú unibeei:

—iBenechiqui' nu' arqui'lu! ¿Ti niarqui' úti li'ilu?

²¹Nu uni Jesuse lubeei:

—Equie tucu milagro nú uri'á bichia nú sulachi bee bene, yehua chiqui' nzenu arqui'hua. ²²Pero li'ihua mase nú neca bichia nú sulachi bee bene rquie'ehua seña bee endu' me'hua para nú ri'ihua tucu nú unibiya' Moisés nú ri'ihua, añinzuca nú la neca equie cuenda' Moisés nú rquie seña bee endu' me'hua sino que bee bene'hua enu udetela rri'ila scua huatu. ²³Neequie, para nú la i'chiahua lunú rni ley' Moisés rquie'ehua seña bee endu' niyu masia nú necane bichia nú sulachi bee bene. Nu, ¿xiquie nú rlehua lua nú uriyeca tucu niyu bichia nú sulachi bee bene? ²⁴La nihua lu cuenda' bee bene lunú rlañi'tsiahua rri'i bee bene sino que rlutixu uri'inze'cahua beya' xi rri'illa che nihua.

Uni Jesuse nú cá benenu

²⁵Chequie chiucu chuna bee bene Jerusalén unibeei lu sa'bee:

—¿Xie' lanu benequie' neca enu rla'na bee bene para nú úti beei la?

²⁶Nu nee lu' nzulla rnilla ante lu ye bee bene, nu lecati ri'chialla. ¿Xie' uyalílaquie arqui' bee usticia nú necalla Cristo la? ²⁷Pero lia'ahua nediya' nze'ca'ahua cá enza nze'talla, nu chenu nze'ta Cristo, lecati ri'ibeya' cá enza nze'tanu.

²⁸Chenu ubene' Jesuse lunú rnibeei, diqui nú sete'nu bee bene liñi Indu llene Jerusalén, che juerte uninu lubei:

—Li'ihua rnihua nú nu'luhua li'á, nu le'ca nediya'hua cá enza nzela, pero li'á lá yelá equie cuenda' li'itsia. Li'á uriña equie cuenda' li'inu enu rni nú neli neca, nu li'ihua la chuluhua li'inu. ²⁹Pero li'á nu'lua li'inu, xne nzela enza lunu nu li'inu uxe'lanu li'á.

³⁰Chenu ubene'bee nucua' uniarqui'bee nú na'tse beei Jesuse, pero lecati una'tse li'inu xne lasca' riña hora nú xi ri'inu beei li'inu.

³¹Nulu huaxi añi bee bene enu nucua'a ze'e, huaxi beei uchili arqui' li'inu nu unibeei:

—Chenu ye'ta Cristo, ¿xie' ri'ilanu huaxilá bee milagro luquelá nú rri'i benequie' la?

Uxe'la bee fariseo bee sundado nze tucu Jesuse

³²Ubene' bee fariseo lunú rni bee bene equie cuenda' Jesuse. Che li'ibeei cuna bee ule'ya enu rnibiya', uxe'la beei bee sundadu enu rri'ucu Indu llene Jerusalén para nú

na'tse beei Jesuse cha ni'cu'. ³³Nu uni Jesuse lubei:

—Lacaxea' nzula cuna li'ihua nu chu benchila' zeca elu nzucu enu uxe'la li'á. ³⁴Li'ihua la'nahua li'á pero la llela'hua li'á, xne leca modo riñahua elu nza'a.

³⁵Che bee bene Israel ze'e unibeei lu sa'bee:

—¿Cá nza nucua' nú la llela'ahualla che? ¿Xie' nzalla lubei bene Israel enu uri'chialetse leta bee bene enu la neca bee bene Israel para nú zete'lla hasta bee bene enu laca bee bene Israel la? ³⁶¿Xa neca nú uni nucua': “Nú la'nahua li'á pero la llela'hua li'á, xne leca modo riñahua elu nza'a”?

Re'cu nú nu' inza nú nehuañi

³⁷Ultimo bichia eliñi ze'e, neca bichia nú másela llene neca nu utsuli Jesuse nu juerte uninu:

—Tunu nu' enu rebichi' ye'ta nze'lua para nú hue' nze'e inza. ³⁸Xne bee bene enu chili arqui' li'á, tucu nú rni lu ichi' Stichia' Diöse, liñi arqui' nze'e liñi inza nú rliqui' elunehuañi.

³⁹Chenu uni Jesuse scua. Nu nú uninu rni, nú yebee bene enu chili arqui' li'inu huañi Espíritu Santo cuna bee nze'e, xne bee bichia ze'e lá riñasca' Espíritu Santo equie nú lecasca' Jesuse elu rnibiya'nu.

Ule'e sa' bee bene

⁴⁰Chenu ubene' bee bene ze'e nú uni Jesuse, nu'bee enu uni:

—Neli nú benequie' neca profeta enu nzu nú nze'ta.

⁴¹Nu nu'lá beei enu uni: —Benequie' neca Cristo.

Pero textcua'a beei uni:

—Laca li'illa Cristo xne necalla bene Galilea. ⁴²Lu ichi' Stichia' Diose rni nú lubee familia' arre David nze'ta Cristo, nu eyeche Belén alanu elu le'ca unga lachi arre David.

⁴³Nu scua ule'esa' bee bene equie cuenda' Jesuse. ⁴⁴Nu nu'beei uniarqui' nú chanu ni'cu', pero lecati ulaca arqui' ana'tse li'inu.

La chili arqui' bee usticia Jesuse

⁴⁵Chequie bee sundado enu rriucu Indu llene Jerusalén ze'e, ubenchila' zeca beei elu nucua'a bee fariseo cuna bee ule'ya enu rnibiya', nu uni bee bene cua' lubeei:

—¿Xinu lá ye'tayuhualla?

⁴⁶Nu ucuaqui bee sundado ze'e nú unibeei:

—Leca xunga, uyu'u tucu bene enu rni tucu nú rni benecua'.

⁴⁷Che uni bee fariseo ze'e lubeei:

—¿Xie' le'ca nuhua uzelahua nú uzequienu nucua' li'ihua la? ⁴⁸¿Xie' nu'tátucu bee usticia'ahua urre nu' tátucua'ahua bee fariseo enu uchilila arqui' li'illa la? ⁴⁹¿Xie' la ri'ihua beya' nú huaxi bee benequie' nenitilula beei ante Diose, equie nú la aca beei ley la?

⁵⁰Che fariseo enu lee Nicodemo enu uyabi'ya Jesuse tucu reché, li'illa unilla:

⁵¹—Ley'ahua rni nú leca modo nia'ahua nú xi castiya riala tucu bene ante nú yene'ahua stichia'lla para nú ria'ahua beya' xi uri'illa.

⁵²Chequie ucuaqui beei lulla nú unibeei:

—¿Xie' le'ca nuulu nzulu chu' bee bene Galilea la? Uze'te' nze'ca lu

ichi' Stichia' Diose, para nú ri'ilu beya' nú ni' tucu bene Galilea lá aca profeta.

Tucu una'a huexe

⁵³Che chu nziue beei enza ni'beei.

8 Nu nza Jesuse enza dañi Olivos, ²nu chenu uye'e lu yuu stucu bichia, ubenchila' zecanu liñi indu llene Jerusalén, che uyetesa' huaxi bee bene lunu ze'e, nu chu uzucunu nu uquixienu uzete'nu li'ibeei.

³Che bee ulaxcuela enu reca ley' Moisés cuna bee fariseo, unguya'beei tucu una'a enu ullunanuu tucu niyu, nu utsu beei li'inchu arli'ti' bee bene enu nucua'a ze'e. ⁴Nu unibeei lu Jesuse:

—Maestro, una'aquei' ullunanunchu tucu niyu mero chenu nucua'anu sa'beei.

⁵Lu ley nú utsa'na Moisés lua'ahua rni:

—Nú sa' bee una'aquei', rqui'ña nú atincho cuna quiee, nu li'iquielu, ¿xa nilu nee?

⁶Li'ibeei unidichia' beei lunu scua para nú bi'ya xi ninu, nu scua lu'cu beei xi ricu'quiya beei li'inu, pero chu uzi'quindiqui Jesuse, nu uquixienu rquie'enu cuna cuene yaanu lu yuu. ⁷Pero lunú chu rnidichia'sca'lá beei lunu, che uzucu nelínu nu uninu lubeei:

—Tatsehua enu la lu'cu dula, rlutilá nze'e du'quiee una'a quie'.

⁸Che uzi'quindiqui zecanu núchu rquie'elánu lu yuu. ⁹Bee bene enu uyayu una'a ze'e lu Jesuse, chenu ubene' beei nú uni Jesuse scua, che uquixie nú tucua tucua beei nziue beei, desde enu unguxu nu hasta

bee enu nere'nelá, nziue ye beei nu utsa'natsia beei una'a ze'e cuna Jesuse lu ye bee bene enu nucua'a ze'e cuna li'inu. ¹⁰Chequie uzucu neli Jesuse nu uninu lu una'a ze'e:

—Una'a, ¿ma bee bene enu ube'tayu li'ilu ca'a? ¿Xie' ni'tucu beei lecaxi uri'inu li'ilu la?

¹¹Nu ucuaquinchu:

—Ni'tucu beei detá.

Che uni Jesuse lunchu:

—Ni'li'á lecaxi ri'inua li'ilu, uquia nee nu la ria'lu dula.

**Jesuse neca ellie'e lubee
bene lu iliulabe**

¹²Chequie uni zeca Jesuse lubee bene enu nucua'a ze'e:

—Li'á neca ellie'e lubee bene iliulabe. Bee bene enu zucu' stichia'a, chu'u ellie'e elliebacu' beella, nú xa lu'cu beella elunehuañi ante Diose, nu leca xunga tsunecabe elliebacu' beella.

¹³Nu uni bee fariseo lunu:

—Li'ilu rnilu le'ca lu cuenda' li'itsialu, nu lunú rnilu la zibi'i.

¹⁴Nu ucuaqui Jesuse nú uninu lubeei:

—Stichia'a si zibi'i, añinzuca nú rnia lu cuenda' li'á. Xne li'á nediyaa cá enza nzela nu cá enza nza'a, pero li'ihua la ri'ihua beya' cá enza nzela nu cá enza nza'a. ¹⁵Li'ihua rnhua lu cuenda' bee bene tucu nú rri'itsiahua elliebacu'. Pero li'á la nia lu cuenda' ni' tucu bee bene. ¹⁶Nu li'á rnia lu cuenda' bee bene, lunú neli neca. Xne la nia tucu nú necatsia elliebacua, sino que Paa enu uxe'la li'á nediya'nu nú neli neca lunú rnia. ¹⁷Lu ley'hua rni nú chenu nu' chiucu bene enu

tucu nchiucu'tse stichia' neli lunú rnibeei. ¹⁸Nee le'ca li'á neca tucu enu rni lu cuenda' li'á, nu Paa enu uxe'la li'á neca stuculla.

¹⁹Chequie unidichia' beei lunu:

—¿Ca nzucu pa'lu che?

Nu ucuaqui Jesuse lubeei:

—Li'ihua la chuluhua li'á, nu le'ca la chuluhua Paa xne tunu uyu'luhua li'á, le'ca nu'luhua Paa.

²⁰Scua uni Jesuse diqui nú sete'nu bee bene liñi Indu llene Jerusalén elu nchiucu' bee alcancía elu riu'u bee u'na. Pero ni'tucu lecati una'tse li'inu, xne lasca' riña hora nú llunanu.

Elu nza'a li'ihua leca modo chuehua

²¹Nu le'ca uninu lubeei:

—Chenu nza'a li'ihua la'nahua li'á, pero li'ihua atihua cuna stulahua, xne elu nza'a leca modo chuehua ze'e.

²²Nu uni bee bene Israel ze'e:

—¿Xie' le'ca li'itsialla útilla li'illa, enze'e rnilla nú leca modo cha'ahua elu nzalla la?

²³Chequie uni Jesuse lubeei:

—Li'ihua necahua bene lu yuu quie' pero li'á nzela enza liñibe, li'ihua necahua bee bene iliulabe, pero li'á la neca bene iliulabe.

²⁴Enze'e unia luhua nú atihua cuna stulahua. Xne tunu la chili arqui'hua nú li'á neca enu necaa, che atinuhua stulahua.

²⁵Nu unidichia' beei lunu:

—¿Ti necalu che?

Nu ucuaquinu lubeei:

—¿Desde chenu uquixiea nú rnia luhua, unilá luhua nú ti necaa?

²⁶Huaxi nú rqui'ña zetea li'ihua nu nia equie cuenda'hua. Pero

nee lunú rnia lubee bene iliulabe, necane nú rienea rni enu uxe'la li'á, nu lunú rniu neli necane.

²⁷ Pero li'ibeei né ri'i beei beya' nú equie cuenda' Diose neca nú rniu.

²⁸ Enze'e uniu lubeei:

—Chenu uri'ilahua lunú niarqui'hua cuna li'á Bene enu uxe'la Diose che ri'ihua beya' nú li'á neca enu neca, nu la ri'itsia lunú necatsia elliebacua. Sino que rnitsia lunú uzete'la Diose li'á. ²⁹ Xne li'inu enu uxe'la li'á nzunu cuna li'á nu leca' bichia nu tsana' arqui'nu li'á, xne rri'á puro lunú riu'u arqui'nu.

³⁰ Chenu ulaxu nú uni Jesuse scua, huaxi bee bene uyalí arqui' li'inu.

Bee bene enu neli neca lli'ñi Diose

³¹ Che uni Jesuse lubee bene Israel enu uyalí arqui' li'inu:

—Tunu nzezucu'láhua stichia'a. Che si neli necahua bee benea.

³² Nu chuluhua nú neli neca, nu equie cuenda' nú neli neca cua', la'ahua.

³³ Che ucuaqui beei:

—Li'iru nzelarú lu familia' tuxie Abraham, nu leca xunga unga neiquiru. ¿Xiquie nú rnilu nú aca nela'aru che?

³⁴ Nu uni Jesuse lubeei:

—Neli nia luhua nú ye bee bene enu rri'i dula, neca beei xi neca esclavo lu dula. ³⁵ Nu tucu esclavo la ya'nalí nze'e ni' bene enu utsi li'i, pero lliana' bene enu utsi esclavo ze'e sii nu' modo ria'nalii ni' pa'i.

³⁶ Enze'e tunu Lli'ñinu tsila'a li'ihua, che si neli nela'ahua ché. ³⁷ Nediyaá nú nze'tahua lu familia' tuxie Abraham. Pero li'ihua niarqui'hua nú útihua li'á, xne la yu' arqui'hua

stichia'a. ³⁸ Li'á rnia lunú uzete'la Paa li'á, pero li'ihua rri'ihua lunú rni pa'hua luhua.

³⁹ Chequie ucuaqui beei:

—iPa'ru neca tuxie Abraham!

Nu uni Jesuse lubeei:

—Tunu li'ihua neli necahua lliana' tuxie Abraham li'ihua, ri'ihua tucu nú uri'illa. ⁴⁰ Pero li'ihua añinzuca nu unilá nú neli neca luhua, tucu nú uzete'la Diose li'á, nu li'ihua niarqui'hua nú útihua li'á. iNu tuxie Abraham lá ri'illa scua! ⁴¹ Pero li'ihua rri'ihua tucu nú rri'i pa'hua.

Nu unibeei lunu:

—Li'iru lecati lli'ñilá necaru, tucutsia Diose neca pa'ru.

⁴² Che ucuaqui Jesuse lubeei:

—Tunu neli nú neca Diose pa'hua sechua li'á, xne equie cuenda' li'inu nzela lu iliulabe, lá yela lu cuenda' li'itsia sino que li'inu necanu enu uxe'la li'á. ⁴³ La ri'ihua beya' lunú rnia luhua, xne la niarqui'hua nú zucu' diacahua stichia'a. ⁴⁴ Enu neca pa'hua neca beze'lu, nu rri'ihua tucu nú niarqui' beze'lu nú ri'ihua. Desde chenu uquixie iliulabe riu' arqui' beze'lu nú úti bee bene sa' bee bene. Leca xunga uyu'u bichia nú nzenalai lunú neli neca, xne la ni lunú neli neca chenu rni eluquichia', nu scua rlube' nuxa necai, xne necai enu niquichia', nu li'i necai pa' eluquichia'. ⁴⁵ Pero li'á lunú rnia lunú neli neca, la chili arqui'hua lunú rnia. ⁴⁶ ¿Tahua nu' beya' ni nú rlu'cua dula che? Nu tunu neli neca lunú rnia luhua, ¿xiquie nu la chili arqui'hua li'á che? ⁴⁷ Bee bene enu neca bee bene! Diose sucu' diaca beella Stichia' Diose, pero li'ihua la

acahua bene' Diose, enze'e la zucu' diacahua stichia'nu.

**Nzula Jesucristo ante
nú ala Abraham**

⁴⁸Chequie uni bee bene Israel ze'e lunu:

—Neli lunú rniru nú benechiqui' nchiñi arqui'lu, nu bene Samaria necalu.

⁴⁹Che ucuaqui Jesuse lubeei:

—Ni' tucu benechiqui' leca arquia, sino que li'á sucua stichia' Paa, pero li'ihua puro bedichia' nú necha se rri'chiahua li'á. ⁵⁰Li'á la la'na nú zucu' aya bee bene li'á, pero nu' enu niarqui' nú zucu' aya bee bene li'á, nu li'inu necanu enu rri'i elu usticia. ⁵¹Neli rnía luhua nú titse bene enu zucu' stichia'a, leca' xunga ati nze'e.

⁵²Nu uni bee bene Israel ze'e lunu:

—Nee si' neli'ru nú rniru nú nchiñi benechiqui' arqui'lu. Abraham cuna ye bee profeta unguiti beella, nu li'ilu rnilu: “Titse bene enu zucu' stichia'a leca' xunga ati nze'e.”

⁵³¿Xie' másela neca equielu luquelá tuxie Abraham bene'ru enu udetela la? Li'illa ungutilla nu le'ca unguiti bee profeta. Nu li'ilu. ¿Ti si'lu nú necalu?

⁵⁴Che ucuaqui Jesuse:

—Tunu le'catsia li'á sucu ayaa li'á, lecaxi sibi' lunú rnía lu cuenda' li'á che. Pero enu sucu' aya li'á neca Paa, li'inu enu rnihua nú neca Diose'hua. ⁵⁵Li'ihua la chu'luhua li'inu. Pero li'isi'a nu'lua li'inu. Nu tunu nía luhua nú la chulua li'inu, che neca tucu bene enu niqichia' tucu nú necahua. Pero li'á nu'lua

li'inu nu sucua stichia'nu. ⁵⁶Tuxie Abraham bene'hua enu udetela ñia utsu arqui'lla nú lañi'lla bichia nú nzela lu iliulabe. Nu chenu ulañi'lla bichia cua' másela ñia utsu arqui'lla.

⁵⁷Nu uni bee bene Israel ze'e lunu:

—Pero ni' cincuenta lana lasca' lu'culu nu rnilu nú ulañi'lla'lu Abraham.

⁵⁸Chequie uni Jesuse lubeei:

—Neli nialuhua nú nzulá ante nú ala Abraham.

⁵⁹Che una'tse beei quiee nzetu' beei li'inu, pero chu uyu'unu leta bee bene, nu udetenu labe beei uchiu'unu liñi indu ze'e nu chu nzanu.

**Uri'iyeca Jesuse tucu bene enu
la ye'e lu desde nú ungula**

9 Chenu nzedete Jesuse tucu luhua ulañi'nu tucu niyu enu la ye'e lu desde nú ungulalla. ²Chequie unedichia' bee bene'nu lunu:

—Maestro, ¿xinu laye'e lu niyu quie' desde nú ungulalla? ¿Neca nucua' equie cuenda' stula pa'lla cuna na'lla la, urre necane equie cuenda' stulalla la?

³Nu ucuaqui Jesuse nú uninu:

—La nequie'lu niyuquie' equie cuenda' stulalla, ni' equie cuenda' stula pa'lla cuna na'lla. Li'illa nequie'lulla para nú lañi' bee bene lunú reca Diose rri'i equie milagro nú aca lulla. ⁴Nee diqui nú nu'sca' tiambu, rqui'ña nú ri'ahua lunú rni enu uxe'la li'á, xne nze'ta chenu laxu tiambu cua', nú lecasca' xi aca. ⁵Nu diqui nú nzua lu iliulabe quie', li'á neca ellie'e para lubee bene iliulabe.

⁶Chenu ulaxu nú uni Jesuse scua, chee utsuxenenu lu yuu nu ureche'nu ebenu cuna xenenu nu udu'nu ebenu cua' i'culu niyu enu la ye'e lu ze'e.

⁷Nu uninu lulla:

—Uquia uquiee lulu ru'u estanque nú lee Siloé —Siloé, rni nucua'. Enu uxe'la.

Che uya niyu ze'e nu uquiella lulla, nu chenu ubenchila'lla ri'yalalla. ⁸Chequie bee besinu'lla cuna bee bene enu nediya' nú rnacu'lla caridá unibeei:

—¿Xie' lacanu niyuquie' neca enu sucu rnacu' caridá la?

⁹Nu' beei rni:

—Li'illa nucua'.

Le'ca nu'lá beei enu rni:

—Xi rnaa nze'e rnaalla pero laca li'illa.

Che uni niyu ze'e:

—Li'á nze'e.

¹⁰Chequie unedichia' beei lulla:

—¿Xaquie modo uri'ilu nú uquixie ri'yalu che?

¹¹Nu ucuaquilla nú unilla:

—Bene enu lee Jesuse ureche'enu ebenu udu'nu i'culua, che uninu lua: “Uquia uquie lulu ru'u estanque Siloé.” Nu chu uya'a, nu chenu ulaxu nú uquiea lua ri'yala.

¹²Nu unibeei lulla:

—¿Ma bene ze'e che?

Nu ucuaquilla:

—La ri'á beya'.

Unidichia' bee fariseo lu niyu ze'e xa uyeca'lla

¹³Chequie uyayu beei niyu enu unga niquie'lu ze'e lube fariseo.

¹⁴Xne bichia nú ureche'e Jesuse ebenu nu udu'nue i'culu niyu ze'e

para nú ubi'yai. Bichia ze'e neca bichia nú sulachi bee bene. ¹⁵Nu unidichia' bee fariseo ze'e lulla, nú xa unga nú uquixie nú ri'yalla nu ucuaquilla lubeei:

—Bene ze'e udu' ebenu i'culua, nu chu uyaquiea lua, nu nee ri'yalá.

¹⁶Nu' bee fariseo ze'e enu uni:

—Bene enu uri'iyeca i'cululu la acalla bene' Diose, xne la lu'culla ula'na bichia nú sulachi bee bene.

Pero stucu beei uni:

—¿Xa aca nucua' ri'i nucua' milagro quie' tunu rlu'cu nucua' dula?

Nu urene urene unibeei.

¹⁷Chequie unidichia' zeca'la beei lu niyu enu unga niquie'lu ze'e:

—Nee nú uri'iyeca benecua' i'cululu, ¿ti neca nucua' secalu?

Nu unilla:

—Li'á rnia nú neca nucua' tucu profeta.

¹⁸Pero bee bene Israel ze'e la chili arqui'beei nú unga niquie'lu niyu ze'e, nu nee ri'yalla. Che ubixia beei pa'lla cuna na'lla, ¹⁹para nú unidichia' beei lubeella:

—¿Xie' ninguie' endu'hua enu rnihua nú la ye'elu desde nú ungula la? Nee, ¿xaquie unga nú ri'yai?

²⁰Chequie ucuaqui pa'lla cuna na'lla:

—Nediya'ru nú necai liana'ru, nu le'ca nediya'ru nú desde nú unglai la ye'e lui. ²¹Pero la ri'iru beya' xa unga nú ri'yai, nu le'ca la ri'iru beya' ti uri'iyeca i'cului. Mejora unidichia'hua lui unguxulacai, li'icai ixiule'i luhua xa unga nucua'.

²²Uni pa'lla cuna na'lla scua, equie nú xiqui beella, xne unga tucu necatsela bee bene Israel nú

tatse bee enu ni nú neca Jesuse Cristo, la zela'bee ni nú chu'u nze'e liñi indu. ²³Enze'e uni pa'lla cuna na'lla: “Mejora lui nedichia'hua, unguxulacai.”

²⁴Che ubixia zeca bee niyu enu unga niquie'lu nu unibeei lulla:

—Nzucu Diose ri'ya, uni' nú neli neca, xne nediya'ru nú bene enu uri'iyeca i'cululu necalla bene enu rlu'cu dula.

²⁵Nu ucuaqui niyu ze'e:

—La ri'á beya' tunu rlu'culla dula, urre la lu'culla dula, lunú nediyatsia nú ante unga niquie'lua nu nee ri'ya.

²⁶Chequie unidichia' zeca bee lulla:

—¿Xa uri'inu nucua' lulu? ¿Xa uri'i nucua' nú reca ri'yalu?

²⁷Nu ucuaquilla:

—¿Unilá luhua, pero la chili arqui'hua nú rnia? ¿Xinu niarqui'hua nú ni zecaa luhua xa uri'illa? ¿Xie' le'ca nuhua niarqui'hua nú acahua bene'lla la?

²⁸Che uqui'ya'lla uri'i bee nu unibeei lulla:

—Li'ilu tunu necalu bene'lla. Pero li'iru necaru bene' Moisés. ²⁹Xne li'iru nediya'ru nú Diose uni lu Moisés. Pero benecua' ni'teme' la ri'iru beya' cá enza nze'talla.

³⁰Che uni niyu ze'e lubeei:

—iNú secalullie' bene necahua! Li'ihua la ri'ihua beya' cá enza nze'talla pero li'illa uri'illa nú ri'ya nee. ³¹Nediya' nze'ca'hua nú Diose la ri'i caso bee bene enu rlu'cu dula, rri'i casotsianu bee bene enu sucu' stichia'nu nu rri'i lunú niarqui'nu.

³²Leca xunga ubene'ahua nú nu' tucu bene enu rri'i nú ri'ya tucu

bene enu la ye'elu desde nú ungula.

³³Tunu benecua' la ye'talla equie cuenda' Diose. Lecaxi acalla ari'illa.

³⁴Che unibeei lulla:

—Li'ilu nú ungulanúlu stulalu, ¿xie' li'ilálu zete'lu li'iru la?

Nu ulua bee li'illa ze'e.

Bee bene enu neca xi neca nú niquie' i'culu ante Diose

³⁵Ungabiya' Jesuse nú ulua bee bene Israel ze'e niyu enu unga niquie'lu liñi indu, nu chenu ulla'canu li'i uninu lui:

—¿Nzelí arqui'lu Bene enu uxe'la Diose la?

³⁶Nu ucuaquii nú uni:

—Detá, udixiule'e tii nze'e para nú chili arquia li'illa.

³⁷Che uni Jesuse lulla:

—Ulañi'la'lulla, nu li'illa necalla enu rdichia'nulu nee.

³⁸Chequie utsulliqui niyu ze'e lu Jesuse, nu uni:

—Nzelí arquia li'ilu Detá.

³⁹Nu chu uni Jesuse:

—Li'á ubela lu iliulabe quie' para nú ri'á elu usticia, para nú lañi' bee bene enu la lañi', nu bee enu rlañi' la laña' bee nze'e.

⁴⁰Chequie chiucu chuna bee fariseo enu nucua'a lunu ze'e, chenu ubene' bee ni uninu scua, unibeei lunu:

—¿Xie' le'ca nuuru niquie'luru la?

⁴¹Che uni Jesuse lubeei:

—Tunu necacla nú niquie'luhua, lecaxi equiya rlu'cuhua equie stulahua. Pero lunú rnihua nú ri'yahua enze'e rlu'cuhua equiya.

Ejemplu' curale' sanchi

10 Che uni Jesuse:
—Neli nia luhua nú bene enu la chu'u enza ru'u puerta

curale' sanchi sino que riu'u nze'e enza rene neca nze'e huana' nu rcachi' nze'e stene' bee bene. ²Pero bene enu riu'u enza ru'u curale nze'e si' neca bene enu rri'iucu bee sanchi. ³Nu bene enu rriucu ru'u curale' beéi xa'la nze'e ru'u curale' beéi para nú chu'u bene enu rri'iucu beéi nu chenu rixialla nú lee cada tucua beéi nu'lu beéi chilla. Nu rlualla beéi curale. ⁴Nu chenu ulaxu nú uchiu'u ye bee sanchi'lla che nzucululla lubeeí nu nzenala beéi li'illa, xne nu'lu beéi chilla. ⁵Pero la chenala beéi bene rene, sino que riecaxu'u beéi lu nze'e, xne la chulu beéi chii nze'e.

⁶Chenu ulaxu nú uni Jesuse ejemplu cua' li'ibeei né ri'i beei beya' xi rni nú uninu.

Jesuse neca xi neca tucu bene enu rri'iucu nze'ca bee sanchi

⁷Chequie unia'la Jesuse lubee bene ze'e:

—Neli nia luhua, li'á neca xi neca ru'u curale' bee sanchi elu riu'u beéi. ⁸Ye bee bene enu rlutilá ube'ta luquelá li'á neca bee nze'e xi neca huana' nu rcachi' nze'e stene' bee bene pero bee enu neca bee benea né ri'i caso beella bee nze'e. ⁹Li'á neca xi neca puerta, nu bene enu chu'u ru'u puerta quie' tsila'a nze'e, che nu'la modo nú chu'u nze'e nu chiu'u nze'e tucu nú rri'i bee sanchi, nú xela' beéi ixi acubeeí.

¹⁰Huana' nze'tatsia para nú rcachi' nu ruuti nu rnitilui bene, pero li'á nzela para nú li'ihua lu'cuhua elunehuañi, elunehuañi nú leca xunga laxu. ¹¹Li'á neca tucu bene enu rri'iucu nze'ca bee

sanchi', nu tucu bene enu rri'iucu nze'ca bee sanchi' para li'illa lecaxi ri'i mase hasta nú atilla equie cuenda' bee sanchi'lla. ¹²Pero enu rixaxtsia rriucu beéi, chenu rlañi' nze'e nú nze'ta bichiu riecaxu'u nze'e sana' arqui' nze'e beéi xne la neca nze'e tucu bene enu rri'iucu nze'ca bee sanchi nu laca beéi sanchi'lla, che rucu bichiu beéi nu rti'chiale'tse bichiu beéi. ¹³Bene cua' sana' arqui'lla beéi, xne rixaxtsialla nequienulla beéi nu la ri'illa caso beéi.

¹⁴⁻¹⁵Li'á neca bene enu rri'iucu nze'ca bee sanchi', scua tucu nú nu'lu Paa li'á le'ca scua nu'lua li'inu, le'ca scua nu'lua bee sanchia nu li'ibeeí nu'lu beéi li'á. Nu lecaxi ri'i mase hasta nú atia equie cuenda' beéi.

¹⁶Le'ca rlu'cua stexcua'a bee sanchi enu la chuche' liñi curale quie', rqui'ña nú nzetucua'a beéi, nu zucu'beéi nú rnia, para nú acatucunecatse beéi nu tucutsia enu ri'iucu beéi.

¹⁷Pa Diose seca li'á xne rdete cuendaa li'á nú atia, para nú huañi zecaa stucu bese. ¹⁸Lecati ri'i ana nú uti li'á, tunu li'á la zela nú atia, li'á rlu'cua poder nu zela nú atia, nu huañi zecaa stucu bese xne scua unibiya' Paa lua.

¹⁹Chenu ubene' bee bene Israel bee bedichia' quie', stucua'lla urene urene unibeei. ²⁰Huaxi beei uni: —¿Xinu rri'i casohua nucua' nu benechiqui' nu' arqui' nucua' nu ichia lucu seca nucua'?

²¹Pero texcua'a beei rni:

—Ni' tucu bene enu nu' benechiqui' arqui' laca ni scua. ¿Xie' aca tucu benechiqui' ri'i nú lañi' bee bene enu niquie' i'culu la?

Rle bee bene Israel lu Jesuse

²²Tiambu iqui, chenu rri'i bee bene Israel eliñi Indu llene Jerusalén, ²³se Jesuse enza liñi curdure' indu ze'e elu lee curdure' Salomón. ²⁴Che uyabica bee bene Israel lunu nu unibeei lunu:

—¿Hasta xungaquie ixiule'elu luru nú ti necalu? Neli uni' luru tunu li'ilu necalu Cristo.

²⁵Nu uni Jesuse lubeei:

—Unilá luhua nú ti necaa pero li'ihua la chili arqui'hua Li'á. ²⁶Pero li'ihua la chili arqui'hua li'á, lunú la acahua bee benea. Tucu nú unilá luhua. ²⁷Bee bene enu neca bee benea nu'lu bee nze'e chia nu li'á nu'lua bee nze'e nu nze'tanala bee nze'e li'á. ²⁸Li'á rdelea elunehuañi nú leca xunga laxu lubeella, nu leca' xunga nitilu beella, le'ca lecati axi beella yaa. ²⁹Xne Pa Diose, li'inu uliqui'nu beella lua, li'inu másela rlu'cunu poder lu yeene nu lecati axi beella yanu. ³⁰Li'á nu Pa Diose tucutsia necaru.

³¹Che una'tsea'la bee bene Israel quiee nzetu'bee li'inu. ³²Chequie uni Jesuse lubeei:

—Huaxi beenú neca nze'ca uri'á luhua equie poder nú rlu'cu Pa Diose, ¿ta luye bee nucua', du'hua quiee li'á?

³³Ucuaqui beei nú unibeei:

—La necane equie beenú neca nze'ca uri'ilu, nú du'uru quiee li'ilu. Du'uru quiee li'ilu lunú la lu'culu ula'na lu Diose, xne rri'ilu nú necalu Diose nu benetsialu.

³⁴Nu uni Jesuse lubeei:

—Xie'lanu lu ley'hua rni: “Li'á unia nú li'ihua necahua bee diose.”

³⁵Nediya'ahua nú leca modo tsacu' arquia'ahua lunú rni lu ichi' Stichia' Diose. Nú li'inu ulualenu bee diose bee bene enu uyucu stichia'nu.

³⁶Nee tunu Pa Diose utsulanu li'á para nú nzela la li'iliulabe quie'.

¿Xinu rnhua nú la lu'cua ula'na lunu, lunú unia nú necaa li'iñinu?

³⁷Tunu li'á la ri'á tucu nú rni Pa Diose la chili arqui'hua li'á. ³⁸Pero tunu rri'á tucu nú rninu mase la chili arqui'hua li'á, pero uyalí arqui'hua lunú rri'á, para nú ri'ihua beya' nú li'á nzua cuna Pa Diose nu li'inu nzunu cuna li'á.

³⁹Hora ze'e stucua'la bese uniarqui' beei nú na'tse beei Jesuse, pero chu ula'anu leta yaa beei nzanu.

⁴⁰Nu che nza zecanu stucu chú re'cu Jordán, luguare elu rluti urinza Juan bee bene, nu uya'nanu ze'e. ⁴¹Nu huaxi bee bene uya lunu, nu unibeei:

—Neli, nú né ri'i Juan ni' tucu milagro. Pero ye lunú unilla equie cuenda' bene quie', neli necane.

⁴²Nu huaxi bee bene uyalí arqui' Jesucristo luhua ze'e.

Unguti Lázaro

11 Uhuañi tucu bene enu ungariti lee Lázaro, li'illa cuna bee zanalla María nu Marta neca lachi beella Betania. ²Nu María zana Lázaro, li'inchu necanhu enu udu' perfume cuchiu' Jesuse nu ucui'chinchue cuna ichia equienchu. ³Che rucu bela beenchu uxe'la beenchu resuna lu Jesuse nu uni beenchu lunu:

—Detá, amigo'lu Lázaro riti.

⁴Chenu ubene' Jesuse nucua' inunu:

—Elichia quie' lanecatsiae para nú atilla sino que necane para nú equie cuenda'e acachee poder' Diose nu para nú le'ca acachee poder nú rlu'cu lli'ñi Diose.

⁵Añinzuca nú chiqui' seca Jesuse Marta cuna María nu Lázaro.

⁶Chenu ungabiya'nu nú riti Lázaro uya'nasca'lánu xiucu bichia luguare elu nzucunu. ⁷Udetetsia bee bichia ze'e uninu lubee bene'nu:

—Cha zeca'ahua lu iliu Judea.

⁸Che uni bee bene'nu lunu:

—Maestro, lacaxeelá nú uniarqui' bee bene Israel ze'e úti li'ilu cuna quiee. ¿Nu nza'lalu ze'e stucu bese la?

⁹Nu uninu lubeella:

—Li'ihua nediya'hua nú chi'chiucu hora nuya' tucu bichia. Nu tunu bichia see bee bene la llica cuchiu'lla, xne rlañi'lla ellie'e nú nu' lu iliulabe quie'. ¹⁰Pero tunu rula' see bene xica cuchiu'lla xne leca ellie'e ye'e lulla.

¹¹Le'ca uninu lubeella:

—Amigo'ahua Lázaro ra'tselalla. Pero nee nzecua'ñiialla.

¹²Nu uni bee bene'nu lunu:

—Detá, tunu ra'tsella yeca'calla che.

¹³Pero lunú uni Jesuse scua, rnii nú unguila Lázaro, nu bee bene'nu ulle'ca nú li'inu rninu nú ra'tsetsialla. ¹⁴Chequie udixiule'e itá Jesuse lubeella nú uninu:

—Unguti Lázaro. ¹⁵Nu ñia nzu arquia nú leca' ze'e, xne scua máse neca nze'cae lu cuenda'hua para nú chili arqui'hua li'á. Nee chahua chebi'ya'ahualla.

¹⁶Chequie Tomás enu ri'chia bee bene “cuachi”, unilla lubeelá bee bene' Jesuse:

—Uchahua cuna li'inu para nú atia'ahua cuna li'inu.

Jesuse neca enu rliqui' elunehuañi

¹⁷Che uriña Jesuse Betania, nu ungalá tacu bichia nú uhuachi' Lázaro. ¹⁸Betania axu ria'na Jerusalén, tucu chuna kilometro.

¹⁹Nu huaxi bee bene Israel uya bi'ya Marta cuna María, para nú tsala beella arqui' beenchu equie nú unguti zana beenchu. ²⁰Chenu ungabiya' Marta nú axula nze'ta riña Jesuse che uyacha'calunchu li'inu, pero María uya'na ni'beenchu.

²¹Chequie uni Marta lu Jesuse:

—Detá, tunu nzulu ca'a né ati zanaa. ²²Pero li'á nediyaá nú Diose liqui' ye nú nacu'lu lunu.

²³Nu uni Jesuse lunchu:

—Li'á rniaa nú huañi zeca zanalú.

²⁴Chequie uni Marta lunu:

—Neli'lu nucua', nediyaá nú huañi zecai chenu huañi zeca bee bene nguti, bichia nú laxu iliulabe.

²⁵Nu uni Jesuse lunchu:

—Li'á neca enu rri'i nú rehuañi zeca bee bene nguti nu rdetea elunehuañi' bee bene. Nu enu chili arqui' li'á mase nú atilla huañi zecalla. ²⁶Nu ye bee bene enu nehuañisca' nu nzeli arqui' li'á leca' xunga ati bee nze'e. ¿Nzelí arqui'lu nú rnia la?

²⁷Nu uninchu lunu:

—Nzelí arquia nú rnilu Detá, li'á nzeli arquia nú li'ilu necalu Cristo Lli'ñi Diose, enu nzu nú riña lu iliulabe.

Unguna' Jesuse ru'u eluhua' Lázaro

²⁸Chenu ulaxu nú uni Marta scua lunu, chu uyatixianchu belanchu María, nu uni a'chi'nchu lunchu:

—Uriñala Maestro nu rixianu li'ilu.

²⁹Chenu ubene' María nucua',
utsulíxu'unchu nzanchu lu Jesuse.

³⁰Nu lasca' chu'u Jesuse eyeche
Betania ze'e, nu nzusca'nu luhuare
elu uyacha'calu Marta li'inu. ³¹Che
bee bene Israel enu nucua'a ni'i
beenchu saala arqui' beenchu,
chenu ulañi' beella nú yexetsia
nza María che nzenala beella
li'inchu nu rni beella. Nzanchu nze
una'nchu ru'u eluhua' Lázaro.

³²Chenu uriña María elu nzu
Jesuse, utsu lliquinchu lunu nú
uninchu:

—Detá, tunu nzulu ca'a né ati
zanaa.

³³Chenu ri'yanu nú runa' María
nu le'ca runa' bee bene Israel enu
nuunchu, che nehuana utsi'nu, nu
chiqui' nehuana utsu arqui'nu. ³⁴Nu
unidichia'nu lubeella:

—¿Cá ucachi'hualla?

Che unibeella:

—Utecuru ne lañi'lu Detá,

³⁵Chequie unguna' Jesuse. ³⁶Che
uni bee bene Israel ze'e:

—iBi'yacuruhua chiqui' ulle'canu
li'illa!

³⁷Pero nu' beei enu uni:

—Benequie' neca enu uriyeca
i'culu bene enu unga niquie' i'culu
ze'e, ¿xie' lá acaquiella ari'illa xi
ari'illa para nú lá ati Lázaro la?

Uhuañi zeca Lázaro lu eluti

³⁸Chequie stucua'la bese nehuana
utsu arqui' Jesuse chenu uya bicanu
ru'u eluhua ze'e. Necane tucu yube',
nu nacu' tucu quiee ru'e. ³⁹Nu uni
Jesuse:

—Uyucuhua quiee cua'.

Che Marta zana tuxie uni lunu:

—Detá, nechala rlialla xne necala
tacu bichia nú ungutilla.

⁴⁰Nu uni Jesuse lunchu:

—¿Xie' lanu unilá lulu nú tunu
chili arqui'lu, lañi'lu poder' Diose
la?

⁴¹Che uyucu beella quiee nú nacu'
ru'u eluhua ze'e, nu ubi'ya Jesuse
enza liñibe nu rninu:

—Pa Diose, che'tsalu xne uri'i
casolu nú unia lulu. ⁴²Li'á nediyaa
nú siempre rri'ilu caso lunú rnia
pero rnine lu cuenda' bee bene
quie', enu nucua'a ca'a, para nú
chili arqui'beella nú li'ilu uxe'lalu
li'á.

⁴³Chenu ulaxu nú uninu scua che
juerte uninu:

—iLázaro, uchiu'u liñi cua'!

⁴⁴Chequie uchiu'u Lázaro liñi
eluhua ze'e, nu nebelasca' venda
yalla cuna cuchiu'lla. Nu le'ca
nacu' tepedaso laquie lulla, che uni
Jesuse lubeella:

—Uxe'chehualla nu uzelahua
yaalla.

Unga tucu necatse bee bene para nú xa utibeei Jesuse

(Mt. 26:1-5; Mr. 14:1-2; Lc. 22:1-2)

⁴⁵Chequie huaxi bee bene Israel
enu uyanuu María uyalí arqui'beei
Jesuse chenu ulañi' beei milagro
nú uri'inu. ⁴⁶Pero nu'beei enu
uyatixiule'e lubee fariseo lunú uri'i
Jesuse. ⁴⁷Che bee fariseo quie' cuna
bee ule'ya enu rnibiya' uquie'te'
sa'beella cuna beelá bee usticia nu
uni beella:

—¿Xneca ria'ahua? Xne bene quie'
rri'i huaxi bee milagro. ⁴⁸Nu tunu
zela'ahua nú nzeri'ilá benequie'
scua, ye bee bene chili arqui' li'illa,

che bee usticia Roma ye'ta nitilu indu'ahua nu cuna nación'ahua.

⁴⁹Pero tucu beella enu lee Caifás enu neca ule'ya enu rnibiya' lu ye bee ule'ya lana ze'e uni:

—Li'ihua la biya'hua, ⁵⁰nu la ri'ihua beya' nú másela neca nze'ca nú ati tucutsia bene equie cuenda' ye bee bene, luquela nú nitilu diqui nación'ahua.

⁵¹Pero né ni Caifás nucua' lu cuenda'tsialla. Diose udete' bee bedichia' cua' lulla, xne necalla ule'ya enu rnibiya' lu ye bee ule'ya lana ze'e, enze'e unilla nú enta nú ati Jesuse equie cuenda' bee bene Israel; ⁵²nu la necane nú equie cuenda'tsia beella atinu, sino que le'ca necane para nú acatucunecatse beella cuna bee bene' Diose enu nucua'a diqui lu iliulabe. ⁵³Enze'e desde bichia ze'e bee usticia' bee bene Israel unga tucunecatse beella nú útibeella Jesuse.

⁵⁴Enze'e lá lube'lua' Jesuse lubee bene Israel. Sino que uchiu'unu lu iliu Judea nu nzanu tucu eyeche nú lee Efraín axu lu tucu dañi achi, nu ze'e uya'nanu cuna bee bene'nu.

⁵⁵Chenu nze'ta riñala eliñi baxcu nú rri'i bee bene Israel. Huaxi bee bene bee eyeche enza ze'e nzuebeella Jerusalén para nú ri'ibeella lunú neca costumbre' beella para nú lecaxi naa beella lu Diose ante nú riña eliñi ze'e. ⁵⁶Che rla'na beei Jesuse nu rnedichia' beei lu sa'beei liñi Indu llene Jerusalén, nú unibeei:

—¿Xa nihua? ¿Nze'talla lu eliñi la o la ye'talla la?

⁵⁷Nu bee ule'ya enu rnibiya' cuna bee fariseo unibiya'la beella, nú tunu titse bee bene acabiya' cá nzunu ixiule'e beei para nú llunanu.

Tucu una'a udu' perfume cuchiu' Jesuse

(Mt. 26:6-13; Mr. 14:3-9)

12 Sexu'cu bichia rri'i para nú aca eliñi baxcu, chenu uya Jesuse Betania, elu neca lachi Lázaro enu uri'inu nú uhuañi zeca lu eluti. ²Ze'e ureche' beella tucu exee para Jesuse, Marta neca enu udete' elubacu lubeella nu Lázaro neca tucu enu nzucununu lu mexa. ³Hora ze'e uriñayu María tucu arula' litro perfume nú huaxi seca xne necache'e puro nardo nu udu'nchue equie cuchiu Jesuse, nu chu ucui'chinchue cuna ichia equienchu. Nu diqui liñi ni'i ze'e ñia ulia uri'i perfume cua'. ⁴Che uni Judas Iscariote enu neca lliana' Simón enu neca tucu lu chi'chiucu bee bene' Jesuse enu udete' cuenda li'inu, uni:

⁵—¿Xinu lá autinchu perfume quie' chuna ayu'u dimi denario para nú aca elietsa lubee bene enu seca elitsi?

⁶Pero né ni Judas scua lunú nzeno arqu'i lu cuenda' bee bene enu seca elitsi, uniitsiai scua xne nehua'ni nu como li'i nuya' cuendai biti nú nu'che' dimi, che rcachi'i bee dimi nú rdete' beella yai duche'i. ⁷Chequie uni Jesuse lui:

—La ri'chialunchu, xne li'inchu udu'xulanchu perfume quie' li'á para bichia chenu achi'a. ⁸Xne bee bene elitsi ye bichia nucua'a cuna

li'ihua, pero li'á la ye tiambu nzua cuna li'ihua.

**Unga tucunecatse bee bene
nú úti beei Lázaro**

⁹Huaxi bee bene Israel ungabiya' nú nzucu Jesuse eyeche Betania, uya beei ze'e. La necatsiae para nú lañi'beei Jesuse sino que le'ca para nú lañi' beei Lázaro enu uri'inu nú uhuañi lu eluti. ¹⁰Enze'e bee ule'ya enu rnibiya' unga tucunecatse beella para nú úti beella Jesuse nu le'ca nuu Lázaro uniarqui' beella úti beella. ¹¹Xne equie cuenda'lla huaxi bee bene Israel xiu'u leta beella, nu nzeli arqui' beella Jesuse.

Uyu'u Jesuse Jerusalén

(Mt. 21:1-11; Mr. 11:1-11; Lc. 19:28-40)

¹²Chenu uye'e lu yuu stucu bichia, huaxi bee bene bee enu uriña Jerusalén lu eliñi baxcu ungabiya' beella nú riña Jesuse ze'e. ¹³Che uchiecu' beei iña nu uya cha'calu beei li'inu, nu urixialibeei nú unibeei:

—iDiose nzu cuna lia'ahua! iÑia neca lu cuenda' li'inu enu nze'ta lu cuenda' Diose, enu neca Arre Israel!

¹⁴Jesuse ullela' tucu burro e'ne! nu uricunuí, tucu nú rni lu ichi' Stichia' Diose elu rni:

¹⁵Bee bene Sión la lliquihua,
bi'yacuruhua nze'taquiela
Arre'hua,

nchiucu' equie tucu burro e'ne!

¹⁶Hora ze'e lá ri'i bee bene'nu beya' lunú reca, pero chenu uquienu liñibe che uri'ibeella beya' nú scua niquie lu ichi' Stichia' Diose equie cuenda'nu, enze'e unga scua.

¹⁷Bee bene enu nucua'a cuna Jesuse chenu ubixianu Lázaro nú

uchiu'ui liñi eluhua, nu uri'inu nú uhuañi lu eluti, bee bene cua' udixiule'e lubee bene lunú ulañi'beei. ¹⁸Enze'e uchiu'u huaxi bee bene uyacha'calu Jesuse, xne ungabiya' beei bee milagro nú uri'inu. ¹⁹Chequie uni bee fariseo lu sa'beei ulañi'huanee nú leca xa modo ria'ahua:

—Bi'yacuruhua tescuala' huaxi bee bene nzenala li'lla.

**Rla'na chiucu chuna bee
bene griego Jesuse**

²⁰Bee bene enu uriña Jerusalén lu eliñi para nú lu'cu ula'na lu Diose, leta beei nucua'a chiucu chuna bee bene griego. ²¹Li'ibeei uyabica beei lu Felipe, enu neca bene eyeche Betsaida, tucu eyeche lu iliu Galilea, nu uzequiee beei lulla nú unibeei:
—Detá, niarqui'ru bedichia'nuru Jesuse.

²²Che uyatixiule'e Felipe nucua' lu Andrés nu che rucu beella uyatixiule'e beella nucua' lu Jesuse. ²³Chequie uni Jesuse lubeella:

—Uriñala hora nú li'á Bene enu uxe'la Diose, zucu' aya bee bene li'á. ²⁴Xne li'á nia luhua nú tucu nú neca tucu ebichi trigo nú tunu la benii, necasca' tucutsiae, pero tunu benii che chiqui' ayune. ²⁵Xne bene enu máse niarqui' huañi lu iliulabe quei', enta bichia nú laxu nucua', pero bene enu nzenu arqui' nú ri'i lunú niarqui' Diose mase ulle'calla lunú ulle'calla lu'culla elunehuañi nú leca xunga laxu ante lu Diose. ²⁶Tunu nu' bene enu niarqui' nú zibi' lua, ye'taquié nze'e li'á, nu elu nza'a le'ca ze'e nza nze'e. Nu bene enu zibi' lua, zucu' aya Pa Diose nze'e.

Udixiule'e Jesuse nú atinu

²⁷ ¡Chiqui' nehuana nzu arquia nee hora quie'! ¿Nu xi nia? ¿Nia "Pa Diose, utsila'a li'á lunú chiqui' nehuana se'ca"? ¡La nia scua xne para nucua' nzela!

²⁸ Enze'e rnia, Pa Diose ulube' poder'lu lubeei.

Che uyene tucu chii enza liñibe, nú rni:

—Ulubela poder nú rlu'cua lubee bene pero lubezecane stucu bese lubeei.

²⁹ Chequie chenu ubene' bee bene enu nucua'a ze'e chii cua', uni beella nú biziyu' neca enu uni, pero nu' beella enu uni:

—Tucu ángel neca enu ni lunu.

³⁰ Che uni Jesuse lubeei:

—Lá yene chiquie' lu cuenda' li'á sino que necane para li'ihua.

³¹ Nee uriñala hora nú aca elu usticia lu iliulabequie' nu nee la nibiya' beze'lu tucu nú rnibiya'i lu iliulabequie'. ³² Pero chenu uquieelá lu cruse, che ri'á nú yelu bee bene chili arqui' li'á.

³³ Scua udixiule'enu xa modo atinu. ³⁴ Che ucuaqui bee bene lunu:

—Li'iru nediya'ru nú lu ley rni, nú leca xunga ati Cristo. ¿Xinu rnilu nú Bene enu uxe'la Diose rqui'ña nú quíe lu cruse? ¿Ti neca Bene enu uxe'la Diose che?

³⁵ Chequie uni Jesuse lubeei:

—Lacaxea' nzulá ellie'e quie' cuna li'ihua, enze'e uyaquiehuane diquila nú nzue cuna li'ihua para nú la ri'i nú necabe ana luhua xne bene enu nzenala nú necabe la ri'i nze'e beya' cá nza nze'e. ³⁶ Enze'e diquila nú nzu ellie'e quie' cuna li'ihua uchili

arqui'huane para nú acahua bee benea.

Chenu ulaxu nú uni Jesuse bee bedichia'quie' chu nzanu nu né laña' beei li'inu.

La chili arqui' bee bene Israel Jesuse

³⁷ Pero añinzuca nú uri'i Jesuse huaxi bee milagro lubeei, né chili arqui'beei li'inu. ³⁸ Nu scua uyalu nú uni profeta Isaías chenu unilla:

Pa Diose, lecati nzeli arqui' beenú rniru equie cuenda'lu.

Lecati rri'i beya' nú equie poder'lu huaxi beenú unga.

³⁹ Enze'e né chili arqui'beei li'inu. Nu le'ca uquie'e profeta Isaías:

⁴⁰ Diose uri'i nú neca xi neca nú la lañi'beei,

nu uri'inu nú unga nziti

arqui'beei,

para nú la lañi'beei,

nu la ri'ibeei beya', para nú la

benchila'beei lua,

para nú ri'á perdona stula beei.

⁴¹ Uni Isaías scua xne ulañi'la'lla poder nú rlu'cu Jesuse hasta hua'tu, enze'e unilla scua equie cuenda'nu.

⁴² Pero huaxi bee bene Israel uchili arqui' Jesuse, nu hasta chiucu chuna bee bene enu rnibiya' uchili arqui' li'inu. Pero lá tsiru'u beei nucua' lubee bene xne xiqui beei nú cánu la zela' bee fariseo nú chu'ulá beei liñi indu. ⁴³ Xne másela uyu'u arqui'beei nú zucu' ayaa bee bene li'ibeei, luhuare nú ya'na nze'ca beei lu Diose.

Stichia' Jesuse ri'i elu usticia

⁴⁴ Nu juerte uni Jesuse:

—Bene enu nzeli arqui' li'á, la nzeli arqui' nze'e li'itsia, le'ca

nzeli arqui' nze'e Pa Diose enu uxe'la li'á. ⁴⁵Nu enu rlañi' li'á, le'ca rlañi'la' nze'e Pa Diose enu uxe'la li'á. ⁴⁶Li'á enu neca ellie'e, uriña lu iliulabe para nú bee bene enu nzeli arqui' li'á, la chenala' beei inziu nú necha neca. ⁴⁷Enu riene' stichia'a nu la ri'i casoe, li'á la necaa enu dete' castiya nze'e, xne lá yela lu iliulabe para nú detea castiya bee bene, sino que uriña para nú tsila'a bee bene. ⁴⁸Bene enu rluachu li'á, nu la ri'i caso stichia'a nzula enu dete' castiya nze'e, bee bedichia' nú unila dete' castiya nze'e bichia chenu hualu Diose lu cuenda' bee bene. ⁴⁹Xne bee bedichia' nú rnia la necane stichia'tsia, sino que Pa Diose enu uxe'la li'á, li'inu unibiya'nu lua nú xi nia nu xi zetea bee bene. ⁵⁰Nu nediya' nú stichia' Pa Diose necane para nú lu'cu bee bene elunehuañi nú leca xunga laxu lu Diose. Enze'e rnia tucu nú unibiya'nu lua nú nia.

Quijee Jesuse cuchiu' bee bene'nu

13 Ante eliñi baxcu, nediya'la' Jesuse nú entariñala hora nú tsa'nanu iliulabequie' para nú nzianu zucunu cuna pa'nu Diose. Li'inu chiqui' uzecanu bee bene'nu lu iliulabe quie' nu secasca'nu li'ibeella hasta nee.

²Nu chenu racuxee beella, uyu'u beze'lu arqui' Judas Iscariote lliana' Simón Iscariote para nú dete' cuendai Jesuse. ³Pero nediya'la'nu nú Pa'nu Diose utsa'nala yeene yanu, nu le'ca nediya'la'nu nú enza lu Pa'nu Diose nze'tanu nu enza lu Pa'nu Diose benchila' zecanu. ⁴Diquila nú racuxee beella utsulínu

nu uluanu laquie nú nutunu lu xucunu nu ullica'nu tucu tualla xla'cunu. ⁵Che chu udu'nu inza liñi tucu exqui'ña, nu uquixienu rquienu cuchiu' bee bene'nu, nu rcui'chinue cuna tualla nú naca'cu xla'cunu.

⁶Chenu nze quienu cuchiu' Simón Pedro, unilla lunu:

—Detá, la yala nú quielu cuchiu'a.

⁷Nu ucuaqui Jesuse lulla:

—Nee la ri'ilu beya' lunú rri'á, pero enta chenu ri'ilu beya'e.

⁸Chequie uni Pedro lunu:

—iLa zelaa nú quielu cuchiu'a!

Nu uninu lulla:

—Tunu la quiea cuchiu'lu la aca'lu benea che.

⁹Nu ucuaqui Simón Pedro lunu:

—Aa che, Detá, pero la quieelu cuchiu'tsia, le'ca uquiee ya nu u'cha' li'á che.

¹⁰Pero ucuaqui Jesuse lulla:

—Enu ungutsala, cuchiu'tsia nze'e rqui'ña nú chequielá, xne leca' xi naa diquilla. Nu li'ihua leca' xi naahua, añinzuca nú laca yehua.

¹¹Li'inu uninu: “Añinzuca nú laca yehua”, xne nediya'nu nú ta enu dete' cuenda li'inu.

¹²Chenu ulaxu nú uquieenu cuchiu' bee bene'nu, che ungotu zecanu laquie nú uluanu lu xucunu, nu chu uzucu zecanu lu mexa nu uninu lubeella:

—¿Rri'ihua beya' lunú uri'á luhua la? ¹³Li'ihua rnhua Maestro nu Detá lua, nu neli'hua xne scua necane. ¹⁴Nee li'á nú neca ulaxcuela nu Detá uquia cuchiu'hua, le'ca scua rqui'ña nú quiehua cuchiu' bee sa'hua. ¹⁵Ulubela luhua xa ri'ihua para nú le'ca scua

tucu nú uri'á ri'ihua. ¹⁶Li'ihua nediya'hua nú ni'tucu moso' la neca equielái lu patron'i, le'ca bene enu nza luhua'e' stucu bene la neca equielái lu bene enu xe'la li'i. ¹⁷Ñia nza lu cuenda'hua tunu rri'ihua beya' bee nucua' nu zucu'huane.

¹⁸La nia lu cuenda' yehua, li'á nediya tahua bee enu ucaña. pero rqui'ña nú yalu tucu nú rni lu ichi' Stichia' Diose elu rni: "Li'i e'cu enu racunua, ubelleta equiea." ¹⁹Nia nucua' luhua ante nú acane para nú chenu acane, chili arqui'hua nú li'á necaa enu necaa. ²⁰Neli nia luhua: Nú bene enu ri'i caso bene enu xe'laa, rri'i caso nze'e li'á, nu enu rri'i caso li'á, li'illa rri'i casolla enu uxe'la li'á.

Udixiule'e Jesuse nú dete' cuenda Judas li'ínu

(Mt. 26:20-25; Mr. 14:17-21; Lc. 22:21-23)

²¹Chenu ulaxu nú uni Jesuse scua, chiqui' nehuana utsu arqui'nu, che udixiule'e nze'canu lubeella nú uninu:

—Neli nia luhua nú tucuhua dete' cuenda li'á.

²²Chequie uquixie ubi'ya bee bene'nu lu sa'beella, nu la ri'i beella beya' tabeella neca enu uninu lu cuenda'. ²³Nu tucu bene' Jesuse enu chiqui' secanu enu nzucu cue'tsenu diqui nú racuxe beella, ²⁴uri'i Simón Pedro seña lulla para nú nedichia'lla lunu, núti lu cuenda' rninu. ²⁵Che bene'nu enu nzucu cue'tsenu unedichia'lla lunu:

—Detá, ¿Taru enu dete' cuenda li'ílu?

²⁶Nu ucuaqui Jesuse, nu uninu:

—Cuachaa tele'e pá nu ya enu detene nze'ella.

Che ucuachanu tele'e pá udete'nu ya Judas Iscariote, Iliana' Simón Iscariote. ²⁷Hora nú una'tse Judas pá ze'e chu uyu'u beze'lu arqui, nu uni Jesuse lui:

—Lunú niarqui'lu ri'ílu, yexetsia uri'í.

²⁸Nu ni' tucu beella enu nzucununu lu mexa ze'e né ri'ibeella beya' xinu uninu lui scua. ²⁹Nu lunú Judas nuya' cuenda biti nú nu'che' melu, che nu' beella enu uri'í elliebacu', nú uni Jesuse lui nú chetsii xi chetsii para eliñi, urre dete'i xi dete'i lubee bene enu seca. elitsi.

³⁰Chenu ulaxu udacu Judas pa ze'e chu uchiu'ui nzai nu uyu'ula rula' che.

Tucu mandamiento cuqui

³¹Chenu uchiu'u Judas uni Jesuse:

—Nee aca ahee poder nú rlu'cu Bene enu uxe'la Diose lu iliulabe, nu equie cuenda' li'ínu aca ahee poder nú rlu'cu Diose. ³²Nu scua tucu nú lube' Bene enu uxe'la Diose, xa neca poder nú rlu'cu Diose, le'ca scua lube' Diose poder nú rlu'cu bene enu uxe'lanu, nu la lea' nú acane scua.

³³Bee lli'ñia, lle'natsia nzula cuna li'ihua. La'nahua li'á pero tucu nú unila lubee bene Israel, le'ca scua nia luhua nee. Leca modo tsehua elu nza'a. ³⁴Nee líquia tucu mandamiento cuqui luhua: Uzecahua bee sa'hua. Tucu nú se'ca li'ihua, le'ca scua uzecahua bee sa'hua. ³⁵Tunu secagua bee sa'hua, scua ri'i ye bee bene beya' nú li'ihua necahua bee benea.

Uni Jesuse nú ni Pedro nú la chululla li'ínu

(Mt. 26:31-35; Mr. 14:27-31; Lc. 22:31-34)

³⁶Nu uni Simón Pedro lu Jesuse:

—Detá, ¿ca nzalu?

Nu uni Jesuse:

—Elu nza'a leca modo tselu nee, pero enta bichia nú ye'tanalalu li'á.

³⁷Che uni Pedro lunu:

—Detá, ¿xiqúie nú leca modo tsea cuna li'ilu nee? ¡Nu li'á lecaxi ri'i mase nú atia lu cuenda'lu!

³⁸Nu ucuaqui Jesuse nú uninu:

—¿Neli'lu nú atilu lu cuenda la? Li'á nia lulu nú ante nú bixia tiula, li'ilu chunala bese unilálu nú la chululu li'á.

**Jesuse neca inziu para nú
riña bene lu Diose**

14 'Chequie uni Jesuse lubeella:

—La chenu arqui'hua, uchili arqui'hua Diose, nu uchili arqui'hua li'á. ²Elu nzucu Pa Diose chiqui' nu' luguare elu cua'a bee bene nu', xne tunu leca luhua li'á lá ania luhua nú nze tsuche'a elu cua'ahua. ³Nu chenu uyatsuche'la elu cua'ahua, che nzela stucu bese para nú nzela tucua'ahua para nú cua'ahua elu zucua'a. ⁴Li'ihua nediya'hua cá nza'a nu nu'luhua inziu para nú riñahua ze'e.

⁵Chequie uni Tomás lunu:

—Detá, la biya'ru cá nzalu, ¿xa chuluru inziu nú rnilu?

⁶Che ucuaqui Jesuse, nú uninu:

—Li'á neca inziu ze'e, nu nú neli neca, nu elu nehuañi. Equie cuenda' li'itsia nu' modo riña bee bene lu Pa Diose liñibe. ⁷Tunu li'ihua nu'luhua li'á le'ca nu'luhua Pa Diose nu nee nu'lulahuanu, xne ulañi'la'huanu.

⁸Che uni Felipe lunu:

—Detá, uzela lañi'ru Pa Diose para nú ya'na conformero.

⁹Chequie uni Jesuse lulla:

—Felipe, xeela nzua cuna li'ihua, ¿Nu lasca' chululu li'á la? Enu ulañi'la' li'á, le'ca ulañi'la' nze'e Pa Diose, ¿xiqúie nú rnilu lua nú zela lañi'hua Pa Diose? ¹⁰¿Xie' la chili arqui'lu nú tucutsia neca cuna Pa Diose nu li'inu tucutsia necanu cuna li'á la? Bee bedichia' nú rnía la necane elliebacutsia sino que Pa Diose, enu nzunu li'á, li'inu necanu enu rri'i lunú rri'á. ¹¹Uchili arqui'hua nú li'á nzunua Pa Diose, nu li'inu nzununu li'á, tunu la chili arqui'hua, uchili arqui'hua li'á equie beenú rri'á. ¹²Li'á nia luhua nú enu nzeli arqui' li'á, le'ca ri'i nze'e beenú rri'á, nu ri'i nze'e beenú llesca'lá neca, lunú nzia'la elu nzucu Pa Diose. ¹³Nu ye nú nacu'hua lu Diose equie cuendaa li'á liquine. Para nú equie cuenda' lli'ñinu acachee poder nú rlu'cu Pa Diose. ¹⁴Xitse nú nacu'hua lu Diose equie cuendaa, li'á liquine.

Uni Jesuse nú xe'lanu Espíritu Santo

¹⁵Tunu li'ihua secahua li'á, zu'cuhua stichia'a. ¹⁶Nu li'á nacua lu Pa Diose para nú xe'lanu stucu enu du' ana arqui'hua nu ya'nalínu cuna li'ihua. ¹⁷Li'inu necanu Espíritu Santo enu rni nú neli neca, bee bene enu laca bee benea leca modo yucu arqui'bee' li'inu. Xne la lañi' beei li'inu nu la chulu beei li'inu. Pero li'ihua nu'luhuanu xne nzunu cuna li'ihua nu ya'nalínu arqui'hua. ¹⁸La tsa'na zaquia li'ihua, nzela zeca luhua. ¹⁹Lacaxea' la laña' bee bene enu laca bee benea li'á, pero li'ihua lañi'hua li'á. Nu tucunú rlu'cua elunehuañi, le'ca

scua lu'cuhua elunehuañi. ²⁰Bichia nú yucuhua Espíritu Santo ri'ihua beya' nú tucutsia necaa cuna Pa Diose, nu tucutsia necahua cuna li'á, nu tucutsia necaa cuna li'ihua. ²¹Enu rdu' equie stichia'a nu sucu'e, nze'e rlube' nú neli seca li'á. Nu enu seca li'á zeca Pa Diose nze'e, nu le'ca zecaa nze'e, nu lubea lu nze'e nú ti necaa.

²²Chequie Judas (enu laca Judas Iscariote) uni lunu:

—Detá, ¿xiquie nú lutsiaru lube'lu nú ti necalu? Nu la lube'lu nú ti necalu lu beelá bee bene iliulabe.

²³Che ucuuqui Jesuse nú uninu:

—Enu seca li'á sucu' stichia'a, nu Paa Diose seca nze'e, nu Paa nu li'á nzelarú para nú huañiru cuna nze'e. ²⁴Enu la zeca li'á, la zucu' nze'e stichia'a nu bee bedichia' nú riene'hua rnia lacane stichia'a, stichia' Paa Diose enu uxe'la li'á necane.

²⁵Rnia ye bee nucua' luhua diquila nú nzusca'a cuna li'ihua; ²⁶pero Espíritu Santo enu xe'la Paa Diose equie cuendaa, li'inu du'nu ana arqui'hua nu zete'nu li'ihua yeene, nu ellu'cu arqui'nu li'ihua ye beenú unila luhua. ²⁷Chenu nzia'la liquia nú nzuxe arqui'hua, nu li'á la nitsiane tucu nú rni bee bene iliulabe xne li'á neli liquine luhua. La chenu arqui'hua nu la lliquihua.

²⁸Ubene'la'hua nú unia nú nzia'a pero benchila' zecaa luhua. Tunu neli nú secagua li'á, ñia atsu arqui'hua chenu unia nú nzia'a lu Pa Diose, xne li'inu rnibiya'nu lua. ²⁹Rixiule'exula nucua' luhua nee para nú chenu acane chili arqui'hua li'á.

³⁰'La nia'a huaxilá bee bedichia' luhua, xne nze'tala enu rnibiya' lu iliulabe quie'. Añinzuca nú la nibiya' nze'e lua, ³¹pero rqui'ña nú acane scua tucu nú rqui'ña nú acane, para nú ri'i bee bene iliulabe beya' nú li'á se'ca Pa Diose, nu rri'á lunú unibiya'nu ri'á. Utsulihua ne cha'ahua.

Jesuse neca xi neca
luchi cuchiu' lube'

15 'Le'ca uni Jesuse lubeella: —Li'á neca xi neca luchi lube' nu Pa Diose neca xi neca enu rquienii. ²Nu bee bene enu neca xi neca bee luchi yae. Bee luchi yae nú la ayu uva, chiecu'nue, pero beenú rayu uva, chi'qui yae nú la zibi' para nú lecaxi nae nu che ayulae. ³Li'ihua leca' xi nahua equie nú nzeli arqui'hua bee bedichia' nú unilá luhua. ⁴Aca tucutsiahua cuna li'á, tucu nú tucutsia necaa cuna li'ihua, xne tucu luchi lube' leca modo ayu uva lue tunu la nzenene cuna luchi uzana le'ca scua li'ihua leca modo ri'ihua lunú riu' arqui' Diose tunu la neca tucutsiahua cuna li'á.

⁵Li'á neca xi neca luchi lube' uzana nu li'ihua necahua xi neca luchi yae. Bene enu la tsana' arqui' nú neca tucunecatse cuna li'á, nu li'á necatucunecatsea cuna nze'e, nze'e máse rri'i lunú riu' arqui' Pa Diose, xne tunu la neca tucunecatsehua cuna li'á lecaxi acagua ri'ihua. ⁶Bene enu sana' arqui' nú neca tucunecatse cuna li'á, zeca nze'e tucu nú seca yaa luchi lube' nú urecu' nu rebichi, che yete'sae para nú chiquine.

⁷Tunu la tsana'hua nú neca tucunecatsehua cuna li'á nu la tsana'hua nú sucu'hua stichia'a, una'cuhua nú niarquihua nu yucuhuane. ⁸Nu chenu neli rri'ihua lunú riala ri'ihua equie bee nucua', li'ihua sucu' ayahua Pa Diose, scua rlube' nú neli necahua bee benea. ⁹Tucu nú seca Pa Diose li'á, le'ca scua se'ca li'ihua udu' equiehua nú li'á se'ca li'ihua. ¹⁰Tunu li'ihua sucu'hua stichia'a, rdu' equiehua nú li'á se'ca li'ihua, scua tucu nú sucua nú rni Pa Diose, xne rdu' equiea nú li'inu secanu li'á.

¹¹Rnia scua luhua para nú ñia tsu arquihua tucu nú ñia nzu arquia para nú za' nú ñia nzu arquihua. ¹²Nee lunú rnibiya'a luhua necane: nú uzecahua bee sa'hua tucu nú se'ca li'ihua. ¹³Le'ca eluseca nú máse llene neca nú zela tucu bene ati equie cuenda' amigo'. ¹⁴Nu li'ihua necahua bee amigoa, tunu rri'ihua lunú rnibiya'a luhua. ¹⁵La nia mosoa luhua xne tucu moso' la ri'i beya' ye nú rri'i patrón. Li'á rnia luhua bee amigo, xne li'á unila luhua ye beenú uni Pa Diose lua. ¹⁶Li'ihua nécañihua li'á, sino que li'á ucaña li'ihua, nu uxe'la li'ihua para nú chetixiule'ehua lubee bene nú chili arquibeei li'á, tucu nú nzeli arquihua li'á para nú nzedalala bee bene enu chili arquihua li'á. Nu scua Pa Diose liqui' luhua ye nú nacu'hua lunu equie cuenda' li'á. ¹⁷Nee lunú rnibiya'a luhua necane: nú uzecahua bee sa'hua.

**Rana arquihua bee bene Jesuse
cuna bee bene'nu**

¹⁸Tunu rana arquihua bee bene li'ihua ullu'cu arquihua nú li'á

rlutila uhuana arquibeei. ¹⁹Tunu li'ihua nehuañisca'hua tucu nú nehuañi beei, seca beei li'ihua tucu nú seca beei sa'beei, pero li'á ucaña li'ihua leta beei, nu rana arquibeei li'ihua, xne la ria'ahua tucu nú rri'i beei. ²⁰Ullu'cu arquihua bee bedichia' nú unilá luhua: “Ni' tucu moso' la neca equiela lu patron.” Neequie tunu li'á rri'i condra bee bene, le'ca ri'i condra beei li'ihua, nu tunu rri'i caso beei stichia'a, le'ca ri'i caso beei stichia'hua. ²¹Scua ri'inu beei li'ihua lunú necahua bee benea, xne lachulu beei enu uxe'la li'á.

²²Li'ibeei lecaxi equiya lu'cu beei, tunu li'á lá ayela ania lubeei pero nee lunú ubelalá unia lubeei leca' xi quieru'ulá beei lu cuenda' stula beei. ²³Nu bee bene enu rana arquihua li'á, le'ca nuu Pa Diose rana arquibeei. ²⁴Lecaxi equiya lu'cubeei tunu li'á lá ari'á bee milagro lubeei, bee milagro nú ni' tucu bene lá ri'i, pero nee añinzuca nú ulañi'la' beei beenú uri'á rana arquibeei li'á, nu le'ca nuu Pa Diose rana arquibeei. ²⁵Pero recae scua, xne rqui'ña nú yalu tucu nú nequie lu ley' beei elu rni: “Rana arquibeei li'á nu lecaxi rri'a lubeei.”

²⁶Pero chenu riña enu du' ana arquihua, li'inu necanu Espiritu Santo enu xe'la luhua desde elu nzucu Pa Diose, nu li'inu ninu equie cuenda. ²⁷Nu le'ca li'ihua nihua equie cuenda' li'á, xne nucua'anuhua li'á desde nú uquixiea setea li'ihua.

16 Rnia bee bedichia' quie' luhua para nú la tsu chiucu arquihua. ²Xne nze'ta bichia nú la

zela'beeí nú chu'uhua liñi indu, nu hasta riña bichia nú bene enu úti li'ihua zeca nze'e nú rri'i nze'e lunú riu' arqui' Diose. ³Rri'i beeí scua xne lasca' chulu beeí Pa Diose nu ni' li'á lá chulu beeí. ⁴Rnia beeí nucua' luhua para nú chenu acane ellu'cu arqui'hua nú unilane luhua. Né nia nucua' luhua desde nú uquixiea setea li'ihua, xne li'á nzua cuna li'ihua.

Lunu rri'i Espíritu Santo

⁵Pero nee nzia'a lu enu uxe'la li'á nu ni'tucuhua la nedichia' lua cá nza'a, ⁶a'la chiqui' nehuana nzu arqui'hua nú unia scua luhua. ⁷Pero li'á rnia luhua: nú neca nze'calá para li'ihua nú nzia'a. Xne tunu la ya'a la ye'ta Espíritu Santo luhua pero tunu nzia'a li'á xe'la Espíritu Santo luhua. ⁸Nu chenu riñanu che lube' nze'canu lubee bene ta enu rlu'cu dula, nu ta enu la lu'cu dula, nu ta enu riala castiya. ⁹Nu li'ibeei ri'ibeei beya' nú rlu'cu beeí dula xne la chili arqui'beeí li'á. ¹⁰Nu ri'ibeei beya' nú li'á la lu'cua dula xne nzia'a lu Pa Diose, nu la lañia'hua li'á, ¹¹nu le'ca ri'ibeei beya' nú enu riala castiya neca beze'lu enu rnibiya' lu iliulabe quie'.

¹²Huaxisca'lá nú rlucua nia luhua, pero nee li'ihua la ri'ihua beya' xi rni beeí nucua'. ¹³Pero chenu riña Espíritu Santo li'ínu lube'nu luhua ye nú neli neca xne la ninu lu cuenda' li'ínu, li'ínu ninu ye nú riene'nu nu equie cuenda'nu ri'ihua beya' beenú aca. ¹⁴Nu li'ínu zucu' ayanu li'á, xne ye nú nediya'nu lu cuendaa lube'nue luhua. ¹⁵Ye nú rlu'cu Pa Diose, le'ca necane stenea

enze'e unia luhua nú ye nú nediya' Espíritu Santo lu cuendaa lube'nue luhua.

Che'e nú nehuana nzu arqui' bene cuna lunú ñia nzu arqui'lla

¹⁶Lle'natsia la lañia'hua li'á, pero cheelá lle'natsia chu lañi' zeca'hua li'á, xne nzia'a lu Pa Diose.

¹⁷Chequie nu' beeí bene'nu unedichia' beella lu sa'beella:

—¿Xi rrinu nú lle'natsia la lañia'ahuanu nu cheelá lle'natsia lañi' zeca'ahuanu xne nzianu elu nzucu Pa Diose? ¹⁸¿Xi rni bedichia' nú rrinu “lle'natsia”? La ria'ahua beya' xi rrinu.

¹⁹Nu uri'i Jesuse beya' nú niarqui' beella nedichia' beella lunu bedichia' nú uninu lubeella:

—¿Rnedichia'hua lu sa'hua lunú unia, lle'natsia la lañia'hua li'á nu cheelá lle'natsia lañi' zeca'hua li'á la? ²⁰Neli rnia luhua nú una'hua nu nehuana tsu arqui'hua, diquila nú ñia nzu arqui' beelá beeí bene. Pero lecaxi ri'i nú nehuana tsu arqui'hua, cheela che'e nú ñia'la tsu arqui'hua.

²¹Tucu nú seca tucu una'a enu enta nú ala endu' rlachi xla'culla pero chenu ungulala endu'lla, ni' la llucua' arqui'lla nú nehuana utsi'lla equie nú ñia nzu arqui'lla nú unguila endu'lla lu iliulabe. ²²Le'ca scua li'ihua nehuana nzu arqui'hua nee, pero chenu nzelabi'ya zeca li'ihua chiqui' ñia tsu arqui'hua nu lecati axi nú ñia nzu arqui'hua.

²³Bichia ze'e leca' xi nedichia'hua lua. Nu neli nia luhua nú ye nú nacu'hua lu Pa Diose, li'ínu liqui'nue luhua equie cuenda' li'á.

²⁴Hasta nee lecaxi nacu'hua lunú

equie cuendaa, una'cuhua nu yucuhuane para nú za' nú ñia tsu arqui'hua.

Jesuse uri'i ana lu ye beenú nu' lu iliulabe

²⁵Ye beenú unia luhua la ri'ihua beya'e xne unine luhua puro bee ejemplu pero nze'ta hora nú la nia'a scua luhua, sino que ahee nia luhua equie cuenda' Pa Diose. ²⁶Bichia ze'e equie cuendaa nu' modo nacuhua lu Pa Diose nu la qui'ñia' nú nacua lunu equie cuenda'hua, ²⁷xne le'ca li'i Pa Diose seca li'ihua, secanu li'ihua xne secahua li'á nu nzeli arqui'hua nú li'inu uxe'lanu li'á. ²⁸Lunú uriña lu iliulabe quie', nu nee tsa'na iliulabe quie' para nú benchila' zeca lunu.

²⁹Chequie uni bee bene'nu lunu:

—Nee si' ahee rixiule'elu luru, la nia'lu bee ejemplu luru tucu nú unilu nú la ri'iru beya'. ³⁰Nee rri'iru beya' nú nediya'lu yeene nu la qui'ñialu nú ti nedichia' lulu, enze'e nzeli arqui'ru nú nze'talu enza lu Diose.

³¹Nu ucuaqui Jesuse lubeella:

—¿Nee si' nzeli arqui'hua li'á la?

³²Xne nee nze'ta riñala hora, nu nee necalane, nú li'ihua ri'chialetsehua tucua tucuahua na'tsehua inziu'hua, nu tsa'nahua stuculi'a. Pero la ya'na stuculi'a xne Pa Diose nzu cuna li'á ³³Rnia ye bee nucua' luhua para nú equie cuenda'e ñia tsu arqui'hua. Li'ihua nehuana zecahua lu iliulabe, pero la lliquihua xne li'á uri'ila ana luye nú nu' lu iliulabe.

Rnacua' Jesuse lu Diose equie cuenda' bee bene'nu

17 Chenu ulaxu nú uni Jesuse scua lubee bene'nu, che ubi'yanu enza liñibe nu uninu:

—Pa Diose, uriñala hora nú aca lunú riala aca. Ulube' poder nú rlu'cu lli'ñilu para nú le'ca lube' lli'ñilu poder nú rlu'culu. ²Xne li'ilu udete'lu poder lu lli'ñilu para nú nibiya'nu luye bee bene iliulabe, nu dete'nu elunehuañi nú leca xunga laxu luye bee bene, enu udete'lu lunu. ³Nu elunehuañicia' neca para bee bene enu nu'lu li'ilu, nú tucutsia li'ilu necalu Diose nu nu'lu beei Jesucristo enu uxe'lalu lu iliulabe.

⁴Li'á ulubea poder nú rlu'culu ante lubee bene iliulabe, nu nee ula'xula rri'á beenú unibiya'lu lua nú ri'á. ⁵Nee nú nzela lulu Pa Diose uli'qui' poder lua tucu nú ulu'cune cuna li'ilu ante nú quixie iliulabe.

⁶Bee bene enu ucañilu lu iliulabe quie' nu uliqui'lu lua, unila lubeella equie cuenda'lu. Bee bene'lu beella nu uliqui'lu beella lua nu uzucu' beella stichia'lu. ⁷Nee rri'i beella beya' nú equie cuenda'lu nze'ta ye beenú unia nu ye beenú uri'á, ⁸xne udixiule'a stichia'lu lubeella, nu uyali arqui'beella. Neequie rri'i nze'ca beella beya' nú nzela enza lulu, nu nzeli arqui' beella nú li'ilu uxe'lalu li'á.

⁹Li'á rnacua lulu equie cuenda' beella, la nacua lulu equie cuenda' ye bee bene iliulabe, sino que rnacua lulu equie cuenda' bee bene enu uliqui'lu lua, xne bee bene'lu neca beella. ¹⁰Nu equie cuenda' beella ahee poder nú rlu'cua. Ye nú neca stenea neca stene'lu nu ye nú neca stene'lu le'ca necane stenea.

¹¹Li'á la zucua'a lu iliulabe quie' pero li'ibeella nucua'alá beella lu iliulabe, nu li'á nzela lulu. Pa Diose,

li'ilu enu la lu'culfi dula ubi'yaa li'ibeella enu uliqui'lu lua, cuna poder nú rlu'culu uli'qui'lua para nú aca tucunecatse beella tucu nú tucutsia neca'a. ¹²Chenu nzunua li'ibeella lu iliulabe quie', li'ibeella enu uliqui'lu lua ubi'ya beella cuna poder nú rlu'cua uliqui'lu lua nu ni' tucu beella né nitilu, sino que unutilutsia tucu enu nzula nú nitilu, para nú yalu tucu nú rni lu ichi' stichia'lu.

¹³'Nee nzelala lulu, pero rnia bee bedichia' quie' diquila nú nzua lu iliulabe, para nú chiqui' ñia tsu arqui'beella tucu nú ñia nzu arquia. ¹⁴Li'á udixiule'a stichia'lu lubeella nu rana arqui' bee bene li'ibeella, xne la nehuañia' beella tucu nú nehuañi beelá bee bene, tucu nú le'ca li'á la nehuañia tucu nú nehuañi bee bene iliulabe. ¹⁵La nacua lulu nú hualu li'ibeella lu iliulabequie', sino que nacua lulu nú bi'yalu li'ibeella para nú la ri'ibeella nú necha neca. ¹⁶Li'ibeella la nehuañia' beella tucunú nehuañi beelá bee bene, tucu nú le'ca li'á la nehuañia tucu nú nehuañi bee bene iliulabe. ¹⁷Uri'i nú lecaxi naa beella nu la lu'cu beella dula, equie cuenda' stichia'lu. Xne stichia'lu neli necane. ¹⁸Tucu nú uxe'lalu li'á lu iliulabe quie', le'ca scua li'á xe'la li'ibeella lu beela bee bene iliulabe, ¹⁹Nu equie cuenda' beella dete cuendaa li'á para nú le'ca li'ibeella lecaxi naabeella equie cuenda' stichia'lu nú neli neca.

²⁰'Nu la neca equie cuenda'tsia beella rnacua lulu, le'ca rnacua lulu lu cuenda' bee bene enu neela chili arqui' li'á chenu yene' beella

lunú ixiule'e bee benea equie cuendaa. ²¹Nacua lulu Pa Diose nú aca tucunecatse beella, tucu nú tucutsia neca cuna li'ilu, nu le'ca scua acatucunecatse beella cuna li'á, para nú chili arqui' bee bene iliulabe nú li'ilu uxe'lalu li'á lu iliulabe. ²²Le'ca li'i poder nú uliqui'lu lua, udetene lubeella para nú acatucunecatse beella tucu nú li'ilu nu li'á tucutsia neca'a. ²³Li'á nzunua li'ibeella nu li'ilu nzunulu li'á para nú za'lí nú acatucunecatse beella cuna li'á, nu scua ri'i bee bene iliulabe beya' nú li'ilu uxe'lalu li'á nu secalu li'ibeella tucu nú secalu li'á.

²⁴'Pa Diose, niarquía nú ye bee bene enu uliqui'lu lua cua'a beella elu zucua'a, para nú lañi' beella poder nú uliqui'lu lua xne secalu li'á desde chenu lasca' quixie iliulabe. ²⁵Pa Diose, li'ilu enu rri'i tucu nú rialane, añinzuca nú bee bene iliulabe lá chulu beei li'ilu pero li'á nu'lua li'ilu, nu bee benea nediya' beella nú li'ilu uxe'lalu li'á. ²⁶Li'á unila lubeella equie cuenda'lu nu nzenisca'la lubeella, para nú zeca beella sa'beella tucu nú secalu li'á nu li'á nzua cuna li'ibeella.

Una'tse bee bene Jesuse

(Mt. 26:47-56; Mr. 14:43-50; Lc. 22:47-53)

18 Chenu ulaxu nú uni Jesuse bee bedichia' quie', uchiu'unu nú nzanu cuna bee bene'nu stucu chú re'cu nú lee Cedrón. Ze'e nu' bee aca olivos nu uyu'ununu bee bene'nu leta bee aca ze'e. ²Nu Judas, enu udete' cuenda li'inu nu'lui ze'e, xne huaxi bese yayanu Jesuse li'ibeella ze'e. ³Nu

ze'e urina'yu Judas texcua'a bee sundado, nu cuna texcua'a bee bene enu rriucu Indu llene Jerusalén enu uxe'la bee ule'ya enu rnibiya' nu bee fariseo nu nuya' beei bee lanza cuna bee espada nu le'ca nuya' beei bee quinqué cuna bee antorcha.

⁴Pero lunú nediya'la' Jesuse ye nú zecanu, uchiu'unu leta bee aca ze'e, nu unidichia'nu lubeei:

—¿Ti rla'nahua?

⁵Nu ucuaquibeei lunu:

—Li'iru rla'naru Jesuse bene Nazaret.

Che ucuaqui Jesuse nú uninu:

—Li'á neca nze'e.

Nu Judas enu udete' cuenda li'inu le'ca nzui leta beei ze'e. ⁶Nu chenu uni Jesuse lubeei: “Li'á neca nze'e”, ulacaquie beei enza di'chibeei nu uyecata beei lu yuu. ⁷Chequie unidichia' zeca'la Jesuse lubeei nú uninu:

—¿Ti rla'nahua?

Nu unia'la beei stucu bese:

—Li'iru rla'naru Jesuse bene Nazaret.

⁸Che unia'la Jesuse stucu bese lubeei:

—Unila luhua nú li'á neca nze'e.

Tunu li'á rla'nahua, uzelahua nú yue bee benequie'.

⁹Ungae scua para nú uyalu nú uni Jesuse chenu uninu: “Ni' tucu bee bene enu uliqui'lu lua né nitilu beella.”

¹⁰Chequie Simón Pedro ulualla espada nú nuya'lla nu uchiecu'lilla diaca chubé tucu bene enu lee Malco moso' ule'ya enu rnibiya' lubee ule'ya. ¹¹Che uni Jesuse lu Pedro:

—Uduche' espada cua' luhua'e. Xne tunu Pa Diose unilanu nú nehuana zecaa rqui'ña nú nehuana zecaa.

Unguya' bee bene Jesuse lu ule'ya enu masela rnibiya'

(Mt. 26:57-58; Mr. 14:53-54; Lc. 22:54)

¹²Chequie bee sundado ze'e nu tucu sundado enu rnibiya' lubeei, cuna bee bene Israel enu rriucu Indu llene Jerusalén, una'tsebeei Jesuse nu ullica'cubeei li'inu. ¹³Nu unguya' beei li'inu rluti ni' Anás, enu neca suegro' Caifás, Caifás quie' neca ule'ya enu máse rnibiya' lubeelá ule'ya lana ze'e. ¹⁴Nu le'ca li'i Caifás quie' neca enu uni lubee bene Israel nú neca nze'calá para li'ibeella nú ati tucutsia bene equie cuenda' ye bee bene Israel.

Utsacu' arqui' Pedro nú nu'lulla Jesuse

(Mt. 26:69-70; Mr. 14:66-68; Lc. 22:55-57)

¹⁵Simón Pedro cuna stucu bene' Jesuse uyanala beella li'inu. Nu lunú nu'lu ule'ya enu mase rnibiya' cua' stucu benecua', che uyu'ulla cuna li'inu ni' ule'yacua', ¹⁶pero Pedro uya'na ru'u puertatsia. Che uchiu'u bene' Jesuse enu nu'lu ule'ya enu máse rnibiya', nu unilla lu una'a enu rriucu ru'u puerta ze'e para nú uyu'u Pedro. ¹⁷Che uni una'a enu rriucu ru'u puerta ze'e lu Pedro:

—¿Pianu le'ca li'ilu necalu tucu bene' Jesuse?

Nu ucuaqui Pedro lunchu nú unilla:

—Li'á laca bene'lla.

¹⁸Nu lunú nucuaa che bee moso' cuna bee bene enu rriucu Indu llene Jerusalén ucua'a beei quii para nú ubichia beei. Nu le'ca nzu Pedro cuna li'ibeei ru'u quii ze'e rebichia beei.

Ule'ya enu másela rnibiya' huaxi nú unedichia'lla lu Jesuse

(Mt. 26:59-66; Mr. 14:55-64; Lc. 22:66-71)

¹⁹Chequie ule'ya enu mase rnibiya' uquixie unedichia' lu Jesuse equie cuenda' bee bene'nu nu cuna equie nú sete'nu bee bene.

²⁰Che ucuaqui Jesuse lulla nú uninu:

—Li'á siempre unia ante luye bee bene nu uzetea li'ibeella liñi bee indu nu cuna liñi Indu llene Jerusalén elu riete'sa' ye bee bene Israel, nu lecaxi nú unia a'chi' lubeella. ²¹¿Enze'e xinu rnedichia'lu lua? Unedichia' lubee bene enu ubene' nú unia, li'ibeella nediya' beella lunú uzetea li'ibeella.

²²Chenu uni Jesuse scua tucu bee bene enu rriucu ru'u Indu llene Jerusalén, udichiui ru'unu nu uni:

—¿Xie' scua rcuaqui bene lu ule'ya enu másela rnibiya' la?

²³Nu ucuaqui Jesuse lui nú uninu:

—Tunu nu' xi nú necha neca unia, uni' xine. Pero tunu uni nze'caa, ¿xinu udiñilu li'á che?

²⁴Che naca'cunu uxela Anás li'inu lu Caifás ule'ya enu másela rnibiya'.

Stucua'la utsacu' arquí' Pedro nú nu'lulla Jesuse

(Mt. 26:71-75; Mr. 14:66-72; Lc. 22:58-62)

²⁵Pero Pedro nzusca' rebichia ru'u quii ze'e. Nu unibeei lulla:

—¿Pianu le'ca li'ilu necalu tucu bene' Jesuse?

Nu ucuaqui Pedro lubeei nú unilla:

—Li'á laca bene'lla.

²⁶Chequie tucu bee moso' ule'ya enu másela rnibiya' cua', enu recasa' bene enu uchiecu' Pedro diaca, uni lu Pedro:

—¿Xie'lanu li'á ulañialu cuna li'illa leta bee aca olivos la?

²⁷Nu stucua'la utsacu' arquí' Pedro nú nu'lulla Jesuse. Hora ze'e ubixia tucu tiula.

Nzu Jesuse lu Pilato

(Mt. 27:1-2, 11-14; Mr. 15:1-5; Lc. 23:1-5)

²⁸Chenu uye'e lu yuu uchiu'unu beei Jesuse ni'i Caifás nu unguya' beei li'inu ru'u palacio' gobernador Roma. Nu bee bene Israel cua' né chu'u beei liñi palacio ze'e, xne para li'ibeei tunu achu'u beei ze'e lixiu naa beei lu Diose, nu che leca' modo acubeei exe baxcu. ²⁹Che uchiu'u Pilato nu unilla lubeei:

—¿Xi uri'i benequie' nú uriñayuhua ca'a?

³⁰Che ucuaqui beei nú unibeei lulla:

—Tunu necalla bene nze'ca né ayelayurulla lulu ca'a.

³¹Che uni Pilato lu beei:

—Uya'hualla, nu ulualuhua lu cuenda'lla tucu nú rnibiya' ley'hua.

Che unibeei lu Pilato:

—Li'iru la lu'curu elurnibiya' nú nibiya'ru nú ati tucu bene.

³²Scua uyalu nú uni Jesuse chenu uninu equie cuenda' nú xa atinu. ³³Chequie uyua'la Pilato liñi palacio ze'e nu ubixialla Jesuse nu unedichia'lla lunu:

—¿Xie' li'ilu necalu arre' bee bene Israel la?

³⁴Che ucuaqui Jesuse lulla nú uninu:

—¿Li'itsialu rnidichia'lu nucua' la o stucu bene uni nucua' lulu la?

³⁵Nu ucuaqui Pilato lunu:

—¿Xie' bene Israel li'á la? Li'i e'cu bee bene lachilu cuna bee ule'ya enu rnibiya' udete' cuenda li'ilu lua. ¿Xi uri'ilu che?

³⁶Che ucuaqui Jesuse lulla:

—Elurnibiya' nú rlu'cua lacane elurnibiya' nú nu' lu iliulabequie'. Tunu necane elurnibiya' nú nu' lu iliulabequie', rlu'cua bee bene enu ari'i xuu para nú lecati adete' cueda li'á lubeei pero elurnibiya' nú rlu'cua lacane elurnibiya' nú nu' lu iliulabequie'.

³⁷Chequie uni Pilato lunu:

—¿Li'ilu necalu arre chela?

Nu ucuaqui Jesuse lulla nú uninu:

—Tucu nu rnilu scua necane, li'á neca arre. Para nucua' ungula, nu para nucua' ubela lu iliulabe quie' para nú nia lunú neli neca lubee bene. Ye bee bene enu nzenala nú neli neca riene' bee nze'e nú rnia.

³⁸Che uni Pilato lunu:

—¿Xi neca nú neli neca che?

Unibiya' beei nú ati Jesuse

(Mt. 27:15-31; Mr. 15:6-20; Lc. 23:13-25)

Chenu ulaxu uni Pilato nucua', uchiu'u zeca'lalla uyani'lla lubee bene Israel ze'e nu unilla lubeei:

—La llela ni' tucu equiya nú uri'i benequie'. ³⁹Pero li'ihua rlu'cuhua custumbre nú li'á la'a tucu bene enu nchiñi ni'cu' lu eliñi baxcu. ¿Niarqui'hua nú la'a Arre Israel che la?

⁴⁰Chequie ubixialí zeca'labeei nú unibeeci:

—La la'alu benequie', ula'a Barrabás.

Nu Barrabás necai tucu huana'.

19 Che unibiya' Pilato nú uzete'che' bee sundado Jesuse. ²Nu bee sundado cua' ureche' beei tucu ellu'ñi' eche uzucu'beei equienu, nu ungutubeei li'inu tucu laquie morado. ³Che uyabica beei lunu rnibeeci:

—iNehuañi arre Israel!

Nu udichiu beei ya beei lunu.

⁴Chequie uchiu'u zeca'la Pilato nu unilla lubee bene Israel ze'e:

—Ubi'yacuruhua, hualla ca'a para nú ri'ihua beya' nú lá llela ni' tucu equiya nú xi uri'illa.

⁵Nu uchiu'u Jesuse nzucu ellu'ñi' eche equienu nu nutunu laquie morado nú ungutubeei li'inu. Che uni Pilato lubee bene ze'e:

—iNzuquie'lla!

⁶Che bee ule'ya enu rnibiya' cuna bee bene enu rriucu Indu llene Jerusalén chenu ulañi' beei li'inu uquixie beei rixiali beei rnibeeci:

—iUquie'ella lu cruse! iUquie'ella lu cruse!

Che uni Pilato lubeei:

—Li'ihua uya'hualla nu uquie'ehualla lu cruse, xne li'á la llela ni'tucu equiya nú xi uri'illa.

⁷Pero bee bene Israel ze'e ucuaqui beella nú unibeella:

—Li'iru rlu'curu tucu ley, nu lunú rnibiya' ley riala nú atilla xne rnilla nú necalla lli'ñi Diose.

⁸Chenu ubene' Pilato nucua' chiqui' ulliquilla. ⁹Che uyu'u zeca'lalla liñi palacio nu unedichia'lla lu Jesuse:

—¿Cá benelu?

Pero lecaxi ucuaqui Jesuse lulla.

¹⁰Che uni Pilato lunu:

—¿Xie' la cuaquilu nú rnia la?

¿Xie' la ri'ilu beya' nú rlu'cua elurnibiya' nú nibiya'a nú quielu lu cruse, nu le'ca para nú la'a li'ilu la?

¹¹Chequie ucuaqui Jesuse lulla:

—Lecaxi elurnibiya' rlu'culu lua, tunu lá liqui' Diosee lulu, enze'e bene enu udete' cuenda li'á lulu nze'e rlu'cu masela equiya luquela li'ilu.

¹²Nu desde hora ze'e, uquixie rla'na Pilato nú xneca modo la'alla Jesuse, pero bee bene Israel ze'e ubixialíbeei nú unibeei:

—i'Tunu la'alulla lacalu amigo' arre César! iXne titse bene enu rni nú neca arre, rri'i condra nze'e arre César!

¹³Chenu ubene' Pilato nucua' uhua zecalla Jesuse ele'ya' ante lubee bene ze'e nu chu uzuculla lu xleta elu rlualullae, tucu luhuare elu lee bedichia' hebreo Gabata, nu rni nucua' labe ele'ya' nú necache' cuna quiee. ¹⁴Nu bichia ze'e neca bichia xee eliñi baxcu, nu tucu rebibichia, uni Pilato lubee bene Israel cua':

—iNzuquie' arre'hua!

¹⁵Pero ubixialíbeei nú unibeei:

—iUtilla! iUtilla! iQuie'ella lu cruse!

Che uni Pilato lubeei:

—¿Xie' quie'a arre'hua lu cruse la?

Nu ucuaqui bee ule'ya enu rnibiya':

—Lecati stucu neca arre'ru, tucutsia arre César neca arre'ru.

¹⁶Chequie udete' cuenda pilato li'inu lubee sundado para nú chequie'e beei li'inu lu cruse.

Uquie'e bee sundado Jesuse lu cruse

(Mt. 27:32-44; Mr. 15:21-32; Lc. 23:26-43)

¹⁷Nu uchiu'unu beei Jesuse nu nuya'nu cruse, nzenubeei li'inu “tucu luguare elu lee calavera”, nu bedichia' hebreo lee Gólgota. ¹⁸Ze'e uquie'eberei li'inu lu cruse, nu cuna xiucu bene tucua beei cada tucu chú cue'tsenu nu li'inu labe. ¹⁹Nu unibiya' Pilato nú uquiee bee bedichia' equie cruse'nu nú rni: “Jesuse bene Nazaret, Arre' bee bene Israel.” ²⁰Huaxi bee bene Israel ungula bee bedichia' ze'e xne luhuare elu uquie'e bee bene li'inu lu cruse axue Jerusalén, nu bee bedichia' ze'e nequiene cuna bedichia' hebreo, cuna bedichia' griego nu bedichia' latín. ²¹Enze'e bee ule'ya Israel enu máse rnibiya' uni beella lu Pilato:

—Xinu uquie'elu: “Arre' bee bene Israel”, mejora uquie'e: “Enu rni nú neca Arre' bee bene Israel.”

²²Nu ucuaqui Pilato lubeella:

—Lunú uquie'a, uquie'elane.

²³Chenu ulaxu nú uquie'e bee sundado Jesuse lu cruse, una'tsebeei xucunu nu utsabeei tucu pedaso xucunu nu uritsi'beei xucunu lu dacubeei. Nu stucu xucunu nú lee túnica nu lunú tucunecatsene nu la nedicune, ²⁴enze'e uni bee sundado lusa'beei:

—La tsa'ahuane, mejora te ita'ahua tucu rifa para nú bi'ya'ahua ta'ahua ri'i anae.

Scua uyalu tucu nú niquie lu ichi' Stichia' Diose elu rni: “Uditsi'beei xucua lusa'beei, nu urita beei rifa equie túnicaa.” Scua neca nú uri'i bee sundado ze'e.

²⁵Axu elu uquie Jesuse lu cruse nzu na'nu cuna belalla, cuna María, una'a Cleofas, nu María Magdalena.

²⁶Chenu ulañi' Jesuse na'nu nzu cue'tse bene'nu enu chiqui' secanu, uninu lu na'nu:

—Naa nzucua' endu'lu:

²⁷Nu uninu lu bene'nu:

—Nzucua' na'lu.

Desde hora ze'e uyucu cuenda bene'nu nucua' na'nu ni'lla.

Unguti Jesuse

(Mt. 27:45-56; Mr. 15:33-41; Lc. 23:44-49)

²⁸Chenu ulaxu nú uni Jesuse scua lunú nediya'la'nu nú uyalula yeene tucu nú riala nú acane. Nu para nú yalu tucu nú nequie lu ichi' Stichia' Diose, che uninu:

—Rebichia.

²⁹Nu ze'e nzu tucu jarra nú achechicu nu' vinagre, che ucuacha beei tucu esponja lu vinagre ze'e nu uzucu' beei lli'i tucu aca nú lee hisopo, nu uti'beei ru'unu. ³⁰Chenu ungüe' Jesuse vinagre ze'e, uninu:

—Uyalula yeene nee.

Che chu uzi'quindiquinu nu ungutinu.

Utse'e tucu sundado lanza cue'tse Jesuse

³¹Nu bichia ze'e neca bichia xee eliñi baxcu chenu rri'ilu bee bene ye nú xi qui'ñiabeei, nu la niarqui'beei nú ya'na cuerpo' bee bene ze'e lu cruse bichia nú sulachi beei, xne bichia ze'e neca bichia nú máse necachi neca para li'ibeei, enze'e unacu'beei lu Pilato nú nibiya'lla nú acha cuchiu' bee bene enu nequie lu cruse enu nehuañisca' para nú atibeei nu laca beei lu

cruse. ³²Che uyaa bee sundado nu rluti udi'chia beei cuchiu' tucu bene ze'e nu che udi'chia beei cuchiu' stuculla. ³³Pero chenu uyabica beei lu Jesuse ulañi'beei nú ungutulanu. Enze'e ne i'chia'beei cuchiu'nu.

³⁴Pero tucu bee sundado ze'e utse'e lanza cue'tsenu, nu uchiu'lu rene cuna inza cue'tsenu. ³⁵Nu bene enu rquie'e nucua' ulañilu'lla nú ungae scua, nu neli neca nú rnilla, nu li'illa nediya'lla nú neli neca nú rnilla para nú chili arqui'hua. ³⁶Ungae scua para nú uyalu tucu nú nequie lu ichi' Stichia' Diose elu rni: “Ni' tucu arta'nu lá i'chia beei.” ³⁷Nu le'ca stucu luhuare lu ichi' Stichia' Diose elu rni: “Lañi' bee bene li'inu enu utsee lanza.”

Uhuachi' Jesuse

(Mt. 27:57-61; Mr. 15:42-47; Lc. 23:50-56)

³⁸Chenu ulaxu nú unga ye bee nucua' che José bene eyeche Arimatea uyana'cu'lla cuerpo' Jesuse lu Pilato para nú uya'llanu. José quie' neca bene' Jesuse pero a'chi' xne xiquilla bee usticia Israel. Nu chenu uzela Pilato, che uyalla nu unguya'lla cuerpo'nu. ³⁹Nu le'ca Nicodemo enu uyabedichia'nu Jesuse tucu rula', uriñayulla tucu ala lichi'i kilo mirra nú nucha cuna áloe nú ñia rlia. ⁴⁰Che una'tse beella cuerpo'nu utelabeella venda nú nu' perfume, tucu nú neca costumbre' bee bene Israel chenu rcachi' beella tucu benenguti. ⁴¹Axu luhuare elu uquiee Jesuse lu cruse nu' bee aca ndixí, nu ze'e nzucu tucu eluhua elu lasca'lí achi' nitucu bene, ⁴²ze'e uachi' beella

cuerpo' Jesuse xne axue, nu enta quixiela eliñi baxcu nú rri'i bee bene Israel.

Uhuañi Jesuse lu eluti

(Mt. 28:1-10; Mr. 16:1-8; Lc. 24:1-12)

20 Domingo sila'tu', chenu necabesca' uyaa María Magdalena ru'u eluhua' Jesuse, nu ulañi'lla nú udocu'la quiee nú nacu' ru'u eluhua ze'e, ²che xexu'ulla uyatixiule'ella lu Simón Pedro nu lu stucu bene' Jesuse enu chiqui' secanu, nu unilla lubeella:

—iUnguya' bene cuerpo' Detá Jesuse nu la ria'ahua beya' cá uri'i beei li'inu leca'nu liñi eluhua!

³Chequie uchiu'u Pedro cuna stucu bene'nu, nzuebeella ru'u eluhua ze'e. ⁴Rucu beella xuxu'u beella nzuella pero stuculla másela xexu'u nza che rlutilálla uriñalla ru'u eluhua ze'e luquela Pedro. ⁵Chequie uzi'quilulla ri'yalla liñi eluhua ze'e, nu ulañi'lla laquie nú ubela Jesuse nchiucu' ze'e pero né chu'ulla.

⁶Che chu uriña Simón Pedro nu uyu'ulla liñi eluhua ze'e nu le'ca ulañi'lla laquie ze'e nú nchiucu'e ze'e, ⁷nu le'ca ulañi'lla laquie nú ubela equienu nu la nchiucu'e cuna laquie nú ubela cuerpo'nu sino que neyu'chine nchiucu' renene. ⁸Che le'ca uyu'u stucu bene'nu enu uriña rlutilá liñi eluhua ze'e nu ulañi'lla nú unga, che uchili arqui'lla. ⁹Pero lasca' ri'ibeella beya' lunú rni lu ichi' Stichia' Diose nú huañi Jesuse lu eluti. ¹⁰Che chu nzia bee bene'nu nze'e ni'beella.

Ulube'lu Jesuse lu María Magdalena

(Mr. 16:9-11)

¹¹Pero María uya'nalá ru'u eluhua runa'. Nu diquila nú runa'lla uzi'quilulla ubi'yalla liñi eluhua ze'e, ¹²nu ulañi'lla chiucu bee ángele enu nutu laquie niquichi nzucu liñi eluhua ze'e. Tucunu nzucu elu unguta equienu nu stucunu nzucu elu unguta e'yanu. ¹³Che unidichia' bee ángele cua' lu María nú uni beenu:

—Una'a, ¿xiquie nú runa'lu?

Che unilla lubeenu:

—Xne unguya' bene cuerpo' Detá Jesuse, nu la ri'á beya' cá uri'i bene li'inu.

¹⁴Uloxutsia unilla scua, ubelletalla nu ulañi'lla nú nzu Jesuse ze'e, pero lá chululla li'inu.

¹⁵Che uninu lulla:

—Una'a, ¿xiquie nú runa'lu? ¿Ti rcua'nalu?

Ulle'ca María nú bene enu rriucu bee aca ndixi ze'e necanu, nu unilla lunu:

—Detá, tunu li'ilu unguya'lu cuerpo' Jesuse, u dixiule'e lua cá uri'ilunu para nú nzetucua'anu.

¹⁶Nu uni Jesuse lulla:

—iMaría!

Che ubelletalla nu unilla lunu bedichia' hebreo:

—iRabuni! —nu ni bedichia' cua': Maestro.

¹⁷Che uni Jesuse lulla:

—Utsana' li'á, xne lasca' cha'a elu nzucu Paa, pero uquia nu uni' lubee benea nú nzia'a elu nzucu Paa, enu le'ca neca Pa'hua nu neca Diosea, nu le'ca necanu Diose'hua.

¹⁸Chequie uyatixiule'e María Magdalena lube'e bene'nu nú ulañi'lla Jesuse nu le'ca udixiule'ella lubeella yebeenú uninu lulla.

Ulube'lu Jesuse lube'e bene'nu

(Mt. 28:16-20; Mr. 16:14-18; Lc. 24:36-49)

¹⁹Nu chenu uyu'u rula' domingo ze'e neyete'sa' bee bene'nu nu nacu' ru'u puerta nucua'a beella xne xiquibeella bee usticia Israel, che tu'natsia uyu'u Jesuse elu nucua'a beella nu uninu lubeella:

—iLa lliquihua!

²⁰Chenu ulaxu uninu scua, ulube'nu yanu nu cue'tsenu lubeella. Nu chiqui' ñia utsu arqui'beella nú ulañi' beella li'inu. ²¹Che stucua'la bese uni Jesuse lubeella:

—iLa lliquihua utsu naqui arqui'hua! Nu tucunú uxe'la Paa li'á, le'ca scua xe'la li'hua lube'e bene iliulabe para nú ixixiule'ehua stichia'nu lubeella.

²²Chequie ulaanu equie beella nu uninu lubeella:

—Uyucuhua Espíritu Santo.

²³Chenu nihua nú xa aca perdona stula bee bene, che enu ri'i caso nú nihua neca perdona stula nze'e, nu enu la ri'i caso nú nihua la aca perdona stula nze'e.

Ulañi' Tomás Jesuse

²⁴Pero Tomás, enu neca lu chi'chiucu bee bene'nu, enu rri'chia bee bene cuachi lecalla chenu ulube'lu Jesuse lubeelá bee bene'nu.

²⁵Chequie chenu uni beella lu Tomás:

—Ulañi'ru Detá Jesuse.

Che ucuaqui Tomás lubeella:

—Tunu la laña yanu elu uzucu clau, nu tunu la dua'a cuene yaa ze'e nu tunu la du'a yaa cue'tsenu elu udi'qui, la chili arquia.

²⁶Xunu bichia luzelá, uyetesa' zeca bee bene'nu nu le'ca nzu Tomás leta beella nu nacu' puerta nucua'a beella, che ulube'lu Jesuse lubeella nu uninu lubeella:

—iTsu'e arqui'hua!

²⁷Che uninu lu Tomás:

—Udu' cuene yaalu ca'a nu ubi'yacuru yaa, nu uli'qui yalu nu una'tse cue'tsea la za' arqui'lu. iUchili arqui' li'á!

²⁸Chequie uni Tomás lunu:

—iLi'ilu necalu Paa nu Diosea!

²⁹Nu uni Jesuse:

—¿Nzelí arqui'lu li'á xne ulañi'la'lu li'á? iÑia neca lu cuenda' bee bene enu nzeli arqui' li'á añinzuca nú lá lañi' beei li'á!

¿Xiquie nú uquiee libro quie'?

³⁰Huaxilá bee milagro nú uri'i Jesuse lube'e bene'nu nu lá quiee lu libro quie'. ³¹Pero uquiee bee nucua' para nú chili arqui'hua nú Jesuse neca Cristo lli'ñi Diose, nu lunú chili arqui'hua li'inu lu'cuhua elunehuañi lu Diose liñibe.

Ulube'lu Jesuse lu achi bee bene'nu

21 Lu ze'e lá, ulube'lu zeca'la Jesuse lube'e bene'nu ru'u inzatu' Tiberias, nu singuie ulube'lunu lubeella: ²Chenu neyete'sa' beella, nzu Simón Pedro, cuna Tomás enu rri'chia bee bene cuachi, nu Natanael enu neca bene Caná tucu eyeche lu iliu Galilea cuna bee lliana' Zebedeo nu cuna xiucu bee bene'nu. ³Che uni Simón Pedro lubeella:

—Nza'a nze ucua'a bee bela.

Che unibeella:

—Le'ca nuuru tseru cuna li'ilu.

Che nzuebeella nu uquie beella equie tucu barco, pero rula' ze'e né uculí beella bee bela. ⁴Chenu enta ye'ela lu yuu, uriña Jesuse ru'u inzatu' ze'e, pero né chulu bee bene'nu li'inu. ⁵Nu uni Jesuse lubeella:

—Bee endu', ¿lá ucuhua ni' tucu bela la?

Nu ucuaqui beella nú uni beella:

—Ni' tucuí.

⁶Che uninu lubeella:

—Utsi'quihua ixiu nú rucuhua bee bela enza cue'tse barco chubee para nú ucuhua bee bela.

Nu scua uri'i beella, nu la riqui'a beella lua beella ixiu lu inza, xne huaxi bela nu' liñii. ⁷Chequie bene'nu enu chiqui' secanu uni lu Pedro:

—iDetá Jesusenu!

Chenu ubene! Simón Pedro nú necanu Detá Jesuse che chu ungutulla xuculla nú ulualla, nu chu utetsalla lu inza. ⁸Che beelá bee bene'nu uriñayuu beella barco ze'e nú nzexa' ixiu nú ahee nú bela hasta ru'u inzatu', xne rri'i casi tucu ayu'u metro para nú riña beella ru'u inzatu'. ⁹Chenu ulaca beella equie barco ze'e ulañi' beella nú nucua'a quii nu nchiucu' tucu bela lue, nu cuna pá. ¹⁰Che uni Jesuse lubeella:

—Uteyuhua chiucu chuna bee bela enu ulaxu inza uducuhua.

¹¹Che uquie zeca Simón Pedro equie barco ze'e nu uxa'lla ixiu nú ahee nu' bee bela llene hasta ru'u inzatu', nu neca tucu ayu'u arula'

nu' chuna beelá, añinzuca nú huaxi beelá né tsa ixiu ze'e. ¹²Che uni Jesuse lubeella:

—Utehua ne acusila'hua.

Nu ni'tucu bee bene'nu lá laca arqui' beella anedichia' beella nú tinu, xne nediya'la' beella nú Jesusenu. ¹³Che chu uyabica Jesuse, nu una'tsenu pá nu udete'nue udacu beellae, nu le'ca scua uri'inu cuna bela.

¹⁴Ninguie' neca bese rriuna nú ulube'lu Jesuse lubee bene'nu chenu uhuañi zecanu lu eluti.

Lunú uni Jesuse lu Simón Pedro

¹⁵Chenu ulaxu nú udacusila' beella, uni Jesuse lu Simón Pedro: —Simón, lliana' Jonás, ¿másela secalu li'á luquela beelá beella la?

Nu ucuaqui Pedro lunu:

—Ahua', Detá, li'ilu nediya'lu nú se'calu.

Che uni Jesuse lulla:

—Ubi'ya bee benea che.

¹⁶Che unedichia'lanu bese rruclu lulla:

—Simón, lliana' Jonás, ¿secacálu li'á la?

Nu ucuaqui Pedro lunu:

—Ahua', Detá, li'ilu nediya'lu nú se'calu.

Che uni Jesuse lulla:

—Ubi'ya bee benea che.

¹⁷Nu bese rriuna unedichia'lanu lulla:

—Simón lliana' Jonás, ¿secalu li'á la?

Che nehuana utsu arqui' Pedro xne unedichia'nu chuna bese lulla tunu secacalla li'inu, nu ucuaquilla nú unilla:

—Detá, li'ilu nediya'lu yeene. Li'ilu nediya'lu nú se'calu.

Che uni Jesuse lulla:

—Ubi'ya bee benea che. ¹⁸Li'á rnia lulu nú chenu nere'ne'lálu, rutulu xuculu nu nzalu elu niarqui'lu, pero chenu uxulu lílu yalu nu stucu bene utu xuculu li'ilu nu uya' nze'e li'ilu elu la niarqui'lu chálu.

¹⁹Chenu uni Jesuse scua, rixiule'enu equie cuenda' nú xa ati Pedro, nu equie nú atilla zucu' ayalla Diose. Chequie uninu lulla: —Utenala li'á.

Bene' Jesuse enu chiqui' secanu

²⁰Chenu ubelleta Pedro ulañi'lla nú nze'tanala bene' Jesuse enu chiqui' secanu li'ibeella, enu uzucu cue'tsenu chenu udacuxee beella enu unedichia' lunu: “Nu ti dete' cuenda li'inu.” ²¹Chenu ulañi' Pedro li'illa unedichia'lla lu Jesuse nú unilla:

—Detá, li'iquiella ¿xa zecalla?

²²Ucuaqui Jesuse lulla nú uninu:

—Tunu niarquía nú nehuañilla hasta chenu riña zecaa lu iliulabe, cuenda nucua'. Li'ilu utenalatsia li'á.

²³Che urichialetse bee bedichia' cua' leta beelá bee bene'nu, nú bene'nu nucua' la atilla. Pero lá ni Jesuse nú la atilla. Lunú uninu neca: “Tunu niarquía nú nehuañilla hasta chenu riña zecaa lu iliulabe, cuenda nucua'.”

²⁴Nu le'ca bene'nu ninguie' rni bee nucua' nu uquie'ellae. Nu nediya'ahua nú neli rnilla.

²⁵Nu huaxilá beenú uri'i Jesuse nu tunu quíee tucua tucua bee se'ca nú la yala lu iliulabe chu'u bee libro quie'.

Amén.

Lunú uri'i bee apóstol' Jesucristo

Ucuaqui u'na Jesucristo nú xe'lanu Espíritu Santo

1 Teófilo enu rquietea, ichi' rluti nú uxe'la lulu, lu ichi' ze'e udixiule'a ye beenú uquixie Jesucristo uri'inu cuna ye beenú uzete'nu, ²hasta bichia nú uquienu liñibe. Nu ante nú yanu liñibe, ucañinu bee bene enu aca bee apóstol'nu, nu equie cuenda' Espíritu Santo, udixiule'enu lubeella nú xi rqui'ña ri'ibeella. ³Ungutinu nu uhuañi zecanu nu ulube'lunu lubeella para nú ri'ibeella beya' nú neli nú nehuañinu, nu diqui chiu'a bichia ulube'lunu lubeella, nu udixiule'enu lubeella nú xa neca lunú rnibiya' Diose.

⁴Chenu nzusca'nu cuna bee apóstol'nu, uninu lubeella nú la chiu'usca' beella eyeche Jerusalén. Nu uninu:

—Ucua'aqueihua hasta nú yalu tucu nú ucuaqui u'na Paa nú ri'inu luhua, tucu nú unilá luhua. ⁵Neli nú Juan urinza bee bene cuna inza, pero la acaxea' nú rinzahua cuna Espíritu Santo.

Chenu uquie Jesuse liñibe

⁶Chequie chenu uyetesa'beella cuna li'inu, unidichia' beella lunu nu necachi unibeella:

—Jesuse, ¿xie' uriñala bicha nú ri'ilu nú nibiya' zeca bee bene lachiru luru la?

⁷Nu ucuaqui Jesuse lubeella:

—La yala nú ri'ihua beya' nú xi bichia nu xi hora nu xunga ri'i Diose nucua', xne li'itsianu rnibiya'nu xunga ri'inu nucua'; ⁸pero chenu yucu arqui'hua Espíritu Santo, che acahua ixiule'ehua ti neca li'á lubee bene eyeche Jerusalén, cuna diqui lu iliu Judea cuna lu iliu Samaria, cuna lu ye bee bene iliulabe.

⁹Chenu ulaxu nú uni Jesuse scua diquila nú ri'yasca' beella lunu tu'natsia uyatsanu uquienu liñibe, che ulaca tucu xcabe nú uyacu'nu liñi nu né lañia' beella li'inu. ¹⁰Diqui nú ri'yasca' beella enza liñibe enza uquienu, che ulube'lu chiucu ángele enu nutu laquie niquichi lubeella, ¹¹nu uni bee ángele ze'e lubeella:

—Bee bene Galilea, ¿xinu ri'yalisca'hua enza liñibe? Li'i Jesuse quie' enu ulañia'ahua nú uquie liñibe, nze'ta zecanu stucu bese tucu nú ulañi'hua nú nzianu.

Ucañi beella Matías nú uya'nalla luhua' Judas

¹²Chenu ulaca beella nú uya beella dañi nú lee Olivos, utse

beella casi tucu kilometro para nú uriña beella Jerusalén. ¹³Chenu uriña beella ni'i elu nucua'a beella, uquie beella stucu piso aya equie ni'i ze'e. Nu singuie lee beella,

Pedro,

Jacobo,

Juan,

Andrés,

Felipe,

Tomás,

Bartolomé,

Mateo,

Jacobo lliana' tucu bene enu lee

Alfeo,

Simón enu ulletse leta tucu

partido nú lee cananista,

cuna Judas enu neca bichi

Jacobo.

¹⁴Yebeella unga tucu necatse beella nu uyete sa'beella para nú unacu' beella lu Diose cuna bee bichi Jesuse, cuna María enu neca na'nu, cuna beelá bee una'a.

¹⁵Bee bichia ze'e utsuli Pedro lubee bene enu nzeli arqui' Jesucristo, nu neca casi tucu ayu'u ala beella, nu uni Pedro lubeella:

¹⁶—Bee sa'a enu nzeli arquia'ahua Jesucristo, rqui'ña nú yalu tucu nú uquie'e David lu ichi' Stichia' Diose, tucu nú udu' Espíritu Santo arqui'lla nú xneca ri'i Judas lu iliulabe, Judas quie' neca enu udetel' cuenda Jesuse lubee bene enu una'tse li'inu. ¹⁷Judas quie' unga tucu sa'ahua enu, uri'inua'ahua riña' tucu nú rria'ahua nee. ¹⁸Pero cuna dimi nú uyaxu Judas lu cuenda' nú necha uri'i ungaxi'i tucu yuu, nu uyecata rendiqui Judas lu yuu nu utsa xla'cui uchiuxqui' ye llutsi'i, nu scua ungutii. ¹⁹Chenu ungabiya'

ye bee bene Jerusalén lunú unga scua, che uhualee beei yuu ze'e Acéldama, nu rni nucua' yuu réne. ²⁰Xne lu ichi' Stichia' Diose nú lee Salmos rni:

Ya'na tuculi' ni'ii,

nu leca' xunga che cua'a benene.

Le'ca rni lu Salmos cua':

Chu'u stucu bene luhuare'i.

²¹'Enze'e lu ye bee bene enu uyanzenua'ahua ye bee bichia chenu nzu Jesuse cuna lia'ahua, ²²hasta chenu urinza Juan li'inu nu hasta bichia nú uquienu liñibe. Lu ye bee benequie' rqui'ña nú caña'ahua tucu beella para nú ri'illa elietsa lua'ahua nú ixiule'ahua lubee bene nú neli nú uhuañi zeca Jesuse nú ungutinu.

²³Chequie ucañi beella chiucu bee bene cua': tuculla lee Matías, nu stuculla lee José Barsabás, enu le'ca ri'chia bee bene Justo. ²⁴Nu unacu' beella lu Diose nú unibeella: —Diose Pa liñibe, li'ilu enu nu'lu arqui' ye bee bene, ulube'luru ta lu rucu benequie' enu ucañilálu ²⁵para nú acalla apóstol'lu enu chu'u luhuare' Judas xne Judas unitilulai equie cuenda' stulai, nu nzialai elu riala nú yai.

²⁶Che ubi'ya beella bi'ya ta lu rucu bene quie' yala nú chu'u luhuare' Judas nu uyala nú uya'na Matías, nu hora ze'e unga zeca chi'chiucu apóstol cuna li'illa.

Chenu ube'ta Espíritu Santo

2 Chenu uriña bichia liñi nú lee Pentecostés, uyetesá' ye bee bene enu nzeli arqui' Jesuse tucutsia luhuare. ²Nu tu'natsia ubene nú rula enza liñibe xi rula

chenu enta tucu bi juerte, nu ubene nú rula diquineca liñi ni'i elu nucua'a beella. ³Chequie ulube'lu beenú rnaa xi rnaa quii me'e nú rulu, nu ulacae equie cada tucua beella. ⁴Nu yebeella chiqui' uyucu arqui'beella Espíritu Santo, nu uquixie nú unibeella stucu bee dialu rene, tucu nú niarqui' Espíritu Santo nú ni beella.

⁵Bee bichia ze'e uriña bee bene Israel eyeche Jerusalén para nú dete' beella ula'na lu Diose, nu nze'ta beella diqui bee luhuare lu iliulabe. ⁶Chenu ubene'beella nú rula, uyetesa'beella para nú nze bi'ya beella xi nú rula scua, nu hasta la ri'ibeella beya' xi elliebacu' ri'ibeella, xne cada tucua beella ubene' beella nú rni bee bene' Jesuse dialu' cada tucua beella. ⁷Chiqui' nzenu arqui'beella hasta nú lá ri'ibeella beya' xa ni beella, nu uquixie beella nú unibeella lusa'beella:

—¿Xie' la neca ye bee bene enu rni cua' bee bene Galilea la? ⁸¿Xiquie nú riene'ahua nú rnibeella dialu' cada tucua'ahua? ⁹Ca'a leta'ahua nucua'a bee bene eyeche iliu Partia, cuna bee bene enu nze'ta lu iliu Media, cuna bee bene enu nze'ta lu iliu Elam, cuna bee bene enu nze'ta lu iliu Mesopotamia, cuna bee bene lu iliu Judea, cuna bee bene lu iliu Capadocia, cuna bee bene lu iliu Ponto, cuna bee bene Asia, ¹⁰cuna bee bene Frigia, cuna bee bene Panfilia, cuna bee bene Egipto, cuna bee bene lu iliu Africa, axu Cirene. Nu cuna bee bene Roma, chiucu chuna bee bene Roma quie'

ungula lu iliu Israel nu nucua'a beei Roma. Le'ca chiucu chuna beei neca mero bene Roma enu nzeli arqui' tucu nú nzeli arqui' bee bene Israel Diose. ¹¹Le'ca ca'a leta'ahua nucua'a bee bene lu iliu Creta cuna bee bene Arabia, pero ye'ahua riene'ahua bee milagro nú rri'i Diose xne rni bee bene cua' dialu' cada tucua'ahua.

¹²Chiqui' nzenu arqui' ye beei nu la ri'ibeei beya' xi elliebacu' ri'ibeei, nu uquixiebee nú rnidichia' beei lu sa'beei:
—¿Xi nucua' nú reca ca'a scua?

¹³Pero nu' beei enu utsequichia' li'ibeella nú unibeei:
—iXuchi' bee bene cua'!

Lunú uni Pedro lubee bene

¹⁴Chequie utsuli Pedro cuna se chetu'cu bee apóstol nu juerte unilla:
—Bee bene Judea cuna ye bee bene enu nucua'a ca'a Jerusalén, uzu'cu' diacahua nu uri'ihua beya' nú nia luhua. ¹⁵La lluchi' bee bene quie' tucu nú rri'ihua elliebacu', xne apena neca rquiquie' sila' nee. ¹⁶Lunú reca ca'a, neca tucu nú uni profeta Joel chenu unilla:

¹⁷Uni Diose, riña bichia chenu xe'la Espíritu
Santoa para nú llutsene arqui'
ye bee bene;
Nu bee lliana'hua cuna bee
xinchiu'cuhua ixiule'e beei
stichia'a,
nu bee endu'hua huaxi beenú
enta lube'lu lubeei,
le'ca esquie bee bene uxu huaxi
beenú ni xcala' beella.
¹⁸ Bee bichia ze'e xe'la Espíritu
Santoa lubee niyu cuna
lubee una'a enu sibi' lua,

che ixiule'e beella stichia'a
lubee bene.

¹⁹ Lubea luhua nú lañi'hua huaxi
bee seña liñibe nu chiqui'
chenu arqui'hua,
nu lu yuu lubea luhua bee
seña: Nu lañi'hua nú na xi
na rene, cuna qui cuna
llene nu na xi na xcabe.

²⁰ Che cabe lu bichia,
nu aca nelu guu xi nelu rene,
ante nú riña bichia llene nú ñia
neca,
chenu riña li'inu, enu rnibiya'.

²¹ Nu tatse bee bene enu nacu' lu
Diose,
tsila'anu nze'e lu dula.

²² Nee nia luhua bee bene
Israel, uzu'cu' diacahua, nú li'ihua
nediya' nze'ca'hua nú Jesuse bene
eyeche Nazaret, li'inu enu uxe'la
Diose uri'inu bee milagro luhua
nu cuna bee seña nú chiqui' uyanu
arqui'hua para nú ri'i nze'cahua
beya' nú Diosé uxe'la li'inu. ²³ Hasta
hua'tu utsula Diosé nú xa zeca
Jesuse, li'ihua una'tsehua li'inu nu
udete' cuendahua li'inu lubee bene
enu necha rri'i para nú ungotinu lu
cruse.

²⁴ Pero uri'i Diosé nú uhuañi zeca
Jesuse lu eluti, nu utsila'a Diosé
li'inu lu eluti, xne másela reca
Jesuse luquela eluti.

²⁵ Nu chenu uni arre David bedichia'
equie cuenda' Jesuse, unilla:
Siempre ulaña nú nzu Diosé
Pa liñibe cuna li'á.
Nu nzunu cue'tsea chubee
para nú lecaxi lliquia.

²⁶ Enze'e chiqui' ñia nzu arquia
rnia bedichia' nze'ca lu
Diose.

Mase nú atia la chenuarquia,
²⁷ xne la tsana'lu nú ya'na cuerpoa
liñi eluhua, nu le'ca la
tsana'lu nú uchu cuerpo'
Lli'ñilu enu la lu'cu dula.

²⁸ Ulube'lu lua inziu nú rliqui' nú
nehuaña nu chiqui' ñia tsu
arquia huaña cuna li'ilu.

²⁹ Bee sa'a, nia luhua nú arre
David ungotilalla nu uhuachi'lalla,
nu eluhua'lla rlañi'scahua hasta
nee. ³⁰ Pero arre David ungalla
tucu profeta' Diosé, nu nediya'la'lla
nú ucuaqui u'na Diosé nú leta bee
bene'lla enu nze'ta enza luquiela
ala Cristo enu nibiya'. ³¹ Scua unga,
chenu uhuañi David neca xi neca
nú rlañi'lá'lla nú xi enta aca, nu
unilla nú huañi zeca Cristo lu eluti
nu la ya'na cuerpo'nu liñi eluhua,
nu le'ca esquie la uchu cuerpo'nu.

³² Nu nee uri'ila Diosé nú uhuañi
zeca Jesuse lu eluti, yeru ulañi'la'ru
nú ungae scua. ³³ Nu nee nzucula
Jesuse liñibe cue'tse Diosé chube,
nu udete'la Diosé Espíritu Santo
lunu tucu nú ucuaqui u'na Diosé
hasta hua'tu, nu uxe'la Jesuse
Espíritu Santo quie' lu iliulabe nu
equie cuenda' Espíritu Santo reca
lunú riene'ahua nu rlañi'ahua. ³⁴ La
neca David enu uquie liñibe, xne
li'illa unilla:

Diose Pa liñibe uni lu li'inu enu
rnibiya' lua:

“Uzucu cue'tsea chube,

³⁵ hasta nú riña bichia nú ri'á nú
nibiya'lu lu ye bee bene enu
rle lulu.”

³⁶ Enze'e yehua bee bene Israel,
uri'ihua beya' nú Jesuse enu
uquie'ehua lu cruse, uri'i Diosé nú
necanu Cristo enu rnibiya' lua'ahua.

³⁷Chenu ubene' bee bene cua' nú uni Pedro scua, nehuana utsu arqui'beella, chequie unidichia' beella lu Pedro cuna lubeelá bee apóstol' Jesucristo nú unibeella:

—Uni'hua, ¿xi rqui'ña nú ri'iru che?

³⁸Nu ucuaqui Pedro lubeella:

—Utsana' arqui'hua stulahua, nu urinza cada tucuahua lu nú lee Jesucristo para nú ri'i Diose perdona stulahua, nu scua liqui'nu Espíritu Santo luhua. ³⁹Xne nucua' ucuaqui u'na Diose, nu neca nucua' para li'ihua, nu necane para lu ye bee lli'ñihua nu para lu ye bee bene enu nucua'a istu, nu le'ca necane para lu ye bee bene enu ucañi Diose Pa liñibe para li'inu.

⁴⁰Scua uni Pedro lubeella, nu unilla bee bezete' lubeella cuna beelá bee bedichia' nú unilla:

—iUchiu'uchuhua leta bee bene enu rri'i nú necha neca!

⁴¹Chequie bee bene enu uzucu' stichia' Pedro urinza beella, nu bichia ze'e uyalí arqui' tucu chuna mili bee bene Jesucristo. ⁴²Yebeella utsuta' arqui'beella lunú uzete' bee apóstol' Jesucristo li'ibeella, nu uhuañinze'ca beella, nu unga tucu necatse beella nu rnacu' beella lu Diose, nu uyetesa'beella para nú udacu junto beella pá tucu nú unibiya' Jesucristo nú ri'i beella.

Xa uhuañi bee bene enu rlutilá uchili arqui' Jesucristo

⁴³Ye bee bene chiqui' uyanu arqui'beella, lu huaxi bee milagro cuna lubeela beenú uri'i bee apóstol. ⁴⁴Ye bee bene enu uyalí arqui' Jesucristo neca tucu necatse

beella nu uditsi' beella stene' beella lu sa'beella, ⁴⁵nu ungüiti beella bee yu' beella cuna ye beenú rlu'cu beella, nu uditsi' beella dimi cua' lu sa'beella lunú xi seca la'cha' cada tucua beella. ⁴⁶Ye bichia riete' sa'beella liñi Indu llene Jerusalén, nu cheelá nzuebeella ni'bee sa'beella enu nzeli arqui' Jesucristo nze tacu beella eta nu ñia nzu arqui'beella lu sa' beella cuna nú seca sa'beella. ⁴⁷Unibeella bedichia' nze'ca lu Diose, nu uyu' arqui' ye bee bene eyeche ze'e lunú xneca nehuañi beella, ye bichia uri'i Diose elietsa nú rdalalá bee bene enu uchili arqui' li'inu nu uri'inu perdona stula beella, nu uyete' bee bene quie' cuna beelá bene' Jesucristo.

Uyeca' tucu bene enu lacialitse

3 Tucu bichia uya Pedro cuna Juan ru'u Indu llene Jerusalén tucu rquiechuna uchee, neca hora ze'e chenu rnacu' bee bene lu Diose. ²Ru'u puerta indu quie', sucu tucu niyu enu lacialitse hasta nú ungulalla. Ye bichia ruya' bee bene li'illa nu sucu' beella bene quie' ru'u puerta nú lee ñia rnaa para nú rnacu'lla caridá lubee bene enu riu'u liñi indu ze'e. ³Chenu ulañi'lla nú nzechu'u Pedro cuna Juan liñi indu ze'e, unacu'lla caridá lubeella. ⁴Chequie ubi'ya beella lulla, nu uni Pedro lulla:

—Ubi'ya luru.

⁵Nu ubi'yalílla lubeella nu uri'illa elliebacu' nú dete' beella dimi yalla.

⁶Pero uni Pedro lulla:

—La lu'cua plata ni' oro biquia lulu, pero lunú aca ri'á enze'e ri'á

lulu: lunú rnibiya' Jesucristo bene eyeche Nazaret, nia lulu nú utsuli nu utse'.

⁷Chequie una'tse Pedro ya niyu ze'e chúbe nu utsuli Pedro li'illa, nu hora ze'e uyu'u Juerza' bee cuchiu'lla nu utsuta'e. ⁸Nu utetsalla utsul'illa, nu uquixiella nú utsella, uyu'unulla li'ibeella liñi indu ze'e. Sella nu rtetsalla unilla bee bedichia' nze'ca lu Diose. ⁹Ye bee bene enu ulañi' nú sella cuna nú rnilla bee bedichia' nze'ca lu Diose, ¹⁰chiqui' nzenu arqui'bee nu ulliqui beei lunú ulle'ca niyu ze'e, xne nu'lubeei li'illa nú necalla enu sucu rnacu' caridá ru'u indu ze'e, ru'u puerta nú lee Ñia rnaa.

Bee bedichia' nú uni Pedro lubee bene ru'u cordore nú lee Salomón

¹¹La tsana' niyu enu uyeca' ze'e Pedro cuna Juan, ye bee bene nzenu arqui' nu uyaxu'u beei elu nzu Pedro cuna Juan ru'u cordure elu lee Salomón. ¹²Chenu ulañi' Pedro nucua', unilla lubee bene ze'e:

—Bee bene Israel, ¿xinu nzenu arqui'hua nú uyeca' niyuquie'?, nu ¿xinu ri'yahua luru, xi neca nú li'iru necaru enu uri'i nú utse niyu quie', lunú recaru, urre lunú nehuañi nze'caru lu Diose? Xne equie nú rnibiya' Jesucristo uyeca' niyu quie'. ¹³Diose' bee bene'ahua enu udetela Abraham, Isaac cuna Jacob, Diose quie' neca enu udete' poder lu Lli'ñinu Jesucristo, pero li'ihua udete' cuendahua Jesucristo lubee usticia'hua. Nu chenu niarqui' Pilato nú la'alla li'inu li'ihua né zelahua. ¹⁴Pero

luhuare nú anacu'hua nú la'a Lli'ñi Diose enu la lu'cu dula nu rri'i tucu nú neli neca, unacu'hua nú la'a tucu bene enu uri'i eluti. ¹⁵Scua uri'ihua nú ungti li'inu enu rliqui' nú nehuañi bee bene. Pero uri'i Diose nú uhuañi zecanu lu eluti, nu li'iru ulañi'ru nú ungae scua. ¹⁶Li'i niyu enu uyeca' quie' yehua nu'luhualla, nu equie nú rnibiya' Jesuse uyeca'lla xne nzeli arqui'ru li'inu. Nu equie nú nzeli arqui'ru li'inu scua, enze'e uyeca'li'lla tucu nú rlañi' yehua nee.

¹⁷Bee sa'a, nediyaá nú li'ihua cuna bee usticia'hua chenu ungtihua Jesuse né ri'ihua beya' xi uri'ihua. ¹⁸Pero uri'i Diose scua para nú yalu stichia'nu tucu nú uni ye bee profeta'nu hasta hua'tu. Nú Cristo Lli'ñi Diose nehuaña zecanu. ¹⁹Enze'e nia luhua nú utsana' arqui'hua stulahua nu ubenchila' zeca arqui'hua lu Diose para nú chila Diose stulahua. Che liqui'nu nú ñia tsu arqui'hua. ²⁰Nu xe'la zeca Diose Jesucristo enu ucañinu hasta hua'tu luhua. ²¹Pero rqui'ña nú nzucusca' Jesucristo liñibe hasta nú tsuche' Diose yeene tucu nú uni bee profeta'nu hasta hua'tu. Li'ibeella enu ucañinu. ²²Nu uni Moisés lubee bene'ahua enu udetela: “Tucu nú uxe'la Diose Pa liñibe li'á luhua le'ca scua xe'lanu stucu bene enu ni bee stichia'nu luhua, nu chiu'u bene quie' letahua. Uzu'cu'hua ye nú ni bene quie' luhua, ²³xne tatse bee bene enu la zucu' nú ni bene quie' la nebacua'lla leta bee bene' Diose, nu nitilulla che.”

²⁴Ye bee profeta enu udixiule'e Stichia' Diose desde tuxie Samuel cuna beelá bee profeta enu ube'ta enza luquiela, udixiule'e beella lunú reca bee bichia quie'. ²⁵Nu li'ihua necahua lli'ñi bee profeta quie'. Luhua zibi' Stichia' Diose nú unibeella, nu le'ca yucuhua nú ucuaqui u'na Diose lubee bene'ahua enu udetela chenu uni Diose lu Abraham: “Equie cuenda' bee bene'lu aca le'ya ye bee bene lu iliulabe.” ²⁶Nu chenu uri'i Diose nú uhuañi zeca Lli'ñinu Jesucristo lu eluti, rlutilá luhua uxe'lanu Lli'ñinu para nú ri'ile'yanu li'ihua para nú cada tucuahua tsana' arqui'hua stulahua.

**Chenu una'tse bee bene
Pedro cuna Juan**

4 Rniscallá Pedro cuna Juan lubee bene ze'e, chenu uri'ña bee ule'ya cuna bee bene enu rnibiya' lubee sundado enu rriucuru'u Indu llene Jerusalén, cuna texcua'a bee saduceo. ²Chiqui' rle bee bene quie' xne sete' Pedro cuna Juan bee bene nu rnibeella nú huañi zeca bee benenguti tucu nú uhuañi zeca Jesuse lu eluti. ³Chequie una'tse bee bene ze'e Pedro cuna Juan, nu lunú ucheela udu'sca' beei li'ibeella ni'cu' hasta nú ye'e luyuu stucu bichia. ⁴Pero huaxi bene enu uzucu' diaca nú unibeella, uchili arqui'beella Stichia' Diose nu lu yebeella enu uyal' arqui' neca tucu ayu' mili bee niyu sin nú bacu' bee una'a.

⁵Chenu uye'e lu yuu stucu bichia bee usticia' bee bene Israel cuna

bee bene enu rnibiya' leta beella nu cuna bee ulaxcuela enu reca ley' Moisés uyetesa'beella eyeche Jerusalén. ⁶Le'ca ze'e nzu ule'ya Anás, enu rnibiya' lubee ule'ya cuna Caifás cuna Juan cuna Alejandro cuna ye bee niyu enu neca familia' ule'ya enu rnibiya' lubee ule'ya. ⁷Chequie unibiya' beella nú ye'tayu bee bene Pedro cuna Juan, nu tsu bee bene li'ibeella labe bee bene ze'e, che unidichia' beella lu Pedro cuna lu Juan:

—¿Ti unibiya' nú rri'ihua scua?
¿Nu ti unga stichia' nú rri'ihua nucua'?

⁸Nu lunú chiqui' nchiñi Espiritu Santo arqui' Pedro che unilla:

—Li'ihua bee usticia, nu li'ihua bee bene uxu, ⁹nedichia'hua luru lunú uri'inze'caru lu tucu niyu enu ungariti, nu xneca uyeca'lla. ¹⁰Enze'e ixiule'eru luhua para nú ri'i yehua beya' cuna ye bee bene Israel nú niyu enu nzu luhua ca'a uyeca'lla'equie cuenda' poder' Jesucristo bene eyeche Nazaret, enu uquie'ehua lu cruse nu uri'i Diose nú uhuañi zecanu lu eluti. ¹¹Uri'inuhua li'inu tucu nú rri'i bee bene enu rreche'e ni'i chenu rua u'nalla tucu quié nú reche'lla ni'i, nu lu ze'ela quie ze'e neca nú máse sibi'. ¹²Nu le'ca scua lecati stucu bene enu reca tsila'a lia'ahua, xne tucutsia Jesucristo uxe'la Diose lu iliulabe para nú tsila'a lia'ahua lu stula'ahua.

¹³Chenu ulañi' bee usticia nú la lliqui Pedro cuna Juan nú rnibeella, nu chenu uri'i bee usticia beya' nú né cha beella xcuela nu necatsia beella titse bee bene, che chiqui' uyanu

arqui'beella. Nu uri'ibeella beya' nú neca Pedro cuna Juan enu uyanzenu Jesuse. ¹⁴Nu lunú le'ca nzu niyu enu uyeca' ze'e cuna li'ibeella leca'xi ullela arqui' bee usticia ze'e ani lu cuenda' beella. ¹⁵Chequie unibiya' beella nú chiu'u Pedro cuna Juan ele'ya' para nú bedichia' li'itsia beella. ¹⁶Nu unibeella lu sa'beella:

—¿Xi ri'inua'ahua bee niyu quie'?'
Xne ye bee bene eyeche Jerusalén nediya' nú uri'ibeella milagro quie', nu leca modo nú tsacu'arquia'ahua nú ungae scua. ¹⁷Pero para nú la ri'chia letselá bee bedichia' quie' lubee bene rqui'ña nú qui'ya' beella ria'ahua nu chiquia'ahua arqui'beella para nú desde nee la nia'beella lunú lee Jesuse lu ni' stucu bee bene.

¹⁸Chequie ubixia zeca beella Pedro cuna Juan nu unibiya' beella lubee benecua' nú la zetea' beella nu la nia' beella lunú lee Jesuse lubee bene. ¹⁹Pero ucuaqui Pedro cuna Juan lubeella:

—¿Xi rri'ihua elliebacu' nú máse neca nze'ca nú zucu'ru nú rnhua la, luhuare nú zucu'ru nú rni Diose la? ²⁰Pero li'iru leca modo nú tsana'ru nú la niru lunú ulañi'ru cuna lunú ubene'ru.

²¹Chequie uqui'ya' zeca Pedro cuna Juan uri'i bee usticia ze'e, nu ula'a usticia li'ibeella xne né llela arqui'beella xamodo a dete'beella castiya Pedro cuna Juan xne ye bee bene uni bedichia' nze'ca lu Diose equie milagro nú unga. ²²Nu máse chiu'a lana nza niyu enu uyeca' ze'e.

Bee bene enu nzeli arqui' Jesucristo unacu' beella lu Diose

²³Chenu ula'a bee usticia Pedro cuna Juan, che chu nzuebeella

elu nucua'a beelá bee sa'beella enu nzeli arqui' Jesucristo. Nu udixiule'e beella lubee bene ze'e ye nú uni bee ule'ya enu rnibiya' lubeelá bee ule'ya cuna bee bene uxu enu rnibiya'. ²⁴Chenu ubene' bee sa'beella enu nzeli arqui' Jesucristo nucua', yebeella unacu' beella lu Diose nu unibeella:

—Diose Pa liñibe enu rnibiya' lu yeene, li'ilu enu ureche' liñibe cuna iliulabe, cuna inzatu', cuna ye nú nu' lubee. ²⁵Nu equie cuenda' Espíritu Santo'lu uchiu'u bee bedichia' quie' ru'u arre David chenu unilla:

¿Xiquie nú rlee bee bene iliulabe lu Diose?

Nu, ¿xinu rri'ibeei elliebacu' nú la zibi'?

²⁶Bee arre cuna bee usticia enu rnibiya' lu iliulabe uyetesa'beella,

nu unga tucu necatse stichia' beella,

para nú ri'i cundra beella Diose cuna Cristo'nu.

²⁷'Nu scua ungala nee, Herodes cuna Poncio Pilato uyete sa'beella eyeche quie' cuna bee bene Israel nu cuna bee bene enu la neca bene Israel. Uri'i cundra beella lli'ñilu Jesuse enu la lu'cu dula enu uxe'lalu lu iliulabe. ²⁸Scua ungala tucu nú uri'ilu elliebacu' hasta hua'tu, nu uri'ibeella nú ungala lunú riala nú aca. ²⁹Nu nee, Diose Pa liñibe ubi'yacuru xneca rqui'ya'ru rri'ibeella, uri'i elietsa luru enu neca bee bene'lu para nú la lliquiru ixiule'eru stichia'lu, ³⁰nu cuna poder nú rlu'culu rriyecaru bee bene enu riti, nu le'ca rri'iru

bee milagro equie poder nú rlu'cu lli'ñilu Jesucristo enu la lu'cu dula.

³¹Chenu ulaxu nú unacu' beella lu Diose ucuñi luhware elu neyetesabeella, nu chiqui' uyucu arqui'beella Espíritu Santo nu lá lliqui beella udixiule'e beella Stichia' Diose.

Bee bene enu nzeli arqui' Jesucristo rri'ibeella elietsa lu sa'beella

³²Ye bee bene enu uyalí arqui' Jesucristo unga tucu necatse beella nu unga tucutsia elliebacu' beella. Ni' tucu beella lá ni nú neca nú rlu'cu beella stene'tsia beella, sino que yeene necane stene' beella.

³³Nu cuna elietsa' Diose, bee apóstol unilá beella nú neli nú uhuañi zeca Jesucristo stucu bese lu eluti, nu chiqui' uri'i Diose nú neca nze'ca lu cuenda' yebeella.

³⁴Nu ni' tucu beella lecaxi uzeca la'cha' beella xne ye beella enu rlu'cu yuu urre ni'i ungüiti beellae. Nu dimi ze'e ³⁵udete'beella ya bee apóstol para nú ritsi'beellae lu sa'beella tucu nú secala'cha' beella.

³⁶Uhuañi tucu bene enu lee José, nu li'illa nze'talla leta famili' bene enu lee levita, nu necalla bene enu nze'ta enza lu iliu Chipre. Nu uhualee bee apóstol li'illa Bernabé, nu rni nucua' enu sala arqui' bene.

³⁷Bene quie' ungüitilla tucu yu'lla nu udete'lla dimi ze'e ya bee apóstol.

Lunú ulle'ca Ananías cuna Safira

5 Pero uhuañi stucu niyu enu lee Ananías, nu una'lla lee Safira, ungüiti beella tucu yu' beella. ²Pero unga tucu necatse

beella nú uya'nanu beella lle'na dimi quie' nu lle'nae udete'lla ya bee apóstol. ³Che uni Pedro lulla: —Ananías, ¿xinu uzelalu nú uri'i beze'lu ana lulu para nú unga niquichia'lu lu Espíritu Santo nú uya'nanulu lle'na dimi nú ungüitilu yu'lu? ⁴Ante nú utilu yuu ze'e, ¿xie' la neca yuu ze'e stene'lula? nu chenu ungüitilue, ¿xie' la neca dimi ze'e dimi'lu la? ¿Xinu ullela arqui'lu nú uri'ilu scua? Unga niquichia'lu lu Diose nu né aca nequichia'lu lubee bene.

⁵Chenu ubene' Ananías bee bedichia' quie' chu uyecatalla luyuu nu ungutilla. Che ye bee bene enu ungabiya' xi ulle'calla chiqui' ulliqui beella. ⁶Chequie uriña bee niyu e'ne' ze'e nu utela beei tucu laquie cuerpo'lla Che unguya'beei cuerpo'lla nu uyaca'chi' beei li'illa.

⁷Chenu udetela tucu chuna hora uriña una'a Ananías ze'e nu la ri'inchu beya' xi unga. ⁸Nu unidichia' Pedro lunchu: —Uni', ¿neli nú ungüitihua yu'hua tucu nú uni niyu'lu la?

Nu ucuauqui Safira nú uninchu: —Esquie ungüitirune.

⁹Che uni Pedro lunchu: —¿Xinu unga tucu necatse stichia'hua nu unga nequichia'hua lu Espíritu Santo? Lu'tsia enta bee bene enu uya ca'chi' niyu'lu, nu nee le'ca scua che cachi' beei li'ilu.

¹⁰Hora nú uni Pedro scua lunchu uyecatanchu lu Pedro nu ungutinchu. Chenu uyu'u bee niyu e'ne' liñi ni'i ze'e ulañi'beei nú ungutilanchu. Nu ulua beei li'inchu para nú nzecachi' beei li'inchu tucu chu cue'tse tuxie niyu'nchu. ¹¹Ye

bee bene enu nzeli arqui' Jesucristo, cuna ye bee bene enu ungabiya' lunú unga chiqui' ulliqui beella.

Uri'i bee apóstol huaxi bee milagro

¹²Chequie uri'ilá bee apóstol huaxi bee milagro lubee bene eyeche ze'e; nu yebeella riete'sa'beella ru'u cordure nú lee cordure' Salomón. ¹³Bee bene eyeche ze'e chiqui' uni nze'ca beei lu cuenda' bee bene enu nzeli arqui' Jesucristo, pero xiqui beei nú ayete'sa'beei cuna li'ibeella. ¹⁴Scua unga huaxilá bee bene enu uyalí arqui' Jesucristo niyu si una'a. ¹⁵Nu hasta rlua bee bene bee bene enu riti labe inziu nu rixiu beei li'ibeella lu eda' urre lu camilla para nú chenu dete Pedro masia xca'lalla dete equie beella para nú yeca' beella. ¹⁶Nu le'ca bee bene enu nucua'a bee eyeche axu Jerusalén, huaxi bee bene ze'e uyanu beei bee bene enu riti cuna bee bene enu nchiñi benechiqui' arqui' eyeche Jerusalén nu yebeella uyeca' beella.

Pedro cuna Juan ullutse beella ni'cu'

¹⁷Chequie ule'ya enu máse neca equie nu rnibiya' lu ye bee ule'ya cuna bee saduceo enu nucua'a cuna li'illa, chiqui' uye arqui'beei lubeella. ¹⁸Che unibiya' beei nú ulluna bee apóstol nu udu' beei li'ibeella ni'cu'. ¹⁹Pero rula' ze'e tucu ángele' Diose uxa'la ru'u bee puerta' ni'cu' ze'e. Nu ulua ángele ze'e li'ibeella liñi ni'cu', nu uninu lubeella:

²⁰—Uquiahua liñi Indu llene Jerusalén nu udixiule'ehua lubee bene para nú ri'ibeei beya' xa lu'cu

beei elunehuañi nú leca xunga laxu lu Diose.

²¹Chenu ubene'beella nú uni ángele ze'e scua. Silatu' stucu bichia uyu'u beella liñi indu ze'e, nu uquixiebeella uzete' beella Stichia' Diose lubee bene.

Chequie ule'ya enu máse neca equie nu rnibiya' lu ye bee ule'ya cuna beelá bee bene enu nzu cuna li'illa ze'e, uquiete' sa'beei bee usticia cuna ye bee bene enu rnibiya' leta bee bene Israel, nu unibiya' beei nú chetucu bee sundado bee apóstol liñi ni'cu'.

²²Pero chenu uriña bee sundado ru'u puerta' ni'cu' ze'e, lá llela'beei bee apóstol, nu ubenchila' zeca beei nu udixiule'e beei lubee usticia.

²³Nu unibeei:

—Chenu uriñaru ru'u ni'cu' nacuta' ru'u ni'cu', nu ze'e nucua'a bee sundado enu rriucu ru'u ni'cu'. Pero chenu uxa'laru ru'u ni'cu' ni'tucu leca' ti nu' liñi ni'cu'.

²⁴Chequie ule'ya enu máse neca equie nu rnibiya' lu ye bee ule'ya cuna capitañi enu rnibiya' lubee sundado enu rriucu Indu llene Jerusalén cuna beelá bee ule'ya enu rnibiya', chenu ubene'beei nucua' uquixiebeei nú rri'ibeei elliebacu' xa laxulu bee nucua'. ²⁵Hora ze'e uriña tucu niyu enu uni lubeei: —Bee bene enu udu'hua ni'cu' nucua'ala beella liñi indu sete' beella bee bene.

²⁶Chequie capitañi ze'e cuna bee sundado nzetucu beei bee apóstol, pero lecaxi uri'inu beei li'ibeella xne xiqui beei nú cá du' bee bene eyeche ze'e quiee li'ibeei.

²⁷Chenu uriñayu beei bee apóstol

udete'bee'i li'ibeella lubee usticia, chequie ule'ya enu máse neca equie nu rnibiya' lu ye bee ule'ya uni lubeella:

²⁸—¿Xie'lanú ita unibiya'ru luhua nú la zetea'hua stichia' Jesuse lubee bene la? Nu nee uri'ihua nú yela bee bene Jerusalén ungabiya' bee bedichia' cua', nu le'ca niarqui'hua nú ricu'quiyahua li'iru nú ungutiru Jesuse cua'.

²⁹Nu ucuaqui Pedro cuna beelá bee apóstol lubeella:

—Rluti rqui'ña nú zucu'xuru nú rni Diose cheela zucu'ru nú rni bee bene. ³⁰Diose' bee bene'ahua enu udetela uri'ínu nú uhuañi zeca Jesuse enu ungutihua lu cruse. ³¹Nu uzucu' Diose li'ínu cue'tse Diose chúbe liñibe, nu li'ínu necanu enu rnibiya' nu sila'anu bee bene lu dula, nu equie cuenda' li'ínu nu' modo nú tsana' arqui' bee bene Israel stula bee'i nu scua ri'ínu perdona li'ibeei. ³²Li'iru nediya' nze'caru nú neli bee nucua' cuna Espíritu Santo nú rdete' Diose lu ye bee bene enu sucu' stichia'nu.

³³Chenu ubene'beella nucua', chiqui' ulebeella nu niarqui'beella úti beella bee apóstol ³⁴Pero leta bee usticia ze'e nzucu tucu fariseo enu lee Gamaliel, nu necalla ulaxcuela enu reca ley, nu chiqui' rlu'cu bee bene ze'e ula'na lulla. Benequie' utsulílla nu unibiya'lla nú chiu'u bee apóstol eli'ya' lle'na. ³⁵Nu chu unilla lubee usticia ze'e:

—Bee bene Israel, uri'i nze'cahua elliebacu' xa ri'inuhua bee niyu quie'. ³⁶Ullu'cu arqui'hua nú xa uri'i tucu bene

enu lee Teudas hua'tu, uni nú necai tucu bene enu neca equie, nu neca tucu tacu ayu'u bee bene'i, pero chenu unguuti bee bene li'i, ye bee bene enu uyaquie li'i uri'chia letse bee'i, ze'e ulaxu ye nu uri'i. ³⁷Le'ca bee bichia chenu unibiya' gobierno nú bacu' calu neca bee bene. Uchiu'u Judas enu neca bene Galilea, le'ca esquie ulu'cui huaxi bee bene'i, pero chenu unguuti bee bene li'i, uri'chia letse bee bene'i. ³⁸Enze'e nia luhua nú utsana'hua bee niyu cua', nu ula'ahua li'ibeella. Xne tunu neca nucua' bezete' nú udete' bee bene lubeella nú ri'ibeella scua, laxu nucua'. ³⁹Pero tunu equie cuenda' Diose rri'ibeella nucua', leca modo tsuxehua lunú rri'ibeella scua. Ubi'yahua tunu cá rri'i condrahua lunú neca cuenda' Diose.

⁴⁰Che uri'i bee usticia ze'e caso lunú uni Gamaliel, nu ubixia bee'i bee apóstol nu uzeteche' bee'i li'ibeella, nu unibeei nú la chetixiulea' beella stichia' Jesuse lubee bene, nu chu ula'a bee'i li'ibeella. ⁴¹Nu chenu uchiu'u beella lubee usticia ze'e, chiqui' ñia nzu arqui'beella xne utsana' Diose nú nehuana ulle'ca beella equie cuenda' Jesuse. ⁴²Nu ye bichia né tsana' arqui'beella udixiule'e beella cuna nú uzete' beella bedichia' nze'ca' Jesucristo lubee bene, sia liñi Indu llene Jerusalén cuna ni' bee bene.

Uyañi achi bene para nú ri'ibeella elietsa lubee bene' Jesucristo

6 Bee bichia ze'e, chenu nze aca huaxilá bee bene enu nzeli

arqui' Jesucristo, che bee bene enu rni dialu griego uquixiebeella nú xanabitsi beella lu cuenda' bee bene enu rni dialu hebreo. Unibeella nú yeye'e chenu ritsi' bee elubacu, lle'nalá nú riucu bee una'a zaqui enu rni dialu griego luquelá nú riucu bee una'a zaqui enu rni dialu hebreo. ²Chequie ye chi'chiucu bee apóstol uquiete' sa'beella ye bee bene enu nzeli arqui' Jesucristo, nu unibeella:

—La necanze'ca nú tsana' arqui'ru nú rixiule'eru Stichia' Diose para nú ritsi'ru nú acu bee bene. ³Enze'e bee sa'a enu nzeli arquia'ahua Jesucristo, ucañihua achi bee niyu letahua enu ri'i riña' cua', nu nediya'hua nú nehuañi beella tucu nú rialane, cuna nú neli nzu Espíritu Santo cuna li'ibeella, cuna nú rlu'cu beella lunú reca beella. ⁴Li'iru nzenacu'láru lu Diose cuna nú nze tixiule'eru stichia'nu lubee bene.

⁵Yebeella unga tucu necatse beella nú acane scua, nu ucañi beella Esteban, enu chiqui' nzeli arqui' Jesucristo, nu chiqui' nzu Espíritu Santo cuna li'illa, nu le'ca ucañi beella Felipe, Procoro, Nicanor, Timón, Parmenas, cuna Nicolás, enu neca bene eyeche Antioquía. Nicolás quie' la necalla bene Israel, pero uyalí arqui'lla tucu nú uyalí arqui' bee bene Israel ante nú chili arqui'lla Jesucristo. ⁶Chequie uriñayu beella achi bee niyu ze'e lubee apóstol para nú unacu' beella lu Diose lu cuenda' beella nu uricu' beella ya beella equie beella.

⁷Pero másela nzeri'chia' Stichia' Diose lubee bene, cuna nú nze aca

huaxilá bee bene enu nzeli arqui' Jesucristo eyeche Jerusalén, hasta bee ule'ya' bee bene Israel huaxi beella uyalí arqui'beella Jesucristo.

Chenu una'tse bee bene Esteban

⁸Chiqui' uri'i Diose elietsa lu Esteban, nu udete'nu poder lulla nú rri'illa huaxilu bee milagro nú llene neca lubee bene. ⁹Chequie chiucu chuna bee bene liñi indu nú lee Esclavos Libertados, cuna bee bene eyeche Cirene, cuna bee bene eyeche Alejandría, cuna bee enu nze'ta enza Cilicia, cuna bee bene Asia, uquixiebeei nú unixu beei cuna Esteban. ¹⁰Pero bee benequie' lá ri'i stichia' beei ana lunú reca elliebacu' Esteban, equie nú rri'i Espíritu Santo elietsa lulla. ¹¹Chequie udixiu beei chiucu chuna bee bene enu ni nú rni condra Esteban Moisés cuna Diose. ¹²Scua uri'ibeei para nú ulee bee bene eyeche ze'e, cuna bee bene enu neca equie, cuna bee ulaxcuela enu reca ley' Moisés lu Esteban. Che una'tse beei li'illa nu uyayu beei li'illa lubee ustichia' bee bene Israel. ¹³Nu le'ca ucua'na beei bee bene enu uni eluquichia' para nú uni bee nze'e:

—Niyu quie' la tsuxella nú se'talla ley' Moisés cuna indu' Diose. ¹⁴Li'iru ubene'ru nú rnilla nú Jesuse bene eyeche Nazaret nitilulla indu llene Jerusalén, nu che'ella bee custumbre nú utsa'na Moisés lua'ahua.

¹⁵Chequie bee usticia cuna ye bee bene enu nucua'a ze'e, chenu ulañi'beella lu Esteban, ulañi'beella nú rnaa lulla xi rnaa lu tucu ángele' Diose.

Lunú uni Esteban lubee usticia

7 Chequie ule'ya enu máse neca equie nu rnibiya' lu ye bee ule'ya unidichia'lla lu Esteban nú unilla:

—¿Xie' neli nú scua unilu la?

²Nu uni Esteban:

—Li'ihua bee usticia cuna yehua bee bene enu nucua'a ca'a, uzu'cu' diacahua nú nia luhua. Diose liñibe ulube'lunu lu Abraham bene'ahua enu udetela, chenu uzuculla lu iliu Mesopotamia, ante nú chálla zuculla lu eyeche Harán. ³Nu uni Diose lulla:

“Utsa'na lachilu cuna ye bee sa'lu, nu uquia luyuu nú lubea lulu.” ⁴Chequie uchiu'u Abraham lu iliu' bee bene Caldea, nu uyacua'a beella lu eyeche Harán. Nu chenu ungu' pa'lla, che uni Diose lulla nú ye'talla zuculla luyuu elu nucua'ahua hasta nee.

⁵Pero chenu uriña Abraham ca'a, lá dete'sca' Diose ni' teme' yuu lulla, pero ucuaqui u'nanu nú dete'nu yuu ze'e lulla. Chequie chenu atilla, aca iliu ze'e iliu' bee lli'ñilla, añinzuca nú chenu uni Diose scua lá lu'cusca' Abraham lli'ñilla. ⁶Nu le'ca uni Diose lu Abraham, nú bee lli'ñilla enu nze'ta enza luquielá checua'a beei xi neca bene rene lu stucu nación, elu ri'i bee bene nú juerte ri'ibeei riña' nu nehuana zeca beei ze'e diqui tacu ayu'u lana.

⁷Pero le'ca uni Diose lu Abraham: “Li'á detea castiya bee bene enu ri'i nú juerte ri'ibeei riña'. Cheelá chiu'u beei lu nación ze'e, nu lu'cu beei ula'na lua luhuare

quie'.” ⁸Nu chenu uni Diose lu Abraham, utsa'nanu stichia'nu nú quiee seña elunecachi'lla cuna beelá bee niyu. Enze'e chenu ungula endu'lla Isaac, nu chenu ullu'cui tucu xmana uquie'ella seña elunecachi'i. Le'ca esquie uri'i Isaac cuna endu'lla Jacob. Nu le'ca esquie uri'i Jacob cuna chi'chiucu bee endu'lla enu unga bee bene'ahua enu udetela.

⁹Bee lli'ñi Jacob, enu unga bee bene'ahua enu udetela, li'ibeella uya arqui'beella lu bichi beella José. Chequie ungu'iti beella li'illa lubee bene enu unguya' li'illa Egipto. Pero né tsana' arqui' Diose José, ¹⁰nu Diose uri'i elietsa lulla lu ye nú nehuana ulle'calla, nu le'ca uri'inu elietsa lulla para nú uzeca Faraón arre Egipto li'illa, nu uri'i arre Faraón nú ungalla gobernador Egipto, nu unibiya'lla lu ye bee stene' arre ze'e.

¹¹Chequie chenu unga biña lu nación Egipto cuna Canaán, chiqui' nehuana ulle'ca bee bene'ahua enu udetela nu ulaxu nú udacu beella. ¹²Pero chenu ungabiya' Jacob bene'ahua enu udetela nú nu' trigo Egipto, uxe'lalla bee lliana'lla nzetsi beei trigo bese rlu ze'e. ¹³Nu chenu uya beella bese rruccu, udixiule'e José nú necalla bichi beella, nu scua ungabiya' arre Faraón nú ti neca bee bene' José. ¹⁴Chequie uxe'la José resuna nú ye'ta pa'lla Jacob cuna ye bee bene'lla para nú cua'a beella Egipto, nu neca beella setenta y cinco bee bene. ¹⁵Scua unga nú uya zucu Jacob Egipto. Ze'e ungu'tilla, nu le'ca

ze'e unguiti bee bene'ahua enu udetela. ¹⁶Chenu udete tiambu, che unguya'beella arta' bee bene'ahua enu udetela, nu uya ca'chi' beellae eyeche Siquem, liñi eluhua nú utsi Abraham lubee lliana' bene enu lee Hamor eyeche Siquem.

¹⁷Chenu nze'ta lluc'cula tiambu nú aca tucu nú ucuaqui u'na Diose lu Abraham, chiqui' udala bee sa'ahua enu neca bee bene Israel Egipto. ¹⁸Chequie bee bichia ze'e uquixie nú rnibiya' stucu arre Egipto enu lá chulu José. ¹⁹Nu arre quie' ucua'nalla nú uri'illa nú nehuana ulle'ca bee bene'ahua enu udetela. Unibiya'lla nú utsi'qui bee bene'ahua bee endu' niyu' beella enu unguila inza re'cu Nilo para nú atibeei. ²⁰Tiambu ze'e unguila Moisés. Nu chiqui' ñia riu' arqui' Diose endu' quie', nu uri'iucu bee pa'nu li'inu diqui chuna guu. ²¹Chenu uriña bichia nú utsana' arqui'beella li'inu, le'ca li'i xinchiu'cu arre Egipto ullela' li'inu nu uri'i ru'cunchu li'inu xi neca endu'nchu. ²²Nu unga Moisés ye nú reca bee bene Egipto, nu chiqui' neca equie lunú rnilla cuna lunú uri'illa.

²³Chenu nza Moisés chiu'a lana, udu' arqui'lla nú nzebi'yalla bee sa'lla enu neca bee bene Israel. ²⁴Nu chenu ulañi' Moisés nú riñi tucu bene Egipto tucu bene sa'lla. Unganu'lla bene ze'e, nu unguutilla bene Egipto ze'e. ²⁵Uri'i Moisés elliebacu' nú nediyala' bee bene Israel nú equie cuenda' li'illa tsila'a Diose li'ibeei lubee bene Egipto, pero la ri'ibeei

beya' nucua'. ²⁶Stucu bichia, ulañi' Moisés chiucu bee bene Israel nú rliu beei, nu niarqu'i'lla nú laalla li'ibeei, nu unilla lubeei: "Tucutse sa'hua, ¿xinu rliuhua?"

²⁷Chequie tucu bene enu rliu ze'e, utsi'ñai Moisés nu uni lulla: "¿Ti uliqui' elurnibiya' lulu para nú nilu luru? ²⁸¿Xie' niarqu'lu nú útilu li'á tucu nú unguutilu bene Egipto neca' la?" ²⁹Chenu ubene' Moisés nucua', uyecaxu'ulla nzalla lu iliu Madián. Ze'e uzuculla xi neca bene rene, nu uchi'alla ze'e nu ulu'culla chiucu endu'.

³⁰Chenu udete chiu'a lana, lu dañi achi elu lecalí ti nucua'a, axu dañi nú lee Sinaí, ulube'lu tucu ángele' Diose lu Moisés lu quii nú rulu lu tucu aca lla'na. ³¹Chequie nzenu arqui' Moisés chenu ulañi'lla quii ze'e, nu chenu nzebicalla para nú lañi' nze'calla nucua', nu ubene'lla chi Diose nú uni lulla: ³²"Li'á neca Diose' bee bene'hua enu udetela Abraham, Isaac, cuna Jacob." Nu uquixie Moisés nú recatse'tse'lla nú xiquilla, nu né laca arqui'lla nú abi'yalla lu quii ze'e. ³³Chequie uni Diose lulla: "Uhua luculu, xne luhuare elu nzulu necachine. ³⁴Li'á rlañi nze'ca lunú xa nehuana seca bee benea enu nucua'a Egipto, nu rienea lunú xanabitsi beella, enze'e ulaca para nú tsila'a li'ibeella lubee nucua'. Utee, ne xe'la li'ilu Egipto."

³⁵Añinzuca nú né zucu'beella lunú uni Moisés lubeella, a'la unibeella lulla: "¿Ti uliqui' elurnibiya' lulu para nú niarqu'lu

nilu luru?”, pero equie cuenda' ángele enu ulube'lu lulla lu aca lla'na nú rulu ze'e, Diose udete' elurnibiyá' lulla, nu uxe'lanu li'illa para nú ri'illa elietsa lubeella nú chiu'u beella Egipto. ³⁶Nu Moisés neca enu uhua bee bene'ahua enu udetela Egipto, uri'illa bee milagro ze'e, nu le'ca uri'illa bee milagro lu inzatu' nú lee inzatu' neluu, cuna lu dañi achi elu unzee beella diqui chiu'a lana. ³⁷Nu le'ca li'i Moisés quie' uni lubee bene Israel: “Diose cañi tucu bene enu aca tucu profeta letahua, tucu nú ucañinu li'á. Zu'cuhua stichia' profeta quie'.” ³⁸Nu chenu nzu Moisés cuna bee bene'ahua enu udetela lu dañi achi, li'illa necalla enu uni ángele' Diose lu equie dañi nú lee Sinaí para nú unilla Stichia' Diose lubeella. Nu bedichia' cua' neca nú utsa'na beella lua'ahua hasta nee.

³⁹'Pero bee bene'ahua enu udetela né zucu'beella nú uni Moisés, nu lá niarquib'beella nú anibiyá'lla lubeella, a'la niarquib'beella nú benchila' zeca beella Egipto. ⁴⁰Nu unibeella lu Aarón: “Ureche'e bee diose enu zuculu lua'ahua; xne la ria'ahua beya' canza Moisés enu uhua lia'ahua Egipto.” ⁴¹Chequie ureche' beella tucu becerro enu unga diose' beella, nu unguuti beella nañi u'na lu becerro ze'e, nu uri'i beella tucu eliñi lunú ñia nzu arquib'beella nú ureche' beella becerro ze'e. ⁴²Che utsana' arquib' Diose li'ibeella, nu utsana'nu nú rdete' beella ula'na lu bichia cuna

lu guu cuna lubee enu nchiucu' liñibe. Xne scua niquie lu ichi' Stichia' Diose nú uquie'e bee profeta elu rni:

Bee bene Israel, ¿xie'
unguutihua bee nañi lua xi
neca u'na,

diqui chiu'a lana nú ucua'ahua
lu dañi achi la?

⁴³ Pero a'la ulu'cuhua ula'na lu diose'hua enu lee Moloc enu nzucu liñi carpa nú necache' iti,

cuna belaa diose' Renfán,
bee diose enu le'ca li'ihua
ureche'hua para nú lu'cuhua
ula'na lu.

Enze'e xe'la li'ihua elu máse
istu Babilonia.

⁴⁴'Nu chenu ucua'a bee bene'ahua enu udetela lu dañi achi, ulu'cu beella tucu ni'i iti nú unga indu'beella elu uduche' beella ley' Diose. Indu quie' ungache' tucu nú unibiyá' Diose lu Moisés, chenu uninu lulla nú reche'llae tucu nú ulañi'lla. ⁴⁵Bee bene'ahua enu udetela uya'nanu beella induquie' chenu unguuti Moisés, nu chenu uya'na Josué luhuare' Moisés che uriñayu beella indu quie' luyuu elu uriñabeella, chenu uri'ibeella xuu lubee bene eyeche Canaán equie yuu, nu Diose uri'i elietsa lubeella nú uya'nanu beella yuu ze'e. Scua ulu'cu beella indu quie' hasta bichia nú uquixie nú unibiyá' arre David. ⁴⁶Diose uzeca arre David, nu niarqu'i'lla nú reche'lla tucu indu para li'inu enu neca diose'ahua, lia'ahua enu neca bee bene Israel. ⁴⁷Pero arre Salomón

neca enu ureche' indu' Diose.

⁴⁸ Añinzuca nú la zucu Diose liñi indu nú ureche' bee bene tucu nú uni profeta chenu unilla:

⁴⁹⁻⁵⁰ Liñibe nzucua'a rnibiya'a, nu luyuu neca elu nzu e'ya. ¿Xa rnaa ni'i nú reche'hua para li'á?

¿Nu xa rnaa luhua elu tsulachia?

Xne le'ca li'á ureche'a ye bee nucua', —uni Diose.

⁵¹ Pero li'ihua —unilá Esteban lu beella— chiqui' nziti arqui'hua, nu la zucu'hua nú rni Diose. La ri'i casohua Espirítu Santo. Tucu nú uri'i bee bene'hua enu udetela.

⁵² Bee bene'hua enu udetela xitse uri'inu beella ye bee profeta' Diose, hasta nú unguuti beella bee profeta enu udixiule'e nú riña li'inu enu rri'i tucu nú neli neca, nu nee nú ube'tanu, udete' cuendahua li'inu lubee bene, nu unibiya'hua nú ungutinu. ⁵³ Añinzuca nú uyucuhua ley nú uliqui' bee ángele' Diose luhua, pero lá zucu'huane.

Unguuti bee bene Esteban

⁵⁴ Chenu ubene' bee bene ze'e nucua', chiqui' ulebee nu tu'na racu xa' laya beei nú rlee beei lu Esteban. ⁵⁵ Pero chiqui' nzu Espirítu Santo cuna Esteban, chenu ubi'yalla enza liñibe ulañi'lla ellie'e lu nzucu Diose, le'ca ulañi'lla nú nzulí Jesucristo cue'tse Diose chubee.

⁵⁶ Chequie uni Esteban:

—iUbi'yacuruhua! Rlañia nú na'la liñibe, nu le'ca rlañia nú nzulí Jesucristo cue'tse Diose chúbee.

⁵⁷ Pero chenu ubene'beeí nú uni Esteban scua utsacu' beei diaca

beeí, nu juerte urixialibeeí nú nze na'tse beei Esteban. ⁵⁸ Che uhuabeeí li'illa ru'u eyeche ze'e para nú útibeeí li'illa cuna quiee, nu tucu niyu e'ne enu lee Saulu uri'i ucu xucu beei. ⁵⁹ Nu diqui nú rdu'beeí quiee Esteban, unilla lu Diose:

—Paa Jesuse uyucu espíritua.

⁶⁰ Che chu utsulliquilla nu juerte rixialilla nú unilla:

—Paa Jesuse, la du' cuendalu dula nú rri'inu bee benequie' li'á nee.

Chenu ulaxu nú uni Esteban scua, chu ungutilla.

Uri'i cundra Saulo bee bene enu nzeli arqui' Jesucristo

8 Nu para Saulo neca nze'ca nú unguuti bee bene Esteban.

Nu le'ca bichia ze'e uquixie bee bene nú uri'ibeeí nú nehuana seca bee bene' Jesucristo eyeche Jerusalén. Ye beella uri'chiale'tse beella diqui lubee iliu Judea, cuna lu iliu Samaria, uya'natsia bee apóstol'nu eyeche Jerusalén. ² Chequie chiucu chuna bee niyu enu nzenu cuenda nú nzucu Diose uyaca'chi' beella cuerpo' Esteban nu chiqui' unguna'nu beella li'illa. ³ Nu uquixie Saulo nú una'tsei bee bene enu nzeli arqui' Jesucristo, nu riu'i ni' por ni' beella, nu ala juerza ruya'i niyu si una'a rdu'i ni'cu'.

Udixiule'e bee bene' Jesucristo Stichia' Diose eyeche Samaria

⁴ Pero bee bene enu uchiu'u eyeche Jerusalén udixiule'e beella bedichia' nze'ca' Diose catse elu nzuebeella. ⁵ Felipe enu neca tucu bene leta beella, uyalla eyeche llene Samaria, nu uquixiella

rixiule'ella stichia' Jesucristo lubee bene ze'e. ⁶Uyetesá' huaxi bee bene nu yebeella sucu'diaca beella lunú udixiule'e Felipe lubeella, cuna lunú ulañi'beella bee milagro llene nú uri'illa. ⁷Xne uri'iyecalla huaxi bee bene enu nchiñi benechiqui' arqui', nu rixiali bee benechiqui' ze'e xiu'u arqui'bee. Le'ca uri'iyecalla bee bene enu neati tucu parte cuerpo' cuna bee bene enu necuxu. ⁸Enze'e chiqui' ñia utsu arqui' ye bee bene eyeche ze'e.

⁹Pero eyeche ze'e nzucu tucu bene enu lee Simón, hasta hua'tu rri'i elu uliñi nu sequienui bee bene eyeche Samaria, nu rri'i nú necai tucu bene enu neca equie. ¹⁰Ye bee bene ze'e ubene'bee lunú uni Simón, desde bee endu' lla'na nu hasta bee bene uxu, nu unibeei:

—Niyu quie' chiqui' rlu'cu poder nú rlu'cu Diose.

¹¹Chiqui' rri'i caso bee lunú rni, xne hasta hua'tu sequienui bee bene equie elu uliñi nú rri'i. ¹²Pero chenu uyalí arqui' bee bene lunú udixiule'e Felipe equie cuenda' poder nú rlu'cu Diose, cuna equie cuenda' Jesucristo. Che urinza beella niyu si una'a. ¹³Nu hasta li'i Simón quie' uyalí arqui'lla Jesucristo nu urinzalla, nu uquixie enzenulla Felipe, cuna nú nzenu arqui'lla lu ye clasia' bee milagro llene nú rlañi'lla rri'i Felipe.

¹⁴Chequie chenu ungabiyá' bee apóstol' Jesucristo enu nucua'a eyeche Jerusalén nú uchili arqui' bee bene Samaria Stichia' Diose, uxe'la beella Pedro cuna Juan lubee bene ze'e. ¹⁵Chenu uriñabeella eyeche Samaria, unacu' beella

lu Diose equie cuenda' bee bene enu uyalí arqui' Stichia' Diose para nú yucu arqui'beella Espíritu Santo. ¹⁶Xne ni' tucu beella lasca' yucu arqui'beella Espíritu Santo, urinzatsia beella cuna nú lee Jesucristo. ¹⁷Chequie uricu' Pedro cuna Juan ya beella equie bee bene ze'e para nú uyucu arqui'beella Espíritu Santo.

¹⁸Chenu ulañi' Simón nú uyucu arqui' bee bene ze'e Espíritu Santo equie nú uricu' bee apóstol ya beella equie bee bene ze'e, uniarqui'lla nú dete'lla dimi ya beella, ¹⁹nu unilla:

—Le'ca nua uli'qui' poder cua' lua para nú chenu ricua yaa equie tatse bene, le'ca yucu arqui' nze'e Espíritu Santo.

²⁰Chequie uni Pedro lulla:

—Li'ilu cuna dimi'lu nitilulu, xne rri'ilu elliebacu' nú tsilu poder nú lia rliqui' Diose. ²¹Li'ilu ni'teme' la yala nú ri'ilu tucu nú rri'iru, xne ni'teme' la chequieelu inziu' Diose. ²²Utsana' arqui' beenú necha neca rri'ilu nu uche'e elliebacu'lu, nu uziquiee lu Diose tunu tianu' xa ri'inu perdona lunú necha uri'ilu elliebacu' scua. ²³Xne puro nú necha neca nu' arqui'lu, nu rnibiya'sca' dula lulu.

²⁴Che ucuaqui Simón nú unilla:

—Una'cuhua lu Diose equie cuendaa para nú la zeca ni' tucu beenú unihua.

²⁵Chenu ulaxu nú unibeella stichia' Jesucristo cuna nú unibeella Stichia' Diose lubee bene ze'e, cheelá ubenchila' zeca beella eyeche Jerusalén. Nu ye bee eyeche nú nchiucu' lu iliu Samaria

elu udete beella udixiule'e beella
Stichia' Diose lubee bene.

**Ubedichia'nu Felipe
tucu bene Etiopía**

²⁶Lulá bee nucua', uni tucu
ángele' Diose lu Felipe:

—Uquia enza sur, inziu nú xiu'u
enza Jerusalén nu nza enza eyeche
nú lee Gaza. Inziu ze'e rdete lu dañi
achi. ²⁷Che uchiu'u Felipe nú nzalla,
nu lu inziu ulluna'lla tucu niyu
eyeche Etiopía. Neca benequie' enu
chiqui' neca equie xne rricuche'ella
ye dimi' reina Candace enu
rnibiya' Etiopía, nu yuaalla eyeche
Jerusalén udete'lla ula'na lu Diose.
²⁸Nu nu' nziulalla nú nzialla enza
lachilla, nzuculla equie acareta'lla
rulalla lu ichi' Stichia' Diose nú
uquie'e profeta Isaías. ²⁹Che uni
Espíritu Santo lu Felipe:

—Uquiabica lu acareta cua'.

³⁰Chenu uyabica Felipe lu acareta
ze'e, ubene'lla nú rula bene ze'e lu
ichi' Stichia' Diose nú uquie'e profeta
Isaías, nu unidichia'lla lu bene ze'e:
—¿Detá rri'ilu beya' lu ichi' nú
rulalu la?

³¹Chequie ucuaqui bene ze'e nú
unilla:

—¿Xa ri'á beya' nú rnii, tunu
lecati xixiule'e lua xa rnii?

Nu uni bene ze'e lu Felipe nú
quieella equie acareta nu cua'a
junto beella.

³²Lu ichi' Stichia' Diose elu
rulalla rni:

Unguya' bee bene li'inu xi neca
tucu sanchi, elu úti beei
li'inu;
nu lá ninu xi neca tucu sanchi
enu lecaxi ri'i nuxu

lu bene chenu xiecu' bene ichia
tsu'í.

³³Chenu xitse uri'inu bee bene
li'inu. Lecati uri'i elu usticia
lu cuenda'nu,
¿ti nii nú ti neca bee bene'nu
enu udetela?

Xne uchiu'ulanu lu iliulabe quie'.

³⁴Chequie uni bene ze'e lu Felipe:
—Uri'i faura uni' lua, ¿ti lu cuenda'
rni profeta cua', rnilla lu cuenda'
li'itsialla la, urre rnilla lu cuenda'
stucu bene la?

³⁵Chequie uquixie Felipe nú
udixiule'ella xi rni luhuare lu
Stichia' Diose elu rulalla, nu uni
Felipe equie cuenda' bedichia'
nze'ca' Jesucristo lulla. ³⁶Lu ze'elá
chenu udete beella tucu luhuare elu
nu' inza, uni bene ze'e lu Felipe:
—Ca'a nu' inza, ¿nu' modo rinzalu
li'á ca'a nee la?

³⁷Nu uni Felipe lulla:

—Nu' modoe, tunu diquinu'
arqui'lu chili arqui'lu Jesuse.

Che unilla:

—Chili arquia nú Jesucristo neca
Lli'ñi Diose.

³⁸Chequie unibiya'lla nú utsuxe
acareta'lla, nu ulaca rucu beella
equie acareta ze'e, nu uyu'u beella
lu inza nu urinza Felipe li'illa.

³⁹Chenu uchiu'u beella lu inza,
hora ze'e tu'natsia uniti Felipe nu
unguya' Espíritu Santo li'illa, nu né
lañia' bene ze'e li'illa. Pero chiqui'
ñia nzu arqui'lla nze ri'illa seidu
inziu'lla. ⁴⁰Chenu uri'i Felipe beya'
nú hasta eyeche Azoto nzulalla, che
eyeche por eyeche udixiule'ella
bedichia' nze'ca' Jesucristo lubee
bene, hasta nú uriñalla eyeche
Cesarea.

Uchili arqui' Saulo Jesucristo

(Hch. 22:6-16; 26:12-18)

9 Nu bee bichia ze'e, la tsuxe Saulo nú rleei lubee bene enu nzeli arqui' Jesucristo, nu uni nú úti li'ibeella. Enze'e uyani'i lu ule'ya enu máse neca equie nu rnibiya' lu ye bee ule'ya, ²para nú acache' tucu ichi' nú nu' modo chai liñi bee indu eyeche Damasco che cua'nai bee bene enu nzeli arqui' Jesucristo niyu si una'a para nú uya'i li'ibeella nu du'i li'ibeella ni'cu' eyeche Jerusalén. ³Pero chenu nze riñai axu eyeche Damasco, tu'natsia ulaca tucu ellie'e nú nze'ta enza liñibe nu udu'llie'e ellie'e ze'e diqui abenchila' elu nza Saulo. ⁴Nu chu uzana' Saulo luyuu, nu ubene'i tucu chii nú uni:

—Saulo, Saulo, ¿xinu rri'i condralu li'á?

⁵Nu uni Saulo:

—¿Tiilu, Detá?

Nu ucuquinu:

—Li'á neca Jesuse enu rri'i condralu, le'catsia li'ilu rri'ilu equiya lulu. Tucu nú rri'i u'na' nú sube'f lli'i icu' aca rucha.

⁶Nu recatse'tse' Saulo xiquilla, nu unilla:

—Detá, ¿xi niarqu'i'lu nú ri'á?

Chequie uni Jesucristo lulla:

—Uzete'e, nu uquia eyeche Damasco, ze'e ni bene ta nú ri'ilu.

⁷Nu bee bene enu nzenu Saulo chiqui' ulliqui beella, xne ubene' beella chii nú uni lulla, pero lecalí ti ulañi' beella. ⁸Chenu utsuli Saulo la bi'ya'lla, che una'tse bee bene enu nuulla yalla nu unguya'beella li'illa eyeche Damasco. ⁹Ze'e

uzuculla chuna bichia, sin nú bi'yalla nu sin nú aculla, nu lecaxi ungue'lla.

¹⁰Eyeche Damasco ze'e nzucu tucu bene enu nzeli arqui' Jesucristo enu lee Ananías, Ananías quie' ulube'lu Jesuse lulla nu uninu lulla:

—iAnanías!

Nu ucuquilla:

—Ca'a nzua, Detá.

¹¹Chequie uni Jesuse lulla:

—Utsuli nu uquia inziu llene nú lee chubee, chenu riñalu ni' Judas nedichia'lu tucu bene eyeche Tarso enu lee Saulo. Xne rncu'lla lua nee, ¹²nu neca xi neca nú rni xcala'lla ulañi'lla nú uyu'u tucu bene enu lee Ananías nu uricu'lla yalla equie Saulo, para nú bi'ya zecalla.

¹³Chenu ubene' Ananías nucua', unilla:

—Detá, huaxi bee bene rni lu cuenda' niyu cua', cuna lu ye beenú necha neca rri'illa lubee bene enu nzeli arqui' li'ilu eyeche Jerusalén.

¹⁴Nu nee uriñalla ca'a cuna elurnibiya' nú udete' bee ule'ya enu máse neca equie nu rnibiya' lu ye bee ule'ya para nú na'tsella ye bee bene enu nzeli arqui' li'ilu.

¹⁵Nu uni Jesuse lulla:

—Uquia, xne ucaña niyu cua' para nú ixiu'e'lla stichia'a lubee bene enu la neca bee bene Israel, cuna lubee arre, nu le'ca cuna nuu lubee bene Israel. ¹⁶Li'á ixiu'e'lla lulla nú chiqui' huaxi nú nehuana zecalla equie nú necalla benea.

¹⁷Chequie nza Ananías ni'i elu nzucu Saulo. Chenu uyu'ulla liñi ni'i ze'e, uricu'lla yaalla equie Saulo, nu unilla:

—Saulo, Jesucristo enu ulube'lu lulu lu inziu nú nze'talu, li'inu uxe'lanu li'á lulu para nú bi'ya zecalu, nu para nú ya'na Espírítu Santo cuna li'ílu.

¹⁸Hora ze'e uzana' nú nacu' i'cululla nú rna xi rna melu tsu' bela, nu ubi'ya zecalla. Che utsulílla nu urinzalla. ¹⁹Che udacu Saulo lle'na nú udaculla nu uyu'u zeca juerza'lla, nu uya'nalla chiucu chuna bichia cuna bee bene enu nzeli arqui' Jesucristo enu nucua'a eyeche Damasco.

**Udixiule'e Saulo Stichia'
Diose eyeche Damasco**

²⁰Nu chu uquixie Saulo rixiule'ella Stichia' Diöse liñi bee indu' bee bene Israel, nu unilla nú neca Jesuse Lli'ñi Diöse. ²¹Ye bee bene enu ubene' nú rnilla chiqui' nzenu arqui'bee, nu unibeei:
—¿Xie' laca benecua' enu utiaca' bee bene enu nzeli arqui' Jesucristo eyeche Jerusalén la? ¿Lanu le'ca li'i nucua' enu uriña ca'a para nú na'tse nucua' bee bene enu nzeli arqui' Jesucristo nu cheyu nucua' li'ibeella lubee ule'ya enu máse rnibiya' lu ye bee ule'ya la?

²²Pero bichia por bichia la lliqui Saulo rixiule'ella Stichia' Diöse, nu rnilla nú neca Jesuse Cristo, hasta nú la ri'i bee bene Israel enu nucua'a eyeche Damasco beya' xa ri'ibeei chenu ubene'bee nucua'.

**Ula'a Saulo lubee bene Israel
enu nucua'a eyeche Damasco**

²³Udetetsia huaxi bee bichia, unga tucu necatse bee bene Israel enu nucua'a eyeche Damasco para

nú úti beei Saulo, ²⁴pero uri'i Saulo beya' nucua'. Bichia si rula' nucua'a quiebee li'illa ru'u puerta eyeche ze'e para nú útibeei li'illa, ²⁵che bee bene enu nzeli arqui' Jesucristo rula' udu' beella Saulo liñi tucu llume nu ulaca beella li'illa enza di'chi barda nú nu' diqui abenchila' eyeche ze'e, nu scua uchiu'ulla eyeche Damasco.

Uriña Saulo eyeche Jerusalén

²⁶Chenu uriña Saulo eyeche Jerusalén, uniarqui'lla nú yete'lla cuna bee bene enu nzeli arqui' Jesucristo, pero ye beella xiqui beella li'illa xne la chili arqui'beella nú le'ca nulla nzelíla arqui'lla Jesucristo. ²⁷Chequie unguya' Bernabé li'illa lubee apóstol. Nu udixiule'ella nú ulañi' Saulo Jesucristo cuna nú ubedichia'nulla li'inu chenu nzalla enza eyeche Damasco, nu la lliquilla udixiule'ella stichia' Jesucristo lubee bene eyeche ze'e. ²⁸Scua uya'na Saulo eyeche Jerusalén, nu uyanzeenulla cuna li'ibeella. ²⁹Lá lliquilla udixiule'ella stichia' Jesuse, cuna nú unixulla cuna bee bene Israel enu rni dialu griego, chequie niarqui'bee nú útibeei li'illa. ³⁰Chenu ungabiya' bee bene enu nzeli arqui' Jesucristo nucua', unguya'beella Saulo eyeche Cesarea, nu ze'e uxe'la beella li'illa eyeche nú lee Tarso.

³¹Chequie bee bene enu nzeli arqui' Jesucristo enu nucua'a lu iliu Judea, cuna lu iliu Galilea, cuna lu iliu Samaria, uyu'u nú nzuxe arqui'beella, cuna nú nze ri'ilá beella beya' xa neca inziu' Diöse,

nu uzucu'beella stichia'nu, nu cuna elietsa' Espíritu Santo nze aca huaxilá bee bene enu nzeli arqui' Jesucristo.

Uyeca' Eneas

³²Chenu nzebilya Pedro bee bene enu nzeli arqui' Jesucristo, chequie le'ca uyabi'yalla bee bene enu nzeli arqui' Jesucristo enu nucua'a eyeche nú lee Lida. ³³Ze'e ulañi' Pedro tucu niyu enu riti enu lee Eneas, nu ungala xunu lana nú nuxulla ritilla, nu la tsulílla. ³⁴Nu uni Pedro lulla:

—Eneas, Jesucristo neca enu uri'iyecala li'ilu. Uzetee nu uletsa nú ungutalu.

Nu hora ze'e utsuli Eneas.

³⁵Chenu ulañi' ye bee bene enu nucua'a eyeche nú lee Lida cuna bee bene enu nucua'a enza Sarón nú uyeca'lla, che le'ca uchili arqui' bee bene ze'e Jesucristo.

Uhuañi zeca Dorcas nú ungutilla

³⁶Tiambu ze'e nzucu tucu una'a enu nzeli arqui' Jesucristo eyeche Jope li'illa leella Tabita, nu dialu griego leella Dorcas. Una'a quie' uri'illa nú neca nze'ca, nu le'ca uri'illa elietsa lubee bene elitsi.

³⁷Bee bichia ze'e ungariti Dorcas nu ungutilla, nu chenu ulaxu nú ungutsa bee bene li'illa uya ricuche'e bee bene li'illa liñi ni'i elu aya equie ni'i ze'e. ³⁸Nu lunú axu eyeche Jope lu eyeche Lida, elu nzucu Pedro, chenu ungabiya' bee bene enu nzeli arqui' Jesucristo nú nzucu Pedro ze'e, uxe'la beella chiucu niyu enu uya ziquiee lulla, nu unibeella lulla:

—Uri'i faura yexetsia ucha eyeche Jope.

³⁹Nu chu nza Pedro cuna li'ibeella. Chenu uriña beella eyeche Jope, unguya'beella Pedro liñi ni'i elu nchiucu' cuerpo' Dorcas, ze'e nucua'a bee una'a zaqui runa' beenchu, che uyabica beenchu lu Pedro nu ulube' beenchu bee laquie nú ureche'e Dorcas chenu nehuañisca'lla. ⁴⁰Chequie unibiya' Pedro nú chiu'u ye bee bene eli'ya', nu chu utsulliquilla nu unacu'lla lu Diose, nu ubi'yalla lu benenguti ze'e nu unilla:

—iTabita, uzetee!

Hora ze'e chu uya'la i'cululla, nu chenu ulañi'lla Pedro, chu uzuculla.

⁴¹Nu chu una'tse Pedro yalla nu utsulílla, che ubixia Pedro bee bene enu nzeli arqui' Jesucristo, cuna bee una'a zaqui para nú lañi' beella nú uhuañi zeca Dorcas lu eluti.

⁴²Nu diqui lu eyeche Jope ungabiya' bee bene nucua', nu huaxi bee bene ze'e uyalí arqui' Jesucristo equie cuenda' nucua'. ⁴³Uya'na Pedro chiucu chuna bichia eyeche ze'e, ni' tucu bene enu lee Simón enu rcu'chi iti.

Pedro cuna Cornelio

10 Eyeche Cesarea uhuañi tucu bene enu lee Cornelio, li'illa ungalla capitañi lu texcua'a bee sundado enu lee Italiano. ²Li'illa ungalla tucu bene enu chiqui' unga nze'ca arqui' lu Diose, nu cuna ye bee bene'lla udete' beella ula'na lu Diose. Le'ca uri'illa elietsa lubee bene Israel enu seca elitsi, nu siempre rnacu'lla lu Diose. ³Tucu bichia, tucu rquiechuna

uchee, ulle'calla xi neca nú uni xcala'lla. Chee nze'ca ulañi'lla nú uyu'u tucu ángele' Diose liñi ni'i elu nzuculla, nu uni ángele ze'e lulla:

—iCornelio!

⁴Nu ubi'yallilla lu ángele ze'e nu chiqui' ulliquilla, nu unilla:

—¿Rnilu lua la Detá?

Nu uni ángele ze'e lulla:

—Diose ubene'la' stichia'lu, nu ulañi'la'nu xa rri'ilu elietsa lubebe bene enu seca elitsi. ⁵Uxe'la bee bene eyeche Jope para nú chetucu beei Simón, enu le'ca lee Pedro.

⁶Nzuculla ni' tucu bene enu le'ca lee Simón, enu rcu'chi iti, nzucu bene quie' ru'u inzatu'.

⁷Chenu nzia ángele enu uni lu Cornelio, ubixialla chiucu moso'lla cuna tucu sundado enu rlu'culla confianza lu enu nzeli arqui' Diose.

⁸Chenu ulaxu nú udixiule'ella lunú ulle'calla lubeella, che uxe'lalla li'ibeella eyeche Jope.

⁹Bichia rrucu, diquila nú nzeriña beella axu eyeche Jope, tucu rrebichia uquie Pedro equie ni'i elu nzuculla para nú nacu'lla lu Diose.

¹⁰Chiqui' rlia'na'lla nu niarqui'lla nú aculla, pero diquila nú rri'ilu bene elubacu nú aculla, che ulle'calla xi neca nú uni xcala'lla,

¹¹nu ulañi'lla nú ria'la liñibe nu nze'ta laca nú rnaa xi rnaa tucu laquie llene lulla, nu naca'cuu dacu lli'i. ¹²Liñi laquie llene ze'e nu' yelu bee nañi enu tacu cuchiu', cuna bee be'la cuna bee nañi enu rcuecu'.

¹³Chequie ubene'lla tucu chii nú uni lulla:

—Pedro, uzetee, nu uti tatse nañi cua' aculu.

¹⁴Nu ucuinqui Pedro nú unilla:

—A'a, Detá, xne leca xunga udacua beenú necha rnaa, cuna beenú la yala acu bee bene.

¹⁵Chequie uni zeca chii ze'e, stucu bese lulla:

—Lunú uquieela Diose, la hualeelu nucua' nú necha rnae.

¹⁶Chenu ulle'calla scua chuna bese, uquie zeca laquie llene ze'e liñibe.

¹⁷Diquila nú rri'i Pedro elliebacu' xinu ulañi'lla nucua', hora ze'e uriña bee bene enu uxe'la Cornelio ru'u puerta ni'i Simón, xne unidichia'la beella cá nzucu ni' Simón. ¹⁸Chenu uriñabeella ru'u ni'i ze'e, unidichia' beella tunu ze'e nzucu Simón, enu le'ca lee Pedro. ¹⁹Rri'isca' Pedro elliebacu' lunú ulañi'lla scua, che uni Espiritu Santo lulla:

—Chuna bene rla'na li'ilu. ²⁰Utsuli, ulaca, nu uquia cuna li'ibeella nu la za' arqui'lu, xne li'á uxe'la li'ibeella.

²¹Nu chu ulaca Pedro elu nucua'a bee bene enu uxe'la Cornelio, nu unilla lubeella:

—Li'á neca enu rla'nahua, ¿xinu rla'nahua li'á?

²²Nu ucuinqui beella:

—Li'iru nzelarú lu cuenda' capitañi enu lee Cornelio, enu neca tucu bene nze'ca, enu rlu'cu ula'na lu Diose, nu ye bee bene Israel seca li'illa. Tucu ángele' Diose uni lulla nú uxe'lalla li'iru para nú nzela tucu'ru li'ilu nú chalu ni'lla para nú yene'lla lunú nilu lulla.

²³Che uni Pedro lubeella nú chu'u beella liñi ni'i, nu ze'e uya'na beella rula' ze'e. Chenu uye'e luyuu stucu bichia, nzenu Pedro li'ibeella, nu le'ca nzenu beella chiucu chuna bee bene enu nzeli arqui' Jesucristo enu neca bene eyeche Jope.

²⁴Chenu uye'e lu yuu stucu bichia uriña beella eyeche Cesarea, elu nzucu Cornelio nu li'illa uquiete'sa'lalla ye bee bene'lla cuna bee bene enu chiqui' rquiete'lla nucua'aquiee beella nú riña Pedro. ²⁵Chenu uriña Pedro ru'u ni' Cornelio, chu uchiu'u Cornelio nu uya cha'calulla li'illa, nu utsulliquilla lu Pedro para nú dete'lla ula'na lulla. ²⁶Nu utsuli Pedro Cornelio, nu unilla lulla:

—Utsuli, xne necatsia bene tucu nú necalu.

²⁷Diquila nú nze riña beella ru'u ni'lla rdichia' beella, nu chenu yuu'u Pedro liñi ni'lla ulañi'lla nú nucua'a huaxi bee bene ze'e.

²⁸Chequie uni Pedro lubeella:

—Li'ihua nediya'hua nú xa neca ley' bee bene Israel la tsana' ley' beella nú yete' beella cuna bee bene enu la neca bee bene Israel, ni' nú chu'u beella liñi ni' bee bene ze'e. Pero Diose uzete' li'á nú la hualeea nú necha neca lu cuenda' ni' tucu bee bene, ni' nú ri'a elliebacu' nú necha neca lu cuenda' beei. ²⁹Enze'e, chenu ubixiahua li'á, chu nzela sin nú nia nú la llucha. ¿Nee, niarquia ri'á beya' xi rixiahua li'á?

³⁰Che uni Cornelio lulla:

—Necala tucu tacu bichia le'ca hora quie', nzucua'a nia sin nú acua equie nú rnacua lu Diose, tucu rquiechuna uche, tu'natsia ulube'lu tucu niyu enu nutu laquie nú rulu siqui' lua. ³¹Nu unilla: “Cornelio, Diose ubene'la' stichia'lu, nu ulañi'la'nu lunú xa rri'ilu elietsa lubee bene enu seca elitsi. ³²Enze'e uxe'la bee benea eyeche

Jope, chetucu Simón, enu le'ca lee Pedro. Nzuculla ni' tucu bene enu lee Simón, enu rcu'chi iti enu nzucu ru'u inzatu'. Pedro quie' ni xi riala ri'ilu.” ³³Enze'e chu uxe'la bee bene enu ube'ta tucu li'ilu, nu uri'inze'calu nú uriñalu. Nu nee nellua'a yeru ca'a lu Diose liñibe para nú yene'ru lunú uxe'la Diose li'ilu nú nilu luru.

Lunú uni Pedro ni' Cornelio

³⁴Chequie uquixie Pedro nú unilla:

—Nee, rri'á beya' nú tucutse rri'i Diose lu ye bee bene, nu la cañinu bee bene. ³⁵Xne tatse bee bene iliulabe enu sucu' Stichia' Diose nu rri'illa tucu nú rialane, li'inu le'ca rri'i casonu bene ze'e. ³⁶Diose unila lubee bene Israel, nu u dixiule'elanu lubeella nú equie cuenda' Jesucristo lu'cu beella nú nzuxe arqui'beella, li'inu enu rnibiya' lu ye bee bene. ³⁷Nu li'ihua nediya'hua nú lulá nú uzete' Juan Bautista bee bene equie cuenda' elurrinza, che uquixie Jesuse nú uzete'nu bee bene desde Galilea, hasta lubee iliu Judea. ³⁸Li'ihua nediya'nze'cahua nú udete'la Diose Espíritu Santo cuna poder lu Jesuse Nazaret, cuna nú uyanzeno nu uri'inu nú neca nze'ca nu uri'iyecanu ye bee bene enu nehuana seca lunú rri'i beze'lu. Uri'inu nucua' xne nzu Diose cuna li'inu. ³⁹Nu li'iru ulañi'ru lu ye nú uri'i Jesuse diqui lu iliu Judea, cuna eyeche Jerusalén. Cheela unguuti bee bene li'inu, lu cruse. ⁴⁰Pero uri'i

Diose nú uhuañi zecanu bichia rriuna, nu utsana' Diose nú ulube'lunu luru. ⁴¹Né lube'lunu lu ye bee bene, ulube'lutsianu luru enu ucañila Diose hasta hua'tu para nú ulañi'ru ye nú uri'ínu. Li'iru uda'cunuru li'ínu nu udiya'nuru li'ínu chenu uhuañi zecanu nú ungotinu. ⁴²Lu ze'ela uxe'la Jesuse li'iru para nú dixiule'eru stichia'nu lubee bene, nu udu' Diose li'ínu para nú hualunue lu cuenda' bee bene chenu dete' beei cuenda lu Diose, sia bee bene enu nehuañi, urre sia bee bene enu ungoti. ⁴³Le'ca hasta hua'tu, ye bee profeta uni lu cuenda' Jesuse, nu ye bee bene enu chili arqui' li'ínu ri'ínu perdona stula beella.

Uyucu bee bene enu la neca bee bene Israel Espíritu Santo

⁴⁴Rniscalá Pedro lubee bene ze'e, chenu tu'natsia uyucu arqui'beella Espíritu Santo. ⁴⁵Chequie bee bene Israel enu nzeli arqui' Jesucristo enu uyanu Pedro, chiqui' uyanu arqui'beella xne le'canuu bee bene enu la neca bee bene Israel uyucu arqui'beella Espíritu Santo. ⁴⁶Xne ubene'beella nú rni bee bene ze'e stucu bee dialu rene, nu rnibeella bedichia' nze'ca lu Diose. ⁴⁷Chequie uni Pedro lubeella:

—¿Ti cá nú rinza bee benequie' xne uyucula arqui'beella Espíritu Santo tucu nú uyucu arquia'ahua Espíritu Santo?

⁴⁸Nu unibiya' Pedro nú rinza beella lunú lee Jesucristo. Cheelá uziquie beella lu Pedro nú ya'nalla cuna li'ibeella xiucu xuna bichia.

Udixiule'e Pedro nú le'ca nuu bee bene enu laca bee bene Israel uyucu arqui' Espíritu Santo

11 Bee apóstol cuna bee bene Judea enu nzeli arqui' Jesucristo, ubene'beella nú le'ca nuu bee bene enu la neca bee bene Israel uchili arqui'beella Stichia' Diose. ²Chequie chenu ubenchila' Pedro eyeche Jerusalén, bee bene Israel enu nzeli arqui' Jesucristo enu nzequiesca' ley, uqui'ya' Pedro uri'ibeella. ³Nu unibeella lu Pedro: —¿Xinu uyalu ni' bee bene enu la neca bee bene Israel, nu udacunulu li'ibeeli?

⁴Chequie uni Pedro lubeella lu ye nú unga, enze'e uyalla ni' bene ze'e, nu unilla:

⁵—Chenu nzua eyeche Jope, nu rnacua lu Diose, che ulle'ca xi neca nú uni xcala'a, nu ulañia nú rnaa xi rnaa tucu laquie llene, nú nze'ta laca enza liñibe nu naca'cuu dachu lli'i nu uriñae hasta elu nzua. ⁶Chequie ubi'ya nze'ca xi nu' liñi laquie llene ze'e, nu ulañia bee nañi dañi enu nelachi, cuna bee nañi enu nzucu tacu cuchiu', cuna bee be'la cuna bee nañi enu rcuecu'. ⁷Nu ubenea tucu chii nú uni:

“Pedro, utsuli, uti tatse bee nañi cua' aculu.” ⁸Che ucuaquia: “A'a, Detá, xne leca xunga udacua beenú necha rnaa lunú la yala acu bee bene.”

⁹Nu uni zeca chii ze'e lua stucu bese desde liñibe: “Lunú uquieela Diose la hualeelu nucua' nú necha rnaa.” ¹⁰Chenu unga nucua' chuna bese, che uquie zeca ye bee nucua' liñibe. ¹¹Le'ca hora ze'e uriña chuna bee niyu elu nzucua'a,

nze'ta bee bene quie' desde eyeche Cesarea nze'ta la'na beella li'á.

¹²Nu uni Espíritu Santo lua nú chenua li'ibeella sin nú za' arquia. Le'ca uya'nua xu'cu bee sa'ahua enu nucua'a ca'a. Nu yeru uyu'uru liñi ni'i bene ze'e, ¹³chequie uni bene ze'e luru nú xa ulube'lu tucu ángele' Diose lulla ni'lla, nu uni ángele ze'e lulla: "Uxe'la bee bene enu cha eyeche Jope para nú chetucu beella Simón enu le'ca lee Pedro, ¹⁴li'illa nilla lulu xa tsila'alu, cuna ye bee bene ni'lu lu stula beella." ¹⁵Chenu uquixia nú unia lubeella, che uyucu arqui'beella Espíritu Santo, tucu nú ungae chenu uyucu arqui'rune.

¹⁶Chequie ullu'cu' arquia bee stichia' Jesucristo chenu uninu: "Neli nú urinza Juan bee bene cuna inza, pero li'ihua rinzahua cuna Espíritu Santo." ¹⁷Nu nee nú uxe'la Diose Espíritu Santo nú uyucu arqui' beella tucu nú uyucu arquia'ahua chenu uyalí arquia'ahua Jesucristo, ¿enze'e ti necaa para nú cáa lunú rri'i Diose?

¹⁸Chenu ubene' bee bene Jerusalén bedichia' cua', che né nia' beella lu Pedro, nu unibeella bedichia' nze'ca lu Diose, nú unibeella:

—iNee nediya'ahua nú le'ca nuu bee bene enu la neca bee bene Israel udete' Diose nú che'e arqui'beella equie cuenda' stula beella nu lu'cu beella elunehuañi nú leca xunga laxu lu Diose!

Uchili arqui' bee bene eyeche Antioquía Jesucristo

¹⁹Lulá nú unguuti bee bene Esteban, che uquixiebee ni' nú

rtiliaca' beei bee bene enu nzeli arqui' Jesucristo, nu uri'chia letse bee bene'nu enza Fenicia, cuna enza Chipre cuna enza Antioquía. Nu ze'e udixiule'e beella bedichia' nze'ca' Jesucristo lubee bene Israel tsia. ²⁰Pero leta beella nchiñi chiucu chuna bee bene eyeche Chipre cuna bene eyeche Cirene, chenu uriña bee benequie' eyeche Antioquía udixiule'e beella bedichia' nze'ca' Jesucristo lubee bene enu la neca bee bene Israel. ²¹Diose uri'i elietsa lubeella, che huaxi bee bene uyalí arqui' lunú rnibeella, nu uyalí arqui'beella Jesucristo.

²²Chenu ungabiya' bee bene enu nzeli arqui' Jesucristo eyeche Jerusalén nucua', uxe'la beella Bernabé hasta eyeche Antioquía. ²³Chenu uriñalla ze'e, chiqui' ñia utsu arqui'lla chenu ulañi'lla nú xa rri'i Diose elietsa lubee bene ze'e. Chequie unilla bezete' lubeella nu diquinu' arqui'beella chequiee beella stichia' Jesucristo. ²⁴Bernabé unga tucu bene nze'ca, chiqui' uri'i Espíritu Santo elietsa lulla nu neli nzeli arqui'lla Jesucristo. Enze'e huaxi bee bene uyalí arqui' Jesucristo.

²⁵Lu ze'elá uya Bernabé eyeche Tarso nzecua'nalla Saulo, nu chenu ullela'lla Saulo che unguya'lla li'illa eyeche Antioquía. ²⁶Ze'e ucu'a' beella tucu lana cuna bee bene enu nzeli arqui' Jesucristo, nu uzete' beella huaxi bee bene. Nu eyeche Antioquía neca elu uquixie nú uhualee bee bene cristiano bee bene enu nzeli arqui' Jesucristo.

²⁷Bee bichia ze'e chiucu chuna bee profeta enu rni Stichia' Diose

uchiu'u beella eyeche Jerusalén para nú nzuebeella eyeche Antioquía. ²⁸Tucu beella enu lee Agabo, utsulílla lubee bene, nu equie cuenda' Espíritu Santo unilla nú aca biña diqui lu iliulabe, nu scua ungae lana nú unibiya' arre Claudio. ²⁹Chequie bee bene enu nzeli arqui' Jesucristo enu nucua'a eyeche Antioquía, unibeella nú quiete'sa'beella dimi calutse nú nu' modo dete' cada tucua beella para nú ri'i beella elietsa lubee sa'beella enu nzeli arqui' Jesucristo enu nucua'a lu iliu Judea. ³⁰Nu scua uri'ibeella, che uxe'la beella dimi ze'e cuna Saulo cuna Bernabé para nú dete' beella dimi ze'e ya bee bene enu rnibiya' lubee bene enu nzeli arqui' Jesucristo, lu iliu Judea.

**Udu' bee bene Pedro ni'cu'
nu unguutibeei Jacobo**

12 Bee bichia ze'e uquixie arre Herodes nú uri'illa nú nehuana ulle'ca chiucu chuna bee bene enu nzeli arqui' Jesucristo. ²Nu unibiya'lla nú ungoti Jacobo bichi Juan cuna espada. ³Nu chenu ulañi' Herodes nú riu' arqui' bee bene Israel lunú uri'illa, che unibiya'lla nú una'tse bee bene Pedro. Nucua' unga bee bichia liñi nú racu bee bene Israel pá nú la nucha levadura. ⁴Chenu una'tse bee bene Pedro nu udu' beei li'illa ni'cu'. Che unibiya' arre Herodes lu tacu textcua'a bee sundado para nú ri'i ucu beei ru'u ni'cu', cada textcua'a bee sundado ze'e neca tacu beei. Xne uri'illa elliebacu' nú dete'lla Pedro lubee bene eyeche ze'e chenu dete eliñi baxcu. ⁵Enze'e uri'i ucu

beei Pedro chenu nchiñilla ni'cu', pero ye bee bene enu nzeli arqui' Jesucristo la tsuxe beella nú siquiee beella, cuna nú rnacu' beella lu Diose equie cuenda'lla.

Uhua Diose Pedro ni'cu'

⁶Le'ca rula' ze'e chenu uye'e luyuu stucu bichia para nú lube' Herodes Pedro lubee bene eyeche ze'e, ra'tse Pedro nuxu labe chiucu bee sundado, nu naca'culla cuna chiucu cadena, nu textcua'a bee sundado rriucu ru'u ni'cu'. ⁷Nu tu'natsia uriña tucu ángele' Diose nu uyu'ullie'e liñi ni'cu'. Nu chu ucuñi ángele ze'e cue'tse Pedro para nú huañilla, nu uni ángele ze'e lulla:

—Yexetsia uzetee.

Hora ze'e uzana' cadena nú naca'cuu ya Pedro. ⁸Nu uni ángele ze'e lulla:

—Ulli'cacuuta' xla'culu nu uquie'e luculu. Chenu uri'i Pedro scua, che uni ángele ze'e lulla:

—U'tu' capa'lu nu utequiee li'á.

⁹Nu chu uchiu'u Pedro nzequiee ángele ze'e, pero la ri'illa beya' tunu neli nú rri'i ángele ze'e. Xne secalla nú rnitsia xcala'lla. ¹⁰Nu udete beella lu textcua'a bee sundado, cheelá udete beella lu textcua'a bee sundado, chenu uriñabeella ru'u puerta ni'cu' para nú chiu'u beella ru'u inziu, e'cu puerta ze'e uya'lane. Nu uchiu'u beella, nu chenu uriñabeella squiña inziu ze'e, ze'e utsana' arqui' ángele ze'e Pedro.

¹¹Chequie uri'illa beya' nú neli lunú secalla scua, nu unilla:

—Nee nediyaa nú uxe'la Diose ángele'nu para nú utsila'anu li'á lu

Herodes, cuna lu ye nú niarqui' bee bene Israel ri'inu li'á.

¹²Chenu uri'i Pedro beya' nú necane scua, che chu nzalla ni' María, na' Juan, enu le'ca lee Marcos, elu nucua'a huaxi bee bene neyete' sa' rnacu' lu Diose.

¹³Chenu uchichi Pedro ru'u puerta, che uchiu'u tucu una'a e'ne enu lee Rode para nú nzebilyanchu ti enu xichi ze'e. ¹⁴Pero chenu uyulunchu chi Pedro, chiqui' ñia utsu arqui'nchu, che luhuare nú xa'lanchu ru'u puerta chu'ulla a'la uyecaxu'unchu uya tixiule'enchu nú Pedro nzu ru'u puerta. ¹⁵Nu uni bee bene ze'e lunchu:

—¡Ichia lucu secalu!

Pero chiuca utsuta' Rode nú neli nú necalla Pedro. Nu uni beella lunchu:

—Laca li'illa, talabese neca nucua' ángele enu rri'i elietsa lulla.

¹⁶Pero chu xichila Pedro ru'u puerta, chequie chenu uxa'la beella ru'u puerta, hasta ulliqui beella chenu ulañi'beella li'illa. ¹⁷Nu uri'i Pedro seña lubeella nú zaca beella, che udixiule'ella nú xa uhua Diose li'illa ni'cu', nu unilla lubeella:

—Scua udixiule'ehua lu Jacobo, cuna lu ye bee bene enu nzeli arqui' Jesucristo.

Cheelá uchiu'ulla nu nzalla stucu luhuare.

¹⁸Chenu uye'e luyuu, ni' la ri'i bee sundado beya' xa ri'ibeei xne né acabiya' beei xa uchiu'u Pedro ni'cu'. ¹⁹Chequie unibiya' Herodes nú checua'na bee sundado Pedro, pero ne llela' beei li'illa. Chenu ulaxu nú unidichia' Herodes lubee sundado xa unga nú uchiu'u

Pedro ni'cu', unibiya'lla nú ati bee sundado ze'e. Che uchiu'u Herodes Judea nu nzalla eyeche Cesarea zuculla.

Unguti Herodes

²⁰Ulee Herodes lubee bene eyeche Tiro cuna lubee bene eyeche Sidón, pero unga tucu necatse bee bene ze'e para nú che nibeei lulla. Nu chenu uri'ibeei ana nú rquiete' beei bene enu lee Blasto, tucu bene' arre Herodes, che uni Blasto ze'e lu cuenda' beei lu arre Herodes nú la ria'lla xu cuna li'ibeei, xne li'illa rnibiya'lla diqui bee luhuare elu nze'ta bee elubacu nú racubeei.

²¹Chequie utsa'na Herodes tucu bichia nú bedichia'nnulla li'ibeei, chenu uri'ña bichia ze'e ungutulla xucu fiñulla, nu uzuculla lu xleta elu rnibiya'lla nu uquixiella nú unilla lubeei. ²²Che uquixie bee bene ze'e nú urixialibeei nú unibeei:

—iTucu diose neca enu rni, nu la ni tucu bene!

²³Hora ze'e uri'i tucu ángele' Diose nú unga riti Herodes, udacu bee berecu' li'illa nu ungutilla. Xne uyu'u arqui' Herodes nú zucu' ayaá bee bene li'illa, luhuare nú zucu' ayaalla Diose.

²⁴Pero Stichia' Diose chu nze ri'chia letsela diqui bee luhuare, nu diqui bee luhuare chu nze dalalá bee bene enu nzeli arqui' Jesucristo.

²⁵Chequie chenu ula'xu Bernabé cuna Saulo lunú riala ri'ibeella eyeche Jerusalén, ubenchila' beella eyeche Antioquía cuna Juan, enu le'ca lee Marcos.

Bese rluti nú yya Bernabé cuna Saulo nu udixiule'e beella Stichia' Diose

13 Leta bene' Jesucristo enu nucua'a eyeche Antioquía nucua'a bee profeta, cuna bee ulaxcuela enu udixiule'e Stichia' Diose. Leta beella nzu Bernabé, Simón (enu le'ca lee enu natsa), cuna Lucio enu neca bene eyeche Cirene, cuna Saulo cuna Manaén (enu tucutse uru'cunu arre Herodes enu unibiya' Galilea). ²Tucu bichia nú né acu beella diqui nú rnacu' beella lu Diose, che uni Espíritu Santo lubeella:

—Ucañihua Bernabé cuna Saulo para nú ri'ibeella riña' nú niarquía nú ri'ibeella.

³Chenu ulaxu nú udete'beella bichia nú la acu beella, diqui nú rnacu' beella lu Diose, chu uricu' beella ya beella equie Bernabé cuna Saulo para nú ri'i Diose elietsa lubeella, nu uni bee bene ze'e lubeella chenu nziue beella.

Udixiule'e Bernabé cuna Saulo Stichia' Diose lu iliu Chipre

⁴Che uxe'la Espíritu Santo Bernabé cuna Saulo lu eyeche nú lee Seleucia. Nu ze'e uyu'u beella liñi barco nu nzuella luyuu nú lee chipre nú netse lu inzatu'. ⁵Chenu uriña beella lu iliu Chipre, chequie eyeche Salomina uquiexie beella nú rixiule'e beella Stichia' Diose liñi indu' bee bene Israel enu nucua'a ze'e, le'ca unguya' beella Juan para nú ri'illa elietsa lubeella. ⁶Chenu nzuebeella diqui lu iliu Chipre, che uriña beella eyeche nú lee Pafos, eyeche ze'e uchu'u beella tucu

bene Israel enu lee Barjesus, li'illa necalla tucu uliñi nu sequienulla bee bene nu rnilla nú necalla tucu profeta' Diose. ⁷Barjesus quie' neca bene' Sergio Paulo enu neca gobernador lu iliu Chipre, nu chiqui' recalla. Unibiya'lla nú ye'ta Bernabé cuna Saulo, xne niarqu'illa nu yene'lla Stichia' Diose. ⁸Pero uliñi quie' dialu griego leella Elimas, niarqu'illa nú cálla nú chili arqui' Sergio Paulo Stichia' Diose. ⁹Chequie Saulo enu le'ca lee Pablo, chiqui' nzu Espíritu Santo cuna li'illa, nu ubi'yalílla lu Elimas, ¹⁰nu uni Pablo lu Elimas:

—iLli'ñi beze'lu lee, puro eluquichia' rnilu, nu puro lunú necha neca rri'ilu, ni' tucu nú neca nze'ca la yu' arqui'lu! ¿Hasta xunga tsana'lu nú chequiee bee bene inziu' Diose nú neli neca? ¹¹Nee dete' Diose castiya li'ilu nu quie' lulu, nu la bi'ya'lu ellie'e bichia tucu tiambu.

Hora ze'e ucabelí lu Elimas nu la biya'illa nu rla'nalla enu na'tse yalla, xne la bi'ya'lla. ¹²Chenu ulañi' gobernador Sergio Paulo nucua', uchili arqui'illa stichia' Jesucristo. Nu chiqui' uyanuu arqui'illa equie cuenda' stichia' Jesucristo nú sete' beella.

Uriña Pablo cuna Bernabé lu iliu Pisidia

¹³Chequie Pablo cuna bee bene enu nuulla uyu'u beella liñi barco eyeche Pafos nu nzuebeella enza lu eyeche Perge nú nchiucu' lu iliu Panfilia. Ze'e utsa'na Juan Marcos li'ibeella nu ubenchila'lla eyeche Jerusalén. ¹⁴Lu ze'elá uchiu'u beella eyeche nú lee Perge nu nzuebeella

eyeche Antioquía nú nchiucu lu iliu Pisidia. Chenu uriña bichia nú sulachi bee bene Israel, uyu'u beella liñi indu' beei nu chu uzucu beella liñi indu ze'e. ¹⁵Chequie chenu ulaxu nú ungula bene lu ichi' nú uquie'e Moisés cuna beenú uquie'e bee profeta, bee bene enu rnibiya' liñi indu ze'e unibeei lu Pablo cuna lu Bernabé:

—Tunu nu' nú niarquihua nihua para nú nihua bezete' lubee bene nu' modo nihuane nee.

¹⁶Che utsuli Pablo nu uri'illa seña lubeella nú zaca beella, nu unilla lubeella:

—Bee bene Israel, cuna yehua bee enu rcua'na nú huañi tucu nú niarquí' Diose, uquie'e diacahua nú nia luhua. ¹⁷Diose'ahua lia'ahua enu neca bee bene Israel, li'inu ucañinu bee bene'ahua enu udetela, nu uri'inu nú udala beella nu unga huaxi beella chenu ucua'a beella xi neca bee bene rene Egipto, chequie cuna poder'nu uhuanu li'ibeella Egipto. ¹⁸Nu uriqui' Diose li'ibeella lunú uri'ibeella diqui chiu'a lana chenu ucua'a beella lu dañi achi, ¹⁹nu unitilu Diose achi bee nación nú uricu lu iliu Canaán para nú udete'nu yuu ze'e lubee bene'ahua enu udetela. ²⁰Nucua' unga diqui tacu ayu'u arula' lana, cheelá udu' Diose bee juece para nú nibiya' lubeella. Nu profeta Samuel unga último juece lubeella. ²¹Cheelá unacu' beella nú chu'u tucu arre enu nibiya' lubeella, che ucañi Diose arre Saul para nú nibiya' lubeella diqui chiu'a lana, li'illa ungalla liana' bene enu lee Cis,

enu nze'ta leta famili' Benjamin. ²²Nu chenu ungti arre Saúl, che ucañi Diose arre David, nu uninu: “Ulañilá nú David, liana' Isaí nehuañilla tucu nú niarquía, nu li'illa ri'illa lu ye nú niarquía nú ri'illa.” ²³Nu nee, tucu nú uni Diose nú le'ca leta bee famili' arre David quie' uchiu'u Jesuse enu uxe'la Diose para nú tsila'anu bee bene Israel lu cuenda' stula beella. ²⁴Ante nú riña Jesuse, udixiule'e Juan Bautista lu ye bee bene Israel nú rqui'ña nú che'e arqui'bee lu stula beei, nu rinza beei. ²⁵Nu chenu nze'ta axula nú ati Juan, unilla: “La necá Cristo tucu nú nzeli arqui'hua. Pero chenu riñanu ni' lucunu la yala nú hua xne máse neca equienu luquela li'á.”

²⁶Nee ye'ahua enu nzela'ahua lubee famili' Abraham, cuna yehua enu rcua'na nú huañihua tucu nú niarquí' Diose para lia'ahua neca stichia'nu nú rixiule'e nú xa tsila'a Jesucristo lia'ahua lu cuenda' dula. ²⁷Pero bee bene eyeche Jerusalén cuna bee usticia' beella lá chulubeella Jesucristo tucu nú riala nú chulu beella li'inu nu le'ca la ri'ibeella beya' xi rni Stichia' Diose nú uquie'e bee profeta nú rula beella liñi indu bichia nú sulachi beella nu le'ca li'ibeella ungti beella Jesucristo. Nu scua uyalu tucu nú niquie lu ichi' Stichia' Diose. ²⁸Añinzuca nú lecaxi equiya ulu'cu Jesucristo, pero unite'ca beei lu Pilato nú unibiya'lla nú ungtinu. ²⁹Chenu ulaxu luye nú uri'inubeella li'inu tucu nú

nequiee lu ichi' Stichia' Diose equie cuenda'nu. Che uya bee bene enu ulaca cuerpo'nu lu cruse nu uyaca'chi' beella cuerpo'nu. ³⁰Pero uri'i Diose nú uhuañi zecanu. ³¹Nu huaxi bee bichia ulube'lunu lubee bene enu uyanzenu li'inu chenu uchiu'unu Galilea nu nzanu Jerusalén, nu nee neca bee bene ze'e enu rixiule'e equie cuenda'nu lubee bene.

³²'Enze'e, li'iru le'ca rixiule'eru bedichia' nze'ca cua' luhua tucu nú ucuaqui u'na Diose lubee bene'ahua enu udetela. ³³Li'inu utsa'alulanu nucua' lua'ahua nu nzela'ahua leta famili' beella, utsa'alunu stichia'nu chenu uhuañi zeca Jesuse, tucu nú niquie lu salmo rruclu elu rni: "Li'ilu necalu Lli'ñia nu desde nee rlu'culu nú rnibiya'lu tucu nú rnibiya'a." ³⁴Diose uni nú ri'inu nú huañi zeca Jesucristo, nu leca' xunga atinu tucu nú niquie lu ichi' Stichia' Diose elu rni: "Li'á ri'á nú cha nze'ca lu cuenda'hua tucu nú ucuaqui u'naa lu David." ³⁵Nu le'ca nu' stucu parte lu ichi' stichia'a elu rni: "Li'ilu la tsana'lu nú uchu cuerpo' Lli'ñilu enu la lu'cu dula." ³⁶Nee, bedichia' quie' la nine equie cuenda' David, xne chenu ulaxu nú unibiya'lla lubee sa'lla tucu nú uni Diose lulla nú nibiya'lla tiembu ze'e, chequie ungutilla nu uhuachi'lla nu unguchu' cuerpo'lla. ³⁷Pero cuerpo' Jesucristo enu uri'i Diose nú uhuañi zeca, lá uchu cuerpo'nu. ³⁸Enze'e bee sa'a, rixiule'eru luhua para nú ri'ihua

beya' nú equie cuenda' li'inu nu' nú rri'i Diose perdona stula'ahua. ³⁹Ye bee bene enu nzeli arqui' Jesucristo neca perdonala ye stula beella nú leca modo nú aca perdona, añinzuca nú uri'ibeella tucu nú rnibiya' ley nú udete' Diose lu Moisés. ⁴⁰Enze'e ubi'yahua li'ihua para nú la zecahua tucu nú uquie'e bee profeta, chenu uquie'e beella nú unibeella:

⁴¹ Uzu'cu' diacahua li'ihua enu sequichia' stichia'a.
Uyanu arqui'hua nú unitiluhua,
xne bee bichia nú nehuañihua ri'á beenu hasta li'ihua la chili arqui'hua, añinzuca nú nu' bee enu, ixiule'e bee nucua' luhua.

⁴²Chenu uchiu'u Pablo cuna Bernabé liñi indu' bee bene Israel ze'e, nu bee bene enu la neca bee bene Israel uziquiee beei lu Pablo para nú chenu riña zeca bichia nú sulachi bee bene Israel cha zecalla ixiule'ella tucu nú unilla lubeei bichia ze'e. ⁴³Chenu uchiu'u bee bene liñi indu ze'e huaxi beella uyaquie Pablo cuna Bernabé, sianu neca beella bee bene Israel urre bee bene rene enu rlu'cu ula'na lu Diose, tucu nú rlu'cu bee bene Israel ula'na lu Diose. Nu uni Pablo cuna Bernabé lubeella nú tsúta' arqui'beella lunú nziquie beella inziu' Diose li'inu enu seca li'ibeella.

⁴⁴Chenu ulaxu xmana, bichia nú sulachi bee bene Israel, casi ye bee bene eyeche ze'e uyetes'a'beei para nú ubene' beei Stichia' Diose. ⁴⁵Pero chenu ulañi' bee bene

Israel bee beneañi enu neyete'sa' ze'e, chequie uyee arqui'beei nu uquixiebeei nú se'ta beei nú rnibeei bedichia' nú necha necha lu Pablo. ⁴⁶Chequie sin nú lliqui Pablo cuna Bernabé ucuauqui beella lubeei nú unibeella:

—Rlutilá luhua riala nú dixiule'eru bedichia' nze'ca' Diose, li'ihua enu necha bee bene Israel, pero nee la niarqui'hua nú yene'huane, chequie le'catsia li'ihua rri'ihua nú la yalahua elu nehuañi nú leca xunga laxu lu Diose. Nu nee nze tixiule'eru bedichia' nze'ca cua' lubee bene enu la necha bee bene Israel. ⁴⁷Xne scua unibiya' pa'ru Diose chenu uninu tucu parte lu stichia'nu elu rni:

Udu'a li'ilu xi necha ellie'e lubee bene enu la necha bee bene Israel,
para nú chetixiule'elu lu ye bee bene iliulabe nú xa tsila'a beella.

⁴⁸Chenu ubene' bee bene enu la necha bee bene Israel nucua', che chiqui' ñia utsu arqui'beei nu uquixiebeei unibeei nú necha nze'ca bedichia' nze'ca' Diose. Nu ye bee bene enu riala elunehuañi nú leca xunga laxu lu Diose uchili arqui'beella stichia'nu. ⁴⁹Scua ungiabiya' bee bene Stichia' Diose diqui lubee iliu ze'e. ⁵⁰Pero bee bene Israel udu' beei arqui' bee una'a enu siempre se indu nu necha equie beella eyeche ze'e, cuna lubee niyu enu necha equie para nú utiliaca' beei Pablo cuna Bernabé hasta nú uhuabeei li'ibeella lu iliu ze'e. ⁵¹Nu chu uri'qui Pablo cuna Bernabé yu be'cha' cuchiu' beella xi

neca seña nú ne zucu' bee bene ze'e stichia' beella, nu chu nzuebeella eyeche nú lee Iconio. ⁵²Pero bee bene enu uyalí arqui' Jesucristo chiqui' ñia nzu arqui'beella nu chiqui' nzu Espíritu Santo cuna li'ibeella.

Uriña Pablo cuna Bernabé eyeche Iconio

14 Chenu nzucu Pablo cuna Bernabé eyeche Iconio, uya beella liñi indu' bee bene Israel, nu uzete' beella bedichia' nze'ca' Jesucristo lubee bene nu huaxi bee bene uyalí arqui' li'inu, masia nú necha beei bee bene Israel, urre la necha beei bene Israel. ²Pero bee bene Israel enu la chili arqui' li'inu, udu' beei arqui' bee bene enu la necha bee bene Israel para nú uquixiebeei nú uri'ibeei elliebacu' nú necha necha lubee bene enu nzeli arqui' Jesucristo. ³Pero añinzuca nú ungae scua uya'na bee apóstol ze'e huaxi tiambu. Nu sin nú lliqui beella udixiule'e beella stichia' Jesucristo xne nzeli arqui'beella li'inu, nu li'inu udete'nu poder lubeella nú uri'ibeella huaxi bee milagro cuna beelá beenú uri'ibeella para nú lañi' bee bene nú neli nú rnibeella lunú necha cuenda' Diose. ⁴Pero bee bene eyeche ze'e ule'e sa'beei nu unga chiucu texcua'a beei, texcua'a beei nzu chu' bee bene Israel nu texcua'a beei nzu chu' bee apóstol. ⁵Chequie sia bee bene Israel urre sia bee bene enu la necha bee bene Israel unga tucu necatse beei cuna bee usticia para nú quiexu beei Pablo cuna Bernabé nu du' beei

quie li'ibeella. ⁶Pero chenu uri'i Pablo cuna Bernabé beya' nucua', chu nzuebeella eyeche Listra cuna eyeche Derbe, nú nchiucu' lu iliu Licaonia, cuna lubeelá bee eyeche nú nchiucu' enza ze'e, ⁷uyatixiule'e beella bedichia' nze'ca' Jesucristo lubee bene.

**Udu' bee bene quíee
Pablo eyeche Listra**

⁸Lu eyeche Listra uhuañi tucu niyu enu laca tse nu leca xunga utsella xne necuxulla desde nú ungulalla nu nzuculla ze'e, ⁹riene'lla lunú rni Pablo, chenu ulañi' Pablo li'illa ulañi' Pablo nú nzeli arqui'lla para nú yeca'lla. ¹⁰Nu juerte uni Pablo lulla:

—iUtsuli nu neli utsu!

Hora ze'e utetsalla nu utsulílla nu uquixie seella. ¹¹Chenu ulañi' bee bene lunú uri'i Pablo, uquixiebeeí nú rixiali beeí cuna dialu Licaonia nú unibeeí:

—iBee diose enu neca xi neca bene ulaca elu nellua'ahua!

¹²Nu unibeeí nú Bernabé neca diose Jupiter nu Pablo neca diose Mercurio, xne li'illa neca enu rni lubeei. ¹³Nu ru'u eyeche ze'e elu riu'u bee bene nzucu indu' diose Jupiter. Chequie ule'ya enu nzucu indu ze'e uyayulla bee u'na' cuna bee quíee lu Pablo cuna lu Bernabé. Nu ule'ya ze'e cuna ye bee bene enu nuulla uniarqui'beella nú úti beella bee u'na' ze'e para nú dete' beella ula'na lubee apóstol. ¹⁴Pero chenu uri'i Pablo cuna Bernabé beya' nucua', chu utsa beella xucu beella nu uyu'u xu'u beella leta bee bene ze'e nu rixiali beella nú unibeella:

¹⁵—iUzu'cu' diacahua! ¿Xinu rri'ihua scua? Li'iru necaru bene tucu nú necahua. Nu nucua'tsia nzelarú para nú niru luhua nú tsana' arqui'hua lunú rri'ihua xne lecaxi zibi' bee nucua'. Mejora uchili arqui'hua Diose enu nehuañi, enu ureche' liñibe cuna iliulabe cuna inzatu' cuna ye beenú nu' lubee. ¹⁶Hua'tu utsana' Diose nú uri'i bee bene tucu nú niarqui'tsia beeí, ¹⁷pero añinzuca nú necane scua, leca xunga utsacu' arqui' Diose lunú ti necanu equie beenú neca nze'ca rri'ínu. Xne li'ínu necanu enu rliqui' quiu cuna bee ula'cu nu le'ca li'ínu rliqui'nu nu rda'cua'ahua para nú ñia tsu arquia'ahua.

¹⁸Chenu uni Pablo cuna Bernabé scua lubeella, chiqui' neriña' uri'ibeella ana lubee bene ze'e nú ne uti bee bene ze'e u'na' xi neca u'na lubeella para nú alu'cu beeí ula'na lubeella.

¹⁹Pero chiucu chuna bee bene Israel enu nucua'a eyeche Antioquía cuna eyeche Iconio, chenu uriña beeí eyeche Listra uri'ibeeí ana udu' beeí arqui' bee bene eyeche ze'e. Chequie udu' beeí quíee Pablo nu uri'ibeeí elliebacu' nú ungutílla Pablo nu uya xa' beeí li'illa nu uhuabeeí li'illa hasta ru'u eyeche ze'e. ²⁰Pero chenu uyetesá' bee bene enu nzeli arqui' Jesucristo abenchila' elu nuxu Pablo, che udete'lla ellie'e nu utsulílla nu uyu'u zecalla eyeche ze'e. Nu stucu bichia uchiu'lla cuna Bernabé nu nzuebeella eyeche Derbe.

²¹Chenu ulaxu nú udixiule'e beella stichia' Jesucristo eyeche

Derbe elu huaxi bee bene uyali' arqui' Jesucristo, che ubenchila' zeca beella eyeche Listra cuna eyeche Iconio cuna eyeche Antioquía. ²²Bee eyeche cua' udu' beella ana arqui' bee bene enu nzeli arqui' Jesucristo, nu unibeella lubee bene ze'e nú tsuta' arqui'beella lunú nzeli arqui'beella li'inu, xne chiqui' nehuana zeca bee bene para nú chu'u bee bene elurnibiya' Diose. ²³Nu le'ca cada tucua bee eyeche ze'e ucañi beella tucu bene enu nibiya' lubee bene enu nzeli arqui' Jesucristo, nu chenu ulaxu nú udete'beella bichia nú la acu beella equie nú rlu'cu beella ula'na lu Diose, cuna nú unacu' beella lunu nu chu utsa'na beella li'ibeella ya Jesucristo enu nzeli arqui'beella.

**Ubenchila' zeca Pablo cuna
Bernabé eyeche Antioquía
nú nchiucu' lu iliu Siria**

²⁴Chenu udete Pablo cuna Bernabé lu iliu Pisidia, uriña beella lu iliu Panfilia. ²⁵Chequie udixiule'e beella Stichia' Diose eyeche Perge. Nu nzuebeella lu eyeche Atalia. ²⁶Ze'e uyu'u beella liñi barco para nú nzuebeella eyeche Antioquía ze'e utsa'na beelá bee bene enu nzeli arqui' Jesucristo li'ibeella ya Diose para nú ri'inu elietsa lubeella nú chetixiule'e beella stichia'nu. Nu riña' cua' neca nú ula'xu beella rri'ibeella nee. ²⁷Chenu uriñabeella eyeche Antioquía, uquiete'sa' beella bee bene enu nzeli arqui' Jesucristo nu unibeella lubee bene ze'e lu ye nú uri'i Diose cuna li'ibeella, cuna nú uri'inu elietsa nú nzeli arqui' bee bene enu la neca bee bene

Israel Jesucristo. ²⁸Ze'e uya'na Pablo cuna Bernabé huaxi tiambu nu ucu'a beella cuna bee bene enu nzeli arqui' Jesucristo eyeche ze'e.

**Uyetesá' bee bene enu nzeli
arqui' Jesucristo Jerusalén**

15 Bee bichia ze'e uriña chiucu chuna bee bene Judea eyeche Antioquía. Nu uquixiebee unibeei lubee bene enu nzeli arqui' Jesucristo nú tunu la quie seña li'ibeella tucu nú rnibiya' ley' Moisés leca modo tsila'a beella lu cuenda' stula beella. ²Chequie Pablo cuna Bernabé chiqui' unixuu beella cuna bee benecua', luze'elá ucañi bee bene enu nzeli arqui' Jesucristo Pablo cuna Bernabé cuna xiucu xuna bee bene para nú uya beella Jerusalén, uya ni'i beella lubee apóstol cuna lubee bene enu rnibiya' lubee bene enu nzeli arqui' Jesucristo para nú bi'ya beella xa aca equie cuenda' nucua'.

³Nu udu'nziu bee bene eyeche Antioquía enu nzeli arqui' Jesucristo li'ibeella para nú chue beella. Chenu nzuebeella udete beella lu iliu Fenicia cuna lu iliu Samaria, nu udixiule'e beella lubee bene enu nzeli arqui' Jesucristo enu nucua'a enza ze'e. Nu bee bene enu la neca bee bene Israel nzelila arqui'beella Stichia' Diose. Nu ye bee bene enu nzeli arqui' Jesucristo enu nucua'a enza ze'e, chiqui' ñia utsu arqui'beella chenu ubene'beella nucua'.

⁴Chenu uriña Pablo cuna bernabé Jerusalén, uyucu nze'ca bee bene enu nzeli arqui' Jesucristo li'ibeella cuna bee apóstol cuna bee bene

enu rnibiya' lubee bene enu nzeli arqui' Jesucristo, che ubedichia'nu Pablo cuna Bernabé li'ibeella lunú uri'i Diose lubeella. ⁵Pero chiucu chuna bee fariseo enu nzelíla arqui' Jesucristo, utsulíbeei nú unibeei:

—Bee bene enu la neca bee bene Israel enu nzelíla arqui' Jesucristo rqui'ña nú quiee seña nú rquie bee bene Israel li'ibeella, nu rqui'ña nú ri'ibeella beya' nú zucu' beella ley' Moisés.

⁶Chequie uyetesa' bee apóstol cuna bee bene enu rnibiya' lubee bene enu nzeli arqui' Jesucristo para nú bi'ya beella xa ri'ibeella lu cuenda' nucua'. ⁷Lunú chiqui' ubedichia' beella equie cuenda' nucua', utsuli Pedro nu unilla:

—Bee sa'a enu nzeli arquia'ahua Jesucristo, li'ihua nediya'hua nú hasta hua'tu ucañi Diose li'á letahua para nú nzetixiule'a bedichia' nze'ca' Jesucristo lubee bene enu la neca bee bene Israel para nú chili arqui'beella li'inu.

⁸Nu Diose enu nu'lu arqui' ye bee bene, ulube'nu nú neca beella bee bene'nu equie nú udete'nu Espíritu Santo lubeella tucu nú uliqui' nue luru, ⁹tucutse rri'i Diose luru cuna lubeella, xne tucu nú uri'inu perdona stularu le'ca esquie uri'inu perdona stula beella equie nú nzeli arqui'beella Jesucristo. ¹⁰Nee, ¿xiquie nú la zucu'hua lunú rni Diose nu rnibiya'hua nú zucu' bee bene enu nzeli arqui' Jesucristo nú rni ley' Moisés, nu ni' li'iru nu ni'bee benea'ahua enu udetela, né aca beella azucu'beella ley' cua'?

¹¹Li'iru nediya'ru nú utsila'alaru lu dula tucu nú utsila'a Diose li'ibeella,

equie nú neca nze'ca nú uri'i Jesucristo enu rnibiya' lua'ahua.

¹²Chequie uzaca ye beella nu uzucu' diaca beella lunú rni Pablo cuna Bernabé lu ye bee milagro nú uri'ibeella lubee bene enu la neca bee bene Israel, equie poder nú rlu'cu Diose. ¹³Chenu ulaxu nú unibeella, chequie le'ca uni Jacobo:

—Bee sa'a enu nzeli arquia'ahua Jesucristo, uzucu' diacahua lunú nialuhua. ¹⁴Simón Pedro unilalla lua'ahua nú xa uquixie Diose nú ucañinu bee bene enu la neca bee bene Israel para nú aca beella bee bene'nu. ¹⁵Ye bee nucua' ungala tucu nú uquie'e bee profeta lu ichi' Stichia' Diose elu rni:

¹⁶ Lulá nú aca bee nucua', ri'á nú aca tucu necatse bee benea stucu bese tucu nú ungae chenu uhuañi David. Nu aca tucu necatse beella cuna beelá bee bene enu nehuañisca' nee, tucu nú uhuañi bee bene tiambu nú uhuañi David, nu equie cuenda' beella aca huaxi bee benea,

¹⁷ para nú cua'na ye bee bene nú zeca beella li'á, nu ye bee bene lu iliulabe cua'na beella nú zeca beella li'á, li'ibeella enu ucaña.

¹⁸Scua rni Diose enu rixiule'e ye bee nucua' lu ye bee bene hasta hua'tu.

¹⁹Enze'e li'á Jacobo rri'á elliebacu' nú la qui'ña nú ria'ahua juerza bee bene enu la neca bee bene Israel nú chequie beella lunú rni ley' Moisés, li'ibeella enu utsana' arqui' bee custumbre

para nú nzequie beella inziu' Diose. ²⁰Nee neca nze'ca nú xe'lahua tucu ichi' lubeella nú la acu beella nú necale'ya lubee nú nzeli arqui' bee bene nú neca diose, nu la ri'ibeella eluhuexe nu la acu beella be'la' bee nañi enu la ti'chia rene chenu rati, nu la acu beella rene. ²¹Scua nia'ahua lubeella, xne hasta hua'tu cada eyeche siempre nu' tucu bene enu sete' li'ibeella lunú xi rni ley' Moisés nú rula beella liñi indu' bee bene Israel bichia nú sulachi bee bene.

²²Chequie bee apóstol cuna bee bene enu rnibiya' lubee bene enu nzeli arqui' Jesucristo, cuna ye beelá bee bene enu nzeli arqui' Jesucristo unga tucunecatse beella nú ucañi beella bee bene leta beella para nú xe'la beella bee benequie' cuna Pablo cuna Bernabé eyeche Antioquía. Che ucañi beella Judas enu le'ca lee Barsabás, cuna Silas, li'ibeella enu neca equie leta bee bene enu nzeli arqui' Jesucristo. ²³Nu uxe'la beella tucu carta cuna li'ibeella nú rni:

“Li'iru bee apóstol, cuna bee bene enu rnibiya' lubee bene enu nzeli arqui' Jesucristo, cuna beela bee bene enu nzeli arqui' Jesucristo, ri'iru saluda li'ihua enu la neca bee bene Israel, pero neca sa'ahua lunú nzeli arquia'ahua Jesucristo, li'ihua enu nucua'a eyeche Antioquía, nu diqui lu iliu Siria, cuna Cilicia. ²⁴Li'iru ungabiya'la'ru nú uchiu'u chiucu chuna bee bene lachia'ahua nu rri'ibeei nú sa' arqui'hua cuna stichia'

bee, che la ri'ihua beya' ta nú ri'ihua xne rnibeei nú rqui'ña nú quiehua seña nú rquie bee bene Israel, cuna nú ri'ihua tucu nú rnibiya' ley' Moisés pero lá dete'ru permiso nú ri'ibeei scua. ²⁵Enze'e uyetesaru nu uniru nú máse neca nze'ca nú cañiru chiucu chuna bee sa'ahua para nú ye'ta bi'ya beella li'ihua, cuna sa'ahua Pablo cuna Bernabé enu chiqui' se'ca'ahua, ²⁶li'ibeella enu la lliqui mase nú ati equie cuenda' nú sibi' beella lu Jesucristo enu rnibiya' lua'ahua. ²⁷Nu cuna li'ibeella xe'laru Judas cuna Silas, nu le'ca li'ibeella ixiule'e beella ye bee nucua' luhua. ²⁸Nu equie nú nzu Espíritu Santo cuna li'iru, uri'iru beya' nú la qui'ña nú nibiya'ru luhua nú xi ri'ihua, lunú rqui'ña nú ri'ihua neca, ²⁹nú la acuhua be'la' bee nañi enu rricu' bee bene lubee nú nzeli arqui' bee bene nú neca bee diose, nu la acuhua bee nañi enu la ti'chia rene chenu rati nu le'ca la acuhua rene nu la ri'ihua eluhuexe. Tunu ri'yahua li'ihua nú la ri'ihua ye bee nucua' che sí nehuañi nze'cahua lu Diose. Diose bi'ya li'ihua.”

³⁰Scua ungae, uxe'la beella carta cua' cuna tacu bene ze'e eyeche Antioquía. Ze'e uquiete'sa'beella bee bene enu nzeli arqui' Jesucristo nu udete' beella carta cua' ya beella. ³¹Chenu ungula beella carta ze'e, chiqui' ñia utsu arqui'beella equie bee bedichia' nze'ca nú rni lu carta ze'e. ³²Chequie Judas cuna Silas lunú le'ca rlu'cu beella nú reca beella para nú udete' beella Stichia'

Diose lubee bene, xee unibeella lubee bene' Jesucristo cuna nú udu' beella ana arqui'beella cuna stichia' beella. ³³Chenu udete huaxi bee bichia nú nzucu Judas cuna Silas ze'e, chequie bee bene' Jesucristo enu nucua'a eyeche Antioquía ze'e udu' inza beella li'ibeella para nú benchila' zeca beella elu nucua'a bee sa'beella enu uxe'la li'ibeella nú unibeella lubella: “Diose ri'i ucu li'ihua.” ³⁴Pero udu' arqui' Silas nú uya'nalla ze'e ³⁵Nu Pablo cuna Bernabé uya'nalá beella eyeche Antioquía, li'ibeella cuna beelá bee bene uzete' beella, cuna nú uyatixiule'e beella bedichia nze'ca' Jesucristo lubee bene ze'e.

**Bese rruccu nú uchiu'u Pablo
nú nzetixiule'ella Stichia'
Diose stucu eyeche**

³⁶Chenu udete chiucu chuna bee bichia, che uni Pablo lu Bernabé: —Cha'a chebi'ya' zeca'a bee sa'ahua enu nzeli arqui' Jesucristo bee eyeche elu uyatixiule'e lá stichia'nu para nú bi'ya'a xa nucua'a beella.

³⁷Bernabé niarqui' nú uya' beella Juan enu le'ca lee Marcos; ³⁸pero nézela Pablo nú a uya' beella Juan Marcos, xne chenu uya beella lu iliu Panfilia utsana' arqui'lla li'ibeella nu né chequiella li'ibeella. ³⁹Chequie ni' tuculla nu ni' stuculla né ya'na tucu necatse beella, nu utsana' arqui'sa'beella. Che unguya' Bernabé Marcos nu uyu'u beella liñi barco nu nzuebeella enza Chipre luyuu nú netse lu inzatu'. ⁴⁰Nu ucañi Pablo Silas nzenulla, nu utsa'na beelá bee bene' Jesucristo

li'ibeella ya DiOSE para nú ri'iucunu li'ibeella. ⁴¹Nu udete beella lu iliu Siria, cuna lu iliu Cilicia nu udu' beella ana arqui' bee bene' Jesucristo enu nucua'a enza ze'e.

Nzenu Pablo Timoteo nu Silas

16 Chenu uriña Pablo cuna Silas eyeche Derbe cuna eyeche Listra, ze'e uchu'u beella tucu bene enu nzeli arqui' Jesucristo, benequie' lee Timoteo nu necalla lliana' tucu una'a bene Israel enu le'ca nzeli arqui' Jesucristo, pero pa'lla neca bene griego. ²Ye bee bene' Jesucristo enu nucua'a eyeche Listra cuna eyeche Iconio rnibeella nu rri'i nze'ca Timoteo. ³Chequie uni Pablo nú uya'lla Timoteo, pero rluti uquieella seña nú rquiee bee bene Israel para nú lecaxi nii bee bene Israel enu nucua'a enza ze'e lu cuenda'lla, xne ye beei nediya' beei nú neca pa' Timoteo bene griego. ⁴Nu lu ye bee eyeche elu uyabeella, udixiule'e beella lubee bene enu nzeli arqui' Jesucristo nú xa riala ri'i beella, tucu nú uni bee ápostol cuna bee bene enu rnibiya' lubee bene enu nzeli arqui' Jesucristo eyeche Jerusalén. ⁵Scua unga nú utsuta' arqui' bee bene enu nzeli arqui' Jesucristo enu nucua'a enza ze'e, nu bichia por bichia udala bee bene enu nzeli arqui' Jesucristo.

**Ulube'lu tucu bene
Macedonia lu Pablo**

⁶Chequie né tsana' Espíritu Santo nú a ixiule'e beella Stichia' DiOSE enza Asia. Che udetetsia beella lu iliu Frigia cuna lu iliu Galacia,

⁷nu uriñabeella enza Misia. Ze'e uri'ibeella elliebacu' nú chue beella enza lu iliu Bitinia, pero le'ca né zela Espíritu Santo nú a chaa beella enza ze'e. ⁸Chenu uдете beella enza Misia, uriñabeella eyeche Troas. ⁹Rula' ze'e ulle'ca Pablo xi neca nú uni xcala'lla, nú ulañi'lla tucu bene enu nze'ta enza Macedonia nu nzulílla sequieella lu Pablo nú unilla: “Ye'talu enza Macedonia para nú ri'ilu elietsa luru.” ¹⁰Hora chenu ulube'lu nucua' lu Pablo, uquieneru nú nza'aru enza Macedonia xne nediya'ru nú Diose neca enu rixia li'iru enza ze'e para nú chetixiule'eru bedichia' nze'ca' Jesucristo.

Uriña Pablo cuna Silas eyeche Filipos

¹¹Nu uyu'ru liñi barco eyeche Troas nu nza'alíru enza Samotracia. Nu stuculá bichia uriñaru eyeche Neápolis. ¹²Ze'e uchiu'uru nu nza'aru eyeche Filipos, eyeche quie' neca nú máse neca equie enza Macedonia. Pero Roma rnibiya' lu eyeche quie', ze'e uya'naru chiucu chuna bichia. ¹³Nu tucu bichia nú sulachi bee bene Israel uchiu'uru ru'u eyeche ze'e, uya'aru tucu re'cu elu nediya'ru nú riete'sa' bee bene Israel para nú rnacu' beella lu Diose. Nu ze'e ullua'aru uniru bedichia' nze'ca' Jesucristo lubee una'a enu uyetesá' ze'e. ¹⁴Tucu una'a ze'e lee Lidia, li'illa necalla bene eyeche nú lee Tiatira, nu rutila laquie fiñu nú morado. Neli rlu'culla ula'na lu Diose nu sucu' diacalla lunú rni Pablo, nu uxa'la Diose elliebacu'lla para nú riene' nze'ca'lla lunú rni Pablo. ¹⁵Che

urinzalla cuna ye bee bene'lla nu uziquieella luru nú unilla:

—Tunu nzeli arqui'hua nú nzelíla arquia Jesucristo uteehua ne ya'nahua nia.

Che uri'illa juerza li'iru nú uya'naru ni'lla.

¹⁶Tucu bichia chenu nza'aru elu see bee bene rnacu' lu Diose, uchu'uru tucu una'a e'ne' enu nchiñi benechiqui' arqui'. Nu equie nú reca benechiqui' ze'e rri'inchu beya', nu rri'nchu ana huaxi dimi para bee bene enu utsii li'inchu para nú ri'inchu riña' cua'. ¹⁷Nu chu nze'ta quienchu Pablo cuna li'iru nu rixialinchu nú rninchu:

—iBee benequie' sibi' beella lu Diose liñibe, nu rixiule'e beella luhua nú xa lu'cuhua nú tsila'ahua lu stulahua!

¹⁸Scua uri'inchu huaxi bee bichia, hasta nú ullaca' Pablo lunú rri'inchu scua nu ubenchila'lla nu unilla lu benechiqui' enu nchiñi arqui'nchu:

—Equie poder nú rlu'cu Jesucristo li'á nibiya'a lulu nú chiu'ulu arqui' una'a e'ne' quie'.

Hora ze'e uchiu'u benechiqui' ze'e arqui'nchu.

¹⁹Pero chenu ulañi' bee bene enu rnibiya' lu una'a e'ne' ze'e nú la ria'nchu ana dimi para li'ibeei, chequie una'tse beei Pablo cuna Silas unguya'bee li'ibeella ru'u nilabe lubee usticia. ²⁰Chenu uдете' cuenda beei li'ibeella lubee usticia unibeei:

—Bee bene Israel quie' chiqui' sureche beella bee bene lachia'ahua, ²¹nu sete' beei bee custumbre nú leca modo ria'ahua nu la ria'ahua

bee custumbre cua', xne neca'ahua
bee bene Roma.

²²Chequie ye bee bene ze'e uri'i
condra beei li'ibeella, nu unibiya'
bee usticia nú chiu'u xucu Pablo
cuna Silas para nú zete'che' beei
li'ibeella. ²³Chenu ulaxu nú juerte
uzete'che' beei li'ibeella, chu udu'
beei li'ibeella ni'cu' nu unibiya'
beei lu bene enu rriucu ru'u ni'cu'
para nú ri'i ucu nze'ca bene ze'e
li'ibeella. ²⁴Chenu ubene' bene enu
rriucu ru'u ni'cu' ze'e nucua', che
udu' bene ze'e Pablo cuna Silas
hasta cuarto aquíe xiña' ni'cu' ze'e
nu ullica'cui cuchiu' beella cuna
cadena lu tucu ba'ca nú nchiucu'
ze'e.

²⁵Pero tucu ulela' rula', diqui nú
rnacu' Pablo cuna Silas lu Diose
cuna nú rula beella canto lunu.
Chequie beelá bee bene enu nchiñi
liñi ni'cu' ze'e riene' beei lunú rula
beella. ²⁶Chequie tu'natsia uquixie
nú unga tucu xú juerte nu ucuñi
hasta simiendu' ni'cu' ze'e. Hora
ze'e uya'la ye ru'u bee puerta' ni'cu'
ze'e nu uye'che bee cadena nú
naca'cuu ye bee bene enu nchiñi
ze'e. ²⁷Chenu uzetee bene enu
rriucu ru'u ni'cu' ze'e ulañi'lla nú
ye ru'u bee puerta' ni'cu' ze'e na'la,
che uhualla espada'lla para nú nze
utila li'illa xne uri'illa elliebacu'
nú ye bee enu nchiñi ni'cu' ula'ala.

²⁸Che juerte uni Pablo lulla:

—La útilu li'ilu xne yeeru
nellua'aru ca'a.

²⁹Chequie unacu' bene enu rriucu
ru'u ni'cu' ze'e tucu quii nu uyu'u
xu'ulla liñi ni'cu' nu recatse'tse'lla
xiquilla, uriñalla hasta lu Pablo
cuna Silas nu utsulliquilla lubeella.

³⁰Nu chu uhualla li'ibeella eli'ya'
nu unidichia'lla lubeella nú unilla:
—Detá uni'hua, ¿xi riala ria'la para
nú ri'i Diose perdona li'á?

³¹Nu ucuaqui beella lulla:
—Uchili arqui' Jesucristo enu
rnibiya', che ri'i Diose perdona li'ilu
cuna bee bene'lu.

³²Che unibeella stichia' Jesucristo
lulla cuna lu ye bee bene enu
nucua'a ni'lla. ³³Nu rula' ze'e bene
enu rriucu ru'u ni'cu', uquieella bee
elu nedi'qui' Pablo cuna Silas. Che
chu urinzalla cuna ye bee bene'lla.

³⁴Nu unguya'lla li'ibeella ni'lla nu
udete'lla nú udacu beella, nu chiqui'
ñia nzu arqui'lla cuna bee bene'lla
equie nú nzelíla arqui'beella Diose.

³⁵Chenu uye'e luyuu, uxe'la bee
usticia bee sundado nú uyani'bee
lu bene enu rriucu ru'u ni'cu' nú
la'lla Pablo cuna Silas. ³⁶Chequie
uni bene enu rriucu ru'u ni'cu' ze'e
lu Pablo:

—Unibiya'la bee usticia nú la'a
li'ihua nu' modo nú yuehua nee sin
nú chenu arqui'hua.

³⁷Che uni Pablo lubee sundado
ze'e:

—Li'iru necaru mero bene Roma
nu udiñi beella li'iru ante lu ye
bee bene, nu ni'teme' la zela beella
nú aniru lubeella xa necane, nu
udu' beella li'iru ni'cu'. Nu nee
niarqui'beella nú la'a beella li'iru
a'chi'tsia. ¡Leca modoe! Ye'ta li'i
e'cu beella la'a beella li'iru.

³⁸Nu uya bee sundado ze'e
udixiule'e bee nucua' lubee usticia,
chequie ulliqui bee usticia ze'e
chenu ubene' beella nú neca Pablo
cuna Silas bene Roma. ³⁹Che uya
bee usticia unacu' beella perdona

lu Pablo cuna lu Silas, nu unibiya' bee usticia nú uchiu'u beella ni'cu' nu uni bee usticia ze'e lubeella nú chiu'u beella eyeche ze'e. ⁴⁰Chenu uchiu'u Pablo cuna Silas liñi ni'cu' ze'e uyabeella ni' Lidia. Nu chenu ulaxu nú udu' beella ana arqui' bee sa' beella enu nzeli arqui' Jesucristo, chu nzuebeella.

Lunú unga eyeche Tesalónica

17 Chenu nza Pablo cuna Silas, udete beella enza eyeche Anfípolis cuna enza eyeche Apolonia nu uriñabeella eyeche Tesalónica, elu nzucu tucu indu' bee bene Israel. ²Tucu nú neca costumbre' Pablo, uyalla liñi indu ze'e chuna bichia nú sulachi beella, unilla Stichia' Diose lubeella. ³Udixiule'ella nu ulube'lla lu ichi' Stichia' Diose lubeella elu rni nú rqui'ña nú nehuana zeca Jesucristo, nu chenu atinu huañi zecanu unilla lubeella:

—Le'ca li'i Jesuse enu rnia luhua nee, li'inu necanu Cristo.

⁴Chequie chiucu chuna bee bene Israel ze'e uyalí arqui' lunú uni Pablo, nu uyetesa'beella cuna li'illa cuna Silas, le'ca huaxi bee bene griego enu rlu'cu ula'na lu Diose cuna huaxi bee una'a enu chiqui' neca equie uyalí arqui'beella Jesuse. ⁵Pero bee bene Israel enu la chili arqui' Jesucristo, uye arqui'bee' nu uquiete'sa'bee' bee bene enu enzee labe inziu, nu bee bene ze'e uquiete'sa'bee' beelá bee bene para nú tsureche bee' bee bene. Nu uyu'u bee' liñi ni' Jasón rla'na bee' Pablo cuna Silas para nú huabee' li'ibeella nu tsu bee' li'ibeella ante

lu ye bee bene eyeche ze'e. ⁶Pero lunú néllela' bee' li'ibeella ze'e, che uxa'bee' Jasón cuna xiucu xuna bee bene enu nzeli arqui' Jesucristo, nu uyayu bee' li'ibeella lube' usticia, nu urixialíbee' nú unibee':

—Bee niyu enu rri'i nú rliu casi ye bee bene iliulabe uriñabeella ca'a, ⁷nu ni' Jasón nucua'a beella. Li'ibeella cuna ye bee bene enu nzeli arqui' lunú rnibeella, la ri'i beella tucu nú rnibiya' ley' arre César. Xne rnibeella nú nu' stucu arre enu lee Jesús.

⁸Chenu ubene' bee usticia cuna bee bene nucua', yelu elliebacu' uri'i beella. ⁹Pero Jasón cuna beelá bee bene enu una'tse bee', chenu udixiu beella che ula'a bee usticia li'ibeella ni'cu'.

Uriña Pablo cuna Silas eyeche Berea

¹⁰Le'ca rula' ze'e, bee bene enu nzeli arqui' Jesucristo uxe'la beella Pablo cuna Silas eyeche nú lee Berea. Chenu uriñabeella ze'e, uya beella liñi indu' bee bene Israel. ¹¹Bee bene Israel quie' máse uri'i nze'ca beella luquela bee bene enu nucua'a eyeche Tesalónica, nu chiqui' ñia nzu arqui'beella ubene'beella lunú uni Pablo, nu yeye'e rula beella sitichia' Diose para nú ri'i beella beya' tunu neli lunú rni Pablo. ¹²Enze'e huaxi beella uyalí arqui'beella Jesucristo, nu le'ca huaxi bee enu neca griego uyalí arqui'beella li'inu, sia bee niyu nu sia bee una'a enu máse neca equie ze'e. ¹³Nu chenu ungabiya' bee bene Israel enu nucua'a eyeche Tesalónica nú rixiule'e Pablo Stichia' Diose eyeche

Berea, che uyatu' beei arqui' bee bene ze'e para nú lee bee bene ze'e lu Pablo. ¹⁴Pero bee bene enu nzeli arqui' Jesucristo né le'beella chu uxe'la beella Pablo enza ru'u inzatu'. Nu Silas cuna Timoteo uya'na beella eyeche Berea. ¹⁵Nu bee bene enu uya tu'inza Pablo uyayu beella li'illa hasta eyeche Atenas liñi barco chenu ubenchila' zeca beella eyeche Berea unguya'beella resuna nú uxe'la Pablo para nú chu cha Silas cuna Timoteo elu nzuculla.

Uriña Pablo eyeche Atenas

¹⁶Diqui nú nzuquie Pablo nú riña Silas cuna Timoteo eyeche Atenas, chiqui' nehuana utsu arqui' Pablo chenu ulañi'lla nú nu' huaxi bee diose enu rlu'cu bee bene ula'na lu eyeche ze'e. ¹⁷Enze'e, uya Pablo liñi indu' bee bene Israel para nú unilla lubee bene ze'e Stichia' Diose, cuna lubeelá bee bene enu rlu'cu ula'na lu Diose tucu nú rri'i bee bene Israel, nu yeye'e unilla lu titse bee bene enu xa'calla ru'u i'ya stichia'nu. ¹⁸Le'ca unilla lu chiucu chuna bee bene enu nzequiee lunú uzete' bene enu lee epicúreos, cuna bee bene estoicos, che nu'beei enu uni:

—¿Xi equie rni benecua' nú chiqui' rni nucua' scua?

Xiucu xuna beei uni:

—Pianu stichia' stucu bee diose rene rixiule'e nucua' unibeei.

Unibeei scua xne lunú rixiule'e Pablo lubeei neca bedichia' nze'ca' Jesucristo, cuna nú unilla equie nú uhuañi zeca Jesucristo stucu bese.

¹⁹Chequie unguya'beei Pablo tucu luhuafe elu lee Areópago elu

riete'sa'beei. Nu unidichia' beei lulla:

—¿Nu' modo ri'iru beya' xa neca bee bedichia' cuqui cua' nú nze'talu sete'lu li'iru ca'a la? ²⁰Xne puro beenú la ri'iru beya' rnilu luru, enze'e niarqu'ru ri'iru beya' xa neca bee nucua'.

²¹Xne ye bee bene eyeche Atenas, cuna beelá bee bene rene enu nucua'a ze'e, siempre rri'i'beei scua, riu' arqui'beei nú rdete' beei bichia nú riene' beei cuna nú rdichia' beei lunú necuqui neca.

²²Chequie utsuli Pablo ante lu ye beei elu neyete'sa' beei ze'e, nu unilla lubeei:

—Bee bene eyeche Atenas, lu ye nú ulañia uri'á beya' nú rlu'cuhua huaxi bee diose enu rlu'cuhua ula'na lu. ²³Nu chenu ri'ya elu rdete'hua ula'na lubee diose'hua, ulañia tucu ecu'cu elu niquie bee bedichia' nú rni: “Para Diose enu la chuluru.” Nu Diose cua' enu rlu'cuhua ula'na lu sin nú chuluhua li'inu, stichia'nu neca nú nzelatixiule'a luhua.

²⁴Diose cua' ureche'e iliulabe cuna ye nú nu' lue, li'inu rnibiya'nu liñibe cuna lu iliulabe. La nzucunu liñi indu nú rreche' bee bene, ²⁵nu le'ca la qui'ñanu núti ri'i elietsa lunu, xne li'inu necanu enu lia rliqui' bii lua'ahua para nú huañia'ahua nu li'inu rliqui'nu elu nehuañia'ahua, cuna ye beenú rqui'ñia'ahua.

²⁶Equie cuenda' tucutsia bene uri'i Diose nú udala bee bene lu iliulabe para nú huañi bee bene diqui lu iliulabe, nu utsa'nalanu nú calu lana huañi beei, cuna elu

cua'a beei nu hasta calu luyuu nibiya' beei lu. ²⁷Para nú la'na beei Diose masia xi neca chenu rri'la' ya bene nú rla'na bene xi rla'nalla para nú scua llela' beei li'inu. Añinzuca nú neli nú laca istu nzu Diose lu ye bee bene. ²⁸Xne equie cuenda' Diose nehuaña'ahua, nu equie cuenda' li'inu rcuña'ahua nu se'ahua, nu equie cuenda' li'inu nellua'ahua lu iliulabe. Tucu nú le'ca uni chiucu chuna bee bene'hua enu chiqui' reca chenu unibeella: "Li'iru necaru lli'ñi Diose." ²⁹Enze'e tunu neca'ahua lli'ñi Diose, la qui'ña nú ria'ahua elliebacu' nú necache' Diose oro urre plata urre quiee, xi neca bee diose nú rreche'e bee bene tucu nú xelatsia arqui'beei. ³⁰Bee tiambu nú udetela uzela Diose nú uri'i bee bene tucu nú nzelitsia arqui'beei equie nú la ri'i beei beya', pero nee diqui lu iliulabe rnibiya'nu lubee bene, nú che'e arqui'beei lu stula beei nu chili arqui'beei Diose. ³¹Xne ucañila Diose tucu bichia nú hualunue lu cuenda' bee bene. Nu udu'lanu Jesucristo para nú ri'inu elu usticia cua', nu para nú lañi' bee bene nú ucañi Diose li'inu nú ri'inu nucua', nu uri'i Diose nú uhuañi zecanu chenu ungotinu. ³²Chenu ubene'beei nú uni Pablo nú huañi zeca bee benenguti stucu bese, chiucu chuna beei utsequichia' li'illa, nu xiucu xuna beei uni: —Pianu hasta stucu bese yene'la'ru lunú rnilu. ³³Chequie utsana' arqui' Pablo li'ibeel, ³⁴pero nu' beella enu uyetesa' cuna Pablo nu uchili

arqui'beella Stichia' Diose. Leta beella nzu tucu bene enu lee Dionisio, enu neca lu tucu texcua'a bee bene enu lee Areópago, cuna tucu una'a enu lee Dámaris, cuna beelá bee bene.

Uriña Pablo eyeche Corinto

18 Lu ze'ela uchiu'u Pablo eyeche Atenas nu nzalla eyeche Corinto. ²Ze'e ulla'calla tucu bene Israel enu lee Aquila, lachi bene quie' lee Ponto. Aquila quie' cuna una'lla Priscila apenatsia uriña beella nú nze'ta beella enza Italia, xne unibiya' arre Claudio nú uchiu'u ye bee bene Israel Roma. Che uyabi'ya Pablo li'ibeella, ³nu lunú le'ca riña' nú rri'ibeella rri'i Pablo, nú rreche'e beella carpa iti, che uya'nalla cuna li'ibeella para nú ri'i junto beella riña' cua'. ⁴Cada bichia nú sulachi bee bene Israel nza Pablo rixiule'ella Stichia' Diose liñi indu' bee bene Israel, sia lubee bene Israel urre lubee bene enu la neca bee bene Israel, rcua'na Pablo xa ri'illa ana nú chili arqui'beei lunú rnilla.

⁵Chenu uriña Silas cuna Timoteo eyeche Corinto nú nze'ta beella enza lu iliu Macedonia lá ria' Pablo stucu riña' rene udixiule'etsialla Stichia' Diose lubee bene, nu udixiule'ella lubee bene Israel nú neca Jesuse Cristo. ⁶Pero uquixiebeei nú uleebeei lu Pablo nu unibeel bedichia' nú necha neca lulla, nu chequie uri'quilla xuculla xi neca seña nú la zucu'beei nú rnilla, nu unilla lubeei:

—Li'i e'cuhua rri'ihua nú nitiluhua lu Diose la neca nucua' cuenda.

Desde nee nza'a lubee bene enu la neca bee bene Israel nzetixiule'a Stichia' Diose lubeei.

⁷Che uchiu'ulla liñi indu ze'e nu nzalla ni' tucu bene enu lee Ticio Justo, benequie' rlu'culla ula'na lu Diose nu axu nzucu ni'lla ru'u indu ze'e. ⁸Nu Crispo lee tucu bene enu rnibiya' liñi indu' bee bene Israel, li'illa cuna ye bee bene'lla uchili arqui'beella Jesucristo. Le'ca huaxi bee bene eyeche Corinto uchili arqui'beella Jesucristo chenu ubene'beella stichia'nu nu urinza beella. ⁹Tucu rula' neca xi neca nú uni xcala' Pablo nu uni Diose lulla:

—La lliquilu uquia tixiule'elá stichia'a lubee bene nu la tsuxeelu, ¹⁰li'á nzua cuna li'ilu para nú lecati xi ri'inu li'ilu, xne eyeche quie' nucua'a huaxi bee bene enu aca bee benea.

¹¹Enze'e uya'na Pablo eyeche Corinto tucu lana arula', uzete'lla bee bene ze'e Stichia' Diose.

¹²Pero chenu unga Galión gobernador lu iliu Acaya, unga tucu necatse bee bene Israel nu una'tse beei Pablo, nu unguya'beei li'illa lu gobernador ze'e. ¹³Nu unibeei lulla:

—Benequie' rcua'nalla xa ri'illa ana bee bene para nú lu'cu beella ula'na lu Diose stucu forma lunú la nibiya' ley'ahua.

¹⁴Nze nila Pablo, chenu ucuaqui Galión lubee bene Israel ze'e, nu unilla:

—Tunu necane nú uri'illa tucu equiya, urre uri'illa tucu nú necha neca enze'e nze'ta yuhualua, che ri'i casoa lunú rnhua. ¹⁵Pero necatsia nucua' equie cuenda' bee bedichia' cuna equie cuenda' nú lee

bee bene, nu cuna equie cuenda' ley'hua, li'itsiahua bi'yahua xa aca nucua', xne la niarquia aca enu hualu nucua'.

¹⁶Nu chu uhualla bee bene ze'e elu rlualullae lu cuenda' bee bene. ¹⁷Chequie chu una'tse bee bene griego ze'e tucu bene enu lee Sóstenes, enu rnibiya' liñi indu' bee bene Israel nu uzete'che' beei li'illa. Pero ni'teme' la ri'i caso gobernador ze'e li'ibeei.

Uriña zeca Pablo eyeche Antioquía

¹⁸Uya'nasca'lá Pablo eyeche Corinto huaxi bichia. Cheela unilla lubee sa'lla enu nzeli arqui' Jesucristo nú nziälla nu nzalla cuna Aquila cuna Priscila, nu uyu'u beella liñi barco nu nzuebeella enza Siria, pero ante nú chiu'u beella eyeche Cencrea urecu' ichia equie Pablo para nú utsa'alulla tucu nú ucuaqui u'nalla lu Diose nú uri'illa. ¹⁹Chenu uriña beella eyeche Efeso, ze'e utsa'na Pablo Aquila cuna Priscila, pero uyalla liñi indu' bee bene Israel enu nucua'a ze'e, uyani'lla lubee bene Israel enu riete'sa' liñi indu ze'e. ²⁰Chequie uziquiee beella lu Pablo nú ya'nalálala cuna li'ibeella ze'e xiucu xuna bichia, pero lá zelalla, ²¹nu unilla lubeella:

—Nzia'la nee, xne eyeche Jerusalén rqui'ña nú detea eliñi nú nze'ta. Tunu zela Diose nzelabi'ya zeca li'ihua stucu bese.

Che uyu'ulla liñi barco nu uchiu'ulla eyeche Efeso. ²²Chenu uriña Pablo eyeche Cesarea, che uyalla Jerusalén uyabi'yalla bee bene' Jesucristo, nu chu nzalla enza

eyeche Antioquía. ²³Chenu ungala xee nú nzuculla eyeche Antioquía, uyalla cada tucua bee eyeche nú nchiucu' lu iliu Galacia cuna lu iliu Frigia, rdu'lla ana arqui' ye bee bene' Jesucristo.

**Udixiule'e Apolo Stichia'
Diose eyeche Efeso**

²⁴Tiambu ze'e uriña tucu bene Israel eyeche Efeso nu li'illa leella Apolos, nu lachilla neca Alejandría. Benequie' chiqui' recalla rnilla, nu le'ca chiqui' recalla Stichia' Diose. ²⁵Unga nze'calla Stichia' Diose, chequie chiqui' nu' ana arqui'lla uzete'lla stichia' Jesuse lubee bene, nu neli unilla stichia'nu lubeella, añinzuca nú nediya'tsiälla elu rrinza nú uzete' Juan Bautista bee bene. ²⁶Apolos quie' sin nú lliquilla uquixiella nú udixiule'ella Stichia' Diose lubee bene Israel liñi indu'beei, nu chenu ubene' Priscila cuna Aquila lunú rnilla, che unguya'beella li'illa ni'beella, nu ze'e uzete'lá bee benequie' li'illa para nú ungalallá Stichia' Diose. ²⁷Chenu uri'i Apolos elliebacu' nú chálla lu iliu Acaya, ye bee bene' Jesucristo enu nucua'a ze'e udu' beella ana arqui'lla para nú challa ze'e, nu uquie'e beella tucu carta lubee bene' Jesucristo enu nucua'a lu iliu acaya para nú yucu nze'ca beella li'illa chenu riñalla lu iliu ze'e. Nu chenu uriña Apolos lu iliu Acaya chiqui' uri'illa elietsa lubee bene enu nzeli arqui' Jesucristo enu nucua'a ze'e, li'ibeella enu uyalí arqui' Jesucristo cuna elietsa' Diose. ²⁸Xne lu ye bee bene unilla nú la cha nze'ca bee bene Israel, nu lecati

unga ucuaqui lulla, xne ye nú rnilla neli necane, li'illa rlube'lla tucu nú nequie lu ichi' Stichia' Diose lubee bene, ye bee luhuare elu rni: “Nú Jesuse neca Cristo.”

Uriña Pablo eyeche Efeso

19 Diquila nú nzucu Apolos eyeche Corinto, uya Pablo enza lubee eyeche lu dañi Asia nu uriñalla eyeche Efeso, elu nucua'a texcua'a bee bene enu nzeli arqui' Jesucristo. ²Nu unidichia' Pablo lubeella:
—¿Uyucu arqui'hua Espíritu Santo chenu uyalí arqui'hua Jesucristo la? Nu ucuaqui beella nú unibeella:
—Ni' lasca' yene'ru nú nu' Espíritu Santo.
³Nu uni Pablo lubeella:
—¿Xa urinzahua che? Nu ucuaqui beella nú unibeella:
—Urinzatsiaru tucu nú uzete' Juan Bautista bee bene.
⁴Chequie uni Pablo lubeella:
—Nelí nú Juan urinza bee bene, li'ibeella enu utsana' arqui' stula, pero unilla lubeella nú rqui'ña nú chili arqui'beella enu nze'ta lulá Juan, nu li'inu necanu Cristo.
⁵Chenu ubene'beella nucua', che urinza beella equie nú lee Jesuse enu rnibiya', ⁶nu chenu uricu' Pablo yalla equie beella, uyucu arqui'beella Espíritu Santo, nu uquixie beella nú unibeella stucu dialu rene, che unibeella Stichia' Diose lubee bene. ⁷Lu yebeella neca tucu chi'chiucu bee niyu.
⁸Diqi chuna guu uya Pablo liñi indu' bee bene Israel enu nucua'a ze'e, nu sin nú lliquilla udixiule'ella Stichia' Diose lubeella,

unilla lubeella nu ucua'nalla xa ri'illa ana nú chili arqui'beella xa neca elurnibiya' Diose. ⁹Pero chiucu chuna beei unga nziti arqui' nu lá niarqui'beei nú achili arqui'beei stichia' Jesucristo, a'la uquixiebeei nú uni condra beei stichia'nu ante lu ye bee bene. Che uchiu'uchu Pablo lubeei cuna bee bene enu nzeli arqui' Jesucristo, nu unguya'lla li'ibeella xcuela' tucu bene enu lee Tirano, ze'e uzete'lla li'ibeella yeye'e, ¹⁰scua uri'illa diqui chiucu lana. Nu ye bee bene enu nucua'a lu iliu Asia nu sia bee bene Israel cuna bee bene enu la neca bee bene Israel ubene'beella stichia' Jesucristo. ¹¹Nu equie nú rnibiya' Diose uri'i Pablo bee milagro nú llene, ¹²hasta bee panitu' Pablo cuna bee laquie nú rquiee lulla ruya' bee bene nucua' lubee bene enu riti, nu scua riega' beella lu elichia nú secabeella, nu xiu'u bee benechiqui' enu nchiñi arqui'beella.

¹³Chequie nu' chiucu chuna bee bene Israel enu enzeehua bee benechiqui' arqui' bee bene, nu niarqui'beei nú cuna nú lee Jesucristo huabeei bee benechiqui' cua' arqui' bee bene, che unibeei lubee benechiqui' ze'e:

—Equie nú lee Jesuse enu rixiule'e Pablo nibiya'a nú chiu'uhua arqui' bee benequie'.

¹⁴Nucua' neca nú uri'i achi lliana' tucu bene enu lee Esceva, enu unga tucu ule'ya enu rnibiya' lubee ule'ya. ¹⁵Pero tucu bese ucuaqui tucu bee benechiqui' ze'e lubeei nú uni:

—Nu'lua Jesuse, nu le'ca nediya' ti neca Pablo, pero li'ihua la ri'á beya' tihua.

¹⁶Chequie bene enu nchiñi benechiqui' ze'e arqui' uquixiei nú uzete'che'i li'ibeei nu uri'i ana lubeei cuna juerza nú rlu'cui, chiqui' necha udiñii li'ibeei, nu e'cu etubeei uchiu'uxu'ubeei liñi ni'i ze'e uyecaxu'ubeei nu nedi'qui beei. ¹⁷Ye bee bene enu nucua'a eyeche Efeso, sia bee bene Israel cuna bee bene enu la neca bee bene Israel, ungabiya' beella nú ungae scua. Chequie chiqui' ulliqui beella nu uni nze'ca beella lu cuenda' Jesuse.

¹⁸Nu huaxi bee bene enu uyalí arqui' Jesucristo uriña beei nu utsiru'u beei ante lu ye bee bene lu ye beenú necha neca uri'ibeei. ¹⁹Le'ca huaxi bee bene enu uri'i bee elu uliñi uriñayu beei ichi' elu uliñi nu utsiqui' beei ichi' cua' lu quii ante lu ye bee bene. Chenu uhuabeei cuenda nú calu seca bee ichi' ze'e, nu uyalu nú seca bee ichi' ze'e tucu cincuenta mil melu plata. ²⁰Scua unga nú chu nze ri'chia letselá stichia' Jesucristo cuna nú ungachee lunú neca poder'nu.

²¹Chenu ulaxu nú unga bee nucua', udu' arqui' Pablo nú challa lu iliu Macedonia cuna lu iliu Acaya, cuna nú nze ri'illa seidu biaji'lla hasta eyeche Jerusalén. Le'ca unilla nú chenu uyalalla eyeche Jerusalén che le'ca challa Roma.

²²Nu uxe'lalla chiucu bee bene enu rri'i elietsa lulla, Timoteo cuna Erasto para nú nzuebeella lu iliu Macedonia diqui nú ria'nalla xiucu xuna bichia lu iliu Asia.

Utsureche bee bene eyeche Efeso

²³Bee bichia ze'e utsureche bee bene eyeche Efeso equie nú rri'i

contra beei stichia' Jesucristo.

²⁴Xne Demetrio tucu bene enu rreche'e beenú necache' plata, li'i enu rreche'e bee indume' diose enu lee Diana, li'i nediya'i nú equie bee nucua' rri'i ana huaxi dimi cuna bee bene enu rri'i sa' riña' nú rri'i.

²⁵Chequie uquiete' sa'i bee benecua', cuna beelá bee bene enu rri'i sa' riña' nú rri'i, nu uni lubeella:

—Uzu'cu' diacahua, li'ihua nediya'hua nú lu riña' quie' rria'ahua ana huaxi dimi, ²⁶pero nee rlañi'ahua nu riene'ahua nú enzee Pablo rnilla nú bee diose enu rreche'e bee bene la neca bee nucua' diose. Nu scua rri'illa ana nú nzeli arqui' huaxi bee bene lunú rnilla, nu lacane eyeche quie'tsia, sino que casi diqui lubee eyeche Asia nzeli arqui' bee bene scua.

²⁷Nu scua nelliqi nú laxu riña' nú rria'ahua, nu lacane equie riña' nú rri'litsia'ahua, le'ca la detea' bee bene nú neca equie indu' diose Diana. Nu scua la ria' bee bene caso diose Diana enu rlu'cu ye bee bene ula'na lu lu iliu Asia cuna ye bee bene iliulabe.

²⁸Chenu ubene' bee bene ze'e nucua', chiqui' ulee beei nu rixiali beei nú unibeei:

—iChiqui' neca equie Diana diose'ahua lia'ahua enu neca bee bene efesio!

²⁹Che utsureche bee bene eyeche ze'e, nu una'tse beei Gayo cuna Aristarco, rucu bee niyu quie' neca bene eyeche Macedonia enu enzeno Pablo, nu uxa'beei li'ibeella nu unguya'beei li'ibeella elu rietesa' bee bene eyeche ze'e, elu rri'ibeei junta'beei. ³⁰Niarqui'

Pablo nú nze chu'ulla ze'e para nú nilla lubee bene, pero bee sa'lla enu nzeli arqui' Jesucristo né zela beella nú ari'illa scua. ³¹Nu le'ca leta bee usticia Asia, nu' chiucu chuna bee bene enu rquiete' Pablo, li'ibeella enu uxe'la resuna lulla nú máse neca nze'ca nú la chu'ulla ze'e. ³²Texcua'a bee bene ze'e urixialibeei nu urene urene unibeei, nu texcua'a beei urixiali nu urene unibeei nu utsureche beei nu huaxi beei ni' la ri'i beei beya' xinu uyete' sa'beei ze'e. ³³Leta bee beneañi ze'e uhua bee bene Israel tucu bee sa'beella enu lee Alejandro para nú nilla lubee bene ze'e. Nu uri'i Alejandro seña cuna yalla lubee bene ze'e nú zaca beei para nú nilla lu cuenda' bee bene Israel lubee bene eyeche ze'e. ³⁴Pero chenu uri'ibeei beya' nú necalla bene Israel, tucu chiucu hora junto urixialibeei nú unibeei:

—iChiqui' neca equie Diana diose'ahua lia'ahua enu neca bee bene efesio!

³⁵Chequie chenu uri'i secretario eyeche ze'e ana nú uzaca bee bene, che unilla:

—Bee bene Efeso, ye bee bene iliulabe nediya' nú eyeche quie' siempre rriucu bee bene indu' diose Diana, nu le'ca rlu'cu bee bene ula'na lu diose Diana enu ulaca liñibe. ³⁶Li'ihua nediya'hua nú neli nucua'. Enze'e la qui'ña nú ri'ihua scua, la ri'ihua beenú rri'ihua sin nú ri'ihua elliebacu'. ³⁷Xne bee bene enu uriñayuhua ca'a, lá ri'ibeella nú necha neca lu indua'ahua, nu la ni beella bedichia' nú necha neca lu diose'ahua. ³⁸Tunu Demetrio

cuna bee bene enu rri'inui riña' rlee beei lu stucu bene, lu' nzucu nilabe nu ze'e nucua'a bee usticia, chexana bitsi beei lubeella. ³⁹Pero tunu nu'lá bee nú niarqui'hua nú xana bitsihua, chenu aca tucu junta' bee bene eyeche che tsuxcua'a bee nucua'. ⁴⁰Nu nee lunú ungae scua nu' beya' nú ni gobierno nú lia'ahua rdua'ahua arqui' bee bene nú sureche beei scua, ¿nu xi cuaquia'ahua lubeella tunu nedichia' beella lua'ahua equie nú sureche bee bene scua?

⁴¹Chenu ulaxu nú unilla scua lubee bene che chu nziue ye beei.

Uya Pablo Macedonia cuna Grecia

20 Chenu utsuxe lunú sureche bee bene eyeche Efeso ze'e, ubixia Pablo bee bene enu nzeli arqui' Jesucristo nu udu'lla ana arqui'beella. Che unilla lubeella nú nzalla, nu nzalla enza lu iliu Macedonia. ²Uyalla diqui bee enza ze'e nu chiqui' udu'lla ana arqui' bee bene enu nzeli arqui' Jesucristo cuna stichia'lla, che uriñalla enza lu iliu Grecia, ³elu uzuculla chuna guu. Necala nú chu'ulla liñi barco para nú nzalla enza lu iliu Siria, chenu uri'lla beya' nú nu' nú niarqui' bee bene Israel ri'inu li'illa, che uri'lla elliebacu' nú ubenchila' zecalla enza lu iliu Macedonia. ⁴Nu unguya'lla tucu bene Berea enu lee Sópater lliana' Pirro, cuna bene enu lee Segundo, nu cuna Aristarco enu neca bee bene eyeche Tesalónica, le'ca unguya'lla Gayo bene Derbe, cuna Tiquico cuna Trófimo bene Asia cuna Timoteo. ⁵Yebeella uriculu beella nu utsuquie beella

Pablo cuna li'á Lucas eyeche Troas. ⁶Nu li'iru, chenu udete eliñi nú racu bee bene pá nú la ucha levadura, che uchiu'uru eyeche Filipos nu uyu'uru liñi barco nu lu ayu' bichia uriñaru eyeche Troas elu nucua'a beella, nu ze'e ullua'aru achi bichia.

Uri'i Pablo nú uhuañi zeca

Eutico chenu ungutii

⁷Chenu uriña bichia rlu liñi tucu xmana uyetesa'ru para nú da'cu junturu pá tucu nú utsa'na Jesucristo, nu lunú uri'i Pablo elliebacu' nú chiu'ulla bichia rruca, chenu uriña ulela' rula' lá laxisca' nú sete'lla bee bene. ⁸Nu equie ni'i elu ayaa nellua'aru, nu rulu huaxi bee quii liñi ni'i ze'e; ⁹che tucu niyu e'ne' enu lee Eutico nzucui ru'u ventana. Nu lunú chiqui' xee uzete' Pablo beella, che chiqui' uyu'u cala' lu niyu e'ne' ze'e, nu uri'i cala' ana lui nu uzana'i desde piso rriuna hasta luyuu nu ungutilai chenu uletsa beella li'i. ¹⁰Chequie ulaca Pablo elu nuxui, nu utsulliquilla uchi'chilla li'i, nu unilla lubee bene ze'e:

—La lliquihua, nehuañii.

¹¹Che chu uquie zeca Pablo equie ni'i ze'e, nu ule'ella pá udacu beella, nu unilálla lubeella hasta nú uye'e lu yuu, chenu uye'e luyuu chu nzalla. ¹²Nu niyu e'ne' enu uzana' ze'e, nehuañii nzeyu beella li'i ni'i, nu chiqui' ñia nzu arqui'beella.

Uya Pablo eyeche Mileto

¹³Che uyu'uru liñi barco nu uricu'luru nú nza'aru eyeche Asón elu utsa'naru bedichia' lu Pablo nú

lla'caru li'illa, xne uri'illa elliebacu' nú tsee e'yalla nzalla ze'e. ¹⁴Chenu ulla'caru Pablo eyeche Asón, che uyu'ulla liñi barco cuna li'iru, nu nza'aru lu eyeche nú lee Mitilene. ¹⁵Che uchiu'uru eyeche Mitilene, nu bichia rrucu udete'ru enza lee Quío, nu stucu bichia uriñaru elu lee Samos. Nu stucu bichia uriñaru Mileto, pero ante nú riñaru ze'e, utsuxeru elu lee Trogilio. ¹⁶Uri'i Pablo elliebacu' nú la challa eyeche Efeso, nu le'ca niarqu'i'lla nú la le'lla enza Asia, xne lunú niarqu'i'lla nú chu riñalla Jerusalén tunu nu' beya' nú riñalla ze'e bichia liñi pentecostés.

Uni Pablo lu bee bene enu rnibiya' lu bee bene enu nzeli arqui' Jesucristo eyeche Efeso

¹⁷Chenu nellua'aru eyeche Mileto, unibiya' Pablo nú ye'ta bee bene enu rnibiya' lubee bene enu nzeli arqui' Jesucristo eyeche Efeso, ¹⁸chenu uriña beella ze'e uni Pablo lubeella:

—Desde bichia rluu nú uriña ca'a Asia nu hasta nee li'ihua nediya' nze'ca'hua lunú rri'á. ¹⁹Ye bee bichia nú nzua cuna li'ihua sibi'a lu Jesucristo cuna nú nzuquie arquia, nu hasta runa nú huaxi beenú nehuana se'ca lunú niarqu'i' bee bene Israel ri'inu li'á. ²⁰Pero añinzuca nú scua necane, ne tsana arquia unia luhua lunú neca nze'ca para li'ihua ante lu ye bee bene urre ni'hua uzetea li'ihua. ²¹Nu sia lubee bene Israel cuna lubee bene enu la neca bee bene Israel, unila lubeella nú che'e arqui'beella lu stula

beella nu benchila' arqui'beella lu Diose, nu chili arqui'beella Jesucristo enu rnibiya'. ²²Nee nú nza'a Jerusalén elu uxe'la Espíritu Santo li'á, la ri'á beya' xi nzu nú zeca ze'e. ²³Lunú nediya'sia nú lu ye bee eyeche elu nza'a rni Espíritu Santo lua nú huaxi beenú nehuana zeca cuna nú cha'a ni'cu'. ²⁴Pero la chenuarquía nucua' mase atia, pero ñia nzu arquia rri'á lunú riala ri'á hasta elu zelae, nu ri'á lunú uliqui' Jesucristo enu rnibiya', nu ixiule'a bedichia' nze'canu cuna nú xa neca eluseca' Diose.

²⁵Nu nee nediya' nú ni' tucuhua enu udixiule'a xa neca lunú rnibiya' Diose lu, la lañia'hua li'á. ²⁶Enze'e nia luhua nee, nú la neca' nucua' cuenda' li'á tunu la huañihua tucu nú neli neca, ²⁷xne li'á udixiule'a luhua ye lunú xa neca Stichia' Diose, nu lecaxi utsacu arquia luhua. ²⁸Ubi'yahua li'ihua, nu ubi'yahua bee bene enu nzeli arqui' Jesucristo, li'ibeella enu uliqui' Espíritu Santo luhua para nú bi'yahua li'ibeella xi neca bene enu rriucu bee sanchi, xne Jesucristo udixiulanu cuna rene'nu equie cuenda'ahua chenu ungutinu lu cruse. ²⁹Li'á nediya' nú chenu nzia'a, nze'ta stucu bene ti'chialetse bee nze'e bee bene enu nzeli arqui' Jesucristo, tucu nú rti'chialetse bee bichiuu bee sanchi. ³⁰Nu le'ca letahua chiu'u bee bene enu zete' puro bee eluquichia' para nú ri'ibeei ana bee bene' Jesucristo, nu ri'ibeella caso stichia' beei luhware nú ri'ibeella caso Stichia'

Diose. ³¹Enze'e ucu'atsiñahua ubi'yahua li'ihua. Ullu'cu' arqui'hua nú diqui chuna lana, bichia si rula' né tsana arquia unia luhua hasta unguna unia bezete' luhua.

³²Nee bee sa'a enu nzeli arquia'ahua Jesucristo, ya DiOSE tsa'na li'ihua cuna bedichia' nze'ca'nu, nú rlu'cu poder para nú ri'i elietsa luhua nú nze chululáhua nú xa riala nú huañihua, nu liqui'nu luhua ye nú uninu nú dete'nu lubee bene enu neca bee bene'nu.

³³Lecaxi unacua luhua ni' dimi nu ni' laquie. ³⁴Li'ihua nediya' nze'ca'hua nú cuna yaa uri'á riña' para nú udacunua bee bene enu uya nzeno li'á. ³⁵Ulubelá luhua nú scua rqui'ña ri'i bee bene riña' para nú ri'ibeella elietsa lubee bene enu seca elitsi, ullu'cu' arqui'hua stichia' Jesucristo enu rnibiya' chenu uninu: “Máse ñia nzu arqui' bene enu lia rdete' nú rdete' luquela bene enu riucue.”

³⁶Chenu ulaxu nú uni Pablo scua, chequie utsulliquilla nu unacu'lla lu DiOSE cuna li'ibeella. ³⁷Che yebeella unguna'beella nu uchi'chi beella Pablo nu udacu beella bichiu' xecalla. ³⁸Nu chiqui' nehuana utsu arqui'beella lunú uni Pablo lubeella nú la ñaña' beella li'illa. Nu chu uyayu beella li'illa hasta elu nzu barco.

Uya Pablo Jerusalén

21 Ze'e utsa'naru li'ibeella, nu uyu'uru liñi barco nu nza'alíru enza lee Cos tucu yuu nú netse lu inzatu', nu stucu bichia

uriñaru elu lee Rodas lu stucu yuu nú netse lu inzatu', nu ze'e chu nza'aru eyeche nú lee Pátara. ²Nu eyeche ze'e uchu'uru tucu barco nú nza enza Fenicia, nu uyu'uru liñi barco ze'e. ³Chenu nza'aru che enza cue'tseru chubeca ulañi'ru yuu nú lee Chipre nú netse labe inzatu', nu nza'aru enza Siria. Nu lunú rqui'ña nú laca beenú nuya' barco eyeche Tiro. Che uyu'uru eyeche ze'e, ⁴ze'e uchu'uru bee bene eyeche ze'e enu nzeli arqui' Jesucristo, nu ullua'aru cuna li'ibeella ze'e achi bichia. Nu bee benequie' equie cuenda' Espíritu Santo ungabiya'beella lunú zeca Pablo Jerusalén che unibeella lu Pablo nú la challa ze'e. ⁵Pero chenu ullu'cu' achi bichia, che uchiu'uru eyeche ze'e. Ye beella cuna bee una'beella cuna bee endu'beella uyatuinza beella li'iru hasta ru'u inzatu' ru'u eyeche ze'e, nu ru'u inzatu' ze'e utsulliquiru nú unacu'ru lu DiOSE. ⁶Che uniru lubeella nú nzia'aru nu uyu'uru liñi barco, nu che ubenchila' beella ni'beella.

⁷Chenu uchiu'uru eyeche Tiro uya'aru Tolemaida, ze'e ulaxu nú seeru barco, le'ca uyaniru lubee bene enu nzeli arqui' Jesucristo eyeche ze'e, nu ullua'aru cuna li'ibeella tucu bichia. ⁸Stucu bichia, Pablo cuna li'iru enu nellua'anuru li'illa uchiu'uru Tolemaida nu nza'aru eyeche Cesarea, nu uya'aru ni' Felipe enu rixiule'e stichia' Jesucristo. Felipe quie' neca lu achi bene enu uyañi para nú ritsi' beella lunú riala ritsi' beella lubee bene enu seca elitsi, nu uya'naru

ni'lla. ⁹Felipe quie' rlu'culla tacu xinchiu'culla enu lá chia nu neca beenchu profeta' Diose. ¹⁰Nu necala huaxi bichia nú nellua'aru ni' Felipe, chenu uriña tucu bene enu lee Agabo ze'e, li'illa le'ca necalla profeta' Diose nu nze'talla enza Judea. ¹¹Chenu uriñalla una'tsella sinchiu' Pablo nu ullica'cuullae cuchiu'lla cuna yalla nu unilla:

—Espíritu Santo unilua nú Jerusalén bee bene Israel singuie llica'cuu beei bene enu neca stene' sinchiu quie' nu dete' cuenda beei li'illa lubee bene enu la neca bee bene Israel.

¹²Chenu ubene'ru nucua', li'iru cuna bee bene ze'e uziquieru lu Pablo nú la chálla Jerusalén. ¹³Pero ucuaqui Pablo nú unilla:

—¿Xinu runa'hua nu rri'ihua nú nehuana nzu arquia? Para li'á lecaxi ri'i mase llica'cuu bee bene li'á, nu mase uti bee bene li'á Jerusalén equie cuenda' Jesucristo enu rnibiya'.

¹⁴Nu lunú lá ri'iru ana nú la challa, lá ria'ru juerza li'illa unitsiaru lulla:

—Acatsia nucua' tucu nú niarquí' Diose.

¹⁵Chenu udete bee bichia ze'e, uquieneru nu chu nza'aru Jerusalén. ¹⁶Nu nzenuru chiucu chuna bee bene Cesarea enu nzeli arquí' Jesucristo, li'ibeella unguya' beella li'iru elu uya'naru ni' tucu bene Chipre enu lee Nasón, nu necala huaxi tiembu nú nzeli arquí'lla Jesucristo.

Uyabi'ya Pablo Jacobo

¹⁷Nu bee bene Jerusalén enu nzeli arquí' Jesucristo, chiquí' ñia

utsu arquí'beella uyucu beella li'iru. ¹⁸Stucu bichia uyanuru Pablo uyabi'yarú Jacobo, ze'e nucua'a ye bee bene enu rnibiya' lubee bene' Jesucristo. ¹⁹Chenu ulaxu nú uri'iru saludar li'ibeella chu udixiule'e Pablo lubeella lu ye nú uri'illa lubee bene enu la neca bee bene Israel equie poder' Diose. ²⁰Chenu ubene' beella nucua', unibeella bedichia' nze'ca lu Diose. Chequie unibeella lu Pablo:

—Li'ilu nediya'lu nú leta bee bene Israel huaxi beella nzelíla arquí'beella Jesucristo, nu ye beella rni beella nú rqui'ña nú ria'ahua tucu nú rnibiya' ley' Moisés. ²¹Li'ibeella ubene'beella nú li'ilu sete'lu bee bene Israel enu la nucua'a Israel, nú la ri'i beella caso ley' Moisés, nu rnilu nú la qui'ña quíee seña nú rquíee bee bene Israel bee endu' beella, le'ca la qui'ña nú chequie beella costumbrea'ahua. ²²Neequie, ¿xí ríala nú aca? Li'ibeella itá yete'sa' beella chenu yene' beella nú uriñalálu. ²³Enze'e máse neca nze'ca nú ri'ilu singuie: Nucua'a tacu niyu leta'ahua nu rqui'ña nú tsa'alubeei tucu nú ucuaqui u'na beei lu Diose. ²⁴Uyanubeei nu ri'ihua tucu nú rnibiya' ley para nú lecaxi náhua lu Diose, nu xixiulu para nú recu' equie beei, scua ri'i ye bee bene beya' nú sucu'cálu tucu nú rnibiya' ley nu la neli nú ubene'beella lu cuenda'lu. ²⁵Nu bee bene enu la neca bee bene Israel enu nzelila arquí' Jesucristo, uquie'elaru tucu carta lubeella nú la chenu xe'ta' arquí'beella lu cuenda' ley' Moisés. La qui'ña nú

acu beella bee u'na nú rricu' bee bene lunú nzeli arqui'beella nú neca diose, nu la acu beella rene, ni' be'la' bee nañi enu la ti'chia rene chenu rati, nu la ri'i beella eluhuxe.

Una'tse bee bene Pablo

²⁶Chequie unguya' Pablo dacu bee niyu ze'e, nu bichia rricu' uri'i' beella tucu nú rnibiya' ley' Moisés nú ri'i beella para nú lecaxi nábeella lu Diose. Che uyu'u beella liñi Indu llene Jerusalén para nú udixiule'e beella lu ule'ya nú xunga ellu'cu' nú ri'i beella tucu nú rnibiya' ley bichia nú rqui'ña nú uya' cada tucua beella tucu nañi nu atí' xi neca u'na lu Diose.

²⁷Chenu nze llu'cula achi bichia nú rqui'ña nú ri'i beella tucu nú rnibiya' ley, chequie chiucu chuna bee bene Israel enu nze'ta enza Asia ulañi' beei Pablo liñi Indu llene Jerusalén nu utsureche beei nu una'tse beei li'illa, ²⁸nu rixiali beei nú unibeei:

—iBee bene Israel, uri'ihua elietsa! Benequie' neca enu enzee catse se'ta bee bene Israel cuna indua'ahua cuna nú rni nucua' nú la ri'i bee bene tucu nú rnibiya' ley'ahua, nu la necane nucua'tsia, le'ca udu'la nucua' bene griego liñi indua'ahua nu rri'ila nucua' indua'ahua xi neca tucu luhuare nú la zibi' nu necane tucu luhuare elunecachi.

²⁹Unibeei scua xne lunú ulañi'beei nú enzee Pablo eyeche ze'e cuna tucu bene Efeso enu lee Trófimo, chequie uri'ibeei elliebacu' nú yyanu Pablo benequie' liñi indu ze'e.

³⁰Chequie utsureche ye bee bene eyeche ze'e, nu uriña xu'u beei una'tse beei Pablo, nu uxa' beei li'illa uhua beei li'illa liñi indu ze'e, nu chu utsacu' xu'u beei ru'u puerta indu ze'e. ³¹Yamero uti beei Pablo, chenu uriña resuna lu comandante enu rnibiya' lubee sundado, uyani'beei nú sureche ye bee bene Jerusalén. ³²Che yexetsia uyetesa' bee sundado cuna bee capitañi nu xexu'u beei uya beei elu neyete'sa' bee bene ze'e. Chenu ulañi' beei nú uriñayu comandante ze'e bee sundado, che utsuxe beei nu lá iñia' beei Pablo. ³³Chu uyabica comandante ze'e nu una'tsella Pablo, nu unibiya'lla nú uyaca'cuu Pablo cuna chiucu cadena, nu unidichia' comandante ze'e tilla nu xi uri'illa. ³⁴Pero texcua'a bee bene ze'e urene urixialibeei nu texcua'a beei urene rixiali nu lunú rixiali beei scua, lá ri'i comandante ze'e beya' xi rnibeei, che unibiya'lla nú unguya' bee sundado Pablo liñi cuartel. ³⁵Chenu uriña beella lu escalera cuartel ze'e, uricu' bee sundado ze'e Pablo ru'u xcuu beei equie nú chiqui' nelachi bee beneañi ze'e, nu nzequiee beei li'ibeella; ³⁶nu ye bee beneañi ze'e rixiali beei nú unibeei:

—iUti nucua'!

Uni Pablo lubee bene

³⁷Chenu necala nú nzechu'u beella cuna Pablo liñi cuartel ze'e, unidicha'lla lu comandante ze'e:

—¿Nu' modo nia lulu lle'nala?

Nu ucuaqui comandante ze'e

—¿Xie' recalú rnilu griego la?

³⁸¿Xie' laca li'ilu bene Egipto

enu uri'i condra gobierno, nu chu unguya'lu tacu mili bee bene'lu enza lu dañi achi, li'ibeei enu unguuti bee bene la?

³⁹Che uni Pablo lu comandante ze'e:

—Li'á neca bene Israel, li'á ungula eyeche Tarso nú nchiñi lu estado Cilicia, tucu eyeche nu neca equie nu lle'na lu iliu ze'e. Uri'i faura uzela nú nia lubee benequie'.

⁴⁰Chequie uzela comandante ze'e nu utsuli Pablo lu escalera ze'e, nu uri'illa seña cuna yalla lubee bene ze'e nú zaca beei. Nu chenu uzaca beei unilla hebreo lubeei nú unilla:

22 —Yehua bee bene uxu cuna beelá bee bene enu nucua'a ca'a, uzu'cu' diacahua lunú nia luhua equie cuenda' li'á.

²Chenu ubene'beei nú rni Pablo hebreo lubeei, máse ucua'a chibeei, nu unilálla lubeei:

³—Li'á neca bene Israel, nu ungula eyeche Tarso nú nchiñi lu estado Cilicia, pero ca'a Jerusalén ube'ta ru'cua nu ulaxcuela Gamaliel uzete' li'á ye nú xa neca ley' bee benea'ahua enu udetela, nu diquinu' arquia udu'a ana arquia nú sibia'a lu Diose tucu nú le'ca rri'ihua nee.

⁴Chequie uri'i condraa bee bene enu nzeli arqui' Jesucristo, hasta nú ungutia li'ibeella, sia bee una'a urre sia bee niyu una'tsea beella udu'a beella ni'cu'. ⁵Ule'ya enu máse neca equie nu rnibiya' lu ye bee ule'ya cuna ye bee usticia' bee bene Israel nediya' beella nú neli nucua'. Xne li'ibeella uliqui' beella tucu ichi' lua para nú ulubea nucua' lubee sa'ahua bee

bene Israel enu nucua'a eyeche Damasco para nú cua'na bee bene enu nzeli arqui' Jesucristo eyeche ze'e, nu na'tsea li'ibeella nu nzelayua li'ibeella Jerusalén para nú dete castiya li'ibeella.

Uni Pablo xa uchili arqui'lla Jesucristo

(Hch. 9:1-19; 26:12-18)

⁶Pero diqui nú nza'a lu inziu, chenu nze riñala eyeche Damasco, tucu rrebibichia tu'natsia ulaca tucu ellie'e enza liñibe nu udu'llie'e ellie'e ze'e diqui abenchila' elu sea, ⁷nu uzana'a luyuu. Che ubenea tucu chii enu uni: “Saulo, Saulo, ¿xinu rri'i condralu li'á?” ⁸Nu unidichia'a: ¿Tilu Detá? “Nu ucuaquinu: Li'á neca Jesuse Nazaret enu rri'i condralu.” ⁹Bee bene enu nzenua ulañi' beella ellie'e ze'e nu ulliqui beella, pero la ri'ibeella beya' lunú uni chii ze'e lua. ¹⁰Chequie unidichia'a: “Detá, ¿xi niarquillu nú ri'á?” Nu uni Jesucristo lua: “Uzetee. Nu uquiaa ri'i seidu inziu nú nzalu eyeche Damasco, ze'e nii bene lulu lu ye nú ri'ilu.” ¹¹Nu lunú la bi'ya'a uri'i ellie'e ze'e, chequie bee bene enu nzenua una'tse beella yaa nu nza'aru eyeche Damasco.

¹²'Ze'e nzucu tucu niyu enu sucu' ye nú rnibiya' ley' Moisés li'illa leella Ananías, nu ye bee bene Israel enu nucua'a eyeche Damasco nu'lu li'illa nú nehuañilla tucu nú neli neca. ¹³Ananías quie' ube'ta bi'ya li'á, nu chenu uriñalla lua unilla: “Saulo, nee bi'ya zecalú. Hora

ze'e ubi'ya zecaa nu ulañia li'illa.”
¹⁴Chequie unilla lua: “Diose' bee bene'ahua enu udetela ucañi li'ilu para nú ri'ilu beya' xa niarqui'nu nú ri'ilu, cuna nú lañi'lu Jesucristo nu yene'lu chiinu li'inu enu rri'i tucu nú neli neca. ¹⁵Para nú chálu chetixiule'elu stichia'nu lu ye bee bene iliulabe cuna nú ixiule'elu lubeei lunú ulañi'lu cuna lunú ubene'lu. ¹⁶Nee la lea'lu. Utsuli nu urinza, una'cu' lu Jesucristo para nú lecaxi naalu lu cuenda' stulalu.”

Uni Pablo lunú xa uyalla lubee bene enu la neca bee bene Israel

¹⁷Chenu ubenchila'a ca'a Jerusalén uya'a liñi Indu llene uya'nacua lu Diose, nu ulle'ca xi neca nú uni xcala'a. ¹⁸Ulañia Jesucristo nu uninu lua: “Uquiene, yexetsia uchiu'u Jerusalén, xne la ri'i bee bene caso lunú niilu lubeei equie cuenda' li'á.” ¹⁹Che unia lunu: “Li'ibeei nediya' beei nú uya'a ye bee liñi indu nu una'tsea ye bee bene enu nzeli arqui' li'ilu, nu udua'a beella ni'cu' nu uzeteche'a li'ibeella. ²⁰Nu chenu unguuti bee bene Esteban enu udixiule'e stichia'lu, ze'e nzua rnia nú neca nze'ca nú atilla, nu hasta nú ubi'yaa xucu bee enu unguuti li'illa.” ²¹Pero uninu lua: “Uquia, li'á xe'la li'ilu istu hasta lubee bene enu la neca bee bene Israel.”

Udu'u beei Pablo liñi cuartel

²²Hasta nucua'tsia uzelabeei ubene'bee nu uquixiebee rixialibeei nú unibeei:

—iBenequie' la yala nú huañilla! iUtihua li'illa!

²³Nu lunú chu rixialilábee utsi'qui beei xucu beei enza yaa, nu le'ca utsi'qui beei yuu be'cha' enza yaa, ²⁴chequie unibiya' comandante ze'e nú du' bee sundado Pablo liñi cuartel, nu unibiya'lla nú zeteche'bee Pablo para nú tsiru'ulla xinu rixiali bee bene contra li'illa scua. ²⁵Pero chenu ullica'cuu beei Pablo para nú zete'che'bee li'illa, unilla lu capitañi enu nzu ze'e:

—¿Xie' nu' modo zete'che'hua tucu bene Roma, sin nú chiu'ulue lunú xi uri'illa la?

²⁶Chenu ubene' capitañi ze'e nucua', che uyatixiule'ella lu comandante ze'e nu unilla lulla: —Ubi'yacuru xa ri'inulu benecua', xne bene Roma benecua'.

²⁷Chequie uya comandante ze'e elu nzu Pablo, nu unidichia'lla lulla: —¿Xie' neli nú bene Romalu?

Nu ucuaqui Pablo nú unilla: —Neli nucua'.

²⁸Nu uni comandante ze'e lulla: —Li'á huaxi dimi udixiua para nú neca bene Roma.

Nu ucuaqui Pablo nú unilla: —Pero li'á desde nú unguula neca bene Roma.

²⁹Chenu ubene' bee sundado enu nze zeteche' Pablo nú necalla bene Roma chu ulluna'bee lulla. Nu hasta comandante ze'e ungabiya' nú neca Pablo bene Roma, nu ulliquilla xne unibiya'lla nú ullica'cuu bee sundado Pablo.

Nzu Pablo lubee usticia' bee bene Israel

³⁰Stucu bichia niarqui' comandante ze'e nú ri'i nze'calla

beya' xinu rri'i condra bee bene Israel Pablo. Nu unibiya'lla nú yete'sa' bee ule'ya enu rnibiya' lubee ule'ya cuna bee usticia, nu uhualla Pablo utsulla ante lu yebeella.

23 Chequie ubi'ya Pablo lubee usticia ze'e nu unilla:

—Bee sa'a bee bene Israel, diqui nú nehuañia nu hasta bichia nee la nchiñi nú necha neca elliebacua lu Diose, xne nediyaa xa nehuañia.

²Chequie Ananías, ule'ya enu mase neca equie nu rnibiya' lu ye bee ule'ya, unibiya'lla lubee enu nucua'a axu elu nzu Pablo para nú xutse nze'e nda'gu ru'u Pablo. ³Pero ucuaqui Pablo lu ule'ya ze'e:

—iLe'ca scua ri'inu Diose li'ilu, bene enu niquichia' le! ¿Lanu ca'a nzuculu para nú hualulue tucu nú rnibiya' ley? Nu, ¿xiquie nú rri'ilu tucu nú la nibiya' ley, nu rnibiya'lu nú xutse benene ru'a?

⁴Chequie uni bee bene enu nucua'a ze'e lu Pablo:

—¿Xie' scua sucu' ru'ulu lu ule'ya' Diose enu máse neca equie la?

⁵Nu uni Pablo:

—Utsulachihua xne la ri'á beya' nú necalla ule'ya enu máse neca equie. Xne lu ichi' Stichia' Diose rni: “La zucu' ru'ulu lu bene enu rnibiya' lachilu.”

⁶Chenu uri'i Pablo beya' nú textcua'a bee bene ze'e neca bee saduceo, nu textcua'a beei neca fariseo, chequie juerte uni Pablo:

—Bee sa'a, li'á neca fariseo, nu lliana' fariseo necaa. Nu equie nú nzeli arquia nú huañi zeca bee benenguti enze'e rlualu bee benene lu cuendaa.

⁷Chenu uni Pablo scua, uquixie bee fariseo cuna bee saduceo nú rnixuu beei lu sa'beei, nu unga chiucu textcua'a beei. ⁸Xne la chili arqui' bee saduceo nú huañi zeca bee benenguti, nu le'ca la chili arqui'beei nú nu' bee ángele, cuna bee espíritu, pero bee fariseo nzeli arqui' ye bee nucua'. ⁹Chequie lunú sana' nucua'a beei ze'e. Che chu utsuli chiucu chuna bee ulaxcuela enu reca ley, li'ibeella enu neca bee fariseo, nu unibeella:

—Benequie' lecaxi nú necha neca uri'illa, pianu tucu espíritu urre tucu ángele unilulla, bi'yacuruhua tunu ca rri'ahua condra Diose.

¹⁰Chenu ulañi' comandante ze'e nú másela rni xuubeei, chequie ulliquilla tunu cá su'be beei Pablo. Nu unibiya'lla nú ye'ta bee sundado hua Pablo leta bee bene ze'e nu uya' zeca beei li'illa liñi cuartel.

¹¹Chenu uyu'u rula' stucu bichia rula', ulube'lu Jesucristo lu Pablo nu uninu lulla:

—Udu' ana arqui'lu Pablo, xne tucu nú unilu lu cuendaa lubee bene ca'a Jerusalén, le'ca scua nilu lu cuendaa lubee bene Roma.

Unga tucu necatse beei nú útibeei Pablo

¹²Bichia rrucu, chiucu chuna bee bene Israel unga tucu ungatse stichia' beei para nú útibeei Pablo, nu unibeei nú lecaxi acubeei nu lecaxi hue'beei hasta nú útibeei li'illa.

¹³Máse de chiu'a neca bee niyu enu uni scua. ¹⁴Nu uyani'beei lubee ule'ya enu rnibiya' lubee ule'ya cuna lubee bene enu rnibiya' lubee bene Israel, nu unibeei lubeella:

—Li'iru unilaru nú lecalí xi da'curu hasta nú útiru Pablo.

¹⁵Nee, li'ihua cuna ye bee usticia una'cu'hua lu comandante nú ye'tayuulla Pablo ye'e luhua, uni'tsiahua lulla nú niarquihua nú ri'i nze'cahua beya' xa neca lu cuenda'lla. Nu li'iru nellua'a tsiñalaru para nú útiru li'lla ante nú riñalla luhua.

¹⁶Pero ubene' lliana' zana Pablo nú rnibeei scua, che uyai ru'u cuartel nu udixiule'i lu Pablo lunú unibeei lu cuenda'lla. ¹⁷Nu chu ubixia Pablo tucu bee capitañi ze'e nu unilla lui:

—Chiu'u arqui'lu uya' niyu e'ne' quie' lu comandante para nú nii lulla tucu resuna.

¹⁸Che unguya' capitañi ze'e niyu e'ne' lu comandante nu uni capitañi ze'e lulla:

—Pablo enu nchiñi ni'cu' ubixia li'á nú nzelayua niyu e'ne' quie' lulu para nú nii lulu tucu resuna.

¹⁹Chequie una'tse comandante ze'e ya niyu e'ne ze'e, nu unguya'lla li'i tucu chú nu unidichia'lla lui:

—¿Xi niarquihua niilu lua?

²⁰Nu uni niyu e'ne' ze'e lu comandante:

—Bee bene Israel tucu ungatse stichia' beei para nú nacu' beei lulu nú ye'e uya'lu Pablo ante lu ye bee usticia, nitsiabeei lulu nú niarquihua nú ri'i nze'ca beei beya' xa neca lu cuenda'lla. ²¹Pero la chili arqui'lu nú nibeei lulu, xne máse de chiu'a bee benecua' cua'a quiee a'chi' beei li'lla lu inziu, nu uniila beei nú la acu beei nu la hue' beei hasta nú úti beei li'lla. Nee,

nucua'a tsiñatsia beei nu nzuquiee beei lunú nilu.

²²Chequie uni comandante ze'e lu niyu e'ne' ze'e nú yai, nu leca tilu nii lunú unii lulla.

Uxe'la beei Pablo lu gobernador Félix

²³Chequie ubixia comandante ze'e chiucu capitañi, nu unibya'lla nú quiete'sa' bee capitañi ze'e chiucu ayu'u bee sundado enu cha e'ya nu setenta bee sundado enu ricu huayu nu chiucu ayu'u bee sundado enu uya' lanza para nú chue beei eyeche Cesarea riquie' rula'. ²⁴Nu le'ca unibya'lla nú ye'tayuu bee sundado huayu ricu Pablo, nu unilla lubeei nú ri'i ucu beei Pablo para nú riña nze'calla lu gobernador Félix. ²⁵Nu unguya' beei tucu carta nú uxe'lalla nú rni:

²⁶“Li'á Claudio Lisias, ri'á saludar li'ilu detá gobernador Félix, li'ilu enu chiqui' neca equie.

²⁷Bee bene Israel una'tse beei niyuquie', necala nú nze utibeei li'lla, pero chenu ungabiyaá nú necalla bene Roma, che uya'a cuna bee sundadoa uya'hualla leta yabeei. ²⁸Nu lunú niarquia ri'á beya' xinu rana arqui'bee li'lla, chequie unguyalla lubee usticia' beei, ²⁹che uri'á beya' nú equie cuenda' bee ley' beei rana arqui'bee li'lla, pero laca equie nucua' nú riala nú atilla, ni' nú llutsella ni'cu'. ³⁰Nu lunú ungabiyaá nú uri'ila bee bene Israel elliebacu' nú útibeei li'lla, enze'e xe'lalla lulu, nu unila lubee bene enu rana arqui' li'lla nú cuna li'ilu tsúxcua'a beei lunú xi

niarqui' beei cuna li'illa. Nucua' neca nú rixiule'a lulu."

³¹Chenu uyu'u rula', tucu nú unibiya' comandante ze'e, chu unguya' bee sundado Pablo eyeche Antípatris. ³²Bichia rruccu bee sundado enu nza e'ya ubenchila'beei ru'u cuartel, nu bee sundado enu nchiucu' huayu unguya'beei Pablo eyeche Cesarea. ³³Chenu uriña beei eyeche Cesarea, udete'beei carta' comandante ze'e ya gobernador, nu le'ca udete' cuenda beei Pablo lulla. ³⁴Chenu ulaxu nú ungula gobernador ze'e lu carta, unedichia'lla lu Pablo nú cábenella. Nu chenu ungabiya'lla nú neca Pablo bene Cilicia, ³⁵che unilla lu Pablo:

—Chenu ye'ta bee bene enu rana arqui' li'ilu, che yenea lunú nilu.

Nu unibiya'lla nú ri'iucubeei Pablo ru'u palacio' Herodes.

Lunú uni Pablo lu gobernador Félix

24 Chenu udete ayu' bichia, ule'ya Ananías enu máse neca equie nu rnibiya' lu ye bee ule'ya, uriñalla eyeche Cesarea cuna chiucu chuna bee usticia' bee bene Israel nu cuna tucu abogado enu lee Tértulo. Nu uyabeella lu gobernador para nú uricu'qui'ya beella Pablo. ²Chenu uriñayu beei Pablo, uquixie Tértulo nu uniquiyalla lu cuenda' Pablo nu unilla lu gobernador Félix:

—Che'tsalu detá gobernador, equie cuenda' li'ilu nellua'a nze'caru, nu equie nú reca elliebacu'lu huaxi beenú sibi' recache' lachiru. ³Diqui bee luhuare neca conforme bee

bene lu ye beenú rri'ilu detá gobernador Felix, li'ilu enu chiqui' neca equie, che'tsa dexquixiulu. ⁴Pero para nú la ri'i le'a li'ilu, ziquia lulu nú yene'lu tucu rratu lunú niru lulu. ⁵Niyu quie' ungabiya'ru nú necalla xi neca elichia leta bee bene Israel, nu diqui lu iliulabe enzeella nu rri'illa nú rliu bee bene, li'illa necalla enu rnibiya' lubee bene enu rri'chia bee bene Nazareno. ⁶Nu le'ca uniarqui'lla nú ri'illa nú aca indu'ru xi neca tucu luhuare nú la zibi', enze'e una'tseru li'illa nu niarqui'ru nú ari'iru elusticia tucu nú neca ley'ru. ⁷Pero chenu uriña comandante Lisias cuna bee sundado'lla nu uhuaxu'ulla Pablo leta yaru. ⁸Nu uni comandante ze'e nú lulu ye'ta bee enu rri'i condra Pablo, neequie li'i e'culu nu' modo nedichia'lu lubeella para nú ri'ilu beya' nú neli nú rricu' quiyaru li'illa.

⁹Nu bee bene Israel enu nucua'a ze'e unibeella nú neli ye bee nucua'. ¹⁰Nu chu uri'i gobernador ze'e seña lu Pablo para nú nilla, nu unilla:

—Equie nú nediyaa nú hua'ttula rnibiya'lu lu nación Israel scua tucu nzutse arquia cuaquia lulu lunú rricu'quiya beella li'á. ¹¹Lecaxi neriña' para nú ri'ilu beya' nu necatsia chi'chiucu bichia nú uriña Jerusalén, para nú detea ula'na lu Diose. ¹²Nu lecati uchu'u li'á nú rnixua cuna ni' tucu bee bene, nu la tsurechea bee bene liñi Indu llene Jerusalén, nu ni' liñi beelá bee indu, nu ni' leta eyeche ze'e. ¹³Bee benequie' lecaxi lube' beei nú neli lunú

rricu'quiya beei li'á. ¹⁴Pero lunú neli neca, necane tucu nú nzeli arquia Jesucristo nu inziucua' neca nú nzequia nu sibi'a lu Diose' bee bene'ahua enu udetela, nu rni bee benequie' nú laca nucua' inziu' Diose, pero li'á rri'á scua equie nú nzeli arquia ye beenú nze'ta lu ley cuna beenú uquie'e bee profeta. ¹⁵Tucu nú nzeli arqui' bee benequie' Diose le'ca scua nzeli arquia li'inu, nú huañi zeca bee benenguti, masia nú neca beella enu uri'i nú necanze'ca nu masia nú neca beella enu uri'i nú necha neca. ¹⁶Enze'e rcua'na nú huañia tucu nú neli neca lu Diose para nú la nchiñi nú necha neca elliebacua lunu, nu ni' lubee bene.

¹⁷'Necala huaxi lana nú uchiu'a lachia, nu hasta neelá ubenchila' zeca lachia, nu ubelayua beenú uxe'la bee bene para bee bene elitsi, nu le'ca ubelayua u'na lu Diose.

¹⁸Nucua' neca nú rri'á liñi Indu llene Jerusalén chenu uchu'u bee bene Israel enu nze'ta enza Asia li'á, pero uri'ilá tucu nú rnibiya' ley para nú lecaxi naa. Nu leca huaxi bene ze'e nu le'ca lá tsurechea bee bene. ¹⁹Nee bee bene enu una'tse li'á, li'ibeei riala nú ye'ta beei ca'a lulu para nú nibeei xi uri'á nú rana arqui'beei li'á. ²⁰Urre ni bee bene enu nucua'a ca'a xi equiya uchu'u beei nú uri'á chenu uya'a lubee usticia' bee bene Israel. ²¹Lunú uri'itsia chenu nzua lubeei nú juerte unia: “Equie nú nzeli arquia nú huañi zeca bee benenguti. Enze'e rri'i condra beei li'á nee.”

²²Chenu ubene' gobernador Felix nucua', nu lunú nediya'la'lla xa

neca inziu' Jesucristo nú necuqui neca, che utsa'nalla nucua' para stucu bichia nu unilla lubee bene ze'e:

—Chenu ye'ta comandante Lisias, che ri'i nze'caa beya' xa neca lu cuenda'hua.

²³Chequie unibiya' gobernador ze'e lu capitañi nú ri'i uculá beei Pablo, pero zelabeei nú ri'illa lunú niarqui'lla nu la cábeei nú ye'tabi'ya bee bene enu rquiete'lla li'illa.

²⁴Chenu udete chiucu chuna bichia, uriña zeca gobernador Felix cuna una'alla Drusila enu neca bene Israel. Chequie unibiya'lla nú ye'ta Pablo, nu ubene'beella lunú uni Pablo xa chili arqui' bee bene Jesucristo.

²⁵Pero chenu uquixie Pablo nú unilla nú rqui'ña nú huañi bee bene tucu nú rialane, nu la tsana' bee bene nú ri'i elliebacu' nú necha neca ana lubeei, nu nze'ta bichia nú dete' bee bene cuenda lu Diose, chequie chiqui' ulliqui Félix nu unilla lu Pablo:

—Uquia'a. Bixiaca li'ilu stucu bese chenu llu'chaa.

²⁶Pero Félix dimi le'ca nzuquieella nú dete' Pablo yalla para nú la'alla Pablo, enze'e ubixialla Pablo huaxi bese para nú nilla lulla. ²⁷Scua udete chiucu lana, che uchiu'u Félix nú ungalla gobernador nu uyu'u Porcio Festo luhuare'lla. Nu lunú niarqui' Félix nú ya'na nze'calla lubee bene Israel, che néla'alla Pablo.

Lunú uni Pablo lu Festo

25 Chenu udete chuna bichia nú uriña Festo eyeche Cesarea para nú acalla gobernador, che uyalla Jerusalén, ²ze'e bee

ule'ya enu rnibiya' lubee ule'ya cuna bee bene Israel enu neca equie uriñabeella lu Festo nu uξανabitsi beella lu cuenda' Pablo lulla. ³Nu uziquiree beella lulla nú xe'lalla Pablo Jerusalén. Scua niarqui'beella xne neca'la' beella nú úti beella Pablo lu inziu. ⁴Pero ucuaqui Festo lubeella nú eyeche Cesarea nchiñi Pablo ni'cu', nu la lea' nú benchila' Festo ze'e, ⁵nu unilla lubeella:

—Bee bene enu rnibiya' letahua, li'ibeella tsebeella Cesarea, nu tunu nu' xi uri'i benecua', ze'e nibeella lunú xi uri'illa.

⁶Stucu se xunu bichia urre se xi'i bichia uzucu Festo Jerusalén, cheela ubenchila'lla Cesarea. Stuculá bichia uzuculla elu rnibiya'lla. Nu unibiya'lla nú ye'ta yuu beella Pablo. ⁷Chenu uriña beella cuna Pablo, bee bene Israel enu nze'ta enza Jerusalén, ube'tabica beella lu Pablo nu rricu'quiya beella Pablo nú uri'illa huaxi beenu chiqui' necha neca añinzuca nú ni' tucu nú unibeella né aca beella alube' beella nú neli necane. ⁸Chequie ucuaqui Pablo lubeella:

—Ye nú rni ley' bee bene Israel sucua bee nucua', nu lá ri'á nú necha neca lu Indu llene Jerusalén nu ni' lu arre César.

⁹Pero niarqui' Festo nú ya'na nze'calla lubee bene Israel, chequie unidichia'lla lu Pablo:

—¿Xie' niarqui'lu nú chalu Jerusalén para nú ze'e hualurune lu cuenda'lu tunu neli urre la neli lunú rni beella lu cuenda'lu la?

¹⁰Chequie ucuaqui Pablo nú unilla:

—Lubee usticia Roma nzua elu riala nú chiu'lulue lu cuenda' nú xi uri'á, li'ilu nediya' nze'ca'lu nú lá ri'á ni' tucu nú necha neca lubee bene Israel. ¹¹Tunu uri'á tucu nú necha neca nú riala nú atia, lacá nú atia. Pero tunu la neli ye lunú rnibeella nú uri'á, lecati riala dete' cuenda li'á lubeella mejora dete'a lu arre César.

¹²Chequie chenu ulaxu nú uni Festo lubee bene'lla enu rni nú xi riala aca, unilla lu Pablo:

—Li'ilu unacu'lu nú du'inzaa li'ilu lu arre César. Nee du'inzaa ali'ilu lulla.

Nzu Pablo lu arre Agripa

¹³Chenu udete chiucu chuna bichia, uriña arre Agripa cuna Berenice Cesarea nu nze'ta bi'yabeella gobernador Festo. ¹⁴Nu lunú huaxi bichia ucua'a beella ze'e, che ubedichia'nu Festo arre Agripa lu cuenda' Pablo, nu uni Festo lulla:

—Ca'a utsa'na Felix tucu niyu ni'cu'. ¹⁵Chenu uya'a Jerusalén, bee ule'ya enu rnibiya' lubee ule'ya cuna bee bene enu rnibiya' lubee bene Israel unikiya beella lu cuenda'lla lua, rnacu' beella nú nibiya'a nú atilla. ¹⁶Pero li'á unia lubeella nú bee usticia Roma la neca costumbre' beella nú nibiya' beella nú ati tucu bene ante nú detella lubee enu rri'i condra li'illa para nú nibeai tunu neli lunú uri'illa urre la neli. ¹⁷Enze'e, chenu ube'ta bee bene Israel ca'a, la le'a, stucu bichia chu uzucua'a lu xleta elu rnibiya'a nu unibiya'a nú ube'tayu beei niyu cua' lua.

¹⁸Pero bee bene enu ube'ta para nú

uxanabitsi beei xi uri'illa, né ricu' quiya beei nú necha neca li'illa tucu nú uri'á elliebacu'. ¹⁹Lunú uxana bitsitsiabeei lu cuenda'lla neca equie bee costumbre'beei, cuna lu cuenda' tucu bene enu lee Jesuse enu ungutí, pero Pablo uni nú nehuañi Jesuse ze'e. ²⁰Nu lunú la ri'á beya' xa ri'á equie cuenda' bee nucua', che unidichia'a lu Pablo tunu niarqui'lla nú chálla Jerusalén para nú tsúxcua'a bee nucua' ze'e. ²¹Pero li'illa unacu'lla nú detella lu arre César para nú tsúxcua'a lunú rnibeei lu cuenda'lla, enze'e unibiya'a nú nchiñiche'calla hasta nú aca ana nú xe'laalla lu arre César.

²²Chequie uni arre Agripa lu Festo:

—Tunu nu' beya'e, le'ca nua niarquía yenea lunú rnilla.

Nu ucuaqui Festo nú unilla:

—Ye'e yene'lu lunú nilla che.

²³Stucu bichia, ñia utsuche' arre Agripa cuna Berenice uriña beella cuna bee bene enu rnibiya' lubebe sundado cuna beelá bee bene enu neca equie eyeche ze'e, uyu'u beella liñi ni'i elu yene' beella lunú ni Pablo, che unibiya' Festo nú uyatucu beei Pablo, ²⁴nu uni Festo:

—Arre Agripa, cuna yehua enu nellua'anuru ca'a. Bene enu nzuquie', ye bene Israel nu sia Jerusalén nu sia ca'a, nze'ta beei lua rnacu' beei nú atilla. ²⁵Li'á la llela ni'tucu equiya nú uri'illa nú riala nú atilla. Nu li'illa unacu'lla nú detella lu arre César elu tsuxcua'e lu cuenda'lla, nu udu' arquia nú xe'lalla lu arre César. ²⁶Pero lállelaa xi quie'a

lu cuenda'lla lu ichi' nú xe'la lu arre César enu rnibiya' lua, enze'e detealla lu yehua, nu máse necane lulu arre Agripa para nú chenu ulaxu nú unidichia'hua lulla lunú rqui'ña nú nedichia'hua lulla, che nu' xi quie'a lu cuenda'lla. ²⁷Xne se'ca nú la neca nze'ca nú xe'la tucu bene enu nchiñi ni'cu' lu arre César, tunu la nia xi uri'illa.

Lunú uni Pablo lu arre Agripa

26 Chequie uni arre Agripa lu Pablo:

—Nu' modo nilu lu cuenda'lu.

Che uletsa Pablo yalla nu uquixiella unilla:

²—Chiqui' ñia nzu arquia nú unga uriña lulu nee arre Agripa para nú nia lulu, nu cuaquia lulu ye nú rni bee bene Israel lu cuendaa. ³Xne li'ilu nediya'nze'calu ye bee costumbre' bee bene Israel cuna ta beenú rri'i nú rnixuu beei lu sa'beei. Enze'e nacua lulu nú tsuquieelu nu yene'lu lunú nia.

Lunu xa uhuañi Pablo ante nú chululla Jesucristo

⁴'Ye bee bene Israel nediya' beella xa uhuaña cuna li'ibeella sia lachia nu sia Jerusalén desde nú lle'na, ⁵nu le'ca nediya'beella nucua', enze'e nu' modo nibeella tunu niarqui'beella, nu desde lle'na neca fariseo, nu bee fariseo neca bee enu máse nzequiee ley' bee bene Israel. ⁶Nu nee nzua ca'a nu uri'ibeella nú uriña lubebe usticia equie nu nzeli arquia nú ri'i Diose nú huañi zeca bee benenguti, tucu nu

ucuaqui u'nanu lubee bene'ahua enu udetela. ⁷Nu nucua' neca nú nucua'aquiee lu chi'chiucu texcua'a bee bene Israel nú tsa'alu Diose nú sibi' beella lunu bichia si rula', nu nee arre Agripa, equie nú nzeli arquia scua rri'i condra bee bene Israel li'á. ⁸¿Nu xie' rri'ihua elliebacu' nú neriña' nú ri'i Diose nú huañi zeca bee benenguti la?

Uni Pablo xa uri'i condrala bee bene enu nzeli arqui' Jesucristo

⁹Hua'tu uri'á elliebacu' nú nu' xi rqui'ña ri'inua bee bene enu nzeli arqui' Jesuse Nazaret, ¹⁰nu scua uri'á Jerusalén. Cuna ichi' nú uliqui' bee ule'ya enu rnibiya' lubee ule'ya, huaxi bee bene enu nzeli arqui' Jesucristo udu'a beella ni'cu', nu unguuti bee bene li'ibeella, nu le'canua rnia nú atibeella. ¹¹Huaxi bese udetea castiya li'ibeella nu uri'á juerza li'ibeella nú tsana' arqui'beella nú nzeli arqui'beella Jesuse, scua uri'á ye bee liñi indu, nu lunú chiqui' rana arquia li'ibeella che uyanala li'ibeella hasta stucu bee eyeche.

Uni zeca Pablo nú xa uchili arqui'lla Jesucristo

(Hch. 9:1-19; 22:6-16)

¹²Nu para nucua' nza'a enza eyeche Damasco, cuna ichi' nú uliqui' bee ule'ya enu rnibiya' lubee ule'ya. ¹³Pero chenu nza'a inziu detá arre Agripa ulaña tucu ellie'e enza liñibe tucu rrebibichia, pero máse rdu'llie'e ellie'e quie lu ellie' bichia, nu udu'llie'e ellie'e ze'e ye elu nza'a cuna lubee bene

enu nzenua. ¹⁴Nu yeru uzana'ru luyuu, che uyenea tucu chi enu uni lua cuna dialu hebreo: "Saulo, Saulo, ¿xinu rri'i condralu li'á? Le'catsia li'ilu rri'ilu equiya lulu, tucu nú rri'i u'na' nú subee' li'i' icu' aca rucha." ¹⁵Chequie unia: "¿Tilu Detá?" Nu ucuaquinu nú uninu: "Li'á neca Jesuse enu rri'i condralu. ¹⁶Pero uzetee nu utsuli, xne ulubelua lulu para nú zibi'lu lua nu para nú niilu lubee bene lunú ulañi'lu nee cuna lunú lubea lulu. ¹⁷Li'á xe'la li'ilu lubee bene Israel, cuna lubee bene enu la neca bee bene Israel, nu li'á ri'á elietsa lulu para nú lecaxi ri'inubeei li'ilu, ¹⁸Xe'laalu lubeella para nú xa'lalu i'culubeella nú tsana' arqui'beella inziu nú necha neca, nu chequiee beella inziu nze'ca. Nu la zela beella nú nibiya' beze'lu lubeella nú chequiebeella inziu' Diose, nu chili arqui'beella li'á para nú aca perdona stula beella nu yucubeella lunú yucu beelá bene' Diose, li'ibeella enu lecaxi necha neca arqui' lunu."

Uzucu' Pablo nú uninu chenu ulube'lunu lulla

¹⁹Scua ungae arre Agripa, uzucua lunú uni Jesucristo lua chenu ulube'lunu lua. ²⁰Rluti eyeche Damasco udixiule'a stichia'nu, cheelá udixiule'ene Jerusalén cuna diqui lu iliu Judea, cuna lubee bene enu la neca bee bene Israel, unia lubeella nú che'e arqui'beella lu stula beella nu benchila' arqui'beella lu Diose, nu ri'ibeella tucu nú riala nú ri'ibeella para nú acachee nú

uche'e xa nehuañibeella. ²¹Nu equie cuenda' nucua' una'tse bee bene Israel li'á liñi Indu llene Jerusalén, nu niarqui'beella nú útibeeella li'á. ²²Pero cuna elietsa' Diose ca'a nzua hasta nee, nzenia stichia'nu sia lubee bene enu neca equie nu sia lubee bene enu la neca equie. Nu ye lunú rnia lubeella necane tucu nú uquie'e bee profeta cuna lunú uquie'e Moisés xa neca lunú nze'ta nú aca, ²³xne unibeella nú nehuana zeca Cristo nu atinu. Pero chenu unutilanu, li'inu necanu enu rlutilá uhuañi zeca leta bee benenguti, nu ixiu'e'enu lubee bene Israel cuna lubee bene enu la neca bee bene Israel xa tsila'a Diose li'ibeella.

Ucua'na Pablo nú xa chili arqui' arre Agripa Jesucristo

²⁴Chenu rni Pablo scua, che urixiali Festo nú unilla: —iNelocolo Pablo! Lunú chiqui' sete'lu nelocolo.

²⁵Pero ucuaqui Pablo nú unilla: —La nelocoa gobernador Festo. Lunú rnia neli necane, nu nelii.

²⁶Ca'a nzu arre Agripa, li'illa nediya'lla lunú rnia, enze'e sin nú lliquia rnia ante lulla. Li'á nediyanze'ca nú li'illa nediya'lla luye nú rnia xne lania equie beenú a'chi neca lunú leca tiri'ibeya'.

²⁷¿Nzelí arqui'lu lunú uni bee profeta la arre Agripa? Li'á nediya nú nzeli arqui'lu.

²⁸Chequie ucuaqui arre Agripa: —Steme'tsia nze ri'ilu ana nú a aca bene' Jesucristo.

²⁹Nu uni Pablo:

—Añinzuca nu lle'natsia uri'i, nu añinzuca nú másela rri'i, Diose niarqui' nú laca li'itsialu, sinoque le'ca ye bee bene enu riene' lunú rnia nee, nze'ta bichia nú acahua bene' Jesucristo tucu nú necaa bene'nu, añinzuca nú la acane cuna cadena quie'.

³⁰Chequie utsuli arre Agripa, cuna gobernador Festo cuna Berenice nu cuna ye beelá bee bene enu nzucu cuna li'ibeella ze'e.

³¹Chenu uchiu'uchu beella tucu chú uquixiebeella nú ubedichianu sa'beella. Nu rnibeella:

—Niyu quie' lecaxi uri'illa nú riala nú atilla, urre nú llutsella ni'cu'.

³²Nu uni Agripa lu Festo:

—Nu'beya' ala'a li'illa tunu né nacu'lla nú detella lu arre César.

Uxe'la beella Pablo Roma

27 Chenu unibeella nú xe'la beella li'iru Italia, che udete' cuenda beella Pablo cuna chiucu chuna bee bene enu nchiñi ni'cu' lu capitáñi enu lee Julio, enu rnibiya' lu tucu texcua'a bee sundado enu lee Augusto. ²Nu Cesarea uyu'uru liñi barco nu see enza Adramitio, nzula nú chiu'u barco quie' para nú chae enza lubee eyeche Asia. Le'ca unguya'ru Aristarco, bene Tesalónica, eyeche nú nchiucu' lu iliu Macedonia. ³Stucu bichia uriñaru eyeche Sidón, elu uri'i nze'ca Julio lu Pablo, uzelalla nú uyabi'ya Pablo bee bene enu rquiete'lla eyeche ze'e nu udete'beella lunú seca la'cha'lla. ⁴Chenu uchiu'uru Sidón udu'uru huelta stucu chú yuu Chipre nú netse lu inzatu', utsa'naru yuu ze'e cue'tseru chúbeca para nú la

chechu'u xe'taru bii xne nze'ta bii enza luru. ⁵Udete'ru lu inzatu' axu Cilicia cuna Panfilia, nu uriñaru Mira, tucu eyeche nú nebacu' lu iliu Licia.

⁶Ze'e uchu'u capitáñi tucu barco Alejandría nú nza enza Italia, nu unilla nú chu'uru liñi barco ze'e. ⁷Chabe' nza'aru huaxi bichia, nu chiqui' neriña' uriñaru enza lee Gnido. Nu lunú recasca' bii enza luru chequie nza'ru enza Salmón, nu udu'uru huelta Creta yuu nú netse lu inzatu'. ⁸Nu chiqui' neriña' nza'aru enza ru'u yuu ze'e lu inzatu', hasta nú uriñaru tucu luhua elu lee Buenos Puertos axu tucu eyeche nú lee Lasea.

⁹Nu lunú ule'ru, chiqui' necachi neca nú nza'aláru lu inzatu', xne nze'ta riñala tiambu nú aca nucuaa. Enze'e uni Pablo lubeella, ¹⁰nú unilla lubeella:

—Uzu'cu' diacahua, tunu chu nza'ahua la chanze'ca'ahua xne nu' beya' nú nitilu barco nu ri'chia ye beenú nuya' barco lu inzatu', nu nu' beya' nú hasta lia'ahua atia'ahua.

¹¹Pero capitáñi enu rnibiya' lubeesundado, máse uri'illa caso nú rni bene enu neca stene barco cuna enu senune, né ri'illa caso lunú uni Pablo. ¹²Nu lunú ze'e la neca nze'ca para nú dete'ahua tiambu nú nucuaa, che casi yebeella uri'ibeella elliebacu' nú chiu'uru ze'e, teria'ahua juerza nú riña'ahua eyeche Fenice, eyeche nú nchiucu' lu iliu Creta elu laca xe'ta' bii, ze'e dete'ahua tiambu nú nucuaa.

Unga tucu bii a'tsa' lu inzatu'

¹³Chequie uquixie nú unga tucu bii nú xexee nze'ta enza sur, nu

uri'ibeella elliebacu' nú ungala tucu nú uri'ibeella elliebacu' nú aca, uchiu'uru nú nza'aru lu inzatu' enza ru'u yuu Creta. ¹⁴Pero lle'nalá nza'aru lu inzatu' ze'e chenu uriña tucu bii a'tsa' nú lee Euroclidón, ¹⁵nu uquixie bii ze'e si'ña barco. Nu lunú nze'ta bii ze'e enza luru che lá cha' barco ze'e elu riala nú chae, nu utsana' beella nú unguya' barco ze'e li'iru enza elu si'ña bii li'i. ¹⁶Nu udete'ru di'chi tucu yuu lla'na nú lee Clauda nú netse lu inzatu', elu laca' bii a'tsa', chequie canoa nú naca'cuu di'chi barco ze'e, chiqui' neriña' uquie'erune liñi barco ze'e. ¹⁷Chequie chenu ulaxu nú uquie'eru canoa ze'e liñi barco, ullica'cuu beella diqui abenchila' barco ze'e cuna tuu para nú la nitilue, nu lunú xiqui beella nú cá chatse' barco ze'e lu eyuxi nú lee Sirte, che ulaca beella bee lona' barco ze'e para nú uya'e li'iru enza si'ña bii. ¹⁸Stucu bichia, le'ca esquie recasca' bii juerte lu inzatu' ze'e, nu uquixiebeella nú utsi'qui beella yuhua' nú nuya' barco ze'e lu inzatu'. ¹⁹Bichia rriuna una'tse beella lunú rqui'ña barco nu utsi'qui beellae lu inzatu'. ²⁰Huaxi bee bichia né aca achea' lubichia, ni lubees belaa, equie cuenda' bii a'tsa' nú unga lu inzatu' ze'e. Chequie li'iru la nzucua'luru nú tsila'alaru lu inzatu' ze'e.

²¹Nu lunú udetela huaxi bichia nú né da'curu, chequie utsuli Pablo arli'ti' beella nu unilla:

—Máse neca nze'ca para lia'ahua tunu uzucu'hua lunú unia nú né chiu'ahua Creta, nu la nehuana ulle'ca'ahua, nu lecaxi unitia'ahua

che. ²²Pero lecaxi ri'i nucua', la lliquihua xne ni'tucuhua la atihua, barco quie'tsia rila. ²³Xne Diose enu rnibiya' lua li'inu enu sibi'a lu uxe'lanu tucu ángele enu ulube'lu lua rula'quie'. ²⁴Nu uni ángele ze'e lua: "La lliquilu Pablo, xne rqui'ña nú detelu lu arre César, nu equie cuenda' li'ilu ni' tucu bee enu nze'ta liñi barco quie' la zela Diose nú atibeei." ²⁵Enze'e udu'hua ana arqui'hua, xne li'á nzeli arquia Diose, nu nediya nze'ca nú yalu tucu nú uni ángele lua. ²⁶Pero chellica barco quie' ru'u tucu yuu nú netse lu inzatu'.

²⁷Chenu udete chiñu' bichia nú nza'aru lu inzatu', rula' ze'e uriñaru enza ru'u inzatu' nú lee Adriatico, che chuquie' churquie nza barco rri'i bii, nu bee bene enu rri'i riña' liñi barco li'ibeei enu lee marineros, rula' ze'e tucu ulela' rula' uri'i bee bene ze'e beya' nú yamerotsia riñaru tucu ru'u yuu. ²⁸Chequie utexe beella calu aquiee inza elu nzuebeella, nu aquiee alalichi'i nu' xu'cu metro, máse lu ze'ela utexea'la beellae stucu bese, nu aquiee ala cheachi metro. ²⁹Nu xiqui beella nú cá chu'u barco ze'e lu quiee, chequie enza rqui' barco ze'e utsi'qui beella tacu gancho nú neca icu' lu inzatu' para nú tsuxe barco ze'e, nu ala' nú uye'ela luyuu nú secabeella. ³⁰Bee bene enu rri'i riña' liñi barco ze'e, uri'ibeei tucu nú si'quisca' beei bee gancho lu inzatu' enza lu barco ze'e para nú lacatsia beei canua, nu chu chu'ubeei liñii para nú yecaxu' beei. ³¹Pero udixiule'e Pablo lu capitañi cuna lubee sundado nu unilla, lubeella:

—Tunu la ya'na bee benequie' liñi barco, la tsila'ahua.

³²Chequie uchiecu' bee sundado tuu nú naca'cuu canoa ze'e nu uzana'e lu inzatu'.

³³Chenu nze'ta ye'ela luyuu uni Pablo lubeella nú acubeella, nu unilla lubeella:

—Ungala chiñu' bichia nú la a'tsehua nu lecalí xi udacuhua.

³⁴Li'á nia luhua nú rqui'ña nú acuhua para nú la atihua. Xne yehua la niti ni'tucu ichia equiehua.

³⁵Chenu uni Pablo scua, una'tsella tucu pá nu udete'lla che'tsa lu Diose ante lu yebeella. Chequie ule'ella pá ze'e nu uquixiella racullae.

³⁶Che uyu'u ana arqui' yebeella nu uquixiebeella le'ca udacubeella.

³⁷Chiucu ayu'u chuna ala chayu' nu' tucu neca yeeru enu nzelarú liñi barco ze'e. ³⁸Chenu ulaxu nú udacu beella hasta elu ubela' beella, che uti'chia beella trigo lu inzatu' para nú chacha barco.

Urila barco lu inzatu'

³⁹Chenu uye'e luyuu, bee bene enu rri'i riña' liñi barco lá ri'ibeella beya' cá luyuu uriñabeella. Ulañi'beella tucu xcuu inzatu' ze'e elu nu' eyuxi diqui abenchila'e, nu uri'i beella elliebacu' nú chebica beella barco ru'u eyuxi ze'e.

⁴⁰Chequie uchiecu' beella tuu nú naca'cuu bee gancho nú rri'i elietsa nú suxee barco lu inzatu' nu utsana' beella bee gancho ze'e lu inzatu', nu uxe'che beella aca nú rri'i elietsa nú see barco para nú quixie nú tsene. Chequie uletsa beella lona nú nchiucu' enza lu barco para nú zi'ña bii li'i, nu uquixie nú nza

barco enza ru'u inzatu' ze'e. ⁴¹Pero uhuatse' barco ze'e elu nu' huaxi eyuxi nu ullicae ze'e. Enza lue uhuatse' lu eyuxi nu ni' steme' lá cuñia'e, nu enza rqui'i uquixie rriila cuna juerza nú riu'u inza tsu'e.

⁴²Chequie niarqui' bee sundado nú nze utibeei bee preso para nú la xucu' yelabeei nu yecaxu'u beei.

⁴³Pero capitañi enu rnibiya' lube sundado ze'e lá zelalla nú acae scua, xne la niarqui'lla nú ati Pablo, che unibiya'lla nú bee bene enu reca xucu'yela rluti beella chu'ubeella lu inza nu xucu' yelatsia beella chiu'u beella ru'u inzatu' ze'e. ⁴⁴Nu che uchiu'u beelá beella equie bee ala cuna bee aca nú uri'ila barco ze'e. Scua utsila'a yeeru nu uriñaru hasta ru'u inzatu' ze'e.

Uriña Pablo elu lee Malta

28 Chenu ulaxu nú uchiu'u yeru lu inzatu' ze'e, che uri'iru beya' nú luyuu elu uriñaru netse lu inzatu' núlee Malta. ²Bee bene enu nucua'a luyuu ze'e chiqui' ñia uri'inze'ca beella luru, ucu'a beella quii nú ubichia'ru xne nucuaa nu le'ca rlaca quiuu. ³Chequie uquiete' sa' Pablo tucu añi yaalla aca bichi, nu chenu udu'lla aca ze'e luquii, uchiu'u xu'u tucu be'la leta aca ze'e lunú chiqui' nelee lu quii ze'e nu udacuquie'f ya Pablo. ⁴Chenu ulañi' bee bene Malta nú nzi'qui nala be'la ze'e ya Pablo, che unibeella lu sa'beella:

—Benequie', unguutilla bene, enze'e añinzuca nú ula'alla lu inzatu', pero añica atilla equie nú uri'lla.

⁵Pero uri'qui Pablo yaalla nu uzana' be'la ze'e luquii nu lecaxi

unga'lla. ⁶Yebeella nucua'aquiee beella nú tsequii ya Pablo urre tu'natsia zana'lla nu atilla. Pero chenu unga xeela nú ulañi'beella nú lecaxi zeca Pablo, che uche'e elliebacu' beella nú unibeella nú necalla tucu diose.

⁷Axu elu ullua'aru nucua'a yu' bene enu rnibiya' luyuu nú netse lu inzatu', li'lla leella Publio. Nu unilla nú cha'aru ni'lla, ze'e ullua'aru chuna bichia nu chiqui' ñia uri'inze'calla luru. ⁸Chequie nuxu pa'lla riti nu' xlee nu secalla ichia rene. Nu uyu'u Pablo elu nuxulla, nu chenu ulaxu nú unacu' Pablo lu Diose equie cuenda'lla, che uricu' Pablo ya Pablo equiella nu uyeca'lla. ⁹Chenu ungabiya' beelá bee bene enu riti enu nucua'a ze'e nucua', che uriñabeella elu nzu Pablo nu uri'iyecalla li'ibeella.

¹⁰Chequie huaxi beenú lia uliqui' beella luru equie nucua'. Nu chenu uyu'uru liñi barco nú nza'aru uliqui' beella ye nú quiñaru.

Uriña Pablo Roma

¹¹Chuna guu ullua'aru luyuu ze'e nú lee Malta, lu ze'elá uyu'uru liñi barco Alejandría uya'na barco quie' tiambu nú nucua ze'e. Nu lu barco ze'e nequiee chiucu diose enu lee Cástor cuna Pólux. ¹²Chequie uriñaru tucu eyeche nú lee Siracusa elu ullua'aru chuna bichia, ¹³Nu ze'e uchiu'ru nú nza'aru enza ru'u inzatu' nu uriñaru eyeche nú lee Regio. Chenu uye'e luyuu uchiu'ru ze'e nu nze'ta tucu bii enza sur, che bichia rruccu uriñaru eyeche nú lee Puteolí. ¹⁴Ze'e ulla'caru chiucu chuna bee bene ze'e enu le'ca nzeli

arqui' Jesucristo, nu unibeella nú ya'naru cuna li'ibeella nu uya'naru lubeella tucu xmana, cheelá nza'aru enza Roma. ¹⁵Bee sa'ahua enu nzeli arqui' Jesucristo, li'ibeella enu nucua'a Roma nediya'la'beella nú riñaru ze'e. Chequie uchiu'u beella nu ube'ta cha'calu beella li'iru hasta eyeche nú lee Foro de Apio nu eyeche nú lee Tres Tabernas. Chenu ulañi' Pablo li'ibeella ñia utsu arqui'lla nu udetel'la che'tsa lu Diose. ¹⁶Chenu uriñaru Roma, che udetel' cuenda capitañi ye bee preso lu comandante ze'e, pero uzela beella nú uzucu Pablo tucu ni'i rene, elu uri'i ucu tucu sundado li'illa.

**Udixiule'e Pablo stichia'
Jesucristo Roma**

¹⁷Chenu udetel' chuna bichia nú uriñaru Roma, ubixia Pablo bee bene Israel enu rnibiya' lubeel' bene Israel enu nucua'a ze'e. Chenu uyetesal'beella unilla lubeella:

—Bee sa'a bee bene Israel, li'á lecaxi uri'inua bee bene Israel ni'bee costumbre' bee beneahua enu udetela, pero li'ibeella una'tse beella li'á Jerusalén nu udetel' cuenda beella li'á lubeel' usticia Roma. ¹⁸Nu bee bene Roma cua', chenu ulaxu nú unia lubeella xa neca lu cuendaa che niarqui'beella nú la'a beella li'á, xne uri'ibeella beya' nú lecaxi uri'á para nú atia. ¹⁹Pero lá zela bee bene Israel, che unacua nú dete'a lu arre Césarpara nú tsuxcua'a nú xi uri'á lubeella, pero li'á lecaxi uri'á lubeella.

²⁰Enze'e ubixia li'ihua para nú ye'ta bi'yahua li'á para nú nia luhua nú equie nú nzeli arquia nú huañi zeca

bee benenguti, tucu nú le'ca nzeli arqui' beelá bee sa'ahua bee bene Israel, enze'e naca'cua cuna cadena quie'.

²¹Nu unibeella lulla:

—Li'iru lasca' yucu'ru ni' tucu carta nú nze'ta Judea elu nibeella luru equie cuenda'lu, le'ca nitucu bee sa'ahua enu rriña nu nze'ta enza Judea lecaxi nii condra beella li'ilu. ²²Pero niarqui'ru ri'iru beya' xa neca stichia'lu, xne riene'ru nú diqui bee luhuare rni condra bee bene religión cuqui cua'.

²³Chenu unibeella xi bichia yetel' sa'beella, nu chenu uriña bichia ze'e huaxi bee bene uyetesal' elu nzucu Pablo. Nu desde sila' nu hasta uchee unilla lubeella xa neca elurnibiya' Diose. Ucua'nalla xa chili arqui'beella Jesuse nu unilla elu rni equie cuenda'nu lu libro ley' Moisés cuna lunú uquie'e bee profeta. ²⁴Nu' beella enu uchili arqui' nú uni Pablo, pero nu' beella enu né chili arqui' lunú rnilla. ²⁵Nu lunú né aca tucu necatse beella, che uquixiebeella nú nziue beella, nu uni Pablo lubeella:

—Neli lunú uni profeta Isaías lubeel' beneahua enu udetela nú uni Espíritu Santo:

²⁶Uquia nu uni'i lubeel' benecua':

Nú añinzuca nú riene' beella,
pero lecaxi ri'i beella beya',
nu añinzuca nú ri'ya beella,
pero neca xi neca nú la
lañi'beella.

²⁷Xne unga nziti arqui'beella,
nu rri'ibeella tucu nú la
lañi'beella,

nu neca xi neca nú la yene'
beella para nú la lañi'beella

nu yene'beella nu ri'ibeella
beya'.

La zela beella nú ye'ta beella
lua para nú ri'á perdona
li'ibeella.

²⁸Enze'e urí'ihua beya' nú desde
nee, lube'e bene enu la neca bee
bene Israel nze ri'chia letse bee
bedichia' cua' para nú ri'ibeella
beya' xa ri'i Diose perdona li'ibeella.

²⁹Chenu ulaxu nú uni Pablo
scua, chu nzia bee bene Israel ze'e,
Chiqui' rnixuu beella lu sa'beella.

³⁰Chiucu lana uzucu Pablo ni'i
ze'e. Nu ze'e uriña ye bee bene
enu uyabi'ya li'illa. ³¹Nu sin nú
lliquilla udixiule'ella lubeella xa
neca elurnibiya' Diose, nu uzete'lla
stichia' Jesucristo li'ibeella sin nú
lecati cá.

Carta nú uquie'e San Pablo lubee bene Roma enu nzeli arqui' Jesucristo

1 Li'á Pablo, enu sibi' lu Jesucristo, Diose ucañi li'á nú aca apóstol'nu para nú ixiule'a bedichia' nze'ca'nu lubee bene.

²Hasta hua'tu, bee bedichia' nze'ca quie' nze'tae lu ichi' Stichia' Diose nú uquie'e bee profeta'nu. ³Bee bedichia' nze'ca quie' rni equie cuenda' Jesucristo enu rnibiya' lua'ahua nu chenu ube'tanu lu iliulabe ungulanu lubee familia' tuxie David, ⁴pero equie cuenda' Espíritu Santo necanu lli'ñi Diose xne uhuañi zecanu lu eluti, nu chiqui' rlu'cunu poder.

⁵Nu equie cuenda' Jesucristo ucañi Diose li'á nú necaa apóstol'nu para nú ixiule'ahua stichia'nu lubee bene, nú chili arqui'beella stichia'nu nu zucu' beellae xne seca beella li'inu. ⁶Nu le'ca nuuhua nebacu'la Diose leta bee bene enu ucañilanu, para nú acahua bee bene' Jesucristo.

⁷Enze'e rquie'a carta quie' luyehua enu seca Diose, li'ihua bee enu nucua'a Roma, li'ihua enu ucañila Diose nú acahua bee bene'nu. Diose Pa liñibe cuna Jesucristo enu

rnibiya' lua'ahua ri'inu nú cha nze'ca lucuenda'hua nu ñia tsu arqui'hua.

Niarqui' Pablo nú challa Roma

⁸Rluti nia che'tsa lu Diose equie cuenda' Jesucristo lucuenda' yehua xne yebbe luhua rni bee bene nú xa nzeli arqui'hua Jesucristo. ⁹Nu diquinu' arquia sibi'a lu Diose nu rixiule'a bedichia' nze'ca' lli'ñinu Jesucristo lubee bene, nu li'inu nediya'nu nú siempre rnacua lunu equie cuenda' li'ihua chenu rnacua lunu. ¹⁰Siempre rnacua lu Diose para nú nu' modo nzelabi'ya li'ihua tucu nú rri'á elliebacu'.

¹¹Xne nu' ana arquia nzelabi'ya li'ihua para nú ri'á elietsa luhua lu cuenda' Stichia' Diose, che tsuta'lá arqui'hua lu stichia'nu. ¹²Nu para nú ri'ihua elietsa lua nu ri'á elietsa luhua equie nú xa nzeli arquia'ahua Diose nu scua dua'ahua ana arqui'sa'ahua. ¹³Bee sa'a enu nzeli arquia'ahua Jesucristo niarquia nu ri'ihua beya' nú huaxi bese niarquia nzelabi'ya li'ihua, para nú dalalá bee bene enu chili arqui' Stichia' Diose letahua tucu nú unga lubeelá

bee eyeche elu uya'la pero hasta nee lá llucha yela bi'ya li'ihua. ¹⁴Xne cuendaa neca nú ixiule'a Stichia' Diose lu titse bee bene, sia lubee bene griego urre lubee bene enu la neca bee bene griego, lubee bene enu laca urre lubee bene enu reca. ¹⁵Enze'e chiqui' nu' ana arquia nzelabi'ya li'ihua para nú ixiule'a bedichia' nze'ca' Diose luhua enu nucua'a eyeche Roma.

Elurnibiya' nú rlu'cu Stichia' Diose

¹⁶Nu la tua rixiule'a bedichia' nze'ca' Jesucristo. Xne bedichia'cua' rlu'cu poder' Diose. Para nú yebee bene enu chili arqui' li'inu tsila'a beella, nu rluti bee bene Israel nu chelá bee bene enu la neca bee bene Israel. ¹⁷Xne equie cuenda' bedichia' nze'ca' Jesucristo rri'i bene beya' nu lunú nzeli arqui' bene Jesucristo la lu'cu bene dula lu Diose tucu nú nequie lu ichi' Stichia' Diose: “Nu bee bene enu la lu'cua' dula equie nú nzeli arqui'beella li'inu huañi beella diqui tiambu.”

Ye bee bene necha rri'i

¹⁸Lia'ahua nediya'ahua nú enza liñibe nze'ta castiya' Diose nu chiqui' juerte zeca bee bene enu la zucu' stichia'nu nu la ri'i tucu nú necane nu equie nú nehuañi beei scua rca nucua' nú chulu bee bene Stichia' Diose. ¹⁹Nu li'ibeei nediya'la'beei nú nu' Diose, xne ulube'nu lubeei nú neli nu' Diose. ²⁰Añinzuca nú la lañi' bene Diose pero desde chenu ungache' iliulabe rlañia'ahua ye nú ureche'nu, nu equie cuenda' ye nú ureche'nu

rria'ahua beya' nú leca xunga laxu poder nú rlu'cunu, nu li'inu necanu Diose, enze'e leca modo nú cachi' bene nú nu' Diose. ²¹Añinzuca nú nediya' bee bene nú nu' Diose pero la lu'cu bene ula'na lu Diose tucu nú rialane nu la dete' bee bene che'tsa lunu, sino que rri'itsia bee bene puro beenú necha neca, nu che neca xi neca nú nucua'abeei leta rula'. ²²Rnibeei nú chiqui' recabeei pero máse netundubeei. ²³Xne luhuare nú lu'cu bee bene ula'na lu Diose liñibe enu leca xunga ati, li'ibeei rlu'cubeei ula'na lubee diose enu la nehuañi, enu nuya' forma' bene, cuna bee nañi xi neca bella cuna iñi, cuna bee nañi enu rlu'cu tacu cuchiu'.

²⁴Enze'e utsana' arqui' Diose li'ibeei nú necha rri'ibeei, nu netú na nú rri'inubeei sa'beei, ²⁵luhuare nú chenalabeei Stichia' Diose nú neli neca, a'la nzenalabei bedichia' nú la neli neca. Nu rlu'cubeei ula'na lubee nú ureche' Diose, nu la lu'cubeei ula'na lu li'inu enu ureche' bee nucua', nu lu li'inu riala nú lu'cu bee bene ula'na diqui tiambu. Amén.

²⁶Enze'e utsana' arqui' Diose li'ibeei nú rri'ibeei nú necha neca. Nu huaxi bee una'a la ria' tucu nú neca beenchu una'a, sino que niarqui' beenchu le'ca sa' una'a beenchu. ²⁷Le'ca scua nu' bee niyu enu la na'tsea' bee una'a, sino que riu'u arqui'beei le'catsia sa' niyubeei, nu puro nú necha neca rri'ibeei elliebacu' lusa'beei. Niyu cuna niyu rri'i beei nú netú neca. Che le'ca li'ibeei rla'na beei castiya nú zecabeei.

²⁸Nu lunú lá ri'i caso beei Diose, enze'e utsana' arqui'nu beei lu elliebacu' nú necha neca rri'ibeei para nú ri'ibeei lunú la yala ri'ibeei. ²⁹Puro nú necha neca rri'ibeei, rlu'cubeei stucu una'a nu rlu'cubee una'a stucu niyu, huaxi nú necha neca rri'ibeei, rle'beei lu'cusca'lábeei stene'beei, ríaa arqui'beei, ruuti beei bee bene, rliunubeei bee bene, nezequiebeei, puro nú necha neca nzucu lubeei rri'ibeei, nu puro rnibeei lu cuenda' bee bene. ³⁰Le'ca se'tabeei bee bene, nu rlebeei lu Diose, la lu'cubeei ula'na lubee bene, secabeei nú chiqui' recabeei, nu nelliñabeei, ³¹chiqui' nzitibeei nu la tsalubeei stichia'beei, nu lecalí ti zecabeei, nu la hua'a arqui'beei bee bene. ³²Nediya'la'beei nú uni Diose nú bee bene enu rri'i scua rqui'ña nú zecabeei, castiya' Diose, añinzuca nú nediya'beei nucua' nu chu rri'isca'lábeei scua, nu hasta ñia nzu arqui'beei chenu rlañi'beei nú stucu bee bene rri'i scua.

**Rlualu Diose tucu nú necane
lu cuenda' bee bene**

2 Enze'e la yala nú tsequichia'lu bee bene, tunu rri'ilu scua sequichia'lu le'catsia li'ilu, xne rri'ilu tucu nú rri'ibeei. ²Pero lia'ahua nediya'ahua nú tucutsia Diose rlualu tucu nú necane chenu rdete'nu castiya lubee bene enu rri'i beenú necha neca, nú unila luhua. ³Nu li'ilu enu sequichia' nú xneca rri'i bee bene nu le'ca esquie rri'ilu, la ri'ilu elliebacu' nútia tsila'alu lu castiya' Diose. ⁴Li'ilu rluachulu nú ñia rri'i Diose lulu, rluachulu

lunú rua'a arqui' Diose li'ilu, nu rlu'cu arqui'nu li'ilu nu la ri'ilu beya' nú lunú rlu'cu arqui'nu li'ilu scua. necane nú rlu'culu tiempo nú che'e arqui'lu lu stulalu. ⁵Pero li'ilu chiqui' nzitilu nu la niarquillu che'e arqui'lu lu stulalu, nu le'catsia li'ilu rri'ilu nú recahuaxilá stulalu para bichia chenu dete' Diose castiya bee bene nu hualu Diose lu cuenda' bee bene li'inu enu rlualu tucu nú necane. ⁶Bichia ze'e dete' Diose lunú riala cada tucua bene lunú xneca uri'illa. ⁷Nu bee bene enu la tsana' arqui' nú rri'i nze'ca nu rla'na eluxene nú nu' liñibe, nu rla'na nú huañi nze'ca lu Diose para nú lu'cu bee nze'e cuerpo nú la nitilua' nu dete' Diose elunehuañi nú leca xunga laxu lubee nze'e. ⁸Pero bee bene enu la zucu' Stichia' Diose chiqui' rlenu lubee nze'e nu dete'nu castiya beei, xne luhuae nú chenalabeei stichia'nu nú neli neca, nzenalabeei inziu nú necha neca. ⁹Chiqui' nehuana zeca beei nu cuu arqui'beei lunú rri'i beei nú necha neca, sia bee bene Israel nusia bee bene enu la neca bee bene Israel. ¹⁰Pero yebee bene enu rri'i nú neca nze'ca ñia nzu arqui' Diose lubeei, nu rri'inu nú la chenu arqui'beei nu chu'ubeei liñibe, sia nú necabeei bee bene Israel nu sia nú lacabeei bee bene Israel. ¹¹Xne teriallu rri'i Diose tucu nú necane luye bee bene. ¹²Yebee bene enu la chulu ley' Diose nú udete'nu lu Moisés nu rri'i dula, la chiulue lu cuenda'lla tucu nú rni ley cua', pero ye bee bene enu nu'lu ley cua', tucu nú rni ley cua' esquie chiu'ulue lu cuenda'lla. ¹³Xne la

neca lunú riene'tsia bee bene ley cua' nú la lu'culla dula lu Diose sino que bee bene enu sucu' nú rni ley cua' bee nze'e neca enu la lu'cu dula lu Diose. ¹⁴Pero bee bene enu la neca bee bene Israel nu rri'i nú neca nze'ca sin nú chulubeei ley cua', nu rri'ibeei tucu nú rni ley cua' sin nú chulubeei, sino que elliebacu' e'cubeei xiu'u nú neca ley' beei, ¹⁵xne lunú xneca nehuañihua rlube' nú elliebacu'hua xiu'u ta nú neca nze'ca nu ta nú la neca nze'ca rri'ihua, luhuare nú rlu'cuhua ley cua', nu le'ca mismo li'ibeei ri'ibeei beya' chenu rri'i nze'cabeei urre chenu la ri'i nze'cabeei. ¹⁶Scua aca bichia chenu hualu Diose lu cuenda' ye beenú a'chi' rri'i bee bene equie cuenda' Jesucristo tucu nú rni stichia'nu nú rixiule'a.

Bee bene Israel cuna ley

¹⁷Nee li'ihua enu neca bee bene Israel, nelliñiahua nú necahua bee bene' Diose nu cuna nú recahua ley nú udete' Diose lu Moisés. ¹⁸Nu rnihua nú nediya'hua xa niarqui' Diose nú huañihua nu equie cuenda' ley'nu rri'ihua beya' ta nú neca nze'ca ri'ihua. ¹⁹Nu secahua nú acahua nihua lubee bene enu laca ley cua', cuna lubee bene enu lachulu Stichia' Diose. ²⁰Secahua nú li'ihua acahua zete'hua bee bene enu lecalí xi reca cuna bee bene enu lle'natsia reca, xne equie cuenda' ley cua' recahua nu nu'luhua ye nú neli neca. ²¹Pero scua tucu nú nehuañihua, ÷xiquienú mejora la zete'xuhua li'ihua nú xneca huañihua luhuare nú rnihua lubeelá bee bene nú xneca huañi

beeí? Xne li'ihua rnihua nú la neca nze'ca nú ri'i bene eluhuana', ¿nu xiquie nú rri'ihua eluhuana'? ²²Rnihua nú la neca nze'ca nú lu'cu niyu stucu una'a nu la lu'cu una'a stucu niyu, ¿nu xiquie nú rri'ihua scua? Le'ca rana arqui'hua bee diose enu ureche' bee bene nu, ¿xiquie nú rcachi'hua liñi indu elu nchiucu' bee diose cua'? ²³Chiqui' nelliñiahua nú recahua ley pero sa'na netúhua Diose equie nú la zucu'hua nú rni ley. ²⁴Enze'eca rni lu ichi' Stichia' Diose: “Bee bene enu laca bee bene Israel se'ta beei Diose equie cuenda' nú rri'ihua.”

²⁵Neli nú sibi' nú rquie seña elunecachi' bee niyu, tunu zucu' bee bene ley nú udete' Diose lu Moisés, pero tunu la zucu' bee bene tucu nú rni ley cua' lecaxi zibi' nú nequie seña elu necachi' bee bene che. ²⁶Pero tunu tucu bene enu la nequie seña'cua' elu necachi', nu sucu'lla tucu nú rnibiya' ley, necalla xi neca tucu bene enu nequie seña, mase nú la nequie seña'la. ²⁷Nu bee bene enu la chulu ley' Diose nu sucu' stichia'nu nu nehuañi xi nehuañi enu nu'lu ley, che mase nú la nequie seña'la tucu nú rnibiya' ley, pero lunú nu'lulla Stichia' Diose, che lunú xneca nehuañilla ri'ihua beya' nú la nehuañihua tucu nú riala nú huañihua, equie nú la ri'ihua tucu nú rnibiya' ley' Diose mase nú nu'luhua ley cua' nu nequie seña'hua. ²⁸Xne la neca lunú rala bene lu iliu Israel nú necalla bene Israel, nu la neca lunú nequie seña'la nú necalla bene Israel ante Diose. ²⁹Sino que enu neli neca bene Israel neca bee enu

diquinu' arqui' sucu' stichia'nu nu la neca nú nequietsia señaalla, nu ni' nú sucu'lla beelá bee custumbre nú rlu'cu bee benecua', sino que necane nú nzu Espíritu Santo cuna bee bene, nu bee bene enu nehuañi scua Diose neca enu sucu' aya li'illa, nu la neca bene enu sucu' aya li'illa.

3 Nu, ¿xi sibi' nú neca bene bene Israel? ¿Nu xi sibi' nú rquie señaacia' bene? ²Chiqui' neca equie nú neca bene bene Israel ye modo, xne rluti udete' Diose stichia'nu lubee bene Israel. ³Neequie la ri'ihua elliebacu' nú lunú nu' bee enu la chenala Stichia' Diose, chequie la tsalua' Diose stichia'nu tucu nú unilanu. ⁴Xne Diose leca xunga xe'enu stichia'nu, mase nú ye bee bene iliulabe nequichia' pero Diose leca xunga nequichia', tucu nú rni tucu luhuare lu stichia'nu:

Yebee bene lañi' nú li'ilu
sa'alulu stichia'lu,
nu lecati niquiya xi niquiya lu
cuenda'lu.

⁵Pero nu' bee bene iliulabe enu rri'i elliebacu', nú equie cuenda' dula nú rri'illa, scua rlube'lla nú ñia neca Diose, nu ¿xi quie nú necha neca Diose nu rdete'nu castiya bee bene? ⁶¡Lacane scua! Xne tunu necha neca Diose, ¿xneca modo nú hualunue lu cuenda' bee bene iliulabe che?

⁷Xne te zucua'ahua nú tunu beenú la neli rnia sibi'i para nú lu'culá bee bene ula'na lu Stichia' Diose, che leca' modo nú ni Diose nú rlu'cua dula. ⁸Nu le'ca teri'ila'ahua beenú necha neca para nú cha nze'cae lu cuenda'ahua, tucu

nú rta' quiya bee bene li'á, nú setea bee bene, la chenu arquia'ahua nucua', xne Diose dete' castiya bee bene enu rni scua, nu scua riala zeca beei.

Lecati neca bene nze'ca

⁹Bueno che, ¿xie' lianú neca'ahua bee bene Israel nú neca'ahua bene nze'ca luquela bee bene enu laca bene Israel la? ¡Pero la acane esquie! Xne sia bee bene Israel nu sia bee bene enu laca bee bene Israel rlu'cu dula. ¹⁰Tucu nú rni lu ichi' Stichia' Diose elu rni:

Leca ni' tucu bene nze'ca, pero
ni' tuculla leca.

¹¹Ni' tucu bene la yene',
nu ni'tucu lecati la'na Diose.

¹²Yebee bene utsana' arqui' Diose,
nu yella rri'illa nú necha neca,
lecalí ti rri'i nú neca nze'ca, leca
ni' tuculla.

¹³Xi neca tucu eluhua nú na'la
ru'u neca bene,
nú puro nú laca neli rni bee
bene,
nu bee bedichia' nú rni bee
bene neca xi neca benenu'
be'la.

¹⁴Puro bedichia' nú necha see
xiu'u ru'ubeei,
nu puro bee bedichia' chi'qui'
rnibeei.

¹⁵Nu nzucutsia lubeei nú útibeei
bene.

¹⁶Nu catse elu nzuebeei puro nú
necha neca rri'ibeei,
nu nehuana seca bee bene
rri'ibeei.

¹⁷La chulubeei nú huañi nze'ca
beei tucu nú rialane para nú
nzuxe arqui'beei.

¹⁸ Nu ni' la za' arqui'beeí nú
lliquibeeí Diose.

¹⁹ Nediya'ahua nú ye nú rni ley
necane para bee bene enu sucu'e,
para nú lecati ni nú la chulu dula,
sino que yebee bene ri'ibeya' nú
rlu'culla dula ante Diose. ²⁰ Xne la
neca nú sucu'tsia bee bene ye nú
rni ley nú secalla nú la lu'culla dula
lu Diose sino que ley cua' sibi' para
nú ri'i bee bene beya' nú rlu'culla
dula.

**Rlu'cu cuenda Diose bene equie
nú nzeli arqui' bene Jesucristo**

²¹ Pero nee ulube'la Diose inziu'nu
lua'ahua para nú xneca ya'na
nze'ca'ahua lu Diose la necane
equie nú ria'ahua lunú xa rnibiya'
ley sino que equie cuenda' ley cua',
nu equie cuenda' nú uquie'e bee
profeta' Diose, ²² rria'ahua beya'
nú Diose rlu'cu cuenda lia'ahua,
nú la lu'cua'ahua dula equie nú
nzeli arquia'ahua Jesucristo, scua
rri'inu luyeebe bene enu nzeli arqui'
li'inu. ²³ Xne yebee bene rlu'cu dula,
nu lecati enu la lu'cu dula ante
Diose. ²⁴ Pero lunú chiqui' nze'ca
Diose, enze'e uri'ilanu perdona
ye stula'ahua, sin nú dixiu'ahua
lunu, sino que Jesucristo udixiula
equie cuenda' stula'ahua chenu
ungutinu lu cruse. ²⁵ Diose uxe'la
Jesucristo lu iliulabe para nú equie
cuenda' rene'nu nú uti'chianu
ri'inu perdona bee bene iliulabe,
nu neca nucua' para bee bene enu
chili arqui' Jesucristo, scua rlube'
nú ye nú rri'i Diose neli necane.
Nu tunu hasta hua'tu lá ri'inu elu
usticia equie bee dula nú rlu'cu bee
bene, necane lunú rlu'cu arqui'nu

bee bene. ²⁶ Para nú nee nu' modo
lube'nu lubee bene nú ñia necanu
nu para nú ri'i bee bene beya' nú
li'inu rri'inu tucu nú necane enze'e
rri'inu perdona stula bee bene enu
nzeli arqui' Jesucristo.

²⁷ Nee ¿xi equie zucu' aya'ahua
lia'ahua? Leca xine, xne la necane
equie cuenda' nú sucua'ahua
nú rni ley nú ri'i Diose perdona
lia'ahua sino que necane nú nzeli
arquia'ahua Jesucristo. ²⁸ Enze'e
nediya' nze'ca'ahua nú rri'i Diose
perdona stula bee bene equie nú
nzeli arqui' bee bene Jesucristo nu
lanecane equie cuenda' nú zucu'
bee bene nú rni ley.

²⁹ ¿Xie' Diose necanu Diose lubee
bene Israel tsia? ¿Nu lacanu Diose
lubee bene enu laca bee bene Israel
chela? Pero li'á nia luhua nú li'inu
necanu Diose luye bee bene iliulabe.
³⁰ Xne nu' tucutsia Diose, nu li'inu
rri'inu perdona bee bene enu nzeli
arqui' Jesucristo, sianu rlu'culla
seña nú rnibiya' ley nú rquie bee
bene Israel, urre la lu'culla seña
cua'. ³¹ La ri'ihua elliebacu' nú
rluachu'ahua ley equie nú nzeli
arquia'ahua Jesucristo sino que
equie nú nzeli arquia'ahua li'inu
sucua'ahua nú rni ley.

Xneca uchili arqui' Abraham Diose

4 Li'ihua nediya'hua nú xneca
unga lu cuenda' Abraham
bene'ahua enu udetela, li'illa enu
rlutila uquie seña nú rquie bee bene
Israel. ² Tunu aca nebacu' Abraham
nú la lu'culla dula equie beenú
uri'illa, che nu' modo nú azucu'
ayalla li'illa lubee bene, pero lu
Diose leca modo ari'illa scua. ³ Pero

Stichia' Diose rni: "Xne uyali arqui' Abraham Diose, enze'e ubacu' Diose li'illa xi neca tucu enu la lu'cu dula." ⁴Chenu rri'i tucu bene riña', dimi nú rixulla la necane nú lia rati'llae sino que rri'illa anae equie riña' nú uri'illa. ⁵Pero para nú ri'i Diose perdona stula bee bene, leca modo nu ni bene nu aca perdonalla equie beenú uri'illa, sino que equie nú uchili arqui' bene Jesucristo enze'e ubacu' Diose li'illa nú la lu'cua'lla dula. ⁶Le'ca uni David lu cuenda' bee bene enu uri'i Diose nú la lu'cu'a dula, nu la necane equie beenú xi uri'illa, ⁷nu unilla:

Ñia neca lu cuenda' bee bene enu uri'ila Diose perdona stula, nu uchilalanu stula.

⁸Ñia neca lu cuenda' bee bene enu nebacu'la Diose, nú la lu'cua' dula.

⁹Lá ni David nucua' para bee bene Israel enu nequie seña, sino que unilla bee bedichia' quie' lu yebee bene. Tucu nú uni'la'ahua nú Diose ubacu'la Abraham nú la lu'culla dula xne uchili arqui'lla li'inu. ¹⁰Nu chenu ubacu' Diose li'illa la lu'culla seña nú rquie bee bene Israel, ante nú quie seña'cu' Abraham nebacu'la Diose li'illa nú la lu'culla dula. ¹¹Nu chenu ubacu' Diose Abraham nú la lu'culla dula, che luze'elá uquie seña'cu' li'illa, xne seña'cu' neca nú nebacu'la Diose li'illa nú la lu'culla dula equie nú uchili arqui'lla li'inu. Scua neca Abraham pa' ye bee bene enu nzeli arqui' Diose, mase nú la nequie seña nú rquie bee bene Israel li'illa, pero lunú nzeli arqui'beella Diose nebacu'lanu li'ibeella, nú la

lu'cu beella dula. ¹²Nu le'ca neca Abraham pa' bee bene enu nequie seña nú rquie bee bene Israel, nu nzeli arqui'beella Diose tucu nú uyali arqui' Abraham, ante nú quie seña li'illa.

Rialu nú ucuaqui u'na Diose equie nú nzeli arqui' bee bene li'inu

¹³Chenu ucuaqui u'na Diose lu Abraham cuna lubee bene enu nzeli arqui' Diose, tucu nú uyali arqui' Abraham nú dete'nu nú yucu beella iliulabe xi neca tucu erencia. Lá cuaqui u'na Diose nucua' lu Abraham, equie nú uzucu'lla nú rni ley, sino que necane lunú uchili arqui'lla Diose. ¹⁴Xne tunu bee enu sucu'tsia ley ati' erencia cua', lecaxi sibi' nú nzeli arqui' bee bene Diose, le'ca la zibi' nú ucuaqui u'na Diose lu Abraham che. ¹⁵Pero lacane scua, xne ley neca para nú dete' castiya bee bene pero elu leca ley leca modo nú ni bee bene nú la zucu' bene nú rni ley.

¹⁶Enze'e chenu ucuaqui u'na Diose lu Abraham nú dete'nu nú ucuaqui u'nanu lu ye bee bene enu nzeli arqui' li'inu, tucu nú udete'nue lu Abraham scua ucuaqui u'nanu lu Abraham xne uchili arqui'lla li'inu, nu la necane nú ucuaqui u'na Diose nucua' para bee bene enu sucu'tsia ley sino que necane para bee bene enu nzeli arqui' Diose, tucu nú uyali arqui' Abraham Diose, mase nu la chulu beella ley, nu scua Abraham neca pa' ye'ahua. ¹⁷Tucu nú rni lu ichi' Stichia' Diose lu cuenda' Abraham, elu rni: "Li'ilu acalu pa' huaxi bee bene iliulabe." Nucua' neca nú ucuaqui u'na Diose lu Abraham, nu uchili arqui'lla nú uni

Diose lulla, li'inu enu rri'i nú rehuañi bee benenguti nu rninu equie cuenda' beenú lecasca' lu iliulabe quie' xi neca nú nu'lane.

¹⁸Añinzuca nú nediya' Abraham nú leca modo nú lu'culla endu', pero chenu uni Diöse lulla nú lu'culla endu' che ita uyali arqui'lla nú uni Diöse lulla scua, neca Abraham “pa' ye bee bene”, enu nzeli arqui' Diöse, tucu nú uni Diöse lu Abraham: “Scua aca huaxi bee lli'ñilu.” ¹⁹Nu uyali arqui' Abraham nú uni Diöse lulla nú lu'culla endu', nu nzalalla casi tucu ayu'u lana, nu ungujulalla nu le'ca esquie una'lla Sara, pero lá tsuchiucu arqui'lla lunú uni Diöse lulla. ²⁰Nu lá za' arqui'lla núla yalu tucu nú ucuaqui u'na Diöse lulla sino que diquinu' arqui'lla uyali arqui'lla nú uni Diöse lulla, nu udete'lla che'tsa lunu. ²¹Chiqui' nzuta' arqui' Abraham nú chiqui' reca Diöse ri'i tucu nú ucuaqui u'nanu lulla. ²²Enze'e nebacu'la Diöse Abraham nú necalla tucu bene enu la lu'cu dula xne uchili arqui'lla li'inu.

²³Nu elu rni nú Diöse nebacu'la Abraham nú necalla tucu bene enu la lu'cu dula, lunú uyali arqui'lla li'inu, láninu lu cuenda'tsia Abraham, ²⁴sino que le'ca uninu nucua' lu cuenda'ahua, xne nzelila arquia'ahua Diöse, che nebacu'lanu lia'ahua nú la lu'cua'ahua dula, li'inu enu uri'i nú uhuañi zeca Jesucristo lu eluti. ²⁵Jesucristo enu ungu' equie stula'ahua nu uhuañi zecanu lu eluti nu equie cuenda' li'inu la lu'cua'ahua dula lu Diöse.

**Xa seca bene chenu la lu'cua'
bene dula lu Diöse**

5 Nu equie nú nzeli arquia'ahua Diöse la lu'cua'ahua dula

lunu, nu equie cuenda' Jesucristo ñia nzu arqui' Diöse lua'ahua. ²Xne lunú nzeli arquia'ahua Jesucristo nu' modo xneca riña'ahua lu Diöse, nu nzuta' arquia'ahua lunú nzeli arquia'ahua nu ñia nzu arquia'ahua, nu riña'ahua lu ellie'el elu nzucu Diöse liñibe. ³Nu la necane equie cuenda'tsia nucua' nú ñia nzu arquia'ahua sino que le'ca equie nú nehuana se'ca'ahua, xne nediya'ahua nú chenu nehuana se'ca'ahua másela rlu'cua'ahua paciencia. ⁴Nu lunú rlu'cua'ahua paciencia aca'ahua riquia'ahua lunú xi ze'ca'ahua, nu equie nú rriquia'ahua nzucu lua'ahua nú riña'ahua lu Diöse. ⁵Nu lunú nzucu lua'ahua nú riña'ahua lu Diöse neli aca nucua', xne nediya'ahua nú seca Diöse lia'ahua xne nzu Espíritu Santo nú uliqui'nu cuna lia'ahua.

⁶Ante nehuañia'ahua sin nú ria'ahua beya' xneca tsila'a Diöse lia'ahua lu stula'ahua, pero chenu uriña bichia nú ube'ta Jesucristo ungu' equie cuenda'ahua nú neca'ahua bene enu rlu'cu dula. ⁷Nediyahua nú neriña' nú ti zela ati equie cuenda' stucu bene, pero ni' lu cuenda' tucu bene enu rri'i nze'ca urre nu' ti zela ati equie cuenda' stucu bene nze'ca. ⁸Pero ulube' Diöse nú chiqui' secanu lia'ahua enze'e ungu' equie cuenda'ahua chenu uria'ahua puro dula. ⁹Nu nee nú la lu'cua'ahua dula equie cuenda' rene nú uti'chia Jesucristo lu cruse chenu ungu' equie cuenda' nu. ¹⁰Xne chenu rri'sca'ahua lunú la yu' arqui'

Diose che uxe'lanu lli'ñi e'cunu lu iliulabe ungti lu cruse equie cuenda'ahua nu scua uyala arqui'nu lua'ahua enzaláquei' nee nú uyala arqui' Diosé lua'ahua. ¹¹Nu nee nú nzu Jesucristo cuna lia'ahua, enze'e chiqui' ñia nzu arquia'ahua dete'ahua che'tsa lu Diosé equie cuenda' Jesucristo enu rnibiya' lua'ahua, xne equie cuenda' li'inu uyala arqui' Diosé lua'ahua.

Adán nu Jesucristo

¹²Scua necane xne equie cuenda' tucu bene uyu'u dula lu iliulabe, nu equie cuenda' dula uyu'u eluti, nú rati ye bee bene xne ye bee bene uri'i dula. ¹³Chenu lecasca' ley nú udete' Diosé lu Moisés añinu'ca dula lu iliulabe, pero lunú leca ley hua'tu enze'e la ri'i caso bee bene nú rri'illa dula. Che leca modo zeca bene castiya tucu nú rnibiya' ley. ¹⁴Pero añica ungti beella hasta tiembu' Adán nu hasta tiembu' Moisés, añinzuca nú lá ri'i beella sa' dula nú uri'i Adán, nu tiembu ze'e unga Adán tucu seña equie cuenda' tucu bene enu nzu nú nze'ta.

¹⁵Nu laca iguale dula nú uri'i Adán, cuna nú chiqui' rri'i nze'ca Diosé lubee bene, nu equie cuenda' dula nú uri'i tucu bene ye bee bene rati, pero le'ca equie cuenda' tucu bene huaxi bee bene tsila'a Diosé, nu li'inu necanu Jesucristo, nu equie cuenda'nu lia tsila'a Diosé lia'ahua. Nu lunú uri'i Jesucristo másela seca para huaxi bee bene. ¹⁶Laca iguale dula nú uri'i Adán cuna lunú chiqui' rri'i nze'ca Diosé. equie cuenda' tucutsia dula, uyu'u castiya para bee bene pero equie

cuenda' Jesucristo nu' modo tsila'a bee bene mase nú uri'illa huaxi dula. ¹⁷Equie cuenda' dula nú uri'i Adán, uyu'u eluti nú rati ye bee bene, pero uri'i Diosé ana lunú uri'i Adán equie nú uri'i Jesucristo nú sila'a ye bee bene enu seca nú equie cuenda' Jesucristo la lu'cua'lla dula ante Diosé nu lu'culla nú huañilílla lu Diosé.

¹⁸Nu scua tucu nú uyu'u eluti xi neca castiya para ye bee bene equie dula nú uri'i Adán, le'ca esquie lunú uri'i nze'ca Jesucristo tsila'a bee bene nu huañilí bee bene liñibe lu Diosé. ¹⁹Xne lunú né zucu' tucu bene nú uni Diosé ye bee bene rlu'cu dula, pero le'ca scua lu cuenda' tucu bene enu uzucu' nú uni Diosé nebacu' Diosé bee bene nú la lu'cu bene dula ante lunu.

²⁰Udete' Diosé ley'nu lu Moisés para nú lu cuenda' ley'cu' ri'i bee bene beya' nú rri'i beei dula, nu elu chiqui' uri'i bee bene dula másela uri'i nze'ca Diosé nu uri'inu perdona bee bene ze'e. ²¹Hua'tu unibiya' dula lubee bene nu equie cuenda' dula cua' rati bee bene, pero nee lunú chiqui' seca Diosé lia'ahua equie nú chiqui' nze'canu nebacu'nu lia'ahua nú la lu'cua'ahua dula, nu liqui'nu nú huañilia'ahua liñibe lu Diosé equie cuenda' Jesucristo.

Neca xi neca nú ungti'la'ahua lu dula

6 La ri'ihua elliebacu' nú nia nú ri'ila'ahua dula para nú ri'i nze'calá Diosé lua'ahua. ²Lacane scua, xne neca xi neca nú ungti'la'ahua lu dula, nu

leca modo nú ri'ilá'ahua dula.

³Xne chenu uri'nza'ahua equie cuenda' Jesucristo, neca xi neca nú ungu'ahua cuna li'inu. ⁴Chenu urinza'ahua neca nucua' xi neca nú uhuachi'la'ahua cuna Jesucristo nu ungu'ahua cuna li'inu para nú scua tucu nú uhuañinu lu eluti, cuna poder' Diose le'ca nu' modo lu'cua'ahua elunehuañi nú necuqui neca nu huañia'ahua tucu nú niarqui' Diose nú huañia'ahua.

⁵Nu tunu neca tucunecatse'ahua cuna Jesucristo lu eluti'nu, le'ca scua tucu nú uhuañi zecanu lu'cua'ahua stucu elunehuañi nú necuqui neca. ⁶Chenu ungu'ahua Jesucristo lu cruse, ungu'ahua equie ye nú neca'ahua hua'tu chenu lasca' chulua'ahua li'inu, nu hasta lu'tsia ulaxu nú neca'ahua hua'tu xne leca' modo nibiya'lá dula lua'ahua. ⁷Xne bene enu ungu'ahua lu cuenda' dula la nibiya' dula lu nze'e. ⁸Nu equie nú ungu'ahua Jesucristo equie cuenda' stula'ahua, ungu'ahua dula lu dula, nu le'ca nediya'ahua nú huañia'ahua cuna li'inu. ⁹Xne nediya'ahua nú chenu uhuañi zeca Jesucristo lu eluti, leca' xunga atinu nu la nibiya' eluti lunu. ¹⁰Jesucristo ungu'ahua tucutsia bese equie cuenda' stula bee bene nu nee nehuañinu para nú zucu' ayanu Diose. ¹¹Le'ca scua utsu arquihua nú ungu'ahua lu dula nu nehuañihua para nú zibi'hua lu Diose, equie nú neca tucu necatselahua cuna Jesucristo.

¹²Enze'e diqui nú nehuañihua lu iliulabe quie' la zelahua nú nibiya' dula luhua, nu la zelahua nú ri'i elliebacu' nú necha neca ana luhua

para nú ri'ihua nú necha neca. ¹³La dete' cuendahua li'ihua lu dula para nú ri'ihua nú necha neca, mejora uzu'cu'hua nú rni Diose xi neca tucu bene enu ungu'ahua nu uhuañi zeca para li'inu, nu uzelahua nú nibiya'nu luhua para nú ri'ihua nú neca nze'ca. ¹⁴Nu nee la nibiya' dula luhua xne la nibiya' ley luhua sino que nehuañihua lu eluseca' Diose.

¹⁵La nia luhua lunú nzenala'ahua eluseca' Diose nu nu' modo ri'ila'ahua dula, xne la nibiya' ley lua'ahua xne lacane scua. ¹⁶Li'ihua nediya'ahua nú tunu nu' tucu enu rniya' lua'ahua che rqui'ña nú zucua'ahua stichia' nze'e. Nu tunu rniya' dula luhua che yalahua castiya. Pero tunu sucu'hua Stichia' Diose che huañi nze'cahua. ¹⁷Pero che'tsalá Diose nú mase unibiya' dula luhua hua'tu, pero nee diquinu' arquihua nzenalahua Stichia' Diose. tucu nú ungalahua. ¹⁸Nu nee nú la nibiya' dula luhua nehuañihua para nú ri'ihua tucu nú niarqui' Diose. ¹⁹Rnia luhua puro bee bedichia' nú rri'ihua beya' nú xi rni, xne nediya' nú neriña' ri'ihua beya' bee nucua' tucu nú unibiya' dula luhua hua'tu chenu uri'ihua beenú la zibi' cuna beenú necha neca, nee uzelahua nú nibiya'li Diose luhua para nú ri'ihua nú neca nze'ca, nu uhuañihua tucu nú niarqui'nu nu huañihua.

²⁰Chenu unibiya' dula luhua lá chenu arquihua nú ahuañi nze'cahua. ²¹Pero, ¿xi uri'ihua ana equie beenú necha neca uri'ihua tiambu ze'e, nu neequie rtu'hua equie cuenda' beenú necha neca

cua' uri'ihua? Xne nediya'hua nú equie cuenda' nucua' nze'ta castiya' Diose. ²²Pero nee nú la nibiya' dula luhua nu sucu'hua nú rni Diose, nucua' ñia neca xne scua nu' modo huañihua tucu nú niarqui' Diose nú huañihua nu añica lu'cuhua elunehuañi nú leca xunga laxu lunu. ²³Xne lunú rri'i bene ana nú rri'i bene dula neca castiya pero nú lia rliqui' Diose neca elunehuañi nú leca xunga laxu equie cuenda' Jesucristo enu rnibiya' lua'ahua.

Ejemplu' bee bene enu nechia

7 Bee sa'a enu nzeli arquia'ahua Jesucristo li'ihua nediya'hua nú xneca neca ley, nú ley rnibiya' lubee bene diqui nú nehuañi bene. ²Necane xi neca tucu una'a enu nechia nú leca' modo chianchu stucu niyu rene diqui nú nehuañi niyu'nchu, pero tunu ati niyu'nchu leca ley nú cá nú chianchu stucu bese. ³Pero tunu nehuañisca' niyu'nchu nu yucunchu stucu niyu, nehuañinchu lu eluhexe che. Pero tunu ungti niyu'nchu leca' ley nucá nú chianchu stucu niyu, nu la ri'inchu eluhexe che.

⁴Le'ca scua bee sa'a enu nzeli arquia'ahua Jesucristo, equie nú ungti Jesucristo, ulaxu nú rnibiya' ley' Moisés luhua. Neequie necalahua bee bene' Jesucristo. Li'inu enu uhuañi zeca lu eluti, nu scua nu' modo nú ria'ahua tucu nú niarqui' Diose nú ria'ahua. ⁵Xne chenu uhuañia'ahua tucu nú niarqui'tsia'ahua a'la máse uri'i ley nú uya'la elliebacu'ahua para nú ria'ahua lunú la nibiya' ley nú ria'ahua nu scua uria'ahua nú

neca neca nú riala aze'ca'ahua castiya. ⁶Pero nee neca xi neca nú ungtila'ahua lu cuenda' ley, nee nú la nibiya' ley lua'ahua nu lunú uche'ela modo nú nehuañia'ahua, nee nu' modo nú ria'ahua lunú niarqui' Diose nú ria'ahua equie cuenda' Espíritu Santo nú nzu cuna lia'ahua. Nu la necane equie nú nzenala'ahua nú rnibiya' ley.

⁷La nia luhua nú la neca nze'ca ley, xne lacane esquie. Xne tunu leca ley lá aria'a beya' nú xi neca dula, nu leca xunga aria'a beya' nú dula neca chenu rle'lu stene' sa'lu, tunu leca nú rni ley: "La le'lu stene' sa'lu." ⁸Pero chenu uri'á beya' nú la neca nze'ca nú rle' bene stene' sa'lla che máse udala dula nú rri'á equie cuenda' ye nú rlea lu'cua nú rlu'cu stucu bene. Tunu leca ley lá ari'i bee bene beya' xi neca dula. ⁹Ante nú chulua ley ulle'caa nú nehuañi nze'caa. Pero chenu uyulua ley uri'á beya' nú rri'á dula nu equie cuenda' dula cua' necaa xi neca tucu bene enu ungti. ¹⁰Sibi' ley para nú ri'i bee bene beya' xneca riala nú huañilla. Pero para li'á sibi'tsia ley para nú atia. ¹¹Xne hua'tu uzequienu dula li'á nú nu' modo ri'á ye nú rnibiya' ley pero le'ca lu cuenda' ley cua' uri'á beya' nú riala zecaa castiya.

¹²Pero la necane nú necha neca ley xne Diose udu' ley, nu ye nú rni ley le'ca Diose udu'e, nu neca nze'cae, nu neli rnii. ¹³La lu'cu ley culpa nú atia, sino que dula neca nú uzequienu li'á para nú atia nu equie cuenda' ley cua' uri'á beya' nú necha neca nú rri'i bene dula.

¹⁴Nediya'ahua nú equie cuenda' Espíritu Santo nze'ta ley nú rni

equie cuenda'nu. Pero lunú necaa bene, enze'e siempre rri'i dula ana lua. ¹⁵La ri'á beya' xi se'ca xne lunú niarquía ri'á la ri'á, sino que lunú laniarquía ri'á enze'e neca nú rri'á. ¹⁶Nu chenu rri'á lunú la niarquía ri'á, scua rri'á beya' nú neca nze'ca ley, xne lu cuenda' ley rri'á beya' xi rri'á. ¹⁷Nu la ri'i riña'a lunú la yala ri'á, sino que rri'ine equie cuenda' dula nú nu' arquía. ¹⁸Xne lunú necaa bene, nediyaá nú lacaa bene nze'ca, mase nú niarquía ri'á nú neca nze'ca, pero la ri'á ana nú ri'á scua. ¹⁹La ri'á ana ri'á nú neca nze'ca niarquía ri'á, sino que a'lla lunú necha neca nú la niarquía ri'á enze'e rri'á. ²⁰Neequie tunu rri'á lunú la niarquía ri'á, la neca nú rri'i riña'ne, sino que necane equie cuenda' dula nú nu' arquía enze'e rri'á scua.

²¹Pero nee rri'á beya' nú máse niarquía ri'á nú neca nze'ca, pero chu rri'i dula nú nu' arquía ana lua. ²²Chiqui' riu' arquía zucua nú rnibiya' Diose. ²³Pero nu' tucu nú rcaa nú ri'á scua, nu nucua' neca dula, xne nu'sca' dula arquía.

²⁴¡Cue'curua! ¿Ti tsila'a li'á lu castiya nú zecaa equie dula nú rri'á nú necaa bene? ²⁵¡Pero che'tsalá Diose nú equie cuenda' Jesucristo utsila'anu li'á lu castiyacua'! Xne mase rri'á elliebacu' nú ri'á puro nú rnibiya' Diose, pero lunú necaa bene, rri'i dula ana lua.

**Elunehuañi nú rlu'cu bene
cuna Espíritu Santo**

8 Enze'e ye bee bene enu nzeli arqui' Jesucristo la zeca' bee bene ze'e castiya' Diose. Bee bene

enu la nehuañia' lunú necha neca sino que rla'nalla nú huañilla tucu nú niarquí' Espíritu Santo nú huañilla. ²Xne lunú rnibiya' Espíritu Santo nú nzu cuna lia'ahua lunú neca tucu necatse'la'ahua cuna Jesucristo la nibiya' dula lua'ahua, nu le'ca la yala'ahua castiya' Diose. ³Lunú neca'ahua bene lá aca ley ari'i elietsa lua'ahua, ley nú udete' Diose lu Moisés. Pero nee uri'i Diose lunú né aca ley cua' ari'i. Li'inu uxe'lanu Lli'ñinu lu iliulabe quie' xi neca tucu bene para nú ungutinu equie stula'ahua, nu scua udixiunu equie cuenda' stula'ahua para nú leca' xunga nibiya' dula lua'ahua. ⁴Nee nehuañi'la'ahua lu Diose xi neca tucu bene enu sucu' ley, xne la nehuañia'ahua tucu nú niarquí'tsia'ahua sino que nehuañia'ahua tucu nú rnibiya' Espíritu Santo.

⁵Bee bene enu nehuañitsia lunú neca elliebacu', rri'itsialla elliebacu' nú ri'illa lunú niarquí'tsialla. Pero bee bene enu nehuañi tucu nú rnibiya' Espíritu Santo, máse nzucululla nú ri'illa lunú rnibiya' Espíritu Santo nú ri'illa. ⁶Nu lunú nzuculu bene nú rri'itsialla lunú necha neca, che nze'ta castiya nú zecalla, pero chenu nzucutsialu bene nú rri'illa tucunú rnibiya' Espíritu Santo che rlu'cu bene elunehuañi lu Diose nu la chenu arqui'lla. ⁷Bee bene enu nzuculutsia nú huañi tucu nú niarquí'tsia, li'ibeei necabeei enu la zucu' nú rni Diose equie nú la niarquí'beeí nibiya' Diose lubei nu le'ca la acabeei ri'ibeei tucu nú niarquí'nu. ⁸Enze'e bee bene enu nehuañi tucu

nú niarquí'tsia, la yu' arqui' Diose xa rri'ibee nze'e.

⁹Pero li'ihua la nehuañihua lunú necatsia elliebacu'hua, sino que li'ihua nehuañihua tucu nú rnibiya' Espíritu Santo, tunu neli nú nehuañihua cuna Espíritu Santo' Diose, xne bene enu la nzu Espíritu Santo cuna li'i laca nze'e bene' Jesucristo. ¹⁰Pero tunu nehuañilaha cuna Jesucristo, lecaxi ri'i mase nú unitilu dula li'ihua. Nu nee nehuañilaha cuna Espíritu Santo nu nebacu'la Diose li'ihua nú la lu'cuhua dula. ¹¹Nu tunu nehuañilaha cuna Espíritu Santo' Diose, li'inu enu uri'i nú uhuañi zeca Jesucristo lu eluti, che mase nú atihua, pero le'ca ri'i Diose nú huañi zeca cuerpo'hua lu eluti para nú lu'cuhua elunehuañi equie cuenda' Espíritu Santo nú nehuañi cuna li'ihua.

¹²Enze'e bee sa'a enu nzeli arquia'ahua Jesucristo, la yala nú huañia'ahua tucu nú niarquí'tsia'ahua. ¹³Xne tunu li'ihua nehuañihua lunú niarquí'tsiahua, che rialahua castiya'hua, pero tunu equie cuenda' Espíritu Santo nú nzu cuna li'ihua utsana' arqui'hua stulahua che lu'cuhua elunehuañi nú la laxua' lu Diose.

¹⁴Xne yebee bene enu sela nú rnibiya' Espíritu Santo' Diose lu, li'ibeella neca beella lli'ñi Diose. ¹⁵Xne lá yucuhua Espíritu Santo para nú lliquihua, xi xiqui tucu bene patron'lla sino que equie cuenda' Espíritu Santo necalahua lli'ñi Diose nu equie cuenda' Espíritu cua' rnia'ahua lu Diose: "iPa'ahua!" ¹⁶Nu le'ca equie cuenda'

Espíritu Santo quie' nediya'ahua nú si'ahua nú neca'la'ahua lli'ñi Diose. ¹⁷Nu lunú neca'ahua lli'ñi Diose riala'ahua herencia nú liqui' Diose tucu nú riala Jesucristo, tunu neli nú riquia'ahua nú nehuañi ze'ca'ahua tucu nú ulle'canu che nu' modo riña'ahua liñibe elu nzucunu.

Eluxene nú atia'ahua liñibe

¹⁸Nediya nze'caa nú liaxi nú nehuañi se'ca'ahua nee, luquela nú seca eluxene nú atia'ahua liñibe. ¹⁹Nu hasta yebeenú ureche' Diose, chiqui' nzuquiene nú ala' uriñala bichia nú acachee nú tineca bee lli'ñi Diose. ²⁰Xne iliulabe uchiñi lubeenú necha neca, pero lecaxi culpa'e, sino que Diose uzela nú ungae scua. Nu nee nzuquietsia iliulabe, ²¹nú la'ane lu beenú necha neca nu'lue, nu naa zecae tucu nú ñia nae chenu apenatsia uquixiee, tucu nú le'ca la'a bee bene' Diose lubee nú necha neca nu' lu iliulabequie'. ²²Nu diquila nú nzuquie iliulabe nú riña bichia ze'e, lia'ahua nediya'ahua nú chiqui' nehuañi seca iliulabe xi seca tucu una'a enu ala endu'. ²³Nu la necane nú iliulabetsia seca scua sino que le'ca nua'ahua enu nchiñi Espíritu Santo arqui' xi neca tucu seña lunú liqui' Diose lua'ahua. Nu chiqui' nehuañi se'ca'ahua diquila nú nelluaquie'ahua nú riña bichia nú acachee nú neca'ahua lli'ñi Diose, bichia chenu che'enu cuerpo'ahua nu liqui'nu stucu nú necuqui. ²⁴Nediya'ahua nú scua acane nu nucua' nzuculua'ahua nú aca equie nú nzeli arquia'ahua nú utsila'ala'ahua, li'ihua nediya'ahua

nú tunu lunú nelluaquie'ahua
nú aca ungalane, leca xiquie nú
lluaquie'la'ahuane. ²⁵Pero tunu
nelluaquie'ahua nú aca lunú lasca'
aca, che layala nú llaca'ahua
lluaquie'ahua nú acane.

²⁶Nu le'ca Espíritu Santo ri'i
elietsa lua'ahua chenu la ria'ahua
beya' xneca ria'ahua, xne nu' chenu
laca'ahua nacua'ahua lu Diose tucu
nú rialane. Nu chenu la ria'ahua
beya' xneca nia'ahua lu Diose
lunú niarquía'ahua nia'ahua, pero
Espíritu Santo nediya' xa rria'ahua
elliebacu', che li'ínu see arqui'nu
rnacu'nu lu Diose lu cuenda'ahua.
²⁷Nu Diose, li'ínu enu nu'lu arqui'
bee bene, nediya'nu xi rnacu'
Espíritu Santo lunu lu cuenda'ahua.
Xne chenu rnacu' Espíritu Santo
equie cuenda' bee bene' Diose,
li'ínu rnacu'nu lu cuenda' bee bene
tucu nú niarquí' Diose.

Añica nú ria'ahua ana

²⁸Lia'ahua nediya'ahua nú ye nú
se'ca'ahua lu iliulabequie, zibi'i
lua'ahua, lia'ahua enu se'ca'ahua
Diose lia'ahua enu uri'i caso
stichia'nu para nú ria'ahua tucu
nú niarquí'nu. ²⁹Nu hasta hua'tu
nediya'la' Diose ti bee enu chili arqui'
li'ínu, nu ucañinu li'ibeella para nú
huañi beella, nu acabeella xi neca
lli'ñinu Jesucristo, para nú Jesucristo
aca enu nibiya' lu ye bee bene enu
neca lli'ñi Diose. ³⁰Xne ye bee bene
enu nediya' Diose nú chili arqui'
li'ínu, ucañinu li'ibeella nu ubixianu
beella para nú aca beella bee
bene'nu, nu ulu'cu cuendanu beella
nú la lu'cubeella dula, nu uninu nú
dete'nu eluxene lubeella liñibe.

³¹Nee nú nediya'la'ahua yebee
nucua' lecaxi ri'i mase nú rri'i
cundra bee bene lia'ahua, Diose
ri'i elietsa lua'ahua. ³²Necaa
Diose lli'ñinu ungti equie cuenda'
stula'ahua. Nu tunu uliqui'nu
lli'ñinu ungti equie stula'ahua.
¿Xaquie nú la liqui'nu ye beenú
liqui'nu lua'ahua equie cuenda'
lli'ñinu? ³³¿Ti aca xanabitsi lu
cuenda'ahua nú neca'ahua bene
enu rlu'cu dula ante Diose? Xne
le'ca li'ínu ubacu'nu lia'ahua nú la
lu'cua'ahua dula. ³⁴Lecati aca ni nú
rialala'ahua castiya, xne Jesucristo
neca enu ungti para nú udixiunu
equie cuenda' stula'ahua, nu la neca
nucua'tsia sino que le'ca uhuañi
zecanu lu eluti, nu nee nzucunu
cue'tse Diose chube rnacu'nu lu
Diose lu cuenda'ahua. ³⁵Nu tucu nú
seca Jesucristo lia'ahua lecati ri'i
ana huachuu lia'ahua lunu. Pero
ni' nú nehuana nzu arquia'ahua,
urre nú nehuana se'ca'ahua, urre
lunú xi rri'inuu bee bene lia'ahua,
urre nú rlia'na'ahua, urre nú leca
xucua'ahua, urre nú xiquia'ahua,
urre lu eluti, lecaxi nú huachuu
lia'ahua lunu. ³⁶Lu ichi' Stichia'
Diose rni:

Equie nú necaru bee lli'ñilu, ye
ye'e nzuquie eluti li'iru,
rri'ínu bee bene li'iru xi rri'ínu
beei bee sanchi enu nzula
nú ati.

³⁷Pero ni' tucu bee nucua' la ri'i
ana lua'ahua xne rri'i Jesucristo
elietsa lua'ahua, li'ínu enu seca
lia'ahua. ³⁸Nediya nze'caa nu ni'
eluti, nu ni' elunehuañi, nu ni' bee
ángele, nu ni' bee benechiqui', nu
ni' beelá bee enu rlu'cu nú rnibiya',

nu ni' lunú reca, urre lunú aca,
³⁹urre lunú nze'ta enza liñibe, urre
 liñi yuu, ni' tucue nu ni' stucu lunú
 ureche' Diose, lecaxi nu lecati aca
 huachuu lia'ahua lu eluseca' Diose
 equie cuenda' Jesucristo.

9 Como bene' Jesucristo nú
 necaa, rnia nú neli neca luhua
 la nia eluquichia' luhua. Nu li'á
 nediyaá nú Espíritu Santo nediya'
 nú neli neca nú rniá luhua, ²nu
 yeye'e chiqui' nehuana nzu arquia
 hasta nú rcuu arquia. ³Nu hasta
 niarquia nú mase nú yalalá castiya'
 Diose mase nú huachu Jesucristo
 li'á tucu chu, pero ala' nú tunu
 scua nu' modo ri'i nucua' elietsa
 lubee bene lachia Israel para nú
 la zeca beei castiya. ⁴Nucua' si'á
 lubee bene lachia Israel, nu li'ibeei
 neca enu ucañi Diose nú aca bee
 bene'nu, nu rulu siqui'nu ube'tanu
 lubeella, nu uninu lubeella nú
 xneca modo lu'cubeella tucu inziu
 nú riña beella lunu, nu udete'nu
 leynu yabeella, nu uninu lubeella
 nú xneca lu'cubeella ula'na lunu, nu
 uninu nú xi dete'nu lubeella. ⁵Nu
 la necane lucuenda'tsia bee nucua',
 sino que le'ca lubee familia'ahua
 enu udetela enu uzibi' lu Diose
 nze'tabeella, nu le'ca lu familia cua'
 nze'ta Jesucristo chenu uriñanu
 lu iliulabe li'inu enu neca Diose
 enu riala nú lu'cu bee bene ula'na
 lu diqui tiambu, equie nú rlu'cunu
 elurnibiya' lu yebée nú nu'. Amén.

⁶La nia luhua nú la tsalua' Diose
 stichia'nu lubee bene Israel, sino
 que lunú rnia nú la yebée bene
 Israel neca bee bene' Diose. ⁷La
 necane equie nú nze'tabeella lubee
 familia' Abraham nú yebeella

neca beella bene' Abraham, xne
 uni Diose lu Abraham: “Hasta lu
 endu'lu Isaac quixie bee lli'ñilu.”
⁸Scua rria'ahua beya' nú la neca nú
 neca bene bene Israel, nú necala
 bene bene' Diose, sino que bee
 enu neca bene' Diose neca bee enu
 nebacu' nze'ta leta bee familia'
 Abraham xne nzeli arqui'beella
 Stichia' Diose xi uyalí arqui'
 Abraham. ⁹Xne uyalí arqui'lla nú
 uni Diose lulla, chenu uninu lulla:
 “Steliana le'ca mismo tiambuquie'
 nzelaá nu che rlu'cula Sara tucu
 endu'.”

¹⁰Nu lacane nucua'tsia sino que
 chenu uru'cu Isaac endu' Sara, che
 uchialla Rebeca. Nu ante nú ala
 bee cuachi enu ullana Rebeca.
¹¹Chenu lasca' chulu beenu ni'nú
 neca nze'ca nú ni' nú necha neca,
 para nú acachee nú nediya'la' Diose
 xa rcañinu bene, nu la necane
 lunú xa rri'i bene sino que li'inu
 nediya'la'nu ti rcañinu, nu ante nú
 ala bee cuachi cua', ¹²Diose uni lu
 Rebeca: “Lurucu bee cuachicua' enu
 ala nú rrucu, neca enu nibiya' lu
 enu rlu'cu ala.” ¹³Tucu nú nequie lu
 ichi' Stichia' Diose elu rni: “Ulle'caa
 Jacob pero ulea lu Esaú.”

¹⁴Nu nee, ¿xie' nu' modo nú
 nia'ahua nú la ri'i Diose tucu nú
 necane ché la? ¡Pero lacane esquie!
¹⁵Xne uni Diose lu Moisés: “Se'caa
 bee bene enu niarquia nú ze'caa
 nu rua'a arquia bee bene enu
 niarquia nú hua'a arquia.” ¹⁶Enze'e
 leca modo nú hua'a arqui' Diose
 bee bene lunú niarquitsialla
 urre equie nú xi rri'lla sino que
 necatsia nucua' cuenda' Diose nú
 ti niarquinu hua'a arqui'nu. ¹⁷Lu

ichi' Stichia' Diose rni nú uni Diose lu arre Egipto: “Li'á uri'á nú ungalu arre para nú lañi' bee bene lunú recaa nu lu cuenda' li'ilu ri'chialeitse bee bedichia' nú ti necaa diqui lu iliulabe.” ¹⁸Enze'e nia luhua nú nediya'la' Diose nú ti niarqui'nu hua'a arqui'nu, nu le'ca rri'li nztinu enu niarqui'nu nú aca nziti.

¹⁹Pero tala bese nihua lua: “Tunu scua necane, ¿xinu rle Diose nú xneca neca'ahua nu leca modo nia'ahua lu Diose nú xi ri'inu?”

²⁰Pero, ¿ti necalu para nú niilu scua lu cuenda' Diose? Xie' nu' modo ni etsu lu bene enu ureche' etsu: “¿Xinu ureche'lu li'á scua?” ²¹¿Xie'lanu enu rreche' bee etsu, li'illa rri'inulla yuubi'chi xitse nú niarqui'lla la? Li'illa nediya'lla xi reche'lla cuna yuubi'chi ze'e, tunu reche'lla tucu etsu nú rqui'ña yeye'e urre tucu etsu nú rqui'ñiatsia lu eliñi.

²²Neequie le'ca scua nediya'la' Diose ti riala castiya, nu hasta nú nu' beya' nú chu dete'nu castiya bee bene para nú scua acachee nú rlu'cunu poder pero li'inu ulu'cu arqui'nu nu uriqui'nu bee bene enu lá zucu' stichia'nu bee enu riala nú nitilu. ²³Nu uriqui'nu li'ibeei para nú acachee nú li'inu rlu'cu cuendanu nú xa ri'inu nu rlu'cunu nú rnibiya'nu, nu uhua'a arqui'nu bee enu nediya'la'nu nú hasta hua'tu riala nú chu'u liñibe. ²⁴Nu lia'ahua neca bee benecua', bee enu ubixia Diose sia leta bee bene Israel nu sia leta bee bene enu laca bee bene Israel. ²⁵Tucu nú nequie lu ichi' Stichia' Diose nú uquie'e profeta Oseas, elu rni:

Bee enu laca benea, nia lubeei benea,
nu bee bene enu lecati zeca, li'á zecaa beei.

²⁶Elu uni Diose lubee bene: “Li'ihua lacahua bee benea”, ze'e li'ibeei acabeei lli'ñi Diose enu nehuañi.

²⁷Le'ca uni profeta Isaías equie cuenda' bee bene Israel: “Mase nú chiqui' huaxi bee bene Israel tucu nú huaxi eyuxi ru'u inzatu', pero laca huaxi bee bene enu tsila'a.

²⁸Xne lacaxea nú tsalu Diose stichia'nu lu iliulabequie' tucu nú unilanu.” ²⁹Nu hasta hua'tu le'ca uni profeta Isaías:

Tunu Pa'ahua Diose enu rlu'cu ye nú rnibiya' azela nú alaxu yebee bene'ahua enu udetela,
hasta hua'tula ulaxu bee bene'ahua che, tucu nú ulaxu bee bene Sodoma cuna Gomorra.

Bee bene Israel cuna Stichia' Diose

³⁰Neequie, ¿xania'ahua nee? Bee bene enu laca bee bene Israel ni' lá achenu arqui'beella xa tsila'a beella pero nee utsila'ala beella lunú nzeli arqui'beella Jesucristo. ³¹Nu bee bene Israel mase nú chiqui' ula'na beella modo nú xneca huañibeella tucu nú rnibiya' ley para nú tsila'a beella pero né ri'ibeella ana. ³²¿Xiquie nú né ri'ibeella ana nú tsila'a beella? Xne mase ula'na beella nú huañi beella tucu nú rnibiya' ley, luhuare nú chili arqui'beella Diose tucu nú riala nú chili arqui'beella li'inu para nú tsila'a beella. Nu unga Jesucristo

lubeella: “Xi neca tucu quiee nú xica cuchiu' bene.” ³³Tucu nú nequie lu ichi' Stichia' Diose elu rni:

Li'á zucua tucu quiee eyeche
Sión, quiee nú llica cuchiu'
bene, nu zana' bene.

Nu enu chili arqui' li'inu leca'
xunga tu' nze'e.

10 Bee sa'a enu nzeli arquia'ahua Jesucristo, chiqui' rnaqua lu Diose nú tsila'a bee bene Israel. ²Xne li'á nediyaa nú chiqui' rla'na beella nú zibi' beella lu Diose. Pero la ri'ibeella beya' xneca ri'ibeella. ³Xne la zela beella chili arqui'beella tucu nú rialane para nú ri'i Diose perdona beella sino que nzenalatsia beella tucu nú nzeli arqui'beella nú aca perdona beella, luhuare nú ri'i beella tucu nú niarqui' Diose para nú ri'i Diose perdona beella. ⁴Xne equie cuenda' Jesucristo ulaxu nú rnibiya' ley' Moisés lubee bene, nu nee bee bene enu chili arqui' Diose uri'ilanu perdona li'ibeella.

⁵Pero bee bene enu niarqui' nú huañi sin dula lu iliulabequie' equie nú nzenala beella ley' Moisés unii nú bene enu rri'i ye nú rnibiya' ley lu'culla elunehuañi mientras nú sucu'lla ley. ⁶Pero lunú uri'i Diose perdona bene necane lunú uchili arqui'lla Jesucristo nu la yala' ri'illa elliebacu': “¿Ti aca quiee liñibe?” Xne chenu rri'i bene elliebacu' scua niarqui' bene nú lañi'lla nú laca Jesucristo lu iliulabe. ⁷“Le'ca la yala nilla: ¿Ti aca cha elu nu' bee benenguti?” Xne chenu rnilla scua niarqui'lla nú lañi'lla nú huañi zeca Jesucristo leta bee benenguti. ⁸Pero lu ichi' Stichia' Diose rni: “Axu

nzu Stichia' Diose lulu, rri'itsia nú niilu nu ri'ilu elliebacu' tunu chili arqui'lue.” Xne lunú rixiule'eru lubee bene necane nú xneca chili arqui' beella, nu singuie necane. ⁹Tunu li'ilu nilu nú Jesucristo neca enu rnibiya' lulu nu diquinu' arqui'lu chili arqui'lu nú Diose uri'i nú uhuañinu lu eluti, che tsila'alu. ¹⁰Xne desde hora nú diqui'nu arqui' bene nzeli arqui' bene Jesucristo che utsila'alla. Nu chenu ni bene nú Jesucristo neca enu rnibiya' lulla che tsila'alla. ¹¹Lu ichi' Stichia' Diose rni: “Ye bee bene enu chili arqui' Jesucristo leca xunga ya'na netúlla.” ¹²Nu nucua' rni nú ante Diose iguale neca ye bee bene leca xiri'i nú ti benella, tunu necalla bene Israel urre lacalla bene Israel. Xne tucutsia Diose neca Diose lu ye bee bene, nu chiqui' ñia rri'inu luye bee bene enu rnaqu' lunu. ¹³Tucu nú nequie lu ichi' Stichia' Diose elu rni: “Yebee bene enu rnaqu' lu Diose tsila'a bee nze'e.” ¹⁴Pero, ¿xa nacu' bene lunu tunu lasca' chili arqui'beella li'inu? ¿Nu xa chili arqui' beella li'inu tunu lasca' yene' beella nú ti necanu? ¿Nu xneca yene' beella nú ti necanu nu lecati ixiule'e xa neca stichia'nu? ¹⁵Nu, ¿xneca ixiule'e beella stichia'nu tunu lecati xe'la li'ibeella? Lu ichi' Stichia' Diose rni: “iChiqui' ñia neca chenu rriña bene enu rriñayu resuna nze'ca para nú huañi nze'ca bee bene!”

¹⁶Pero la yebee bene rri'i caso bee bedichia' nze'ca' Diose, tucu nú uni profeta Isaías: “Diose Pa liñibe, ¿ti uchili arqui' stichia'lu nú rniru?” ¹⁷Enze'e lunú riene' bene nzeli

arqui' bene, nu lunú riene' bene
neca bedichia' nze'ca' Jesucristo.

¹⁸Nu, ¿xie' lasca' yene' bee bene
Israel Stichia' Diose la? ¡Pero li'á
nia luhua nú ubene'la' beellae! Xne
lu ichi' Stichia' Diose rni:

Diqui lu iliulabe uri'chia letsela
Stichia' Diose,
nu hasta elu máse istu lu
iliulabe ubene'la' bee bene
stichia'nu.

¹⁹Neequie rri'á elliebacu': ¿Xie' nú
la ri'i bee bene Israel beya' Stichia'
Diose la? Pero li'á nia nú rri'i beella
beya'e. Xne hasta hua'tu uquie'e
Moisés nú uni Diose equie cuenda'
beella chenu uninu:

Li'á ri'á nú yiea arqui'hua lunú
ri'á lubee bene enu laca bee
bene Israel,
nu lunú ri'á cuna li'ibeei mase
nú lacabeei xi rechua, che
leehua.

²⁰Nu le'ca sin nú lliqui profeta
Isaías uquie'ella lunú uni
Diose equie cuenda' bee bene
Israel chenu uninu:
Bee bene enu laca bee bene
Israel mase nú né la'nabeei
li'á pero ullela'bee li'á.

Nu ulubelua lubeei mase nú ni'
né nedichia' bee li'á.

²¹Le'ca uquie'e profeta Isaías lunú
uni Diose equie cuenda' bee bene
Israel chenu uninu: “Debichia
nzuquiea nú ye'tabeei lua, pero lá
niarqui'bee azucu'bee nú rniaá nu
rnibeei bee bedichia' nú necha neca
equie cuenda.”

Bee bene Israel enu netsila'ala

11

La nia luhua nú utsana'
arqui'la Diose bee bene

Israel, xne lacane scua. Li'ihua
nediya'hua nú le'ca bene Israel
necaa, nu le'ca leta bee familia'
Abraham nzela equie nú nzela
lubee familia' Benjamin. ²Asta
hua'tu ucañi Diose bee bene Israel
nú aca beella bee bene'nu, enze'e
la tsana' arqui'nu beella. A nchiucu'
arqui'hua lu ichi' Stichia' Diose
elu rni: Chenu uxanabitsi profeta
Elías lu Diose equie cuenda' bee
bene Israel chenu unilla: ³“Diose
Pa liñibe, udiñila beella ye bee
profeta'lu, nu unitilula beella bee
ecu'cu'lu. Nu stucutsia li'á uya'naa
nu le'ca niarqui' beella nú úti beella
li'á.” ⁴Pero ¿xi ucuaqui Diose lulla
che? Li'inu ucuaquinu: “Uhuachulá
achi mili bee bene para li'á enu
lasca'li zuculliqui lu diose enu lee
Baal.” ⁵Le'ca scua nucua'a chiucu
chuna bee bene Israel enu rua'a
arqui' Diose, nu ucañinu beella
para nú aca beella bee bene'nu.

⁶Nu equie nú uhua'a arqui' Diose
beella, enze'e ucañinu beella, nu la
necane equie nú xi rri'ibeella, xne
tunu ucañi Diose beella equie nú xi
rri'ibeella che la aca'e equie cuenda'
nú ru'a arqui' Diose beella.

⁷Scua ungae. Bee bene Israel enu
ucañi Diose, ullela'la'beella inziu'
Diose equie nú nzeli arqui'beella
li'inu. Pero beelá bee bene Israel
lasca' llela' beella inziu' Diose,
xne rla'na beella inziu' Diose
tucu nú niarqui'tsiabeella, nu la
cua'na beella Stichia' Diose tucu
nú niarqui'nu, che uri'inu nú unga
nziti arqui'beella. ⁸Tucu nú nequie
lu ichi' Stichia' Diose elu rni: “Uri'
Diose nú unga necabe elliebacu'
beella, mase rlañi' beella pero neca

xi neca nú la lañi'beella, nu mase riene' beella pero neca xi neca nú la yene' beella”, nu scua rri'i'beella hasta nee. ⁹Le'ca uni David:

Equie elubacu nze'ca' beei
nu eluxene'beei nucua'
sequienu arqui'beei nú
nehuañi nze'ca beei,
nu zequienu arqui'beei
para nú zeca beei castiya nú
rialabeei,

¹⁰Nu cabe i'cu'lubeei xi necabe
i'cu'lu tucu bene enu la ye'e
lu,
nu zecabeei xi seca tucu bene
enu leca xunga tsuxe nú
nehuana seca.

**Tsila'a bee bene enu laca
bee bene Israel**

¹¹La nia luhua nú lunú lá zela bee bene Israel ari'i tucu nú niarqui' Diose nú unitilulabeella lu Diose, xne lacane scua. Lunú rnia luhua necane nú lá zucu' beella Stichia' Diose, che scua ulu'cu bee bene enu laca bee bene Israel nú xneca tsila'abeella, para nú scua yea arqui' bee bene Israel nu che nu' modo tsila'abeella. ¹²Nee tunu lunú la zucu' bee bene Israel Stichia' Diose, uzibi' nucua' para nú yala beelá bee bene iliulabe eluxene' Diose, nu lunú uluachu beella lunú niarqui' Diose ri'ilubeella uzibi' nucua' para nú tsila'a bee bene enu laca bee bene Israel. iChiqui' masesca'lá ñia ri'i Diose nú cha nze'ca lu cuenda' bee bene chenu zela bee bene Israel ri'i tucu nú niarqui' Diose nú ri'ibeella!

¹³Nia luhua bee bene enu laca bee bene Israel, scua tucu nú uxe'la

Diose li'á luhua para nú ixiule'a stichia'nu luhua, chiqui' rla'naa nú ri'á tucu nú riala nú ri'á, ¹⁴para nú scua biase chu'u bee bene lachia Israel enu chiqui' niarqui' ri'i tucu nú rri'ihua, nu che tsila'abeella. ¹⁵Neli nú equie nu né zucu' bee bene Israel Stichia' Diose, scua uyu'u modo nú xneca atsila'a beelá bee bene. Pero, ¿chiqui' masesca'lá ñia neca chenu chili arqui' bee bene Israel Stichia' Diose? neca nucua' xi neca chenu rehuañi zeca tucu bene enu ungu'ti. ¹⁶Nu scua tucu nú uri'i Diose nú nza nze'cae lu cuenda' bee bene Israel enu udetela, nucua' neca tucu seña nú le'ca scua cha nze'cae lu cuenda' beelá bee bene Israel, le'ca scua tunu rri'i Diose nú nza nze'ca lu cuenda' luu tucu aca, nu chenu nza nze'cala luu aca cua', diquineca aca cua' nza nze'ca lu cuenda' che.

¹⁷Bee bene Israel neca beella xi neca tucu aca olivo, pero nu' beella enu neca xi neca ellutsa lue nú urecu', nu li'ilu enu laca bene Israel necalu xi neca tucu ellutsa' aca olivo ixi nú uyela' luhuare' ellutsaa nú urecu' lu aca olivo ze'e, chequie scua rlu'culu elunehuañi equie cuenda' luu aca ze'e. ¹⁸Enze'e la tsi'lu nú maselálu lu ellutsa' aca olivo nú neca xi neca bee bene Israel. Pero tunu scua rri'ilu elliebacu', ullu'cu' arqui' nú laca li'ilu enu rdete' elunehuañi' luu aca ze'e sino que luu aca ze'e rliqui' elunehuañi'lu.

¹⁹Tal vez nilu: “Neli'lu nucua', pero bee ellutsaa lu aca olivo cua' urecu'e para nú yela'a luhuare'e nu acatucunecatsea cuna aca

olivo cua'." ²⁰Neli'lu nucua', pero bee ellutsa' aca olivo nú rñiru nú neca bee bene Israel urecu' bee xne la chili arqui' nu li'ilu uyu'ulu luhuare'e equie nú nzeli arqui'lu Jesucristo, enze'e la aca nelliñalu sino mejora nú bi'ya li'ilu. ²¹Xne tunu bee bene Israel enu neca xineca ellutsa lu aca olivo ze'e né hua'a arqui' Diose le'ca scua nu' beya' nú la hua'a arqui' Diose li'ilu. ²²Uri'i beya' nú nze'ca Diose, pero le'ca rri'inu elu usticia tucu nú necane. Nu uri'ilanu elu usticia lubee bene enu la zucu' stichia'nu, nu uri'inu nú neca nze'ca lulu. Pero riala nú huañilu tucu nú niarqui' Diose nú huaña'ahua xne canu le'ca ri'i Diose elu usticia'nu lulu. ²³Nu tunu bee bene Israel benchila' arqui'beella lu Diose nu chili arqui'beella Jesucristo che li'inu lu'cu cuendanu li'ibeella cuna beelá bee bene enu nzeli arqui' Jesucristo. Xne li'inu rlu'cunu poder para nú ri'inu nú acatucunecatse beella cuna beelá bee bene Israel. ²⁴Xne tunu li'ilu enu laca bene Israel necalu xi neca tucu ellutsaa aca olivo ixi nu unga tucunecatse lu cuna aca olivo stila nú neca bee bene Israel, ixaquie nú la acane scua lubee bene Israel enu lá zucu' Stichia' Diose nú la aca tucunecatse beella stucu bese cuna beelá bee bene Israel, tunu zucu' beella Stichia' Diose!

Bee bene Israel tsila'a

²⁵Bee sa'a enu nzeli arquia'ahua Jesucristo nu' tucu nú la ri'ihua beya nu niarquia nú ri'ihua beya'e para nú la aca nelliñahua: bee

bene Israel enu reca nziti la niarqui' zucu' Stichia' Diose, scua recae hasta bichia nú laxu chili arqui' yebee bene enu laca bee bene Israel Stichia' Diose, bee enu rqui'ña nú chili arqui'. ²⁶Chenu ungalane scua che ye bee bene Israel ri'i caso Stichia' Diose. Nu scua tsila'a beella tucu nú nequie lu ichi' Stichia' Diose elu rni:

Eyeche Sión chiu'u tucu bene enu ri'i elietsa lubee bene enu nze'ta lu familia' tuxie Jacob,

para nú tsana' arqui'beella nú necha neca rri'ibeella.

²⁷Che yalu stichia'a tucu nú unila nú ria'á perdona stula beella.

²⁸Pero nee lunú reca nziti bee bene Israel nu lá chili arqui'beella bedichia' nze'ca' Jesucristo, che scua nu' modo chili arqui'hua li'ihua enu laca bee bene Israel. Nu añinzuca nú scua necane pero secasca' Diose li'ibeella tucu nú ucuauqui u'nanu lubee bene'beella enu udetela. ²⁹Xne la che'e Diose elliebacu'nu, nu la yucunu lunú lia udete'nu lubee bene, nu le'ca la tsana' arqui'nu bee bene enu ucañilanu para li'inu. ³⁰Hua'tu li'ihua ne chenalhua Stichia' Diose. Pero nee equie cuenda' bee bene Israel enu la zucu' Stichia' Diose nee ulube'nu luhua nú rua'a arqui'nu li'ihua. ³¹Nu tunu nee bee bene Israel la zucu' Stichia' Diose, recae scua para nú hua'a arqui' Diose li'ihua, pero le'ca riña bichia nú hua'a arqui'nu li'ibeella. ³²Uzela Diose nú sia bee bene Israel nu bee bene enu laca bene Israel la zucu'

beella stichia'nu para nú hua'a arqui'nu beella.

³³ ¡Chiqui' llene neca eluxene' Diose cuna lunú recanu nu cuna lunú rri'inu beya'! Lecati ri'ibeya' xa neca elliebacu' Diose urre lunú rri'inu, ³⁴ tucu nú nequie lu ichi' Stichia' Diose elu rni: “¿Ti itá ri'i beya' nú xneca neca elliebacu' Pa'ahua Diose? ¿Ti máse reca para nú nii lu Diose nú xneca ri'inu?” ³⁵ Urre, “¿ti udete' xi udete' lu Diose para nú nzuquie nze'e nú ixiu nu lu nze'e?” ³⁶ Yebec nú nu' neca stene'nu nu li'inu ureche'nue nu yeene necane para li'inu. Enze'e riala nú lu'cu bee bene ula'na lunu diqui tiambu. Amén.

Xa niarquí' Diose nú huañi bee bene

12 Enze'e, bee sa'a enu nzeli arquia'ahua Jesucristo, sequia nu nacua luhua, nú scua tucu nú uhua'a arqui' Diose lia'ahua, ude'tecuahua li'ihua lu Diose xi neca tucu u'na nú nehuañi nú lecaxina nu riu' arqui' Diose. Para nú huañihua tucu nú niarquí'nu nú huañihua nu scua riala lu'cuhua ula'na lunu. ² La huañihua xi nehuañi beelá bee bene enu nucua'a tiambu quie', mejora uche'ehua elliebacu'hua para nú scua che'e nú xneca nehuañihua nu scua ri'ihua beya' nú xneca niarquí' Diose nú huañihua. Nu le'ca scua ri'ihua beya' ta nú neca nze'ca nu ta nú riu' arqui' Diose, nu ta nú riala ri'ihua.

³ Equie nú seca Diose li'á enze'e ucañinu li'á, nu uxe'lanu li'á para nú ixiu le'a stichia'nu luhua. Enze'e nialuhua, ni'tucuhua la

aca nelliñiahua nú másela neca equiehua lubeelá bee bene. Mejora uri'ihua elliebacu' nze'ca equie cuenda'tsiahua tucu nú necane nu tucu nú uliqui' Diose elliebacu' lu cada tucuhua. ⁴ Xne scua tucu nú neca cuerpo' bene nú huaxi parte necane pero laca yeene sibi'i ihuale. ⁵ Le'ca scua lia'ahua enu nzeli arquia'ahua Jesucristo mase nú huaxia'ahua pero lunú nzeli arquia'ahua Jesucristo scua neca tucunecatse'ahua cuna li'inu, xne cada tucua'ahua ria'ahua lunú riala ria'ahua para nú ria'ahua elietsa lubee sa'ahua. ⁶ Nu cada tucua'ahua urene elliebacu' uliqui' Diose lua'ahua tucu nú uninu nú reca'ahua. Enze'e tunu uliqui'la Diose nú nia'ahua stichia'nu, rqui'ña nú nia'ahua stichia'nu lubee bene, equie nú nzeli arquia'ahua li'inu. ⁷ Tunu uliqui' Diose elliebacu' nú zibi'ahua lubee sa'ahua uri'ihua tucu nú necane. nu enu udete' Diose elliebacu' para nú zete' stichia'nu lubee bene rqui'ña nú zete'lla stichia'nu lubee bene. ⁸ Nu tunu necane nú udete'nu elliebacu' lulla nú nilla lubee bene rqui'ña nú scua ri'illa. Nu tunu udete'nu elliebacu' nú xi lia dete'lla lubee bene la tsuquiella nú xi ati'lla, nu enu dete'nu elliebacu' nú nibiya' rqui'ña nú bi'yalla xa nibiya'lla tucu nú rialane, nu enu udete'nu nú ri'i elietsa lubee bene enu seca elitsi rqui'ña nú ñia nzu arqui'lla ri'illae.

Xa riala huañi bee bene enu nzeli arqui' Jesucristo

⁹ Uzecahua bee sa'hua nu la ri'ihua nú lia ri'itsiahua ne nu

uluachuhua nú necha rri'ihua, nu uri'ihua nú necha nze'ca. ¹⁰Diquinu' arqui'hua uzecahua bee sa'hua xi necha tucu bichihua nu la zucu' ayahua li'ihua, nu ulu'cuhua ula'na lusa'hua.

¹¹La nebichihua lunú rri'ihua uri'ihua lunú riala ri'ihua, diquinu' arqui'hua xne lu Jesucristo necha enu sibi'hua. ¹²Ñia utsu arqui'hua uhuañihua lunú nzuquie arqui'hua, nu uriqui'hua lunú nehuana secahua nu la lliquihua, nu la tsana' arqui'hua nú rnacu'hua lu Diose. ¹³Uri'ihua elietsa lubee sa'ahua enu nzeli arqui' Jesucristo chenu nu' xi secala'cha'beella nu xi rqui'ña beella, uri'ihua elietsa lubeella. Nu chenu nu' ti rri'ña ni'hua uri'i nze'cahua lubeella.

¹⁴Una'cu'hua lu Diose equie cuenda' bee bene enu necha rri'inu li'ihua nu le'ca una'cuhua nú cha nze'cae lu cuenda' beella nu la i'ñahua nú xi zeca beella.

¹⁵Ñia utsu arqui'hua cuna bee bene enu ñia nzu arqui', nu bee bene enu nehuana nzu arqui' ulube'hua lubeella nú le'ca nehuana nzu arqui'hua cuna li'ibeella.

¹⁶Uhuañi nze'cahua cuna beelá bee bene, nu la aca nelliñiahua sino que uquie'te'hua ye bee bene, nu la tsi'hua nú recasca'lahua lubeelá bee sa'hua.

¹⁷La duse'ehua nú necha necha lubee bene enu rri'i nú necha necha luhua, nu ubi'yahua nú ri'ihua nú necha nze'ca lu ye bee bene.

¹⁸Ula'nahua nú chiqui'sca'lá huañi nze'cahua nu la liunuhua bee bene.

¹⁹Bee sa'a enu nzeli arquia'ahua Jesucristo la duse'ehua nú necha

rri'inu bee bene li'ihua mejora uzelahua nú Diose dete' castiya lubeella, tucu nú rni lu ichi' Stichia' Diose elu rni: "Li'á riala ri'á elu usticia nu detea castiya lulla. Scua uni Diose Pa liñibe." ²⁰Le'ca uninu: "Tunu bene enu rle lulu rlia'na' ude'te' nú aculla, nu tunu rrebichi'lla ude'te' nú hue'lla, xne scua lañi'lu nú chiqui' tu'lla." ²¹La zelalu nú ri'i nú necha necha ana lulu mejora uri'i nú necha nze'ca para nú ri'ilu ana lunú necha necha.

13 Yeebe bene rqui'ña nú zucu' nú rnibee usticia cuna ubierno. Xne Diose udu' bee usticia cuna ubierno, nu li'inu rdete'nu elurnibiya' nú rlu'cubeella. ²Enze'e bee bene enu la zucu' nú rni bee usticia le'ca la zucu'bee' nú rni Stichia' Diose nu bee bene enu rri'i scua le'ca li'ibeei rla'na beei nú zeca beei castiya. ³Xne bee usticia la nucua'a beella para nú dete' beella castiya lubee bene enu lecaxi ri'i, xne nucua'a beella para nú dete' beella castiya lubee bene enu necha rri'i, nu tunu la niarqui'lu nú ri'chia usticia li'ilu rqui'ña nú ri'i nze'calu, nu scua la ri'chia usticia li'ilu. ⁴Xne scua sibi' beella lu Diose para nú acanu'beella li'ilu. Pero tunu rri'ilu nú necha necha, che xiquilu bee usticia xne la necha nú lia rlu'cu beella elurnibiya' sino que scua sibi' beella lu Diose para nú dete' beella castiya bee bene enu necha rri'i. ⁵Enze'e rqui'ña nú zucu' bee bene nú rni bee usticia nu la acatsiae equie nú xiquibeella nú zeca beella castiya, sino que nediya' beella nú scua riala ri'ibeella. ⁶Nu le'ca u dixiuhua impuesto para nú

nzenibiyala bee usticia, xne Diose udu' li'ibeella para nú nibiya' beella nu scua sibi' beella lu Diose.

⁷Enze'e ude'te'hua nú riala dete'hua, tunu riala nú dete'hua melu, ude'te'hua melu, nu tunu riala ixihua impuesto, udixihua impuesto. Nu uzu'cu'hua nú rni bee bene enu riala zucu'hua nú rni, nu ulu'cuhua ula'na lubee enu riala nú lu'cuhua ula'na lu.

⁸La aca nezi'quihua lubee bene, nu lunú la yala tsana' arqui'hua neca nú zecahua bee sa'hua. Xne bee bene enu secasa', scua sucu' bee nze'e ye nú rnibiya' ley' Diose. ⁹Xne bene enu sucu' mandamiento' Diose nú rni: "Uzeca sa'lu tucu nú secalu li'ilu." Enu sucu' mandamiento quie', sucu'la beelá bee mandamiento nú rni: "La ri'ilu eluhuexe, la utilu bene, la ri'ilu eluhua', la le'lu stene' sa'lu." ¹⁰Xne bene enu seca sa' la ri'illa nú necha neca lubeelá bee bene, enze'e bene enu seca sa' sucu'lalla ye nú rnibiya' ley' Diose.

¹¹Nu le'ca uri'ihua beya' xi tiempo nellua'ahua, nu uri'ihua beya' nú necala hora nú dete'ahua ellie'e. Xne nze'ta riñala bichia nú riña zeca Jesucristo stucu bese nu la lea' nú riña zecanu xi neca bichia chenu uchili arqui'ahua li'inu.

¹²Nze laxu tiempo, nu nze'ta riñala bee bichia nú riña zecanu, enze'e rqui'ña nú tsana' arqui'ahua inziu nú necha neca nzenala'ahua nu ria'ahua puro nú neca nze'ca para nú chenala'ahua inziu nze'ca.

¹³Rqui'ña nú huañi nze'ca'ahua, nu la ria'ahua beenú netú neca. Nu la yala nú aca'ahua uniqui nu la ria'ahua eliñi para nú chu'u modo

nú ria'ahua lunú la yala ria'ahua. Nu la yala nú ria'ahua eluhuexe urre xitse stucu bee vicio, nu la yala nú liu'ahua, nu la yala nú yea arqui'ahua lu sa'ahua. ¹⁴Sino que mejora uhuañihua tucu nú niarqui' Jesucristo nú huañihua, nu la yala nú huañihua lunú necha neca riu' arqui'hua.

La ze'ta bene sa'bene enu
apenatsia nzeli arqui' Jesucristo

14 Uri'i nze'cahua lu tucu bene enu apenatsia uchili arqui' Jesucristo nu la liu ru'uhua cuna li'illa, tunu la ri'illa elliebacu' tucu nú rri'ihua elliebacu'. ²Xne nu' bee bene enu nzeli arqui' Jesucristo seca nú nu' beya' acu bene xitse pero nu'bee enu apenatsia nzeli arqui' Jesucristo, seca nú ñialá nú acu bene purotsia bee verdura para nú la aculla beenú la yala aculla. ³Pero bene enu seca nú nu' beya' acu bene xitse, la yala nú huachulla bene enu seca nú la yala acu bene xitse. Nu bene enu seca nú nu' beenú la yala acu bene, la yala nú ze'ta bene bene enu racu ye nú racu, xne tucutse bene' Diose neca beella. ⁴Enze'e, ¿ti neca bene nú ze'ta bene sa'bene enu nzeli arqui' Jesucristo equie cuenda' bee nucua'? Xne Diose nediya' tunu rri'i nzeca bene nu tunu la ri'i nze'ca bene. Nu tunu lasca' ri'i bene beya' nú xneca ri'illa, che Jesucristo rlu'cu poder para nú ri'inu elietsa lulla para nú ri'illa lunú riala ri'illa.

⁵Le'ca scua nu' bee sa'ahua enu nzeli arqui' Jesucristo seca nú nu' bee bichia cachi nú la yala ri'i bene riña' nu nu' bee enu seca nú ye bee

bichia ihuale neca. Pero lecaxi ri'i nucua' xne cada nú nzeli arqui' cada tucu bene. ⁶Xne bene enu seca nú nu' bichia cachi nú la yala ri'i bene riña' rri'illa scua para nú lu'culla ula'na lu Diose. Nu bene enu seca nú ye bee bichia iguale neca, le'ca rlu'culla ula'na lu Diose. Nu bene enu racu ye nú racu, racullae xne nediya'lla nú Diose uliqui'i, nu rdete'lla che'tsa lunu equie cuenda'e. Nu bene enu seca nú nu' elubacu nú la yala acu bee bene, rri'illa scua xne secalla nú scua rlu'culla ula'na lu Diose nu le'ca rdete'lla che'tsa lu Diose.

⁷Ni' tucua'ahua la nehuaña'ahua lunú niarqui'tsia'ahua, nu le'ca la atia'ahua equie nú niarqui'tsia'ahua. ⁸Tunu nehuaña'ahua, equie cuenda' Jesucristo nehuaña'ahua nu para li'inu nehuaña'ahua, nu tunu atia'ahua, equie cuenda' Jesucristo atia'ahua nu para li'inu atia'ahua, enze'e tunu nehuaña'ahua urre atia'ahua necala'ahua para Jesucristo. ⁹Xne para enze'e ungu'ti Jesucristo nu uhuañi zecanu, para nú nibiya'nu sia lubee bene enu nehuañi nu sia lubee bene enu ungu'ti. ¹⁰Enze'e, ¿xiquie nú se'talu nu rluachulu bee sa'lu enu nzeli arqui' Jesucristo? Nu ye'ahua riña'ahua ante Diose para nú lualunue lu cuenda'ahua. ¹¹Xne lu ichi' Stichia' Diose rni:

Nu li'á enu neca Diose enu nehuañi nia luhua nú ye bee bene zucu lliqui lua.

Nu ye bee bene ni nú li'á necaa Diose, scua uni Diose.

¹²Nu cada tucua'ahua dete'ahua cuenda lu Diose lunú xi uri'i cada tucua'ahua.

La zelahua nú zana' sa'hua enu nzeli arqui' Jesucristo lu dula

¹³Enze'e, la yala ze'ta'ahua bee sa'ahua enu nzeli arqui' Jesucristo mejora te bi'ya'ahua lia'ahua nú la yala nú ria'ahua nú ri'i stucu bene dula. ¹⁴Nu lunú necaa bene' Jesucristo, nediya nze'caa nú lacane dula nú racu bene xitse pero para bene enu seca nú leca modo nú acu bene xitse, para li'illa necane dula tunu raculla xitse. ¹⁵Neequie tunu equie cuenda' beenú raculu seca sa'lu enu nzeli arqui' Jesucristo nú dula neca nú rri'ilu, nu tunu la ri'icasululla che neca nú la zecalu li'illa ubi'ya para nú la ri'i nú raculu nú ri'i sa'lu dula, xne le'canuu equie cuenda'lla ungu'ti Jesucristo lu cruse. ¹⁶Enze'e la ri'ilu xi ri'ilu para nú la ze'ta bee sa'lu li'ilu añinzuca nú li'ilu nediya'lu nú neca nze'ca nú rri'ilu. ¹⁷Xne lu Diose la neca equie cuenda' nú racu bene urre equie cuenda' nú rue'e bene nú másela seca, sino que lunú máse seca ante Diose necane nú huañi bene tucu nú riala nú huañi bene nú huañilla sin xuu nu ñia nzu arqui'lla equie cuenda' Espíritu Santo. ¹⁸Nu bene enu nehuañi scua equie nú nzenalalla Jesucristo, sucu'lla tucu nú niarqui' Diose, nu tucu nú riu' arqui' bee bene.

¹⁹Enze'e rqui'ña nú la'na'ahua nú huañi nze'ca'ahua cuna bee sa'ahua sin xuu para nú nzeri'ila'ahua beya' xneca riala chenala'ahua inziu' Diose. ²⁰Bi'yahua xne canú equietsia beenú racuhua ri'ihua nú ri'i bee sa'hua dula, neli nú nu' beya' acu bene ye nú nu' pero

lunú necha necha tunu para sa'lu enu nzeli arqui' Jesucristo necha dula lunú raculu rnitilulu li'illa che. ²¹Enze'e tunu nu'bee sa'lu enu nzeli arqui' Jesucristo seca nú necha necha tunu acu bene mii nu le'ca necha necha nú hue' bene viñiu urre stucu nú rene, mejora la acu bene nu la hue' bene ante lulla para nú la ri'ilu nú ri'illa dula. ²²Añinzuca nú li'ilu nediya'lu nú lecaxi necha nú acu bene xitse, pero mejora li'itsialu cuna Diose nediya'lu nucua'. Li'á nia nú ñia necha lu cuenda' bene enu racu xitse sin nú za' arqui'lla. ²³Pero bene enu sa' arqui' equie nú racu, xne tunu para li'illa dula necha nú acullae nu racullae chequie e'cuñialla rri'illa dula equie nú rri'illa elliebacu' nú la necha nze'ca nú rri'illa. Ye nú rri'illa nu sa' arqui'lla chenu rri'llae rri'illa dula che.

Rqui'ña nú ria'ahua lunú riu' arqui' sa'ahua

15 Lia'ahua enu nzuta' arquia'ahua lunú nzeli arquia'ahua Jesucristo rqui'ña nú ria'ahua elietsa lubee bene enu lasca' tsuta' arqui' lunú nzeli arqui' Jesucristo luhua nú ria'ahua lunú niarqui'tsia'ahua. ²Sino que ye'ahua rqui'ña nú la'na'ahua nú ñia tsu arqui' bee sa'ahua. Nu rqui'ña nú ria'ahua lunú seca beella nú necha nze'ca, para nú ria'ahua elietsa lubeella nú nzeri'ilábeella beya' xneca riala chenala beella inziu' Diose. ³Xne ni' Jesucristo né ri'i tucu nú niarqui'tsianu sino que unga tucu nú nequie lu ichi' Stichia' Diose elu rni: "Li'á

uyucu'a ye bee bedichia' chi'qui' nú riala ni bee bene lulu." ⁴Ye nú nequie lu ichi' Stichia' Diose hasta hua'tu nequiene para nú ria'ahua beya' xneca huañia'ahua, nu equie cuenda' Stichia' Diose nze'ta nú rlu'cua'ahua paciencia, nu la llaca'ahua telluaquie'ahua lunú nelluaquie'ahua nú atia'ahua. ⁵Diose enu rri'i nú rlu'cua'ahua paciencia, nu rri'i elietsa lua'ahua para nú la llaca'ahua, li'inu ri'inu elietsa luhua para nú huañihua nu aca tucunecatsehua cuna beelá bee sa'ahua tucu nú uri'i Jesucristo. ⁶Para nú yehua tucutse nihua bedichia' nze'ca lu Diose, pa' Jesucristo.

Riene' bee bene enu laca bee bene Israel Stichia' Diose

⁷Enze'e scua tucu nú uyucu Jesucristo li'ihua nú necahua bee bene'nu, le'ca scua uri'ihua lu ye bee sa'hua enu nzeli arqui' Jesucristo, equie nú rlu'cuhua ula'na lu Diose. ⁸Nia luhua nú ube'ta Jesucristo lu iliulabe para nú uzete'nu Stichia' Diose lubee bene Israel nu scua ube'tanu uzibi'nu lubeella che scua uyalu tucu nú ucuaqui u'na Diose lubee bene'ahua enu udetela nu scua unga ahee nú Diose sí sa'alunu stichia'nu. ⁹Nu le'ca ube'ta Jesucristo lu iliulabe para nú equie cuenda'nu nu'bee bene enu laca bee bene Israel nibeella bedichia' nze'ca lu Diose xne rua'a arqui'nu li'ibeella, tucu nú nequie lu ichi' Stichia' Diose elu rni: Hasta lubee bene enu laca bee bene Israel nia nú ñia nze'calu,

nu le'ca ulaa bee canto nu ñia ni
lu cuenda'lu.

¹⁰Le'ca rni stucu luhuare Stichia'
Diose:

Li'ihua enu laca bee bene Israel,
ñia utsu arqui'hua tucu nú ñia
nzu arqui' bee bene Israel.

¹¹Nu stucu luhuare Stichia' Dios
rni:

Ye bee bene enu laca bee bene
Israel uni'hua bee bedichia'
nze'ca lu Dios Pa liñibe.
Cuna yebeelá bee bene iliulabe,
uni'hua bee bedichia' nze'ca
lunu.

¹²Le'ca uni profeta Isaías:

Lu familia' Isai chiu' tucu
bene enu nibiya' lubee bene
iliulabe,
nu hasta bee bene enu laca bee
bene Israel chili arqui' li'inu.

¹³Diose enu rri'i elietsa lua'ahua
nú nzeli arquia'ahua, ri'inu nú
ñia nzu arqui'hua nu ri'inu nú
nzuxe arqui'hua lubee sa'hua xne
nzeli arqui'hua li'inu, nu equie
cuenda' Espíritu Santo chiqui'
nucua'aqueihua lunú liqui'nu
lua'ahua.

¹⁴Bee sa'a enu nzeli arquia'ahua
Jesucristo li'á nediya nze'caa nú
rri'i nze'cahua lubee sa'hua, nu
chiqui' recahua hasta rnhua bezete'
lubee sa'hua nu sete'hua bee sa'hua.

¹⁵Añinzuca nú scua nu'bee luhuare
lu carta quie' uquie'a bee bedichia'
nú juerte rcu arqui'hua unia luhua
nú xneca huañihua nu li'á rnia scua
luhua equie cuenda' poder' Dios
nú uliqui'nu lua. ¹⁶Para nú zibi'a
lu Jesucristo nu ixiule'a bedichia'
nze'ca' Dios lubee bene enu laca
bee bene Israel para nú huañibeella

tucu nú niarqui' Dios nú huañi
beella, nu la lu'cu beella dula ante
Diose equie cuenda' Espíritu Santo.

¹⁷Nu xiquie nú rni nze'caa lu
cuendaa como bene' Jesucristo
nú necaa equie nú sibi'a lu Dios,
¹⁸pero lecaxi aca nia nu rri'á tunu
leca nú rri'i Jesucristo elietsa lua,
xne li'inu rri'inu elietsa lua para
nú ri'á elietsa lubee bene enu
laca bee bene Israel para nú chili
arqui'beella Dios nu zucu' beella
stichia'nu, nú nzelila arqui'beella,
equie nú unila lubeella nu lunú
rli'ni' beella xneca nehuaña.

¹⁹Nu le'ca xne ulañi'la'hua ye bee
milagro cuna ye beenú uyanu
arqui'hua unga equie cuenda'
Espíritu Santo. Che scua udixiule'a
bee bedichia' nze'ca' Jesucristo
yabee luhuare, desde Jerusalén
nu hasta lu iliu nú lee Ilírico.

²⁰Xne scua neca elliebacu' nú
rri'á, nú ixiule'a bedichia' nze'ca'
Jesucristo. Pero la ixiule'ene elu
uquixie rixiule'ela benene sino que
rixixiule'ene elu lasca'lí yene' bene
equie cuenda' stichia' Jesucristo.

²¹Tucu nú nequie lu ichi' Stichia'
Diose elu rni:

Bee bene enu lasca' yene' equie
cuenda'nu chulu beella
li'inu,

nu bee bene enu lasca' ri'i beya'
equie cuenda'nu ri'i beella
beya'.

Uri'i Pablo elliebacu' nú nzalla Roma

²²Lunu uya'a ye bee luhuare
elu unila luhua nú nza'a enze'e lá
llucha'a ayelabi'ya li'ihua añinzuca
nú huaxi bese uniarquia ayelabi'ya
li'ihua. ²³Pero nee lunú ula'xulá

rixiule'a Stichia' Diose ye bee luhware ca'a nu como hasta hua'tu niarquia nzelabi'ya li'ihua, ²⁴enze'e nee rri'á elliebacu' nú nzelabi'ya li'ihua chenu nza'a España. Nu chenu nzelabi'ya li'ihua, nu chenu udetela bee bichia nú ñia nzu arquia nú ubelabi'ya li'ihua, che ri'ihua elietsaa nú nza'a España. ²⁵Pero nee rluti nza'xua Jerusalén nzeyua elietsa lubee sa'ahua enu nzeli arqui' Jesucristo nucua'a ze'e. ²⁶Xne bee bene lu iliu Macedonia cuna bee bene lu iliu Acaya enu nzeli arqui' Jesucristo uri'i beella elliebacu' nú quiete' sa'beella melu nú dete' beella lubee bene enu seca elitsi nucua'a Jerusalén, enu le'ca nzeli arqui' Jesucristo. ²⁷Nu elliebacu' e'cubeella uchiu'u nú xe'la beella elietsa cua', añinzuca nú scua riala ri'ibeella lubee bene Israel xne neca xi neca nú nezi'qui beella lubee bene Israel xne equie cuenda' bee bene Israel uriña Stichia' Diose lubeella, nu nee li'ibeella enu laca bee bene Israel, neca nze'cae nú ri'i beella elietsa lubee bene Israel cuna lunú rlu'cu beella. ²⁸Enze'e chenu la'xua lunú rri'á nu detecuendaa elietsa cua' lubeella, che nza'a España nu chenu dete'a lachihua che nzelabi'ya li'ihua. ²⁹Li'á nediya nze'ca nu chenu nzelabi'ya li'ihua nu' huaxi nú nia luhua equie cuenda' Jesucristo.

³⁰Nee equie nú ye'la'ahua se'cala'ahua Jesucristo, nu equie nú seca Espíritu Santo lia'ahua nacua luhua nú ri'ihua elietsa lua nacua'ahua lu Diose equie cuendaa. ³¹Na'cuhua lu Diose nú ri'inu

elietsa lua chenu nzua leta bee bene Judea enu lá chili arqui' Jesucristo, nu le'ca na'cuhua lunu nú bee sa'ahua enu nzeli arqui' Jesucristo bee enu nucua'a Jerusalén, yucu beella elietsa nú nza'a nzetsa'na para li'ibeella. ³²Enze'e tunu zela Diose nú acane scua che ñia nzu arquia nzelabi'ya li'ihua, che nu' beya' tselachia diquila nú nzua cuna li'ihua. ³³Nu Pa'ahua Diose enu rliqui' nú nzuxe arquia'ahua nzu cuna li'ihua. Amén.

Uxe'la Pablo saludo

16 Nee nú nza Febe lachihua una'a enu neca sa'ahua enu nzeli arqui' Jesucristo, nu sibi'lla li'ñi Indu nú nzucu eyeche Cencrea. ²Uyucu nze'cahualla lu cuenda' Jesucristo, tucu nú riala nú ria'ahua lubee sa'ahua enu nzeli arqui' Jesucristo. Le'ca uri'ihua elietsa lulla lu xitse nú rqui'ñalla, xne chiqui' uri'illa elietsa lu huaxi bee bene nu le'ca uri'illa elietsa lua. ³Uri'ihua saludar Aquila cuna una'lla Priscila, li'ibeella enu rri'i elietsa lua, nú rixiule'eru stichia' Jesucristo. ⁴Li'ibeella enu hasta uniarqui' ati equie cuendaa para nú la atia, enze'e rdetea che'tsa lubeella. Nu la necane nú li'itsia rdetea che'tsa lubeella. Le'canu bee sa'ahua enu nzeli arqui' Jesucristo enu laca bee bene Israel rdete' che'tsa lubeella. ⁵Uri'ihua saludar bee sa'ahua enu nzeli arqui' Jesucristo, li'ibeella enu riete'sa' ni'i Priscila nu Aquila uri'ihua saludar Epeneto enu rquietea, enu rlutilá uchili arqui' Jesucristo lu iliu Asia. ⁶Uri'ihua saludar María, li'illa enu

chiqui' uri'i elietsa luhua. ⁷Uri'ihua saludar bee bene lachia Adrónico nu Junias, enu ullutsenua ni'cu'. Nu chiqui' seca bee Apóstol li'ibeella, nu rlutilá beella uchili arqui'beella Jesucristo luquela li'á.

⁸Le'ca uri'ihua saludar bene enu lee Amplias enu rquietea enu chiqui' se'ca, lunú necaru bene' Jesucristo.

⁹Uri'ihua saludar Urbano enu rri'i elietsa lua nú sibi'a lu Jesucristo. Le'ca uri'ihua saludar bene enu rquietea lee Estaquis. ¹⁰Uri'ihua saludar Apeles enu ulube' nú neli nzeli arqui' Jesucristo, nu le'ca uri'ihua saludar familia' Aristóbulo.

¹¹Uri'ihua saludar bene lachia enu lee Herodión, nu le'ca uri'ihua saludar familia' Narciso, li'ibeella enu le'ca nzeli arqui' Jesucristo.

¹²Uri'ihua saludar Trifena cuna Trifosa, bee una'a enu sibi' lu Jesucristo. Le'ca uri'ihua saludar Pérsida, una'a enu nediya'ahua nú chiqui' uzibi' lu Jesucristo.

¹³Uri'ihua saludar Rufu, enu neli nzeli arqui' Diose nu le'ca uri'ihua saludar na'lla, bene enu se'caa tucu nú se'caa naa. ¹⁴Uri'ihua saludar Asíncrito, nu Flegonte, Hermas, Patrobas, Hermes cuna beelá bee bene enu nucua'a cuna li'ibeella enu le'ca nzeli arqui' Jesucristo.

¹⁵Uri'ihua saludar Filólogo, Julia nu Nereo nu cuna zanalla, nu le'ca uri'ihua saludar Olimpas cuna beelá bee bene enu nucua'anu beella, enu le'ca nzeli arqui' Jesucristo.

¹⁶Nu li'á nia luhua: Nú uni'hua Diose lubee sa'hua tucu nú riala nú ri'ihua, nu ca'a yebée sa'ahua enu nzeli arqui' Jesucristo xe'labeella saludo luhua.

¹⁷Bee sa'a enu nzeli arquia'ahua Jesucristo zequiaa nu nacua luhua, nú bi'yahua li'ihua lubee bene enu rri'i nú rle'sa'a bee bene, nu sequienubeei bee bene. Xne urene sete'beei bee bene luquela nú unghua nu la ri'icasohua beei. ¹⁸Xne li'ibeeli la zibi'bee lu Jesucristo, nu li'ibeeli rri'ibeeli lunú niarquitsiabeei, nu cuna bee bedichia' nú ñiase nu cuna bee bedichia' nze'ca nú rnibeei rri'ibeeli ana bee bene enu la chulu Stichia' Diose, urre bee bene enu apena uchili arqui' stichianu. ¹⁹Pero yebée luhua nediya' bee bene nú neli sucu'hua Stichia' Diose nu nzenalahuane nu ñia nzu arquia, nu niarquia nú cua'atsiñahua ri'ihua nú neca nze'ca nu ubi'yahua li'ihua para nú la ri'ihua nú necha neca. ²⁰Diose enu rri'i nú nzuxe arquia'ahua li'inu ri'inu elietsa luhua para nú la ria' beze'lu ana luhua nú ria'ahua dula nu Jesucristo enu rnibiya' ri'i nú cha nze'ca lu cuenda'ahua.

²¹Timoteo enu rri'i elietsa lua, nú rixiule'eru Stichia' Diose xe'lalla saludo luhua, le'ca esquie bee bene lachia enu lee Lucio, nu Jasón, nu Sosípater xe'la saludo luhua.

²²Tercio enu rquie'e stichia'a lu carta quie' le'ca xe'lalla saludo luhua equie cuenda' Jesucristo.

²³Le'ca xe'la Gayo saludo luhua, nu ni'lla nzucua'a nu le'ca sana'lla ni'lla riete'sa' ye bee sa'ahua enu nzeli arqui' Jesucristo. Nu Erasto enu neca Tesorero eyeche quie' cuna sa'ahua enu nzeli arqui' Jesucristo lee Cuarto xe'labeella saludo luhua.

²⁴Nu Jesucristo ri'li nú cha nze'ca lu cuenda' yehua. Amén.

Nzelaxula nú rni Pablo lu carta quie'

²⁵Dete'ahua che'tsa lu Diose xne rri'inu elietsa luhua, nú nze acaláhua nu nzeri'iláhua beya' lunú nzuta' arqui'hua lu bedichia' nze'ca' Jesucristo, tucu nú uzetela li'ihua nú xneca tsila'ahua, xne scua neca elliebacu' Diose hasta chenu lasca' quixie iliulabe, elliebacu' nú lá ri'li bee bene beya' desde chenu uquixie

iliulabe. ²⁶Pero nee nediya'la'ahua elliebacu' Diose nu uri'ila'ahua beya' equie cuenda' ichi' nú uquie'e bee profeta tucu nú unibiya' Diose lubeella enu rlu'cu elunehuañi nú la laxu nu ye bee luhuare riene' bee bene Stichia' Diose, nú uquie'e bee profeta para nú chili arqui' bee bene Jesucristo nu zucu' bee bene stichia'nu. ²⁷Tucutsia Diose enu reca yeene. ¡Chiqui' riala nú lu'cua'ahua ula'na lunu, ye tiambu equie cuenda' Jesucristo! Amén.

Carta tucu nú uquie'e San Pablo lubee bene Corinto enu nzeli arqui' Jesucristo

1 Li'á Pablo, enu ucañi Diose para nú aca apóstol' Jesucristo. Nu cuna sa'ahua Sóstenes enu le'ca nzeli arqui' Jesucristo nzunua ca'a, ²nu li'á rquie'a cartaquei' luhua bee bene enu nzeli arqui' Stichia' Diose eyeche llene Corinto, li'ihua enu leca' xiná lu Diose equie cuenda' Jesucristo, nu ucañila Diose li'ihua para nú necahua bee bene'nu cuna ye beelá bee bene enza stucu luhuare enu le'ca nzelila arqui' Jesucristo, li'inu enu rnibiya' lua'ahua nu lubeella. ³Diose Pa'ahua cuna Jesucristo enu rnibiya' lua'ahua ri'i nú cha nze'ca lu cuenda'hua nu ñia tsu arquia'ahua.

Che'tsala Diose equie ye nú rri'inu lua'ahua

⁴Li'á la zañia rdetea che'tsa lu Diose equie cuenda'hua, scua tucu nú uri'inu elietsa luhua, xne nzeli arqui'hua Jesucristo. ⁵Xne equie cuenda' li'inu chiqui' uri'i Diose elietsa luhua, nu lia uliqui'nu ye clasia' elliebacu' luhua para nú ri'ihua beya' stichia'nu, nu acahua nihuane lubee bene. ⁶Scua achee

neca nú neli neca nú ubene'la'hua equie cuenda' Jesucristo desde nú uchili arqui'hua li'inu. ⁷Nu la ri'i falta nú rri'i Diose elietsa luhua diqui nú nucua'aqueihua bichia nú riña zeca Jesucristo enu rnibiya' lua'ahua. ⁸Nu Diose ri'i elietsa luhua para nú tsuta' arqui'hua lunú nzeli arqui'hua li'inu diqui tiembu para nú la lu'culihua dula bichia nú riña zeca Jesucristo. ⁹Xne neli sa'alu Diose sticha'nu, nu li'inu necanu enu ucañi li'ihua para nú aca tucu necatsehua cuna Jesucristo enu rnibiya' lua'ahua.

La yala nú le'esa' bee bene' Jesucristo

¹⁰Bee sa'a enu nzeli arquia'ahua Jesucristo, equie cuenda'nu zequiea luhua nú aca tucu necatsehua nu la le'esa'hua. Nu uhuañi nze'cahua nu tucutsia elliebacu' uri'ihua. ¹¹Scua rnia luhua bee sa'a enu nzeli arquia'ahua Jesucristo, xne ungabiyalá nú nu' xuu letahua, scua udixiule'e bee familia' Cloé lua. ¹²Li'ibeella rnibeella nú nu'hua enu rni: "Li'á neca bene'

Pablo”; le'ca nu' bee enu rni: “Li'á neca bene' Apolos”; nu le'ca nu' beelá bee enu rni: “Li'á neca bene' Pedro”; nu le'ca nu' bee enu rni: “Li'á neca bene' Jesucristo.”
¹³Pero li'á nia luhua nú tucutsia neca Jesucristo xne li'á lá atia lu cruse equie cuenda' stulahua, nu le'ca lá rinzahua equie cuenda' li'á.
¹⁴Che'tsalá Diose nú ni'tucuhua lá rinzaa urinzatsia Crispo nu Gayo. ¹⁵Scua leca modo nihua nú urinzahua equie cuenda' li'á.
¹⁶Nu le'ca urinzaa bee familia' Estéfanos, pero la llucu' arquia tunu tilá urinzaa. ¹⁷Xne lá xe'la Jesucristo li'á para nú rinzaa bee bene sino que uxe'lanu li'á para nú ixiule'a stichia'nu lubee bene para nú nu' modo tsila'a bee bene. Nu la nia lubee bene bee bedichia' nú zecalullie' beella lua, luguare nú chenu cuenda beella xinu ungu ti Jesucristo lu cruse.

Jesucristo rlu'be' elurnibiya' Diose cuna nú reca elliebacu' Diose

¹⁸Ye nú rnia'ahua equie cuenda' xiquie nú ungu ti Jesucristo lu cruse lecaxi sibi'i para bee bene enu nenitilula lu Diose pero para lia'ahua enu utsila'ala Diose, chiqui' huaxi seca nú ungu ti Jesucristo lu cruse xne scua rria'ahua beya' nú chiqui' reca Diose. ¹⁹Nu lu ichi' Stichia' Diose rni:

Nitilua nú reca elliebacu' bee bene enu reca,
 nu nitilua nu netsiñia bee bene enu chiqui' netsiñia.

²⁰Nu nee ¿ca nucua'a bee bene enu rni nu chiqui' reca elliebacu'? ¿Nu ca nucua'a bee ulaxcuela enu

reca ley? Nu le'ca ca nucua'a bee bene enu rni nú reca ye beenú nu' lu iliulabe quie', nu para Diose lecaxi zibi' lunú reca elliebacu' bee bene. ²¹Nu equie nú reca elliebacu' Diose nediya' nze'ca'nu nú lá chulu bee bene illiulabe li'inu, lunú recatsia elliebacu' beei, enze'e uri'inu elliebacu' nú tsila'anu bee bene equie cuenda' stichia'nu nú sete'ahua bee bene. Nu bee bene enu tsila'a neca bee enu nzeli arqui' li'inu, añinzuca nú neca xi neca nú lecaxi zibi' nú sete'ru bee bene. ²²Bee bene Israel niarqui' beella lañi'beella bee milagro nú rri'iru para nú chili arqui'beella, nu bee bene enu laca bee bene Israel niarqui' beella nú aca beella beenú máse neriña' neca, para nú chili arqui' beella. ²³Pero li'iru lunú sete'ru bee bene necane nú xinu ungu ti Jesucristo lu cruse, nu lá niarqui' bee bene Israel nú chili arqui'beella li'inu, xne para li'ibeella leca modo ati Jesucristo, nu para bee bene enu laca bee bene Israel lecaxi sibi' nú sete'ru bee bene. ²⁴Pero para bee bene enu nzeli arqui' Diose, sia bee bene enu laca bee bene Israel, nu sia bee bene enu neca bee bene Israel, equie cuenda' Jesucristo ahee nú rlu'cu Diose poder nú recanu. ²⁵Xne hasta beenú seca bee bene nú la zibi' uri'i Diose, necane lunú másesca'lá sibi' luquelá nú reca bee bene iliulabe. Nu hasta lunú reca Diose rri'i nú máse lle'na neca, máse secas luquelá nú reca bee bene iliulabe.

²⁶Uri'ihua beya' bee sa'a enu nzeli arquia'ahua Jesucristo, nú chiuculi'

bee bene enu nzeli arqui' li'inu bee enu seca bee bene nú chiqui' reca lu iliulabe quie', nu chiuculi' enu nzeli arqui' li'inu enu rnibiya' lu iliulabe quie', nu le'ca chiuculi' bee enu nzeli arqui' li'inu nze'ta leta bee familia' bee bene enu neca equie lu iliulabe quie'. ²⁷Pero Diose ucañi bee bene enu laca, para nú chiu'u elu netu' bee bene enu chiqui' reca, nu ucañinu bee enu lle'natsia rnibiya' lu iliulabe quie' para nú chiu'u elu netu' bee enu chiqui' rnibiya'. ²⁸Diose ucañi bee bene enu seca bee bene iliulabe nú lecaxi sibi', bee bene enu seca bee bene iliulabe nú lecaxi reca. Bee bene enu lecati neca lu iliulabe quie', para nú nitilu lunú rnibiya' bee bene enu nu' ti neca lu iliulabe quie'. ²⁹Nu scua necane para nú lecati aca nellíñia lu Diose.

³⁰Nu nee equie cuenda' Diose neca tucu necatselahua cuna Jesucristo, nu equie cuenda'nu ungutia'ahua elliebacu' nú reca nze'ta lu Diose. Nu equie cuenda'nu neca'ahua xi neca bene enu la lu'cua' dula nu leca' xi na'ahua lunu, nu li'inu udixiulanu equie cuenda' stula'ahua. ³¹Scua necane para nú yalu tucu nú nequie lu ichi' Stichia' Diose elu rni: “Tunu nu' bene enu niarqui' aca nellíñia, máse neca nze'ca nú aca nellíñialla equie cuenda' Jesucristo.”

**Bee bedichia' equie
cuenda' Jesucristo**

2 Bee sa'a enu nzeli arquia'ahua Jesucristo li'ihua nediya'hua nú chenu uya'a lachihua, unia Stichia' Diose luhua, lá nia luhua

bee bedichia' nú neyaañi o bee bedichia' nú neriña' ri'ihua beya', ²mientras nú nzua cuna li'ihua, lá nia stucu nú rene luhua, unities luhua tucutsia equie cuenda' Jesucristo para nú ri'ihua beya' xiquie nú ungutinu lu cruse. ³Chenu uriña lachihua necaa tucu nú neca tucu bene enu la lu'cu juerza' nu hasta recats'e'tse'a nú xiquia chenu uriña luhua. ⁴Le'ca chenu unia luhua Stichia' Diose, lá nia luhua bee bedichia' nú ri'á ana li'ihua cuna stichia'a, sino que uri'á ana nú uchili arqui'hua Jesucristo equie cuenda' Espíritu Santo nu cuna poder' Diose. ⁵Para nú aca ahee nú lunú nzeli arquia'ahua Jesucristo necane equie nú reca Diose rri'i nu lacane lunú recatsia elliebacu' bee bene iliulabe.

**Espíritu santo rlube' nú
xa neca Diose**

⁶Añinzuca nú chenu sete'ahua bee bene enu másela reca Stichia' Diose, sete'ahua beella equie cuenda' elliebacu' nú reca nú nze'ta lu Diose, nu la necane elliebacu' nú reca bee bene iliulabe quie' nu le'ca lacane xi neca elliebacu' nú rlu'cu bee enu rnibiya' lu iliulabe quie', elliebacu' nú nze'ta bichia nú nitilu. ⁷Sino que rnia'ahua elliebacu' nú reca nze'ta lu Diose, elliebacu' nú unga xi neca tucu nú a'chi' neca para lubee bene iliulabe nú xneca riña bee bene lu Diose. Nu elliebacu' cua' unila Diose desde ante nú quixie iliulabe. ⁸Bee nucua' neca nú lá ri'i bee bene enu rnibiya' lu iliulabe quie' beya', xne tunu uri'i beella beya' nucua', lá quie'e

beella Jesucristo lu cruse, li'inu enu rnibiya'. ⁹Pero lu ichi' Stichia' Diose rni:

Ni' tucu bene lecati ulañi', nu ubene',
nu ni' lá ri'i elliebacu' lunú nu'che' Diose para bee bene enu seca li'inu.

¹⁰Pero ulube'la Diose nucua' lua'ahua equie cuenda' Espíritu Santo nú nzu cuna lia'ahua, xne Espíritu Santo nediya' yeene, hasta beenú máse neriña' ri'i bene beya' nze'ta lu Diose.

¹¹Li'ihua nediya'hua nú lecati ri'i beya' nú xi elliebacu' rri'i tucu bene, espíritu'tsialla nediya' xi elliebacu' rri'illa. Scua necane xne tucutsia Espíritu' Diose nediya' xi rri'inu elliebacu'. ¹²Nu lia'ahua enu nzenalala inziu' Diose, la nehuañia'ahua cuna espíritu nú nu' lu iliulabe quie' sino que nehuañila'ahua cuna Espíritu Santo nú uliqui' Diose, para nú equie cuenda' Espíritu Santo ria'ahua beya' luye nú uliqui' Diose lua'ahua lunú chiqui' nze'canu. ¹³Nu bee nucua' neca nú sete'ahua bee bene, pero lacane lunú necatsia elliebacu'ahua, sino que Espíritu Santo neca enu rlube' lua'ahua nú xneca sete'ahua bee bene. Nu scua sete'ahua lunú neca cuenda' Diose lubee bene enu nehuañi cuna Espíritu Santo.

¹⁴Pero bee bene enu la nehuañi cuna Espíritu Santo la chili arquí' lunú neca cuenda' Diose, xne para li'ibeei necane nú la zibi'. Enze'e la ri'ibeei beya' lunú neca cuenda' Diose, xne hasta cuna elietsa' Espíritu Santo rri'i bee bene beya'

lunú neca cuenda' Diose. ¹⁵Pero bee bene enu nehuañila cuna Espíritu Santo equie cuenda' Espíritu Santo rri'illa beya' luye lunú neca cuenda' Diose, nu ni'tucu bee bene enu la nehuañi cuna Espíritu Santo la ri'i beya' xiquie nú rri'i benecua' beya' lunú neca cuenda' Diose. ¹⁶Lu ichi' Stichia' Diose rni: “Lecati nu'lu elliebacu' Diose para nú nilla lu Diose nú xi ri'inu.” Pero lia'ahua equie cuenda' Espíritu Santo neca tucu necatsela elliebacua'ahua cuna Jesucristo nu Diose.

Bee bene enu sibi' lu Jesucristo

3 Bee sa'a enu nzeli arquia'ahua Jesucristo, chenu nzua cuna li'ihua lá nia luhua xi neca bene enu chiqui' reca Stichia' Diose, li'á unia luhua Stichia' Diose xi neca bene enu lle'natsia reca Stichia' Diose xi neca bee bene enu apenatsia uchili arquí' Jesucristo. ²Unia luhua bee bedichia' nú laca neriña', tucu nú rdete' bene nichí rue' endu' me', xne lacasca'nu acunu tucu nú racu bene. Nu ni' nee leca modo nia luhua xi neca bee bene enu recalá Stichia' Diose, ³xne nehuañisca'hua xi nehuañi beelá bee bene, ria arquí'hua lu sa'hua nu rliuhua, nucua' rlube' nú nehuañisca'hua xi nehuañi bee bene enu la chenala inziu' Diose. ⁴Xne chenu rnihua: “Li'á neca bene' Pablo”, urre chenu le'ca rnihua: “Li'á neca bene' Apolos”, ¿xie' lanu scua achee nú rri'isca'hua tucu nú rri'i titse bee bene la?

⁵Pero li'á nia luhua: ¿Nú tineca Pablo nu tineca Apolos? Rri'ihua beya' nú necaru bee enu sibi' lu

Diose para nú uchili arquihua
 DiOSE, nu cada tucuru rri'itsia lunú
 uliqui' DiOSE nú rri'iru. ⁶Nu li'á
 necaa xi neca tucu bene enu rdu'nii
 ebichi, nu Apolos neca xi neca
 enu su'e, pero DiOSE neca enu rri'i
 ru'cue. Xne li'inu necanu enu rri'i
 nú nzechululáhua stichia'nu. ⁷Xne
 sia bene enu rdu'nii ebichi nu sia
 bene enu su'e lecati neca beella.
 Sino que DiOSE neca enu rri'i yeene,
 xne li'inu rri'inu nú rru'cu ye nú
 rdu'nii bene. ⁸Le'ca scua li'á cuna
 Apolos tucutse iguale sibi'ru lu
 DiOSE, nu nediya'ru nú DiOSE liqui'
 lunú rialaru equie cuenda' riña'
 nú uliqui'nu nú rri'i cada tucuru.
⁹Enze'e li'á cuna Apolos tucutse
 sibi'ru lu DiOSE. Nu li'ihua necahua
 xi neca yu' DiOSE nú rri'iru riña'lu,
 nu li'ihua necahua xi neca tucu ni'i
 nú rreche' DiOSE. ¹⁰Nu lunú chiqui'
 nze'ca DiOSE enze'e ucañinu li'á
 para nú ixiule'a stichia'nu lubee
 bene. Xi neca tucu bene enu ri'ya
 nú acache' nze'ca simiendo' tucu
 ni'i. Nu bee bene enu nzetixiule'ela
 Stichia' DiOSE, li'ibeella neca beella
 xi neca bee bene enu nze reche'la
 ni'icua. Pero rqui'ña nú bi'ya beella
 xneca rreche' beellae. ¹¹Xne la yala
 che'e beella simiendo nú ureche'lá,
 nu simiendo cua' neca nú nzeli
 arquí' bee bene Jesucristo. ¹²Nu
 bee bene enu nzetixiule'e Stichia'
 DiOSE, bee enu neca xi neca enu
 reche'e ni'i equie simiendo, tunu
 reche' beellae cuna oro, plata, urre
 quie nú huaxi seca, urre cuna ala,
 urre cuna quí, urre ixi, nucua' rni
 tunu sete' beella tucu nú rialane
 urre la zete' beella tucu nú rialane.
¹³Pero chenu riña bichia nú ri'i

Diose elu usticia'nu, che aca chee
 xa neca riña' nú uri'ibeella. Xne
 bichia ze'e aca preu beella xi reca
 preu beenú reca preu luquii para nú
 ri'i bee bene beya' tunu uzibi' urre
 lá zibi' lunú uri'i cada tucu beella.
¹⁴Nu tunu uzibi' nú uri'illa tucu nú
 rreche' tucu bene tucu ni'i nú leca
 modo chiqui, chequie ati'lla lunú
 riala ati'lla lunú uri'illa. ¹⁵Pero
 tunu la zibi' lunú uri'illa, che
 zecalla xi seca tucu bene enu riqui
 ni' nu apenatsia sila'alla lu quí ze'e,
 xne tsila'alla pero lecalí xi ati'lla.

¹⁶Uri'ihua beya' nú li'ihua
 necahua xi neca indu' DiOSE, xne
 nzula Espíritu Santo'nu cuna li'ihua.
¹⁷Tunu nu' bee bene enu rri'i nú
 rnitilu bee bene' DiOSE, chequie
 DiOSE nitilu bee benecua' equie
 nú rnitilu beei indu' DiOSE nú
 necale'yala, nu li'ihua necahua indu
 cua'.

¹⁸Lecati zequienu le'catsia li'i:
 Tunu nu' tahua seca nú chiqui'
 reca elliebacu' nú nu' lu iliulabe
 quie', nzalá nú aca lle'na arqu'illa
 lu DiOSE para nú dete'nu nú chiqui'
 aca elliebacu'lla. ¹⁹Xne ante DiOSE
 lecaxi zibi' elliebacu' bee bene
 iliulabe, nu tucu parte lu ichi'
 Stichia' DiOSE rni: “La zela DiOSE nú
 chiu'u nze'ca nú rri'i tucu bene enu
 seca nú chiqui' netsiña elliebacu'
 nú rri'illa tucu nú la neca nze'ca.”

²⁰Le'ca rni stucu parte lu ichi'
 stichia'nu: “DiOSE nediya' nze'ca'
 xneca neca elliebacu' bee bene enu
 seca nú chiqui' reca elliebacu' pero
 para li'inu lecaxi zibi' elliebacu'
 beella.” ²¹Enze'e ni'tucu bee bene
 la yala nú aca nellíñianu tucu bene
 urre stucu bene. Xne scua tucu nú

nzelila arqui'hua Jesucristo yela beenú neca stene'hua. ²²Necalaru bee bene'hua, xi neca li'á Pablo, Apolos nu Pedro para nú ri'iru elietsa luhua cuna Stichia' Diose, nu neca stenelahua iliulabe, lunú nehuañi bee bene, nu eluti cuna ye beenú nu' cuna beenú entalá, ye bee nucua' neca stene'hua.

²³Nu li'ihua necalahua bee bene' Jesucristo, nu Jesucristo neca Lli'ñi Diose.

Riña' bee apóstol

4 Enze'e ulu'cu cuendahua nú li'iru necatsiaru enu sibi' lu Jesucristo para nú zete'ru bee bene nú xa neca elliebacu' Diose, nú lá ri'i bee bene beya' hasta hua'tu. ²Pero li'ihua nediya'hua nú tucu moso' riala ri'i ye lunú riala ri'i para nú lu'cu patron'lla confianza lulla. ³Enze'e lecaxi ri'i tunu xi rnihua equie cuendaa urre xi rni bee usticia equie cuendaa, xne ni' li'á leca modo nú nia xa necaa ante Diose. ⁴Xne mase se'ca nú rri'a tucu nú necane pero laca equie cuenda' nucua' nú nia nú lecaxi dula rlu'cua ante Diose, xne tucutsia Jesucristo nediya' xneca rri'a. ⁵Enze'e la yala nú ze'tahua sa'hua nú ti rri'i nze'ca nu ti enu la ri'i nze'ca, sino que utsa'nahua nucua' para bichia chenu riña Jesucristo. Li'inu lube'nu nú xa neca cada tucu bene, nu bichia ze'e aca chee nú xa neca elliebacu' cada tucu bene, che bichia ze'e ria'ahua beya' xi bedichia' nze'ca ni Diose lu cuenda' cada tucua'ahua.

⁶Bee sa'a enu nzeli arquia'ahua Jesucristo, yebee nú rnia luhua

neca nze'cae para li'ihua. Li'á cuna Apolos necaru tucu ejemplu para li'ihua, para nú acahua nu la nihua lunú la nequie lu ichi' Stichia' Diose, nu para nú lecati aca nelliñia nu ni nze'ca lu cuenda' tucu bene, nu la ni nze'ca lu cuenda' stucu bene. ⁷Xne ni'tucu bene la neca equielá lu stucu bene, xne ye nú rlu'cuhua Diose rliqui'i luhua, nu tunu Diose rliqui' nú rlu'cuhua, ¿xi quie nú reca nelliñiahua? Xi neca nú rlu'cuhua lu cuenda' e'cutsiahua. ⁸Li'ihua secahua nú lecaxi seca la'cha'hua nu rlu'cuhua ye nú rqui'ñiahua, nu secahua nú necahua xi neca arre nu lecaxi rqui'ñiahua equie cuenda'ru iAla' nú neli nú necahua arre para nú anibiya'ru cuna li'ihua! ⁹Se'ca nú li'iru bee apóstol, Diose ucañi li'iru nú necaru xi neca tucu bene enu la neca equie, xi neca bee bene enu necha rri'i riala nú ati, nu secalullie' bee ángele cuna bee bene iliulabe lunú se'caru. ¹⁰Nu li'iru equie cuenda' nú rixiule'eru stichia' Jesucristo, bee bene seca beei nú netunduru, pero li'ihua nelliñiahua nú chiqui' recahua xne nzeli arqui'hua li'inu. Nu li'iru se'caru xi seca bene enu nechiula', nu li'ihua secahua nú lecaxi zeca la'cha'hua, nu le'ca rlu'cu bee bene ula'na luhua, pero li'iru rluachu bee bene. ¹¹Hasta nee, bichia quie' si'ru nú rlia'na'ru, rrebichi'ru, nu rri'i falta xucuru. Nu xitse rri'inu bee bene li'iru, nu la lu'curu ni'i e'curo, ¹²nu hasta chiqui' xaca'ru rri'iru riña', para nú nehuañiru. Chenu riquichi'qui' bee bene li'iru, che rcuaquiru lubeei cuna bedichia' nze'ca, nu rriqui'ru lu

ye nú xi rri'inu beei li'iru. ¹³Nu chenu rta'beei eluquichia' li'iru, che rni nze'caru lubeei. Nu hasta nee necatsiaru xi neca ixi lubee bene nu le'ca necatsiaru xi neca beenú lecali xi zibi' secabeei.

¹⁴La quie'a carta quie' luhua para nú ri'á nú tu'hua, li'á rquie'a carta quie' luhua para nú nia bezete' luhua xi neca bee endua xne chiqui' se'cahua. ¹⁵Xne mase rlu'cuhua chi'i mili bee bene enu sete' li'ihua stichia' Jesucristo, pero tucutsia li'á neca xi neca tucu pa para li'ihua xne equie cuenda' li'á uchili arqui'hua Jesucristo chenu uzeteahua bedichia' nze'ca'nu.

¹⁶Enze'e nacua luhua, nú uhuañihua tucu nú nehuaña.

¹⁷Xne para nucua' xe'laa Timoteo luhua para nú enta bi'yalla li'ihua, li'illa enu chiqui' se'caa xi se'ca tucu endua, li'illa enu neli nzeli arqui' Jesucristo. Li'illa ellu'cu' arqui'lla li'ihua xneca nehuaña lunú nzeli arquia Jesucristo, xne scua tucu nú nehuaña, scua neca nú setea bee bene nú xneca riala huañi bee bene enu nzeli arqui' Jesucristo ye bee luhuare elu nza'a. ¹⁸Nu'hua seca nú tia la yelabi'ya'a li'ihua, che le'catsia li'ihua reca nelliñiahua nú nehuañi nze'cahua. ¹⁹Pero tunu zela Diose la lea' nzelabi'ya li'ihua, che ri'á beya' tunu neli nehuañi beella tucu nú rnibiya' Diose o lia rnitsia beella nucua'. ²⁰Xne lunú nehuañi bee bene tucu nú rnibiya' Diose, lacane purotsia bee bedichia' sino que rqui'ña nú ria'ahua tucu nú rnibiya' Diose. ²¹¿Xi niarquihua nú ri'á chenu nzelabi'ya li'ihua, nú

qui'yahua ri'á la, o nú zecaa li'ihua nu ni nze'ca luhua la?

Xa aca bene enu necha nehuañi

5 Li'á ubenelaa nú tucuhua enu nzeli arqui' Jesucristo nzucunuu naa rru'cu' xi neca una'lla, nu ni' bee bene enu la chulu Diose la ri'i sa' clasia' eluhuexe quie'. ²Nu xinu reca nelliñiahua che, luhuare nú aca nelliñiahua, mejora nú nehuaña utsu arqui'hua nu uluahua bene enu rri'i scua letahua. ³Mase nú lecaa luhua, pero siempre rri'á elliebacu' li'ihua, xi neca nú nzua cuna li'ihua, nu uri'ilá elliebacu' xa zeca bene enu rri'i dula scua. ⁴Nia luhua nú uyetesa'hua nu ulu'cu cuendahua xi neca nú li'á nzua cuna li'ihua nu cuna poder' Jesucristo. ⁵Uluachuhua benecua' letahua. Nu utsa'nahua benecua' ya beze'lu para nú scua nehuaña zecalla nu tsi'lla equie cuenda' nú necha rri'illa para nú tsila'a espíritu'lla chenu riña zeca Jesucristo.

⁶La neca nze'ca nú aca nelliñiahua nu selahua nú nu' sa' dula quie letahua, li'ihua rri'ihua beya' xneca rri'i levadura nú teme'tsiae riu'u equie ecucu nú recache' pá nu rri'i nú sebichi pá. Le'ca scua tunu tucuhua rri'i dula rlañi' bee sa'hua, che chu rri'ilá bee sa'hua scua. ⁷Enze'e uluachuhua nú necha necacua' letahua xi neca ecucu nú recache' pá nú la lu'cu levadura. Xi neca chenu riñi bene tucu sanchi eliñi baxcu equie cuenda' stula beella, le'ca scua equie cuenda' nú unguti Jesucristo, leca' xi na'ahua lu Diose. ⁸Nu

xneca riala nú ñiatsu arquia'ahua equie cuenda' nucua', necane nú diquinu' arquia'ahua huaña'ahua tucu nú rialane, xi neca pá nú la nucha levadura, luhuare nú necha huaña'ahua equie cuenda' dula xi uhuaña'ahua hua'tu. ⁹Nu scua tucu nú unilá luhua lu stucu carta nú uxe'la luhua, la yala nú quiete'hua bee bene enu rri'i eluhuexe. ¹⁰La nia nucua' equie cuenda' bee bene enu la chili arqui' Diose, bee enu rri'i eluhuexe, enu neyi' rcua'a, bee huana' nu bee bene enu rlu'cu ula'na lu stucu diose enu laca Diose, xne tunu scuane rquiña nú chiu'uhua lu iliulabe quie'. ¹¹Lunú rnia luhua nú la yala quiete'hua bee bene cua', li'ibeei enu rni nú neca sa'hua enu nzeli arqui' Jesucristo, nu necha nehuañi rri'i eluhuexe nu neyi' rcua'a, nu rlu'cu ula'na lu stucu diose enu laca mero Diose nu se'ta bee bene, nu neca uniuqui nu huana', bee bene enu nehuañi scua, ni'la yala nú acunuhua beei. ¹²Nu li'á la yala hualua lu cuenda' bee bene enu laca sa'ahua enu nzeli arqui' Jesucristo, Diose neca enu hualue lu cuenda' beei. ¹³Pero lunú riala ri'ihua neca nú hualuhua lu cuenda' bee sa'ahua enu nzeli arqui' Jesucristo. Enze'e uluahua niyucua' enu rri'i sa' clasia' dula cua' letahua.

Xneca riala aca elu usticia

6 Tunu nu'hua enu rliunu sa' enu nzeli arqui' Jesucristo, xiquie nú nzahua lubee usticia para nú tsuxcua'a nú secahua, luhuare nú chahua lubee sa'hua enu nzeli arqui' Jesucristo. ²¿Xie' lari'ihua

beya' nú enta bichia nú bee enu nzeli arqui' Jesucristo neca bee enu lualue lu cuenda' bee bene iliulabe la? Nu tunu li'ihua lualuhua lu cuenda' bee bene iliulabe, xiquie nú lacahua lualuhua lu lle'natsia nú secahua cuna bee sa'hua enu nzeli arqui' Jesucristo. ³¿Xie' la ri'ihua beya' nú hasta bee ángele lualua'ahua lu cuenda' la? ¿Xneca nú la lualua'ahua lu cuenda' bee bene iliulabe quie'? ⁴Enze'e chenu rliunuhua sa'hua, ¿xiquie nú nzahua lubee bene enu laca bee bene' Jesucristo para nú tsuche' lunú xi secahua? ⁵Rnia scua luhua para nú tu'hua. ¿Xne xie' letahua leca ni' tucu enu aca lualue lu cuenda' bee sa'hua enu nzeli arqui' Jesucristo chenu nu' xi seca beella la? ⁶Pero li'ihua chenu rliuhua luhuare nú ri'ihua scua a'la rdete' cuendahua sa'hua lubee usticia, enu la chenala inziu' Diose.

⁷Chiqui' necha nú rliunu sa'hua. Nzalá nú uriqui'hua lunú xi rri'inu beella li'ihua. Nu mejora nú uyala' beella stene'hua. ⁸Pero luhuare nú zelahua nucua' a'la li'ihua rcachi'hua bee stene' bee sa'hua, nu rri'inuhua beella beenú la yala ri'inuhua beella. ⁹¿Xie' lari'ihua beya' nú bee bene enu necha rri'i leca modo chu'u liñibe elurnibiya' Diose la? La zelahua nú zequienu bee bene li'ihua xne elurnibiya' Diose la chu'u bee bene enu rri'i eluhuexe, nu bee enu rlu'cu ula'na lu stucu diose enu laca diose nu bee niyu enu rle' sa' niyu, nu bee niyu enu rna'tse bee una'a enu laca una'a, nu bee una'a enu rna'tse bee niyu enu laca niyu'. ¹⁰Le'ca esquie

bee huana', nu bee bene enu neyi' rcua'a, bee uniqui nu bee enu se'ta bee bene, nu bee enu rcua'na nú xneca modo axi stene' bee bene, la chu'u bee nze'e elurnibiya' Diose liñibe. ¹¹Nu'hua enu uhuañi scua hua'tu, pero nee leca' xi nahua lu Diose, nu nee necalahua para Diose, nu nebacu'lahua xi neca tucu enu la lu'culi dula ante Diose equie cuenda' poder' Jesucristo nu equie cuenda' Espíritu Santo' Diose nú nehuañi cuna li'ihua.

**Cuerpo' bene neca xi neca
indu' Espíritu Santo**

¹²Neli nú nu' beya' ri'á yee lunú niarquía pero laca yeene neca nze'cae. Nu nu' beya' ri'á xitse lunú niarquía, pero la neca nze'ca nú zela nú ri'i bee nucua' ana lua. ¹³Nu' bee bene enu rni: Bee elubacu necane para xla'cu bee bene, nu xla'cu bee bene neca para bee elubacu. Neli nucua', pero nitilu Diose rucu bee nucua', pero laca neli nú cuerpo' bene neca para nú ri'i bene eluhexe. Xne cuerpo'ahua necane para Diose, nu li'inu necanu enu rnibiya' lu cuerpo'ahua. ¹⁴Nu tucu nú uri'i Diose nú uhuañi zeca Jesucristo lu eluti, le'ca scua ri'inu nú huañi zeca'ahua lu eluti cuna poder'nu.

¹⁵¿Uri'ihua beya' nú neca cuerpo'ahua xi neca tucu parte cuerpo' Jesucristo. Enze'e leca modo nú na'tse'ahua cuerpo' Jesucristo nú rnia'ahua neca cuerpo'ahua para nú na'tse'ahua una'a huexe? Nu leca modo nú ria'ahua scua. ¹⁶Xie' la ri'ihua beya' nú bene enu rna'tse tucu una'a

huexe, necabeei xineca tucutsia bene. Li'ihua nediya'hua nú lu ichi' Stichia' Diose rni: "Rucu beei neca beei xi neca tucutsia bene."

¹⁷Pero bee bene enu neca tucu necatse cuna Jesucristo, neca tucu necatsela beella cuna li'inu equie cuenda' Espíritu Santo.

¹⁸Enze'e ubi'yahua li'ihua para nú la ri'ihua sa' clasia' eluhexe cua'. Ye beelá bee dula la nitilu cuerpo' bee bene, xi rnitilu eluhexe cuerpo' bene. ¹⁹Xne uri'ihua beya' nú cuerpo'hua neca indu' Espíritu Santo nú uliqui' Diose luhua, nu lunú nzula Espíritu Santo cuna li'ihua la nibiya' e'cuhua luhua.

²⁰Xne Jesucristo udixiula stulahua chenu ungutinu lu cruse. Enze'e ubi'yahua cuerpo'hua nu la xitse ri'inuhane xne scua riu' arquí' Diose, xne li'inu rnibiya'nu luhua.

**Bezete' equie cuenda' bee
bene enu nechia**

7 Nee cuaquia luhua beenú unedichia'hua lua lu carta nú uxe'lahua lua. Li'á nia luhua nú neca nze'ca nú la yucu bene una'a. ²Pero para nú la ri'i bee bene eluhexe, nzala nú cada niyu yucu una'a nu cada una'a yucu niyu, ³nu cada niyu riala ri'i cumplido lunú niarquí' una'lla nu cada una'a riala ri'i cumplido lunú niarquí' niyu'lla. ⁴Xne chenu uchiala una'a la nibiya'lla lu cuerpo'lla, sino que niyu'lla rnibiya' lu cuerpo'lla. Le'ca esquie niyu la nibiya'lla lu cuerpo'lla, sino que una'lla neca enu rnibiya' lu cuerpo'lla. ⁵Enze'e la yala nú cá niyu urre una'a cuerpo'lla lu sa'lla; pero tunu

ruculla necatucunecatse stichia'lla nú la na'tsella sa'lla chiucu chuna bichia, para nú nacu' beella lu Diose. Lecaxi ri'i pero chenu udetela bee bichia ze'e, chu cua'anu zeca bene sa' bene, para nú la du' beze'lu elliebacu' nú necha neca equie bene.

⁶Ye nú rnia luhua necane tucu bezete'tsia, nu la nibiya'a luhua nú ri'ihua tucu nú rnia. ⁷Niarquia nú ala' ye bee bene nchiñi elliebacu' xi nchiñi elliebacua, pero cada tucu bene udete'la Diose elliebacu'lla nú xa huañilla, tunu chialla urre la chialla.

⁸Para bee bene enu lá chiali nu para bee una'a enu ungu' niyu', li'á nia nú necha nze'ca nú la chiahua tucu nú lá chiaa. ⁹Pero tunu la riqui'hua nú nzu tucuhua, máse necha nze'ca nú uchiahua luhua nú rriqui'hua nú la lu'cuhua niyu urre una'a.

¹⁰Nu bee bene enu nechiala, la necha li'á enu rnibiya' luhua sino que Jesucristo necha enu rnibiya' nú la le'e una'a niyu'lla. ¹¹Pero tunu le'e una'a niyu'lla la yala nú yuculla stucu niyu, máse necha nze'ca nú tsalalla arqui' sa'lla para nú yucu sa'zecalla. Nu le'ca esquie niyu la yala nú le'ella una'lla.

¹²Nee nú nia necatsia bezete' nú rnia, la necane stichia' Jesucristo, tunu tucu niyu enu nzeli arqui' Jesucristo, nechialla tucu una'a enu la chili arqui' Jesucristo pero tunu para li'illa lecaxi ri'i nú nzeli arqui' niyu'lla Jesucristo la yala nú le'e sa'lla. ¹³Nu le'ca esquie tunu tucu una'a enu nzeli arqui' Jesucristo nechialla tucu

niyu enu la chili arqui' Jesucristo, pero tunu para li'illa lecaxi ri'i nú nzeli arqui' una'lla Jesucristo, la yala nú le'esa'lla. ¹⁴Xne niyu enu la chili arqui' Jesucristo nu nechia tucu una'a enu nzeli arqui' Jesucristo, ri'i Diose nú nza nze'ca lu cuenda'lla equie nú nzeli arqui' una'lla Jesucristo, nu una'a enu la chili arqui' Jesucristo, le'ca ri'i Diose nú cha nze'ca lu cuenda'lla xne nzeli arqui' niyu'lla Jesucristo. Che Diose ri'i nú cha nze'ca lu cuenda' bee endu' beella. Xne tunu ni'tucu beella la chili arqui' beella Jesucristo, la ri'i Diose nú cha nze'ca lu cuenda' bee endu' beella. ¹⁵Pero tunu niyu urre una'a enu la chili arqui' Jesucristo niarqui' beella nú le'e sa' beella, le'esa'la' beella. Nu bene enu nzeli arqui' Jesucristo la yala nú ri'illa juerza nú cua'anu sa'lla, xne la niarqui' Diose nú huañi bee bene cuna xuu. ¹⁶Nu le'ca esquie una'a enu nzelila arqui' Jesucristo la ri'ilu beya' tunu ri'ilu ana nú chili arqui' niyu'lu Jesucristo, urre niyu enu nzelila arqui' Jesucristo, la ri'ilu beya' tunu ri'ilu ana nu chili arqui' una'lu Jesucristo.

¹⁷Pero nia nú cada tucu bene enu nzelila arqui' Jesucristo, rqui'ña nú huañibeella lu iliulabe quie' tucu nú udete'la Diose lubeella nú huañi beella, nu nucua'a cahua tucu nú necahua chenu ucañi Diose li'ihua. Scua rnibiya'a nú huañi ye bee sa'ahua enu nzeli arqui' Jesucristo. ¹⁸Tunu tucu bene nequiela seña nú rquie bee bene Israel chenu uchili arqui'lla Jesucristo, esquietsia ria'nacalla. Nu tunu la nequie seña

ze'e li'illa chenu uchili arqui'lla Jesucristo la qui'ña' nú quie seña ze'e li'illa. ¹⁹Xne lecaxi ri'i tunu nequie seña cua' bene urre la nequie seña cua' bene, lunú máse neca equie neca nú sucu' bene nú rnibiya' Diose. ²⁰Enze'e necacahua tucu nú necahua chenu uchili arqui'hua Jesucristo. ²¹Tunu necalu esclavo chenu uquixie nú nzeli arqui'lu Jesucristo, la chenu arqui'lu xneca riala ri'ilu. Pero tunu nu' modo nú ri'ilu ana nú la aca'lu esclavo' stucu bene, ula'na nú la'alu che. ²²Bene enu unga esclavo chenu uchili arqui'lla Jesucristo, igualea'la necalla xi neca bene enu lá aca esclavo para nú sibi'lla lu Jesucristo. Nu bene enu la aca esclavo chenu uchili arqui' Jesucristo. Nee enze'e neca xi neca esclavo lu Jesucristo. ²³Xne nediya'la'hua nu udixiula Jesucristo lunú huaxi secahua, enze'e necalahua para Diose. Nu la zela'hua nú zequienu bee bene li'ihua nu nibiya'beeí luhua. ²⁴Enze'e nialuhua bee sa'a enu nzeli arquia'ahua Jesucristo, nú necacahua tucu nú necahua chenu uchili arqui'hua Jesucristo. ²⁵Nu nee nia luhua bee una'a enu lá chiaa, nu la neca stichia' Jesucristo lunú nia luhua. Sino que necane bezete' nú li'itsia rnía luhua, nu nza nze'calá nú chili arqui'hua tucu nú nia luhua, xne equie nú uhua'a arqui' Diose li'á enze'e ucañinu li'á para nú ri'á lunú niarqui'nu. ²⁶Nu se'ca nú equie nú chiqui' neriña' nehuañi bee bene nee, enze'e nzalá nú la chia bene. ²⁷Nu bene enu nechiala la yala' nú le'ella una'lla. Nu bee bene enu lá

chia la chialla. ²⁸Pero tunu rri'illa elliebacu' nú chialla, lacane dula tunu chialla. Le'ca esquie bee una'a e'ne' bee enu niarqui' nú chia lacane dula tunu chia beenchu, pero ixiule'a luhua nú huaxi nú seca bee bene enu xia, nu bee nucua' la niarquía nú zecahua.

²⁹Bee sa'a enu nzeli arquia'ahua Jesucristo nialuhua nú lle'natsia tiambu nehuañihua lu iliulabe quie, enze'e nia luhua bee bene enu nechiala, uzibi'hua lu Diose diquinu' arqui'hua xi sibi' tucu bene enu lanechia. ³⁰Nu bee bene enu nehuaña nzu arqui' uri'ihua xi neca nú la nehuaña nzu arqui'hua, nu bee bene enu ñia nzu arqui' uri'ihua xi neca nú la ñia nzu arqui'hua, nu bee enu rlu'cu stene' utsu arqui'hua xineca nú la lu'cuhua stene'hua. ³¹Nu bee bene enu lecaxi seca la'cha' lu iliulabe quie', uri'ihua xi neca nú lecaxi rlu'cuhua, xne ye nú nu' lu iliulabe quie' rlxue.

³²Lu nú niarquía nú la chenu arqui'hua lubeé nú nu' lu iliulabe quie', xi neca tucu bene enu nzu tucu nú máse rri'illa elliebacu' lunú neca cuenda' Diose, nu mase rcua'nalla nú ri'illa lunú riu' arqui' Diose, ³³pero tucu bene enu nechiala máse rri'illa elliebacu' lunú nu' lu iliulabe quie', nu mase rla'nalla nú ñiatsu arqui' una'lla.

³⁴Che chiucu elliebacu' rri'illa equie cuenda' Jesucristo, nu equie cuenda' una'lla. Le'ca esquie neca lu cuenda' tucu una'a enu nechia, una'a enu la nechia máse rri'illa elliebacu' lunú neca lu cuenda' Diose, nu rdete' cuendalilla li'illa lu Diose para nú zucu'lla nú niarqui'

Diose. Pero tucu una'a enu uchiala máse sucu' lulla lunú neca cuenda' iliulabe, máse rcua'nalla nú ñia tsu arqui' niyu'lla cuna li'illa.

³⁵Yebee nú rnia luhua, rnia scua luhua para nú ri'á elietsa luhua, nu la necane nú caa nú chiahua, rnia luhua scua para nú huañihua tucu nú rialane nu tucu nú necane. Tucu nú niarqui' Jesucristo enu rnibiya' lua'ahua nú huañihua, sin nú xi caa nú huañihua scua. ³⁶Titse bee niyu enu niarqui' nú chia, cuna una'a enu neca una'a enu chialla, tunu uza'lanchu lana nú chianchu che chianchu, tunu scua rri'ibeella elliebacu' rqui'ña nú ri'ibeella lunú seca beella nú máse neca nze'ca, xne laca dula nú chiabeella. ³⁷Le'ca esquie titse bene enu la ri'i elliebacu' nú chia, layala nú ri'illa elliebacu' nú rqui'ña nú chialla, nu tunu uri'i italla elliebacu' nú la chialla. Xne le'ca neca nze'ca nú la chia bene. ³⁸Enze'e nia luhua, neca nze'ca nú chia bene, pero másesca'la neca nze'ca tunu la chia bene.

³⁹Tucu una'a enu nechiala la yala nú lu'culla stucu niyu diqui' nú nehuañi niyu'lla. Pero tunu ungti niyu'lla nu' modo chialla stucu bese, cuna stucu niyu pero rqui'ña nú necalla tucu niyu enu le'ca nzeli arqui' Jesucristo. ⁴⁰Pero se'ca nú ñiasca'la huañilla tunu la chia'lla stucu bese. Scua rri'á elliebacu' xne nzu Espíritu Santo cuna li'á.

Nia luhua equie cuenda' u'na nú rricu' bee bene lubee enu laca Diöse

8 Nee nialuhua equie cuenda' elubacu' nú rdete' bene u'na

lubee enu laca Diöse, nu lia'ahua nediya'ahua xa neca equie cuenda' nucua', pero avese equie nú nediya' bee bene equie cuenda' nucua' reca nelliña bene. Pero lunú seca bene sa'bene máse seca, xne equie elu secacua' rria'ahua elietsa lu sa'ahua para nú ri'ila'ahua beya' xneca huañia'ahua. ²Tunu nu' tatucu bee bene enu seca nú chiqui' reca ye nú reca, sequienulla le'catsia li'illa xne huaxisca'lá nú rri'i falta nú acalla. ³Pero Diöse nediya' nze'ca' ta bene enu neli seca li'inu.

⁴Nia luhua xa neca equie cuenda' elubacu' nú udete'la bene u'na lubee enu seca bee bene nú neca Diöse, lia'ahua nediya'ahua nu la lu'cu bee diöse cua' poder lu iliulabe quie', xne nu' tucutsia Diöse. ⁵Mase nu' bee bene enu seca nú nu' huaxi bee diöse enu rnibiya' liñibe nu luyuu iliulabe, ⁶pero lia'ahua nediya'ahua nú nu' tucutsia Diöse Pa liñibe nu equie cuenda' li'inu nu' ye nú nu' nu para li'inu nehuañia'ahua lu iliulabe quie'. Nu tucutsia Jesucristo neca enu rnibiya' lua'ahua, xne equie cuenda' li'inu nu' ye nú nu' nu equie cuenda' li'inu rlu'cu'ahua elunehuañi. ⁷Pero laca ye bee bene rri'i elliebacu' scua. Xne nu' bee bene enu ulu'cu ula'na lubee enu seca beella nú neca diöse ante nú chili arqui'beella Jesucristo, nu nee nú apenatsia uchili arqui' beella Jesucristo si' beella nú dula neca nú racu beella elubacu' nú udete' beella u'na lubee diöse cua'. ⁸Lia'ahua nediya'ahua nú la ri'i elubacu' nú racu bene nú nehuañi nze'ca bene ante Diöse, sino que iguale neca bene ante

Diose, tunu acu bene urre la acu bene sa' clasia' elubacu cua'. ⁹Pero li'ihua nediya'hua nú mase nu' beya' nú acu bene xitse clasia' elubacu pero rqui'ña nú bi'yahua xne canu equie cuenda' nucua' ri'ihua nú zana' sa'hua enu apenatsia uchili arqui' Jesucristo lu dula. ¹⁰Tunu li'ilu lecaxi zcalu nú raculu xitse clasia' elubacu, nu nzuculu raculu elubacu nú rdete' bene u'na lubeo diose enu laca diose, nu lañi' tucu bene enu apenatsia uchili arqui' Jesucristo nucua', che le'ca nuulla aculla elubacucua', mase secalla nula neca nze'ca lunú rri'illa. ¹¹Che lunú secalu nú recalú, ri'i nucua' nú ri'i sa'lu enu apenatsia uchili arqui' Jesucristo dula, nu ulu'cu cuenda nú le'ca nuu equie cuenda'lla ungu'ti Jesucristo lu cruse. ¹²Enze'e tunu rri'ilu scua ante bee sa'lu enu apenatsia uchili arqui' Jesucristo, nu ri'ibeella dula equie cuenda'lu, che dula neca nú rri'ilu ante Jesucristo. ¹³Enze'e tunu equie nú racua rri'i nú rri'i tucu sa'a enu nzeli arqui' Jesucristo dula, nzalá nú la acua'a bee elubacucua para nú la ri'i bee sa'a dula equie cuendaa.

Xi riala ri'i tucu apóstol

9 Li'ihua nediya'hua nú nu' beya' ri'á lunú niarquía equie elurnibiya' nú rlu'cua nú necaa apóstol. Li'á ulañilá Jesucristo enu rnibiya' lua'ahua nu li'á uri'ilá ana li'ihua para li'inu xne uchilila arqui'hua li'inu. ²Tunu nu' bee bene enu la chili arqui' nú necaa apóstol, pero li'ihua nediya'hua nú necaa apóstol, xne lunú nzelila arqui'hua

Jesucristo nucua' rlube' nú neli necaa apóstol.

³Nu lubeo bene enu lachili arqui' nú necaa apóstol singuie rcuaquia lubeella: ⁴Rlu'cua derecho nú liqui'hua nú acua cuna nú hue'a. ⁵Nu le'ca nu' beya' nú chiaa cuna tucu una'a enu nzeli arqui' Jesucristo para nú uyalla catse elu nza'a, tucu nú rri'i beela bee apóstol nu cuna bee bichi Jesucristo nu Pedro. ⁶Nu ¿xie' li'itsia cuna Bernabé rqui'ña nú ri'iru riña' e'curu para nú huañiru, che nu' beya' nú ri'iru riña' Diase la? ⁷Pero ni'tucu bee sundado enu nza lu xuu la ixiu beei gasto' beei. Nu tucu bene enu rquienu uva, ¿xie' leca modo nú aculla uva nú rquienuilla la? Nu bene enu rlu'cu vaca, ¿xie' leca modo nú hue'lla nichí'í la? ⁸La ri'ihua elliebacu' nú lunú rnia luhua necatsiae elliebacu' e'cua, sino que le'ca lu ley nú udete' Diase lu Moisés rni scua. ⁹Xne lu ley cua' rni: “La du'hua ixiu lli'i u'na' chenu rri'inuhua'í riña'.” Nu la ni nucua' nú nzenu arqui' Diase equie cuenda' bee nañi, ¹⁰sino que le'ca nzenu arqui'nu equie cuenda'ahua. Xne lu ley nú udete' Diase lu Moisés rni: Xne xi neca bene enu ra'na u'na nu enu rcui trigo, rucu beella nzuculu beella nú yucu beella ula'cu equie riña' nú rri'ibeella.

¹¹Nee nú uzete'laru li'ihua nú xneca chenaluhua Stichia' Diase, ¿xie' huaxi xe'ta' neca nú rnacu'ru luhua tunu ri'ihua elietsa luru nú xi rqui'ñarua la? ¹²Tunu stucu bee bene enu sete' li'ihua rati' lunú riala ati' beella nú rdete'hua lubeella, le'ca esquie li'iru máse rqui'ña

nú riala ri'ihua elietsa luru, pero mase nú scua rialane lecaxi elietsa unacu'ru luhua, nu rriqui'tsiaru lunú se'caru para nú la quieru'u bee bene nú equie cuenda'tsia' nucua' la zelabeella yene' beella bedichia' nze'ca' Jesucristo.

¹³Li'ihua nediya'hua nú ye bee ule'ya enu sibi' liñi bee indu, rati' beella lle'na u'na nú nzeyu bee bene liñi indu lu Diose para nú acubeella. Le'ca esquie yebbe ule'ya enu sibi' luhua elu nzeyu bee bene nañi u'na lu Diose, le'ca rati'beella lle'na u'na nú nzeyu bee bene para nú acu beella. ¹⁴Le'ca scua uni Jesucristo lubee bene enu rixiule'e bedichia' nze'ca'nu, nú bee bene enu sete' beella stichia'nu, riala dete' nú xi rqui'ña beella, ¹⁵pero lua lecali xi elietsa rri'ihua, nu le'ca la quie'a cartaquei' luhua para nú xi liqui'hua lua. Xne para li'á máse neca nze'ca nú atia luhua nú nu' enu axi nú ñia nzu arquia, lunú setea bee bene bedichia' nze'ca' Jesucristo. ¹⁶Nu la nellíñiaa equie nú setea bee bene bedichia' nze'ca' Jesucristo, xne nucua' riala nú ri'á. Nu cue'a tunu la xixiule'a bedichia' nze'ca quie' lubee bene.

¹⁷Enze'e tunu rri'á riña' quie' nú riu'tsia arquia che atia lunú liqui' Diose lua, pero lá cañia nú ri'á riña' quie' pero nucua' utsula Diose li'á nú ri'á. ¹⁸Nu lunú rri'á ana neca nú ñia nzu arquia equie nú rixiule'a bedichia' nze'ca' Jesucristo lubee bene, nu lecaxi ri'á ana, tucu nú rri'i stucu bene enu rixiule'e bedichia' nze'ca' Jesucristo ana.

¹⁹Mase nú lecati rnibiya' lua lunú rri'á, pero ca'a nzua para nú sibi'a

lu ye bee bene para nú ri'á ana nú aca huaxila bee bene' Jesucristo. ²⁰Nu chenu nzucua'a cuna bee bene Israel, nehuaña tucu nú nehuañi beella para nú ri'á ana nú aca beella bene' Jesucristo. Chenu nehuaña cuna beelá bee bene enu neli nzenala ley nú udete' Diose lu Moisés. Che nehuaña tucu nú nehuañi beella, para nú ri'á ana nú aca beella bene' Jesucristo, mase nú nediya nu la nibiya' ley cua' lua. ²¹Nu chenu nzucua'a cuna bee bene enu laca bee bene Israel, bee enu la chenala ley, nehuaña tucu nú nehuañi beella para nú ri'á ana nú aca beella bee bene' Jesucristo, mase nú nediya nú Diose neca enu rnibiya' lua xne nehuaña tucu nú rnibiya' Jesucristo. ²²Chenu nzua cuna bee bene enu nzu chiucu arqui' equie nú xi racu, rla'naa nú rri'á tucu nú rri'i beella para nú ri'á elietsa lubeella nú acabeella bene' Jesucristo. Nu catse elu nza'a rri'á tucu nú rri'i beella, che scua tucu modo urre stucu modo ri'á ana nú tsila'a chiucu chuna beella equie cuenda' Jesucristo. ²³Ye bee nucua' rri'á equie eluseca nú rlu'cua equie cuenda' bedichia' nze'ca' Jesucristo, para nú li'á cuna ye bee bene enu nzeli arqui' Jesucristo, iguale atia'ahua lunú xi liqui' Diose lua'ahua.

²⁴Li'ihua nediya'hua nú chenu riecaxu'u huaxi bene, tucutsia enu riecaxu'ulá nze'e rri'i ana premio. Enze'e le'ca nee udu'hua ana arqui'hua para nú ati'hua premio nú liqui' Diose luhua. ²⁵Ye bee bene enu riecaxu'u rdu' beei ana arqui'beei para nú lecaxi rca

nú yecaxu'u beei, rri'i beei scua para nú ati' beei tucu premio, pero rnitilu premio cua', pero lia'ahua rria'ahua scua para nú atia'ahua tucu premio nú leca xunga nitilu. ²⁶Nu li'á nediya nze'caa lunú rri'á, nu la ri'á xi rri'i tucu bene enu nzexu'u nu la ri'i beya' cariña. Le'ca la ri'á xi rri'i tucu bene enu la ri'i beya' ca richiu penete.

**Enze'e rti'quia arquia
para nú nibiya'a lua**

²⁷Para nú aca ri'á lunú riala ri'á xne canu li'á enu setea bee bene bedichia' nze'ca' Jesucristo lecaxi atia ante Diose.

**Equie cuenda' nú rlu'cu bee bene
ula'na lubee enu laca Diose**

10 Bee sa'a enu nzeli arquia'ahua Jesucristo, niarquia nú ri'ihua beya' nú bee bene'ahua enu udetela bee enu uya nzenu Moisés, yebeella utse beella e'ya xcabe nú uxe'la Diose lubeella, nu yebeella udete beella lu inzatu' nú lee nelu. ²Scua unga ahee nú yebeella neca beella bee bene' Moisés xne yebeella uyanala beella Moisés e'ya xcabe ze'e, nu udete beella cuna Moisés lu inzatu'. ³Nu le'ca yebeella udacu beella elubacu nú uxe'la Diose enza liñibe. ⁴Nu le'ca yebeella ungüe' beella inza nú udete' Diose lubeella nú uliñi tetsu' tucu quiee. Nu nucua' rlube' nú nzula Jesucristo cuna li'ibeella catse elu uyanzee beella. ⁵Pero añinzuca nú scua necane, huaxi beella lá ri'ibeella tucu nú riu' arquí' Diose, enze'e unguti beella luyuu achi elu udete beella.

⁶Yebee nú ulle'ca beella scua necane tucu ejemplu lua'ahua, para nú la niarquia'ahua ria'ahua nú necha neca tucu nú uri'i beella. ⁷La yala nú lu'cuhua ula'na lubeenú seca bee bene nú neca Diose tucu nú uri'i huaxi bee bene'ahua enu udetela, tucu nú rni lu ichi' Stichia' Diose: "Ucua'a beella udacu beella nu ungüe' beella, nu che chu utsuli beella nu uri'ibeella lunú la yala ri'i beella." ⁸Nu la yala nú ria'ahua eluhuexe tucu nú uri'i huaxi beella. Xne equie cuenda' nucua' unguti ala chechuna mili beella tucutsia bichia. ⁹Nu le'ca la ria'ahua nú lee Diose lua'ahua tucu nú uri'i huaxi bee benecua', nu equie cuenda' nucua' udacuquie' bella li'ibeella nu unguti beella. ¹⁰Nu le'ca la yala nú nia'ahua nú necha rri'i Diose, xne scua uni bee bene'ahua enu udetela, nu che ube'ta tucu ángele enu unguuti li'ibeella.

¹¹Ye bee nucua' ulle'ca bee benecua' enu udetela nu nequiene lu ichi' Stichia' Diose para nú ria'ahua beya' nú la neca nze'ca nú ria'ahua tucu nú uri'i beella, lia'ahua enu nehuañi tiambu quie' nú yamero laxu iliulabe. ¹²Enze'e bene enu seca nú nzuta' arquí' lu Stichia' Diose, rqui'ña nú bi'yalla li'illa para nú la ri'illa dula. ¹³Ye bee prueba nú secahua la necane prueba nú la zeca bee bene yebee bene seca prueba. Pero Diose la tsana' arquí' li'ihua nu la zelanu nú zecahua bee prueba nú la riqui'hua. Li'inu ri'inu elietsa luhua, para nú ri'ihua beya' xneca ri'ihua nú riqui'hua lunú xi secahua.

¹⁴Enze'e bee sa'a enu nzeli arquia'ahua Jesucristo, li'ihua enu

chiqui' se'caa uchiu'u chuhua nu la lu'cuhua ula'na lubee nú seca bee bene nú neca Diose. ¹⁵Li'á nediyaá nú li'ihua necahua puro bee bene enu rri'i beya', enze'e le'ca li'ihua bi'yahua tunu neca nze'ca lunú rnia luhua. ¹⁶Chenu rria'ahua tucu nú uri'i Jesucristo, chenu udacuxenu último exe, nu chenu rdiya'ahua viño nú unga le'yala rellu'cu' arquia'ahua rene'nu nú uri'chia chenu ungutinu equie cuenda' stula'ahua. Nu chenu rda'cua'ahua pá tucu nú uri'inu ultimo exe, nucua' neca tucu seña nú tucutsia neca'ahua cuna li'inu. ¹⁷Mase nú huaxi neca'ahua, pero tucu nú rle'e tucutsia pá nú rritsi' luye'ahua scua rlube' nú neca tucutsia'ahua cuna Jesucristo.

¹⁸Li'ihua nediya'ahua xneca rri'i bee bene Israel li'ibeella racubeella mii nú rdete' beella u'na lu Diose nu nucua' rlube' nú neca tucunecatse beella cuna Diose. ¹⁹La nia luhua nú neca equie bee enu seca bee bene nú neca diose, urre máse sibi' u'na nú rdete' bene lubee diose cua'. ²⁰Xne bee bene enu rri'i scua la necane nú rdete' beella u'nacua lu Diose enu nehuañi sino que chenu rri'i beei scua rdete' beei u'na cua' lu beze'lu, nu li'ihua la niarquía nú aca tucu necatsehua cuna beze'lu. ²¹Leca modo nú ri'ihua scua, xne tunu rri'ihua scua neca tucu necatsehua cuna beze'lu, nu che chu acuhua pá nu hue'hua viño nú necale'yala, para nú aca ahee nú le'ca neca tucu necatsehua cuna Jesucristo.

²²¿U xie' niarquí'hua nú lee Diose luhua la? ¿U xie' máse la rlu'cua'ahua poder luquela Diose la?

Xneca riala ri'i bee bene' Jesucristo

²³Yee bee nú nu' beya' ri'i bene, pero laca yeene neca nze'cae. Mase ye nú nu' beya' ri'i bene, pero laca yeene sibi'i para nú ri'i bee bene elietsa lusa' bee bene nú xneca riala nú chenallala inziu' Diose. ²⁴Nu la yala nú ria'ahua elliebacu' lunú neca cuenda' e'cu'tsia'ahua sino que teria'ahua elliebacu' lunú neca cuenda' beelá bee sa'ahua.

²⁵Chenu sihua mii liñi i'ya, la nedichia'hua cá uchiu'u micua', para nú laza' arqui'hua chenu acuhuane. ²⁶Xne iliulabe cuna ye nú nu' lue neca stene' Diose Pa liñibe.

²⁷Tunu tucu bene enu lachili arqui' Stichia' Diose zene' li'ihua nú acuhua eta ni'lla, tunu niarquí'hua nú chahua uquiahua. Udacuhua ye nú liqui'lla luhua nu la nedichia'hua lulla cá uchiu'e para nú la za' arqui'hua chenu acuhuane. ²⁸Pero tunu nu' tucu sa'hua enu ni luhua nú elubacu nú rliqui' benecua' racuhua udete'llae u'na lubee diose'lla, che la acuhuane equie cuenda' bene enu u dixiule'e luhua para nú la za'a arqui'lla equie cuenda' elubacu cua', mase nú nediya'ahua nú Pa'ahua Diose liñibe rni'biya' luye nú nu' lu iliulabe. ²⁹La nia luhua lunú xi rri'ihua elliebacu', lunú rnia luhua neca nú rri'i stucu bene elliebacu'.

Pero tala bese nu'hua rri'i elliebacu': "¿Pero xinu leca modo ri'á yeebe nú nediyaá nú laca necha neca equietsia nú seca stucu bene nú necha necane?"

³⁰Tala bese nihua: "Li'á nediyaá

nú rdetea che'tsa lu Diose equie yebee nú racua, ¿nu xiquie nú lixiu sa' arqui'hua lua?" ³¹ Pero li'á nia luhua nú sia equie cuenda' bee elubacu nú racuhua, nu cuna equie cuenda' nú rue'hua cuna ye beelá beenú rri'ihua, uri'ihuane equie nú rlu'cuhua ula'na lu Diose. ³² Ubi'yahua xneca nehuañihua para nú sia bee bene Israel nu bee bene enu laca bee bene Israel, nu bee sa'ahua enu nzeli arqui' Jesucristo la ri'ibeella elliebacu' nú necha neca equie cuenda'hua. ³³ Li'á rla'na nú ñiatsu arqui' ye bee bene lua. Nu la la'naa nú cha nze'catsiae lu cuendaa, sino que rla'natsia nú ri'á elietsa lu huaxi bee bene para nú tsila'a bee bene.

11 Utenalahua ejemplu nú rri'á, tucu nú nzenala ejemplu' .Jesucristo.

Xa riala ri'i bee una'a enu nzeli arqui' Jesucristo

² Bee sa'a enu nzeli arquia'ahua Jesucristo chiqui' ñia nzu arquia equie cuenda'hua xne siempre nchiucu' arqui'hua li'á nu lunú la tsana' arqui'hua nú uzetea li'ihua. ³ Nu le'ca niarquia nú ellu'cu' arqui'hua nú Diose rnibiya' lu Jesucristo nu Jesucristo neca enu rnibiya' lubee niyu nu bee niyu neca enu rnibiya' lubee una'a. ⁴ Nu chenu rietesa' bee bene para nú lu'cu beella ula'na lu Diose, titse niyu enu nzucu nú nzucu equie chenu rnacu'lla lu Diose urre sete'lla Stichia' Diose lubee bene netuu neca nú rri'illa che. ⁵ Le'ca scua bee una'a enu rnacu' lu Diose urre sete' Stichia' Diose bee bene,

tunu lecaxi nacu' equiella, le'ca netuu neca lunú rri'illa. Nu che neca xi neca nú nrecu' ichia equiella. ⁶ Enze'e tunu tucu una'a la tsacu' xi tsacu' equie, mejora chiecu'tsialla ichia equiella. Pero tunu nediya'lla nú netuu nú recu' ichia equie bee una'a, nu netú nú rrecu' etu equie bee una'a, enze'e mejora nú tsacu'lla xi tsacu'lla equiella. ⁷ Pero bee niyu la yala nú xi zucu' beei equie beei, xne Diose ureche' beei tucu nú rnanu, nu scua rlube'lla nú rlu'culla ula'na lu Diose. Nu le'ca esquie bee una'a lunú sacu'lla xi sacu'lla equiella scua rlube'lla nú rlu'culla ula'na lu niyu. ⁸ Xne néreche' Diose niyu cuna rila' una'a, sino que Diose ureche' una'a cuna rila' niyu. ⁹ Nu lá reche' Diose niyu equie nú nu'la bee una'a sino que ureche'nu una'a xne ureche'lanu niyu. ¹⁰ Enze'e chenu rietesa' bee bene para nú lu'cu bene ula'na lu Diose, rqui'ña nú tsacu' bee una'a equie beella xi neca tucu seña ante bee ángele' Diose, xne nu' enu rnibiya' lubeella. ¹¹ Mase nú ante Diose iguale bee bene, xne tunu leca nú nu' una'a leca niyu, nu tunu leca niyu le'ca leca una'a. ¹² Neli nú cuna rila' niyu ungache' una'a pero nee equie cuenda' una'a rala bee niyu lu iliulabe, nu sia niyu nu sia una'a equie cuenda' Diose nucua'alla lu iliulabe. ¹³ Li'á nia luhua, li'i e'cuhua uri'ihua elliebacu' chenu rietesa' bee bene para nú lu'cu beella ula'na lu Diose, la neca nze'ca nú nacu' tucu una'a lu Diose, tunu lecaxi nacu' equiella. ¹⁴ Le'ca ye bee bene nediya' nú netu neca tunu

sela niyu nú rru'cu ichia equiella.
¹⁵Pero para bee una'a rcua'a nze'ca beenchu chenu stuñi ichia equie beenchu, xne lia uдете' Diose ichia equie beenchu para nú yacu'e equie beenchu. ¹⁶Tunu nu'hua enu layu' arqui' lunú rnia luhua, pero li'á nia luhua nú lia'ahua la lu'cua'ahua stucu custumbre, scua neca custumbre'ahua cuna beela bee bene enu nzeli arqui' Stichia' Diose.

**Xneca riala ri'i bee bene
 exe' Jesucristo**

¹⁷Nee nia stucu nú nia luhua, pero lunú nia luhua nee leca modo nia luhua nú neca nze'ca nú rri'ihua xne chenu riete'sa'hua para nú lu'cuhua ula'na lu Diose a'la nú la yala ri'ihua rri'ihua. ¹⁸Rluti nia luhua nú ubenea nú chenu riete' sa'hua nú rlu'cuhua ula'na lu Diose la neca tucu necatsehua, nu nzeli arquia nú nu' chenu necane scua. ¹⁹Chiqui' neriña' nú zucu'hua Stichia' Diose tucu nú necane, enze'e recahua stucu grupo, nu scua rlube' nú ti enu sucu' Stichia' Diose nu ti enu la zucu'e. ²⁰Pero lunú rri'ihua scua, nu la neca tucu necatsehua cuna bee sa'hua, enze'e lecaxi sibi' chenu riete' sa'hua para nú acuxehua tucu nú uri'i Jesucristo. ²¹Xne cada tucuhua chenu rri'ihua exee, chu rna'tsehua nú racuhua nu la cua'aquiehua beelá bee sa'hua, mientras nú nu' beelá bee sa'hua enu rlia'na', nu nu'hua enu hasta xuchi'hua xne ungue'hua nu udacuhua tucu nú niarqui'hua. ²²¿Xie' la lu'cuhua ni'hua elu acuhua cuna hue'hua tucu nú niarqui'hua la? ¿Nu xie' la

zecahua beela bee sa'hua enu nzeli arqui' Stichia' Diose la? Enze'e sa'na netuhua bee bene enu seca elitsi nu lecali xi lu'cu. ¿Nu nee niarqui'hua nú ñia tsu arqui'hua equie cuenda' bee nucua' la? Pero scua tucu nú rri'inuhua beella leca modo nia luhua nú neca nze'ca lunú rri'ihua.

Exe nú uri'i Jesucristo

(Mt. 26:26-29; Mr. 14:22-25; Lc. 22:14-20)

²³Lunú uzetea li'ihua ungae equie cuenda' Jesucristo. Nu rula' nú uдете' cuenda bene li'inu chenu uri'inu último exe, li'inu una'tsenu tucu pá. ²⁴Nu chenu ulaxu nú uдете'nu che'tsa lu Diose che ule'enu pá, nu uninu: “Pá quie' neca cuerpoa nú dete cuendaa para nú atia equie cuenda'hua. Nu chenu ri'ihua scua, uri'ihuane xne rellu'cu arqui'hua li'á.” ²⁵Le'ca scua uri'inu cuna copa nú nu' viño, chenu ulaxu nú udacuxenu che uninu: “Viño quie' neca renea nú ri'chia chenu atia para nú ya'la tucu inziu nú necuqui neca para nú ri'i Diose perdona stula bee bene, cada chenu ri'ihua scua uri'ihuane xne rellu'cu arqui'hua li'á.” ²⁶Enze'e nia luhua nú cada chenu riete' sa'hua, para nú acuxehua tucu nú uri'i Jesucristo, chenu racuhua pá nu rue'hua viño scua rlube' nú ungutinu equie cuenda'hua. Nu scua uri'ihua hasta bichia chenu riña zecanu lu iliulabe stucu bese.

**Xneca riala nú ri'i bee
 bene exe' Jesucristo**

²⁷Enze'e tunu nu' titse bee bene enu racu pá nu rue' viño chenu neca

exe' Jesucristo nu la lu'cu cuendalla xi significado nú rri'illa scua, che dula neca nú rri'illa, xne la lu'cu cuendalla xi rri'i significado cuerpo' Jesucristo cuna rene'nu chenu rri'illa scua. ²⁸Enze'e rqui'ña nú ri'ixu bene elliebacu' xneca nehuañi bene ante Diose nu xucu' dulaxu bene lu Diose ante nú acu bene pá nu hue' bene viño lunú neca exe' Jesucristo. ²⁹Xne bene enu racu pá cua' nu rue viño cua' nu la ri'illa elliebacu' xinu rri'illa scua, equie cuenda' cuerpo' Jesucristo, che le'catsia li'illa rla'nalla castiya'lla. ³⁰Xne lunú rri'i bee bene scua enze'e huaxi bee bene letahua riti nu xiula' nu rati. ³¹Pero tunu rluti bi'yaxuhua xneca nehuañihua ante Diose nu xucu' dula'xua'ahua lunu ante nú ria'ahua execua', che lecaxi castiya' Diose zeca'ahua. ³²Pero tunu dete' Diose castiya lua'ahua, nucua' neca para nú bi'ya'ahua xneca nehuañia'ahua nu la ria'ahua dula, para nú la liqui' Diose castiya lua'ahua, tucu nú dete'nue lubee bene enu la chili arqui' stichia'nu.

³³Enze'e bee sa'a enu nzeli arquia'ahua Jesucristo, chenu riete' sa'hua para nú ri'ihua exe' Jesucristo, ucu'a quiehua beelá bee sa'hua para nú acuxe juntuhua. ³⁴Pero tunu nu'hua enu la cua'a quiea' nú chiqui' rlia'na' mejora nú acuxuhua eta ni'hua para nú la dete' Diose castiya li'ihua equie nú la ri'ihua tucu nú necane. Nu ye beelá beenú rqui'ña nia luhua, nia bee nucua' luhua chenu nzelabi'ya li'ihua.

Lunú rliqui' Espíritu Santo

12 Nee nia luhua lunú rliqui' Diose lu cada tucua'ahua

lunú riala ria'ahua equie cuenda' Espíritu Santo, xne la niarquía nú huaña'ahua sin nú ri'ihua beya' equie cuenda' bee nucua'.

²Li'ihua nediya'hua nú chenu lasca' chuluhua Stichia' Diose, chiqui' uyanalahua bee enu rni bee bene luhua nú neca diose nu la ni. ³Enze'e nee niarquía nú ri'ihua beya', nú titse bene enu nii nú lecaxi sibi' Jesucristo, tunu rni bene scua nucua' rlube' nú la nzu Espíritu Santo cuna li'illa. Nu le'ca ni'tucu bee bene leca modo nii: “Jesucristo neca enu rnibiya' lua.” Tunu la nzu Espíritu Santo cuna li'illa.

⁴Nu' yelu beenú utsula Diose lia'ahua nú ria'ahua, lia'ahua enu nzelila arquia'ahua Jesucristo, pero enu rliqui' nucua' lua'ahua neca tucutsia Espíritu Santo. ⁵Mase urene urene riña' nú uliqui' Diose lu cada tucua'ahua nú rria'ahua, pero lu tucutsia li'inu sibia'ahua. ⁶Mase urene urene lunú reca'ahua rria'ahua pero tucutsia Diose neca enu rri'i elietsa lua'ahua. ⁷Lu cada tucua'ahua rlube' Diose lunú xi reca'ahua cuna elietsa' Espíritu Santo para nú ria'ahua elietsa lubee sa'ahua. ⁸Xne cuna elietsa' Espíritu Santo nu' bee bene enu ungti'la' elliebacu' para nú ni lubee bene, le'ca nu' bee bene enu ungti'la' elliebacu' para nú ri'illa beya' nú xneca zete'lla bee bene. ⁹Nu equie cuenda' elietsa' Espíritu Santo nu' bee bene enu la nzuchiucu arqui' lunú nzeli arqui' Diose. Nu le'ca nu' bee bene enu ungti'la' poder nú rlu'cu Diose para nú ri'i yecalla bee bene enu riti. ¹⁰Nu

le'ca nu' bee bene enu udete'la Espíritu Santo poder lu para nú ri'i'illa yelu clasia' bee milagro. Nu le'ca nu'bee bene enu udete'la Espíritu Santo elliebacu' nú reca, para nú ixiule'ella Stichia' Diose lubee bene, nu nu' bee sa'ahua enu udete'la Espíritu Santo nú reca elliebacu' para nú ri'i'illa beya' tunu neli urre laca neli lunú rni bene enu rni nú rixiule'e Stichia' Diose. Le'ca nu' beella enu udete'la Espíritu Santo elliebacu' para nú ni yelu clasia' dialu, nu le'ca nu' beella enu udete'la Espíritu Santo elliebacu' para nú ixiule'e xi rni tucu dialu cua' nu xi rni stucue. ¹¹Pero tucutsia Espíritu Santo rri'i' elietsa lubee bene nú rri'i' bee bene ye beenú rri'i' bee bene, nu Espíritu Santo nediyala' xi riala dete'nu ri'i' cada tucu bee bene.

**Ye'ahua neca xi neca nú
rlu'cua'ahua tucutsia cuerpo**

¹²Cuerpo' bene mase nú tucutsia necane pero huaxi parte rlu'cune. Le'ca scua lia'ahua enu nzeli arquia'ahua Jesucristo mase nú huaxi neca'ahua pero neca tucutsia'ahua cuna li'inu. ¹³Xne ye'ahua urinza'ahua equie cuenda' tucutsia Espíritu Santo, para nú aca tucu necatse'ahua cuna beelá bee sa'ahua, mase nú neca'ahua bene Israel urre laca'ahua bene Israel, mase nú neca'ahua esclavo urre laca'ahua esclavo, pero neca tucu necatsela'ahua xne ye'ahua nzula Espíritu Santo cuna lia'ahua.

¹⁴Cuerpo' bene laca tucutsiae sino que huaxi parte rlu'cune. ¹⁵Nu tunu ni cuchiu' bene: “Laca tucu parte

cuerpo' bene xne laca ya bene.” Pero laca equie cuenda' nucua' nú laca'e tucu parte cuerpo' bene. ¹⁶Nu le'ca esquie tunu ni diaca bene: “Laca tucu parte cuerpo' bene xne laca i'culu bene”, laca equie cuenda' nucua' nú laca'e diaca bene. ¹⁷Xne tunu diqui cuerpo' bene necatsia i'culu bene, ¿chequie xneca yene' bene che? Nu tunu diqui bene unga diaca bene, ¿xneca lia' bene che? ¹⁸Pero nediyala' Diose cá riala zucu ye lunú neca cada tucua parte cuerpo'ahua, tucu nú niarqui'nu nú acane. ¹⁹Xne tunu tucutsia parte neca diqui cuerpo lacane tucu cuerpo che. ²⁰Pero tucu nú unilá luhua mase nú huaxi parte neca cuerpo'ahua pero tucutsia neca diqui cuerpo'ahua.

²¹Leca modo ni i'culu bene luya bene: “La qui'ñalu.” Nu le'ca leca modo ni lluca equie bene lu cuchiu' bene: “La qui'ñiahua.” ²²Mase nú huaxi bee parte cuerpo'ahua nú se'ca'ahua nú lle'natsia sibi', pero bee nucua' neca nú máse sibi'. ²³Nu bee parte cuerpo'ahua nú rtua'ahua mase la aca ahee lu cuerpo'ahua bee nucua' neca nú máse rri'i' ucua'ahua xne rla'na'ahua nú xi utua'ahua para nú lecaxi na'ahua. ²⁴Nu bee parte cuerpo'ahua nú ache, bee nucua' neca nú la chenu xe'ta' arquia'ahua equie cuenda'. Pero máse rqui'ña nú chenu arquia'ahua equie cuenda' bee parte cuerpo'ahua nú la ahee para nú lecaxi llua'ahua, nu scua ureche' Diose lia'ahua. ²⁵Para nú la ria'ahua elliebacu' nú nu' parte cuerpo'ahua nú la zibi' sino que diqui cuerpo'ahua rri'i' elietsa lu

sa'e. ²⁶Chenu rcuu tucu parte cuerpo' bene, che diqui cuerpo' bene si' nú rcu, nu chenu tucu parte cuerpo' bene ñia seca che diqui cuerpo' bene ñia seca.

²⁷Nu nee le'ca scua lunú neca tucu necatse'ahua cuna Jesucristo, che ye'ahua neca'ahua xi neca tucutsia cuerpo para li'inu, nu cada tucua'ahua neca'ahua xi neca tucu parte cuerpo ze'e. ²⁸Leta'ahua enu nzeli arquí' Jesucristo ucañi Diose rleri bee apóstol, che chu ucañinu bee profeta, luze'ela ucañinu bee ulaxcuela enu sete' stichia'nu, nu cuna bee bene enu rri'iyeca bee bene enu riti, nu cuna bee bene enu rri'i bee milagro nu cuna bee bene enu rri'i elietsa lubeela bee bene. Le'ca ucañinu bee bene enu nibiya' lubee bene enu nzeli arquí' stichia'nu, le'ca ucañinu bee bene enu rni huaxi dialu. ²⁹Laca ye bee bene neca apóstol nu le'ca laca ye bee bene neca profeta' Diose nu le'ca laca ye bee bene reca sete' Stichia' Diose lubee bene, nu laca ye bee bene reca rri'i bee milagro. ³⁰Le'ca laca ye bee bene reca rri'iyeca bee bene enu riti, nu le'ca laca ye bee bene reca rni ye clasia' bee dialu, nu le'ca laca ye bee bene reca rixiule'e xi rni tucu dialu urre stucue. ³¹Pero la'nahua nú lube' Diose lua'ahua ta nú mase neca nze'ca riala ria'ahua, li'á rluhea luhua tucu inziu nú máse neca nze'ca.

Eluseca

13 Xne tunu recaa rnia xitse bee dialu rene nú rni bee bene iliulabe cuna nú rni bee

ángele liñibe, pero tunu la zeca bee sa'a che necatsia xi neca tucu icu' nú rquiee urre xi neca tucu platillo nú chiquí' fuerte nza bi'i. ²Nu tunu li'á neca profeta, nu tunu alu'cua elliebacu' para nú ri'á beya' ye elliebacu' nú enta lu Diose nú lasca' ri'i bee bene beya', urre alu'cua elliebacu' nú chiquí' reca urre tunu chiquí' nzeli arquia Diose hasta nú aca nia lu tucu dañi nú lluna'e luhuare elu nzucune, nu zucune stucu luhuare pero tunu la zecaa bee sa'a lecaxi zibi' nú rri'á scua che. ³Nu le'ca tunu ritsia ye nú rlu'cua lubee bene enu seca elitsi nu zelaa nú tsiqui' bee bene li'á, pero tunu la zecaa bee sa'a, lecaxi zibi' nu rri'á scua che.

⁴Eluseca neca nú rlu'cu bene paciencia sa'bene, nu rri'i nze'ca bene lusa' bene, nu la yea arquí' bee bene, nu la zucu' aya bene li'illa, nu la aca nellíñia bene. ⁵Nu lacalla bene enu grosero, nu lacalla bene enu rri'itsia elliebacu' lu cuenda' e'cutsia nu lacalla bene enu nelachi nu la ri'illa nú biñi arquí'lla lubeelá bee bene. ⁶Nu lacalla bene enu xila' chenu nu' xi seca sa'lla sino que xila'lla chenu nehuañi nze'calla. ⁷Eluseca neca, nú rriqui' bene sa'bene, nu nzeli arquí' bene nú rni sa'bene, nu la tsu chiucu arquí' bene lusa' bene, nu la llaca' bene sa' bene.

⁸Eluseca, lecaxi bichia nú laxue, pero bee profeta enta bichia nú laxu beella nu le'ca enta bichia nú laxu bee bene enu rni stucu dialu rene, cuna nú laxu nú reca elliebacu' bene. ⁹Xne nee tunu rria'ahua beya' lle'na, pero

huaxisca'lá rri'i nú ria'ahua beya' nu tunu neca'ahua profeta' Diose le'ca huaxisca'lá rri'i para nú ria'ahua beya' equie cuenda'nu.

¹⁰ Pero chenu riña bichia nú ria'ahua beya' yeene, che leca' xi zibi' lunú reca'ahua nee.

¹¹ Chenu unгаа endu' unia xi rni bee endu' nu uri'á elliebacu' xi rri'i bee endu' elliebacu', nu neca elliebacua xi neca elliebacu' bee endu'. Pero chenu uru'cua utsana arquia lunú necaa endu'. ¹² Le'ca scua la ria'ahua beya' yeene, xi neca chenu la lañi' nze'ca'ahua lu tucu huana, pero chenu riña bichia nú riña'ahua elu nzucu Diose che ria'ahua beya' yeene. Nee lle'natsia beenú rri'á beya' pero chenu riña bichia nú riñaa elu nzucu Diose che chluanu xi nu'lunu li'á.

¹³ Nu' chuna beenú leca bichia nú laxu: Tucue neca nú nzeli arqui' bene Diose, nu stucue neca nú nzucu lua'ahua nú xi liqui' Diose lua'ahua, nu stucue neca nú seca bene sa'bene, pero lu yuna bee nucua' máse neca equie nú seca bene sa'bene.

Bee bene enu rni stucu dialu

14 Ula'nahua nú zecahua bee sa'hua nu chiqui' una'cuhua lu Espíritu Santo para nú liqui'nu xi riala ri'ihua pero máse na'cuhua lunu nú liqui'nu nú ri'ihua beya' para nú zete'hua stichia'nu lubee bene. ² Bene enu rni stucu dialu nú la ri'i bee bene beya' xi rni, nze'ta bedichia' cua' lu cuenda' Espíritu Santo. Nu tucutsia Diose rdichia'nulla bedichia' cua' nu lecati bene rri'i beya' nú rnilla.

³ Pero bee bene enu rixiule'e Stichia' Diose lubee bene, rri'illa elietsa lubee bene para nú xneca riala nú chenala bene inziu' Diose, nu rdu'lla ana arqui' bee bene, nu saalalla arqui' bee bene enu nehuana seca. ⁴ Bene enu rni stucu dialu nú la ri'i bee bene beya' xi rni, rri'i nucua' elietsa lu li'itsialla. Pero bee bene enu rixiule'e Stichia' Diose lubee bene, rri'illa elietsa lubee bene' Diose para nú xneca chenala beella inziu' Diose.

⁵ Ala' niarquia nú yehua nihua stucu dialu, pero máse neca nze'ca tunu ixiule'ehua Stichia' Diose lubee bene. Xne máse neca equie nú ixiule'e bene Stichia' Diose lubee bene luquela nú ni bene stucu dialu nú la ri'i bene beya' xi rni. Urre tunu acalla ixiule'ella lubee bene xi rni dialu nú unilla para nú zibi' lunú unilla lu ye bee bene, ⁶ xi neca tunu nzelabi'ya li'ihua bee sa'a enu nzeli arquia'ahua Jesucristo nu nia luhua tucu dialu nú la ri'ihua beya' xi rni che lecaxi zibi' nucua' luhua luhua nú nia luhua Stichia' Diose, luhua nú nia luhua lunú ulube' Diose lua nú nia luhua urre luhua nú zeteahua lunú recaa, urre luhua nú zeteahua lunú riala zeteahua.

⁷ Xi neca tucu bee icu' musica, flauta, urre arpa tunu la ula nze'ca benene la ri'i bene beya' xi instrumento bee nucua'. ⁸ Le'ca scua tunu la bixia nze'ca tucu sundado trompeta lu xuu, xneca ri'i beei beya' para nú nucua' tsiñiala beei para nú chue beei lu xuu. ⁹ Nu nee le'ca scua tunu li'ihua nihua lubee bene cuna tucu dialu nú la ri'i bee

bene beya' xi rni, ¿xneca ri'i beella beya' xi rnihua lubeella? Nu che lia xle'e unihua lubeella. ¹⁰Li'ihua nediya'hua nú nu' huaxi bee dialu lu iliulabe, pero yeene nu' xi rni. ¹¹Pero tunu tucu bene ni lua tucu dialu nú la nia nu la ri'á beya' xi rni, che necaa tucu bene istu para bene ze'e, nu neca bene ze'e tucu bene istu para li'á. ¹²Enze'e scua tucu nú chiqui' niarquihua nú lu'cuhua elliebacu' nú enta lu Diose cuna elietsa' Espíritu Santo chiqui' una'cuhua lu Diose para nú liqui'nu elliebacu'hua nú ri'ihua lunú xi riala ri'ihua para nú xneca chenala bee bene' Diose inziu'nu.

¹³Enze'e bene enu rni tucu dialu nú la ri'i bee bene beya' rqui'ña nú nacu'lla lu Diose para nú ri'inu elietsa lulla para nú acalla ixiule'ella lubee bene xi rni lunú unilla. ¹⁴Xne tunu li'á nacua lu Diose cuna stucu dialu rene nu la ri'á beya' xi rni che tucutsia espíritua nediya' xi rnia pero li'á ni la ri'á beya' xi rnia che.

¹⁵Enze'e lunú rqui'ña ri'á neca nú nacua lu Diose cuna espíritua, nu ri'á beya' xi rnia. Le'ca scua chenu rulaa lu Diose rqui'ña nú tsi'a bee nucua' nu ri'á beya' lunú xi rulaa. ¹⁶Xne tunu rnilu bedichia' nze'ca lu Diose cuna tucu dialu nú la ri'ilu beya' xi rni che leca modo ni bene enu nzu cuna li'lu “Amén” chenu ulaxu udete'lu che'tsa lu Diose. Equie nú lá ri'illa beya' xi unilu. ¹⁷Mase nú ñia udete'lu che'tsa lu Diose, pero lecaxi uri'i nucua' elietsa lu bene enu nzu cue'tselu para nú ri'illa beya' xneca chenalalla inziu' Diose. ¹⁸Rdeta

che'tsa lu Diose nú li'á reca huaxi dialu lu yehua. ¹⁹Pero mase nú scua necane chenu nzua elu riete'sa' bee sa'ahua enu nzeli arqui' Jesucristo para nú nia lubeella, nu para li'á máse nza nze'cae tunu nia masia ayu' bedichia' lubeella bee bedichia' nú rri'i beella beya' para nú zibi'i lubeella nu zete' beellae lu stucu bene, luhuare nú nia lubeella chi'i mili bee bedichia' nú la ri'i beella beya' xi rni.

²⁰Bee sa'a enu nzeli arquia'ahua Jesucristo la ria'ahua elliebacu' xi rri'i bee endu' lla'na elliebacu'. Pero acahua xi neca bee endu' nú la ri'i beei beenú necha neca, pero chenu rri'ihua elliebacu' uri'ihua elliebacu' xi rri'i bene uxu elliebacu' lunú unguxulahua. ²¹Lu ichi' Stichia' Diose rni: “Xe'la bee bene enu rni stucu dialu, bee bene enu laca bee bene ca'a para nú nibeella lubee benequei'. Pero ni' scua la zucu' beella stichia'a uni Diose.” ²²Enze'e lunú rni bene huaxi dialu, necane tucu seña para lubee bene enu la chili arqui' Stichia' Diose para nú scua chili arqui'beella Diose. Nu la neca nucua' tucu seña lubee bene enu nzelila arqui' Diose. Pero lunú rixiule'e bene lunú neca cuenda' Diose neca nucua' tucu seña para lubee bene enu nzelila arqui' Diose. Nu laca nucua' tucu seña para lubee bene enu lachili arqui' Diose. ²³Pero ni' scua chenu riete'sa'hua para nú yene'hua Stichia' Diose nu che quixie yehua nú nihua yelu clasia' dialu nú lecati rri'i beya' xi rni, nu tunu nucua'anuhua bee bene enu apenatsia uchili arqui' Stichia' Diose urre bee bene enu

la chili arqui' stichia'nu, ¿che xie' la ri'i bee benecua' elliebacu' nú tala vese ichia lucu secahua la? ²⁴Pero tunu yehua rixiule'ehua Stichia' Diose elu riete'sa'hua nu nucua'anuhua bene enu apenatsia uchili arqui' Diose, urre bene enu la chili arqui' Diose ze'e, che chenu yene'lla xi rnhua, che ri'illa beya' nú necalla tucu bene enu rlu'cu dula, nu che le'catsia li'illa ri'illa beya' nú ti necalla. ²⁵Nu scua ri'illa beya' nú xneca nehuañilla nu tsulliquilla nacu'lla lu Diose, nu le'ca nilla nú neli nú nzu Diose cuna li'ihua.

Uri'i nze'cahua lunú riala ri'ihua

²⁶Bee sa'a enu nzeli arquia'ahua Jesucristo ye beenú rnia luhua rnine luhua para nú ri'ihua beya' nú chenu riete'sa'hua para nú yene'hua Stichia' Diose, yehua ri'ihua lunú recahua rri'ihua, ti enu rula canto lu Diose, nu ti bee enu sete' Stichia' Diose lubee bene, nu ti bee enu rixiule'e lubee bene nú xi ulube' Diose lulla, nu bee enu rni stucu dialu nú la ri'i ye bee bene beya', nu ti bee bene enu rixiule'e xi rni dialu nú uni benecua', pero luye nú rri'ihua rqui'ña nú zibi'i nu ri'i elietsa lubeelá bee sa'hua nú xneca chenala beella Stichia' Diose. ²⁷Tunu nu'hua enu rni dialu nú la ri'i ye bee bene beya', rqui'ña nú ni chiucu chunatsiahua dialu cua' bee enu recatsiae, nu tucua tucuahua nihuane, nu rqui'ña nú nu' enu ixiule'e lubee bene nú xi rni dialu nú unibeella. ²⁸Pero tunu leca bene enu ixiule'e lubee bene xi uni bee bene enu uni dialu cua', che máse

neca nze'ca nú la nibeellá dialu cua' lubee bene. Mejora li'itsia beella nediyá' beella cuna Diose xi rni nú unacu' beella lunu cuna dialucua.

²⁹Nu bee bene enu ixiule'e lubeelá bee bene xi ulube' Diose lubeella rqui'ña nú chiucutsia beella urre chunatsia beella ixiule'e beella lubeelá bee bene, cada chenu riete'sa'hua nu beelahua saca tunu neli lunú rni beella.

³⁰Pero tunu tucu bene enu nzucu ze'e saca, nu hora ze'e lube' Diose lulla tucu nú lube' Diose lulla, che rqui'ña nú zaca bene enu rni para nú aca ixiule'ella lubee bene xi ulube' Diose lulla hora ze'e. ³¹Yehua nu' beya' ixiule'ehua Stichia' Diose lubee bene, lunú ulube' Diose luhua, pero tucua tucuahua rqui'ña nú ri'ihua scua para nú aca beella, nu chu'u ana arqui'beella, li'ibeella enu riene' nú rnhua. ³²Ulu'cu cuendahua nú bee profeta, la yala nú nibeella chenu la yala nibeella, sino que nibeella chenu riala nibeella. ³³Xne Diose niarquí' nú xcua'a xcua'a ri'i bee bene para nú huañi nze'ca bene cuna sa'bene. Scua tucu nú recae ye bee luhua elu riete'sa' bee bene enu nzeli arqui' Jesucristo. ³⁴Hora nú riene'hua Stichia' Diose, leca modo nú nu'xi ni bee una'a tucu nú uni Diose nú ri'i beenchu hasta hua'tu. ³⁵Tunu nu' xila niarquí'hua nú ri'ihua beya', mejora nú ni'hua nu unedichia'hua lu niyu'hua, xne netue tunu nedichia' tucu una'a hora nú riene' ye bee bene Stichia' Diose.

³⁶Ullu'cu' arqui'hua nú la neca li'ihua enu primero uri'i beya'

Stichia' Diose, nu le'ca la neca li'itsiahua bee enu primero nediya' Stichia' Diose. ³⁷Tunu nu'hua enu seca nú necala profeta, urre seca nú Espíritu Santo udetela elliebacu'lla, nu che chu ri'lla beya' lunú rnia lu cartaquei' nu necane tucu nú unibiya' Diose nú ri'ihua. ³⁸Pero tunu la chili arqui' profeta quie' lunú rnia luhua lu carta quie', le'ca la chili arqui'hua lunú rnilla luhua.

³⁹Scua tucu nú unila luhua bee sa'a enu nzeli arquia'ahua Jesucristo, una'cuhua lu Diose para nú liqui'nu elliebacu'hua para nú ixiu'e'ehua stichia'nu lubece bene, nu la cahua tunu ni tucu bee sa'hua tucu dialu nú la ri'ihua beya'. ⁴⁰Pero lu ye nú rri'ihua uri'i nze'cahua, uri'ihua tucu nú riala ri'ihua chenu riete' sa'hua, para nú yene'hua Stichia' Diose.

Uhuañi zeca Jesucristo lu eluti

15 Bee sa'a enu nzeli arquia'ahua Jesucristo, ellu'cu' arquia li'ihua bee bedichia' nze'ca' Jesucristo nú unila luhua, bee bedichia' nze'ca nú uchilila arqui'hua nú nzuta' arqui'hua lu. ²Ullu'cu' arqui'hua nú equie cuenda' bedichia' nze'ca cua' utsila'alahua equie cuenda' stulahua, tunu neli nú nzuta' arqui'hua pero tunu la neli nú nzuta' arqui'hua lue lecaxi zibi' nú uchili arqui'huane che.

³Rluti uzetea li'ihua lunú rluti unga. Unia luhua nú Jesucristo unguite equie cunda' stula'ahua tucu nú rni lu ichi' Stichia' Diose. ⁴Nu uyachi'nu nu che uhuañi zecanu bichia rriuna, tucu nú rni lu ichi' Stichia' Diose. ⁵Chenu uhuañi

zecanu che ulube'lunu lu Pedro nu luze'elá ulube'lunu lubece apóstol'nu. ⁶Nu le'ca luze'elá ulube'lunu lu texcua'a bee bene enu nzeli arqui' li'inu, nu neca máse de quiniento beella. Nu'beella enu unguite, pero le'ca esquie nu' huaxi beella enu nehuañisca'. ⁷Nu le'ca esquie ulube'lunu lu Jacobo nu cheelá lu ye bee apóstol.

⁸Nu li'á neca xi neca tucu endu'me' enu udetela hora nú ala, xne ulube'lunu lua hasta útimolá. ⁹Nu li'á menula neca equia luquela beelá bee apóstol, nu ni' la yala nú chiulea apóstol xne uri'á nú nehuañi ulle'ca bee bene enu nzeli arqui' Jesucristo. ¹⁰Pero lunú chiqui' nze'ca Diose enze'e necaa lunú necaa, nu la xle'e uhua'a arqui'nu li'á xne máse uri'á riña'nu luquela beelá bee apóstol, añinzuca nú la neca li'á enu rri'i sino que cuna elietsa' Diose rri'ine. ¹¹Nu lecaxi ri'i tunu ti udixiu'e' Stichia' Diose luhua, tunu neca li'á urre neca stucu bee apóstol, xne tucutse Stichia' Diose sete'ru li'ihua nu uchilila arqui'huane.

Huañi zeca bee bene enu unguite

¹²Nu nee lunú uzete'laru li'ihua Stichia' Diose nú rni nú Jesucristo uhuañi zeca lu eluti, ¿xiquie nú nu'hua bee enu rni nú la huañia' bee bene enu unguite? ¹³Xne tunu la huañia' bee bene enu unguite, nucua' rni nú lá huañia' Jesucristo lu eluti stucu bese che. ¹⁴Nu tunu lá huañia' Jesucristo lu eluti, che lecaxi zibi' lunú sete'ru li'ihua, nu le'ca esquie lecaxi zibi' lunú nzeli arqui'hua li'inu che. ¹⁵Nu tunu

scua necane, che la neli neca nú rñiru equie cuenda' Diose che xne unilaru luhua nú li'inu uri'inu nú uhuañi zeca Jesucristo. Nu tunu laca neli nú huañi zeca bee benenguti, che laca neli nú uhuañi zeca Jesucristo stucu bese che. ¹⁶Xne tunu la huañia' bee bene enu ungutí, che le'ca lá huañia' Jesucristo lu eluti stucu bese. ¹⁷Nu tunu lá huañia' Jesucristo lu eluti lecaxi zibi' nú nzeli arqui'hua li'inu che, nu le'ca lasca' la'ahua lu stulahua che. ¹⁸Tunu scua necane che hasta bee enu ungutíla unítululíla beella, añinzuca nú uyali arqui'beella li'inu. ¹⁹Nu tunu lu íliulabequietsia nelluaquia'ahua lunú nellua'aquia'ahua equie cuenda' Jesucristo, che lunú nzeli arquia'ahua li'inu neca'ahua bee bene enu máse riala hua'a arqui' ye bee bene.

²⁰Pero lunú neli neca nú Jesucristo uhuañi lu eluti, nu li'inu necanu enu primero uhuañi lu eluti. ²¹Nu scua tucu nú uyu'u eluti lu íliulabe quie', equie cuenda' tucu bene, le'ca scua equie cuenda' tucu bene uyu'u nú huañi zeca bee bene enu ungutíla. ²²Scua tucu nú uyu'u eluti nú rati ye bee bene equie cuenda' Adán, le'ca scua equie cuenda' Jesucristo rlu'cu bee bene enu nzeli arqui' li'inu stucu elunehuañi. ²³Pero yeene acane tucu nú rialane. Jesucristo neca enu primero uhuañi zeca lu eluti stucu bese, chenu riñazecanu stucu bese lu íliulabe che huañi zeca bee benenguti enu nzeli arqui' li'inu.

²⁴Nu chenu ri'i Jesucristo ana luye elurnibiya' nú nu' lu

íliulabe quie' cuna elusticia cuna poder, chela dete' cuendanu lunú rnibiya'nu lu Diose Pa liñibe. ²⁵Pero rqui'ña nú nibiya' Jesucristo hasta nú ri'i Diose nú ri'inu ana lube enu rlee lunu. ²⁶Nu enu nítílu nu último neca eluti. ²⁷Lu íchi' Stíchia' Diose rni nú Diose udete' poder lu Jesucristo para nú nibiya'nu lu yeene, pero la ni nucua' nú le'ca rnibiya'nu lu Diose, xne Diose neca enu udete' poder lu Jesucristo nú nibiya'nu. ²⁸Nu bíchia nú nibiya' Jesucristo lu yeene, che dete' cuendanu elurnibiya' nú udete' Diose lunu nu che nibiya' zeca tucutsia Diose lu yeene nu cuna lu Jesucristo.

²⁹Neequie tunu rníhua nú la huañia' bee bene enu ungutíla. ¿Xiquie nú rrinzahua equie cuenda' bee bene enu ungutíla? Nu tunu la huañia' bee bene enu ungutíla lecaxi zibi' nú rri'íhua scua che.

³⁰Nu tunu la huañia' bee bene enu ungutíla, hasta lía'ahua enu síbia'ahua lu Diose lecaxi zibi' nú yebíchia rlu'cua'ahua peligro nú atía'ahua. ³¹Xne lí'á nía luhua bee sa'a enu nzeli arquia'ahua Jesucristo nú yebíchia rlu'cua peligro nú atía, neli nú rnía luhua scua, tucu nú neli nú chíqui' ñía nzu arquia equie cuenda'hua, lí'íhua enu necala bee bene' Jesucristo. ³²Nu nee tunu lu íliulabequietsia síbi' lunú rri'á, che lecaxi zibi' beenú uri'inu bee bene Efeso lí'á, lí'íbee enu nelachi xí nelachi bee nañi dañi. Xne tunu la huañia' bee bene enu ungutí enze'le máse neca nze'ca nú ría'ahua tucu nú rni bee enu rni: “Te da'cua'ahua

nu te diya'ahua xne ye'etsia ungu'la'ahua.”

³³Pero li'á nia luhua nu la zelahua nú ti zequienu li'ihua equie cuenda' bee nucua'. Xne tunu rri'i casuhua lunú rri'i bee bene enu la ri'i tucu nú necane, nucua' rnitilu lunú xneca nehuañihua. ³⁴Enze'e uri'ihua elliebacu' tucu nú necane nu la ria'hua dula xne nu'hua enu se'caa nú ni' la chulu nze'ca Stichia' Diose, enze'e rnica scua luhua para nú tu'hua.

Xneca huañi zeca bee benenguti

³⁵Pero tal vez nu'hua enu rri'i elliebacu': “¿Pero xneca huañi zeca bee benenguti che? ¿Nu xneca naa cuerpo nú lu'cu beella?” ³⁶¡Pero elliebacu' cua' la zibi'! Xne li'ihua nediya'hua nú chenu rdu'ni bene tucu ebichi che rliñi nu chu ruchu ebichi'i. ³⁷La neca huañi nú rquienu bee bene sino que ebichi'i rquienu bene, tucu nú rri'inu bene trigo urre tatse stucu ebichi. ³⁸Pero chenu rliñi che necane tucu huañi tucu nú unibiya'la Diose nú necane, nu cada ebichi nú rquienu bene, chenu ru'cue che rlube' nú xine. ³⁹Scua tucu nú urene rnaa cuerpo' bene lu cuerpo' bee nañi nu urene rnaa cuerpo' bee bela lube'e ñi. ⁴⁰Nu le'ca urene rnaa beenú nu' liñibe nu beenú nu' lu iliulabe nu le'ca esquie urene ñia rnaa, nú nu' liñibe nu urene ñia rnaa nú nu' lu iliulabe. ⁴¹Le'ca scua urene rnaa ellie' bichia luquela guu nu le'ca urene rnaa ellie' belaa, hasta bee belaa urene rnaa ellie' tucu belaa, lu stucu belaa. ⁴²Le'ca scua acane lu cuenda' bee bene enu huañi zeca lu eluti,

cuerpo' bene nú riachi' ruchue, pero cuerpo nú lu'cu bee bene stucu bese leca' bichia nú uchune. ⁴³Cuerpo' bene nú riachi' ruchue, pero chenu huañi zeca bene lu'cu bene stucu cuerpo nú ñia rnaa nu leca' xi zeca. Cuerpo nú riachi' leca' juersa'e, pero chenu huañi zeca bene che chiqui' lu'cu zeca bene juersa. ⁴⁴Riachi' cuerpo nú rlu'cu bene lu iliulabe quie', pero chenu huañi zeca bene lu'cu bene tucu cuerpo nú zibi' liñibe. Xne scua tucu nú rlu'cu bene tucu cuerpo lu iliulabe quie' le'ca scua lu'cu bene stucu cuerpo liñibe.

⁴⁵Lu ichi' Stichia' Diose rni nú rluti Adán ulu'cu elunehuañi lu iliulabe quie'. Luze'elá uriña Jesucristo, li'inu enu rliqui' elunehuañi' bee bene. ⁴⁶Rluti lu'cua'ahua sa' cuerpo nú ulu'cu Adán lu iliulabe quie', chéla lu'cua'ahua sa' cuerpo nú ulu'cu Jesucristo liñibe. ⁴⁷Adán ungache' yuu enze'e necalla bene lu iliulabe, pero Jesucristo uriña enza liñibe. ⁴⁸Yebee bene rlu'cu cuerpo tucu nú ulu'cu Adán cuerpo lu iliulabe quie', pero chenu riña bichia nú lu'cu bee bene tucu cuerpo sa' cuerpo nú rlu'cu Jesucristo liñibe.

⁴⁹Xne scua tucu nú rna'ahua le'ca scua unaa Adán lu iliulabe quie', nu le'ca scua na'ahua tucu nú rnaa Jesucristo liñibe.

⁵⁰Nee ixiule'a luhua bee sa'a enu nzeli arquia'ahua Jesucristo, nú cuerpo'ahua nú rlu'cua'ahua lu iliulabe quie' nú neca be'la nu rene leca modo chu'une liñibe elurnibiya' Diose. Xne cuerpo' bene nú rnitilu, leca modo chu'u elu nu' cuerpo' bene nú leca xunga nitilu.

⁵¹ Pero niarquía nú ri'ihua beya' tucu nú lasca' ixíule'a luhua nú lá ri'ihua beya', nú la atíye'ahua, pero ri'i Diose nú che'e xneca naa ye'ahua nu lu'cua'ahua stucu cuerpo. ⁵² Scua aca chenu yene'ahua chii trompeta, che terratutsia tucu nú ríacu' nu ria'la i'culu bene scua terratutsia che'e nú xneca rna'ahua, chenu yene chii trompeta ze'e huañi zeca yee bee benenguti, nu che leca' xunga atibeella, nu lia'ahua hora ze'e che'e xneca rna'ahua. ⁵³ Xne cuerpo nú rlu'cua'ahua rqui'ña nú che'e xneca rnae cuna stucu cuerpo nú la nitilu. Xne rqui'ña nú che'e cuerpo'ahua nú rati cuna stucu cuerpo nú leca' bichia nú ati.

⁵⁴ Nu chenu uche'ela cuerpo nú rlu'cua'ahua nú rnitilu cuna stucu cuerpo nú la nitilu, nu chenu uche'ela cuerpo'ahua nú rati cuna stucu cuerpo nú la ati, bichia ze'e uyalu tucu nú rni lu ichi' Stichia' Diose elu rni: “Uluxu eluti xne uri'ila elunehuañi ana. ⁵⁵ Nu le'ca uyalula stucu luguare lu ichi' Stichia' Diose elu rni: “Eluti, ¿ca nza nú niarquí'lu ari'ilu ana? ¿Nu ca nza nú nehuana seca bee bene rri'ilu?” ⁵⁶ Lunú nehuana seca bee bene rri'i eluti necane equie cuenda' dula, nu equie cuenda' ley rri'i bee bene beya' nú rnibiya' dula lubee bene. ⁵⁷ Pero che'tsala Diose Pa liñibe, enu rri'i elietsa lua'ahua nú rria'ahua ana lubee nucua' equie cuenda' nú unguti Jesucristo.

⁵⁸ Enze'e bee sa'a enu nzeli arquia'ahua Jesucristo scua tucu nú se'ca li'ihua nia luhua, nú utsuta' arqui'hua lunú nzeli arqui'hua

Jesucristo nu la llaca'hua. Nu ye ye'e ula'nahua nú ri'ihua riña' Diose xne li'ihua nediya'hua nú la ri'i xle'ehua riña' Diose.

Elietsa para bee bene' Diose eyeche Jerusalén

16 Nee equie cuenda' bee dimi nú rqui'ña quiete'sa'hua para nú ri'ihua elietsa lubeel' bee sa'ahua enu nzeli arqui' Jesucristo, uquiete'sa'huane tucu nú unibiya'a luhua nú ri'ihua lubee sa'ahua enu nzeli arqui' Jesucristo lu iliu Galilea. ² Rqui'ña nú cada domingo dete' cada tucuhua lle'na dimi equie bichia riña'hua calutse nú uri'ihua ana tucu xmana, para nú la ri'ihua scua chenu riñalá luhua. ³ Nu chenu riñaa, xe'la bene enu cañihua para nú che za'na dimi cua' eyeche Jerusalén, nu xe'lane cuna tucu carta nú ixíule'e ti neca beella. ⁴ Nu tunu rqui'ña nú nzelaa, che nzelayua beella.

Rri'i Pablo elliebacu' xneca riñalla Corinto

⁵ Rluti dete'xua lu iliu Macedonia chela riña lu eyeche Corinto para nú nzelabi'ya li'ihua. ⁶ Talabese ya'na cuna li'ihua tucu tiambu. Diqui tiambu nú nucuaa, che chu du' inzahua li'á elu riala nza'a. ⁷ La niarquía nú nzelabi'ya li'ihua chiucu chunatsia bichia, sino que niarquía nú xee nzela luhua tunu zela Diose nú acane scua. ⁸ Pero nee rqui'ña nú ria'na eyeche Efeso hasta nú riña eliñi pentecostés. ⁹ Xne ca'a eyeche Efeso nu' beya' yene' bee bene Stichia' Diose nu se'ca nú huaxi bee bene chili arqui' Stichia'

Diose, añinzuca nú huaxi bee bene ree lua equie cuenda' Stichia' Diose.

¹⁰Chenu riña Timoteo luhua uri'ihua nú tsu nze'ca arqui'lla, xne le'ca riña' Diose nú rri'á rri'illa.

¹¹Enze'e nia luhua nú ni'tucuhua la huachuhualla, sino que uri'ihua elietsa lulla, nu udu' inzahualla para nú riñalla elu nzucu'quiealla ca'a sin nú chenu arqui'lla cuna beelá bee sa'ahua enu nzeli arqui' Jesucristo enu nze'tayulla.

¹²Nu chiqui' uzequiaa lu sa'ahua Apolo nú chenulla bee sa'ahua enu nzeli arqui' Jesucristo, pero lá zelalla achalla nee, pero chálla chenu ri'illa ana.

Último saludo

¹³Ucua'a tsiñiahua nu utsuta' arqui'hua lunú nzeli arqui'hua Jesucristo. Uriqui'hua lu xitse nú secahua nu utsuta' arqui'hua. ¹⁴Nu ye nú rri'ihua ñia utsu arqui'hua ri'ihuane.

¹⁵Bee sa'a enu nzeli arqui'ahua Jesucristo, li'ihua nediya'hua nú Estefanas cuna yeebe bene'lla, li'ibeella rlutilá uchili arqui' beella Jesucristo lu iliu Acaya, nu li'ihua nediya'hua nú xneca rri'ibeella elietsa lubee sa'ahua enu nzeli arqui' Jesucristo. ¹⁶Enze'e nia luhua nú uri'i casohua bee bene enu rri'i xi rri'i bee benequie' cuna ye beelá

bee bene enu rri'i xi rri'i beella, nu cuna bee enu rri'i elietsa nú reca riña' Diose.

¹⁷Chiqui' ñia utsu arqui' chenu uriña Estéfanos cuna Fortunato nu Acaico xne tucu nú ñia nzu arqui' lubeella. Le'ca scua ñia nzu arqui' luhua. ¹⁸Li'ibeella udu'beella ana arqui' cuna nú rdu'beella ana arqui'hua, nu bee bene enu rri'i scua ulu'cuhua ula'na lubeella.

¹⁹Yeebe sa'ahua enu nzeli arqui' Jesucristo lu iliu Asia quie', xe'la beella saludo luhua. Nu Aquila nu cuna una'lla Pricila cuna ye beelá bee bene enu nzeli arqui' Jesucristo, bee enu rietesa' ni'beella, xe'la beella saludo luhua lunú neca'ahua bene' Jesucristo. ²⁰Ye bee sa'ahua enu nzeli arqui' Jesucristo xe'la beella saludo luhua. Nu li'á nia luhua xitse hora nú xa'cahua sa'hua, uni'hua Diose lubeella tucu nú rialane.

²¹Li'á Pablo, li'i e'cua rquie'a letra quie' luhua para nú ri'á saludar li'ihua.

²²Tunu nu' bee bene enu la zeca Jesucristo, li'illa rialalla castiya' Diose. Nu Jesucristo la lea' nú nze'tanu.

²³Nu Jesucristo ri'i nú cha nze'ca lu cuenda' yehua. ²⁴Nu lunú tucutse bene' Jesucristo neca'ahua chiqui' se'ca yehua. Amén.

Carta rruccu nú uquie'e San Pablo lubee bene Corinto enu nzeli arqui' Jesucristo

Uxe'la Pablo Saludo

1 Li'á Pablo, Diose ucañi li'á para nú aca apóstol' Jesucristo. Nu li'á cuna sa'ahua Timoteo rquie'eru carta quie' luhua li'ihua bee enu nzelila arqui' Stichia' Diose eyeche Corinto cuna diqui lu iliu Acaya. ²Diose Pa'ahua cuna Jesucristo enu rnibiya' lua'ahua ri'inu nú cha nze'cae lu cuenda' yehua cuna nú nzuxe arqui'hua.

Lunú nehuana ulle'ca Pablo

³Che'tsalá Diose, li'inu enu neca pa' Jesucristo enu rnibiya' lua'ahua, li'inu necanu Diose enu rua'a arqui' lia'ahua nu rdu'nu ana arquia'ahua. ⁴Li'inu rdu'nu ana arquia'ahua chenu nehuana se'ca'ahua para nú le'ca scua aca'ahua dua'ahua ana arqui' bee bene lu xitse nú nehuana seca beella, nu du'ahua ana arqui' beella tucu nú rdu' Diose ana arquia'ahua. ⁵Xne mase nú chiqui' nehuana se'ca'ahua lunú neca'ahua bene' Jesucristo, le'ca scua chiqui' rdu'nu ana arquia'ahua. ⁶Nu tunu nehuana se'caru, nehuana

se'caru para nú ri'iru elietsa luhua nú tsila'ahua nu du'uru ana arqui'hua, nu tunu rdu'nu ana arquia'ahua necane para nú chu'u ana arqui'hua nu acahua riqui'hua sa' nú nehuana se'caru. ⁷Nediya' nze'ca'ru nú xneca secahua, scua tucu nú nehuana secahua tucu nú le'ca nehuana se'caru le'ca scua du' Diose ana arqui'hua tucu nú rdu'nu ana arqui'ru.

⁸Bee sa'a enu nzeli arquia'ahua Jesucristo niarqui'ru nú ri'ihua beya' nú chiqui' nehuana ulle'caru lu iliu Asia. Chiqui' necha ulle'caru enza ze'e nu hasta uri'iru elliebacu' nu la riqui'ru lunú ulle'caru, nu uri'iru elliebacu' nu la chiu'u nehuañiru ze'e. ⁹Nu uri'iru elliebacu' nú unguitaru. Pero ulle'caru scua para nú ellu'cu arqui'ru nú lecaxi aca li'itsiaru ri'iru tunu la ri'i Diose elietsa luru, li'inu enu ri'i nú huañi zeca bee bene lu eluti. ¹⁰Diose utsila'a lia'ahua lu eluti quie' nu nze tsila'alánu lia'ahua lu sa' clasia' dixi' cua'. Lia'ahua nediya'ahua nú scua rri'inu. ¹¹Nu tunu ri'ihua elietsa nacu'hua lu Diose equie cuenda'ru.

Nu tunu huaxi bee bene rnacu' lu Diose equie cuenda'ru, che le'ca scua huaxi bee bene dete' che'tsa lu Diose equie cuenda' elietsa nú rri'inu lua'ahua.

Xinu né chu achaa Pablo Corinto

¹²Chiqui' ñia nzu arqui'ru rniru luhua nu la necha se'caru xne nediya'ru nú nehuañi nze'caru ante luhua, nu le'ca esquie ante lubeelá bee bene, nu neli rri'iru lunú riala ri'iru. Pero la ri'iru scua lunú necatsia elliebacu'ru sino que rri'iru scua cuna elietsa' Diose. ¹³Lubee carta nú uxe'laru luhua lá quie'eru bee bedichia' nú lacahua ulahua nu la ri'ihua beya', nu ala' nú ri'ihua beya' ye nú rnia luhua. ¹⁴Scua tucu nú chabe' chabe' nzeri'ihua beya' chenu riña zeca Jesucristo stucu bese, li'ihua ñiatsu arqui'hua cuna li'iru, nu li'iru ñiatsu arqui'ru cuna li'ihua.

¹⁵Nu lunú nzucu lua nú acane scua, enze'e rluti uri'á elliebacu' nú nzelabi'ya li'ihua para nú ñia tsu arqui'hua nú nzelabi'ya li'ihua chiucu bese. ¹⁶Uri'á elliebacu' nú ayelabi'yaxua li'ihua chenu ubelaa ca'a Macedonia, nu chenu benchila' zeca nú ubelaa Macedonia ayelabi'ya zeca li'ihua stucu bese, nu chela adu' inzahua li'á enza Judea. ¹⁷La ri'ihua elliebacu' nú chenu unia luhua nú nzelabi'ya li'ihua li'á rnia nucua'. La ri'ihua elliebacu' nú rri'itsia tucu nú necha elliebacua nú rnia nú nzela nu la yelaa. ¹⁸Diose nediya' nze'ca' nú li'iru la niru nu ri'iru lunú nediya'ru nú la ri'iru. ¹⁹Xne Jesucristo enu necha Lli'ni Diose, li'inu enu rniru

stichia' luhua, li'á nu Silvano nu Timoteo, nu Jesucristo siempre rninu nú neli necha, nu la ninu nú lia ninu. ²⁰Xne equie cuenda'nu uyalu ye nú ucuaqui u'na Diose lua'ahua. Nu equie cuenda'nu rnia'ahua “Amén” chenu rdete'ahua che'tsa lu Diose. ²¹Nu Diose rri'i elietsa luru cuna luhua para nú tsuta' arquia'ahua lunú necha tucu necatse'ahua cuna Jesucristo, Diose ucañi lia'ahua para nú necha'ahua bee bene'nu. ²²Nu li'inu uliqui'nu Espíritu Santo'nu arquia'ahua xi necha tucu seña nú atia'ahua lunú riala atia'ahua.

²³Pero tunu lasca' yela Corinto tucu nú uri'á elliebacu', Diose nediya' nú lá yela xne la niarquía nú qui'yahua ri'á, nu Diose dete' castiya li'á tunu la neli lunú rnia. ²⁴Li'iru la cua'naru nú nibiya'ru luhua para nú xneca chili arqui'hua Jesucristo, xne li'iru nediya'ru nú neli nzuta' arqui'hua lunú nzeli arqui'hua Jesucristo, sino que rla'naru nú ri'iru elietsa luhua nú ñia nzu arqui'hua huañihua.

2 Enze'e uri'á elliebacu', nu la yelabi'ya li'ihua nee, para nú la ri'á nú nehuana tsu arqui'hua. ²Xne tunu ri'á nú nehuana tsu arqui'hua, che ðleca' ti du' ana arquia, tunu ri'á nú nehuana tsu arqui'hua li'ihua enu rdu' ana arquia? ³Enze'e lu carta nú uxe'lala luhua unia tucu nú unia luhua, para nú chenu nzelabi'ya li'ihua la ri'ihua nú tsu nehuana arquia luhua nú ri'ihua nú ñia tsu arquia. Nu li'á nediya nze'caa nú tunu ñia nzu arquia che yehua ñia nzu arqui'hua. ⁴Chenu uquie'a carta

ze'e luhua chiqui' nehuana ulle'ca nu nzeno arquia hasta nú unguna uquie'a bee bedichia' nú fuerte lu carta ze'e, pero lá quie'a carta ze'e luhua para nú nehuana tsu arquihua sino que para nú ri'ihua beya' nú chiqui' se'ca li'ihua.

Uri'i Pablo perdona bene enu uri'i dula

⁵Tunu nu' bene enu uri'i nú nehuana utsu arquia pero la necane nú li'itsia uri'illa nú nehuana utsu arquia sino que le'ca nuuhua uri'i beella nú nehuana utsu arquihua. ⁶Li'á nia luhua nú castiya nú udete'hua zeca benecua' necalane scuatsia. ⁷Uri'ihua perdonalla nee nu udu'hua ana arquilla para nú la nehuana tsu arquilla xne la llela' arquilla xneca ri'illa. ⁸Enze'e nacua luhua nú lube' zecahua lulla nú chiqui' secahua li'illa. ⁹Carta nú uquie'a luhua hua'tu, uquie'ene para nú ri'á beya' tunu sucu'hua ye nú unia luhua. ¹⁰Nu nee tatse bene enu rri'ihua perdona, le'ca li'á rri'á perdona nze'e, nu bene enu uri'á perdona tunu nu' xi rqui'ña nú ri'a perdona li'illa, rri'á perdona li'illa equie cuenda'hua ante Jesucristo. ¹¹Para nú la ri'i beze'lu ana lua'ahua, xne lia'ahua nediya'la'ahua xneca sequienu beze'lu bee bene.

Uyanu arquí' Pablo chenu uriñalla eyeche Troas

¹²Chenu uriñaa eyeche Troas para nú ixiule'a bedichia' nze'ca' Jesucristo lubee bene, chiqui' uri'i Diose elietsa lua, nu uyu'u modo nú xneca ixiule'a Stichia' Diose lubee

bene. ¹³Pero lá tsu nze'cali arquia equie nú né llelaa sa'ahua Tito eyeche Troas, enze'e unia lubee bene ze'e nu chu nza'a enza eyeche Macedonia.

Jesucristo rri'i elietsa nú rri'i bee bene ana lu yeene

¹⁴Pero che'tsalá Diose nú equie cuenda' Jesucristo ye ye'e rri'inu elietsa luru nú rri'iru ana lu yeene, xne equie cuenda'ru rri'i bee bene beya' stichia'nu, bee bedichia' nze'ca'nu nú neca xi neca tucu cuana' nú ñia rlia nú rri'chia diqui lu iliulabe. ¹⁵Nu equie cuenda' Jesucristo lia'ahua neca'ahua xi neca llene quiendixi nu ñia rlia ante Diose, llene nú rri'ña lubee bene enu tsila'a nu lubee bene enu nenitilu lu Diose. ¹⁶Pero lubee bene enu lachili arquí' Diose lia'ahua neca'ahua xi neca llene nú riñi bee bene, pero para lubee bene enu nzeli arquí' Jesucristo, lia'ahua neca'ahua xi neca llene nú rliqui' elunehuañi' bee bene. Nu lecati aca ri'i bee nucua' tunu la ri'i Diose elietsa lulla. ¹⁷Li'iru la dixiule'ru Stichia' Diose para nú ri'iru ana dimi tucu nú rri'i huaxilá bee bene sino que li'iru rri'iru tucu nú rialane, tucu nú ucañila Diose li'iru nú riala ri'iru. Nu nediya' Diose nú lunú necaru bene' Jesucristo enze'e rixiule'ru stichia'nu.

Inziu cuqui nú riña bee bene lu Diose

3 Chenu rniru scua laza' arquihua nú sucu' ayaru le'catsia li'iru. Li'ihua nediya'hua nú la qui'ña nú lube'ru tucu ichi' luhua para nú ri'ihua beya' tiru,

urre nacu'ru tucu ichi' luhua nú ri'i elietsa nú ri'i bee bene beya' nú tiru, tucu nú rri'i beelá bee bene. ²Xne mismo li'ihua necahua tucu carta para li'iru, carta nú nequie liñi arqui'ru nú rlañi' bee bene nu rri'i beella beya'e. ³Neca xi neca nú li'ihua necahua tucu carta' Jesucristo nú uquie'eru, pero lá quie'erune cuna tinda, sino que cuna Espíritu Santo' Diose enu nehuañi, tucu carta nú la nequie lu tucu quiee xata sino que nequiene liñi arqui' bene.

⁴Lunú rlu'curu confianza lu Diose equie cuenda' Jesucristo, ⁵nu la ri'iru elliebacu' nú nu' nú recaru rri'iru equie cuenda' li'itsiaru xne ye nú rri'iru, rri'irune cuna elietsa' Diose. ⁶Nu li'inu uliqui'nu nú reca'ahua para nú rixiule'ahua lubee bene equie cuenda' inziu nú necuqui, nú riña bee bene lu Diose, tucu inziu cuqui nú la qui'ña chenala bee bene ley nú nequie lu ichi', sino que equie cuenda' Espíritu Santo riña bene lu Diose. Nu ley riñitsiae bee bene, pero Espíritu Santo rliqui' elunehuañi' bee bene.

⁷Nu tunu ley nú riñi bee bene, ley nú udete' Diose lu Moisés lu tucu quiee xata, nu uyu'u nú rulu siqui' lu Moisés chenu uyucu cuendalla ley cua', hasta nú lá aca' alañi' bee bene Israel lulla lunú chiqui' rulu siqui' lulla nu lle'na lle'naa uniti nú rulu lulla. ⁸Xne tunu chenu uriña ley cua' scua unga, nu nee. iMase ñia neca nú yene' bee bene equie inziu cuqui nú rlube' Espíritu Santo lubee bene, nu rlu'cula bee bene nú xa modo riña bee bene

lu Diose! ⁹Xne chenu uyu'u ley nú udete' castiya bee bene, chiqui' ñia uriñae nu rulu siqui' uriñae, nu nee masesca'lá chiqui' ñia neca nú yene' bee bene nú la lu'cua' bee bene dula ante Diose. ¹⁰Xne mase nú chiqui' ñia unga chenu uriña ley' Diose lu iliulabe quie', nu lia xi nucua' luquelá nú chiqui' ñia neca inziu' Diose nú rlu'cula bee bene nú xneca modo riña bee bene lu Diose. ¹¹Nu tunu ley nú la zibi' diqui tiambu chiqui' ñia ube'tae, pero nee masesca'lá chiqui' ñia neca lu cuenda' bedichia' nze'ca' Jesucristo nú rixiule'e nú xneca tsila'a bee bene, bedichia' nze'ca'nu nú leca' xunga laxu.

¹²Nu lia'ahua nediya'ahua nú leca xunga laxu bee bedichia' nzeca cua, enze'e sin nú lliquiru rixiule'eru bee bedichia' cua' lubee bene. ¹³Nu la ri'iru tucu nú uri'i Moisés nú utsacu'lla tucu laquie lulla para nú la lañi' bee bene Israel nú rulu siqui' lulla, nu che lle'naa lle'naa uniti nú rulu lulla. ¹⁴Nu la neca nú lutsia Moisés uyacu' xi uyacu', sino que le'ca uyacu' lunú rri'i bee bene ze'e beya'. Xne hasta bee bichia quie' chenu rula beella Stichia' Diose nú uquie'e Moisés la ri'i beella beya' xi rni, xne tunu chili arqui'beella Jesucristo che ya'la elliebacu' beella nu ri'i beella beya' xi rni. ¹⁵Nu hasta bee bichia quie' chenu rula beella nú uquie'e Moisés, la ri'ili beella beya' xi rni nu nacu' elliebacu' beella. ¹⁶Pero chenu sana' arqui' bene stula bene nu nzeli arqui' bene Jesucristo li'inu xa'lanu elliebacu' beella para nú ri'i beella beya' xi rni stichia'nu.

¹⁷Xne tucutsia neca Jesucristo cuna Espiritu Santo, nu elu nehuañi bee bene cuna Espiritu Santo leca' xi nibiya' lubee bene. ¹⁸Enze'e ye'ahua leca' xi nacu' lua'ahua tucu nú ulle'ca Moisés, xne lia'ahua neca'ahua xi neca tucu huana elu ahee nú ñia neca equie cuenda' Jesucristo. Nu chabea chabea reca'ahua rria'ahua tucu nú niarquí' Jesucristo nú aca'ahua, nu bichia por bichia ahee nú xneca rdu' llie'enu arquia'ahua equie cuenda' Espiritu Santo'nu.

4 Enze'e tucu nú uhua'a arquí' Diose li'iru nú ucañinu li'iru para nú dixiule'eru stichia'nu lubee bene, enze'e la llaca'ru nú rri'iru scua. ²Li'iru la ria'aru lunú netu neca nú a'chi rri'i bee bene. Nu la zequienuru bee bene, nu la che'eru lunú neca Stichia' Diose. Li'iru rnitsiaru Stichia' Diose tucu nú necane. Nu le'ca rri'i bee bene beya' nú neli neca nú rri'iru ante Diose. ³Pero nu' bee bene enu para li'ibeei lecaxi seca bedichia' nze'ca' Jesucristo nú rixiule'eru lubee bene, nu le'ca lecaxi zibi'i para li'ibeei xne la chenala beei inziu' Diose. ⁴Nu beze'lu enu rnibiya' li iliulabe quie' utsacu'la elliebacu' beei, li'ibeei enu la niarquí' chili arquí' Jesucristo, para nú la du'llie'e bedichia' nze'ca'nu arquí'beei nu laca lañi'beei lunú recanu rri'inu, li'inu enu iguale neca cuna Diose. ⁵La dixiule'eru lunú necatsia stichia'ru, li'iru rixiule'eru lunú neca bedichia' nze'ca' Jesucristo lubee bene, li'inu enu rnibiya' lua'ahua. Li'iru nediya'tsiaru nú sibi'ru luhua equie cuenda' nú

se'caru Jesucristo. ⁶Xne le'ca li'i Diose enu unibiya' nú chu'u ellie'e lu iliulabe chenu ureche'nue, le'ca li'inu uxa'lanu elliebacua'ahua para nú ria'ahua beya' xneca neca elu rnibiya'nu, elurnibiya' nú rria'ahua beya' equie cuenda' Jesucristo.

**Xneca nehuañi bee bene
enu nzeli arquí' Diose**

⁷Pero luye nú recaru cuna elurnibiya' nú rlu'curu, rlu'curune añinzuca nú necatsiaru xineca etsuyuu para nú aca ahee nú ye elurnibiya' nze'tae lu Diose nu la ye'ta elu rnibiya'cua' lu cuenda' li'itsiaru. ⁸Nu añinzuca nú ye clasia' dixi se'caru pero la tsu nehuaana arquí'ru, añinzuca nú se'caru nú la llela arquí'ru xa ri'iru, pero chu xela'ru xneca ri'iru. ⁹Añinzuca nú xitse rri'inu bee bene li'iru, pero la tsana' arquí' Diose li'iru. Mase nú richiu bee bene li'iru lu yuu, pero lá atiru. ¹⁰Catse elu nza'aru nehuaana rri'inuu bee bene li'iru, tucu nú nehuaana uri'inuu bee bene Jesucristo. Pero scua rlube'ru nú nehuañi Jesucristo xne lá tsana' arquí'nu li'iru. ¹¹Diqui nú nehuañiru, yebee bichia nzucutsia luru nú uti bee bene li'iru equie nú necaru bene' Jesucristo nu scua rlube'ru lubee bene poder nú rlu'cu Jesucristo nú le'ca rlu'curu, mase nú necatsiaru bene enu ati. ¹²Li'iru nzucutsia luru nú atiru equie nú rixiule'eru stichia' Jesucristo, pero li'ihua rlu'cuhua elnehuañi ante Diose lunú ubene'la'hua stichia'nu. ¹³Lu ichi' Stichia' Diose rni: “Lunú nzeli arquia, enze'e unia lunú unia”, nu nee equie nú le'ca nzeli arquí'ru

Stichia' Diose enze'e rixiule'erune.
¹⁴Xne lia'ahua nediya'ahua
 nú Diose uri'i nú uhuañi zeca
 Jesucristo lu eluti, le'ca li'inu ri'inu
 nú huañi zeca'ahua lu eluti tucu
 nú uri'inu cuna Jesucristo. Che ri'i
 Jesucristo nú junto riña'ahua elu
 nzucu Diose. ¹⁵Xne ye lunú rri'iru
 nu se'caru, se'carune para nú ri'iru
 elietsa luhua para nú dalalá bee
 bene enu chili arqui' Jesucristo.
 Che scua huaxila bee bene enu dete'
 che'tsa lu Diose, nu huaxila bee
 bene enu zucu' aya li'inu.

¹⁶Enze'e la llaca'ru xne mase nú
 ulaxu juersa'ru equie nú rri'iru
 lunú rri'iru, pero espíritu'ru yeye'e
 rdu' Diose juersa'e. ¹⁷Nu liaxi nú
 nehuana se'ca'ahua lu iliulabe
 quie' xne chu rlxue nu equie
 nú nehuana secagua scua che
 atia'ahua eluxene nú liqui' Diose
 lua'ahua liñibe, eluxene nú máse
 seca nu leca' bichia nú laxu. ¹⁸Xne
 lia'ahua la la'na'ahua bee eluxene
 nú nu' lu iliulabe quie' sino que
 lia'ahua rcua'na'ahua beenú la lañi'
 bee bene, xne beenú rlañi' bee
 bene lu iliulabe quie' enta bichia
 nú laxu bee nucua', pero beenú
 la lañia'ahua nee, leca' bichia nú
 laxue.

5 Lia'ahua nediya'ahua nú
 cuerpo nú rlu'cua'ahua lu
 iliulabe quie' neca xi neca tucu ni'i
 nú enta bichia nú laxu lu iliulabe
 quie', pero nediya'ahua nú liñibe
 Diose liqui' lua'ahua stucu cuerpo,
 cuerpo nú lá areche' bene xi
 recache' xitse tucu ni'i nu cuerpo
 ze'e lu'cua'ahua diqui tiambu.
²Enze'e diquila nú rlu'cua'ahua
 cuerpo'ahua lu iliulabe quie' xana

bitsi'ahua, nu niarquia'ahua nú ala'
 nú uriñala bichia nú lu'cua'ahua
 stucu cuerpo nú lu'cua'ahua liñibe.
³Xne la aca'ahua Espíritutsia liñibe
 le'ca lu'cua'ahua stucu cuerpo
 nú liqui' Diose lua'ahua. ⁴Diquila
 nú rlu'cua'ahua cuerpo'ahua
 nú rlu'cua'ahua lu iliulabe quie'
 nehuana se'ca'ahua nu nzenu
 arquia'ahua lunú se'ca'ahua. Nu
 la niru nú niarqui'ru nú ya'naru
 sin cuerpo lunú niarquia'ahua
 nú lu'cua'ahua stucu cuerpo nú
 necuqui neca nú leca xunga laxu,
 nú tucu bichia nitilu, cuerpo nú
 rlu'cua'ahua nú rqui'ña nú nitilu.
⁵Nu Diose ureche' lia'ahua nú
 neca'ahua scua lu cuenda' nú
 uliqui'nu Espíritu Santo'nu lua'ahua,
 xi neca tucu seña lua'ahua nú aca
 tucu nú unilanu lua'ahua nú aca.

⁶Enze'e siempre nzuculua'ahua
 nú aca tucu nú uninu lua'ahua nú
 aca, nu lia'ahua nediya'ahua nú
 diquila nú rlu'cua'ahua cuerpo
 quie' leca modo riña'ahua elu
 nzucu Jesucristo liñibe. ⁷Pero
 li'iru nzenalaru li'inu xne nzeli
 arqui'ru li'inu nu la necane equie
 cuenda' nú rlañi'ru li'inu. ⁸Enze'e
 nzucu lua'ahua nú acane scua,
 nu niarquia'ahua nú ala' chu
 za'na'ahua cuerpo nú rlu'cua'ahua
 lu iliulabe quie' para nú nza'ahua
 huaña'ahua cuna Jesucristo.
⁹Enze'e lecaxi ri'i tunu nehuañiru
 lu iliulabe quie' urre liñibe, pero
 lunú niarqui'ru neca nú ri'iru lunú
 niarqui' Jesucristo. ¹⁰Xne ye'ahua
 rqui'ña nú riña'ahua lu Jesucristo
 liñibe elu hualunue lu cuenda'ahua
 para nú cada tucua'ahua atia'ahua
 lunú riala atia'ahua, equie nú uri'i

nze'ca'ahua urre equie nú necha uria'ahua lu iliulabequie'.

**Bedichia' nú rri'i nú nzuxe
arqui' Diose lubee bene**

¹¹Enze'e lunú rlu'curu ula'na lu Jesucristo, rqui'ña nú rcua'naru nú xneca chili arqui' bee bene stichia'nu. Nu nu'lu Diose nú ti necanu, nu ala' nú le'ca nuuhua chuluhua nú ti necanu. ¹²La cua'naru nú sucu' ayaru le'catsia li'iru tucu nú rri'i bee bene elliebacu' nú rri'iru, sino que lunú niarqui'ru nú ñiatsu arqui'hua nu ri'ihua beya' lunú neli neca lunú rri'iru, para nú acahua cuaquihua lubee bene enu máse rri'i caso nú xneca ya'na nze'ca beei lubeelá bee bene luhuare nú ri'i beei elliebacu' nú xneca nehuañi beei ante Diose. ¹³Nu nee tunu para bee bene ichia lucu se'caru lunú rri'iru pero rri'irune lu cuenda' Diose. Nu tunu rri'inze'caru elliebacu' necane para nú ri'iru elietsa luhua. ¹⁴Equie nú se'caru Jesucristo enze'e rri'iru lunú rri'iru, xne li'iru nediya'ru nú ungutí Jesucristo equie cuenda' ye bee bene, nu ye bee bene la qui'ña' nú huañi lu dula. ¹⁵Nu Jesucristo ungutí equie cuenda' stula ye bee bene, para nú ye bee bene enu nehuañi nee la huañi beella tucu nú necatsia elliebacu' beella, sino que nehuañitsia beella tucu nú niarqui' Jesucristo nú huañi beella, li'inu enu ungutí equie cuenda' bee bene nu uhuañi zecanu stucu bese. ¹⁶Enze'e tunu hua'tu uria'ahua elliebacu' nú Jesucristo necatsianu tucu bene lu iliulabe, pero nee la ria'ahua elliebacu' scua

lu cuenda'nu. Nu le'ca la ria'ahua caso nú xneca neca bee bene nu ti neca bee bene, ¹⁷xne titse bee bene enu neca tucu necatsela cuna Jesucristo, li'illa necalla xi neca tucu bene cuqui, ye nú ungalla hua'tu udetelane nu nee necalalla xi neca tucu bene cuqui.

¹⁸Pero ye nucua' necane lu cuenda' elietsa' Diose, nu Diose uri'i nú equie cuenda' Jesucristo nellua'a nze'ca'ahua cuna Diose, nu li'inu ucañinu lia'ahua para nú dixiule'ahua lubee bene nú xneca modo cua'a nze'ca bee bene cuna li'inu. ¹⁹Nu ye nú uri'i Jesucristo nucua' uri'i nú nzu nze'ca arqui' Diose lubee bene nu lá du' cuendanu stula beella nu Diose ucañi lia'ahua para nú dixiule'ahua lubee bene nú xneca cua'a nze'ca bee bene cuna li'inu. ²⁰Enze'e li'iru necaru bee bene enu rni equie cuenda' Jesucristo luhua, nu neca xi neca nú li'i e'cunu necanu enu rni luhua. Nu equie cuenda' Jesucristo rnacu'ru luhua nú cua'a nze'cahua cuna Diose. ²¹Xne Jesucristo lá ri'ilinu dula, pero equie cuenda' stula'ahua uzela Diose nú ungutí Jesucristo xi neca tucu bene enu rlu'cu dula nu equie cuenda' nucua' rlu'cu cuenda Diose lia'ahua xi neca tucu bene enu la lu'cu dula.

6 Enze'e scua tucu nú rri'iru riña' Diose, nacu'ru luhua nú la tsana' arqui'hua lunú neca nze'ca uri'i Diose luhua, xne tunu sana' arqui'huane lecaxi zibi'i para li'ihua che. ²Xne lu ichi' Stichia' Diose nequie:

Chenu uriña bichia nú uri'i casua li'ilu, uri'i casua li'ilu;

nu chenu uriña bichia nú
tsila'alu utsila'alu.

Nu li'iru rniru luhua nú nee uriñala
bichia ze'e para li'ihua, uriñala
bichia nú tsila'a Diose li'ihua.

³Li'iru la ri'iru nú necha necha
nú caa nú la chili arqui' bee bene
Jesucristo, nu lecaxi nú necha necha
rri'iru para nú la nibee bene nú
li'iru la ri'iru tucu nú sete'ru bee
bene. ⁴Sino que ye lunú rri'iru,
rri'irune para nú lube'ru lubee bene
nú sibi'ru lu Diose nu rriqui'ru lunú
se'caru sia nú nehuana se'caru,
lunú xi se'cala'cha'ru, nu nehuana
nzu arqui'ru, ⁵nu riñi bee bene
li'iru. Nu udu' bee bene li'iru ni'cu',
nu uricuyaa bee bene equieru, nu
ullaca'ru equie riña' nú rri'iru nu
ungucha xcala'ru, nu ulia'na'ru.

⁶Nu le'ca ulube'ru lubee bene nú
sibi'ru lu Diose equie nú nehuañiru
tucu nú necane, equie nú nediya'ru
tanú neli necha, nu equie nú rlu'cu
arqui'ru nu rri'i nze'caru lubee bene,
equie nú nzu Espíritu Santo cuna
li'iru, nu equie nú se'caru bee bene,
⁷equie nú rniru nú neli necha, equie
nú rri'i Diose elietsa luru, equie nú
rniru bezete' lubee bene, nu equie
nú recanu'ru li'iru cuna Stichia'
Diose. ⁸Nu' chenu rlu'cu bee bene
ula'na luru nu le'ca nu' chenu riqui
chi'qui' bee bene li'iru. Nu le'ca nu'
chenu rni beella bedichia' nze'ca lu
cuenda'ru, nu le'ca nu' chenu se'ta
beella li'iru. Nu nu' chenu la chili
arqui' beella nú rniru, añinzuca
nú rniru nú neli necha. ⁹Nu' chenu
rri'ibeei luru xi necha nú la chulu
bee li'iru, añinzuca nú nu'lubeei
li'iru. Nu le'ca seca beei nú nze
atilaru, pero lasca' atiru, pero

añinzuca nú uzete'che'bee li'iru
pero lá utibeei li'iru. ¹⁰Añinzuca
nú nehuana se'caru, pero rlube'ru
nú ñia nzu arqui'ru, añinzuca nú
se'caru elitsi pero por li'iru huaxi
bee bene necha xene ante Diose, nu
mase nú lecali xi rlu'curu lu iliulabe
quie', pero lecaxi ri'i falta li'iru.

¹¹Bee sa'a enu nzeli arquia'ahua
Jesucristo eyeche corintios, unilaru
ye nú uniru luhua nu lecaxi utsacu'
arqui'ru luhua equie nú chiqui'
se'caru li'ihua. ¹²Li'iru se'caru
li'ihua, pero li'ihua lle'natsia
secahua li'iru. ¹³Pero li'á nia luhua
xi rni tucu uzana lubee lli'ñilla:
Uzecahua li'iru tucu nú se'caru
li'ihua.

Lia'ahua necha'ahua Indu' Diose

¹⁴La aca tucunecatsehua cuna
bee bene enu la chili arqui' Diose,
xne la necha elliebacu' bee bene enu
nzenala inziu' Diose tucu nú necha
elliebacu' bee bene enu la chenala
inziu' Diose. Xne leca modo yete'
ellie'e cuna nú necabe. ¹⁵Li'ihua
nediya'hua nu la necha tucunecatse
Jesucristo cuna beze'lu, nu le'ca
scua leca modo aca tucu necatse
bee bene enu nzeli arqui' Jesucristo
cuna bee bene enu la chili arqui'
Jesucristo. ¹⁶Urene necha bee bene
enu nzeli arqui' Diose Pa liñibe
luquela bee bene enu nzeli arqui'
bee enu laca diose, xne lia'ahua
enu nzeli arqui' Diose enu nehuañi,
lia'ahua necha'ahua indu'nu, scua
tucu nú nequie tucu parte lu ichi'
stichia'nu elu rni:

Li'á huañia cuna li'ibeella nu
tsua cuna li'ibeella catse elu
nucua'a beella.

Li'á aca Diose' beella,
nu li'ibeella aca beella bee
benea.

¹⁷Nu le'ca rni lu ichi' Stichia' Diose:
La ri'ihua beenú necha neca rri'i
bee bene,
uchiu'u chuhua lubee nucua'.
La ri'ihua beenú necha neca.
Para nú yucua'a li'ihua,

¹⁸Nu che acaa Pa'hua,
nu li'ihua acahua bee lliana'a nu
xinchiu'cua,
scua rni Pa'ahua Diose, li'inu
enu rlu'cu ye poder.

7 Bee sa'a enu nzeli arquia'ahua
Jesucristo bee nucua' necha
nú ucuaqui u'nala Diose lua'ahua,
enze'e riala nú huañia'ahua sin
nú ria'ahua dula nu la ria'ahua
elliebacu' nú necha necha cuna
beela beenu la zibi' nu yebichia
la'na'ahua nú huañia'ahua tucu nú
niarqui' Diose equie nú rlu'cua'ahua
ula'na lunu.

**Ñia nzu arqui' Pablo equie
cuenda' bee bene Corinto**

²iUzecahua li'iru! Li'iru lecaxi nú
necha necha uri'inuru ni'tucuhua
nu lecaxi uzequienuru li'ihua. ³La
ri'ihua elliebacu' nú rquiexuru
li'ihua, xne scua tucu nú unila
luhua hasta hua'tu nú se'caru
li'ihua, mase nú ungutiru urre
nehuañiru tucutse necha'ahua. ⁴La
nzu chiucu arquia luhua chiqui'
ñia nzu arquia luhua. Añinzuca nú
nehuana se'caru, pero scua tucu nú
rdu'hua ana arqui'ru chiqui' ñia nzu
arqui'ru luhua lecaxi ri'i tunu nu' xi
se'caru.

⁵Xne desde chenu uriñaru enza
lu iliu Macedonia lá tselachiliru

equie nú nehuana se'caru catse elu
nza'aru lunú rlee bee bene luru nu
xiquiru. ⁶Pero Diose enu rdu' ana
arqui' bene enu nehuana nzu arqui',
li'inu udu'nu ana arqui'ru chenu
uriña Tito luru ca'a, ⁷nu la necane
equie cuenda' nú uriñatsialla
ca'a sino que necane nú ñia nzu
arqui'lla equie cuenda' li'ihua.
Li'illa unilla luru nú chiqui' nu'
ana arqui'lla lañi'lla li'á, nu le'ca
nzeno arqui'hua equie cuendaa
nu nehuana secagua lu cuendaa,
nu nucua' rri'i nú máse ñia nzu
arquia nú rri'ihua elliebacu' scua lu
cuendaa.

⁸Li'á nediyaa nú nehuana utsu
arqui'hua equie cuenda' carta nú
uxe'la luhua, pero li'á la nehuana
nzu arquia equie cuenda' carta
cua'. Añinzuca nú chiqui' nehuana
utsu arquia chenu uxe'la carta ze'e
luhua xne nediyaa nú nehuana utsu
arqui'hua chiucu chuna bichia, ⁹nu
nee ñia nzu arquia, pero la necane
equie cuenda' nú nehuana nzu
arqui'hua uri'á sino que necane
equie cuenda' nú nehuana nzu
arqui'hua uche'e arqui'hua lunú
nehuañihua. Li'ihua nehuana utsu
arqui'hua tucu nú niarqui' Diose, nu
lecaxi nú necha necha uri'iru luhua.
¹⁰Xne chenu nehuana seca bee bene
tucu nú niarqui' Diose, nu equie nú
nehuana secalla scua, nucua' rri'i
elietsa lulla para nú che'e arqui'lla
lu stulalla nu scua tsila'alla, nu leca'
bichia nú nilla xiquie nú utsila'a,
pero equie nú nehuana seca bee
bene nu la che'e arqui'lla lu Diose,
nucua' ri'i nú nitilulla.

¹¹Ubi'yacuruhua lunú uri'i elliana
nú ulle'cahua tucu nú niarqui'

Diose nú zecahua, equie cuenda' elliana cua' chu utsuxcua'ahua diixi nú unia luhua nu unganu'hua li'á nu ulehua lulla nu ulliquihua lunú rri'illa. Nu li'ihua niarquihua nú ala' nzulá cuna li'ihua, nu le'ca udete'hua castiya li'illa tucu nú rialane, luye nú uri'ihua, scua rlube' nú la lu'cuhua culpa equie cuenda' nú uri'illa. ¹²Carta nú uquie'a luhua, lá quie'ene equie nú rri'itsia elliebacu' lu cuenda' bene enu uri'i dula, urre equie cuenda' bene enu nehuana seca, urre equie cuenda' stula bene ze'e. Li'á uquie'a carta ze'e luhua para nú le'ca li'ihua ri'ihua beya' nú rlube'hua lu Diosé nú nchiucu' arqui'hua li'iru. ¹³Nucua' rri'i nú ñia nzu arqui'ru, nu máse ñia utsu arqui'ru chenu ulañi'ru nú ñia nzu arqui' Tito uriña, equie nú uri'ihua nú ñia nzu arqui'lla. ¹⁴Li'á unila lu Tito nú ñia nzu arquia, equie cuenda'hua, nu né uya'na netua equie cuenda'hua lu Tito. Xne ye nú unia equie cuenda'hua neli necane. Nu li'ihua nediya'hua nú siempre rniru nú neli neca, nu neli neca nú uniru equie cuenda'hua lu Tito. ¹⁵Nu máse secalla li'ihua chenu rellu'cu' arqui'lla nú xneca uzucu'hua nú rnilla nu lu cuenda' nú chiqui' ulu'cuhua ula'na lulla chenu nzulla cuna li'ihua. ¹⁶Li'á chiqui' ñia nzu arquia xne nediya nze'caa nú ye nú rnia luhua rri'ihuane.

U'na para bee bene' Diosé

8 Nee bee sa'a enu nzeli arquia'ahua Jesucristo niarqu'i'ru nú ri'ihua beya' nú xneca uri'i Diosé elietsa lubee

bene enu nzeli arqui' Jesucristo lu iliu Macedonia, ²mase nú huaxi nú seca beella, pero chiqui' ñia nzu arqui'beella. Nu añinzuca nú chiqui' seca beella elitsi, pero diquinu' arqui' beella udete' beella melu para nú ri'i beella elietsa lubee bene. ³Li'á nediya nze'caa nú neli uri'i beella elietsa hasta elu uriqui'tsiae. Li'ibeella máse uri'i beella elietsa lunú uza' arquia'ahua, nu lecati uri'i fuerza li'ibeella. ⁴Chiqui' uzequiee beella luru nú zelaru nu le'ca dete'beella u'na para bee sa'ahua enu nzeli arqui' Jesucristo ⁵Nu másela uri'i beella elietsa lunú uri'iru elliebacu', scua necane xne neli udete' cuenda beella li'ibeella lu Diosé, nucua' neca nú rluti uri'ibeella. Nu nee nucua'alabeella para nú ri'ibeella lunú niru lubeella nú ri'ibeella, tucu nú niarqu'i' Diosé. ⁶Enze'e uzequieru lu Tito nú la'xulla riña'nze'ca nú rri'illa nú rquiete'sa'lla elietsa, elietsa nú rquiete'sa'lla hasta hua'tu letahua. ⁷Li'iru nediya'ru nú ye lunú rri'ihua rri'i nze'cahuane nu neli nzeli arqui'hua Jesucristo, nu nediya'hua equie cuenda'nu, lecaxi rri'i falta li'ihua para nú ixiule'ehua stichia'nu, nucua'a tsiñialahua para nú ri'ihua lunú riala ri'ihua, nu secahua li'iru. Nu nee la'nahua nú lube'hua nú nze'cahua para nú ri'ihua elietsa tucu nú rniru luhua.

⁸La nibiya'a luhua nú alafuerza dete'hua xi dete'hua sino que, rnitsia luhua nú xneca ñia nzu arqui' beela bee bene enú rri'i elietsa. Tunu niarquihua nú le'ca lube'hua nú neli secahua bee sa'hua.

Rqui'ña nú ri'ihua scua. ⁹Xne li'ihua nediya'hua nú chiqui' ñia nze'ca Jesucristo lua'ahua. Li'inu utsa'nanu ye eluxene'nu liñibe nu ube'tanu lu iliulabe xi neca tucu bene enu lecali xi lu'cu, para nú equie cuenda'nu le'ca ati'hua eluxene nú rlu'cu Diose liñibe.

¹⁰Enze'e nia luhua nú neca nze'ca nú la'xuhua nú rquiete'sa'hua elietsa cua' nú uquixiehua rri'ihua desde teliana. Rlutihua uquixiehua rri'ihua elliebacu' nú ri'ihua scua, nu che chu uquixiehua nú uri'ihua scua.

¹¹Nu tucu nú ñia nzu arqui'hua chenu uquixiehua, rdete'hua elietsa cua' le'ca scua ñia tsu arqui'hua nú ri'ihua scua hasta elu riqui'tsiae.

¹²Xne chenu neli niarquí' tucu bene nú ri'illa elietsa, lecaxi ri'i tunu calu rdete'lla, nu la yala nú dete'lla elietsa hasta lunú la lu'culla.

¹³Lania luhua nú ti'quihua arqui'hua nú ri'ihua elietsa hasta lunú la lu'cuhua para nú ri'ihua elietsa lubee bene enu nu' xi secala'cha'. Para nú lecaxi ri'i falta li'ibeella, sinoque lunú niarquí'ru necane nú ye'ahua ria'ahua elietsa lu sa'ahua. ¹⁴Nee li'ihua nu' beya' ri'ihua elietsa lubee bene enu nu' xi secala'cha', nu che enta bichia nú le'ca ri'i beella elietsa luhua lunú xi secala'cha'hua, nu scua ria'ahua elietsa lu sa'ahua. ¹⁵Lu ichi' Stichia' Diose rni: “Bene enu uquiete'sa' huaxilá nú uquiete'sa' la zucu sobrae, nu bene enu uquiete'sa' lle'natsia nú uquiete'sa' la ri'i faltae.”

Cha Tito Corinto

¹⁶Che'tsalá Diose nú udete'nu elliebacu' lu Tito nú nzenu arqui'lla

lu cuenda'hua tucu nú le'ca nzenu arquia equie cuenda'hua. ¹⁷Nu chenu uniru lulla nú nze'tabi'yalla li'ihua, chu uzelalla xne nu' ana arqui'lla nú nze'tabi'yalla li'ihua, nu lá qui'ña nú aniru lulla nú aye'ta bi'yalla li'ihua. ¹⁸Nu cuna Tito xe'laru stucu sa'ahua enu le'ca nzeli arqui' Jesucristo, enu nu'lula bee sa'ahua ye bee luhuare, equie nú chiqui' ñia sete'lla bedichia' nze'ca' Jesucristo. ¹⁹Nu bee sa'ahua enu nzeli arqui' Jesucristo le'ca ula'na li'illa para nú chenurulla che za'naru elietsa nú rquiete'sa'ru. Nu elietsa nú rquiete'sa'ru nucua' rlube' nú nu' ana arquia'ahua ria'ahua elietsa lu beela bee sa'ahua. Nu equie cuenda' elietsa cua' ni nze'ca beella lu cuenda' Jesucristo. ²⁰Enze'e ullela benequie' nú chenurulla para nú lecati niquiya equie cuenda' ye elietsa quie' nú nu'che'ru para nú cheza'naru. ²¹Xne li'iru niarquí'ru ri'iru ye tucu nú necane, nu la neca nú lubee benetsia rri'iru tucu nú necane sino que le'ca nuu ante Jesucristo.

²²Nu nee cuna Tito nu benequie' xe'laru stucu bene enu ulube'laru luhua. ²³Tunu nu' bene enu nedichia' equie cuenda' Tito luhua uni'hua lu nze'e nú neca Tito bene enu rri'eli elietsa lua, para nú ri'á elietsa luhua, nú chenalhua inziu' Diose. Nu xiucu sa'ahua enu nzeli arquia'ahua Jesucristo enu nza cuna Tito, bee sa'ahua enu nzeli arqui' Jesucristo uxe'la li'ibeella, nu li'ibeella sí nza nze'ca beella inziu' Jesucristo. ²⁴Nee lube'hua lubeella nú neli sechua bee sa'ahua, para nú lu cuenda' beella ri'i beelá bee

bene enu nzeli arqui' Jesucristo beya' nú xa necahua nu para nú le'ca lañi' beella nú neli nú unia lubeella equie cuenda'hua.

U'na para bee bene' Diose

9 Nu nee equie cuenda' u'na nú rqui'ña nú dete'hua para nú ri'ihua elietsa lubee sa'ahua enu nzeli arqui' Jesucristo, la qui'ña nú nila nucua' luhua stucu bese. ²Xne li'á nediyaá nú chiqui' riu' arqui'hua ri'ihua elietsa. Nu hasta nú chiqui' ñia nzu arquia unia lubee bene Macedonia nú li'ihua bee bene acaya desde teliana niarqui'hua ri'ihua elietsa, nu casi ye bee bene lu iliu Macedonia uniarqui' beella nú le'ca ri'ibeella elietsa chenu ubene' beella nucua'. ³Enze'e uxe'laa Tito cuna xiucu bee sa'ahua para nú aca ahee nú neli nú unia equie cuenda'hua lu cuenda' elietsa ze'e, para nú nucua'a tsiñiahua nú ri'ihua elietsa, tucu nú unila lubeella nú rri'ihua. ⁴Xne tunu nzelayua chiucu chuna bee bene Macedonia nu canú lluna'ru li'ihua nú lasca' quiete'sa'hua u'na cua' nu che acane diatu para li'á nu para li'ihua, equie confianza nú rlu'cua cuna li'ihua. ⁵Enze'e uri'á elliebacu' nú unia lu Tito cuna lu xiucu bee sa'ahua nú máse neca nze'ca nú ricolu beella ye'tabi'ya beella li'ihua, para nú ri'ibeella elietsa luhua nú la'xuhua quiete'sa'hua elietsa nú unilá luhua para nú neca listulane chenu riñaa. Nu scua aca ahee nú neli niarqui'hua ri'ihua elietsa, nu la necane nú sucu' quiyaru li'ihua nú ri'ihua scua.

⁶Li'á nia luhua nú bene enu rdu' lle'natsia nii le'ca esquie lle'natsia

ula'cu riuquilla nu bene enu rdu' huaxi nii le'ca esquie huaxi ula'cu riuquilla. ⁷Cada tucuhua ude'tehua elietsa nú rri'ihua elliebacu' nú dete'hua, la dete'huane ala fuerza tunu la niarqui'hua nú dete'huane, xne Diose riu' arqui' bene enu ñia nzu arqui' rdete' xi rdete'.

⁸Nu Diose rlu'cu yee poder para nú ri'inu elietsa luhua para nú lu'cuhua yee lunú seca la'cha'hua para nú lecaxi zeca la'cha'hua nu para nú nu' modo ri'ihua elietsa lu yeene chenu riala ri'ihuane. ⁹Lu ichi' Stichia' Diose rni:

Bene nze'ca, rri'i elietsa lubee bene enu nu' xi seca la'cha', nu leca xunga zañi' beella lunú rri'i nze'ca bene ze'e.

¹⁰Nu Diose enu rliqui' ebichi nú rdu'nii bee bene, li'inu ri'inu elietsa luhua nú xneca ri'ihua para nú lu'cuhua ye lunú seca la'cha'hua, para nú nu' beya' ri'iláhua elietsa lubee bene enu nu' xi secala'cha'. ¹¹Che scua lu'culáhua ye clasia' eluxene nú liqui' Diose luhua para nú nzeri'iláhua elietsa lubee bene. Nu equie cuenda' elietsa nú liqui'hua nú uya'ru lubee sa'ahua enu nzeli arqui' Jesucristo, li'ibeella dete' beella che'tsa lu Diose equie cuenda' nucua'. ¹²Elietsa cua' la zibi'tsiae lubeella lunú xi rqui'ña beella sino que zibi'i lubeella para nú máse dete'lá beella che'tsa lu Diose. ¹³Equie cuenda' elietsa cua' ri'i beella beya' nú neli sucu'hua nú rni stichia' Jesucristo tucu nú nzeli arqui'huanu nu nihua bedichia' nze'ca lu Diose equie cuenda' nucua', nu lunú chiqui' nze'cahua ri'ihua elietsa lubeella

cuna lubeelá bee bene enu seca elitsi. ¹⁴Nu le'ca nacu'beella lu Diose equie cuenda'hua, nu zeca beella li'ihua equie elliebacu' nze'ca nú uliqui' Diose luhua nú rri'ihua elietsa. ¹⁵iChe'tsala Diose equie nú lia uliqui'nu lua'ahua hasta la llela'ahua xi nia'ahua equie cuenda' nucua'!

Elurnibiya' nú rlu'cu Pablo

10 Li'á Pablo, nia luhua nú nu' bee bene enu rni nú necaa tucu bene enu chiqui' nze'ca chenu nzua cuna li'ihua nu chenu nzucua'a istu la lliquia rqui'ya'hua rri'a. Pero le'ca scua tucu nú uni Jesucristo luhua bedichia' nú ñiá neca cuna bedichia' nze'ca nacua luhua nú chenu, ²nzelabi'ya li'ihua ala' nú la qui'ña nú qui'ya' chiucu chunahua ri'á, bee enu rni nú rri'iru lunú xelatsia arqui'ru xne la lliquia nia lubeella. ³Neli nú neca'ahua bene iliulabe pero la la'naru nú ri'iru ana equie cuenda' nú xelatsia arqui'ru tucu nú rri'i bee bene enu la chulu Stichia' Diose. ⁴Nu lia'ahua la la'na'ahua nú ria'ahua ana bee bene lunú necatsia elliebacua'ahua, lia'ahua rria'ahua ana bee bene lunú reca poder' Diose rri'i, poder' nú reca rnitilu ye beenú necha neca. ⁵Nu cuna poder' cua' ria'ahua ana luye nú xi rricu' quiya bee bene lia'ahua nu rria'ahua ana lu elullíña nú rlu'cu bee bene nú rca nú chulu beella Diose. Che scua rnitilua'ahua ye clasia' bee elliebacu' bee bene nú necha neca para nú scua zucu' beella stichia' Jesucristo. ⁶Nu nellua'aru para nú niru lubee bene enu rri'i falta nú

zucu' stichia' Jesucristo, chenu yelahua uzucu'hua stichia'nu. ⁷Li'ihua máse rri'ihua caso nú xneca rri'i bee bene. Tunu nu' bee bene enu rri'i elliebacu' nú neli necalla bene' Jesucristo, rqui'ña nú lu'cu cuendalla nú iguale neca'ahua bene' Jesucristo. ⁸Nu mase nú rnilaa luhua equie cuenda' elurnibiya' nú uliqui' Diose lua, la tua xne li'inu uliqui'nu elurnibiya'cua' lua para nú ri'á elietsa luhua, nú chenalahua stichia'nu nu lacane para nú ri'a nú nitiluhua.

⁹La ri'ihua elliebacu' nú niarquitsia chiquia arqui'hua cuna bee cartaa. ¹⁰Xne nu' bee enu rni nú chiqui' fuerte nu sin nú lliquia rnia luhua lubee carta nú uxe'la luhua, nu chenu nzua cuna li'ihua ni' la tsua xi su enu neca equie luhua, nu ni' nú niaa laca. ¹¹Pero li'á nia luhua nú bee enu rni scua rqui'ña nú ri'i bee nze'e beya', nú tucu nú rniru luhua lubee carta'ru chenu nellua'aru istu, le'ca scua nu' beya' nú niru luhua chenu nellua'aru cuna li'ihua.

¹²Xne li'iru la ri'iru tucu nú rri'i bee enu sucu' aya le'catsia li'i. Nu ni'teme' la ri'iru elliebacu' nú ri'iru scua. Xne leca' elliebacu' bee enu sucu' aya le'catsia li'i, nu ri'yatsia beei nú xa necabeei ante lu beelá bee sa'beei.

¹³Pero li'iru la zucu' ayaru li'iru másela lunú riala acane, xne li'iru rnitsiaru lunú neli neca tucu nú unibiya'la Diose nú ri'iru, nu li'inu uzelanu nú uriñaru corinto elu uyuluru li'ihua. ¹⁴Enze'e la ri'ihua elliebacu' nu rdete' xe'taru lunú

rnibiya'ru luhua, xi neca tucu bene enu lasca'li cha lachihua xne rluutiláru uriñaru lachihua para nú zete'ru li'ihua bedichia' nze'ca' Jesucristo. ¹⁵Nu li'iru la zucu' ayaru li'iru equie cuenda' riña' nú uri'i stucu bene. Pero li'iru nzuculuru nú másela nze chili arqui'hua, para nú nze ri'iláru elietsa'hua nú nze chululáhua lunú riala ri'ihua beya', tucu nú riala ri'iru. ¹⁶Che scua nu' modo nú nza'aláru lubeé lá bee bene enza lulá lachihua para nú le'ca dixiule'eru bedichia' nze'ca' Jesucristo lubeella. Pero bee luhuare elu lecasca' ti quixie ixiule'e Stichia' Diose para nú la aca nelliñiaru equie riña' nú uri'i stucu bene. ¹⁷Tunu nu' bene enu niarqui' zucu' aya le'catsia li'i, nzalá nú zucu' ayalla Diose Pa liñibe. ¹⁸Xne la neca nze'ca nú zucu' aya bene le'catsia li'illa, sinoque máse neca nze'ca nú Diose zucu' aya bene.

Pablo neli neca tucu apóstol

11 Ala' nú riqui'hua chiucu chuna bee bedichia' tundu nú nia luhua, pero li'á nia nú uriqui'hua. ²Xne se'ca li'ihua tucu nú seca Diose li'ihua. Tucu nú rri'i tucu pa enu rriucu xinchiu'cu enu nzula nú chiaa enu lasca'li na'tse niyu para nú dete'cuendalla li'inchu lu niyu enu chianchu. Scua niarquía nú detecuendaa li'ihua lu Jesucristo nú la lu'cuhua dula. ³Pero xiquia nú canu ti zequienu li'ihua tucu nú uzequienu be'la Eva cuna nú netsiñiaí, nu chequie la ellu'cua' arqui'hua Jesucristo diquinu' arqui'hua. ⁴Xne chenu nze'ta ni' stucu bene stichia' Jesucristo

luhua, pero urene sete'beeí lunú sete'ru li'ihua, urre chenu le'ca nze'ta ni' stucu bene equie cuenda' stucu espíritu luhua, pero lacane tucu nú neca Espíritu Santo nú nzu cuna li'ihua, urre chenu nze'ta ni' stucu bene nú xneca tsila'ahua, pero urene rnibeeí tucu nú unilaru luhua, nu li'ihua chu rri'i casuhua li'ibeeí. ⁵Li'á se'ca nú lecaxi rri'i falta elliebacua ante lubee bene bee enu nzenala stichia' bee enu rni nú li'ibeeí neca beeí mero apóstol. ⁶Xne mase nú la zibia'a para nú nia, pero la ri'i falta nú reca elliebacua para nú zetea Stichia' Diose, nu li'ihua nediya'hua nú neli nucua' xne ulañi'la'hua ye lunú uri'iru.

⁷Pero ñleca resuna tunu la neca nze'ca nú uri'á chenu udixiule'a Stichia' Diose luhua nu lecaxi uri'á cubre luhua?, nu unga lle'na arquía para nú uri'á ana nú unghua bene' Jesucristo. ⁸Nu texcua'a bee bene enu nzeli arqui' Jesucristo uliqui' melu qui'ña para nú huañia, diquila nú seteahua Stichia' Diose. ⁹Nu chenu utsua cuna li'ihua, chenu nu' xi uze'ca la'cha'a, lá nacua luhua nú ari'ihua elietsa lua, bee bene enu nzeli arqui' Jesucristo enu nze'ta enza Macedonia li'ibeella ube'tayuu beella lunú xi rqui'ña bichia ze'e. Leca xunga unacua luhua nú xi rqui'ña nú liqui'hua lle'na nú liqui'hua lua, nu leca xunga nacua luhua nú rqui'ña nú ri'ihua elietsa lua. ¹⁰Nu como bene' Jesucristo nú necaa rnia nú neli neca luhua, nu ni'tucu bee bene enza lu iliu Acaya leca modo caá nú ñia utsu arquía unia lunú uri'á por li'ihua. ¹¹Nu ñxiquie nú uri'á scua luhua che?

¿Xie' necane nu la zecaa li'ihua la?
Pero Diose nediya' nú chiqui' se'caa
li'ihua.

¹²Nu nze ri'ilá lunú rri'á hasta nee,
nu la nacua luhua nú ri'ihua elietsa
lua, para nú bee enu nelliña rni nú
neca apóstol la nibeei nú rri'ibeei
iguale tucu nú rri'iru. ¹³Xne
li'ibeei lia rnibeei nú neca beei
apóstol, sequienutsia beei bee bene
nú rnibeei nú neca beei apóstol'
Jesucristo. ¹⁴Pero la zeca lulliea'
bee bene nucua', xne hasta mismo
beze'lu reca rlube' lubee bene xi
neca tucu ángel Diose. ¹⁵Enze'e
ni' la zeca lulliea' bee bene nú bee
bene' beze'lu rri'i beei xi rri'i bee
bene enu sucu' nú niarqui' Diose.
Pero li'ibeei riala zeca beei castiya
nú riala zeca beei equie nú rri'ibeei
scua.

**Nehuana seca Pablo equie
nú necalla apóstol**

¹⁶Nee ni zeca luhua stucu bese:
La ri'ihua elliebacu' nú chiqui'
netundua pero tunu scua rri'ihua
elliebacu' uzelahua nú nia luhua xi
neca tucu bene enu netundu para
nú le'ca zucu ayaa li'á masia lle'na.
¹⁷La ni Diose nú zucu ayaa li'á, pero
sucu ayaa li'á xi neca tucu bene enu
netundu. ¹⁸Scua tucu nú nucua'a
huaxi bee bene enu sucu' aya
le'catsia li'i lunú rri'illa lu iliulabe
quie', le'ca scua zucu ayaa li'á. ¹⁹Nu
como bene enu chiqui' reca nú
necahua laca neriña' nú riqui'hua
bee enu netundu, ²⁰nu lunú chiqui'
recahua enze'e rriqui'hua bene
enu rnibiya' luhua nu rri'ihua
tucu nú niarqui' beei nú ri'ihua,
enze'e rriqui'hua bee bene enu raxi

stene'hua, bee enu sequienu li'ihua,
bee enu ruachu li'ihua nu hasta nú
selahua nú rdu'beeí penete luhua.
²¹Mase nú necane diatu para li'á,
pero li'á nia luhua nú lá alu'curu
valuro nú ari'inuru li'ihua scua.

Pero tunu li'ibeei sucu' aya beei
le'catsia li'ibeei lu stucu nú rene,
le'ca scua li'á nu' beya' nú zucu
ayaa li'á, nu li'á rnia luhua xi rni
tucu bene enu netundu, xne lacane
tucu nú riala acane. ²²Pero tunu
li'ibeei rnibeei nú neca beei bene
hebreo le'ca li'á neca bene hebreo.
Nu tunu li'ibeei rnibeei nú necabeei
bene Israel, le'ca bene Israel necaa,
nu tunu rnibeei nú leta familia'
Abraham nze'ta beei, le'ca leta bee
familia' Abraham nzela. ²³Nu tunu
rnibeei nú riña' Jesucristo rri'ibeei.
Li'á máse rri'á riña'nu, mase nú
lixiu see nú rnia scua, pero neli
nú li'á máse rri'á riña' Jesucristo
luquela li'ibeei. Nu enze'e li'á
máse udu' bee bene ni'cu' luquela
li'ibeei, nu máse udiñi bee bene
li'á luquela li'ibeei, nu huaxi bese
yamero auti bee bene li'á. ²⁴Ayu'
bese uzeteche' bee bene Israel li'á,
nu cada tucu bese chenu udiñi
beei li'á ala llich'i nu'quie' chicute
udu'beeí tetsu'a. ²⁵Nu chuna bese
udiñi bee bene li'á cuna ixi' ziti, nu
tucu bese udiñi bee bene li'á cuna
quiee. Le'ca chuna bese uguatse'
barco nú nza'a liñi lu inzatu', nu
tucu bichia nu tucu rula' uya'naa lu
inzatu', ²⁶ye bee luhua elu uya'a,
unga nelliquine lu cuendaa xi neca
chenu udete'a re'cu lubee huana',
lubee bene sa'a enu neca bee bene
Israel cuna lubee bene enu laca bee
bene Israel. Le'ca unga nelliquine

lu cuendaa lubee eyeche, cuna lu dañi, nu lu inzatu' cuna lubee bene enu lia rnitsia nú neca bee bene' Jesucristo. ²⁷Chiqui' udetea trabajo nu nehuana ulle'ca, nu huaxi bese ungucha xcala'a, nu ulia'na nu ubichia nu nu' bee bichia nú la acua, le'ca huaxi bese ungujaa, nu lá lu'cua xucua.

²⁸Nu la necane nú nucua'tsia ulle'ca, huaxilá beenú ulle'ca. Nu yeye'e huaxi bese rri'á elliebacu' equie cuenda' bee bene' Jesucristo bee enu nucua'a enza bee eyeche elu uya'a. ²⁹Tunu nu'xi seca tucu sa'ahua enu nzeli arqui' Jesucristo, che nehuana se'ca equie cuenda'lla. Nu tunu uzequienu bee bene tucu sa'ahua enu nzeli arqui' Jesucristo para nú ri'illa dula, che chiqui' lea nu chenuarquía equie cuenda'lla.

³⁰Tunu rqui'ña nú zucu ayaa le'catsia li'á, rqui'ña nú nia equie cuendaa equie nú nehuana ulle'caa.

³¹Nu Diose enu neca pa' Jesucristo, li'ínu enu riala lu'cu bee bene ula'na lu diqui tiambu, li'ínu nediya'nu nú neli ye beenú rnia.

³²Tiambu nú unibiya' arre Areta, chee uya'a eyeche Damasco nu gobernador enu rnibiya' eyeche ze'e unibiya'lla nú yacu' ru'u bee puerta eyeche ze'e para nú na'tse bee bene ze'e li'á. ³³Pero udu' bee bene li'á liñi tucu llume, nu scua ulaca beella li'á enza ru'u tucu ventana nú nzucu tetsu' pared nu nu' elu' abenchila' eyeche ze'e, che scua ula'a lu gobernador ze'e.

Lunú ulube'lu lu Pablo

12 Lecaxi ri'i bene ana nú sucu' ayalla le'catsia li'illa,

pero rqui'ña nú nia luhua equie cuenda' beenú ulube'lu lua, nu equie cuenda' nú ulube' Jesucristo lua. ²Li'á nu'lua tucu niyu enu nzeli arqui' Jesucristo, nu ungala rtaa lana nú uyalla liñibe elu nzucu Diose. Nu leca resuna tunu uyalla cuna cuerpo'lla urre uyalla cuna espíritu'lla la ri'á beya' nucua' tucutsia Diose nediya', ³tunu uyalla cuna cuerpo'lla urre uyalla cuna espíritu'lla, la ri'á beya' xa uyalla, tucutsia Diose nediya'. Pero li'á nediya' nú, ⁴uyalla elu nzucu Diose, elu ubene'lla bee bedichia' nu la llela'lla xneca nillae lubee bene, xne la yala nú acabiya' bee benene. ⁵Benecua' nu' beya' nú zucu ayaa, pero leca' modo zucu ayaa le'catsia li'á, tucutsia nú nia equie cuendaa neca beenú nehuana ulle'ca. ⁶Nu mase nú zucu ayaa le'catsia li'á laca nucua' nú netundua, xne puro beenú neli rnia, pero la ria'a scua para nú la dete bee bene lunú sucu' aya bee bene li'á lunú ri'ya beei xi rri'á urre lunú riene'beei xi rnia. ⁷Nu para nú la zucu ayaa li'á equie cuenda' ye lunú ulube' Diose lua, che chiqui' nehuana tsi'a xi neca chenu nchiñi tucu eche cuerpo' bene. Nucua' neca riña' beze'lu para nú ri'i equiya lua, para nú la zucu ayaa li'á.

⁸Chuna bese unacua lu Diose para nú luachunu nú nehuana se'caa, ⁹pero li'ínu uninu lua: “Scua tucu nú se'calu lecali xi zecalu, xne máse rlubea nú rnibiya'a lubee bene chenu nehuana seca bee bene.” Enze'e ñia nzu arquía equie nú nehuana se'ca para nú scua aca ahee nú nzu poder' Jesucristo

cuna li'á. ¹⁰Ñia nzu arquia equie xitse lunú nehuana se'ca, chenu rquiexu bee bene li'á, urre chenu nu' xi secala'cha'a, urre chenu nu' xi rri'inu bee bene li'á, nu cuna ye beelá beenú se'ca equie nú se'ca Jesucristo. Xne chenu nehuana se'ca che máse si'a nú rri'i Jesucristo elietsa lua.

**Nzenu arqui' Pablo equie
cuenda' bee bene' Jesucristo**

¹¹Unila luhua equie cuenda' li'á xi neca tucu bene enu netundu, pero li'ihua nu' culpa'hua nú uri'á scua. Xne li'ihua riala azucu' ayahua li'á ante lubee bene enu rni nú li'ibeei neca beei mero apóstol. Xne mase nú lecaxi sibi'a pero lecaxi rri'i falta elliebacua. ¹²Chenu nzua cuna li'ihua lá llaca nú uri'á bee milagro cuna ye beelá beenú ulle'ca lullie'hua nú uri'á cuna ye beelá beenú uri'á nú uzibi' xi neca tucu seña nú neli neca apóstol' Jesucristo. ¹³Ye lunú uri'á cuna bee sa'ahua enu nzeli arqui' Jesucristo elu uya'a, le'ca scua uri'á cuna li'ihua. Tucutsia nú uri'á neca nú né nacua luhua nú ari'ihua elietsa lua diquila nú uzucua'a cuna li'ihua, pero tunu lixiu uri'á nú né nacua elietsacua' luhua uri'ihua perdona li'á.

¹⁴Nu ne rria'lá elliebacu' nú nzelabi'ya'lá li'ihua stucu bese, cuna nucua' aca chuna bese nú nzelabi'ya li'ihua. Nu ni' ne la niarquía nú ri'ixi'a luhua nú ri'ihua elietsa lua nu la necane nú niarquía nú rlu'cuhua, sino que li'ihua niarquía; xne la neca nú bee endu' rla'na nú xneca bacu beei

uzana'bee, sino que bee uzana neca bee enu rebacu bee lli'ñi. ¹⁵Nu mase nú la'xua ye nú rlu'cua nu ti'quia arquia equie nú ri'á elietsa luhua; pero lecaxi ri'i nucua'. Mase nú se'ca nú la zeca xe'tahua li'á chenu rlubea luhua nú chiqui' se'ca li'ihua.

¹⁶Neli nú lá nacua nú ari'ihua elietsa lua pero nu' bee bene enu rni nú uri'á scua equie nú chiqui' netsiña para nú azequienua li'ihua. ¹⁷Pero chenu uxe'la bee bene enu ube'tabi'ya li'ihua, ¿xie' uxe'la beella luhua para nú aye'ta na'cu' beella luhua nú nu' xi ri'ihua elietsa lua la? ¹⁸Le'ca chenu unia lu sa'ahua Tito nú ye'tabi'yalla li'ihua uxe'lalla cuna stucu sa'ahua enu nzeli arqui' Jesucristo, ¿nu xie' unacu' Tito xi unacu'lla luhua la? Nu tanto li'illa cuna li'á iguale neca tucu necatse elliebacu'ru nu tucu nú rri'á rri'illa.

¹⁹Equie nú unilaru luhua la ri'ihua elliebacu' nú recanu'tsiaru li'iru, xne lecali xi uri'inuru li'ihua. Diose nediya' nú como bene' Jesucristo nú necaru rniru luhua, nu ye nú rniru necane para nú ri'iru elietsa luhua nú chenalahua inziu' Diose equie nú se'caru li'ihua. ²⁰Xne xiquia nú chenu nzelabi'ya li'ihua canu la llelaa li'ihua tucu nú niarquía, nu li'ihua la lañi'hua li'á tucu nú niarqui'hua nú lañi'hua li'á. Xiquia nú llela li'ihua nú rliuhua, nú ria arqui'hua lu sa'hua, nú rlehua lu sa'hua, nú nechiqui'hua lu sa'hua, nú rnhua di'chi sa'hua, nú se'tahua bee bene, nú nellini'ahua nu la neca tucu necatsehua lu sa'hua. ²¹Le'ca xiquia equie cuenda'hua nú canu

chenu nzelabi'ya li'ihua stucu bese zela Diose nú ya'na netua equie cuenda'hua, nu che unaa nu nehuana zecaa equie cuenda' huaxihua nú la chiecu' arqui'hua nú rri'ihua dula, bee enu la che'e arqui' xneca nehuañi, nu la tsana' arqui'beeí nú rri'i beeí eluhuexe, nu la tsana' arqui'beeí nú rlu'cu beeí stucu una'a, urre rlu'cu una'a stucu niyu enu laca niyu'nchu, le'ca la chiecu' arqui'beeí nú rlu'cu beeí stucu vicio urre stucu beenú necha neca nú la zibi' rri'ibeeí.

Consejo nú uni Pablo

13 Nee aca chuna vese nú nzelabi'ya li'ihua. Chenu nzelabi'ya li'ihua, ye lunú rni stucu bee sa'hua lu cuenda'hua, nú la nehuañihua tucu nú necane, rqui'ña nú ni chiucu chuna bee bene enu ni tunu neli lunú rnihua. ²Tucu nú unila luhua cuna lubee bene enu rri'i dula chenu ubela luhua, le'ca scua rnia luhua nee nú nzua istu luhua, nu chenu nzelabi'ya li'ihua stucu bese nu tunu nu' xi rri'ihua la ri'á perdona li'ihua.

³Che scua ri'ihua beya' lunú niarqui'hua ri'ihua beya' nú Jesucristo neca enu rliqui' bedichia' nú riala nia luhua. Nu Jesucristo lecaxi rri'i falta li'inu para nú ri'inu lunú riala ri'inu cuna li'ihua nu equie cuenda'hua rlube'nu poder'nu. ⁴Neli nú unguti Jesuse lu cruse xi neca tucu bene enu la nibiya', pero nee nehuañinu equie cuenda' poder' Diose. Nu scua tucu nú ungotinu xi ungoti tucu bene enu la nibiya' le'ca scua necane lu cuenda'ru neca xi neca nú la lu'cul'ru elurnibiya',

pero como bene' Jesucristo nú necaru rlu'curu poder' Diose para nú ri'iru elietsa luhua.

⁵Li'i e'cuhua uri'ihua elliebacu' tunu neli nzeli arqui'hua Jesucristo, li'i e'cuhua uri'ihua elliebacu' xneca nehuañihua, uri'ihua beya' nú nehuañila Jesucristo cuna li'ihua, tunu lacatsiae nú lia rnihua nú nzeli arqui'hua li'inu. ⁶Ala' nú ri'ihua beya' nú li'isi'ru neli nzeli arqui'ru li'inu.

⁷Nu nacu'ru lu Diose equie cuenda'hua para nú la ri'ihua nú necha neca, nu la necane nú ya'na nze'caru ante lubee bene sino que rnacu'ru lu Diose para nú ri'i nze'cahua, mase nú seca bee bene nú la ri'iru tucu nú necane. ⁸Pero li'iru leca modo che'eru lunú neli neca, li'iru rnitsiaru lunú neli neca. ⁹Enze'e lecaxi ri'i tunu nu' xi se'caru para nú scua tsuta' arqui'hua lunú nzeli arqui'hua, nu equie cuenda' nucua' ñia nzu arqui'ru, nu nacu'ru lu Diose para nú huañihua tucu nú necane.

¹⁰Nu nee rquie'exua carta quie' luhua ante nú nzelabi'ya li'ihua, xne chenu nzelabi'ya li'ihua la qui'ña nú qui'ya'hua ri'á equie elurnibiya' nú uliqui' Jesucristo lua elurnibiya' nú uliqui'nu lua para nú ri'á elietsa luhua nú ri'iláhua beya' nú xneca huañihua tucu nú necane, nu lacane para nú nitiluhua. ¹¹Bee sa'a enu nzeli arquia'ahua Jesucristo nee nú la'xua quie'a carta quie' luhua, li'á nia luhua: Nú ñia tsu arqui'hua, ucua'nahua nú huañinze'cahua tucu nú riala nú huañihua, udu'hua ana arqui'

sa'hua nu uhuañi nze'cahua cuna
bee sa'hua nu la liuhua, nu Diose
enu seca li'ihua nu rri'i nú nzuxe
arqui'hua li'inu ri'inu elietsa luhua.
¹²Xitse hora nú lla'cahua sa'hua,
uni'hua Diose lu sa'hua tucu nú
rialane. ¹³Ye bee sa'ahua enu

nzeli arquia'ahua Jesucristo xe'la
beella saludo luhua. ¹⁴Jesucristo
enu rnibiya' lua'ahua ri'inu nú
cha nze'ca lu cuenda'hua nu Diose
enu seca lia'ahua nu cuna Espíritu
Santo nzu cuna li'ihua ye bichia.
Amén.

Carta nú uquie'e San Pablo lubee bene enu nzeli arqui' Jesucristo enu nucua'a lu iliu Galacia

1 Li'á, Pablo neca apóstol Jesucristo, pero lá cañi bee bene li'á, nu lá xe'la beella li'á sino que Jesucristo uxe'la li'á nu cuna Pa'ahua Diose enu uri'i nú uhuañi zeca Jesucristo lu eluti. ²Ye bee sa'ahua enu nzeli arqui' Jesucristo enu nzucu'nua ca'a xe'laru carta quie' lu yehua enu nzeli arqui' Jesucristo lu iliu Galacia. ³Pa'ahua Diose cuna Jesucristo ri'i nú cha nze'ca lu cuenda'hua nu cuna nú nzuxe arqui'hua. ⁴Jesucristo ungu'ti equie stula'ahua para nú tsila'ahua lu ye beenú necha neca nu' lu iliulabequie' tucu nú uri'i Pa'ahua Diose elliebacu'. ⁵iEnze'e riala nú lu'cuahua ula'na lu Diose diqui tiambu!

**Leca stucu bedichia' nú
tsila'a bee bene**

⁶Chiqui' nzenu arquia nú terratutsia sana' arqui'hua Stichia' Diose, li'inu enu ucañi li'ihua equie elu seca' Jesucristo. Pero li'ihua a'la stucu bedichia' rene rri'i casohua, ⁷nú ni' laca sitichia' Diose. Sino que neli nú nu' bee bene enu rla'na

nú zequienu li'ihua nu niarqui' nú che'e xa neca bedichia' nze'ca' Jesucristo. ⁸Pero tunu nu' bee bene enu sete' li'ihua stucu bedichia' rene luquelá bee bedichia' nze'ca' Jesucristo nú uzete'laru li'ihua. Nze'e riala castiya' Diose, lecxiri'i tunu neca nze'e titse bene urre neca nze'e li'á urre neca nze'e tucu ángele enu nze'ta enza liñibe. ⁹Tucu nú unilaa luhua, nu nee rni zeca luhua stucu bese: Tunu nu'ti sete' li'ihua stucu bee bedichia' rene nú laca xi neca stichia' Jesucristo nú uchilila arqui'hua, nze'e rialala castiya' Diose.

¹⁰La la'naa nú xa modo ya'na nze'ca lubee bene sino que rla'naa nú ya'na nze'ca lu Diose. Xne tunu la'naa nú ya'na nze'caa lubee bene chequie la zucua'a stichia' Jesucristo.

Xneca unga Pablo apóstol

¹¹Bee sa'a enu nzeli arquia'ahua Jesucristo niarquia nú ri'ihua beya' nú stichia' Jesucristo nú uzeteláhua lacane nú ullelatsia arqui' bee bene iliulabe. ¹²Né ni bee benene

lua nu lecati uzete'e li'á sino que Jesucristo neca enu uzete'e li'á.

¹³Li'ihua ubene'la'hua lu cuendaa chenu uyalí arquia tucu nú nzeli arqui' bee bene Israel Diose, nu siempre necha uri'inua bee bene enu nzeli arqui' stichia' Jesucristo nu ula'naa xneca modo tsana' arqui'beella nú nzeli arqui'beella Jesucristo. ¹⁴Nu li'á máse utsuta' arquia lunú xa nzeli arqui' bee bene Israel luquela beelá bee bene enu tucutse lana nzenua xne uzucua yebee costumbre nú uri'i bee bene'ru enu udetela. ¹⁵Pero lunú chiqui' seca Diose li'á, enze'e desde ante nú alaa ucañilanu li'á. Nu chenu niarqui'nu, ¹⁶che ulube'lu lli'ñinu lua, para nú ixiule'a bedichia' nze'ca'nu lubee bene enu laca bee bene Israel. Nu chenu ungae scua lecatilu unacadichia'a, ¹⁷nu le'ca né cha'a Jesucristo lubee bene enu necala apóstol ante nú acaa apóstol'nu, sino que chu uya'a lu iliu Arabia nu cheelá ubenchila' zeca eyeche Damasco.

¹⁸Chenu udete chuna lana che uya'a Jerusalén para nú chulua Pedro nu uzucua'a lulla chiñu' bichia. ¹⁹Pero né lañia beelá bee apóstol ulañitsia Jacobo bichi Jesucristo. ²⁰Ye beenú rnia luhua neli nu Diose nediya' nze'ca' nú la nequichia'a. ²¹Luze'elá uya'a lu iliu Siria cuna lu iliu Cilicia. ²²Pero bee bene enu nzeli arqui' Jesucristo enu nucua'a lu iliu Judea lá chulubeella li'á tiambu ze'e. ²³Ubene'tsia beella lunú rni bee bene equie cuendaa: "Bene enu necha uri'inu lia'ahua hua'tu nee rixiule'elalla stichia' Jesucristo añinzuca nú hua'tu

ula'nalla nú xneca modo tsana' arquia'ahua nú nzeli arquia'ahua Jesucristo." ²⁴Nu rdete' beella che'tsa lu Diose equie cuendaa xne nzelila arquia Jesucristo.

Uyete' Pablo cuna beelá bee Apóstol

2 Chenu udete rta lana, che uya'a Jerusalén stucu bese uya'nua Bernabé cuna Tito. ²Xne Diose uni lua nú uya'a ze'e. Nu Jerusalén, ze'e uyetesa'ru stucu luhua puro bee bene enu rnibiya' leta bee bene enu nzeli arqui' Jesucristo para nú bedichia'ru equie cuenda' stichia' Jesucristo nú setea bee bene enu laca bee bene Israel scua uri'á para nú laca xle'e uri'á yebeenú uri'á nu cuna nú rri'á. ³Pero ni' Tito enu nzu cuna li'á ze'e añinzuca nú necalla bene griego lá nibiya' bee bene' Diose nú aquie seña nú rquie bee bene Israel li'illa. ⁴Xne nu' bee bene Israel enu lia rri'i nu neca beei sa'ahua para nú scua aca chu'tu beei leta'ahua nu tsi'ñia beei ta beenú la zucua'ahua, para nú scua nibiya' zeca beei lua'ahua nú zucua'ahua nú rnibiya' ley. ⁵Pero ni' teme' lá azelaru nú ari'ibeei ana luru, xne la niarqui'ru nú tsana' arqui'hua bedichia' nze'ca' Jesucristo nú neli neca nú nzenalalahua

⁶Nu bee bene enu rnibiya' leta bee bene' Jesucristo lá nia'beella lua xilá riala ri'á, añinzuca nú xi ri'á nú ti neca beella xne ante Diose iguale yebee bene. ⁷Luhua nú anibeella lua nú xilá rqui'ña ri'á, luego chu uri'ibeella beya' nú ucañila Diose li'á para nú ixiule'a bedichia' nze'ca' Jesucristo lubee

bene enu laca bee bene Israel, tucu nú ucañi Diose Pedro para nú ixiule'ella bedichia' nze'ca' Jesucristo lubee bene Israel. ⁸Nu le'ca Diose enu ucañi Pedro nú necalla apóstol lubee bene Israel le'ca li'inu ucañinu li'á para nú necaa apóstol lubee bene enu laca bee bene Israel.

⁹Enze'e, Jacobo, Pedro nu Juan li'ibeella enu máse rnibiya' leta bee bene enu nzeli arquí' Jesucristo luego uri'ibeella beya' nú Diose neca enu uliquí' elurnibiya'cua' lua. Nu che una'tse beella yaru xi neca tucu seña nú neca tucunecatselaru, nu uya'naru nú li'á nu Bernabé nzetixiule'eru stichia' Jesucristo lubee bene enu laca bee bene Israel. Nu li'ibeella ixiule'ebeella stichia' Jesucristo lubee bene Israel. ¹⁰Tucutsia nú unibeella luru nú la zañi'ru ri'iru elietsa lubee bene enu seca elitsi nu nucua' riu' arquia nú ri'á.

Uqui'ya' Pedro uri'i Pablo

¹¹Pero chenu uya Pedro eyeche Antioquía, che uqui'ya'lla uri'á xne la ri'illa tucu nú riala ri'illa, ¹²xne rluti udacunuuxulla bee bene enu laca bee bene Israel. Pero chenu uriña bee bene enu uxe'la Jacobo eyeche Antioquía che né quietea' Pedro bee bene enu laca bee bene Israel xne ulliquilla nú xi ni bee bene enu neli sucu' nú rni ley. ¹³Ye beelá bee bene Israel enu nzeli arquí' Jesucristo enu nucu'a ze'e le'ca uri'ibeella tucu nú uri'i Pedro, nu le'ca hasta Bernabé uri'i scua. ¹⁴Enze'e, chenu ulañia nú la ri'i beella tucu nú rni stichia'

Jesucristo che unia lu Pedro ante lu yebeella: “Li'ilu nú necalu bene Israel la nehuañilu tucu nú nehuañi beella. ¿Nu xneca niarquí'lu nú ri'ilu juerza bee bene enu laca bee bene Israel nú huañi beella tucu nú nehuañi bee bene Israel?”

Equie nú nzeli arquí' bene Jesucristo tsila'a bene

¹⁵Li'iru necaru bene Israel desde nú unglaru nu siempre uzucu'ru nú rni ley' Diose nu la nehuañiru xi nehuañi bee bene enu laca bee bene Israel. ¹⁶Pero li'iru nediya'ru nú lecati enu la lu'cu dula ante Diose equie nú sucu'lla ley cua' sino que lunú nzeli arquí' bene Jesucristo, enze'e le'ca nuuru nzelila arquí'ru Jesucristo para nú la lu'curu dula lunu, nu la necane equie nú rri'iru nú rnibiya' ley, xne lecati enu la lu'cu dula lu Diose equie nú nzenalatsia nze'e ley cua'. ¹⁷Neequie tunu li'iru rla'naru nú la lu'curu dula lu Diose equie cuenda' Jesucristo, nu tunu le'ca nuuru necaru bene enu rlu'cu dula, ¿xie' nú másela rri'i Jesucristo nú rlu'curu dula che la? Li'iru nediya' nze'ca'ru nú lacane esquie, ¹⁸xne tunu utsana arquíl' ley' Moises, nu chequie zucu zeca nú rni ley cua' stucu bese, che le'catsia li'á rri'á nú necaa bene enu rlu'cu dula. ¹⁹Enze'e neca xi neca nú unglutí' equie cuenda' ley para nú huañia para Diose. ²⁰Nu nee neca xi neca nú le'ca unglutia chenu ungluti Jesucristo lu cruse nu nee la nehuañia'a lu cuenda' li'itsia sino que Jesucristo neca enu nehuañi cuna li'á nee. Nu nee nehuañia lunú

nzeli arquia lli'ñi Diose enu chiqui' seca li'á nu ungti equie cuenda' li'á. ²¹Nu la luachua eluseca' Diose xne tunu nu' modo nú la lu'cu bene dula ante Diose equie nú sucu' bene ley' Moisés, lecaxi sibi' nú ungti Jesucristo lu cruse che.

La tsila'a ley bee bene

3 iBee bene Galacia! ¿Xiquie nú chiqui' netunduhua? ¿Ti uzequienuu arquí'hua? Xne chenu uzete'ru li'ihua, claro udixiule'eru luhua xiquie nú ungti Jesucristo lu cruse. ²Neequie tucutsia nú niarquia ri'á beya': ¿Xie' nzu Espíritu Santo cuna li'ihua xne rri'ihua tucu nú rnibiya' ley' Moisés la, urre necane nú uchili arquí'hua stichia' Jesucristo nú ubene'la'hua la? ³¿Xiquie nú nzitisca'hua, nu nzula Espíritu Santo cuna li'ihua nu nee secahua nú para nú yalu tucu nú niarquí' Diose nú ri'ihua rqui'ña nú ri'ihua tucu nú rni ley' Moisés? ⁴¿Xie' lecaxi uzibi' nú chiqui' nehuana ulle'cahua la, o xie' lia xle'e nehuana ulle'cahua la? ⁵Chenu xella Diose Espíritu Santo luhua nu rri'inu milagro luhua, ¿rri'inu scua equie nú sucu'hua nú rni ley' Moisés la? o ¿necane equie nú nzeli arquí'hua stichia' Jesucristo nú ubene'la'hua la?

⁶Ullu'cu arquí'hua nú equie nú uchili arquí' Abraham Diose enze'e udu' cuenda Diose li'illa xi neca tucu bene enu la lu'cu dula. ⁷Enze'e, uri'ihua beya' nú ye bee bene enu nzeli arquí' Diose, bee nze'e neca xi neca lli'ñi Abraham. ⁸Hasta hua'tu nediya'la' Diose nú leta bee bene enu laca bee bene Israel nu'

bee bene enu lu'cu cuenda Diose xi neca enu la lu'cu dula xne nzeli arquí'lla Diose. Xne tucu luhuare lu ichi' Stichia' Diose rni nú uninu lu Abraham: “Li'á ri'á nú cha nze'cae lu cuenda' yebee bene iliulabe equie cuenda'lu.” ⁹Enze'e, rri'i Diose nú nza nze'cae lu cuenda' bee bene enu nzeli arquí' li'inu tucu nú uri'inu lu Abraham xne uyali arquí' Abraham li'inu.

¹⁰Ye bee bene enu sucu' nú rnibiya' ley' Moisés zeca bee nze'e castiya xne le'ca lu ichi' leycua' rni: “Bee bene enu la ri'i ye beenú rnibiya' leycua', zeca bee nze'e castiya.” ¹¹Enze'e, ¿lecati enu la lu'cu dula ante Diose equie nú sucu'tsialla nú rnibiya' ley? Xne lu ichi' Stichia' Diose rni: “Bene enu ubacu'lanu nú la lu'cu dula xne nzeli arquí'lla li'inu lu'culla elunehuañi ante lunu.” ¹²Pero equie cuenda' ley, la nacu' ley nú chili arquí' bene ley sino que lu ichi' ley rni: “Bene enu sucu' nú rni ley nze'e si lu'cu elunehuañi.”

¹³Jesucristo neca enu utsila'a lia'ahua lu castiya' ley nu li'inu uyucunu castiya nú riala zeca'ahua, chenu uquienu lu cruse, xne lu ley rni: “Bene enu necha rri'i si'quinala bee bene li'illa lu aca ratilla.” ¹⁴Ulle'ca Jesucristo scua para nú nu' beya' ri'i Diose nú cha nze'ca lu cuenda' bee bene enu laca bee bene Israel, tucu nú uri'inu nú uya nze'ca lu cuenda' Abraham. Nu lunú nzeli arquia'ahua Jesucristo enze'e nzula Espíritu Santo cuna li'ihua tucu nú unila Diose hasta hua'tu.

Ley' Moisés cuna nú ucuaqui u'na Diose lu Abraham

¹⁵Nee nia luhua nú xa rri'i bee bene, chenu rreche' chiucu bene

tucu ichi' nu rdu'lla firma'lla lu ichi' ze'e, che leca' ti nitilu nú nequie lu ichi' ze'e urre quie'ella huaxisca'lá lunú nequie lue. ¹⁶Le'ca scua uri'ihua beya' nú chenu uri'ínu nú nza nze'ca lu cuenda' Abraham nu cuna lucuenda' bene enu nze'ta lu familia'lla, lu ichi' Stichia' Diose la ni nú ri'ile'yanu “bee bene enu nze'ta lu familia'lla”, nu la nine equie cuenda' huaxi bee bene sino que rnitsiae equie cuenda' “tucutsia bene”; xne li'ínu rninu equie cuenda' bene enu nze'ta lu familia'lla. Nu bene ze'e enu nze'ta lu familia'lla neca Jesucristo. ¹⁷Nu lunú rnia luhua nú ley' Moisés yu'u cuatrocientos treinta lana luquielá chenu ucuaqui u'na Diose nú dete'nu xi dete'nu lu Abraham. Enze'e leca modo nú nitilu ley cua' lunú ucuaqui u'na Diose lu Abraham hasta hua'tu. ¹⁸Xne tunu equie cuenda' ley atia'ahua lunú ucuaqui u'na Diose lu Abraham. La neca'e lunú ucuaqui u'na Diose che. Pero Diose lia udete' lu Abraham nú uninu lulla nú dete'nu lulla lunú ucuaqui u'nanu lulla hasta hua'tu.

¹⁹Tala bese nedicha'hua lua: ¿Xi sibi' ley che? Diose udu' ley para nú ri'i bee bene beya' nú la zucu' bene nú rninu nu uzibi' ley' Moisés hasta bichia nú uriña bene enu nze'ta lu familia' Abraham tucu nú ucuaqui u'na Diose lulla hasta hua'tu. Bee ángele' Diose udete' ley cua' lu Moisés, nu che Moisés udixiule'e lubee bene. ²⁰Pero chenu ucuaqui u'na Diose lu Abraham nú xi dete'nu lulla lecati udixiule'e stichia'nu lulla sino que li'i e'cu Diose ubedichia'nu li'i Abraham.

Xi sibi' ley

²¹La ri'ihua elliebacu' nú rnia luhua nú rri'i cundra leycua' lunú ucuaqui u'na Diose. Sino que tunu equie cuenda' leycua' nu' modo lu'cu bene elunehuañi ante Diose che nediya'la' bene nú la lu'cu bene dula ante lunu equie nú nzenala bene ley. Pero lacane esquie. ²²Xne lu ichi' Stichia' Diose rni nú yebee bene rnibiya' dula lu nu ungae scua para nú yebee bene enu nzeli arqui' Jesucristo yucu bee nze'e lunú ucuaqui u'nala Diose.

²³Ante nú riña Jesucristo, unibiya' ley lua'ahua xi neca chenu noche'nacu' tucu bene, nu nelluaquie'tsia'ahua chenu riña Jesucristo. ²⁴Enze'e, ley cua' neca lua'ahua xi neca tucu bene enu rni lua'ahua nú xneca huañia'ahua nu hasta bichia nú uyulua'ahua Jesucristo che ulaxu nú unibiya' ley lua'ahua para nú lu'cu cuenda Diose lia'ahua xi neca tucu bene enu la lu'culi dula equie nú nzeli arqui'lla Jesucristo. ²⁵Pero nee nú uchilila arquia'ahua Jesucristo la qui'ña nú ni ley lua'ahua nú xneca huañia'ahua. ²⁶Xne ye'ahua bee enu nzelila arqui' Jesucristo neca'la'ahua lli'ñi Diose. ²⁷Nu equie nú urinzala'ahua necatucu necatsela'ahua cuna Jesucristo xne nzulanu cuna lia'ahua. ²⁸Nu lecaxiri'i tunu neca'ahua bee bene Israel urre laca'ahua bee bene Israel, tunu neca'ahua esclavo lubee bene, o laca'ahua esclavo, nu tunu neca bene niyu urre neca bene una'a xne para Jesucristo iguale neca'ahua xne neca tucu necatsela'ahua cuna

li'inu. ²⁹Enze'e, tunu neca'la'ahua bene' Jesucristo le'ca esquie neca'la'ahua xi neca lli'ñi Abraham, nu riala'ahua lunú ucuaqui u'nala Diose lu Abraham hasta hua'tu.

4 Xi neca tucu endu' lla'na enu ati' herencia, nú chenu lle'nanu la lu'cunu elurnibiya xi neca tucu moso', añinzuca nú necala stene'nu, bee stene' pa'nu. ²Pero nu' bee bene enu rriucu li'inu nu rnibiya' lunu cuna lubee stene'nu hasta nú riña bichia nú uni pa'nu nú yucunu herencia cua'. ³Le'ca scua necane lu cuenda'ahua, xi uri'i endu' uria'ahua hua'tu xne uyanala'ahua ye bee costumbre' bee bene. ⁴Nu chenu uriña bichia nú uni Diose nú xe'lanu lli'ñinu lu iliulabe, ungulanu equie cuenda' tucu una'a. Nu uhuañinu tucu nú unibiya' ley' Moisés nú huañi bee bene. ⁵Para nú uhuanu lia'ahua lu ley cua', nu scua yucu Diose lia'ahua xi neca bee lli'ñinu. ⁶Nu lunú neca'la'ahua lli'ñi Diose, li'inu uxe'lanu Espíritu Santo' lli'ñinu Jesucristo lua'ahua para nú huañia'ahua cuna li'inu, nu equie cuenda' Espíritu cua' rnia'ahua: "iPa Diose!" ⁷Enze'e la neca'ahua xi neca esclavo lu ley sino que lunú neca'la'ahua lli'ñi Diose, enze'e riala'ahua herencia nú liqui'nu lua'ahua equie cuenda' Jesucristo.

Nzenu arqui' Pablo equie cuenda' bee bene' Jesucristo enu nucua'a eyeche Galacia

⁸Hua'tu chenu la chuluhua li'inu enu neca mero Diose, uzibi'hua lubee enu secagua nú neca diose, nu ni' laca bee nze'e Diose. ⁹Pero

nee nú nu'lulahua Diose nu le'ca nu'lula Diose li'ihua, ¿xiquie nú niarqui' zecahua ri'ihua yelu beenú uri'ihua hua'tu? ¿Nu xiquie nú niarqui' zecahua nú aca zecahua esclavo lubee nucua' stucu bese? ¹⁰Nee nú rlu'cu cuenda zecahua nú xi bichia nu xi uu nu xi lana nu xi tiembu nú ri'ihua tucu nú ri'ihua tucu nú neca costumbre'hua nú rri'ihua hua'tu. ¹¹iChiqui' xiquinuahua xne canú xle'e uzetea Stichia' Diose li'ihua!

¹²Enze'e bee sa'a enu nzeli arquia'ahua Jesucristo zequiaa luhua: Nú uhuañihua tucu nú nehuañia, tucu nú ula'na nú uhuañia xi nehuañihua, la nia luhua nú nu' xi tucu nú necha neca uri'inuhua li'á. ¹³Xne li'ihua nediyahua nú bese rluti nú uzetea li'ihua bedichia' nze'ca' Jesucristo, ritia bichia ze'e. ¹⁴Pero añinzuca nú scua ulle'ca pero uriqui'hua li'á nu lá huachuhua li'á nu le'ca né tsana' arqui'hua li'á, sino que uri'i casohua li'á xi neca tucu ángele' Diose urre xi neca li'i e'cu Jesucristo. ¹⁵Li'á nediyaa nú tunu nu' modo hasta i'culuhua luahua liqui'hua lua. Nu nee, ¿cá uri'ihua nú uzecahua li'á? ¹⁶U, ¿xie' a'la rana arqui'hua li'á, lunú unitsia luhua lunú neli neca la? ¹⁷Nia luhua nú bee bene enu rla'na nú xa zucu'hua nú rnibeei lacane nú rri'i nze'cabeei elliebacu' urre secabeei li'ihua sino que elliebacu'beei neca nú tsana' arqui'hua lunú uzetea li'ihua nu niarqui'beeí nú máse ri'i casohua stichia'beeí. ¹⁸La necha neca nú seca bene sa'bene pero rqui'ña nú ri'llae cuna elliebacu'

nze'ca diqui tiambu, nu la ri'ihua scua chenu nzutsia cuna li'ihua. ¹⁹Xne li'á se'ca nú necahua xi neca bee endua. Nu stucua'la nehuana se'caa equie cuenda'hua xi nehuana seca tucu una'a chenu ala endu'lla. Nu la tsuxe nú nehuana se'caa hasta chenu neli nzenalahua Jesucristo tucu nú rialane. ²⁰iAla' nú nee nzu li'i e'cua luhua para nú nia luhua bee bedichia' nú ri'i nze'cahua beya' pero nee ni' la ri'á beya' xa ri'inuahua!

Ejemplu' Agar cuna Sara

²¹Li'ihua enu niarquí' nú huañi tucu nú rnibiya' ley' Moisés. ¿Xie' lasca' ri'ihua beya' nú rni leycua'la? ²²Lu ley' Moisés rni nú ulu'cu Abraham chiucu endu'. Ulu'culla tucu endu' cuna una'a enu utsilla lee Agar nu le'ca ulu'culla stucu endu' cuna mero una'alla Sara. ²³Endu' Abraham enu unganu Agar, unganu Agar endu' Abraham xne uzucunulla Abraham. Pero endu'lla enu unganu mero una'lla, ungulanu pero la necane equie cuenda' nú uzucunutsialla una'lla, sino que ungulanu para nú yalu lunú ucuaqui u'na Diose lu Abraham. ²⁴Nu nee Sara cuna Agar, neca tucu ejemplu lua'ahua equie chiucu inziu nú nu' chenala bee bene, tucu inziu cua' neca nú chenala bee bene ley nú udeté' Diose lu Moisés equie dañi nú lee Sinaí, nu bee enu nzenala ley cua' neca xi neca esclavo lu leycua' xi unga Agar esclavo lu Abraham. ²⁵Nu li'ihua nediya'hua nú enza Arabia nzucu dañi nú lee Sinaí nu bee bene enza ze'e rri'chiabeei dañi ze'e

Agar. Pero nee Jerusalén neca xi neca dañi ze'e xne yebée bene enu nucua'a Jerusalén, bee enu nzenala ley, neca beella xi neca esclavo lu ley. ²⁶Pero lia'ahua lachia'ahua neca Jerusalén liñibe nú laca esclavo lu ley, tucu nú lá aca Sara esclavo. ²⁷Nu lu ichi' Stichia' Diose rni:

Ñia utsu arqui' li'ilu una'a enu leca modo nú lu'cu endu'; nu chiqui' ullila' li'ilu enu la chulu xa nehuana seca tucu una'a enu rala endu'.

Xne huaxilá endu' lu'cu una'a enu leca modo lu'cu endu' luquela una'a enu rlu'cu niyu'.

²⁸Bee sa'a enu nzeli arquia'ahua Jesucristo li'á rnia luhua nú tucu nú ungula Isaac equie nú uchili arqui' Abraham Stichia' Diose nú acane scua le'ca scua lia'ahua neca'la'ahua bene' Diose xne nzeli arquia'ahua stichia'nu. ²⁹Nu tiambu ze'e endu' Agar, la yu' arqui'i endu' Sara una'a Abraham. Le'ca scua bee bene enu nzenala nú rni ley' Moisés sequichia' beei lia'ahua nú nzu Espíritu Santo cuna lia'ahua, nu lunú neca'la'ahua bene' Diose. ³⁰Pero li'ihua nediya'hua nú lu ichi' Stichia' Diose rni: “Uteliaca' una'a enu utsilu cuna endu'nchu, xne la yala nú ati' endu' cua' herencia nú riala endu' Sara una'alu.” ³¹Enze'e bee sa'a enu nzeli arquia'ahua Jesucristo lia'ahua la neca'ahua xi neca endu' una'a enu utsi Abraham sino que lia'ahua neca'ahua xi neca endu' Abraham enu ulu'cu una'lla xne la nibiya' ley lua'ahua.

Utsuta' arqui'hua lu Stichia' Diose

5 Jesucristo utsila'a lia'ahua para nú la nibiya' ley lua'ahua

enze'e utsuta' arqui'hua nu la zela'hua acahua stucu bese xi neca esclavo equie nú rri'ihua nú rnibiya' ley.

²Li'á Pablo nia luhua: Tunu li'ihua aquie seña nú rnibiya' ley nú quiehua lecaxi zibi' nú nzeli arqui'hua Jesucristo che. ³Nu li'á rni zeca luhua: Titse bene enu quie señacua' cuerpo' rqui'ña nú ri'illa ye nú rnibiya' ley. ⁴Li'ihua enu rri'i elliebacu' nú lunú sucu'hua nú rnibiya' ley che la lu'cuhua dula lu Diose. Nucua' rri'i nú laca'hua bene' Jesucristo nu ni' la lu'cu cuenda'hua eluseca' Diose. ⁵Pero lia'ahua equie cuenda' Espíritu Santo, nu lunú nzeli arqui'ahua Jesucristo nzucu lua'ahua nú riña'ahua lu Diose sin nú lu'cua'ahua dula. ⁶Xne chenu neca tucunecatsela bene cuna Jesucristo lecaxi sibi' nú nequie seña bene urre la nequie seña bene. Lunú mase sibi' neca nú nzeli arqui' bene Jesucristo nu lunú nzeli arqui' bene rlucu bene eluseca, che nu' modo nehuañi nze'ca bene.

⁷Li'ihua nzeli nze'ca arqui'hua. ¿Nu ti uni luhua nú lá ri'i casoa'hua lunú neli neca? ⁸Xne elliebacu'cua' la ye'ta lu Diose xne li'ínu ucañilanu li'ihua para li'ínu. ⁹Enze'e ubi'yahua li'ihua xne canu terratutsia nu' modo zequienu bee bene yehua. ¹⁰Pero li'á nzuta' arqui' lu Jesucristo, nú la chiecu' arqui'hua Stichia' Diose nú uzetelahua. Nu Diose dete' castiya bene enu sequienu li'ihua lecaxi ri'i nú ti neca nze'e.

¹¹Tunu li'á rnisca'lá luhua nú rqui'ña nú quie seña bee bene, ¿xie' tiliaca' bee bene Israel li'á

nu útibeei li'á chela? Nu tunu nia nú quie señacua' bee bene neca nucua' nú lecaxi zibi' nú ungti Jesucristo lu cruse che. ¹²¡Ala! nú bee bene enu rri'illi'bi arqui'hua rni nú rqui'ña nú quiee, señahua ala' nú li'i e'cubeei chiecu'lí beei elunecachi'bee!

¹³Xne la nibiya' ley luhua, nu la neca equie cuenda' nú la nibiya' ley luhua nú ri'itsiahua lunú niarqui'hua, sino que uzecahua bee sa'hua nu uri'ihua elietsa lubeella.

¹⁴Xne tunu sucu'la bene tucu mandamiento nú rni: “Uzeca sa'lu tucu nú secalu li'ilu”, che sucu'la bene yenú rnibiya' ley' Diose.

¹⁵Pero tunu li'ihua rana arqui'hua sa'hua nu rliunuhua sa'hua xi rri'i bee nañi ubi'yahua li'ihua xne canu ri'i nucua' nú le'esa'hua.

Uhuañihua tucu nú niarqui' Espíritu Santo nú huañihua.

¹⁶Enze'e nia luhua, uhuañihua tucu nú rnibiya' Espíritu Santo luhua nú huañihua. Nu scua la huañia'hua lunú necha neca nu' elliebacu'hua. ¹⁷Xne lunú nehuañi bene lunú nechá neca nu' elliebacu' bene, lacane tucu nú rnibiya' Espíritu Santo nú huañi bee bene. Nu tucu nú rnibiya' Espíritu Santo nú huañi bee bene nú huañilla. Ni' tucue nu ni' stucue la uya' sa'e nu laca igualee, enze'e lia'ahua leca modo huañia'ahua tucu nú niarqui'tsia'ahua. ¹⁸Pero tunu Espíritu Santo neca enu rnibiya' luhua che la nibiya' ley luhua.

¹⁹Neequie ahee neca nú necatsia elliebacu' bee bene: Necane eluhuexe nu beenú lecaxi zibi', nu

yelu clasia' bee biciu. ²⁰Nu rlu'cu beei ula'na lubeenú seca beei nú neca diose nu rdu' ixiu beei sa'beei, nu rliubeei, nu neyi' rcua'a beei. Nu terratutsia rlebeei, nu rri'ibeei nú rle'e sa' bee bene, nu le'ca rlu'cubeei bee bene'beei, ²¹ria arqui'beei, nu ruuti beei bene nu necabeei uniqi, nu racu xeta' beei, nu nu' beelá beenú iguale sa'bee nucua' rri'ibeei, ni zeca luhua stucu bese tucu nú unila luhua ante, bee bene enu rri'i scua leca modo chu'u liñibe elurnibiya' Diose.

²²Pero lunú rliqui' Espíritu Santo neca nú zeca bene sa'bene, nú ñia tsu arqui' bene, nu la huañi bene cuna xuu, nú lu'cu bene paciencia, nú ñia ri'i bene lusa' bene nu ri'i nze'ca bene lusa' bene nu tsa'alu bene stichia'bene, ²³nu aca lle'na arqui' bene, nu ri'lla ana lu elliebacu' nú necha neca, nu leca ni' tucu ley nú cá nú ri'i bee bene bee nucua'. ²⁴Nu bee bene enu necala bee bene' Jesucristo para li'ibeella neca xi neca nú unguutila yebee nucua', cuna yebeelá beenú nechá neca xne unguutila Jesucristo lu cruse equie cuenda' ye dula. ²⁵Nu nee nú nzu Espíritu Santo cuna lia'ahua rqui'ña nú huaña'ahua tucu nú rnibiya'nu nú huaña'ahua.

²⁶La aca nellíña'ahua nu la ria'ahua nú le bene lu sa' bene, nu la yea arquia'ahua lubee sa'ahua.

Uri'ihua elietsa lubee sa'hua

6 Bee sa'a enu nzeli arquia'ahua Jesucristo, nia luhua nú tunu tucu bee sa'ahua rri'i dula ana lu, li'ihua enu másela nzuta' arqui' lu Stichia' Diose rqui'ña nú nihua

lulla pero ni' nze'cahua lulla. Nu uri'ihua beya' nú le'ca nu' modo nú ri'i dula ana luhua. ²Uri'ihua elietsa lubee sa'hua lu xitse beenú nehuana seca beella che scua sucu'hua lunú rnibiya' Jesucristo nú ri'ihua.

³Tunu nu' enu seca nú reca ye nú reca nu lecaxi reca, che le'catsia li'lla sequienulla li'lla. ⁴Cada tucuhua ri'ihua beya' tunu neli nú nehuañihua tucu nú niarquí' Diose nú huañihua. Nu tunu nehuañi nze'cahua li'itsiahua llila'hua luhuae nú ri'ihua elliebacu' nú nehuañi nze'calahua luquela beelá bee bene. ⁵Xne cada tucua'ahua rqui'ña nú bi'ya'ahua lunú xneca nehuaña'ahua.

⁶Titse bene enu sete' Stichia' Diose rqui'ña nú ri'lla elietsa lu bene enu sete' li'lla lu xitse nú rqui'ñalla.

⁷La zequienuhua le'catsia li'ihua, xne leca modo nú itanu bene Diose xne ye beenú rdu' ni bene enze'e ri'i bene ula'cu. ⁸Tunu nehuañitsia bene lunú necha neca rri'i bene elliebacu'. Riña bichia nú zecalla castiya, pero bene enu nehuañi tucu nú rnibiya' Espíritu Santo, equie cuenda' Espíritu Santo lu'culla elu nehuañi nú leca xunga laxu ante Diose. ⁹La llaca'ahua ria'ahua nú neca nze'ca. Xne tunu la llaca'ahua, che riña bichia nú atia'ahua nú riala atia'ahua. ¹⁰Enze'e chenu nu' modo nú ria'ahua elietsa lubee bene rqui'ña nú ria'ahuane, nu máse rqui'ña nú ria'ahua elietsa lubee sa'ahua enu nzeli arqui' Jesucristo.

Bezete' nú uni Pablo lubee bene Galacia

¹¹Bi'yacuruhua xi llene bee letraquie' rquie'á luhua nu li'i

e'cua rquie'ene. ¹²Bee bene enu rri'i juerza li'ihua nú quie seña nú rquie bee bene Israel li'ihua rri'i beei scua para nú ya'na nze'ca beei ante bee bene nu la niarqui'beei nú nehuana zeca beei equie nú nzeli arqui'beei Jesucristo. ¹³Pero ni' bee bene enu nequie seña cua' la ri'ibeei tucu nú rni ley. Niarqui'tsiabeei nú quie seña cua' li'ihua para nú aca nelliñabeei nú uri'ilabeei ana luhua nú quie seña cua' li'ihua. ¹⁴Pero li'á leca xi stucu nú aca nelliña, necatsiae equie cuenda' nú ungutí Jesucristo. Nu equie cuenda' nú ungutinu lu cruse utsa'nalá ye nú nechá neca nu' lu iliulabe quie', nu para bee nucua'

neca xi neca nú unguutilá. ¹⁵Xne chenu neca tucu necatsela bene cuna Jesucristo lecaxi zibi' tunu nequie seña bene urre la nequie seña bene. Lunú mase neca equie neca nú uche'ela nú xneca nehuañi bene. ¹⁶Nu bee bene enu nzenalala inziu' Jesucristo, Diose hua'a arqui' bee nze'e nu ri'inu nú nzuxe arqui' beella cuna yebeelá bee bene enu neli neca bee bene' Diose.

¹⁷Desde nee la nia' arquia nú zucu' llianaláhua arquia. Xne bee beya' nú nuyaa cuerpoa rlube' nú necaa apóstol' Jesucristo.

¹⁸Bee sa'a enu nzeli arquia'ahua Jesucristo, li'inu ri'inu nú cha nze'ca lu cuenda' yehua. Amén.

Carta nú uquie'e San Pablo lubee bene eyeche Efeso enu nzeli arqui' Jesucristo

Uxe'la Pablo saludo

1 Li'á Pablo, necaa tucu apóstol Jesucristo equie nú rnibiya' Diose. Rquie'a carta quie' luhua li'ihua enu neli nzeli arqui' stichia' Jesucristo, li'ihua enu necala bee bene' Diose eyeche Efeso. ²Diose Pa'ahua cuna Jesucristo enu rnibiya' lua'ahua ri'inu nú cha nze'cahua cuna nú nzuxe arqui'hua.

Rri'i Diose nú nza nze'ca lu cuenda' bee bene enu nzeli arqui' Jesucristo

³Che'tsa Diose pa' Jesucristo enu rnibiya' lua'ahua nú chiqui' ñia necanu, xne nee equie nú neca tucunecatse'ahua cuna Jesucristo, uri'ile'yalanu lia'ahua desde liñibe nu chiqui' rri'inu elietsa lua'ahua para nú chequie'ahua stichia'nu. ⁴Li'inu ucañinu lia'ahua equie cuenda' Jesucristo hasta chenu lasca' acache' iliulabe para nú huañia'ahua nu lecaxi na'ahua lunu sin dula, ⁵xne equie nú seca Diose lia'ahua, uri'inu nú riala nú aca'ahua bee lli'ñinu equie cuenda' Jesucristo, tucu nú uri'inu elliebacu'

nú acane. ⁶Enze'e, la tsana'ahua nú sucu' aya'ahua Diose equie nú chiqui' ñia necanu, xne uri'i le'yalanu lia'ahua equie cuenda' Lli'ñinu Jesucristo enu secanu. ⁷Xne udixiulanu equie cuenda' stula'ahua chenu uri'chia rene'nu lu cruse nu scua uri'ila Diose perdona stula'ahua enze'e rlube' nú chiqui' secanu lia'ahua. ⁸Enze'e chiqui' lia uliqui'nu lunú reca elliebacu'ahua cuna nú rria'ahua beya', ⁹nu ulube'lanu lua'ahua xa neca elliebacu'nu hasta hua'tu tucu nú uri'inu elliebacu' nú acane. ¹⁰Nu elliebacu'cua' tsalunu chenu riña bichia ze'e, Diose tsa'na ye nú nu' liñibe cuna beenú nu' lu iliulabe ya Jesucristo.

¹¹Le'ca equie nú neca tucu neca'tse'ahua cuna Jesucristo, ucañila Diose lia'ahua para nú aca'ahua bee bene'nu tucu nú udu' arqui'nu nú ri'inu hasta chenu lasca acache' iliulabe, xne li'inu rrinu yeene tucu nú niarqui'nu nú acane. ¹²Nu li'inu uri'ilanu scua para nú lia'ahua enu rluti uyalí arqui' Jesucristo, aca'ahua enu zucu'

ayaa Diose equie nú rnibiya'nu.
 13Le'ca li'ihua chenu ubene'hua stichia'nu nú neli neca nú xa tsila'ahua, che uyalí arqui'hua Jesucristo nu unga tucu necatsehua cuna li'inu. Nu tucu nú uni Diose nú liqui'nu Espíritu Santo luhua, nu nee nú nzula Espíritu Santo cuna li'ihua, li'inu necanu xi neca tucu sello nú rlube' nú necalahua para Diose. 14Equie nú nzula Espíritu Santo cuna lia'ahua enze'le yucua'ahua erencia nú uni Diose nú liqui'nu lua'ahua, chenu ye bee bene'nu nucua'ala liñibe para nú la tsuxe'ahua nú sucu' aya'ahua Diose equie nú rnibiya'nu.

Rnac' Pablo lu Diose nú dete'nu lunú aca elliebacu' bee bene'nu

15Nu lunú nediyala nú nzeli arqui'hua Jesucristo enu rnibiya', nu le'ca secahua beelá bee bene' Diose, 16la tsuxea nú rdetea che'tsa lu Diose equie cuenda'hua cada chenu rnacua lunu. 17Nu li'inu enu neca Diose enu rnibiya' desde liñibe, nu li'inu necanu pa' Jesucristo enu rnibiya' lua'ahua. Le'ca nacua lunu nú ri'inu nú aca elliebacu'hua para nú ri'ihua beya' lunú lube'nu luhua para nú nze chululáhua li'inu. 18Le'ca nacua lu Diose nú xa'lanu elliebacu'hua para nú ri'ihua beya' xa neca equie nú nzuculuhua hasta chenu ucañinu li'ihua nu ri'ihua beya' nú le'ca chiqui' llene nu ñia neca erencia nú nu'che' Diose para bee bene'nu. 19Le'ca rnacua lunu nú ri'ihua beya' nú chiqui' llene neca poder, nú rri'i elietsa lua'ahua nú nzeli arquia'ahua li'inu. Le'ca li'i poder llenecua' nú chiqui' ulube'

Diose lua'ahua, 20chenu uri'inu nú uhuañi zeca Jesucristo, nu uzucu' Diose li'inu cue'tse Diose chubee liñibe, 21elu udete'nu nú rnibiya'nu lunu nú máse seca lu ye elu rnibiya', cuna ye elu usticia cuna ye bee gobierno. Le'ca másela seca elu rnibiya'cua' lu ye bee elurnibiya' nú nu' cuna nú nze chu'ulá lu iliulabe quie'. 22Chequie utsa'na Diose ye bee elurnibiya' cua' ya Jesucristo enu ucañinu para nú nibiya'nu lu ye bee bene enu nzeli arqui' li'inu. 23Nu bee bene enu nzeli arqui' Jesucristo, li'inu neli nehuañinu cuna li'ibeella nu catse nzunu xne li'inu necanu enu rnibiya'li.

Utsila'a Diose lia'ahua equie nú secanu lia'ahua

2 Li'ihua unghua xi neca bene enu ungutí lu Diose equie cuenda' bee dula cuna beenú necha neca 2uri'ihua, uyanalahua inziu nú necha neca nu uri'ihua tucu nú niarqui' beze'lu nú ri'ihua, nu espíritu nú necha neca cua' neca enu nehuañi cuna bee bene enu la zucu' Stichia' Diose. 3Ye'ahua le'ca scua uhuañia'ahua tucu nú niarqui'tsia'ahua, nu tucu nú necatsia elliebacua'ahua. Nu le'ca scua tucu nú riala bee bene enu la zucu' Stichia' Diose castiya, le'ca scua ayala'ahua castiya'nu. 4Pero lunú chiqui' ñia rua'a arqui' Diose lia'ahua, nu lunú chiqui' secanu lia'ahua, 5añinzuca nú unga'ahua xi neca bene enu ungutí lu Diose, equie cuenda' stula'ahua, pero nee rlu'cula'ahua elunehuañi cuna Jesucristo lu Diose. Equie nú chiqui' ñia necanu utsila'ahua. 6Chenu

uri'inu nú uhuañi zeca Jesucristo lu eluti neca xi neca nú le'ca nua'ahua uhuañi zeca'ahua, nu le'ca neca xi neca nú nellunu'la'ahuanu liñibe. ⁷Uri'i Diose scua para nú lube'nu lua'ahua bee bichia nú nze'talá nu chiqui' secanu lia'ahua nu ñia nze'canu lua'ahua equie cuenda' Jesucristo. ⁸Lunú nze'ca Diose enze'e utsila'anu lia'ahua, la necane nu neca'ahua bene nze'ca lunu, sino que lunú nzeli arquia'ahua Jesucristo enze'e utsila'ahua. ⁹Le'ca la necane equie nu uria'ahua nú neca nze'ca utsila'anu lia'ahua para nú lecati aca nelliña. ¹⁰Xne Diose ureche' lia'ahua, nu equie cuenda' Jesucristo uche'enu arquia'ahua lunú necha uhuañia'ahua hua'tu para nú ria'ahua nú neca nze'ca, tucu nú uri'inu elliebacu' nú ria'ahua.

**Equie cuenda' Jesucristo
neca tucunecatse'ahua**

¹¹Enze'e li'ihua enu la neca bee bene Israel ullu'cu arqui'hua xa ulle'cahua hasta hua'tu. Bee bene Israel uhualee li'ihua bee bene enu la uya' seña, xne li'ibeella nuya'beella seña tucu nú rnibiya' ley, ¹²le'ca tiambu ze'e la chuluhua Jesucristo, nu la nebacu'hua leta bee bene Israel, nu le'ca la nebacu'hua lunú ucuaqui u'na Diose. Uhuañihua lu iliulabe quie' nu lecaxi nzuquie arqui'hua nu sin nú chuluhua Diose. ¹³Pero nee nú nzelila arquia'ahua Jesucristo, li'ihua enu istu utsu arqui' lu Diose, nu nee ube'ta bicalahua lunu equie cuenda' rene' Jesucristo nú uri'chia lu cruse. ¹⁴Xne Jesucristo neca

enu rri'i nú nzuxe arquia'ahua. Li'inu unitilunu elu rlee lunú rri'i nú la zela nú aca tucunecatse bee bene Israel cuna bee bene enu la neca bee bene Israel. ¹⁵Nu equie nú ungti Jesucristo ulaxu yebee custumbre nú rnibiya' ley lubee bene Israel nú rri'i beella, li'inu uri'inu nú unga tucunecatse bee bene Israel cuna bee bene enu la neca bee bene Israel xi neca tucu eyeche cuqui, xne neca tucunecatse'ahua cuna li'inu. Scua uri'inu nú uyu'u nú nzuxe arqui' bee bene. ¹⁶Xne equie nú ungti Jesucristo lu cruse, ulaxu nú rlee bee bene Israel lubee bene enu la neca bee bene Israel, nu scua iguale uyala arqui' Diose lua'ahua lunú neca tucu necatse'ahua cuna Jesucristo.

¹⁷Nu li'inu ube'ta tixiule'enu lubee bene Israel cuna lubee bene enu la neca bee bene Israel nú xa chu'u nú nzuxe arquia'ahua lu Diose. ¹⁸Nu equie cuenda' Jesucristo sia bee bene Israel nu sia bee bene enu la neca bee bene Israel, rlu'cula'ahua tucu inziu nú riña'ahua lu Diose xne nzula Espíritu Santo'nu cuna lia'ahua. ¹⁹Enze'e la neca'hua xi neca bene istu nu la neca'hua bene rene lu Diose sino que nebacu'lahua leta bee bene'nu, neca tucunecatsela'ahua cuna bee bene'nu. ²⁰Li'ihua necahua xi neca tucu ni'i nú recache'e, nu bee apóstol cuna bee profeta neca beella xi neca cimiendu' ni'i quie', nu Jesucristo neca xi neca quiee nú neca equie uzibi' nú recache' ni'i quie'. ²¹Nu ze'e uquixie riatsa

ni'i quie nú rniru nú neca li'ihua, nu scua nze liqui nze'cae para nú aca tucu necatse'ahua indu' Diose cuna Jesucristo. ²²Nu nee nú neca tucu necatselahua cuna Jesucristo, le'ca neca tucu necatselahua cuna beela bee sa'ahua enu nzeli arqui' li'inu para nú aca'ahua tucu indu elu nehuañi Diose equie cuenda' Espíritu Santo.

**Ucañi Diose Pablo para nú
ixiule'ella stichia' Jesucristo lubee
bene enu laca bee bene Israel**

3 Enze'e li'á Pablo, nchiñia ni'cu' equie nú sibi'a lu Jesucristo para nú rri'á elietsa luhua enu laca bee bene Israel. ²Li'ihua nediya'hua nú la yala ri'á riña' nú rri'á, pero lunú nze'ca Diose uliqui'nu riña' quie' rri'á para nú ri'á elietsa luhua nú ri'ihua beya' stichia'nu. ³Nu li'inu ulube'lanu lua xa neca elliebacu'nu hasta hua'tu, tucu nú unilá luhua lu tucu carta. ⁴Chenu ulahua carta cua' che ri'ihua beya' nú nediya'la xa neca equie cuenda' Jesucristo nú la ri'i bee bene beya' hasta hua'tu. ⁵Bee tiambu nú udetela lecali ti uri'i beya' xa neca equie cuenda' Jesucristo, xne ungae xi neca tucu nú a'chi' neca lubee bene, pero nee equie cuenda' Espíritu Santo ulube'la Diose nucua' lubee apóstol cuna lubee profeta. ⁶Nu lunú unga xi neca nú a'chi' neca lubee bene, necane equie cuenda' bedichia' nze'ca' Jesucristo, nú le'ca bee bene enu laca bee bene Israel riala beella erencia nú riala bee bene Israel lunú neca tucunecatse'la beella, nu nebacu'la beella lunú ucuaqui u'na Diose equie cuenda' Jesucristo.

⁷Li'á rixiule'a bedichia' nze'ca' Jesucristo lubee bene, la necane equie cuenda' nú riala nú ri'á scua sino que necane nú ñia nze'ca Diose enze'e lia uliqui'nu elurnibiya'cua' lua para nú zibi'a lunu. ⁸Li'á neca enu máse leca tineca lu ye bee bene' Diose, pero lunú ñia nze'ca Diose lia uliqui'nu lua nú ixiule'a lubee bene enu la neca bee bene Israel equie cuenda' eluxene' Jesucristo nú llene neca. ⁹Nu para nú ixiule'e nze'caa lu yebeella xa neca elliebacu' Diose enu ureche' ye nú nu', elliebacu' nú né chu alube'nu lubee bene. ¹⁰Para nú equie cuenda' bee bene enu nzeli arqui' Jesucristo ri'i ye bee enu rlu'cu nú rnibiya' liñibe beya' nú Diose rlu'cu ye poder. ¹¹Nu hasta chenu lasca' quixie iliulabe uri'ila Diose elliebacu' nú acane scua nu nee uyalulane equie cuenda' Jesucristo enu rnibiya' lua'ahua. ¹²Nu equie nú nzelila arquia'ahua Jesucristo nu'la modo xa riña'ahua lu Diose sin nú lliquia'ahua chebica'ahua lunu. ¹³Enze'e nia luhua nú la tsunehuana arqui'hua lunú nehuana se'caa equie cuenda'hua, xne neca nze'ca nucua' para li'ihua.

Chiqui' seca Jesucristo lia'ahua

¹⁴Enze'e súlliquia lu Diose pa' Jesucristo enu rnibiya' lua'ahua, ¹⁵li'inu enu rnibiya' lu ye nú nu' liñibe cuna lu iliulabe. ¹⁶Rnacua lunu, nú lunú chiqui' rlu'cunu poder nú liqui'nu juerza'ahua cuna elurnibiya' luhua equie cuenda' Espíritu Santo para nú tsuta' arqui'hua lunu, ¹⁷nu huañihua cuna Jesucristo equie nú nzeli arqui'hua

li'inu para nú scua tucu nú neli nzenalahua eluseca'nu. ¹⁸Scua acahua ri'ihua beya' cuna beelá bee sa'hua enu nzeli arquia'ahua li'inu nú eluseca Diose chiqui' llene neca, nu ni' la ria'ahua beya' xa nia'ahua lunú chiqui' llene necane. ¹⁹Enze'e rnacua lu Diose nú chuluhua eluseca cua' nú chiqui' llene neca, nu másela llene necane luquela' nú rri'i bee bene elliebacu', nu scua neza'li nú huañihua cuna Diose.

²⁰Nu li'inu enu rlu'cu nú rnibiya' para nú ri'inu másela lunú rri'i bee bene elliebacu', urre másela lunú rnacu' bee bene lunu equie cuenda' Espíritu Santo'nu nú nzu cuna lia'ahua. ²¹Nu riala nú zucu' uya'ahua Diose ye bichia nu ye tiambu equie cuenda' Jesucristo, lia'ahua enu nzeli arquia'ahua Jesucristo. Amén.

Equie cuenda' Espíritu Santo neca tucu necatse'ahua

4 Li'á enu nchiña ni'cu' lunú sibi'a lu Jesucristo, zequia luhua nú scua tucu nú necalahua bee bene' Diose, uhuañihua tucu nú riala nú huañi bee bene enu necala bee bene'nu. ²Aca lle'na arqui'hua nu aca nze'cahua, nu tsuquie arqui'hua, nu uriqui'hua bee sa'hua lunú xi rri'inu beella li'ihua, equie nú secahua beella. ³Uzu'cu' luhua nú chenalahua nú neca tucu necatsehua cuna elietsa' Espíritu Santo, enu rliqui' nú nzuxe arqui'hua, nu rri'i nú neca tucu necatsehua. ⁴Lia'ahua neca'ahua xi neca tucutsia bene, nu ye'ahua nzu Espíritu Santo cuna lia'ahua, nu scua tucu nú necala'ahua bee

bene' Diose le'ca scua tucutse nellua'aqueia'ahua nú liqui'nu lua'ahua. ⁵Tucutsia enu rnibiya', tucutsia nú nzutenelí arquia'ahua, nu tucutsia elu rrinza nu', ⁶xne nu' tucutsia Diose enu neca Pa'ahua nu li'inu rnibiya'nu lu ye'ahua. Nu li'inu rnibiya'nu lu ye beenú nu', nu nzunu cuna ye'ahua nu rria'ahua lunú niarquiu'nu.

⁷Pero cada tucua'ahua utsula Jesucristo nú ria'ahua tucu nú uniarqui'nu nú ria'ahua. ⁸Tucu nú rni lu ichi' Stichia' Diose:
Chenu uquienu liñibe,
uri'inu ana lu ye bee elurnibiya',
nu udete'nu lubee bene lunú
riala ri'i beella.

⁹Nu, ¿xi rni elu rni nú “uquienu liñibe”? Rni nucua' nú ube'tanu lu iliulabe. ¹⁰Nu Jesucristo enu ube'ta lu iliulabe, le'ca li'inu uquienu liñibe nu rnibiya'nu diquineca iliulabe. ¹¹Nu udete'lanu lubee bene lunú riala ri'ibeella, nu'beella enu uyala nú aca bee apóstol, le'ca nu'beella enu uyala aca bee profeta, nu nu' beella enu uyala nú ixiule' stichia'nu lubee bene, nu le'ca nu' beella enu uyala nú ni bezete' nu zete' bee bene enu nzeli arqui' li'inu. ¹²Scua ucañi Jesucristo bee bene'nu para nú zete' beella beelá bee bene enu nzeli arqui' li'inu para nú scua aca beella zibi' beella lunu, nu nzechululá beella li'inu, ¹³hasta nú neza'li nú nzeli arquia'ahua nú chulua'ahua lli'ñi Diose para nú ri'ilia'ahua beya' xa riala chenala'ahua Jesucristo tucu nú rialane. ¹⁴Chequie la aca neriña' nú zequienu bee bene lia'ahua xi sequienu bee bene bee

endu', la aca'ahua xi necha tucu nú ruya' bii enzichiu' enzerquie equie yelu beenú rdichia' bee enu rla'na nú xa modo zequienu bee bene. ¹⁵Sino que rqui'ña nú nia'ahua nú nelíneca nu chenala'ahuane cuna eluseca nú rlu'cua'ahua, nu lunú necha tucunecatse'ahua cuna Jesucristo enu rnibiya' lua'ahua chenala'ahua tucu nú niarqui'nu nú ria'ahua. ¹⁶Xne equie cuenda' Jesucristo iguale necha'ahua nu necha'ahua xi necha tucutsia bene, ye'ahua enu nzeli arqui' Jesucristo, xne equie cuenda'nu necha tucu necatse'ahua, nu cada tucua'ahua ria'ahua lunú riala ria'ahua para nú ria'ahua elietsa lubee sa'ahua, nu zeca'la'ahua bee sa'ahua.

**Elunehuañi nú necuqui
rliqui' Jesucristo**

¹⁷Nu nee equie cuenda' Jesucristo nialuhua: La huañihua xi nehuañi bee bene enu la chulu Diose, xne li'ibeei nehuañitsiabeei lunú necatsia elliebacu'bee ¹⁸nu necabe necha elliebacu'bee. Nu la zucu'lubeei nú huañibeei tucu nú niarqui' Diose nú huañibeei, equie nú la ri'ibeei beya' nu nziti arqui'bee. ¹⁹Leca' xi zeca beei nu utsana' arqui'labeei le'catsia li'ibeei nu rri'ibeei seidu nú nzeri'ibeei yelu clasia' beenú necha necha. ²⁰Pero li'ihua lá chuluhua Jesucristo para nú huañihua scua, ²¹tunu neli nú ubene'la'hua lu cuenda'nu, nu neli nú ungalahua beenú neli necha nze'ta lunu. ²²Utsana arqui'hua lunú uhuañihua chenu lasca' chuluhua li'inu nucua' rnitilutsia li'ihua, xne bee

elliebacu' nú necha necha uzequienu li'ihua nu uri'itsiahua tucu nú uniarqui'tsiahua. ²³Uche'elihua xa necahua, ²⁴para nú acahua xi necha tucu bene cuqui enu ureche' Diose tucu nú niarqui'nu cuna tucu elunehuañi nú leca nú lixiu necha tucu nú rialane, equie cuenda' stichia'nu nú neli necha.

²⁵Enze'e la nia'hua eluquichia', uni'itsiahua nú neli necha lubee sa'hua xne necha tucu necatsela ye'ahua.

²⁶Tunu rlehua, la ri'ihua dula. La duche'hua elu rleca' arqui'hua debichia. ²⁷Para nú la dete'hua luhua nu ri'i beze'lu ana luhua.

²⁸Bene enu rcachi' rqui'ña nú tsana'lla nú rcachi'lla, nu ri'illa riña' para nú equie riña' nze'ca nú rri'illa nu' modo ri'illa elietsa lubee bene enu nu' xi secala'cha'.

²⁹Le'ca la nihua bee bedichia' nú necha necha, uni'itsiahua puro bedichia' nze'ca nú ri'i elietsa nu zibi' lu beelá bee bene enu yene'e.

³⁰La ri'ihua nú tsúnehuana arqui' Espíritu Santo' Diose nú nzula cuna li'ihua xi necha tucu seña nú rlube' nú necalahua bee bene'nu para bichia nú riñahua lunu.

³¹Utsa'nahua tucu chu ye nú rlee nzu arqui'hua, nu elu rlee, nu elu rana arqui', cuna nú rixialihua lu sa'hua, cuna bee bedichia' chi'qui', cuna ye beenú necha necha. ³²Aca nze'cahua, nu uhua'a arqui'hua bee sa'hua nu uri'ihua perdona bee sa'hua tucu nú uri'i Diose perdona li'ihua equie cuenda' Jesucristo.

Xa riala huañi bee bene' Diose

5 Scua tucu nú necalahua lli'ñi Diose enu secanu, ula'nahua

nú ri'ihua tucu nú rri'inu. ²Huañi nze'cahua, uzecahua bee sa'hua tucu nú seca Jesucristo lia'ahua nú udete' cuendanu li'inu nú ungotinu equie cuenda'ahua, nu unganu xi neca tucu u'na nú ñia rlia para Diose.

³Li'ihua enu necala bee bene' Diose, la tsu neyi'hua nu ni' la yala nihua bee bedichia' nú necha see, cuna yelu beenú lecaxi zibi'. ⁴La nihua bee bedichia' nú necha see, ni' bee bedichia' nú lecaxi zibi' nu bee bedichia' nú la yala nihua, xne la neca nze'ca bee nucua'. Mejora ude'tehua che'tsa lu Diose. ⁵Xne nediya'la'hua nú bee bene enu nehuañi lu eluhexe, nu bee enu rri'li nú necha neca, nu bee enu neyi' rcua'a nu niarqui' lu'cu huaxi beenú lu'cu, máse seca beei bee nucua' luquelá Diose, leca modo chu'u bee nze'e elurnibiya' Jesucristo nu Diose. ⁶La zelahua nú ti zequienu li'ihua cuna bee bedichia' nú lecaxi zibi', xne equie beenú lecaxi zibi' cua' nze'ta castiya' Diose lubee bene enu la zucu' stichia'nu. ⁷Enze'e la ri'ihua tucu nú rri'ibeei.

⁸Ante uhuañihua xi neca bene enu necabe ellie'bacu', pero nee lunú neca tucu necatselahua cuna Jesucristo enu neca ellie'e luhua. Enze'e uhuañihua xi nehuañi bee bene enu nzenala ellie'e cua', ⁹xne lunú nzenala bee bene ellie'e cua', che rri'illa nú neca nze'ca, tucu nú rialane nu tucu nú neli neca. ¹⁰Ucua'nahua nú ri'ihua tucu nú riu' arqui' Diose. ¹¹La ri'ihua beenú la zibi' nú rri'li bee bene enu necabe nzu ellie'bacu', sino que uni'hua lubeei para nú ri'ibeei beya' lunú

rri'ibeei. ¹²Xne hasta rtu'bene ni lunú rri'li a'chi'beei. ¹³Pero equie cuenda' stichia' Jesucristo chu ri'ibeei beya' lunú rri'ibeei. ¹⁴Xne equie cuenda' stichia'nu rri'li bee bene beya' yeene. Enze'e rni lu ichi' Stichia' Diose:

Ude'te' ellie'e li'ilu enu nza inziu nú necha neca, utsana' arqui' stulalu che xa'la Jesucristo ellie'bacu'lu.

¹⁵Enze'e ubi'yahua xa nehuañihua, xne la neca nú lia nehuañihua sino que ubi'yahua xa nehuañihua. ¹⁶Diquila nú nehuañihua la zelahua nú lia xle'e dete bee bichia'hua, uhuañihua tucu nú riala huañihua, xne tiambu quie' necha nehuañi bee bene. ¹⁷Enze'e la huañihua lunú necatsia ellie'bacu'hua, sino que ucua'nahua nú ri'ihua beya' xa niarqui' Diose nú huañihua. ¹⁸La lluchi'hua, xne elu xuchi' cua' rnitilu bene, mejora uzelahua nú nibiya'li Espíritu Santo luhua. ¹⁹Uni'hua lubee sa'hua bee Salmo, cuna bee himno, cuna bee canto nú neca para Diose, nu diquinu' arqui'hua ula'hua nu uzu'cu' ayahua Diose. ²⁰Nu equie cuenda' Jesucristo ude'tehua che'tsa lu Pa'ahua Diose ye bichia equie ye beenú rri'inu lua'ahua.

Xa riala nú huañi bee bene enu nzeli arqui' Jesucristo

²¹Uzu'cu'hua nú rni bee sa'hua equie nú rlu'cuhua ula'na lu Jesucristo.

²²Nu li'ihua bee una'a enu nechia uzu'cu'hua nú rni bee niyu'hua, tucu nú sucu'hua nú rni Jesucristo. ²³Xne niyu rnibiya' lu una'i, tucu

nú rnibiya' Jesucristo lubee bene enu nzeli arqui' li'inu, li'inu enu utsila'a li'ibeei. ²⁴Nu le'ca scua tucu nú sucu' bee bene enu nzeli arqui' Jesucristo stichia'nu, le'ca scua bee una'a enu nechia rqui'ña nú zucu'hua nú rni bee niyu'hua tucu nú rialane.

²⁵Le'ca li'ihua bee niyu enu nechia uzecahua bee una'hua, tucu nú seca Jesucristo bee bene enu nzeli arqui' li'inu, nu hasta ungutinu equie cuenda'beella.

²⁶Para nú uquieenu li'ibeella lu cuenda' stula beella. Uquieenu li'ibeella equie cuenda' stichia'nu nu cuna equie cuenda' elu rrinza, ²⁷para nú ñia naa beella riña beella lunu nu lecaxi na beella, sin ni' tucu equiya nu ni' xitse stucu bee dula, sino que lecalí xi naa beella sin dula. ²⁸Le'ca scua bee niyu enu nechia rqui'ña nú zeca beella una'a beella, tucu nú seca beella li'ibeella. Nu enu seca una'a seca le'ca li'i.

²⁹Xne ni' tucu bene la chana arqui' le'catsia li'i, sino que rebaculla li'illa nu ri'yalla li'illa, tucu nú rri'i Jesucristo cuna lia'ahua enu nzeli arqui' li'inu, ³⁰equie nú neca tucu necatse'ahua cuna li'inu. ³¹Enze'e tucu nú rni lu ichi' Stichia' Diose: "Tsa'na niyu pa'lla cuna na'lla para nú aca tucutsialla cuna una'lla, nu rucu beella aca beella xi neca tucutsia bene." ³²Chiqui' neriña' nú ri'i nze'ca bee bene beya' bee bedichia' quie!, pero rniine xne le'ca scua neca Jesucristo cuna bee bene'nu. ³³Nee bee niyu uzecahua bee una'hua tucu nú secahua li'ihua, nu li'ihua bee una'a ulu'cuhua ula'na lubee niyu'hua.

6 Le'ca esquie li'ihua bee endu', uzu'cu'hua nú rni bee uzana'hua xne scua rialane, equie nú nzeli arqui'hua Jesucristo. ²Nu mandamiento rluti nú rni nú yucu cuenda'ahua lunú ucuacui u'na Diose lua'ahua tunu zucua'ahua mandamiento nú rni: "Ulu'cu ula'na lu pa'lu cuna lu na'lu, ³para nú huañi nze'calu nu huañixeelu lu iliulabe quie!"

⁴Nu le'ca esquie li'ihua bee paa cuna bee naa, la detehua lunú rri'inuhua bee endu'hua para nú la leebeci equie cuenda' nucua', mejora ubi'ya nze'cahua li'ibeei, uni'hua bezete' lubeei nu uze'tehua li'ibeei tucu nú niarqui' Diose.

⁵Nu li'ihua bee enu rri'i riña' bee bene, uzu'cu'hua nú rni bene enu rri'ihua riña'lu lu iliulabe quie!, nu diquinu' arqui'hua ulu'cuhua ula'na lubeella, nu uzu'cu'hua nú rni beella, uri'ihua xineca nú rri'ihua riña' Jesucristo.

⁶Uri'ihua riña' beella, nu la ri'ihuane chenu ri'yatsia beella luhua para nú ya'na nze'cahua lubeella, sino que uri'ihua riña' beella xi neca nú sibi'hua lu Jesucristo, equie nú neli rri'ihua tucu nú niarqui' Diose nú ri'ihua. ⁷Uri'ihua riña' beella diquinu' arqui'hua, uri'ihuane xi neca nú rri'ihua riña' Jesucristo xne la necatsiae riña' bee bene. ⁸Nu li'ihua nediya'la'hua nú cada bee bene, mase nú necalla moso' urre lacalla moso', pero dete' Jesucristo lulla nú riala nú ati'lla equie nú neca nze'ca uri'illa.

⁹Le'ca esquie li'ihua bee patrón, aca nze'cahua lubee moso'hua, la

ri'ihua nú nehuana zeca beella. Xne li'ihua nediya'hua nu li'inu enu rnibiya' lubeella nu luhua nzucunu liñibe nu ante lunu iguale neca ye bee bene.

Utsuta' arqui'hua lunú nzeli arqui'hua Jesucristo

¹⁰Le'ca nia luhua bee sa'a enu nzeli arquia'ahua Jesucristo nú utsuta' arqui'hua lunú neca tucu necatsela'ahua cuna li'inu, lunú chiqui' rnibiya'nu. ¹¹Ubi'yahua li'ihua cuna elietsa' Diose para nú tsuta' arqui'hua, nu para nú la ri'i beze'lu ana luhua nú zequienui li'ihua. ¹²Xne la liunua'ahua bee bene lu iliulabe quie', sino que rliunua'ahua cuna yelu clasia' bee benechiqui', sia bee enu rlu'cu nú rnibiya', cuna enu rlu'cu elu usticia, cuna ye beelá bee espíritu' beze'lu nú nu', nu rnibiya' lu iliulabe quie'. ¹³Enze'e ubi'yahua li'ihua cuna poder nú rliqui' Diose luhua para nú riqui'hua lu xitse beenú nehuana nze'ta zecahua, nu utsuta' arqui'hua mase secahua lunú secahua. ¹⁴Utsuta' arqui'hua lunú neli neca nú nediya'la'hua, nu uyanalahua tucu nú riala nú huañihua. ¹⁵Ucua'a tsiñahua para nú ixiu'e'ehua lubee bene bee bedichia' nze'ca' Jesucristo nú rri'i nú nzuxe arqui' bee bene lu Diose. ¹⁶Nu lu yeene la zañi'hua lunú nzu tenelí arqui'hua, nú neca nú rri'i elietsa luhua luye beenú necha neca nú nze'ta lu beze'lu. ¹⁷Nu lunú utsila'a Diose li'ihua nucua' neca nú recanu' li'ihua, nu

stichia'nu neca xi neca tucu espada nú rliqui' Espíritu Santo luhua. ¹⁸La tsana'hua nú rnacu'hua lu Diose. Uzequiehua lunu nu una'cuhua lunu yebichia cuna elietsa' Espíritu Santo. Utsutsiñahua una'cuhua lunu nu la llaca'hua, nu una'cuhua lunu equie cuenda' ye bee bene'nu. ¹⁹Le'ca una'cuhua lu Diose lu cuendaa para nú liqui'nu bee bedichia' nú riala nia para nú aca ixiu'e'ene lubee bene sin nú lliquia, nu nia bee bedichia' nze'ca' Jesucristo nú rni nú xneca tsila'a bee bene. ²⁰Uxe'la Diose li'á para nú ixiu'e'la bee bedichia' nze'ca quie', enze'e nchiñia ni'cu' nee. Pero una'cuhua lu Diose para nú la lliquia nia equie cuenda'nu tucu nú riala nú nia.

Último bedichia' nú nequie lu ichi' quie'

²¹Tíquico, enu neca tucu bee sa'ahua enu chiqui' se'ca'ahua enu neli rri'i elietsa lua'ahua lunú sibia'ahua lu Jesucristo, li'illa ixiu'e'ella luhua lu ye nú xa nzucua'a ca'a nu xi rri'á. ²²Xne para enze'e xe'lalla luhua para nú ixiu'e'ella luhua nú xa nellua'aru ca'a, nu scua du'lla ana arqui'hua. ²³Nacua lu Diose nú ye bee sa'ahua enu nzeli arquia'ahua Jesucristo liqui'nu nú nzuxe arqui'hua, cuna eluseca, cuna nú chililá arqui'hua Pa'ahua Diose nu Jesucristo enu rnibiya'. ²⁴Diose ri'i nú cha nze'ca lu cuenda' ye bee bene enu neli seca Jesucristo enu rnibiya'. Amén.

Carta nú uxe'la San Pablo lubee bene enu nzeli arqui' Jesucristo eyeche Filipino

Uxe'la Pablo saludo

1 Li'á, Pablo cuna Timoteo, li'iru enu sibi' lu Jesucristo xe'laru cartaque' lu yehua bee enu nzeli arqui' Jesucristo enu nucua'a eyeche llene Filipino. Li'ihua bee enu rnibiya' nu sete' Stichia' Diose lubee bene, cuna bee enu rri'i elietsa lubee bene enu nzeli arqui' stichia'nu. ²Diose Pa'ahua cuna Jesucristo enu rnibiya' lua'ahua ri'inu nú cha nze'ca lu cuenda'hua cuna nú nzuxe arqui'hua.

Unacu' Pablo lu Diose

³Cada chenu rellu'cu' arquia li'ihua rdetea che'tsa lu Diose, ⁴nu chiqui' ñia nzu arquia rnacua lunu equie cuenda' yehua, ⁵xne desde bichia' nú uquixie uchili arqui'hua Jesucristo nu hasta nee rri'ihua elietsa nú rixiule'ahua stichia' Jesucristo lubee bene. ⁶Li'á nediyaa nú hasta chenu uquixie uchili arqui'hua Stichia' Diose rri'inu elietsa luhua para nú nze acahua tucu nú riala acahua hasta bichia chenu riña zeca Jesucristo.

⁷Scua riala nú ri'a elliebacu' equie cuenda'hua, xne siempre nchiucu' arquia li'ihua, sia chenu nchiña ni'cu' urre chenu rixiule'a lubee bene ta nú neli neca equie cuenda' Diose xne iguale rri'i nze'ca Diose lua'ahua. ⁸Nediya' Diose nú chiqui' nchiucu' arquia li'ihua xne chiqui' se'ca li'ihua tucu nú seca Jesucristo li'ihua. ⁹Nu rnacua lunu equie cuenda'hua, nú másela zecahua bee sa'hua ye bichia nu liqui'lánu elliebacu'hua nú ri'iláhua beya' xa ri'ihua, ¹⁰para nú scua acahua cañihua ta nú neca nze'ca nu scua huañi nze'cahua nu la lu'cuhua dula lu Diose para nú lecaxi equiya lu'cuhua chenu riña zeca Jesucristo. ¹¹Nu equie cuenda' li'inu huañihua tucu nú niarqui' Diose para nú lu'culá bee bene ula'na lu Diose nu zucu' aya bee bene li'inu.

Para Jesucristo nehuaña

¹²Bee sa'a enu nzeli arquia'ahua Jesucristo niarquía nú ri'ihua beya' nú mase ulle'ca lunú ulle'ca pero uri'i nucua' elietsa nú uri'chia letselá bedichia' nze'ca' Jesucristo.

¹³Xne nee yebee bene enu nucua'a liñi palacio cuna beelá bee bene nediya'beeí nú nchiñia ni'cu' equie nú necaa bene' Jesucristo. ¹⁴Nu chenu ungabiya' bee sa'ahua enu nzeli arqui' Jesucristo nú nchiñia ni'cu' másela utsuta' arqui'beella nu casi yebeella uyu'u ana arqui'beella udixiule'e beella stichia' Jesucristo, sin nú lliqui beella.

¹⁵Pero neli nú nu'bee bene enu rixiule'e stichia' Jesucristo ria arqui'beeí, nu niarquí'beeí nú másela aca equiebeeí lua, pero nu' beelá bee bene enu rixiule'e stichia'nu diquinu' arqui'beella. ¹⁶Nu' bee bene rixiule'e stichia' Jesucristo equie nú secabeella li'ínu, nu nediya'beella nú nchiñia ni'cu' equie nú nzuta' arquia lu stichia' Jesucristo.

¹⁷Pero nu' bee bene enu la ixiule'e stichia' Jesucristo diquinu' arqui', rri'itsia beella scua para nú zucu' aya bee bene li'ibeella para nú nehuana zecaa diqui nú netsea ni'cu'. ¹⁸Pero para li'á lecaxi ri'i tunu diquinu' arqui'beella rixiule'e beella stichia' Jesucristo nu tunu la ri'i beellae diqui nu' arqui'beella lecaxi ri'i nucua', pero lunú rixiule'e beella stichia' Jesucristo nucua' mase neca nze'ca, nu nucua' chiqui' ñia nzu arquia, nu ñiasca'la nzetsu arquia. ¹⁹Xne nediyaa nú la'acaa lu yebeenú se'caa, xne rñacu'hua lu Diose equie cuendaa nu rri'i Espíritu' Jesucristo elietsa lua. ²⁰Nediya nze'caa nú leca bichia nú tua, nu la lliquia lubea lubee bene xneca rlu'cua ula'na lu Jesucristo, mase nú nehuaña urre ungutiaa. ²¹Xne para li'á diqui nú nehuaña

sibi'a lu Jesucristo, nu tunu atia máse neca nze'cae xne nzula cuna li'ínu. ²²Pero tunu nehuañisca'a lu iliulabequie', rqui'ña nú zibia'a lunu tucu nú rialane. Pero la ri'á beya' ta nú máse neca nze'ca. ²³Xne chiqui' neriña' nú ri'á beya' ta lu rucu bee nucua' caña. Tucue nú niarquía atia para nú nzia'a lu Jesucristo liñibe, nu nucua' máse neca nze'ca para li'á, ²⁴pero para nú nu' modo ri'á elietsa luhua, máse neca nze'cae tunu nehuañisca'lá. ²⁵Nu nediya nze'caa nú nehuañisca'lá lu iliulabequie' para nú ri'a elietsa luhua nú chenalahua inziu' Diose nu chu'u ana arqui'hua lunú nzeli arqui'hua Jesucristo. ²⁶Nu chenu nzelabi'ya zecaa li'ihua stucu bese ñia tsu arqui'hua cuna Jesucristo equie cuendaa.

²⁷Pero lunú niarquía neca nú huañi nze'cahua tucu nú rni bedichia' nze'ca' Jesucristo. Xne tunu nzelabi'yahua, urre la yelabi'yahua, pero niarquía yenea nú junto nzuta' arqui'hua lu Jesucristo nu neca tucunecatsehua rixiule'ehua stichia'nu, ²⁸nu la lliquihua bee bene enu rle luhua. Nu scua aca ahee nú nenitilula beeí lu Diose, pero para li'ihua scua acachee nú utsila'ala Diose li'ihua lu stulahua. ²⁹Ñia neca lu cuenda'hua nu la nzelitsia arqui'hua Jesucristo sino que le'ca nehuana secahua equie cuenda' li'ínu. ³⁰Li'ihua cuna li'á iguale se'ca'ahua equie nú rixiule'ahua stichia' Jesucristo, ulañi'la'hua xneca uri'á equie cuenda' stichia'nu, nu nee riene'hua xneca rri'á.

Unga lle'na arqui' Jesucristo

2 Nequie tunu ñia nzu arqui'hua equie cuenda' Jesucristo, nu

tunu secahua bee sa'hua, nu tunu nzu Espiritu Santo cuna li'ihua tunu rri'i nze'cahua lubee sa'ahua, tunu rua'a arqui'hua bee sa'hua, ²scua uhuañihua para nú ñiala tsu arquia, uhuañi nze'cahua cuna bee sa'hua, nu uzecahua bee sa'hua nu tucutsia elliebacu' uri'ihua. ³Lunú ri'ihua, la ri'ihuane para nú ri'itsiahua ana lubeelá bee bene, urre para nú zucu' ayahua li'ihua nzalá nú aca lle'na arqui'hua lubeelá bee bene uri'hua elliebacu' nú neca equielá bee bene luquela li'ihua. ⁴La la'nahua nú huañi nze'ca li'itsiahua, sino que ula'nahua nú ri'ihua elietsa lu beelá bee bene.

⁵Aca lle'na arqui'hua tucu nú unga lle'na arqui' Jesucristo, ⁶Xne añinzuca nú necanu Diose pero né tsuta'nu nú aninu nú igualenu Diose. ⁷Sino que uhuachunu nú rnibiya'nu, nu ube'tanu lu iliulabequie' xi neca tucu moso' nu ungulanu xi rala bee bene. ⁸Nu chenu unganu bene iliulabe unga lle'na arqui'nu, nu uzucu'nu nú uni Diose, hasta ungutinu lu cruse. ⁹Enze'e chiqui' udete' Diose nú rnibiya'nu nu uri'i Diose nú chiqui' neca equie nú leenu luyeebe nú lee bee bene. ¹⁰Para nú chenu yene' bee bene nombre' Jesucristo, che ye bee bene enu nucua'a liñibe, cuna ye bee enu nucua'a lu iliulabe, cuna ye bee enu nucua'a liñi yuu, yebeella tsulliqui beella lunu. ¹¹Nu ye bee bene nii nú li'inu necanu enu rnibiya' lu yeene para nú zucu' ayabeella Pa Diose.

**Bee bene' Jesucristo neca xi
neca ellie'e lu iliulabe**

¹²Bee sa'a enu nzeli arqui'
Jesucristo chiqui' se'ca li'ihua, xne

siempre uzucu'hua nú rnia chenu nzua letahua, le'ca scua uzu'cu'hua nú rnia nee nú lecaa luhua.

Ulliquihua Diose nu ulu'cuhua ula'na lunu, xne scua riala ri'i bee bene enu utsila'la Diose. ¹³Xne lu Diose nze'ta elliebacu' nze'ca nú rri'ihua, nu rri'inu elietsa luhua para nú ri'ihua lunú riu' arqui'nu.

¹⁴Uri'ihua ye lunú riala ri'ihua sin nú lehua, nu sin nú liuhua.

¹⁵Para nú lecaxi niquiya bee bene lu cuenda'hua nu la ze'ta beei li'ihua. Li'ihua enu neca lli'ñi Diose uri'i nze'cahua lubee bene enu la chenala inziu' Diose, lubee enu nzenalatsia inziu nú necha neca para nú acahua letabeei xi neca bee belá enu rdu'llie'e liñibe. ¹⁶Lunú nzuta' arqui'hua lu Stichia' Diose nú rliqui' elu nehuañi. Scua ñia tsu arquia equie cuenda'hua xne nediyaa nú uzibi' nú uri'á nu né chenze xle'a. ¹⁷Xne lunú nzeli arquia'ahua Diose neca xi neca u'na lunu, nu ñia nzu arquia. Lecaxi ri'i mase nú atia para nú za' u'na cua', lunú ñia nzu arquia lu cuenda'hua. ¹⁸Le'ca scua ñiañia tsu arqui'hua tucu nú ñia nzu arquia.

Timoteo nu Epafrodito

¹⁹Tucutse Jesucristo lalea' xe'la Timoteo luhua para nú ñia tsu arquia chenu ye'tayulla resuna lua nú xneca nucua'ahua. ²⁰Xne lecati stucu enu nzenu arqui' tucu nú nzenu arqui' Timoteo nú xneca nucua'ahua tucu nú nzenu arquia equie cuenda'hua; ²¹ye beelá bee bene nzenutsia arqui' lunú xneca nehuañi nze'ca, pero la chenu arqui'beella nú ri'ibeella lunú niarqui' Jesucristo. ²²Pero

li'ihua nediya'la'hua xneca rri'i Timoteo, nu le'ca nediya'hua xneca rri'illa elietsa lua nú rixiule'eru stichia' Jesucristo, tucu nú rri'i tucu endu' elietsa lu pa'lla scua rri'illa elietsa lua. ²³Enze'e niarquía x'e'la Timoteo luhua, chenu ri'á beya' nú xneca chiulue lu cuendaa. ²⁴Tucutse Jesucristo nzuculua nú chu nzelabi'ya li'ihua.

²⁵Se'ca nú rqui'ña x'e'la zeca sa'ahua Epafrodito luhua, li'ihua uxe'lahualla lua nú ri'illa elietsaa lunú xi rqui'ña. Nu scua rri'illa elietsa lua nu junto nehuana ulle'caru. ²⁶Nu chiqui' niarquí'lla lañi' zeca'lla li'ihua, nu nzenu arquí'lla equie cuenda'hua equie nú unga biya'hua nú unga ritilla. ²⁷Neli nú unga ritilla hasta nú yamerotsia atilla. Pero uhua'a arquí' Diose li'illa, nu la neca lu cuenda' li'itsialla sino que le'ca uhua'a arquí'nu li'á, para nú la nehuanalá nzu arquía tucu nú nehuanala utsu arquía, ²⁸enze'e chu x'e'la zecalla luhua para nú ñia tsu arquí'hua, lunú lañi'hua li'illa, nu para nú la tsunehuanalá arquía. ²⁹Chenu riñalla luhua ñia utsu arquí'hua uyucu nze'cahualla, lunú necalla sa'ahua enu nzeli arquía'ahua Jesucristo, nu zecahua beelá bee bene enu neca xi neca li'illa. ³⁰Xne yamero atilla equie nú sibi'lla lu Jesucristo, nu yamero atilla equie nú uri'illa elietsa lua, luhuae nú leca modo ari'ihua elietsa lua.

**Máse neca equie nú chulu
bee bene Jesucristo**

3 Bee sa'a enu nzeli arquía'ahua Jesucristo ñia tsu arquí'hua

cuna Jesucristo, la llaca nú nii zecaa bee bedichia' nú unilá luhua, xne neca nze'ca nú ni zecane luhua para nú lecati zequienu li'ihua. ²Ubi'yahua li'ihua lubee bene enu necha neca, nu lubee bene enu necha rri'i, lubee bene enu rri'i juerza bee bene nú quie seña elunecahi' bee bene xi rquie seña elunecachi' bee bene Israel. ³Xne bee bene enu neli nequie seña' Diose neca lia'ahua bee enu rlu'cu ula'na lu Diose, xne nzu Espíritu Santo cuna lia'ahua, nu ñia nzu arquía'ahua lunú neca'la'ahua bene' Jesucristo, pero la necane nú nzenala'ahua bee custumbre nú rri'i bee bene Israel. ⁴Añinzuca nú rlu'cua resuna nú nellíñiaa, equie ye beenú uri'á, pero tunu nu' bee bene enu nellíñia equie cuenda' nú xi rri'illa, pero li'á máse rlu'cua resuna nú nellíñiaa. ⁵Xne chenu uza' xunu bichia nú ungulaa uquie seña elunecachia nú necaa bene Israel nu necaa lli'ñi aca tuxie Benjamín, rnia dialu Israel xne neca bene hebreo, nu uri'á ye nú rnibiya' ley nú ri'á, xne unga fariseo. ⁶Uri'á tucu nú rni ley, nu hasta necha uri'inua bee bene enu nzeli arquí' Jesucristo, hasta nú lecati né ufanabitsi nú lá ri'á tucu nú riala ri'á xne nzie' nú rni ley uzucua. ⁷Ye beenú uri'á tiembu ze'e chiqui' unga neca equíee ulle'ca, pero nee la neca equíee'ae para li'á, xne nee Jesucristo neca enu máse neca equie para li'á. ⁸Nu para li'á lecaxi stucu nú mase seca luquela nú nzeli arquía Jesucristo, nu equie cuenda'nu ye nú uri'á hua'tu uhuachulane, nu necane xi

neca ixi para li'á para nú nibiya'li Jesucristo lua, ⁹nu aca tucutsia cuna li'ínu. Nu la lu'cu cuendaa nú equie nú rri'á tucu nú rnibiya' ley nú la lu'cua'a dula lu Diose sino que rlu'cu cuendaa nú equie nú nzeli arquia Jesucristo la lu'cua'a dula lu Diose. ¹⁰Niarquia chululá equie cuenda' Jesucristo, nu niarquia nú lu'cua poder nú ulu'cunu, nú ulu'cunu chenu uhuañi zecanu lu eluti, nu riquia xitse nú nehuaña zeca tucu nú uriqui'nu, nu zela nú atia tucu nú uzelanu. ¹¹Lunú nzuta' arquia nú huañi zecaa lu eluti tucu nú uhuañizecanu.

**Rqui'ña nú ria'ahua
lunú riala ria'ahua**

¹²La nia luhua nú uri'ilá ana uri'á yeene, urre neca bene nze'ca, pero rla'na nú nzeri'ilá tucu nú niarqui' Jesucristo nú ri'á desde bichia nú uyu'uluanu. ¹³Bee sa'a enu nzeli arquia'ahua Jesucristo, nia luhua nú lasca' ri'a ana nú zucua yeene, pero ye nú uri'á hua'tu uzañiláne, nu nee rri'itsia elliebacu' nú nze'tala, ¹⁴para nú ri'á yeene tucu nú rialane, para nú atia premio nú liqui' Diose lua liñibe equie nú nzeli arquia Jesucristo. ¹⁵Ye'ahua enu rri'i nze'cala beya' Stichia' Diose, rqui'ña nú ria'ahua elliebacu' scua nu tunu nu'ta enu rri'i elliebacu' nú lacane scua, Diose dete' elliebacu'lla para nú úri'illa beya' xa necane. ¹⁶Pero rqui'ña nú huañi nze'ca'ahua tucu nú rri'ila'ahua beya' nú riala huañia'ahua.

¹⁷Bee sa'a enu nzeli arquia'ahua Jesucristo, uhuañihua tucu nú nehuañiaa nu le'ca ubi'yahua xneca

nehuañi bee bene enu nehuañi tucu nú nehuañiaa. ¹⁸Xne huaxi bese unila luhua, nu nee hasta runa rnia luhua nú nu' huaxia'ahua bee enu nehuañi xi nehuañi bee bene enu lachili arqui' para nú xi nú unguti Jesucristo lu cruse. ¹⁹Nu' bee bene cua' nzuquietsia castiya li'ibeei xne rri'ibeei puro beenú necha neca nú nu' ana arqui'beei ri'ibeei, luhua nú tu'bee a'lla mase reca nelliañibeei equie nú mase rri'ibeei elliebacu' lubeé nú nu' lu iliulabe quie'. ²⁰Pero lia'ahua liñibe neca elu chua'ahua, nu enza liñibe nellua'a quie'ahua nú nze'ta zeca Jesucristo li'ínu enu utsila'ala lia'ahua. ²¹Nu li'ínu che'enu cuerpo nú rlu'cua'ahua nee para nú aca cuerpo'ahua xi neca cuerpo'nu nú ñia naa rlu'cunu liñibe, nu scua ri'ínu equie nú rnibiya'nu lu yeene.

**Ñiatsu arqui'hua equie nú
necahua bene' Jesucristo**

4 Bee sa'a enu nzeli arquia'ahua Jesucristo, chiqui' se'ca li'ihua, nu niarquia nzelabi'ya li'ihua, xne li'ihua rri'ihua nú ñia nzu arquia nu necahua xi neca tucu premio para li'á, utsuta' arqui'hua nú nzeli arqui'hua Jesucristo. ²Zequia lu Evodia, cuna lu Síntique nú aca tucunecatse elliebacu' beella equie nú tucutse nzeli arqui'beella Jesucristo. ³Le'ca zequia lulu sa'a enu junto rixiule'a Stichia' Diose, nú ri'ilu faura ri'ilu elietsa lubeé una'a quie, xne uri'ibeella elietsa lua nú udixiule'eru stichia' Jesucristo, cuna Clemente nu beelá bee sa'ahua enu uri'i elietsa lua. Nu nzucu ichila nombre' beella lu libro' Diose liñibe elu huañilí bee bene.

⁴Nia luhua nú siempre ñia utsu arquí'hua equie nú necahua bee bene' Jesucristo. Nia luhua stucu bese nú ñia utsu arquí'hua.

⁵Ula'nahua nú ye bee bene ri'i beya' nú ñia nze'cahua, lu ye bee bene, xne la lea' nú riña zeca Jesucristo lu iliulabe.

⁶La chenu arquí'hua lu ni'tucu nú secahua. Sino que una'cu'tsaiahua lu Diose luye nú secahua nu la zañi'hua nihua che'tsa lunu chenu rnacu'hua lunu. ⁷Nu liqui' Diose nú nzuxe arquia'ahua nú lecati ri'i beya' nu chiqui' llene necane. Nu lunú nzuxe cua' ri'i elietsa luhua para nú nzuxe elliebacu'hua lunú necahua bene' Jesucristo.

Uri'ihua elliebacu' nú neca nze'ca

⁸Ante nú laxu quie'a carta quie' nia luhua bee sa'a enu nzeli arquí' Jesucristo, nú ri'ihua elliebacu' lunú neli neca, nu uri'ihua elliebacu' lunú riala ula'na, nu uri'ihua elliebacu' tucu nú necane, nu uri'ihua elliebacu' lunú sibi' riu' arquí' Diose, nu lunú ri'i elietsa luhua nú ri'i nze'cahua, nu lunú riala ri'i tucu bene enu nehuañi nze'ca, uri'ihua elliebacu' nú riu' arquí' Diose bee bene.

⁹Uri'ihua tucu nú uzetela li'ihua, tucu nú ulubela luhua nú ri'ihua, uri'ihua tucu nú unila luhua nu uri'ihua tucu nú ulañi'la'hua xa uri'á, nu scua ri'i Diose elietsa luhua li'inu enu rliqui' nú nzuxe arquí' bee bene.

**Elietsa nú uri'i bee bene
eyeche Filipino lu Pablo**

¹⁰Chiqui' ñia nzu arquia lu Jesucristo nú ullu'cu' zeca

arquí'hua li'á. La nia luhua nú uzañi'hua li'á sino que necane nú lá lu'cuhua xneca modo axe'lahua elietsacua' lua. ¹¹La nia luhua nú xi se'cala'cha'a xne nu'beyalá tunu rlu'cua nú rlu'cua urre la lu'cune. ¹²Nu'lua nú nehuañia lu elitsi nu nu'lua eluxene. Pero nu'beyalá nú rriquia xnecatse sianú neela urre rlia'naa sia nú sucu sobra nú rlu'cua urre rri'i faltae. ¹³Pero recaa nehuañia xnecatse equie nú rri'i Jesucristo elietsa lua. ¹⁴Pero uri'inze'cahua nú uxe'lahua elietsa cua' lua nee nú rqui'ñiane.

¹⁵Li'ihua bee bene Filipino nediya'hua chenu uchiu'a lu ili Macedonia, para nú uquixia udixiule'a stichia' Jesucristo li'itsiahua uri'ihua elietsa lua, nu lecati beelá bee bene enu uri'i elietsa lua, nu tucu nú uri'á elietsa luhua nú uyu'uluhua Jesucristo le'ca scua uri'ihua elietsa lua. ¹⁶Le'ca chenu nzucu'sca'a eyeche Tesalónica, uxe'lahua elietsa lua chiucu chuna bese para nú ri'ihua elietsa lua lunú xi rqui'ña. ¹⁷La la'naa nú xneca modo ri'iláhua elietsa lua sino que lunú niarquia necane nú cha nze'caláhua lu Diose. ¹⁸Uyucu' cuendalá ye elietsa nú uxe'lahua lua ya Epafrodito. Nu nee hasta sucu sobrae. Para li'á nú uxe'lahua lua necane xi neca tucu nú ñia rlia urre xi neca tucu u'na nú riu' arquí' Diose. ¹⁹Nu Diose liqui' ye nú xi rqui'ñahua equie eluxene nú rlu'cunu liñibe cuna Jesucristo. ²⁰Nu riala nú yebee bene lu'cu ula'na lu Pa'ahua Diose diqui tiambu. Amén.

Xe'la Pablo saludo

²¹Uri'ihua saludar yebee bene' Jesucristo lu cuendaa. Nu le'ca yebee

bene' Jesucristo enu nzunua ca'a
xe'labeella saludo luhua. ²²Le'ca
yebee bene' Jesucristo enu rri'li riña' lu
arre Roma nu cuna yebeelá bee bene'
Jesucristo xe'la beella saludo luhua.

²³Nu Jesucristo enu rnibiya'
lua'ahua li'inu ri'inu nú cha nze'cae
lu cuenda'hua.

Amén.

Carta nú uquie'e San Pablo lubee bene eyeche Colosas enu nzeli arqui' Jesucristo

Uxe'la Pablo saludo

1 Li'á Pablo, necaa tucu apóstol' Jesucristo xne scua niarqui' Diose. Li'á cuna Timoteo enu neca sa'ahua enu nzeli arqui' Jesucristo, ²rquie'eru carta quie' luhua, li'ihua enu neli nzeli arqui' Jesucristo, li'ihua enu neca bee bene' Diose enu nucua'a eyeche Colosas. Diose Pa'ahua cuna Jesucristo enu rnibiya' lua'ahua, ri'inu nú cha nze'ca lu cuenda'hua cuna nú nzuxe arqui'hua.

Rnacu' Pablo lu Diose lu cuenda' bee bene enu nzeli arqui' Jesucristo

³Cada chenu rnacu'ru lu Diose lu cuenda'hua, li'inu enu neca pa' Jesucristo enu rnibiya' lua'ahua, rniru che'tsa lunu lu cuenda'hua. ⁴Xne ubene'la'ru xa nzeli arqui'hua Jesucristo cuna lunú xa secagua bee bene enu neca bee bene'nu, ⁵equie nú nzuculuhua nú riña bichia nú yucuhua eluxene nú nu'che'e liñibe. Li'ihua ungabiya'la'hua nucua' chenu ubene'hua bedicha' nze'ca' Jesucristo nú neli neca.

⁶Nu bedichia' nú neli neca cua' nú ubene'la'hua diqui lu iliulabe nze ri'chia letse bee bedichia' cua' nu diqui bee luhua le'ca nzelila arqui' bee bene bedichia' cua'. Li'ibeella nzelila arqui'beella bedichia' cua' tucu nú ungae luhua chenu ubene'hua lunú xa uhua'a arqui' Diose li'ihua cuna nú neli secanu li'ihua. ⁷Li'ihua uri'ihua beya' nú neli neca nucua' chenu uzete' Epafra's nucua' li'ihua. Li'illa rri'illa elietsa luru nu chiqui' se'caru li'illa xne li'illa neli sibi'lla lu Jesucristo. ⁸Nu le'ca li'illa necalla enu udixiule'e luru lunú xa secagua bee sa'ahua equie nú nzu Espíritu Santo cuna li'ihua.

⁹Enze'e hasta bichia chenu ubene'ru nú xa nehuañihua, la tsana' arqui'ru nú rnacu'ru lu Diose equie cuenda'hua para nú equie cuenda' Espíritu Santo ri'i nze'cahua beya' nú xa niarqui'nu, nu liqui'nu lu ye nú acagua nu xa'lanu elliebacu'hua nú ri'ihua beya' nú ti necanu. ¹⁰Nu scua huañihua tucu nú riala nú huañi bee bene enu neca bee bene'

Jesucristo, nu ri'ihua tucu nú riu' arqui'nu, nu che ri'iláhua puro nú neca nze'ca para nú ri'iláhua beya' Stichia' Diose. ¹¹Nu li'iru le'ca rnacu'ru lunu para nú equie nú chiqui' rnibiya'nu ri'inu elietsa luhua nú tsuta' arqui'hua lunu, nu riqui'hua lubee xitse nú nehuana zecahua nu ulu'cuhua paciencia. ¹²Nu hasta ñia tsu arqui'hua dete'hua che'tsa lu Pa'ahua Diose equie nú uquieelanu arqui'hua para nú ati'hua lunú riala bee bene enu neca bee bene'nu enu nzequie inziu'nu. ¹³Diose utsila'a lia'ahua lunú rnibiya' beze'lu para nú udu'nu lia'ahua lunú rnibiya' Lli'ñinu Jesucristo enu secanu. ¹⁴Li'inu udixiunu equie cuenda' stula'ahua nú rlu'cu'la'ahua perdona lu Diose.

**Equie nú ungti Jesucristo
nehuañi nze'cahua cuna Diose**

¹⁵Lecati aca lañi' Diose. Pero Jesucristo neca tucu nú neca Diose, nu nzula Jesucristo cuna Diose hasta chenu lasca' acache' iliulabe. ¹⁶Equie cuenda' Jesucristo ungache' ye nú nu' liñibe cuna nú nu' lu iliulabe, sianu rlañi' bee bene urre nu la lañi' bee bene, nu le'ca equie cuenda' li'inu nu' yee bee elurnibiya' cuna yee bee elu usticia nú rlu'cu bee enu leca modo nú lañi' bee bene. Yeene ungache'e lu cuenda' li'inu nu para li'inue. ¹⁷Nzula Jesucristo ante nú acache' iliulabe nu li'inu nuya' cuendanu yeene nu rnibiya'nu lu yeene. ¹⁸Nu le'ca li'inu rnibiya'nu lu ye bee bene enu nzeli arqui' li'inu, enu neca bee bene'nu. Li'inu necanu enu rluti nzula, nu li'inu necanu

enu rluti uhuañi zeca leta bee benenguti para nú ri'i bee bene beya' nú tucutsia li'inu rlu'cunu nú rnibiya'nu lu yeene. ¹⁹Xne uyu' arqui' Diose nú neca Jesucristo tucu nú neca Diose. ²⁰Nu equie cuenda' Jesucristo uyu'u nú uyaala arqui' Diose lubee nú nu' lu iliulabe urre sia beenú nu' liñibe, uyu'u nú uyaala arqui'nu scua lubee nucua' equie cuenda' rene' Jesucristo nú uri'chia chenu ungtinu lu cruse.

²¹Hua'tu istu nzu arqui'hua lu Diose cuna nú necahua xi neca enu rlee lunu, xne uri'itsiahua puro nú necha neca. ²²Pero nee uri'i Diose nú uyu'u nú uyaala arqui'nu luhua equie nú nehuana ulle'ca Jesucristo chenu ungtinu lu cruse para nú riñahua lunu nu lecaxi natsa arqui'hua, cuna nú lecaxi equiya lu'cuhua nú nacu' quiyanu luhua. ²³Pero para nucua' rqui'ña nu chiuca tsuta' arqui'hua chequiehua lunú nzu teneli arqui'hua, sin nú tsana' arqui'hua nú nzequiehua bedichia' nze'ca' Jesucristo nú ubene'la'hua. Nu le'ca li'i bedichia' nze'ca quie' nze ri'chia letse diqui lu iliulabe, nu li'á Pablo, necaa tucu enu rixiule'e bedichia' nze'ca cua' lubee bene.

**Ucañi Diose Pablo para nú
zibi'lla lubee bene'nu**

²⁴Nu nee, chiqui' ñia nzu arquia equie nú nehuana se'ca equie cuenda' li'ihua. Xi neca nú ulle'ca Jesucristo para nú ri'á elietsa lubee bene enu nzeli arqui' li'inu enu neca bee bene'nu. ²⁵Xne Diose udu'u li'á para nú zibi'a lubee bene'nu. Nu li'inu uliqui'nu riña'

cua' lua para nú zetea li'ihua Stichia' Diose tucu nú necane. ²⁶Hasta hua'tu lá ri'i bee bene beya' xa neca Stichia' Diose. Pero nee ulube'lanu xa neca stichia'nu lubee bene enu neca bee bene'nu ²⁷para nú ixiule'e beella lubee bene enu la neca bee bene Israel xa neca eluxene'nu. Nu lunú né lube' Diose lubee bene tiambu nú udetela necane nú nzu Jesucristo cuna li'ihua, nu equie cuenda' li'inu nediya' nze'ca'hua nú nze'ta bichia nú riñahua liñibe.

²⁸Nu li'iru rixiule'eru stichia' Jesucristo, nu rniru bezete' lubee bene, cuna nú sete'ru li'ibeella lu ye nú reca elliebacu'ru para nú equie cuenda' Jesucristo riña beella lu Diose tucu nú riala nú riña beella lunu. ²⁹Nu chiqui' rti'quia arquia nú ri'á riña' quie' cuna poder nú uliqui'nu lua.

2 Niarquia nú ri'ihua beya' nú chiqui' rti'quia arquia para nú ri'á elietsa luhua, cuna lubee bene enu nucua'a eyeche Laodicea nu cuna lu ye beelá bee bene enu lasca' chulu li'á. ²Rti'quia arquia para nú dua'a ana arqui'beella nú aca tucu necatsebeella nu zeca beella bee sa' beella nu lu'cubeella nú chiqui' aca elliebacu' beella para nú aca beella chulu beella lunú nélube' Diose lubee bene tiambu nú udete, nú nucua' neca Cristo. ³Nu equie cuenda' li'inu nze'ta ye nú reca elliebacu' bee bene, cuna nú rri'i bee bene beya'. ⁴Li'á rnia bee bedichia' quie' luhua para nú lecati zequienu li'ihua cuna bee bedichia' nú nu'chi neca. ⁵Añinzuca nú la nzua cuna li'ihua, pero siempre

nchiucu' arquia li'ihua, nu ñia nzu arquia xne rri'ihua tucu nú rialane, cuna nú chiuca nzuta' arqui'hua lunú nzeli arqui'hua Jesucristo.

⁶Enze'e tucu nú nzelila arqui'hua Jesucristo enu rnibiya' le'ca scua uzu'cu'hua lunú rninu, ⁷ucua'nahua nú chequiehua li'inu tucu nú neli neca, nu chiuca utsuta' arqui'hua lunú nzeli arqui'hua li'inu tucu nú ungalahua, nu siempre de'te'hua che'tsa lu Diose.

**Elu nehuañi nú necuqui
neca rliqui' Jesucristo**

⁸Ubi'yahua li'ihua. La tsana'hua nú zequienu bee bene li'ihua cuna elliebacu' beei nú lixiu neca, urre bee bedichia' nú la zibi' nú nze'ta lubee costumbretsia, urre elurnibiya' nú nu' lu iliulabe quie', xne la ye'ta nucua' lu cuenda' Jesucristo.

⁹Xne tucu nú neca Diose scua neca Jesucristo, ¹⁰nu leca' xi qui'ña ri'ihua para nú acahua bene' Diose xne neca tucu necatsehahua cuna Jesucristo, li'inu enu rnibiya' lu ye bee enu rnibiya' cuna ye bee elu usticia nú la lañia'ahua. ¹¹Nu le'ca equie nú neca tucu necatsehua cuna Jesucristo, nuya'lahua seña'nu, pero la neca seña quie' xi neca seña nú rquiee bee bene Israel, seña'nu neca nú la huañia'hua tucu nú necatsia elliebacu'hua. ¹²Chenu urinzahua, neca nucua' xi neca nú ungutihua cuna Jesucristo nu uhuañi zecahua cuna li'inu, equie nú nzeli arqui'hua nú rlu'cu Diose poder nu uri'inu nú uhuañi zeca Jesucristo lu eluti. ¹³Hua'tu, li'ihua necahua xi neca bene enu ungutí lu Diose equie

cuenda' stulahua nu equie nú la uya'hua seña nú nuya' bee bene Israel. Pero nee equie cuenda' Jesucristo uri'ila Diose perdona lia'ahua lu cuenda' stula'ahua, nu nee rlu'cula'ahua elunehuañi cuna Jesucristo. ¹⁴Diose uchilala stula'ahua lunú nzu dixiu'ahua tucu nú rnibiya' ley'nu. Uchilanu dula cua' chenu ungoti Jesucristo lu cruse. Nu li'inu udixiunu equie cuenda'ahua. ¹⁵Nu scua uri'inu ana lu ye bee elu usticia, cuna lu ye nú rnibiya' nú nze'ta lu benechiqui'. Nu utsa'na netúnu beei lu ye bee bene nu uri'inu ana lubeei equie nú ungotinu lu cruse.

Uri'ihua elliebacu' beenú nu' liñibe

¹⁶Enze'e la ri'ihua caso bee enu se'ta li'ihua equie nú racuhua urre equie nú rue'ehua, urre equie nú la ri'i casohua bee bichia liñi, urre bichia nú rquiee guu urre bee bichia nú sulachi bee bene, ¹⁷xne ye bee nucua' necatsia xi neca xca'la' Jesucristo, nu nee li'inu ube'talanu. ¹⁸La tsana'hua nú zequienu bee enu rlu'cu ula'na lubee ángele li'ihua para nú tsana' arquihua inziu' Diose, xne li'ibeei rlube'beei nú lle'na arqu'ibeei pero lia rri'itsiabeei nucua'. Le'ca rnibeei nú nu' xi rlube'lu lubeei, che ruti'beei cuna elliebacu' tsia'bee. ¹⁹Pero li'ibeei la nzu Jesucristo cuna li'ibeei, li'inu enu rnibiya' lua'ahua. Nu equie cuenda' li'inu nze ri'ila'ahua beya' xa chequie'ahua stichia'nu para nú aca tucu necatse'ahua cuna bee sa'ahua, cuna nú aca tucu necatsehua cuna Jesucristo tucu nú niarqui' Diose.

²⁰Nee tunu neli nú rlu'cuhua elunehuañi nú necuqui neca cuna Jesucristo, cuna nú la qui'ña nú ri'ihua caso stichia' bee bene enu nzequiee lunú la ye'ta lu Diose. ¿Xinu sucu'hua stichia' bee bene enu rni: ²¹“La ti'yalu nucua'. Nu la aculu nucua', nu la na'tselu nucua'”? ²²Ye bee elu rnibiya'cua laxu bee nucua', xne bee benetsia ullela arqu' bee nucua'. ²³Neli nú bee elurnibiya' cua' neca xi neca nú chiqui' secae equie nú chiqui' rla'na bee bene nú tsa'alubeei nu sucu'bee nu rri'ibeei nú nehuana seca le'catsia li'ibeei, pero lecaxi zibi' elurnibiya' cua' para nú cá nucua' lunú necha neca rle'bee.

3 Enze'e nee lunú rlu'culahua elunehuañi nú necuqui neca cuna Jesucristo, ucuahua nú ri'ihua elliebacu' lu cuenda' beenú nu' liñibe elu nzucu Jesucrito cue'tse Diose chube. ²La ri'ihua elliebacu' beenú nu'tsia lu iliulabe, máse uri'ihua elliebacu' beenú nu' liñibe, ³xne neca xi neca nú ungotilahua lu cuenda' nú nu' lu iliulabe nu rlu'culahua elu nehuañi nú necuqui neca equie cuenda' Jesucristo, lu Diose. ⁴Nu chenu riña Jesucristo, li'inu enu rliqui' elunehuañi lua'ahua, le'ca nuhua yalahua nú huañihua cuna li'inu elurnibiya'nu.

Xa riala nú huañi bee bene enu nzeli arqu' Jesucristo

⁵Nee, utsana'hua ye beenú necha neca nu' lu iliulabe quie'. La ri'ihua bee eluhuexe ni' beenú lecaxi zibi', ni' bee elliebacu' nú necha neca, ni' beenú necha neca nú

riu'u ana arqui'hua rri'ihua, le'ca la cua'nahua nú ri'ihua elu neyi' nú lu'cuhua huaxi beenú lu'cuhua xne nucua' neca xi neca nú rlu'cuhua ula'na lunú la neca Diose. ⁶Nu equie cuenda' bee nucua' nze'ta castiya' Diose nú zeca bee bene enu la zucu' nú rninu, ⁷nu sa' beenú necha neca cua' uri'ihua ante nú chuluhua Jesucristo. ⁸Pero nee utsana'hua ye beenú necha neca. La aca nelachi nzu arqui'hua, la leehua lubee sa'hua, nu la ri'ihua beenú necha neca lubee sa'hua, la ze'tahua bee sa'hua, nu la nihua bee bedichia' chi'qui'. ⁹La nihua eluquichia' lubee sa'hua, xne la nehuañia'hua tucu nú uhuañihua hua'tu chenu uri'ihua beenú necha neca. ¹⁰Xne uche'ela Diose xa nehuañihua, necalahua xi neca tucu bene cuqui equie nú lle'naa lle'naa nze acahua tucu nú niarqui' Diose nú acahua para nú chulu nze'cahua Diose, li'inu enu ureche' lia'ahua. ¹¹Nu chenu uyalila arqui' bee bene Jesucristo lecaxi ri'i lunú ti neca beella, tunu neca beella bee bene Israel urre la neca beella bee bene Israel nu tunu nequiee seña nú rquiee bee bene Israel li'ibeella, urre la nequiee seña cua' li'ibeella, tunu necabeella bee bene rene nu tunu necabeella bene ixí nu tunu necabeella enu neiqui lu stucu bene urre la necabeella enu neiqui. Pero lunú máse seca nú chili arqui' bee bene Jesucristo, li'inu enu rnibiya' nu nzu cuna ye'ahua.

¹²Diose seca li'ihua, enze'e ucañinu li'ihua para nú acahua bee bene'nu. Enze'e uhua'a arqui'hua bee bene, aca nze'cahua nu la aca

nelachihua. La aca nelliñahua, utsuquie arqui'hua bee sa'ahua.

¹³Uriqui'hua bee sa'hua, nu uri'ihua perdona li'ibeella tunu nu' xi rri'ibeella luhua. Tucu nú uri'i Jesucristo perdona li'ihua le'ca esquie uri'ihua perdona bee bene. ¹⁴Lu cuenda' yeene máse rqui'ña nú seca bee bene sa'lla. Nu eluseca cua' neca nú rri'i elietsa para nú huañi bee bene nú neca tucu necatse beella. ¹⁵Utsana'hua nú nibiya' Jesucristo luhua para nú lu'cuhua nú nzuxe arqui'hua xne para nucua' ucañi Diose li'ihua para nú aca tucu necatsehua lubee sa'hua equie cuenda' Jesucristo, nu ude'tehua che'tsa lunu equie cuenda' nucua'.

¹⁶Chiqui' udu'equiehua bee stichia' Jesucristo. Uze'te'hua bee sa'hua nu uni'hua bezete' lubeella tucu nú rialane. Diquinu' arqui'hua ude'te'hua che'tsa lu Diose, cuna bee canto cuna bee salmos nú cuna bee canto nú neca para li'inu. ¹⁷Ye beenú rri'ihua urre rnihua, rluti ullu'cu arqui'hua Jesucristo enu rnibiya' lua'ahua nu equie cuenda' li'inu dete'ahua che'tsa lu Pa'ahua Diose.

**Xa riala nú huañi bene enu
nzeli arqui' Jesucristo**

¹⁸Li'ihua bee una'a enu nechiala, uzu'cu'hua nú rni bee niyu'hua xne scua riala nú ri'i bee bene enu nzeli arqui' Jesucristo. ¹⁹Nu le'ca esquie li'ihua bee niyu enu nechiala, uzecahua bee una'ahua nu la xitse ri'inuhua li'ibeella. ²⁰Le'ca esquie li'ihua bee endu', lu yeene uzu'cu'hua nú rni bee pa'ahua cuna nú rni bee na'hua, xne scua riu'

arqui' Diose nú ri'ihua. ²¹Nu le'ca esquie li'ihua bee paa cuna bee naa, la detehua lunú rri'inuhua bee endu'hua para nú la laca quieebeci lunú rri'inuhua beei.

²²Li'ihua bee enu rri'i riña' bee bene, uzu'cu'hua ye nú rni bee bene enu rri'ihua riña'lu lu iliulabequie'. La ri'itsiahua nucua' chenu ri'yatsia beella luhua para nú ya'na nze'cahua lubeella, uri'ihua riña'beella diquinu' arqui'hua equie nú rlucluhua ula'na lu Jesucristo. ²³Tatse beenú ri'ihua, uri'ihuane diquinu' arqui'hua. Uri'ihua nucua' xi neca nú sibi'hua lu Jesucristo, nu la zibi'hua lubee bene. ²⁴Xne li'ihua nediya'hua nú scua yucuhua lunú liqui' Jesucristo enu rnibiya', equie nú sibi'hua lunu. ²⁵Pero bee bene enu rri'i nú necha neca, li'ibeei yalabeei castiya lunú necha neca uri'ibeei, xne tucutse rri'i Diose elu usticia'nu lubee bene.

4 Le'ca esquie li'ihua bee patrón, uri'ihua tucu nú rialane lubee bene enu rri'i riña' luhua nu uri'i nze'cahua lubeei xne li'ihua nediya'hua nú liñibe nzucu li'inu enu rnibiya' luhua.

²Utsutsiñahua na'cu'hua lu Diose sin nú llaca'hua, nu ude'te'hua che'tsa lunu. ³Le'ca una'cuhua lu Diose equie cuenda'ru para nú xa'lanu inziu nú nzetixiule'eru stichia' Jesucristo nú lasca' chulu bee bene hasta hua'tu. Nu equie cuenda' bedichia' cua' nchiñia ni'cu'. ⁴Le'ca una'cuhua lu Diose para nú ixiale'e nze'caa bee bedichia' cua' lubee bene tucu nú riala nú ixiale'ene.

⁵Uhuañihua tucu nú riala nú huañihua lubee bene enu lasca'

chili arqui' Jesucristo, nu uni'hua lubeei stichia'nu chenu nu' modoe.

⁶Chenu rdichia'hua, uni'hua lubeee bene bee bedichia' nú nuya' resuna para nú yu' arqui'bee lúnú rnihua para nú chenu nedichia' bee bene luhua acahua cuaquihua lubeei.

Uxe'la beella saludo

⁷Tíquico, enu neca tucu bee sa'ahua enu chiqui' se'ca'ahua, li'illa enu neli rri'i elietsa lua lunú sibi'ru lu Jesucristo, li'illa ixiale'ella luhua lu ye nú xa nzucu'ca'a. ⁸Xne para enze'e xe'laalla luhua para nú ixiale'ella luhua nú xa nellua'aru ca'a, nu para nú du'lla ana arqui'hua. ⁹Nu cuna li'illa xe'la Onésimo, tucu sa'hua enu se'ca'ahua nu nehuañilla tucu nú rialane nu necalla bene lachihua. Li'ibeella ixiale'ebella luhua lu ye beenú reca ca'a.

¹⁰Aristarco, enu nchiñinua ni'cu' xe'la saludo luhua. Le'ca esquie Marco bichi e'ne Bernabé xe'la saludo luhua, nu udixiale'elá luhua nú ti neca Marco tunu nze'tabi'yalla li'ihua, uyucuhua li'illa tucu nú rialane. ¹¹Nu le'ca esquie Jesús enu le'ca lee Justo, xe'la saludo luhua. Leta ye bee bene Israel enu nzeli arqui' Jesucristo, li'itsia beella neca beella enu rri'i elietsa lua para nú rixiale'eru xa neca nú rnibiya' Diose, nu li'ibeella neca beella enu rdu' ana arquia. ¹²Le'ca Epafras bene lachihua xe'la saludo luhua. Li'illa sibi'lla lu Jesucristo, yee bichia rna'cu'lla lu Diose equie cuenda'hua para nú tsuta' arqui'hua lunú nzequiehua inziu' Diose nu ri'ihua beya' yeene tucu nú niarqui'

Diose. ¹³Li'á nediya nze'ca nú chiqui' nzeno arqui' Epafras lu cuenda'hua, cuna lu cuenda' bee bene Laodicea, cuna lu cuenda' bee bene Hierápolis. ¹⁴Lucas enu neca doctor enu chiqui' se'ca'ahua cuna Demas, xe'la beella saludo luhua.

¹⁵Uri'ihua saludar bee sa'ahua enu nzeli arqui' Jesucristo enu nucua'a eyeche Laodicea, nu le'ca uri'ihua saludar Ninfas cuna ye bee bene' Jesucristo enu riete' sa' ni'lla. ¹⁶Chenu laxu nú ulahua carta quie',

che xe'lahuane lubee bene eyeche Laodicea enu nzeli arqui' Jesucristo para nú le'ca ula beella lue. Nu le'ca carta nú uxe'la lubeella rqui'ña nú xe'la beellae luhua para nú le'ca ulahuane. ¹⁷Nu uni'hua lu Arquipo nú tsalulla lunú ucañi Jesucristo li'illa nú ri'illa.

¹⁸Li'á Pablo, nu le'ca li'á rquie'a letra quie' para nú xe'la saludo luhua. Ullu'cu' arqui'hua nú nchiña ni'cu'. DiOSE ri'i nú cha nze'ca lu cuenda' yehua. Amén.

Carta tucu nú uquie'e San Pablo lu bee bene eyeche Tesalónica enu nzeli arqui' Jesucristo

Uxe'la Pablo saludo

1 Li'á Pablo, cuna Silvano nu Timoteo, rquie'eru carta quie' luhua, li'ihua bee enu nzeli arqui' Jesucristo eyeche Tesalónica, li'ihua bee enu neca bee bene' Diose Pa liñibe cuna Jesucristo enu rnibiya'. Ri'i Diose nú cha nze'ca lu cuenda'hua cuna nú nzuxe arqui'hua.

Rdete' Pablo che'tsa lu Diose equie cuenda' bee bene Tesalónica

²Ye bichia rdete'ru che'tsa lu Diose lu cuenda' yehua nu la zañi'ru rnacu'ru lunu equie cuenda'hua ye chenu rnacu'ru lunu. ³Cada chenu rnacu'ru lu Diose Pa'ahua li'iru rlu'cu cuendaru ye beenú rri'ihua xne nzeli arqui'hua li'inu, nu li'iru rlu'cu cuendaru lunú rri'ihua xne secahua bee sa'hua nu le'ca rlu'cu cuendaru nu li'ihua neli nucua'aquiehua nú benchila' zeca Jesucristo enu rnibiya'. ⁴Bee sa'a enu nzeli arquia'ahua Jesucristo, li'iru nediya'ru nu seca Diose li'ihua nu li'inu ucañinu li'ihua.

⁵Xne chenu udixiule'eru bedichia' nze'ca' Jesucristo luhua, la neca nú uzete'tsiaru li'ihua cuna bee bedichia'tsia sino que uzete'ru li'ihua cuna poder' Espíritu Santo nu nediya'ru nú neli neca lunú rniru luhua. Li'ihua nediya'hua xneca uri'iru chenu ullua'aru cuna li'ihua, uhuañiru scua para nú lube'ru luhua nú xneca riala nú huañihua. ⁶Nu li'ihua nehuañihua tucu nú uhuañiru nu tucu nú uzete' Jesucristo li'iru, nu equie cuenda' Espíritu Santo ñia utsu arqui'hua uyalí arqui'hua bee bedichia' nú udixiule'eru luhua añinzuca nú chiqui' nehuana ulle'cahua. ⁷Scua necahua tucu ejemplu lu ye bee bene lu iliu Macedonia cuna lu iliu Acaya ante lu bee enu nzeli arqui' Jesucristo. ⁸Nu equie cuenda' li'ihua uri'chiale'tse stichia' Jesucristo nu la neca nucua' nú unga lu iliu Macedonia cuna lu iliu Acaya tsia, sino que ye bee luhuare rni bee bene xneca nzeli arqui'hua Diose hasta nú leca' xi rqui'ña nú niláru lube'e bene equie cuenda' li'ihua. ⁹Xne li'i e'cu beei rnibeei

lubee bene lunú xneca uyucuhua li'iru bese rlu chenu ubelabi'yarú li'ihua, nu xneca utsana arqui'hua bee enu secahua nú neca diose para nú chili arqui'hua Diose enu nehuañi nu zibi'hua lunu, li'inu enu neli neca Diose. ¹⁰Nu le'ca rnibeei nú xneca nucua'aqueihua bichia chenu nze'ta zeca Jesucristo Lli'ñi Diose enza liñibe, li'inu enu uri'i Diose nú uhuañi leta bee benenguti. Jesucristo enu sila'a lia'ahua lu casti'ya llene nú nzu nú nze'ta.

Lunú uri'i Pablo eyeche Tesalónica

2 Bee sa'a enu tucutse nzeli arquia'ahua Jesucristo, li'ihua nediya'hua nú né yela xle'eru chenu ubela bi'yarú li'ihua, ²añinzuca nú nediya' nze'ca'hua lunú xneca udiquichi'qui' bee bene li'iru nu xitse uri'inubeei li'iru eyeche Filipos. Pero uri'i Diose elietsa luru nú utsu naaqui arqui'ru udixiule'eru bedichia' nze'ca'nu luhua añinzuca nú nehuaña ulle'caru equie cuenda' nú ulee bee bene luru. ³Xne li'iru uniru luhua puro nú neli neca nu lá ri'iru luhua tucu nú niarqui'tsiaru urre para nú zequienuru li'ihua. ⁴Sino que scua tucu nú ucañila Diose li'iru para nú dixiule'eru bee bedichia' nze'ca'nu lubee bene nu ulañi'nu nú acaru ri'iru lunú riala nú ri'iru, nu scua necane tucu nú udixiule'eru lubee bene. La necane para nú ya'na nze'caru lubee bene sino ante lu Diose. Li'inu enu nu'lu xa nchiñi arqui' bee bene. ⁵Li'ihua nediya'hua nú leca xunga uzucu' ayaru li'ihua para nú zecahua li'iru, nu le'ca lá la'naru nú xneca modo ri'iru ana dimi'hua, Diose

nediya' nú neli necane scua. ⁶Le'ca la la'naru nú zucu' aya bee bene li'iru, nu la la'naru nú zucu' ayahua li'iru urre nú zucu' aya stucu bee bene li'iru, añinzuca nú nu' modo nú nibiya'ru luhua nú ri'ihua luru lunú niarqui'ru, né ri'iru scua luhua. ⁷Li'ihua nediya'hua xa uri'i nze'caru luhua chenu ullua'aru cuna li'ihua, tucu nú rri'i tucu naa enu chiqui' rriucu bee lli'ñi. ⁸Nu lunú chiqui' se'caru li'ihua laneca nú Stichia' Diose tsia rixiule'ru luhua sino que lecaxi ri'i máse nú úti bee bene li'iru lunú chiqui' se'caru li'ihua. ⁹Nu li'ihua bee sa'ru enu nzeli arqui'hua Jesucristo nediya'hua nú chiqui' ula'naru nú uri'iru riña'. Bichia si rula' uri'iru riña' para nú la qui'ñia nú ari'ihua elietsa luru diqui' nú uzete'ru li'ihua bee bedichia' nze'ca' Diose.

¹⁰Nediya' nze'ca' Diose nú le'ca li'ihua nediya'hua nú xneca uhuañiru ante luhua, nu lecali xi dula lu'curu, nu sin nú lecaxi ta'quiyahua li'iru, li'ihua bee enu nzeli arqui' Jesucristo. ¹¹Le'ca nediya'hua xneca uniru bezete' luhua nu xneca udu'uru ana arqui'hua tucu nú rri'i pa' endu' lu endu'. ¹²Nu unilaru luhua nú huañihua tucu nú riala huañi bee bene' Diose, li'inu enu rixia li'ihua para nú huañihua cuna li'inu liñibe elu rnibiya'nu. ¹³Enze'e le'ca li'iru la tsuxeru nú rdete'ru che'tsa lu Diose nú chenu ubene'hua stichia'nu nú udixiule'ru luhua uri'i casohuane lunú neli necane Stichia' Diose, nu lanecatsiae stichia' bee bene iliulabe. Nu bee bedichia' cua' neca nú rri'i riña'

arqui'hua, li'ihua bee enu nzeli arqui' Jesucristo. ¹⁴Nu li'ihua bee sa'ru enu nzeli arquia'ahua Jesucristo. Tucutse ulle'ca'la'ahua tucu nú ulle'ca bee bene' Diose enu neca bee bene Judea enu nzeli arqui' Jesucristo. Xne scua tucu nú nehuana uri'inu bee sa'beella bee bene Israel li'ibeella le'ca scua nehuana uri'inu bee bene lachihua li'ihua. ¹⁵Nu le'ca bee bene Israel unguuti beei Jesuse enu rnibiya' lua'ahua nu le'ca unguuti beei bee profeta, nu le'ca utiliaca' beei li'iru nu la ri'ibeei tucu nú niarqui' Diose, nu rlebee lu ye bee bene. ¹⁶Nu uca beei nú udixiule'eru bedichia' nze'ca' Diose lubee bene enu la neca bee bene Israel nú xneca tsila'a beella, scua le'ca li'ibeei rri'ibeei nú rdalalá stula beei, nu nee chiqui'la nehuana seca beei.

**Niarqui' Pablo nú chazecalla
eyeche Tesalónica**

¹⁷Bee sa'ru enu nzeli arquia'ahua Jesucristo, li'iru utsa'naru li'ihua chiucu chuna bichia, añinzuca nú la lañi'ru li'ihua pero nchiucu' arqui'ru li'ihua nu chiqui' niarqui'ru nú lañi' zeca'ru li'ihua stucu bese. ¹⁸Nu chiqui' uniarqui'ru nú nzelabi'yarú li'ihua, li'á Pablo huaxi bese uniarquia nú nzelabi'ya li'ihua. Pero uca beze'lu nú acae scua. ¹⁹Pero niarqui'sca'ru nzelabi'yarú li'ihua xne nzucu luru nú li'ihua necahua enu rri'i nú ñia nzu arqui'ru, li'ihua necahua riña' nú nellinñianuru nú riñayuru lu Jesucristo enu rnibiya' bichia chenu nze'ta zecanu. ²⁰Li'ihua necahua enu rri'i nú ñia nzu arqui'ru nu equie cuenda'hua nellinñiaru.

3 Enze'e chenu ullua'aru eyeche Atenas chiqui' niarqui'ru ri'iru beya' xa nucua'ahua, chequie uri'iru elliebacu' nú ya'na li'itsiaru ze'e. ²Nu uxe'laru sa'ahua Timoteo enu neca tucu sa'ahua enu rri'inuru riña' Diose nú rixiule'eru bedichia' nze'ca' Jesucristo lubee bene para nú du'lla ana arqui'hua nú tsuta' arqui'hua lunú nzelila arqui'hua Jesucristo. ³Para nú ni'tucuhua la lacaquiehua lunú nehuana secahua, li'ihua nediya'hua nú scua riala nú zeca'ahua. ⁴Chenu ullua'anuru li'ihua udixiule'eru luhua nú nze'ta nú chiqui' huaxi nú nehuana zeca'ahua, nu li'ihua nediya'hua nú scua ungae. ⁵Nu lunú chiqui' niarquía lañiahua che uxe'la Timoteo luhua para nú ri'á beya' xa nzenalahua lunú nzeli arqui'hua Jesucristo. Xne xiquia nú cá zequienu beze'lu li'ihua, nu che xle'e uri'iru lunú uri'iru.

⁶Pero nee nú ubenchila' Timoteo nú ube'tabi'yalla li'ihua, udixiule'ella luru nú nza nze'cahua lunú nzeli arqui'hua Jesucristo nu xneca secahua bee sa'hua. Li'illa rnilla nú yeye'e ñia nzu arqui'hua rellu'cu' arqui'hua li'iru nu chiqui' niarqui'hua nú ala' nú ulañi'la'hua li'iru nú secahua, scua tucu nú le'ca chiqui' niarqui'ru lañi'ru li'ihua. ⁷Enze'e, bee sa'a enu nzeli arquia'ahua Jesucristo añinzuca nú yelu nú se'caru nu chiqui' nehuana se'caru, pero chiqui' ñia nzu arqui'ru ubene'ru nú nza nze'cahua lunú nzeli arqui'hua. ⁸Nu nee másela xila' arqui'ru equie nú ungabiya'la'ru nú neli nzuta' arqui'hua nzenalahua inziu'

Jesucristo. ⁹Enze'e hasta ni' la llela' arqui'ru xa dete'ru che'tsa lu Diose equie cuenda'hua equie nú chiqui' ñia nzu arqui'ru equie cuenda'hua lu Pa'ahua Diose. ¹⁰Bichia si rula' rnacu'ru nu sequieru lu Diose para nú zelanu nú nzelabi'yarú li'ihua, nu la'xuru niru luhua lunú rri'ilá nú ri'ihua beya' lunú nzeli arqui'hua Jesucristo.

¹¹Diose Pa'ahua cuna Jesucristo enu rnibiya' ri'inu elietsa luru nú aca nzelabi'yarú li'ihua. ¹²Nu Jesucristo ri'inu elietsa luhua para nú másescalá nze zecahua bee sa'hua nu zecahua ye beelá bee bene tucu nú se'caru li'ihua. ¹³Jesucristo neca enu ri'i elietsa luhua nú tsuta' arqui'hua riñahua lu Diose sin dula nu lecaxi nahua, bichia chenu nze'ta zeca Jesucristo cuna ye bee bene'nu.

Xa niarqui' Diose nú huañi bee bene'nu

4 Nee bee sa'a enu nzeli arquia'ahua Jesucristo nacu'ru nu zequieru luhua equie cuenda' Jesucristo enu rnibiya', nu scua tucu nú nehuañihua nee tucu nú uzete'laru li'ihua nú huañihua para nú ri'ihua tucu nú niarqui' Diose, másela uyanalahua nú huañihua tucu nú niarqui' Diose nú huañihua.

²Xne li'ihua nediya'la'hua ye nú unibiya' Jesucristo luru nú niru luhua nú ri'ihua. ³Lunú niarqui' Diose necane nú huañihua sin dula nu la ri'ihua eluhuexe. ⁴Nu cada tucuhua uri'ihua beya' xa huañi nze'cahua cuna una'ahua urre niyu'hua tucu nú rnibiya' Diose cuna ula'na. ⁵La lu'cuhua una'hua

para nú ri'ihua bee elliebacu' nú nechá neca, nu ni' beenú necha neca riu'u ana arqui'hua rri'ihua, xi rri'i bee bene enu la chulu Diose. ⁶Le'ca ni' tucuhua la yala nú detehua lunú xitse ri'inuhua bee sa'hua nu la zequienuhua sa'hua xne Diose Pa'ahua dete' castiya ye bee bene enu rri'i scua tucu nú unilaru nu udixiule'elaru luhua. ⁷Xne né bixia Diose lia'ahua nu neca'ahua bee bene'nu para nú nechá huañia'ahua, sino que para nú huañia'ahua nú leca xi na'ahua lunu. ⁸Enze'e bee enu la ri'i caso lunú unilaru luhua, la necane nu lu bee bene iliulabe la ri'i casolla, sino que Diose neca enu la ri'i casolla. Li'inu enu rliqui' Espíritu Santo lua'ahua.

⁹Nu nee lunú xa riala zecahua bee sa'hua la qui'ñia nú nilá luhua lu cuenda' nucua' xne le'ca li'ihua ungalahua equie cuenda' Diose nú xneca riala nú zecahua beelá bee bene. ¹⁰Nu nucua' neca lunú rri'ihua cuna ye bee sa'hua enu nzeli arqui' Jesucristo enza Macedonia. Pero nacua nu zequiaa luhua nú másela zecaláhua bee sa'ahua. ¹¹Le'ca ula'nahua nú huañihua nú nzuxe arqui'hua, uzu'cu'luhua riña'hua, tucu nú unilaru luhua nú ri'ihua riña', ¹²Para nú huañi nze'cahua lu bee bene enu la chili arqui' Jesucristo nu para nú leca xi zecala'cha'hua.

Chenu nze'ta zeca Jesucristo

¹³Nee bee sa'a enu nzeli arquia'ahua Jesucristo, la niarqui'ru nú huañihua sin nú ri'ihua beya' equie cuenda' bee bene enu ungti

para nú la nehuana nzu arqui'hua xi rri'i bee bene enu la chili arqui' Jesucristo. ¹⁴Tucu nú nzeli arquia'ahua nú ungoti Jesucristo nu uhuañi zecanu stucu bese, le'ca nzeli arquia'ahua nu bee enu ungotila nu nzeli arqui' Jesucristo, le'ca ri'i Diose nú huañi zeca beella equie cuenda' Jesucristo.

¹⁵Enze'e tucu nú nediya'la'ahua stichia' Jesucristo, li'iru niru luhua nú ye bee bene' Jesucristo enu nehuañisca' chenu nze'ta zecanu stucu bese, la zuculu beella lu bee bene'nu enu ungotila. ¹⁶Nu bichia ze'e yene chi enu rnibiya' nú xneca aca, nu yene chi ángele enu rnibiya' lu ye bee ángele, yene chi trompeta' Diose. Nu enta Jesucristo enza liñibe nu rluti bee bene'nu enu ungotila huañi zeca beella stucu bese. ¹⁷Chequie bee sa'ahua enu nehuañisca' bichia ze'e yete' sa'ahua cuna bee bene enu huañi zeca, nu chu nzia'ahua enza liñibe leta xcabe elu lla'ca'ahua Jesucristo scua nzia'ahua huañilia'ahua cuna li'inu. ¹⁸Enze'e udu'hua ana arqui' bee sa'hua cuna bee bedichia' cua'.

5 Nee bee sa'a enu nzeli arquia'ahua Jesucristo la qui'ñaia nú nia luhua equie cuenda' nú xi bichia nu xunga aca bee nucua'. ²Xne li'ihua nediya' nze'ca'hua nú xi neca chenu tu'natsia rriña tucu huana' rula', scua aca bichia chenu riña zeca Jesucristo stucu bese. ³Chenu ni bee bene: "Nú yene nza nze'cae, lecaxi aca", che tu'natsia riña nú nehuana zeca beella nu la tsila'a beella lu nucua', scua tucu nú tu'natsia rriña nú rlachi xla'cu una'a enu ala endu'. ⁴Pero li'ihua

bee sa'a enu nzeli arquia'ahua Jesucristo, la chahua inziu nú necabe nzu para nú la na'tse bichia chenu riña zeca Jesucristo li'ihua, xi neca chenu rriña tucu huana'. ⁵Xne yehua nzequielahua ellie' Diose, yehua nzenalahua inziu'nu. La chenala'ahua inziu nú necabe nzu, nu le'ca la chenala'ahua inziu nú nechá neca. ⁶Enze'e la yala nú huañia'ahua xi neca tucu bene enu ra'tse, tucu nú rri'i beelá bee bene, sino que rqui'ña nú hua'ahua cala' lua'ahua nu ria'ahua lunú sibi'. ⁷Bee bene enu nzenala inziu nú nechá neca, neca beella xi neca tucu bene enu ra'tse, xi neca tucu bene enu xuchi', scua nzenala beella inziu nu necha neca. ⁸Pero lia'ahua enu nzenalala'ahua ellie' Diose, ye bichia rqui'ña nú huañia'ahua nu ria'ahua lunú sibi'. Bi'ya'ahua lia'ahua lunú nzu teneli arquia'ahua lu elu seca' Diose, nu tsuta' arquia'ahua lunú nzuculua'ahua nú utsila'ala Diose lia'ahua. ⁹Xne né bixia Diose lia'ahua para nú liqui'nu castiya lua'ahua, sino que ubixianu lia'ahua para nú tsila'ahua equie cuenda' Jesucristo enu rnibiya' lua'ahua. ¹⁰Li'inu enu ungoti equie cuenda'ahua para nú mase nú nehuañia'ahua urre mase nú ungotila'ahua chenu nze'ta zecanu stucu bese, pero nzia'ahua huañia'ahua cuna li'inu. ¹¹Enze'e udu'hua ana arqui' sa'hua nu uri'ihua elietsa lu sa'hua para nú másela nzeri'iláhua beya' lunú rri'ilahua.

Uni Pablo lunú ri'i bee bene enu nzeli arqui' Jesucristo

¹²Bee sa'a enu nzeli arquia'ahua Jesucristo, nacu'ru nu ziquieru

luhua, nú lu'cuhua ula'na lu bee bene enu sete' li'ihua Stichia' Diose. Li'ibeella enu sete' li'ihua nu rni bezete' luhua nú xneca chenalahua Jesucristo. ¹³Uri'i nze'cahua lubeella nu chiqui' uzecahua li'ibeella equie cuenda' riña' nú rri'i beella. Nu uhuañi nze'cahua cuna sa'hua.

¹⁴Le'ca nacu'ru luhua bee sa'a enu nzeli arquia'ahua Jesucristo nú qui'ya'hua bee bene enu nebichiu nu udu'hua ana arqui' bee bene enu rlacaquíe lu Stichia' Diose nu uri'ihua elietsa lu bee bene enu lasca' tsuta' arqui' lu Stichia' Diose, nu utsuquie arqui'hua ye beella.

¹⁵Ubi'yahua nú la ri'ihua nú nechá neca lu bee bene enu rri'i nú nechá neca luhua, mejora aca nze'cahua lu bee sa'hua cuna lu ye bee bene.

¹⁶Ñia tsu arqui'hua diqui' nú nehuañihua. ¹⁷Nu yee ye'e na'cuhua lu Diose. ¹⁸De'tehua che'tsa lu Diose equie cuenda' yeene, xne scua riu' arqui' Diose nú ri'ihua, li'ihua enu neca bee bene' Jesucristo.

¹⁹Uzelahua nú nibiya' Espíritu Santo luhua. ²⁰La huachuhua nu rni bee bene enu rdete' Stichia'

Diose lubee bene. ²¹Rluti uri'i nze'caxuhua beya' tunu neli ye lunú rni beella, nu ri'ihua lunú neca nze'ca. ²²Uchiu'u chuhua lu ye beenú nechá neca.

²³Nu Pa'ahua Diose enu rri'i nú nzuxe arquia'ahua ri'inu elietsa luhua para nú lecali xi na arqui'hua ante lunu. Nu li'inu acanu'nu li'ihua, cuna espíritu'hua, cuna diqui' lunú necahua para nú lecali xi nahua bichia chenu riña zeca Jesucristo enu rnibiya' lua'ahua. ²⁴Nu Diose ri'i scua, xne li'inu enu rixia lia'ahua para nú neca'ahua bene'nu, neli sa'alunu stichia'nu.

**Último bee bedichia' nú
nequie lu carta quie'**

²⁵Bee sa'a enu nzeli arquia'ahua Jesucristo, una'cu'hua lu Diose equie cuenda'ru. ²⁶Uri'ihua saludar ye bee sa'ahua enu nzeli arqui' Jesucristo nu uchi'chihua li'ibeella. ²⁷Nu equie cuenda' Jesucristo nibiya'a luhua nu nia luhua, nú ulahua carta quie' lu ye bee sa'ahua enu nzeli arqui' Jesucristo. ²⁸Nu Jesucristo enu rnibiya' lua'ahua ri'inu nú cha nze'ca lu cuenda'hua.

Carta rruçu nú uquie'e San Pablo lu bee bene eyeche Tesalónica enu nzeli arqui' Jesucristo

Lunú niarqui' Pablo nú cha
nze'ca lu cuenda' bee bene

1 Li'á Pablo, cuna Silvano nu
Timoteo, rquie'eru carta quie'
luhua, li'ihua bee bene Tesalónica
enu nzeli arqui' Jesucristo, li'ihua
enu neca tucunecatse cuna Diose
Pa liñibe nu cuna Jesucristo enu
rnibiya'. ²Nu Diose Pa'ahua cuna
Jesucristo enu rnibiya' ri'i nú cha
nze'ca lu cuenda'hua cuna nú nzuxe
arqui'hua.

Rdete' Pablo che'tsa lu Diose

³Bee sa'a enu nzeli arquia'ahua
Jesucristo ye ye'e rdete'ru che'tsa lu
Diose equie cuenda'hua, xne scua
riala nú ri'iru, xne ye ye'e másela
nze chililá arqui'hua Jesucristo, nu
le'ca cada tucuhua maselá secahua
bee sa'hua. ⁴Nu chiqui' ñia nzu
arqui'ru rniru lu cuenda'hua ante
lu beelá bee bene' Diose, nu rniru
lubeella equie nú xa nzeli arqui'hua
nu xa nzuquie arqui'hua añinzuca
nú rri'inu bee bene li'ihua lunú
rri'inu bee bene li'ihua, nu lunú
nehuana secahua. ⁵Nucua' rlube' nú

rlualu Diose tucu nú necane. Xne
li'ihua bee enu nehuana seca riala
nú ati'hua elu rnibiya'nu.

⁶Nu lunú rlualu Diose tucu nú
necane, enze'e ri'inu nú nehuana
zeca bee bene enu rri'i nú
nehuana secahua. ⁷Nu li'ihua bee
enu nehuana seca nee, liqui'nu
nú tselachia'ahua bichia chenu
riña zeca Jesucristo enu rnibiya',
nze'tanu enza liñibe leta ellie'nu
nú xi neca quii neca cuna bee
ángele'nu enu chiqui' rlu'cu poder.

⁸Che dete'nu castiya bee bene
enu la niarqui' chulu Diose nu
cuna lubee bene enu lá niarqui'
chili arqui' bedichia' nze'ca'
Jesucristo enu rnibiya' lua'ahua.
⁹Bee benequie' zeca castiya nú
leca xunga laxu, nu la yala cua'a
beei elu nzucu Diose xne chiqui'
rnibiya'nu. ¹⁰Scua aca bichia chenu
riña zeca Jesucristo enu rnibiya'
para nú lu'cu bee bene'nu ula'na
lunu, nu zecalullie' ye beella lunu,
nu le'ca li'ihua enu uyali arqui'
stichia'nu nú uniru luhua.

¹¹Enze'e ye ye'e rracu'ru lu
Diose equie cuenda'hua, nú ri'inu

elietsa luhua nú huañihua tucu nú rialane tucu nú ubixianu li'ihua nú huañihua. Nu le'ca rnacu'ru lunu nú ri'inu elietsa luhua cuna poder nú rlu'cunu nú yalu ye elliebacu' nze'ca nú rri'ihua, nu cuna ye beelá beenú rri'ihua, equie nú nzeli arqui'hua li'inu. ¹²Nu scua zucu' ayahua Jesucristo enu rnibiya' lua'ahua nu li'inu zucu' ayanu li'ihua equie nú secanu li'ihua nu seca Diose li'ihua.

**Lube'lu tucu bene enu rlu'cu
nú rnibiya' beze'lu**

2 Nee bee sa'a enu nzeli arquia'ahua Jesucristo, equie cuenda' nú nze'ta zeca Jesucristo enu rnibiya' lua'ahua nu equie nú yete' sa'ahua cuna li'inu, nacua nu zequiaa luhua, ²nú la zelahua nu chu zequienu bee bene li'ihua, li'ibeei enu rni nu uriñala bichia nu riña Jesucristo enu rnibiya'. La lliquihua chenu yene'hua nú rni bee bene scua, urre bee enu rni nú tucu espíritu uni lubei scua, urre nibeii nú li'i e'curu uquie'eru tucu carta nú rni scua lubei. ³La zelahua nú ti zequienu li'ihua, xne ante nú riña bichia ze'e rluti riñaxu bee bichia nú la zucua' bee bene Stichia' Diose. Che lube'lu tucu bene enu ri'i puro nú rri'i beze'lu bene quie' necala nú cha ebila. ⁴Bene quie' neca enu ri'i cundra ye lunú neca cuenda' Diose nu lu'cu bee bene ula'na lui, nu zucu' ayai li'i hasta nú zucui liñi indu' Diose, nu ni nú necai Diose.

⁵Ullu'cu arqui'hua nú scua unia luhua chenu uzucua'a cuna li'ihua. ⁶Nu nee li'ihua nediya'la'hua ti la zela nú chu lube'lu nucua' sino

que lube'lu nucua' hasta chenu riña bichia nu riala nú lube'lui. ⁷Bee elliebacu' nú nechá neca cua' necalane lu iliulabe, rri'itsia nú zela enu la zela nú acane scua. Chenu uzelala enu la zela nú acane scua, ⁸che lube'lu bene enu nechá rri'i cua', nu Jesucristo cuna bii nú laatsianu utinu li'i nu cuna ellie'nu nú nze'tanu nitilu li'i. ⁹Bene enu necha rri'i cua', lu cuenda' beze'lu entai, nu chiqui' lu'cui nú nibiya'i. Nu ri'i huaxi bee nú zecalullie' bee bene, nu ri'i bee milagro para nú zequienui bee bene. ¹⁰Cuna ye clasia' beenú necha neca zequienui bee bene enu unitilula ante Diose equie nú lá zela beei nu lá niarqui' beei chili arqui' beei nú neli neca nú atsila'a li'ibeei. ¹¹Enze'e tsana' Diose nu ye bee nucua' zequienu li'ibeei, nú chili arqui' beei lunú la neli neca. ¹²Para nú ye beei zeca beei castiya, li'ibeei enu lá chili arqui' lunú neli neca, equie nú máse uyu' arqui' beei uri'i beei lunú nechá neca.

Bee bene enu netsila'ala

¹³Pero li'iru ye ye'e riala nú dete'ru che'tsa lu Diose equie cuenda'hua, bee sa'a enu chiqui' seca Jesucristo. Xne hasta hua'tu ucañila Diose li'ihua para nú tsila'ahua lu castiya lunú leca xi nahua equie cuenda' Espíritu Santo nu lunú uchili arqui'hua lunú neli neca. ¹⁴Para nucua' ubixia Diose li'ihua nú acahua bee bene'nu, chenu uniru luhua bedichia' nze'ca' Jesucristo enu rnibiya' para nú huañihua liñibe elu nzucunu.

¹⁵Enze'e bee sa'a enu nzeli arquia'ahua Jesucristo utsuta'

arqui'hua uyanalahua lunú
uzete'ru li'ihua chenu ullua'aru
cuna li'ihua, nú lunú unilaru
luhua lu carta. ¹⁶Nu Jesucristo enu
rnibiya' lua'ahua cuna Pa'ahua
Diose enu seca lia'ahua nu rdu'nu
ana arquia'ahua diqui tiembu
enu uliqui' lua'ahua tucu nú neca
nze'ca nzuculua'ahua, equie nú
ña nze'canu. ¹⁷Li'inu du'nu ana
arqui'hua nu ri'inu elietsa luhua nú
tsuta' arqui'hua nihua nu ri'ihua
puro nú neca nze'ca.

Na'cuhua lu Diose equie cuenda'ru

3 Nee bee sa'a enu nzeli
arquia'ahua Jesucristo,
una'cuhua lu Diose equie cuenda'ru
para nú la le'e ri'chia letse stichia'
Jesucristo diqui bee luhua nu
zucu' aya bee bene stichia'nu, tucu
nú ungae letahua, ²le'ca na'cuhua
lu Diose para nú tsila'anu li'iru
lu bee bene enu necha rri'i, nu
lu bee bene enu necuchi nehuañi
xne laca ye bee bene nzeli arqui'
stichia' Jesucristo. ³Pero Pa'ahua
Diose siempre sa'alunu stichia'nu,
li'inu ri'inu elietsa luhua nú tsuta'
arqui'hua, nu acanu'nu li'ihua
lu ye nú nechá neca. ⁴Nu li'iru
nediya' nze'ca'ru nú Pa'ahua DiOSE
rri'inu elietsa luhua nú rri'ihua nu
nzeri'iláhua lunú unilaru luhua.
⁵Jesucristo ri'i elietsa luhua para
nú chenalaha elu seca' DiOSE, nu
ri'inu elietsa luhua nú riqui'hua lu
ye beenú xi nze'ta zecahua tucu nú
uriqui' Jesucristo.

Rqui'ña nú ri'i bee bene riña'

⁶Nee bee sa'a enu nzeli
arquia'ahua Jesucristo, enu rnibiya'

lua'ahua equie cuenda' li'inu
rnibiya'ru luhua nú chiu'uchuhua
lu titse bee sa'ahua enu nebichiu
la niarqui' ri'i riña' nu la nehuañi
tucu nú uzete'ru li'ihua. ⁷Xne
li'ihua nediya'la'hua xa riala nú
huañihua para nú huañihua tucu
nú nehuañiru. Li'iru né allua'aru
letahua sin nú ri'iru riña'. ⁸Nu le'ca
lecati eta' nú lia uda'curu sino que
bichia si rula' uti'qui arqui'ru nu
uri'iru riña' para nú la du'uru riña'
luhua nú ari'ihua elietsa luru para
nú huañiru, ⁹la necane nú la yala
nacu'ru nú ri'ihua elietsa luru sino
que necane para nú ulube'ru luhua
nú huañihua tucu nú nehuañiru.
¹⁰Chenu ullua'aru cuna li'ihua
uniru luhua: bene enu la niarqui'
ri'i riña', le'ca la acu nze'e. ¹¹Pero
nee ubene'ru nu nu' bee sa'hua
enu nebichiu letahua nu la niarqui'
ri'i riña' nu rdete' ru'u beella elu
la yala dete' ru'u beella. ¹²Equie
cuenda' Jesucristo enu rnibiya'
lua'ahua rniru nu rnibiya'ru lu bee
bene cua' nú cua'axe beella nu
zucu'lu beella nú ri'i beella riña'
para nú huañi beella.

¹³Bee sa'a enu nzeli arquia'ahua
Jesucristo, la llaca'hua nú rri'ihua nú
neca nze'ca. ¹⁴Tunu nu' tá tucuhua
enu la zucu' lunú rniru lu carta quie',
ubi'yahua ta nucua' nu la quiete'hualla
para nú che tu'lla. ¹⁵Pero la ri'ihua
lulla xi rri'ihua lu bene enu rlehua lu
sino que xi neca tucu bichihua uni'hua
lulla nú ri'i nze'calla.

Último bedichia' nú nequie lu carta quie'

¹⁶Nu Pa'ahua DiOSE enu rliqui'
nú nzuxe arquia'ahua, li'inu ri'inu

nú nzuxe arqui'hua ye bichia nu lu yeene. Nu Jesucristo nzu cuna yehua.

¹⁷Li'á Pablo le'ca li'i e'cua rquie'a letra quie' para nú ri'á saludar

li'ihua, scua rri'á lu ye bee cartaa, scua rquie'a. ¹⁸Nu Jesucristo enu rnibiyá' ri'inu nú cha nze'ca lu cuenda' yehua.

Amén

Carta tucu nú uquie'e San Pablo lu Timoteo

Uxe'la Pablo saludo lu Timoteo

1 Li'á Pablo, neca tucu apóstol' Jesucristo equie nú unibiya' Diose enu sila'a lia'ahua cuna equie nú unibiya' Jesucristo enu nzuculua'ahua nú nze'ta stucu bese. ²Quie'a carta quie' lulu Timoteo, li'ilu enu neca xi neca endua equie nú nzeli arqui' rucua'a Jesucristo, Diose Pa liñibe cuna Jesucristo enu rnibiya' lua'ahua ri'inu nú cha nze'ca lu cuenda'lu, cuna nú hua'a arqui'nu li'ilu cuna nú ri'inu nú nzuxe arqui'lu.

Uni Pablo equie cuenda' bee bene enu la zete' tucu nú neli neca

³Tucu nú unilá lulu chenu nza'a lu iliu Macedonia, nú ya'nalu lu eyeche Efeso, para nú nilu lu chiucu chuna bee bene ze'e para nú la zetea' beei bee bene lunú la neli neca, ⁴cuna nú la ria' beei caso lunú xela arqui' bee bene cuna lunú ti unga bee bene' beei hua'tu. Xne rri'i nucua' nú liutsia beei nu la ri'i nucua' elietsa lubeei para nú chililá arqui'beei Stichia' Diose. ⁵Lunú niarquía nú zeca beei bee sa'beei diquinu' arqui'beei sin nú

za' arqui'beei nú necha neca, scua aca ache nú diquinu' arqui'beei nzeli arqui'beei Stichia' Diose. ⁶Xne nu' beei enu la ria' scua, equie nú máse rdichia' beei bee bedichia' nú la zibi'. ⁷Niarqui' beei nú zete' beei bee bene xa neca ley' Diose, pero ni' li'ibeei la ri'ibeei beya' xi rni bedichia' nú rnibeei, nu la ri'ibeei beya' xi rni ye nú sete'beei bee bene.

⁸Nediya'ahua nú neca nze'ca ley' Diose, para bene enu rri'i beya' xi sibi'i. ⁹Le'ca nediya'ahua nú né liqui' Diose ley' cua' para bee bene enu nehuañi tucu nú rialane lunu. Neca ley' cua' para nú aca castiya bee bene enu nziti arqui' cuna bee bene enu la zucu'lu nú huañi nze'ca, cuna bee bene enu necha rri'i cuna bee bene enu rri'i dula, cuna bee bene enu la dete' nú neca equie Diose nu la lu'cu ula'na lunu, cuna bee bene enu ruuti pa' urre na', cuna ye bee bene enu rri'i eluti. ¹⁰Le'ca sibi' ley' cua' para nú aca castiya bee bene enu rri'i eluhuexe, cuna lubei niyu enu rna'tse le'ca sa' niyu, cuna lubei una'a enu le'ca rna'tse sa' una'a, cuna lubei bene enu rcachi' bee bene para nu

ruti beei bee bene lu stucu bene xi neca moso'. Le'ca sibi' ley cua' para nu aca castiya bee bene enu niquichia', cuna lubee bene enu hasta nú rquie'e Diose chenu rni eluquichia', cuna lubee bene enu rri'i condra bedichia' nú neli neca. ¹¹Bee bedichia' nú neli neca quie', neca beenú nze'ta lubee bedichia' nze'ca' Jesucristo nú ñia neca. Diose Pa liñibe enu riala ula'na utsa'nanu bedichia' quie' lua para nú ixiu'e'ene lubee bene.

Udete' Pablo che'tsa lu Diose equie nú uhua'a arqui'nu li'illa

¹²Rdetea che'tsa lu Jesucristo enu rnibiya' lua'ahua, xne rri'inu elietsa lua, nu nediya'nu nú tsalua stichia'nu enze'e ucañinu li'á para nú ixiu'e'la stichia'nu, ¹³añinzuca nú ante unia bedichia' nú necha neca lu cuenda'nu, nu uri'i condra bee bene enu nzeli arqui' li'inu, cuna nú chiqui' necha uri'á lubeella. Pero uhua'a arqui' Diose li'á, xne lá ri'á beya' lunú uri'á equie nú lasca' chili arquia Jesucristo. ¹⁴Nu chiqui' ñia uri'i Diose lua, uri'inu elietsa lua nú xa chili arquia Jesucristo, nu xneca zeca li'inu xne neca tucu necatse'ahua cuna li'inu.

¹⁵Nee bee bedichia' nú neli nia luhua, rqui'ña nú ye bee bene chili arqui' nú ube'ta Jesucristo lu iliulabe para nú tsila'anu li'ibeei lu stula beei, nu lu ye bee bene li'á neca tucu enu máse uri'i dula. ¹⁶Pero añinzuca nú necaa bene enu máse rlu'cu dula, uhua'a arqui' Diose li'á nu né llaca' Jesucristo li'á para nu scua ri'i bee bene enu chili arqui' li'inu beya' xa nzuquie arqui'

Jesucristo bee bene para nú scua chili arqui' bee bene stichia'nu, nu scua lu'cu beella nú huañili beella liñibe. ¹⁷¡Enze'e rqui'ña nú diqui tiambu lu'cua'ahua ula'na lu Diose, nu nia'ahua bedichia' nze'ca para li'inu enu neca Arre nu leca xunga atinu, nu le'ca rlu'cunu elurnibiya' diqui tiambu, xne li'itsianu necanu Diose nu lecati lañi' li'inu! Amén.

¹⁸Timoteo li'ilu enu neca xi neca endua, nia lulu nú ri'ilu tucu nú uni bee bene enu nzeli arqui' Diose lu cuenda'lu hasta hua'tu, xi neca tucu sundado enu nza lu xuu la lliquilu bee bene enu rri'i condra Stichia' Diose. ¹⁹Utsuta' arqui' lunú nzeli arqui'lu Jesucristo, nu uri'i bee elliebacu' nú neca nze'ca para nú acalu ri'ilu tucu nú necane. Xne nu' bee bene equie nú lá zucu' beei nú ri'i beei scua utsana' arqui'beei lunú uchili arqui'beei Stichia' Diose. ²⁰Scua ulle'ca Himeneo cuna Alejandro, enze'e utsa'na li'ibeei ya beze'lu para nú zete' beei nú la yala nú nibeei bedichia' nú necha neca lu cuenda' Diose.

Xa rqui'ña nú nacu' bee bene lu Diose

2 Nee rluti nia luhua nú nacu'hua lu Diose, cuna nú ziquieehua lu Diose, cuna nú diquinu' arqui'hua nacu'hua lunu lu cuenda' ye bee bene, nu dete'hua che'tsa lunu lu cuenda' beella. ²Rqui'ña nú nacu'ahua lu Diose lu cuenda' bee gobierno cuna lu cuenda' ye bee usticia, para nú huañi nze'ca'ahua nu nzuxe arquia'ahua, cuna nú nze ri'ila'ahua seidu inziu' Diose nu lu'cua'ahua

ula'na tucu nú rialane. ³Xne nucua' neca nze'ca nú riu' arqui' Diose Pa liñibe li'ínu enu utsila'a li'ahua lu dula. ⁴Nu niarquiu'nu nú tsila'a ye bee bene nu riña bichia nú chu'lu bee bene lunú neli neca. ⁵Xne nu' tucutsia Diose, nu equie cuenda' tucutsia Jesucristo nu' modo riña bee bene lu Diose li'ínu enu ube'ta lu iliulabe xi neca tucu bene. ⁶Unguti Jesucristo lu cruse para nú udixiunu equie cuenda' stula ye bee bene iliulabe, nucua' neca nú ulube' Diose lubee bene chenu uriña bichia nú unga bee nucua'. ⁷Enze'e ucañinu li'á para nú aca tucu apóstol'nu nu ixiule'a stichia'nu lubee bene cuna nú zetea bee bene enu la neca bee bene Israel lunú neli neca cuna nú xa chili arqui'bee' Jesucristo. Nelia nú nria scua, la zequienuahua.

⁸Nee niarquia nú ye bee eyeche nacu' bee niyu lu Diose nu letsa beella yabeella enza liñibe, pero la nacu' beella lu Diose cuna elliebacu' nú lixiu neca nu sin nu rlee bene nu sin xuu. ⁹Le'ca niarquia nú bee una'a utu beenchu xucu beenchu tucu nú riala nú utu beenchu, sin nú dete xe'ta' beenchu lunú suche'e beenchu cuna oro cuna perla, cuna laquie fiño nú huaxi seca, cuna nú la tsuche' xe'ta' beenchu ichia equie beenchu, ¹⁰xne máse neca nze'ca nú ri'i beenchu lunú neca nze'ca, tucu nú riala nú ri'i ye bee una'a enu nzenala inziu' Diose. ¹¹Le'ca esquie bee una'a rqui'ña nú chii cua'a beenchu nu zucu' diacatsia beenchu nu la ni beenchu chenu sete' bee niyu Stichia' Diose. ¹²La yala nú zete' tucu una'a Stichia'

Diose elu riete' sa' bee bene para nú riene'bee' Stichia' Diose xne la yala nú nibiya' bee una'a lubee niyu. Sino que zucu' diacatsia bee una'a, ¹³xne rlutilá ureche'e Diose Adán, cheela ureche'nu Eva. ¹⁴Nu lá zequienu beze'lu Adán, enu uzequienu beze'lu neca Eva, nu equie nú uzequienu beze'lu li'inchu uri'inchu dula. ¹⁵Pero le'ca tsila'a Diose bee una'a tunu ri'i beenchu tucu nú riala nú ri'i beenchu como naa nú neca beenchu, cuna nú chequieelá beenchu nú nzeli arqui' beenchu Diose, cuna nú zeca beenchu bee bene, nu huañi nze'ca beenchu.

Xa Riala nú huañi bee bene enu rnibiya' leta bee bene' Jesucristo

3 Neli, neca bedichia' quie' tunu nu' tucu bene enu rri'i elliebacu' nú nibiya' leta bee bene enu nzeli arqui' Jesucristo, neca nze'ca nú niarqu'i'lla ri'i'illa scua. ²Pero bene enu nibiya' rqui'ña nú acalla tucu bene enu nehuañi nze'ca tucu nú rialane para nú la ze'ta bee bene li'i'illa, cuna nú nechialla tucutsia una'a, nu acalla tucu bene enu nehuañi nze'ca cuna nú lu'culla elliebacu' nze'ca para nú lu'cu bee bene ula'na lulla, cuna nú acalla enu siempre nu' arqui' nú dete' elu ya'na bee bene ni'illa, nu acalla tucu bene enu chiqui' reca para nú acalla zete'lla bee bene. ³Cuna nú la acalla uniqui nu la acalla bene enu nelachi, nu la la'nalla nú ri'i'illa ana dimi' bee bene, rqui'ña nú ri'i nze'calla lu titse bee bene, nu aca lle'na arqui'lla, nu la acalla bene

enu riu'tsia arqui' dimi. ⁴Le'ca rqui'ña nú acalla tucu bene enu nibiya' nze'ca ni'i, nu zete'lla bee endu'lla nú zucu' beei ye nú zucu' beei cuna nú lu'cu beei ula'na. ⁵Xne tunu tucu bene la acalla nibiya'lla ni'lla, ¿xa acalla nibiya'lla lubee bene' Diose che? ⁶Enze'e, bene enu apenatsia nzeli arqui' Jesucristo, la yala nu nibiya'lla lubee bene enu nzeli arqui' li'inu para nú la aca nelliñalla nu la zecalla castiya nú riala beze'lu. ⁷Nu hasta bee bene enu la chili arqui' Jesucristo riala chulu li'illa nú nehuañilla tucu nú riala nú huañilla para nú la ya'na netúlla urre ri'i beze'lu ana lulla.

Xa rqui'ña huañi bee diácono

⁸Nee le'ca esquie, bee diácono bee enu rri'i elietsa lu bene enu rnibiya' rqui'ña nú aca beella bene enu rlu'cu bee bene ula'na lu, cuna nú tsa'alu beella stichia' beella, nu la aca beella bee uniki, nu le'ca la la'na beella nú ri'itsia beella ana dimi' bee bene. ⁹Nu tsuta' arqui'beella lunú ulube' Diose lua'ahua nú nzeli arquia'ahua, nu ri'ibeella puro elliebacu' nze'ca. ¹⁰Enze'e rluti rqui'ña nú acaxu preo beella, para nú bi'ya xa rri'i beella, nu tunu la lu'cu beella ni' tucu falta che nu' modo nú aca beella diácono. ¹¹Le'ca esquie bee una'a enu ri'i elietsa liñi indu, rqui'ña nú ri'i beella tucu nú riala ri'i beella para nú lu'cu bee bene ula'na lubeella nu la yala nú aca niquichia' beella, rqui'ña nú huañi nze'ca beella, tucu nú riala nú huañi beella, cuna nú tsa'alu beella stichia' beella lu yeene. ¹²Bee diácono rqui'ña nú

nechia beella tucutsia una'a beella, nu le'ca nibiya' beella ni'i beella cuna lubee endu' beella tucu nú rialane. ¹³Xne tunu ri'i bee diácono tucu nú rialane, lu'culá bee bene ula'na lubeella, nu ni'teme' la lliqui beella nibeella nú xa nzeli arqui'beella Jesucristo.

Chiqui' neca equie Jesucristo enu nzeli arquia'ahua

¹⁴Nzuculua nú la lea' nzelabi'ya li'ilu Timoteo, pero rquie'a carta quie' lulu, ¹⁵xne tunu rle'a nú nzelabi'ya li'ilu, nediya'la'lu xa riala nú huañilu ante beelá bee bene' Diose, enu nehuañi nu nzuta' arqui' lunu, nu sete'beella stichia'nu nú neli neca. ¹⁶Li'ihua nediya'nze'ca'ahua nú chiqui' rlu'cu Jesucristo poder li'inu enu ulube' Diose lua'ahua nú chili arquia'ahua: Ube'tanu lu iliulabe xi neca tucu bene, uni Espíritu Santo nú la lu'cunu dula, nu ulañi' bee ángele li'inu nú ube'tanu lu iliulabe. Ubene' bee bene iliulabe stichia'nu, nu diqui bee luhuare lu iliulabe uyali arqui' bee bene li'inu, nu uquienu liñibe nzianu.

Bee bene enu sana' arqui' Stichia' Diose

4 Neli unila Espíritu Santo nú nze'ta bichia nú nu' bee bene enu tsana' arqui' lunú nzeli arqui' Jesucristo, nu máse rri'i beei caso lunú rni bee bene enu sequienu bee bene cuna ye beelá nú nze'ta lu beze'lu. ²Li'ibeei maselá rri'i caso

beei stichia' bee bene enu niquichia' nu sequienu bee bene, bee benecua' neca enu la tsia' lunú rri'i beei dula xne nu'beya'la' beei nú rri'ibeei scua. ³Bee benecua' rnibeei nú la yala chia bee bene, cuna nú nu' bee elubacu nú leca modo nú acu bee bene, pero udu' Diose ye clasia' bee elubacu para nú acu bee bene enu nzeli arqui' li'ínu, li'ibeella enu nu'lu lunú neli neca nu dete'beella che'tsa lunu. ⁴Xne ye nú ureche' Diose neca nze'cae, nu la yala nú ni'ahua nú nu' nú la neca nze'ca, tunu dete'ahua che'tsa lu Diose chenu nzeta'cua'ahuane, ⁵xne chenu rna'cua'ahua lu Diose, li'ínu rri'ile'yanu cuna stichia'nu equie nú rda'cua'ahua.

Tucu bene enu neli sibi' lu Jesucristo

⁶Tunu li'ilu sete'lu bee bene enu nzeli arqui' Jesucristo tucu nú unilá lulu, che sí necalu enu neli sibi' lu Jesucristo tucu nú rialane, scua nzeacalálu maselá lunú recalalu cuna lunú nzeli arqui'lu, cuna bee bedichia' nze'ca nú nzequieelu.

⁷La ri'ilu caso bee cuento nú xela arqui' bee bene beenú la neli neca, mejora uquia quietsia nú acalálu nú tsuta' arqui'lu nú huañilu tucu nú niarqui' Diose nú huañilu. ⁸Neca nze'ca nú rri'i bee bene ejercicio para nú aca naaqui cuerpo'lla, pero lu yeene máse sibi' nú nzuta' arquia'ahua lu Diose, xne tucu nú sibi' nucua' lu iliulabe quie' le'ca scua zibi'li liñibe elu huañi li'ahua. ⁹Neli neca bee bedichia' cua', nu ye bee bene riala nú chili arqui' li'i. ¹⁰Enze'e mase se'ca'a lunú se'ca'a, pero nzeri'ilá lunú ri'á, equie nú

nzeli arquia'a Diose enu nehuañi, li'ínu enu sila'a ye bee bene. Pero máse necane para bee bene enu nzeli arqui' li'ínu.

¹¹Nucua' neca nú riala zete'lu bee bene cuna nu nibiya'lu lubeei nú zucu' beei bee nucua'. ¹²Ubi'ya li'ilu para nú la ni bee bene nu la zibi'lu equie nú nere'ne'lu, rqui'ña nú acalu tucu ejemplu lubee bene enu nzeli arqui' Jesucristo equie nú xa rdichia'lu nu xa nehuañilu, cuna nú secalu bee bene cuna nu xa nzeli arqui'lu Jesucristo, cuna nú xa rri'ilu elliebacu' nze'ca. ¹³Diqui nú nzelabi'ya li'ilu ula' Stichia' Diose lubee bene, nu ni' bezete' lubeei nu zete'lu li'ibeei lunú rni Stichia' Diose. ¹⁴Ubi'ya nú uliqui' Diose lulu tucu nú uni bee bene' Jesucristo enu rnibiya' equie cuenda'lu chenu uricu' beella yabeella equielu, chenu uri'i beella beya' nú necalu bene enu ucañi Diose. ¹⁵Uzu'cu'lutsia nú ri'ilu ye bee nucua' nu utsuta' arqui' lue para nú lañi' ye bee bene nú xa nzequielu inziu' Diose. ¹⁶Ubi'ya li'ilu nu ubi'ya lunú xa sete'lu bee bene, nu uquia quieelá lunú nzuta' arqui'lu lu ye nu nediya'la'lu, scua tsila'alu li'ilu nu tsila'a bee bene enu riene' lunú sete'lu.

Xa riala huañi bene enu nzeli arqui' Jesucristo

5 La ri'ilu nú qui'ya' tucu bene enu unguxu uni' bezete' nze'ca lulla tucu nú necalla xi neca pa'lu, nu bee bene enu nere'ne' ude'te' bezete' nze'ca lubeei tucu nú neca beei xi neca bichilu. ²Le'ca uni' bezete' nze'ca lubee una'a enu

unguxu tucu nú neca beella xi neca na'lu, nu bee una'a enu nere'ne', uni' bezete' nze'ca lu beenchu tucu nú neca beenchu xi neca zanalú, nu la za' arqui'lu nú necha neca lu beenchu.

³Uri'i elietsa lubee una'a zaqui enu leca'ti nu'. ⁴Pero tunu tucu una'a zaqui enu rlu'cu endu' urre lli'ñi acaa, li'ibeei rqui'ña nú rluti acabeei enu bi'ya bee bene' beei nu ri'ibeei elietsa lulla para nú ixiu beei nu uri'i ru'cu pa' beei cuna na' beei li'ibeei, xne nucua' neca nze'ca, nu scua riu' arqui' Diose.

⁵Una'a zaqui enu neli nú leca' tinu', nchiucu'tsia arqui'lla Diose nu la tsuxella rnacu'lla lunu nu sequieella lunu bichia si rula'. ⁶Pero una'a zaqui enu nehuañitsia lunú riu'tsia arqui' lunú necha neca, neca xi neca nú unguutilanchu xne la llucu' arqui'nchu Diose. ⁷Udixiule'e bee nucua' lubee bene enu nzeli arqui' Jesucristo, para nú la ze'ta bee bene li'ibeella. ⁸Xne bene enu la ri'i elietsa lusa', nu ni' lubee bene ni'lla la ri'illa elietsalu, li'illa utsana' arqui'lalla lunú nzeli arqui'lla Jesucristo' nu scua másela necha necalla lunú neca bee bene enu la chili arqui' Jesucristo.

⁹Una'a zaqui enu zucuichi para nú ri'ihua elietsalu, rqui'ña nú necalla enu nza máse de sesenta lana cuna nú lá lu'culla stucu niyu diqui nú nehuañi niyu'lla. ¹⁰Le'ca rqui'ña nú nu'lu bee bene li'illa nú uri'illa ye beenú neca nze'ca, cuna nú uri'i ru'cu nze'calla bee endu'lla, nu udete'lla elu a'tse bee bene ni'lla nu uri'i nze'calla lubee bene enu nzeli arqui' Jesucristo enu

rriña ni'lla. Nu uri'illa elietsa lubee bene enu nehuaana seca. Cuna nú uzucu'lulla nú uri'illa ye nú neca nze'ca.

¹¹Pero bee una'a zaqui enu nere'ne'lá la qui'ña nú zucu' ichilu beenchu, xne luego niarquí' beenchu nú chia zeca beenchu nu la ria' beenchu tucu nú riala nú sibi' beenchu lu Jesucristo. ¹²Che rri'i beenchu dula, xne la tsa'alu beenchu lunú ucuaqui beenchu lu Jesucristo. ¹³Le'ca bee una'a cua' enzetsia beenchu ni'i por ni'i bee bene, nu rna'tse custumbre beenchu nú lecaxi ri'i beenchu, nu la ri'i beenchu nucua'tsia, le'ca neca beenchu enu rni lu cuenda' bee bene. Nu riu'u beenchu lu ye nú la yala chu'u beenchu nu rni beenchu lunú la yala ni beenchu. ¹⁴Enze'e niarquía nú mejora chia zeca bee una'a zaqui enu nere'ne'lá cuna nú lu'cu beenchu endu', nu nibiya' nze'ca beenchu ni'i beenchu tucu nú rialane para nú la chu'u nú ze'ta bee bene enu rlee lua'ahua lia'ahua. ¹⁵Xne nu' bee una'a zaqui enu utsana' arqui'la inziu' Diose nu nzequie beenchu inziu' beze'lu.

¹⁶Tunu tucu bene enu nzeli arqui' Jesucristo rlu'cu beella leta bee familia' beella tucu una'a zaqui, li'ibeella rqui'ña nú ri'i beella elietsa lu una'a ze'e, para nú la aca nucua' tucu yuhua' para bee sa'ahua enu nzeli arqui' Jesucristo, nu scua nu' modo ri'i beella elietsa lubee una'a zaqui enu neli leca' tinu'.

¹⁷Bee bene enu rnibiya' lubee bene enu nzeli arqui' Jesucristo cuna bee bene enu sete' Stichia'

Diose nu rnibeella tucu nú rialane, rqui'ña nú chiqui' lu'cu bee bene' Diose ula'na lubee benecua' cuna nú dete' beella ye lunú qui'ña bee benecua'. ¹⁸Xne lu ichi' Stichia' Diose rni: “La du'lu ixiu lli'i u'na' chenu rri'í riña'.” Le'ca rni lu ichi' Stichia' Diose: “Bene enu rri'i riña' rqui'ña nú yaxulla.”

¹⁹La chili arqui'lu lunú rni bee bene enu nu' xi rricu' quiya tucu bene enu rnibiya' lubee bene enu nzeli arqui' Jesucristo, tunu leca chiucu chuna testigo enu ni nú neli neca nú rni bene lu cuenda'lla.

²⁰Pero tunu tucu bene enu rnibiya' nzeri'ilá dula rqui'ña nú ri'ilu nú qui'ya'lla ante lu ye bee bene enu nzeli arqui' Jesucristo, para nú lliqui beelá beella.

²¹Lu DiOSE, cuna lu Jesucristo nu lubee ángele enu ucañinu, nia lulu nu la zañi'lu uri'i tucu nú unilá lulu, nu la cañilu xa rri'ilu lubee bene uri'i tucunecatse lu ye bee bene.

²²La liala'lu nú chu cañilu tucu bene enu nibiya', xne la ri'ilu beya' tunu rri'i benecua' tucu nú necha neca chequie ni bee bene nú le'ca nuulu riu' arqui'lu tucu nú rri'illa. Ubi'ya li'ilu lu cuenda' ye dula. ²³Lu nú siempre riti xla'culu xne la neca nze'ca xla'culu, la hue'lu inza tsia, hue'lu lle'na biñu.

²⁴Nu' bee bene enu luego ahee dula nú rri'illa ante nú chiu'lue lu cuenda'lla lu DiOSE, pero nu' bee bene enu la aca ahee dula nú rri'i, hasta bichia chenu chiu'lue lu cuenda'lla ante DiOSE. ²⁵Le'ca scua nu' bee bene enu luego ahee lunú neca nze'ca rri'illa nu nu' bee bene enu la aca chee nú neca nze'ca rri'i

pero riña bichia nu acabiya' bee bene bee nucua'.

6 Bee bene enu neiqui lu stucu bene rqui'ña nú lu'cu beella ula'na lubee patrón' beella, para nú la ni condra bee bene DiOSE cuna stichia'nu nú sete'ahua. ²Nu tunu le'ca patrón beella nzeli arqui' Jesucristo, rqui'ña nú máse lu'cu beella ula'na lu bene ze'e, xne tucutse nzeli arqui'beella Jesucristo, le'ca rqui'ña nú ri'i beella riña' tucu nú rialane, xne sibi' beella lubee sa'beella enu le'ca nzeli arqui' Jesucristo. Scua ze'te' bee bene nu ni' lubeei nú ri'ibeei scua.

Tucu bene enu neli neca xene

³Tunu nu' tucu bene enu sete' bee bedichia' nú la neca tucu nú neca stichia' Jesucristo nu ni' nú xa nzeli arquia'ahua Jesucristo la zete'lla bee bene, ⁴li'i'illa necalla tucu bene enu ruti' nu lecaxi reca. Riu'tsia arqui'lla nú rliunulla bee sa'lla, chequie ze'e rquixie nú ria arqui' bee bene lu sa' bee bene, cuna nú rana arqui' bee bene sa' bee bene, cuna nú rquiexu bee bene bee sa' bee bene nu la lu'cu bee bene confianza lu sa' bee bene, ⁵bee bene enu neca scua, la tsuxe beei nú rliu beei equie ye beenú la zibi' nchiñi elliebacu'beei, xne la ri'i beei beya' lunú neli neca, che rri'i beei elliebacu' equie nú chili arqui'beei Jesucristo aca xene beei. Bee bene enu neca scua uchiu'uchu lubeei nu la quiete'lu beei. ⁶Neli nu chiqui' xene bee bene lunú nzeli arqui'lla Jesucristo, pero bee bene enu neca conforme lunú rlu'cutsia. ⁷Xne lecaxi ubela yua'ahua lu iliulabe quie', nu lecaxi uya'ahua

chenu atia'ahua. ⁸Tunu rlu'cua'ahua nú da'cua'ahua, nu rlu'cua'ahua nú utua'ahua cuna nucua' rqui'ña nu aca conforme'ahua. ⁹Pero bee bene enu niarquí' nú aca xene lu iliulabe quie' la riqui' beei nú tsuta' arqui'beei sino que chu rri'i beze'lu ana lubei cuna nú la ri'ibeei ana lu elliebacu' nú necha neca rri'i beei, nu rri'ibeei tucu nú la yala ri'i beei, nucua' rri'i nú nitilu beei. ¹⁰Xne lunú rle' bee bene nú lu'culla dimi, ze'e rquixie ye beenú necha neca, nu nu' bee enu rle' dimi utsana' arqui'beei lunú nzeli arqui'beei Jesucristo, che le'catsia li'ibeei rri'ibeei nú nehuana seca beei.

Lunú riala ri'i Timoteo

¹¹Pero li'ilu Timoteo bene' Diose, uchiu'uchuu lubee nú necha necacua', ucu'na nú huañi nze'calu tucu nú niarquí' Diose nú huañilu, uchili arqui' li'inu, nu utsuquie arqui', nu uzeca ye bee bene, cuna nú aca lle'na arqui'. ¹²Ucu'na nú tsuta'li arqui'lu lunú nzeli arqui'lu Jesucristo. La tsana'lu nú nitilu elunehuañili nú lu'culu liñibe xne para enze'e udu' Diose li'ilu, nu nilu lu huaxi bee bene xa nzeli arqui'lu Jesucristo. ¹³Lu Diose enu rliqui' nú nehuañi ye beenú nu' lu iliulabe, nu equie cuenda' Jesucristo li'inu enu né lliqui uni lunú neli neca lu Poncio Pilato, nibiya'a lulu, ¹⁴nú zucu'lu nú ri'ilu lunú rnia lulu, nu uri'i tucu nú neli neca para nú la ni bee bene nú la ri'ilu tucu nú neli neca, scua uri'i hasta bichia nú riña zeca Jesucristo. ¹⁵Nu nze'tanu bichia chenu nibiya' Diose nú nze'tanu, li'i Diose enu riala ye nú neca ula'na, nu tucutsia li'inu necanu Diose, nu rlu'cunu ye poder, li'inu

necanu Arre lubee arre nu Rnibiya'nu lu ye bee enu rnibiya'. ¹⁶Li'inu necanu enu leca xunga ati, nu nzucunu lu ellie'e nú rulu siqui' elu lecati chébica. Ni' tucu bee bene lasca' lañi' li'inu, nu laca lañi' bee bene li'inu. iLi'inu chiqui' rialanu huaxi ula'na, nu leca xunga laxu poder nú rlu'cunu! Amén.

¹⁷Bee bene enu neca bene xene lu iliulabe quie', uni' lubeella nú la uti' lliña beella, cuna nú la ri'i beella elliebacu' nú la laxu nú rlu'cu beella, xne bee eluxene nú rlu'cu bee bene rlxue, mejora nú zucu'lutsia beella Diose enu nehuañi, xne li'inu necanu enu chiqui' rliqui' ye nú se'cala'cha'ahua para nú ñia tsu arquia'ahua. ¹⁸Uni' lubeella nú ri'i beella lunú neca nze'ca, cuna nú ri'i beella huaxi beenú neca nze'ca, cuna nú ñia nzu arqui'beella dete' beella xi secala'cha' bee bene nu ri'i beella elietsa lubee bene, ¹⁹xne scua rquie' sa' beella eluxene nú ri'i elietsa lubeella lube bichia nú enta, para nú lu'cu beella nú huañili beella liñibe.

Último bee bedichia' nú nequie lu ichi' quie'

²⁰Timoteo la zañi'lu ri'ilu lunú uya'na cuenda'lu nú ri'ilu, la ri'ilu caso bee bedichia' nú la zibi' nú nu' lu iliulabe quie', ni' bee eluquichia', nu ni' bee bedichia' nú rni bee bene enu rni nú chiqui' reca, pero la neli nú reca beei. ²¹Xne nu' bee bene equie nú rri'i beei caso bee nucua', utsana' arqui'beei nú nzeli arqui'beei Jesucristo.

Diose ri'i nú cha nze'ca lu cuenda' yehua nee Timoteo.

Amén.

Carta rrucu nú uquie'e San Pablo lu Timoteo

Uxe'la Pablo saludo lu Timoteo

1 Li'á Pablo necaa tucu apóstol' Jesucristo, Diose udu' li'á para nú ixiule'a stichia'nu nú ucuaqui u'nanu nú dete'nu nú huañili bee bene liñibe equie nú chili arqui' bee bene Jesucristo. ²Xe'la carta quie' lulu Timoteo enu chiqui' se'ca xi neca tucu endua. Diose Pa liñibe cuna Jesucristo enu rnibiya' lua'ahua, ri'inu nú cha nze'ca lu cuenda'lu cuna nú hua'a arqui'nu li'ilu, cuna nú ri'inu nú nzuxe arqui'lu.

Rdete' Pablo che'tsa lu Diose equie cuenda' Timoteo

³Cada chenu rnacua lu Diose bichia si rula' nchiucu' arquia rnacua lunu equie cuenda'lu, nu rdetea che'tsa lu li'inu enu sibi'a lu cuna tucu elliebacu' nze'ca, tucu nú uzibi' bee benea hua'tu lunu. ⁴Chenu rellu'cu' arquia nú unguna'lu, ala' nú ulañilá li'ilu nú se'ca para nú ñia tsu arquia. ⁵Nchiucu' arquia nú neli nzeli arqui'lu Jesucristo, nu rlutilá naula'lu Loida cuna na'lu Eunice uchili arqui'beella li'inu scua, nu

nediya itaa nú le'ca scua nzeli arqui'lu li'inu.

⁶Enze'e nia lulu nú du'lálu ana arqui'lu para nú ri'ilu lunú uliqui' Diose lulu nú ri'ilu chenu uricua ya equielu. ⁷Xne lá liqui' Diose tucu espíritu lua'ahua para nú lliquia'ahua. Li'inu uliqui'nu Espíritu'nu lua'ahua para nú tsuta' arquia'ahua lunu cuna nú zeca'ahua bee sa'hua cuna nú lu'cua'ahua elliebacu' nú neca nze'ca. ⁸Enze'e la tu'lu nilu stichia' Jesucristo, le'ca la tu'lu li'á nú nchiña ni'cu' equie nú rixiule'a stichia' Jesucristo, cuna elietsa' Diose uriqui' lu ye beenú nehuana nze'ta zecalu equie nú rixiule'elu bedichia' nze'ca' Jesucristo. ⁹Xne utsila'ala Diose lia'ahua lu dula, nu ucañinu lia'ahua para nú huañia'ahua tucu nú niarqui'nu, la neca nucua' equie nú uria'ahua nú neca nze'ca, sino que necane nú hasta ante nú quixie iliulabe uri'inu elliebacu' nú equie cuenda' Jesucristo lube'nu lua'ahua xa secanu lia'ahua, ¹⁰pero nee nú ube'tala Jesucristo, li'inu enu ungutí equie stula'ahua, uria'ahua beya' nú chiqui' seca Diose lia'ahua, nu Jesucristo neca enu uri'i ana lu

eluti, nu scua equie cuenda' li'inu uria'ahua beya' nú nu' elunehuañi nú leca xunga laxu liñibe, elu nehuañi nú neca para bee bene enu chili arqui' Jesucristo.

¹¹Enze'e ucañi Diose li'á para nú aca tucu apóstol'nu nu nia stichia'nu, cuna nú zetea stichia'nu lu bee bene enu la neca bee bene Israel. ¹²Equie cuenda' nucua' nehuana se'ca lu ye nú se'ca, pero la tua nucua' xne nediya ti nzeli arquia, nu le'ca nediya nú rlu'cunu poder para nú bi'yanu ye lunú utsa'na lunu hasta bichia nú riña zecanu.

¹³La chiecu' arqui'lu bee bedichia' nze'ca nú uzetea li'ilu equie nú xa nzeli arqui'lu Jesucristo, cuna nú xa secalu bee bene, xne tucutsia neca'a cuna Jesucristo. ¹⁴Nu cuna elietsa' Espíritu Santo enu nzu cuna lia'ahua, uri'i ucu lunú utsa'na Diose lulu nú ri'ilu.

¹⁵Li'ilu nediya'lu nú ye bee bene enu nzeli arqui' Jesucristo lu iliu Asia utsana' arqui'beella li'á, nu leta beella nchiñi Figelo cuna Hermógenes. ¹⁶Diose ri'i elietsa lubee familia' Onesíforo, xne huaxi bese utsalalla arquia, nu né tu'lla li'á nú nchiñia ni'cu'. ¹⁷Uriñatsialla eyeche Roma, chu ucu'nalla li'á hasta nú ullela'lla li'á. ¹⁸Li'ilu nediya' nze'ca'lu nú chiqui' uri'i Onesíforo huaxi elietsa lua'a chenu ullua'a eyeche Efeso. Ala' chenu riña bichia nú riña zeca Jesucristo, chiqui' hua'a arqui'nu li'illa.

Sundado' Jesucristo

2 Nu li'ilu Timoteo enu neca xi neca endua, utsuta' arqui'lu

lu elietsa nú rliqui Jesucristo lua'a. ²Lunú ubene'lu nú unia lulu ante huaxi bee bene, uze'te' nucua' bee bene enu neli nzeli arqui' Jesucristo, li'ibeella enu aca zete' nucua' stucu bee bene. ³Tucu nú rriqui' tucu sondado lu riña' nú rri'i, scua uriqui' lunú nehuana secalu como bene' Jesucristo nú necalu. ⁴Ni' tucu bee sundado la chu'i lubee nú la yala chu'i, para nú ya'na nze'cai lu bene enu rnibiya' lui. ⁵Le'ca esquie tucu bene enu rita tucu nú rita, rqui'ña nú ita nze'calla para nú scua nu' modo ri'illa ana premio'lla. ⁶Nu bene enu rri'i riña' lu yuu, rluti chiqui' ri'illa riña' para nú scua nu' modo yuculla ula'cu'lla. ⁷Uri'i elliebacu' lunú rnia lulu, nu Jesucristo ri'i elietsa lulu para nú ri'ilu beya' yeene.

⁸Ullu'cu' arqui' Jesucristo enu ungula lubee familia' arre David, li'i Jesucristo enu ungu'ti nu uhuañi zeca, nucua' neca bedichia' nze'ca'nu nú rixiule'a lubee bene. ⁹Enze'e equie cuenda' nucua' nehuana se'ca nu hasta naca'cua nchiñia liñi ni'cu', xi neca tucu bene enu necha uri'i, pero Stichia' Diose la naca'cuu. ¹⁰Enze'e rriquia yeene para nú ri'á elietsa lubee bene enu ucañila Diose enu neca bee bene'nu, para nú lu'cu beella nú tsila'a beella equie cuenda' Jesucristo, cuna nú lu'cu beella elunehuañi nú ñia neca nú la laxu liñibe.

¹¹Neli neca bee bedichia' quie' nú rni:

Tunu ungu'tila'ahua cuna li'inu, le'ca huañia'ahua cuna li'inu.

¹²Tunu rriqui'ahua lunú nehuana se'ca'ahua,

le'ca nibiya'ahua cuna li'inu.
 Nu tunu nia'ahua nú la
 chulu'ahua li'inu,
 le'ca ninu nú la chulunú
 lia'ahua.

¹³ Nu tunu la tsalu'ahua
 stichia'ahua,
 pero li'i sino sa'alunu stichia'nu.
 Xne leca modo nú che'enu lunú
 necanu.

Bene enu rri'i nze'ca riña' Diose

¹⁴ Ellu'cu' arqui'lu bee bene bee
 bedichia' cua', nu equie cuenda'
 Diose nilu lubeei nú la aca equie
 stichia' beei lu sa'beei equie beenú
 lecaxi sibi' nú la ri'i elietsa lubee
 bene, sino que rri'itsia bee nucua'
 nú rnitilu bee bene enu riene' bee
 bedichia' cua'. ¹⁵ Uri'i yeene hasta
 elu acalu para nú ya'na nze'calu
 lu Diose, nu riñalu lunu como
 tucu bene enu la tu' riña' nú rri'i,
 xne rri'ilu tucu nú neca nze'ca
 cuna Stichia' Diose. ¹⁶ La nilu bee
 bedichia' nú lecaxi sibi', nú la ri'i
 elietsa lubee bene. Xne bee bene
 enu rri'i scua másela nzabeei inziu
 nú necha neca, ¹⁷ nu stichia' beei
 neca xi neca elichia nú yexetsia
 rri'chia letse. Sa' bee bene cua'
 neca Himeneo cuna Fileto, ¹⁸ xne la
 chequia' beei tucu nú neca Stichia'
 Diose. Li'ibeei rnibeei nú la huaña'
 bee bene enu ungoti, nu scua
 rri'ibeei nú sa' arqui' chiucu chuna
 bee bene lunú nzeli arqui'beella.
¹⁹ Pero Stichia' Diose leca modo nú
 che'e xi neca tucu quíee nú chiuca
 nzucu. Nu lu ichi' Stichia' Diose
 rni: “Diose nu'lunu bee bene'nu”, nu
 le'ca rni lu ichi' stichia'nu: “Ye bee
 bene enu rni nú nu'lu Diose, rqui'ña

nú tsana' arqui'beella ye beenu
 necha neca.”

²⁰ Liñi tucu ni'i llene la nu'tsia
 bee exqui'ña nú rqui'ña bee bene
 nú necache' oro urre plata, le'ca
 nu' exqui'ña nú necache' aca cuna
 exqui'ña nú necache' yuu, xne nu'
 bee exqui'ña cua' nú sibi'i ye bichia,
 nu nu' beenú sibi'tsia chenu reca
 tucu eliñi. ²¹ Le'ca scua bene enu
 du' ana arqui' nú huañi nze'ca, neca
 benequie' xi neca tucu exqui'ña nú
 máse sibi' chenu reca tucu eliñi.
 Li'illa necalalla bene enu la lu'cu
 dula ante Jesucristo enu le'ca sibi'
 para li'inu, xne nzunu para nú
 ri'inu ye nú neca nze'ca.

²² Enze'e ubi'ya li'ilu nú lá ri'ilu
 lunú necha neca rri'i bee bene enu
 nere'ne', nu uhuañi tucu nu riala
 nú huañilu. Nu uquia quíeelá lunú
 nzeli arqui'lu Jesucristo, nu uquia
 quie nú zecalálu bee bene cuna
 nú nzuxe arqui'lu cuna beelá bee
 bene enu diquinu' arqui' rncu'
 lu Jesucristo. ²³ La nixuulu bee
 bedichia' nú lixiu rni, bee bedichia'
 nú lecaxi zibi', xne li'ilu nediya'lu
 nú scua rquixie xuu. ²⁴ Nu tucu
 bene enu sibi' lu Jesucristo la yala
 nú acalla tucu bene xuu, rqui'ña nú
 acalla tucu bene nze'ca cuna ye bee
 bene, le'ca rqui'ña nú acalla tucu
 bene enu reca sete' bee bene, cuna
 nú lu'culla paciencia bee bene, ²⁵ nu
 cuna bedichia' nze'ca nilla lubee
 bene enu rri'i condra bee bedichia'
 nu neli neca, para nú bi'ya tunu
 scua ri'i Diose nú che'e arqui'beei
 nu chulu beei lunú neli neca, ²⁶ nu
 scua la'a beei leta ya beze'lu enu
 rnibiya' lubeei nu rri'i beei lunú
 niarqui' beze'lu.

**Xa ri'i bee bene chenu
nze'ta laxu iliulabe**

3 Le'ca rqui'ña nú ri'ilu beya' Timoteo, nú chenu nze'ta laxu iliulabe chiqui' neriña' para nú huañi bee bene. ²Xne bee bene para li'itsia beei rri'i beei elliebacu', nu sucu'lutsia beei nú lu'cu beei huaxi dimi, nu aca nelliña beei, nu nibeei puro bedichia' nú ruti', cuna nú ni condra beei Diose, nu la zucu' beei nú ni pa' beei urre na' beei, nu la detea' beei che'tsa lu Diose, nu la ria' beei caso lunú neca cuenda' Diose, ³nu la zeca' beei bee bene nu la hua'a arqui'beei bee bene, cuna nú rta' beei eluquichia' bee bene, nu la aca beei tsuxe beei lunú necha neca rle' elliebacu' beei, nu chiqui' aca nelachi beei, cuna nú le beei lunú neca nze'ca. ⁴Le'ca dete' cuenda beei bee bene enu rquiete' beei, nu la lliqui beei ri'i beei lunú niarqui' beei cuna nú chiqui' zucu' aya beei li'ibeei nu ri'i beei xitse nú niarqui'beei luhuare nú zucu' beei nú niarqui' Diose. ⁵Rlube' beei nú neca beei xi neca bene enu neli nzeli arqui' Diose, pero lunú rri'i beei rlube' nú la chili arqui'beei li'inu. La quiete'lu sa' bee bene enu rri'i scua.

⁶Xne leta bee benecua' nu' bee bene enu riu'u ni'i bee bene nu sequienu beei bee una'a cuna lunú sete' beei bee una'a enu ratu sequienu bene, bee una'a enu rri'i ye clasia' dula cuna ye clasia' bee elliebacu' nú la zibi'. ⁷Bee una'a quie' siempre riene' beenchu lunú sete' bee bene cua', pero la riña nú ri'i beenchu beya' lunú neli

neca. ⁸Hua'tu bee bene enu lee Janes cuna Jambres uri'i condra beei Moisés. Le'ca scua neca bee benecua' nú rri'i condra beei lunú neli neca, li'ibeei unutilula elliebacu' beei nu ni'la chili arqui'beei Diose tucu nú riala chili arqui'beei. ⁹Pero la ria'beei scua huaxi tiembu, xne ye bee bene ri'i beya' lunú sequienu beei bee bene, tucu nú ulle'ca Janes cuna Jambres.

**Uni Pablo lu Timoteo
lunú riala ri'illa**

¹⁰Pero li'ilu Timoteo nediya' nze'ca'lu xa setea bee bene, cuna nú xa nehuaña, cuna nú xa neca ellibacua, cuna nu xa nzeli arquia Jesucristo, cuna nú xa rlu'cua paciencia, cuna nu xa se'ca bee bene, cuna nu xa rriquia lunú nehuana se'ca. ¹¹Li'ilu nediya'lu lunú uri'inu bee bene li'á, nu nediya'lu xa nehuana ulle'ca nu le'ca nediya'lu xa nehuana ulle'ca lubee eyeche Antioquía lu eyeche Iconio cuna lu eyeche Listra. Huaxi beenú nehuana ulle'ca lunú uri'inu bee bene li'á, pero Diose utsila'a li'á lu ye beenú nehuana ulle'ca. ¹²Nu le'ca ye bee bene enu niarqui' nú huañi tucu nú niarqui' Diose nú huañi equie nú nzeli arqui'beella Jesucristo, nu nehuana zeca beella lunú ri'inu bee bene li'ibeella,

¹³pero bee bene enu necha rri'i nu bee enu sequienu bee bene bichia por bichia máse nzeri'i beei nú necha neca, sequienu beei bee bene nu sequienu beei le'catsia li'ibeei. ¹⁴Pero li'ilu utsuta'la arqui'lu lunú ungalálu, cuna lunú nzeli arqui'lu, xne nediya'lu ta bee enu

uzete' li'ilu. ¹⁵Xne desde nú lle'nalu nu'lulu Stichia' Diose, bee bedichia' cua' rri'i elietsa lulu nú rri'ilu beya' xa utsila'alu equie nú nzeli arqui'lu Jesucristo. ¹⁶Ye bee bedichia' nú nequie lu ichi' Stichia' Diose nze'tae lu Diose. Nu sibi'i para nú zete'e bee bene, nu para nú dete'e bezete' lubee bene, nu para nú nine lubee bene nú xa huañi nze'ca bene nu para nú ri'i bee bene beya' xa huañi bene, ¹⁷para nú ri'i nze'ca bee bene' Diose beya', nu che aca beella ri'i beella ye nú neca nze'ca.

4 Lu Diose nu lu Jesucristo, li'inu enu nze'ta xi neca tucu arre para nú hualunue lu cuenda' bee bene enu nehuañi cuna lu cuenda' bee bene enu unguiti, nia lulu ²udixiule'e Stichia' Diose lubee bene, nu chiqui' ula'na xa modo nilu stichia'nu lubeei sia chenu nu' beya'e nu sia chenu leca beya'e, uri'i nú chili arqui'beeí lunú rnilu, nu uqui'ya' bee bene enu la zucu' nú rnilu, nu uni' bezete' lubee bene nu uze'te' li'ibeei, nu ulu'cu paciencia li'ibeei. ³Xne riña bichia nú la zela' bee bene yene' beeí bedichia nú neli neca, ri'itsia beeí lunú riu'tsia arqui'beeí, nu cua'na beeí huaxi bee bene enu zete' li'ibeeí lunú riu'tsia arqui'beeí yene' beeí. ⁴La ria'beeí caso lunú neli neca, ri'itsia beeí caso lunú xelatsia arqui' bee bene. ⁵Pero li'ilu Timoteo ubi'ya li'ilu nu uhuañi nze'ca lu ye nú rri'ilu, uriqui' xitse lunú nehuaña secalu, nu udixiule'e bee bedichia' nze'ca' Jesucristo, uri'i lunú uliqui' Diose lulu nú riala ri'ilu. ⁶Xne yamero uti bee bene li'á, nu yamero tsa'na iliulabe quie'.

⁷Utsuta' arquia lu Stichia' Diose añinzuca nú ulle'ca lunú ulle'ca, ula'xulá uri'á lunú riala ri'á, nu né tsana arquia lunú nzeli arquia Jesucristo. ⁸Nee nzuquiela premio nú rialaa liñibe, neca premio cua' nú liqui' Jesucristo lua chenu riña bichia ze'e, li'inu enu rri'i elu usticia tucu nú neli neca. Nu la liqui'tsianu premio cua' lutsia, le'ca dete'nue lu ye bee bene enu ñia nzuquie arqui' chenu enta zecanu.

Lunú riala ri'i Timoteo

⁹Uri'i juerza nú chu ye'ta bi'yalu li'á, ¹⁰xne utsana' arqui'la Demas li'á equie nú máse niarqu'i' beenú nu' lu iliulabe quie', nu nzalai lu eyeche Tesalónica. Nu Crescente nzala lu iliu Galacia, nu Tito nza lu iliu Dalmacia. ¹¹Stucutsia Lucas nzu cuna li'á. Chenu nze'talu ye'ta yuulu Marcos xne li'illa recalla ri'illa elietsa lua nú ixíule'eru Stichia' Diose. ¹²Nu Tíquico uxe'la lu eyeche Efeso. ¹³Chenu nze'talu ye'ta yuulu capa nu utsa'na eyeche Troas ni'i Carpo, le'ca ye'tayulu bee libroa, nu la zañi'lu ye'ta yuulu bee ichia.

¹⁴Alejandro enu neca bichicu' huaxi nú necha neca uri'inui li'á, pero lu Diose ixíui ye nú uri'inui li'á scua. ¹⁵Ubi'ya li'ilu lunú xa rri'i, xne chiqui' rri'i condrai bee bedichia' nú rixiule'a.

¹⁶Bese rlu nú uhualu bee usticiae lu cuendaa, lecati uri'i elietsa lua, yebeella utsana' arqui'beella li'á ala' lá du' cuenda Diose lunú uri'inu beella li'á scua. ¹⁷Pero Jesucristo uri'i elietsa lua, nu uliqui'nu nú utsu naaqui arquia para nú utsalua nú udixiule'a stichia'nu,

nu ubene' ye bee bene enu la neca bee bene Israel nucua', scua utsila'a Diose li'á tucu nú sila'a bene lu bichee. ¹⁸Nu Jesucristo tsila'a li'á lu ye lunú necha neca, nu li'inu ri'i ucunu li'á hasta bichia chenu riña liñibe elu rnibiya'nu. iLi'inu rialanu huaxi ula'na diqui tiambu nú leca xunga laxu! Amén.

Último saludo

¹⁹Uri'i saluda Prisca cuna Aquila, nu cuna bee familia'

Onesíforo. ²⁰Erasto uya'na eyeche Corinto, nu Trófimo riti utsa'na eyeche Mileto. ²¹Uri'i juerza nú chu ye'talu ante nú riña tiambu nú aca nucuaa. Eubulo, Pudente, Lino, Claudia, cuna ye beelá bee sa'ahua enu nzeli arqui' Jesucristo, xe'la beella saludo lulu.

²²Jesucristo ri'inu elietsa lulu, nu ri'inu nú cha nze'ca lu cuenda' yehua. Amén.

Carta nú uquie'e San Pablo lu Tito

Uxe'la Pablo saludo lu Tito

1 Li'á Pablo enu sibi'a lu Diose, necaa tucu apóstol' Jesucristo para nú ri'á elietsa lubee bene enu ucañi Diose enu aca bee bene'nu, nu para nú ri'i beella beya' xa chili arqui'beella li'inu, cuna nú ri'i nze'ca beella beya' xa riala nú huañi beella lu Diose. ²Xne nzuculu'ahua nú scua lu'cua'ahua nú huañi lia'ahua lu Diose. Hasta chenu lasca' quixie iliulabe ucuaqui u'na Diose nú liqui'nu elu nehuañi cua' lua'ahua, nu nediya' nze'ca'ahua nú la ni Diose nú lia ninu. ³Nu chenu uriña bichia nú ulube' Diose stichia'nu lubee bene, li'inu ulube'nue, nu ucañinu li'á para nú ixiule'a bee bedichia' nze'ca'nu, nucua' neca nú unibiya'nu nú ri'á, li'inu enu utsila'a lia'ahua. ⁴Rquie'a carta quie' lulu Tito, li'ilu enu neca xi neca tucu endua, xne tucutse nzeli arquia'a Jesucristo. Diose cuna Jesucristo enu utsila'a lia'ahua, ri'i beenu nú cha nze'ca lu cuenda'lu cuna nú lia liqui' beenu nú nzuxe arqui'lu.

Riña' nú rri'i Tito lu iliu Creta

⁵Li'á utsa'na li'ilu lu iliu Creta para nú ri'ilu lunú rri'ilá ri'á ze'e.

Nu cada eyeche rqui'ña nú cañilu bee bene enu nibiya' lubee bene' Jesucristo, tucu nú unilá lulu nú ri'ilu. ⁶Chenu cañilu bee bene cua', rqui'ña nú necalla tucu bene enu nehuañi tucu nú rialane para nú lecati ze'ta li'illa, cuna nú nechialla tucutsia una'alla, cuna nú nzeli arqui' bee endu'lla Jesucristo, cuna nú nu'lu bee bene bee endu'lla nú la nehuañi beei tucu nú niarqui'tsia beei, nu la nziti beei. ⁷Xne bee bene enu rlu'cu elurnibiya' lubee bene' Jesucristo, li'illa nuya' cuendalla lunú neca cuenda' Diose, enze'e rqui'ña nú huañilla tucu nú rialane, nu la yala nú acalla bene enu la yu' resuna, nu la acalla enu rlee, nu la acalla uniqui, nu la acalla bene xuu, nu la acalla enu rla'na nú ri'itsia ana dimi' bee bene. ⁸Rqui'ña nú acalla enu siempre nu' arqui' nú dete' elu ya'na bee bene ni'lla, nu acalla enu riu'tsia arqui' ri'i nú neca nze'ca, nu acalla enu rri'itsia puro elliebacu' nú sibi', nu acalla tucu bene nze'ca, nu huañilla sin dula lu Diose nu ante bee bene, nu la nehuañilla tucu nú niarqui'tsialla. ⁹Rqui'ña nú la tsana' arqui'lla bedichia' nú neli neca

nú ungalla para nú acalla zete'lla bee bene bedichia' nze'ca quie', nu para nú lube'lla lubee bene enu rri'i cundra Stichia' Diose nú neli neca.

¹⁰Xne nu' huaxi bee bene enu nziti, puro eluquichia' rnibeei nu sequienu beei bee bene, nu leta bee bene Israel nu' bee bene enu rri'i juerza bee bene nú quie seña nú nequie bee bene Israel bee bene máse nu' sa' bee benecua'. ¹¹Bee benecua' rqui'ña nú ri'i beei beya' nú la ri'ibeei tucu nú necane, xne huaxi bee ni'i ulliti' beei elliebacu' diqui tucu familia' bee bene, sete'beei lunú la yala zete'beei para nú ri'itsia beei ana dimi.

¹²Le'ca tucu bene lachibeei, enu rnibeei nú neca profeta unilla nú bee bene eyeche Creta puro eluquichia' rnibeei, nu chiqui' nelachi beei, xi nelachi nañi cuna nú racu xeta'beei, nu nebichiu beei.

¹³Neli nucua'. Enze'e rqui'ña nú fuerte qui'ya' beei ri'ilu para nú chenala nze'ca beei stichia' Jesucristo tucu nú rialane. ¹⁴Nu la ri'ibeei caso lunú xela arqui' bee bene Israel, nu le'ca la ri'i beei caso lunú rnibiya' bee bene enu utsana' arqui'lla lunú neli neca.

¹⁵Bee bene enu la nchiñi nú necha neca elliebacu' nchiñitsia nú neca nze'ca elliebacu'lla. Pero bee bene enu rri'itsia elliebacu' nú la zibi' cuna bee bene enu lachili arqui' Jesucristo, ni' lle'na elliebacu' nze'ca la ri'i beei, xne leca nú neca nze'ca lluca equie beei, puro elliebacu' nú necha neca nchiñi lluca equie beei. ¹⁶Li'ibeei rnibeei nú nu'lu beei Diose, pero scua tucu nú nehuañi beei rlube' nú lia

rnibeei nucua'. Nu chiqui' necha rri'ibeei, nu nziti beei, nu la ri'ibeei ni'tucu beenú neca nze'ca.

Lunú zete' Tito bee bene

2 Pero li'ilu Tito, uze'te' bee bene tucu nú neca Stichia' Diose. ²Uze'te' bee niyu enu unguxu nú huañi nze'ca beella, nú ri'i beella elliebacu' nú sibi' para nú lu'cu bee bene ula'na lubeella. Nu riala nú chenala beella Stichia' Diose tucu nú rialane, nu zeca beella bee sa' beella, cuna nú riqui' beella lu xitse nú seca beella.

³Le'ca scua bee una'a enu unguxu rqui'ña nú huañi beella tucu nú riala nú huañi bee bene! Jesucristo. Nu la yala nú aca niquichia' beella, nula aca beella uniqui. Rqui'ña nú zete' beella lubee bene nú xa huañi nze'ca bee bene, ⁴cuna nú nibeella bezete' lubee una'a enu nere'ne'lá, nú zeca beenchu niyu' beenchu cuna bee endu' beenchu, ⁵nú huañi nze'ca beenchu, cuna nú ri'i beenchu elliebacu' nze'ca, cuna nú ri'i ucu beenchu ni'i beenchu cuna nú aca nze'ca beenchu, nu zucu' beenchu stichia' niyu' beenchu para nú lecati ni cundra Stichia' Diose.

⁶Le'ca scua li'ilu Tito, uni' bezete' lubee niyu enu nere'ne' nú huañi nze'ca beei. ⁷Uri'i nú acalu tucu ejemplu lubeei para nu lañi' beei xa nehuañilu, nu scua ri'i beei lunú neca nze'ca. Chenu sete'lu li'ibeei, uze'te' nze'ca li'ibeei tucu nú rialane, ⁸cuna puro bee bedichia' nze'ca, che lecaxi ricu'quiya bee bene li'ilu, nu scua tu' titse bee bene enu rri'i cundra lia'ahua xne lecaxi llela' beei nú ricu'quiya beei lia'ahua.

⁹Le'ca du'lu ana arqui' bee bene enu rri'i riña' stucu bee bene nú zucu' beei ye nú rni patron' beei, cuna nú aca nze'ca beei nu la zucu' ru'u beei lubeella. ¹⁰Nu la cachi'beei bee stene' bee patron'beei, ri'itsia beei riña' tucu nú la nchiñi nú necha necha elliebacu'beei, para nú lañi' ye bee bene nú xa nehuañi beei nu chiqui' ñia necha bedichia' nze'ca' Pa'ahua Diose enu utsila'a lia'ahua.

¹¹Xne ulube'la Diose nú ñia necanu, nu equie nú ñia necanu scua, nu' modo tsila'anu ye bee bene. ¹²Nu scua rria'ahua beya' nú rqui'ña nú tsana' arquia'ahua beenú necha necha, cuna ye beenú lecaxi zibi' nú niarquia'ahua ria'ahua lu iliulabequie' para nú huañi nze'ca'ahua nu ria'ahua lunú necha nze'ca, tucu nú niarquí' Diose nú huañia'ahua, ¹³diqui nú nellua'quie'ahua nú riña bichia nú ñia necha nú yalu stichia'nu tucu nú uninu lua'ahua nú nze'ta zeca Diose Pa'ahua Jesucristo cuna poder'nu, li'inu enu utsila'a lia'ahua. ¹⁴Li'inu ungutinu equie cuenda' stula'ahua nu utsila'anu lia'ahua lu ye bee dula, nu uquieenu arquia'ahua para nú aca'tsia'ahua bee bene'nu, cuna nú nu' ana arquia'ahua ri'ahua puro nú necha nze'ca.

¹⁵Ye nú unilá lulu uze'te' li'ibeei. La lliquilu ude'te' elliebacu' beei, nu cuna nú rnibiya'lu uni' lubeei nú huañi nze'ca beei para nú lecati huachu stichia'lu.

**Lunú riala ri'i bee bene enu
nzeli arqui' Jesucristo**

3 Ellu'culu arqui' bee bene'
Jesucristo nú ri'i beella nú

rni gobierno cuna lunú rni bee usticia, cuna nú zucu' beella nú rni bee bene, cuna nú nzu arqui'beella ri'i beella lu ye nú necha nze'ca.

²Nú la ze'ta beella bee bene, nú la cua'na beella xuu, nú aca lle'na arqui'beella, nú aca nze'ca beella lu ye bee bene.

³Lia'ahua uyu'u bee bichia nú uria'ahua tucu nú niarquí'tsia'ahua, nu unga nziti arquia'ahua, unze'ahua inziu nú necha necha, uri'itsia'ahua tucu nú niarquí'tsia'ahua cuna tucu nú necatsia elliebacua'ahua. Uria'ahua puro nú la necha nze'ca, cuna nú uye arquia'ahua cuna nú uhuana arquia'ahua bee bene nu uhuana arqui' bee bene lia'ahua. ⁴Pero chenu uriña bichia nú ulube' Pa'ahua Diose enu utsila'a lia'ahua nú ñia nze'canu, cuna nú secanu bee bene. ⁵Li'inu utsila'anu lia'ahua, la necane equie nú uria'ahua nú necha nze'ca, uri'inu scua equie nú uhua'a arqui'nu lia'ahua.

Li'inu uhuanu ye bee dula nú rlu'cua'ahua nu scua necha'ahua xi necha bene cuqui lunu, nu equie cuenda' Espíritu Santo rlu'cua'ahua elunehuañi nú necuqui necha cuna li'inu. ⁶Nu equie cuenda' Jesucristo enu utsila'a lia'ahua, chiqui' uliqui' Diose Espíritu Santo lua'ahua. ⁷Nu lunú ñia necha nze'canu nebacu'lanu lia'ahua nú la lu'cua'ahua dula, scua liqui'nu lua'ahua nú huañi li'ahua liñibe nú nellua'a quie'ahua.

⁸Neli necha bedichia' cua'. Enze'e niarquia nú uquia tixiule'elá ye bee bedichia' cua' lubee bene enu uchilila arqui' Diose para nú cua'na beella nú ri'i beella nú necha nze'ca.

Nu bee nucua' chiqui' neca equiee nu sibi'i para lu ye bee bene. ⁹Pero la ri'ilu caso beenú lecaxi zibi' rni bee bene, nu la ri'ilu caso stichia' bee bene enu máse nzenu arqui' nú ti unga bee bene' beei hua'tu. Le'ca la ri'ilu caso bee bene enu rni xuu lubee sa' equie cuenda' ley' Moisés, xne la neca equie bee nucua', nu lecaxi zibi' bee nucua'.

¹⁰Tunu nu'hua enu rri'i nú rle'e sa' bee bene' Jesucristo, uni' lulla tucu bese urre chiucu bese nu tunu la zucu'lla stichia'lu, uhua'lla letahua. ¹¹Xne li'ilu nediya'lu nú sa' bee benecua' utsana' arqui'la beei lunú neli neca, nu le'ca li'itsia beei rnitilu beei li'ibeei equie cuenda' stulabeei.

Lunú uni Pablo nú ri'i Tito

¹²Chenu xe'laa Artemas, urre Tíquico elu nzuculu, uri'i juerza nú

ye'ta bi'yalu li'á eyeche Nicópolis, xne ze'e udu' arquia nú detea tiambu nú nucua'. ¹³Le'ca uri'i elietsa lu Apolos cuna lu licenciado Zenas lu ye nú recalú ude'te' lu ye nú secala'cha' beella para nú cheri'ibeella seidu inziu' beella para nú lecaxi zecala'cha' beella. ¹⁴Le'ca bee sa'ahua enu nzeli arqui' Jesucristo rqui'ña nú aca beella ri'i beella nú neca nze'ca, nu ri'i beella elietsa lubee bene chenu nu' nú secala'cha' beei para nú sibi' lunú nehuañi beella lu iliulabe quie'.

Pablo cuna bee bene enu nzunulla xe'la beella saludo lu Tito

¹⁵Ye bee bene enu nucua'a cuna li'á xe'la beella saludo lulu. Le'ca uri'i saludar bee sa'ahua enu seca lia'ahua equie nú tucutse nzeli arquia'ahua Jesucristo. Diose ri'i nú cha nze'ca lu cuenda' yehua. Amén.

Carta nú uquie'e San Pablo lu Filemón

Uxe'la Pablo saludo lu Filemón

¹Li'á Pablo, nchiñia ni'cu' equie nú rixiule'a stichia' Jesucristo, li'á nu Timoteo xe'laru saludo lulu Filemón enu neca sa'ahua lunú rixiulea'ahua stichia'nu, nu chiqui' se'caru li'ilu, ²le'ca xe'laru saludo quie' lu ye bee bene' Jesucristo enu riete' sa' ni'lu, nu le'ca lu sa'ahua Apia, nu lu sa'ahua Arquipo enu neca sa'ahua enu rcua'na'ahua nú xa dixiule'ahua stichia'nu. ³Diose Pa'ahua nu Jesucristo enu rnibiya' ri'i nú cha nze'ca lu cuenda'hua, nu ri'inu nú nzuxe arqui'hua.

**Udete' Pablo che'tsa lu Diose
equie cuenda' Filemón**

⁴Cada chenu rnacua lu Diose rnia che'tsa lunu equie cuenda'lu, ⁵xne ubenelá equie cuenda' nú xneca nzeli arqui'lu Jesucristo enu rnibiya' nu xneca secalu li'inu nu cuna beelá bee bene enu nzeli arqui' li'inu. ⁶Le'ca rnacua lu Diose nú li'ilu enu rri'i elietsa luru para nú rixiulea'ahua lunú nzeli arquia'ahua Jesucristo, nu nzeri'ilálu beya' lu ye nú neca nze'ca rliqui'nu equie nú neca tucu necatse'ahua cuna

Jesucristo. ⁷Chiqui' xila nu ñia nzu arquia equie nú secalu bee sa'ahua enu nzeli arquia'ahua Jesucristo, xne equie cuenda' li'ilu enu rquietea, ñia nzu arqui'beella.

**Rnacu' Pablo lu Filemón nú
yuculla Onésimo ni'illa**

⁸Enze'e mase nú rlu'cua nú rnibiya'a para nú nia lulu nú xi riala ri'ilu equie nú neca tucu apóstol' Jesucristo, ⁹pero equie eluseca nú rlu'cua'ahua lu sa'ahua, mejora nacua nu ziquiea lulu, li'á Pablo nu unguxulá, nu nchiñia ni'cu' equie nú rixiule'a stichia' Jesucristo, ¹⁰nacua lulu equie cuenda' Onésimo, enu neca xi neca endua equie nú nzelila arqui'lla stichia' Jesucristo, nu unia lulla diquila nú nchiñia ni'cu'.

¹¹Bee bichia nú udete lecaxi uzibi' Onésimo lulu, pero ne sibi'lla lua nu le'ca sibi'lla lulu. ¹²Nee xe'la zecaalla ni'lu, nu uri'i nze'ca lulla, tucu nú rri'ilu lua. ¹³Li'á uniarquia nú aya'nanualla ca'a para nú ri'illa elietsa lua luhuare'lu diquila nú nchiñia ni'cu', equie cuenda' nú rixiule'a bedichia' nze'ca' Jesucristo. ¹⁴Pero lá aniarquia nú ari'á tucu

nú ri'á sin stichia' biya'lu para nú xitse faura nú ri'ilu lu cuendaa la ri'ilue ala juerza, sino que acane tucu nú niarqui'lu. ¹⁵Tunu uchiu'u Onésimo ni'lu chiucu chuna bichia, pero ungae scua para nú nee ya'na lilla ni'lu. ¹⁶Pero la ria'lu lulla xi neca tucu moso', másela uri'i nze'ca lulla luquela tucu moso', xi neca tucu bichilu enu chiqui' secalu. Li'á chiqui' se'calla, pero li'ilu rqui'ña nú másela zecalu li'illa, la ri'itsialu lulla xi neca lu tucu bene sino que uri'i lulla xi neca tucu bichilu, xne le'ca nzelila arqui'lla Jesucristo.

¹⁷Nu ne tunu neli neca sa'ahua enu nzeli arquia'ahua Jesucristo, uyucu Onésimo xi neca li'á. ¹⁸Tunu nu' xi uri'illa lulu, nu tunu nu' xi nezi'quilla lulu, li'á ixiune. ¹⁹Li'á Pablo, li'i e'cua rquie'a bee bedichia' quie' lulu, nú li'á ixiua lulu, añinzuca nú la qui'ña nú nia nu ellu'cu arquia li'ilu nú hasta nezi'quilu lua equie elu nehuañi'lu.

²⁰Ne uri'i faura cua' lua, lunú neca sa'a lunú nzeli arquia'a Jesucristo: Scua udu' ana arquia tucu nú neca'a bene' Jesucristo.

²¹Rquie'a carta quie' lulu nu nediya nze'caa nú zucu'lu nú rnia, nu nediya nú másela ri'ilu luquela nú rnia lulu. ²²Le'ca nacua lulu nú ri'ixcua'alu elu ya'naa ni'lu, xne lunú rnacu'hua lu Diose, li'á nediya nú zelanu nú nzelaabi'ya li'ihua.

**Último bedichia' nú
niquie lu ichi' quie'**

²³Epafras enu nchiñinua ni'cu' equie cuenda' nú rixiule'eru stichia' Jesucristo, xe'lalla saludo lulu, ²⁴nu le'ca Marco, Aristarco, Démas nu Lucas, bee enu le'ca rri'i elietsa lua nú rixiule'eru stichia' Jesucristo, yebeella xe'la beella saludo lulu.

²⁵Jesucristo enu rnibiya' ri'inu nú cha nze'ca lu cuenda'hua. Amén.

Carta para bee bene hebreo

Ube'ta Lli'ñi Diose uni
stichia'nu lua'ahua

1 Tiambu hua'tu uni Diose lubee bene'ahua enu udetela huaxi bese nu huaxi forma uni Diose lubeella scua, equie cuenda' bee profeta. ²Pero tiambu quie' unila Diose lua'ahua equie cuenda' lli'ñinu. Diose ureche' yebee nú nu' lu iliulabe cuna liñibe equie cuenda' lli'ñinu. Nu udete'nu yebee nucua' lu lli'ñinu. ³Li'inu enu neca ellie' Diose nú chiqui' ñia rnaa, nu li'inu rnanu tucu nú rna Diose, li'inu rri'inu nú la nitilu iliulabe cuna yebee nú nu'lue equie cuenda' stichia'nu nú chiqui' rlu'cu poder. Chenu ulaxu nú ulle'canu yebee lunú nzu zecanu para nú lecaxi na'ahua nu la lu'cua'ahua dula, chequie uzucunu cue'tse Pa'nu Diose chube liñibe, li'inu enu rlu'cu ye nú rnibiya'.

Máse neca equie lli'ñi Diose
luquela bee ángele

⁴Nu scua máse neca equie Jesucristo luquela bee ángele, xne li'inu necanu lli'ñi e'cu Diose. ⁵Xne leca xunga uni Diose lu ni'tucu bee ángele:

Li'ilu necalu lli'ñia,
nu desde nee lubea nú li'ilu
necalu lli'ñia.

Nu le'ca né ni Diose lu ni'tucu bee ángele:

Li'á neca pa'lu,
nu li'ilu necalu lli'ñia.

⁶Pero chenu uxe'la Diose lli'ñi e'cunu lu iliulabe, che uninu:

Yebee ángelea, lu'cu ula'na lu
Lli'ñia.

⁷Nu chenu uni Diose equie cuenda' bee ángele, uninu:

Li'á ri'a nú neca bee ángelea xi
neca bi,
nu le'ca ri'á nú aca beenu xi
neca quii.

⁸Pero equie cuenda' lli'ñinu, uninu:

Li'ilu necalu Diose.
Nu lunú rnibiya'lu leca xunga
laxu;
nu ye tiambu rnibiya'lu tucu nú
rialane.

⁹Riu' arqui'lu beenú neca nze'ca
nu rana arqui'lu beenú

neca,
enze'e ucañila Diose li'ilu, li'inu
enu neca Diose'lu,
nu rri'inu nú masesca'lá ñia nzu
arqui'lu,
luquela bee ángelea.

¹⁰Le'ca uninu:

Li'ilu enu rnibiya',
 nu chenu uquixie yeene li'ilu
 ureche'lu iliulabe,
 cuna liñibe nu yebeenú nu' lue.

¹¹ Yebee nucua' nitilu.

Pero li'ilu, leca xunga laxu nú
 nehuañilu.

Ye bee nucua' laxu, xi rlxaxu
 laquie.

¹² Nu quichilu bee xi rquichi bene
 laquie,
 nu che'elu bee xi xe'e bene xucu
 bene.

Pero li'ilu leca xunga riña bichia
 nú che'e nú xa necalu,
 nu leca xunga laxu nú
 nehuañilu.

¹³ Diose leca xunga uni lu ni'tucu
 bee ángele:

Uzucu cue'tsea chube,
 hasta nú ri'á nú nibiya'lu lu ye
 bee enu rle lulu.

¹⁴ Xne ye bee ángele necatsia
 beenu espíritu enu sibi' lu Diose,
 nu uxella Diose beenu para nú ri'i
 beenu elietsa lubee bene enu lu'cu
 elunehuañi nú leca xunga laxu.

**La tsana' arquia'ahua
 bedichia' nú tsila'ahua**

2 Enze'e, rqui'ña nú ri'i
 caso'ahua nu zucua'ahua
 Stichia' Diose nú ubene'la'ahua para
 nú la tsana' arquia'ahua stichia'nu
 nú nzenala'la'ahua. ²Xne scua tucu
 nú uyalu ye Stichia' Diose nú uni
 bee ángele tiambu hua'tu enze'e
 bee bene enu la zucu' stichia'nu
 bee enu rlu'cu dula, yala bee nze'e
 castiya nú riala zeca bee nze'e. ³Nu,
 ¿xneca tsila'ahua lu castiya cua',
 tunu le'ca nua'ahua la zucu'ahua
 Stichia' Diose, nú rixiule'e nú xneca

tsila'ahua? Nu le'ca li'i Jesucristo
 udixiule'e equie nú xneca tsila'ahua
 hasta hua'tu nu bee bene enu
 ubene' bee bedichia' cua', li'ibeella
 udixiule'e beellae lua'ahua. ⁴Nu
 scua tucu nú ungui'tla' cada tucu
 bene Espíritu Santo tucu nú niarqui'
 Diose nu equie cuenda' seña, nu bee
 milagro nu cuna ye beenú nzenu
 arqui' bee bene scua ulube' Diose
 nú neli bee bedichia' cua'.

**Equie cuenda' Jesucristo
 riña bee bene liñibe**

⁵Diose la dete' elurnibiya' lubee
 ángele para nú nibiya' beenu elu
 lu'cua'ahua stucu elu nehuañi nú
 necuqui neca nú rniru luhua. ⁶Xne
 tucu luhuare Stichia' Diose nu' tucu
 enu uni:

Diose, ¿ti neca bene iliulabe
 para nú ellu'cu' arqui'lu
 li'illa?

¿Nu ti neca lli'ñi bene iliulabe
 nú nzenu arqui'lu?

¿equie cuenda'lla?

⁷ Tucu tiambu nú uri'ilu nú
 menula unga neca equienu
 luquela bee ángele,
 pero cheelá uri'ilu nú neca
 equienu, nu udete'lu
 elurnibiya' lunu
 para nú nibiya'nu lu ye beenú
 ureche'lu;

⁸ nu uzelalu nú nibiya'nu lu yeene.
 Chenu udete'lu elurnibiya' lunu
 para nú nibiya'nu lu yeene, lecaxi
 nú la nibiya'nu lu, añinzuca nú
 lá lañia'ahua nú ye nú rnibiya'nu
 lu. ⁹Pero nediya'ahua nú uyu'u
 tucu tiambu nú Jesucristo unganu
 menola luquela bee ángele. Pero
 nee li'inu rlu'culanu elurnibiya',

nu rlu'cu bee bene ula'na lunu equie nú nehuana ulle'canu chenu ungutinu equie stula yebee bene, nu ungae scua xne seca Diose lia'ahua.

¹⁰Diose ureche' ye beenú nu' nu li'ínu rnibiya'nu lu yeene nu li'ínu niarquí'nu nú huaxi bee bene chu'u liñibe. Enze'e equie nú nehuana ulle'ca Jesucristo utsa'alunu Stichia' Diose, nu equie cuenda' li'itsianu nu' modo tsila'ahua. ¹¹Bee bene enu la lu'cu dula ante Diose, equie cuenda' Jesucristo leca' xi ná beella. Nu sia Jesucristo nu bee bene enu la lu'cua' dula equie cuenda'nu, nu tucutsia Diose neca pa' beella. Enze'e la tu' Jesucristo nú rninu nú neca'ahua bichinu. ¹²Tucu nú nequie tucu luguare lu ichi' Stichia' Diose elu rni:

Li'á ixiule'a lubee bichiaa equie cuenda'lu,
nu chenu yiete'sa' beella che ula beella canto lulu nú rni nú neca equielu.

¹³Le'ca uninu:

Nzuta' arquia nú Diose ri'i elietsa lua.
Ca'a nzunua bee bene enu uliqui' Diose lua.

¹⁴Lunú necache' bee bene rene nu be'la, le'ca scua unga Jesucristo chenu ube'tanu lu iliulabe ungutinu, nu equie cuenda' nú ungutinu uril'ínu ana lu elurnibiya' nú rlu'cu beze'lu lu eluti. ¹⁵Scua uri'ínu para nú tsila'anu bee bene lunú xiqui bee bene eluti, bee bene enu diqui tiambu nehuañi nu xiqui eluti tucu nú xiqui bene patron'lla. ¹⁶Xne lá ye'ta Jesucristo lu iliulabe para nú ri'ínu elietsa lubee ángele sino que

ube'tanu lu iliulabe para nú ri'ínu elietsa lubee bene enu nzeli arqui' tucu nú uyalí arqui' Abraham Diose. ¹⁷Enze'e unganu tucu nú neca bene lu iliulabe para nú unganu ule'ya enu máse neca equie lu Diose, ule'ya enu neli rua'a arqui' bee bene nu sucu'nu Stichia' Diose nu scua udixiunu stula bee bene. ¹⁸Nu lunú le'ca nehuana ulle'canu, nu ula'na beze'lu nú xa modo la zucu'nu Stichia' Diose, pero lá ri'i ana lunu, enze'e recanu rri'ínu elietsa lubee bene enu rla'na beze'lu nú xa modo ri'i dula.

Másela neca equie Jesucristo lu Moisés

3 Enze'e bee sa'a li'ihua bee enu necala bee bene' Diose li'ihua bee enu ucañilanu, para nú acahua bee lli'ñinu, la zañi'hua nú Jesucristo neca ule'ya enu máse neca equie enu nzeli arquia'ahua, li'ínu enu uxe'la Diose lu iliulabe. ²Xne Jesucristo neli uzucu' Stichia' Diose nu li'ínu enu ucañi Diose para nú zibi'nu lu Diose, tucu nú uzucu' Moisés Stichia' Diose nu uzibi' Moisés lubee bene Israel. ³Pero máse riala zucu' aya bene Jesucristo luquela Moisés, xi neca lu cuenda' tucu bene enu rreche' ni'i nú máse sucu' aya bee bene li'illa luquela ni'i. ⁴Ye bee ni'i nu' tucu bene enu ureche'e, pero Diose ureche' yebee nú nu' lu iliulabe. ⁵Nu uzucu' Moisés Stichia' Diose, nu uzibi'lla lu Diose chenu udete'lla stichia Diose lubee bene Israel para nú ixiule'ella lubee bene Israel lunú xi aca. ⁶Pero Jesucristo neca lli'ñi Diose nu rnibiya'nu lu yebee bene'

Diose. Nu lia'ahua neca'ahua bene' Diose, tunu la tsana' arquia'ahua nú nzeli arquia'ahua li'inu, nu ñia tsu arquia'ahua hasta bichia nú riña zeca Jesucristo stucu bese.

La aca nzitihua

⁷Enze'e tucu nú rni Espiritu Santo:

Tunu yene'hua Stichia' Diose bichia quie'.

⁸La ri'i nzitihua arquihua tucu nú uri'i bee bene'ahua enu udetela chenu lá zucu' beella Stichia' Diose, nu udete' beella preu li'inu, chenu udete beella lu yuu achi.

⁹Ze'e lá zucu' bee bene'hua enu udetela Stichia' Diose, añinzuca nú ulañi' beella bee milagro nú uri'inu lubeella, diqui chiu'a lana lu yuu achi.

¹⁰Enze'e ulee Diose lubee bene ze'e, nu uninu: “Yelu elliebacu' rri'i beella, nu ni' la'na beella nú ri'i beella beya' nú xi niarquia nú ri'i beella.”

¹¹Scua uri'i beella nú ule Diose nu che uninu tucutsia bese, nú ni' tucu beella la riña beella lu yuu elu ucuauqui u'na Diose lubeella nú tsulachi beella.

¹²Enze'e, bee sa'a enu nzeli arquia'ahua Jesucristo ubi'yahua li'ihua para nú la chu'u elliebacu' nú necha neca arquí' tá tucuhua nu che ri'i nucua' nú la chilia' arquihua Diose. Nu che tsana' arquihua Diose li'inu enu nehuañi.

¹³Mejora cada bichia udu'hua ana

arquí' sa'hua, diqui nú nu' tiempo nihua lu sa'hua xne canu enta bichia nú ri'i dula ana luhua, nu che la zucua'hua Stichia' Diose.

¹⁴Xne tunu neca'la'ahua bee bene' Jesucristo, diqui tiempu rqui'ña nú tsuta' arquia'ahua lunú nzeli arquia'ahua li'inu tucu nú uchili arquia'ahua li'inu chenu uchili inza arquia'ahua li'inu.

¹⁵Tucu nú unila lu ichi' Stichia' Diose nú rni:

Tunu riene'hua Stichia' Diose bichia quie',

la ri'i nzitihua arquihua tucu nú unga nziti bee

bene enu lá zucu' stichia'nu hua'tu.

¹⁶Neequie, ¿ta bee bene enu lá zucu' Stichia' Diose añinzuca nú ubene' beella nú uninu? ¿Xie' lanú bee bene Israel enu ulua Moisés Egipto beella la? ¹⁷¿Nu xie' lanu le'ca li'ibeella neca enu ule Diose lu diqui' chiu'a lana, nu li'ibeella enu uri'i dula nu ungti beella lu yuu achi la? ¹⁸¿Xie' lanú le'ca li'ibeella enu uni Diose nú leca xunga riñabeella lu yuu elu ucuauqui un'na Diose nú tsulachi beella xne né zucu' beella stichia'nu la? ¹⁹Scua rria'ahua beya' nú né riñabeella lu yuu elu ucuauqui u'na Diose nú tsulachi beella xne lá chili arquí'beella nú uni Diose lubeella.

4 Enze'e, tucu nú ucuauqui u'nala Diose lua'ahua nú liqui'nu lua'ahua yuu elu tsulachia'ahua, rqui'ña nú bi'yahua, xne lequie nú mase nú unilanu scua lua'ahua canu nu' ta tucu'ahua la ri'i ana riña ze'e. ²Xne li'iru ubene'la'ru bee bedichia' nze'ca' Diose tucu

nú ubene'la' beella, pero li'ibeella lia xle'e ubene' beella bedichia' nze'ca' Diose, xne lá chili arqui' beellae. ³Pero lia'ahua enu nzelfla arquia'ahua Stichia' Diose, rlu'cula'ahua elu tsulachia'ahua, pero bee bene enu la chili arqui' li'inu, uninu lubeella:

Equie nú uri'i beella nú ulea enze'e uri'ilá elliebacu', nú la zela riña beella luguare elu tsulachi beella.

Nu hasta chenu ureche' Diose iliulabe che ula'xunu uri'inu riña'nu. ⁴Tucu nú rni tucu luhuare lu ichi' Stichia' Diose, equie cuenda' bichia nú sulachi bee bene:

Nu chenu ulaxu ureche' Diose iliulabe che bichia achi utsulachinu.

⁵Nu le'ca uninu:

Leca xunga chu'u bichia nú riñahua elu tsulachihua.

⁶Bee bene enu rlutilá ubene' Stichia' Diose, lá lu'cu beella elu tsulachi beella, xne lá zucu' beella Stichia' Diose, pero nu'sca' bee bene enu rri'i falta nú lu'cu elu tsulachi.

⁷Enze'e chenu udete huaxi lana, che uliquia'la Diose stucu bichia nu bichia ze'e neca nee. Nu scau tucu nú uni'la'ahua. Nú arre David unilla tucu parte lu ichi' Stichia' Diose:

Tunu yene'hua Stichia' Diose nee bichia quie', uri'i casuhua stichia'nu.

⁸Xne tunu equie cuenda' Josué ulu'cu bee bene Israel elu tsulachi beella, lá ania' Diose equie cuenda' stucu bichia che. ⁹Enze'e hasta nee bichia quie' nu'sca' luhuare elu tsulachi bee bene' Diose. ¹⁰Xne bee bene enu udete'la Diose nú tsulachi,

tsulachi beella equie cuenda' riña' nú rri'i beella, tucu nú utsulachi Diose chenu ulaxu ureche'nu iliulabe.

¹¹Enze'e rqui'ña nú dua'ahua ana arqui'sa'ahua para nú lu'cua'ahua elu tsulachia'ahua, para nú lecati ri'i tucu nú uri'i bee bene enu lá chili arqui' Stichia' Diose. ¹²Xne Stichia' Diose nehuañine nu rlu'cune poder. Máse ratse'e arqui' bee bene luquela nú ratse' tucu espada nú nechiu'u rucu ru'u, nu ratse'e hasta arqui' bee bene cuna Espíritu' bene nu hasta aquíé liñi arta' bene, nu equie cuenda' Stichia' Diose rri'i bene beya' tanú neca nze'ca nu tanú la neca nze'ca rri'illa. ¹³Ye nú ureche' Diose la a'chi' necane ante lunu, xne ye nú ri'yanu, nu lu li'inu dete'ahua cuenda lu ye lunú uria'ahua.

Jesucristo neca ule'ya enu máse neca equie

¹⁴Enze'e lunú rlu'cula'ahua tucu ule'ya enu máse rnibiya', nu li'inu necanu Jesucristo lli'ñi Diose enu nzucu liñibe, rqui'ña nú nzuta' arquia'ahua lunú nzeli arquia'ahua li'inu. ¹⁵Xne Jesucristo enu neca ule'ya enu máse neca equie lua'ahua, li'inu recanu rri'inu elietsa lua'ahua para nú la ri'i dula ana lua'ahua. Xne le'ca li'inu chiqui' huaxi nú nehuana ulle'canu iguale tucu nú nehuana se'ca'ahua, pero li'inu leca xunga uri'inu dula. ¹⁶Enze'e, la chenu arquia'ahua nu' modo chebica'ahua nacua'ahua lu Diose enu seca lia'ahua, para nú hua'a arqui'nu lia'ahua. Nu equie nú secanu lia'ahua, li'inu ri'inu elietsa

lua'ahua, hora nú niarquía'ahua nú ti ri'i elietsa lua'ahua.

5 Yebee bene enu reca ule'ya enu máse rnibiya' lu beelá bee ule'ya, Diose rcañi li'illa leta bee bene para nú nacu'lla lu Diose equie cuenda' bee bene, nu yalla rdete' cuenda bee bene u'na para nú dete'llae lu Diose cuna bee nañi enu rqui'ña nú ati equie cuenda' stula bee bene. ²Nu lunú neca ule'ya cua' bene nediya'lla lunú xa seca bee bene. Enze'e rlu'culla paciencia bee bene enu la ri'ibeya' lunú rri'i, nu cuna bee bene enu rri'i dula ana lu. ³Nu lunú le'ca nu' chenu rri'i ule'yacua' dula enze'e le'ca riñilla tucu nañi xi neca u'na lu Diose equie cuenda' stulalla, tucu nú rri'illa lu cuenda' stula bee bene. ⁴Nu lecati enu aca e'cu ule'ya enu máse rnibiya' lubeelá bee ule'ya lunú niarquí'tsiilla sino que Diose neca enu rcañi li'illa tucu nú ucañinu Aarón. ⁵Le'ca scua unga lu cuenda' Jesucristo, lá ninu nú a acanu ule'ya enu máse neca equie lua'ahua, sino que Diose ucañi li'inu chenu uni Diose:

Li'ilu necalu lli'ña,
nu desde nee lubea lubee bene
nú li'ilu necalu lli'ña.

⁶Le'ca rni stucu luguare lu ichi' Stichia' Diose equie cuenda'nu:

Li'ilu necalu ule'ya diqui tiambu,
tucu nú unga Melquisedec
ule'ya.

⁷Chenu ube'ta Jesucristo lu iliulabe quie', chiqui' unguna'nu nu juerte unacu'nu lu Diose enu reca tsila'a li'inu lu eluti. Che uri'i caso Diose li'inu nu uri'i Diose elietsa'nu para nú tsalunu Stichia' Diose. ⁸Mase nú

lli'ñi Diose necanu pero uzucu'nu nú rni Diose mase nú nehuana ulle'canu. ⁹Nu lunú neli uri'inu tucu nú niarquí' Diose nú ri'inu, enze'e equie cuenda' li'inu leca xunga laxu nú sila'a Diose bee bene enu sucu' nú rminu. ¹⁰Nu Diose neca enu ucañi li'inu para nú acanu ule'ya enu máse neca equie tucu nú unga Melquisedec ule'ya enu unga neca equie.

**Rqui'ña nú tsuta'la arqui' bene
lunú nzeli arqui' bene Diose**

¹¹Huaxisca'lá nú rqui'ña nia luhua equie cuenda' bee nucua', pero chiqui' neriña' nú xixiule'a luhua xa niarquía equie nú chabe' rri'ihua beya'. ¹²Hua'tulila nu'luhua Stichia' Diose, neequie hasta rialala nú sete'lahua bee bene Stichia' Diose pero li'ihua rqui'ñiasca'hua enu zete' zeca li'ihua Stichia' Diose nú ungalahua. Li'ihua secagua xi seca tucu endu' me' enu rue' puro chi' enu lacasca' acu ye nú acu. ¹³Nu yebee enu neca xi neca endu'me' enu rue' chi' la aca bee nze'e ri'i nze'ca bee nze'e beya' xi rni Stichia' Diose. ¹⁴Pero bee bene enu másela rri'i beya' Stichia' Diose, li'ibeella neca beella xi neca bee enu racula ye nú racu. Xne rri'ilabeella beya' tá nú neca nze'ca nu ta nú necha neca.

6 Enze'e rqui'ña nú la'na'la'ahua nú chulula'ahua stichia' Jesucristo nu la yala nú benchila'ahua lubeenú uzete'ahua hua'tu. Ñialá nú ria'ahua scua, luhuare nú zete'tsiahua xneca modo tsana' arqui'a'ahua lunú necha neca uria'ahua hua'tu, urre nú xneca

chili arquia'ahua Diose, ²urre xneca rinza bee bene, urre xneca ricu' bene yalla equie stucu bene, urre xneca ri'i Diose nú huañi zeca bee bene enu ungu'ti, urre xneca hualu Diose lu cuenda' bee bene chenu riña bichia nú dete' bee bene cuenda lu Diose. ³Chiqui' ñiasca'lá nú nze aca'lá'ahua stichia'nu tunu scua niarqui' Diose nú acane.

⁴Xne bee bene enu recala Stichia' Diose nu nediya'la' lunú nu' liñibe, nu nediya'la' beella xneca neca Espíritu Santo, ⁵nu uri'ilahua beya' nú ñia neca Stichia' Diose nu nediya'la'hua xneca nibiya' Diose, ⁶nu che la nia' arqui'beella chili arqui'beella bedichia' nze'ca' Jesucristo, li'ibeella chiqui' neriña' nú chenala zeca beella inziu' Diose, xne neca xi neca nú rquie'e zeca beella Jesucristo lli'ñi Diose lu cruse stucu bese para nú ze'ta bee bene li'inu. ⁷Bee bene neca xi neca yuu nú ratse ye inza quiu lu, nu tunu chiqui' ñia unguyu' nú unguyu' lu yuu ze'e para bene enu rri'i riña' lu yuu ze'e che rri'i Diose nú nza nze'cae lu cuenda'lla. ⁸Pero tunu purotsia bee eche cuna bee huañi rayu lu yuu ze'e, che lecaxi sibi'i, nu che nze'ta castiya nú zeca yuu ze'e, nu che chiquine.

Lunú rri'i nú nzuta' arqui' bene

⁹Bee sa'a enu nzeli arquia'ahua Jesucristo, la nia scua lu cuenda'hua xne li'iru nediya'ru nú rri'i nze'cahua, nu scua nzeri'iláhua lunu riala ri'ihua para nú tsila'ahua lu castiya. ¹⁰Xne Diose, lacanu tucu Diose enu la ri'i tucu nú necane para nú zañi'nu beenú

neca nze'ca uri'ihua cuna ye nú ulube'lahua lunu, nu secahua li'inu nu uri'ihua elietsa lubees sa'ahua enu nzeli arqui' Jesucristo tucu nú rri'isca'hua nee. ¹¹Pero li'iru niarqui'ru nú nzeri'iláhua scua diqui nú nehuañihua. Nu la llaca'hua nú ri'ihua scua, para nú ati'hua lunú nzucu luhua nú ati'hua. ¹²La ri'ihua nú aca nebichiuhua sino que uri'ihua tucu nú uri'i bee bene enu uchili arqui' Diose sin nú allaca' beella nucua'a quiebeella nú ati' beella lunú ucuaqui' u'na Diose lubeella nú ati' beella.

¹³Chenu ucuaqui u'na Diose lu Abraham, uninu lu le'catsia li'inu xne lecati stucu enu masela neca equie luquela li'inu, ¹⁴nu uninu lu Abraham: "Li'á neli ri'á nú cha nze'ca lu cuenda'lu nu ri'á nú chiqui' huaxi bee familia'lu lu'culu."

¹⁵Chequie lá llaca' Abraham utsuquiella nú ati'lla lunú uni Diose nú dete'nu lulla. ¹⁶Bee bene, para nú aca ahee nú neli tsa'alubeella lunú rnibeella, li'ibeella rqui'ña nú nibeella nombre' tucu enu máse neca equie luquela li'ibeella. ¹⁷Neequie le'ca esquie, equie nú niarqui' Diose lube'nu lubee bene enu ati' lunú uninu, nu riña tucu bichia nú leca xunga che'enu elliebacu'nu equie nú ucuaqui u'nanu, enze'e uninu lu le'catsia li'inu. ¹⁸Chicu beenú la rila ureche' Diose, nu necane lunú ucuaqui u'nanu, nu lunú uninu lu le'catsia li'inu nu nediya'la'ahua nú li'inu la nequichia'nu. Chequie scua chiqui' riu'u ana arquia'ahua para nú nzebica'lá'ahua lunu para nú ri'inu elietsa lua'ahua, equie nú

nzucula lua'ahua nú neli ri'inu tucu nú unilanu. ¹⁹Nu lunú nediya'ahua nú aca tucu nú unila Diose nú aca, enze'e nzuta' arquia'ahua lu stichia'nu tucu nú nzeneta' tucu gancho barco. Nu lunú nzuta' arquí' bene scua nze'tae enza liñibe. ²⁰Elu uyu'ula Jesucristo para nú x'allanu inziu para lia'ahua, li'inu enu necala ule'ya diqui tiambu, tucu nú unga Melquisedec.

**Jesucristo neca ule'ya tucu
nú unga Melquisedec**

7 Melquisedec unga arre Salem nu ungalla ule'ya' Diose enu nzucu liñibe. Chenu ubenchila' Abraham lu xuu nú uri'lla ana lubee arre enu uliunulla, che uya cha'calu Melquisedec li'illa, nu uri'i le'ya Melquisedec Abraham. ²Che yebeenú uri'i Abraham ana lu xuu, ule'llae chi'i parte nu udetel'la tucu parte bee nucua' ya Melquisedec. Nú lee Melquisedec rni “arre enu rri'i elu usticia tucu nú necane”. Nu lunú ungalla arre eyeche Salem, nu Salem rni “arre enu rri'i nú leca xuu”. ³Melquisedec cua' lecati nediya' nú ti neca pa'lla cuna na'lla urre ti neca bee bene'lla enu udetela. Lecati nediya' xunga ungulalla nu xunga ungutilla. Li'illa ungalla ule'ya tucu nú neca Jesucristo lli'ñi Diose, li'inu enu neca ule'ya diqui tiambu.

⁴Ubi'yacuruhua xneca chiqui' unga neca equie Melquisedec. Enze'e hasta Abraham bene'ahua enu udetela, udete' tucu lu chi'i parte luyebeenú uri'lla ana ya melquisedec beenú uri'lla ana lubee arre enu uliunulla. ⁵Lu ley rni

nú bee ule'ya enu nze'ta lu familia' Leví rqui'ña nú yucu beella tucu lu chi'i parte lu ye beenú rlu'cu bee bene Israel añinzuca nú le'ca neca beella bene Israel nu nze'ta beella lu familia' Abraham. ⁶Pero Melquisedec añinzuca nú lá ye'talla lu familia' Leví, pero uyuculla nú neca diezmo' Abraham. Nu uri'i le'yalla Abraham nu uyuculla lunú ucuaqui u'na Diose. ⁷Ye'ahua nediya'ahua nú bene enu máse neca equie nze'e neca enu rri'ile'ya bene enu la neca equie xe'ta'.

⁸Yebee ule'ya enu riucu diezmo ratibeella xi rati beelá bee bene. Pero Melquisedec enu uyucu tucu lu chi'i parte bee stene' Abraham, lu ichi' Stichia' Diose rni nú neca xi neca nú nehuañisca' Melquisedec. ⁹Nu chenu udete' Abraham tucu lu chi'i parte bee stene'lla lu Melquisedec neca xi neca nú nuula lu Leví cuna lubee ule'ya enu nze'ta lu familia' Leví udete' beella tucu lu chi'i parte bee stene' beella ya Melquisedec chenu uya cha'calu Melquisedec Abraham bene'ahua enu udetela. ¹⁰Xne chenu uya cha'calu Melquisedec Abraham, lecasca' Leví tiambu ze'e, pero lu familia' Abraham nze'ta Leví.

¹¹Tunu equie cuenda' bee ule'ya Levítas nu' beya' nú lecaxi na bene lu Diose equie cuenda' ley nú udete' Diose lubee bene Israel che la qui'ña nú aye'ta stucu ule'ya tucu nú ube'ta ule'ya Melquisedec nu lá ye'talla xi ube'ta Aarón. ¹²Xne chenu uche'e ule'ya le'ca uche'e ley. ¹³Nu Jesucristo neca ule'ya cua' nu lá ye'tanu lu familia' bee ule'ya. Sino que nze'tanu stucu lu

familia rene, nu ni' tucu familia'nu lá aca ule'ya. ¹⁴Xne nediya'ahua nú Jesucristo nze'tanu leta bee familia' Judá, nu lá ni Moisés equie cuenda' bee familia cua' chenu unilla nú ti aca bee ule'ya.

¹⁵Nu ahee neca nú Jesucristo neca ule'ya tucu nú unga Melquisedec. ¹⁶Xne lá ye'tanu leta familia' Leví, tucu nú rnibiya' ley nú aca bene ule'ya sino que li'inu necanu ule'ya xne leca xunga laxu nú nehuañinu. ¹⁷Xne scua rni lu ichi' Stichia' Diose lu cuenda'nu:

Li'ilu necalu ule'ya nu siempre
necalu ule'ya tucu nú unga
Mequisedec.

¹⁸Scua ulaxu nú rnibiya' ley' Moisés xne leca modo nú azibi'i lubee bene. ¹⁹Lá ri'i ley cua' ana nú ahuañi nze'ca bee bene. Pero luhua'e' ley cua', nzucu lua'ahua nú ri'i Jesucristo elietsa lua'ahua, xne equie cuenda'nu nu' modo riña'ahua lu Diose.

²⁰Nu scua ucuaqui u'na Diose lua'ahua nú acane. Hua'tu chenu ulluna beella nú neca beella ule'ya lecaxi rcuaqui u'na Diose lubeella. ²¹Pero chenu ucañi Diose Jesucristo, para nú acanu ule'ya, nu Diose uninu lu le'catsia Li'inu, tucu nú rni lu Stichia' Diose:

Diose Pa liñibe uninu lu
le'catsia Li'inu,
nu la che'enu nú rninu, nu
uninu:

“Li'ilu necalu ule'ya nu siempre
necalu ule'ya,
xi unga ule'ya Melquisedec.”

²²Scua nediya'ahua nú máse neca nze'ca inziu nú uxa'la Jesucristo para nú riña bene lu Diose liñibe.

²³Tiambu ze'e uhuañi huaxi bee ule'ya nu ni'tucu beella lá huañi diqui tiambu. ²⁴Pero Jesucristo diqui tiambu nehuañinu, enze'e lecati chu'u luhua'e'nu. ²⁵Enze'e reca Jesucristo tsila'a bee bene, bee bene enu niarqu'i riña lu Diose equie cuenda'nu, xne li'inu diqui tiambu nehuañinu para nú nacu'nu lu Diose equie cuenda' bee bene.

²⁶Enze'e Jesucristo neca ule'ya enu máse neca equie enu rqui'ñia'ahua nú ri'i elietsa'ahua, xne li'inu leca xunga uri'inu dula. Nu lá ri'inu nú necha neca nu lecali xi nanu nu uchiu'unu leta bee bene iliulabe. ²⁷Li'inu lá ri'inu tucu nú rri'i bee ule'ya enu máse neca equie, nú ye bee bichia riñi beella bee nañi xi neca u'na lu Diose equie cuenda' stula beella. Nu chela equie cuenda' stula bee bene. Pero Jesucristo tucutsia bese ungitinu xi neca tucu u'na lu Diose, nu la qui'ña nú atinu stucu bese. ²⁸Equie cuenda' ley uyu'u bee ule'ya enu máse neca equie, añinzuca nú lá ri'i beella tucu nú necane. Pero cheelá uni Diose lu le'catsia li'inu. Nú lliñinu aca ule'ya enu máse neca equie, li'inu enu lecaxi naa lu Diose diqui tiambu.

**Jesucristo neca ule'ya enu
máse neca equie liñibe**

8 Luye nú uni'la'ahua, lunú máse neca equie necane nú Jesucristo neca ule'ya enu máse neca equie li'inu enu nzucula cue'tse Diose enu chiqui' rnibiya' chube liñibe. ²Ze'e necalanu ule'ya, liñi indu nú neli ureche' Diose, nu la necane indu nú ureche' bee bene.

³Ye bee ule'ya enu máse neca equie, riña' nú rri'ibeella neca nú rdete' beella u'na lu Diose nu riñibeella nañi xi neca u'na lunu le'ca scua Jesucristo, li'inu enu neca ule'ya enu máse neca equie lua'ahua nu' tucu nú udete'nu lu Diose. ⁴Tunu nzusca' Jesucristo lu iliulabe quie' ni' lá acanu ule'ya, xne nucua'a bee ule'ya enu rdete' u'na lu Diose tucu nú rni'biya' ley' Moisés. ⁵Pero bee ule'ya quie', rri'itsia beella tucu ejemplu nú reca liñibe. Nediya'ahua nú scua necane xne chenu nze reche' Moisés indu uni Diose lulla: “Ubi'ya nze'cacuru para nú reche'lu indu quie' tucu nú ulubela lulu equie dañi Sinaí.”

⁶Pero máse neca equie nú rri'i Jesucristo enu neca ule'ya enu máse neca equie lua'ahua, nu equie cuenda' inziu cuqui nú uxa'lanu máse neca nze'ca para nú riña bee bene lu Diose liñibe.

⁷Xne tunu equie cuenda' ley ari'i bene ana ahuañi nze'ca bene lu Diose la qui'ñia' nú achu'u stucu inziu cuqui che. ⁸Pero ulañi' Diose nú lá ri'i nze'ca bee bene che uninu:

Li'á nia nú riña bee bichia nú chu'u tucu inziu cuqui para bee bene Israel, cuna bee bene Judá.

⁹Pero inziu cuqui cua' lacane tucu nú neca ley nú utsa'naa lubee bene'hua enu udetela, chenu uhua beella Egipto; nu lunú né zucu'beella nú rnia enze'e utsana arquia beella, uni Diose.

¹⁰Nu le'ca uni Diose: Scua utsa'nalá nú xi zeca bee bene chenu riña bichia ze'e.

Tsa'naa ley elliebacu' beella nu ri'á nú quiene liñi arqui'beella.

Che acaa Diose'beella, nu li'ibeella aca beella bee benea.

¹¹Che bichia ze'e la qui'ña nú zete' bee bene sa' bene.

Ni' bee bichilla para nú chulubeella li'á enu neca Diose,

xne yebeella chulubeella li'á, desde bee enu me' hasta bee bene enu unguxu.

¹²Nu li'á ri'á perdona ye beenu necha neca uri'i beella, nu leca' xunga ellu'cu' arquia ye dula nú uri'i beella.

¹³Chenu uni Diose nú xa'lanu inziu cuquicua' uninu scua xne la zibia' inziu uxu nú riña bee bene lunu nu beenú la zibia' la lea' nú nitilu bee enze'e.

Indu nú nzucu liñibe nu indu nú nzucu lu iliulabe quie'

9 Lia'ahua nediya'ahua nú chenu uzucu' bene ley nú rnia'ahua nú neca inziu uxu, lu ley cua' nze'ta nú xneca ri'i bene lu Diose chenu neyete' sa'bene liñi indu, nu xneca reche' bene indu lu iliulabequie. ²Indu ze'e neca singuie tucu parte liñii elu uchiu'ulee luhuare elu necachi neca, liñii ze'e nzucu candelero, nu nzu mexa elu uricu bee pá nú necale'ya. ³Nu stucu liñii di'chi cortina nú nzi'quinala ze'e uchiu'ulee luhuare elu máse necachi; ⁴luhuare elu lee máse necachi nzucu tucu ecu'cu nú necache' oro elu rdu'bene llene' quie ndixi nu cuna tucu iña

nú nu'che' nú ucuauqui u'na Diose. Diqui tetsu' iñia ze'e nu' oro cuna liñii. Nu liñii nchiñiche' bee quiee nú nequie za' chi'i mandamiento' Diose lu cuna bara' Aarón nú uye' lecatetsu', nu cuna tucu situ nú necache' oro nú nu'che' maná liñi.

⁵Equie iñia ze'e nchiucu' chiucu bee ángele enu lee querubines nu cuna cuaca bee ángele cua' sacu' equie iñia elu rtiqiu ule'ya enu máse neca equie rene' bee nañi equie cuenda' stula bee bene. Pero nee la ixiule'esca'a equie cuenda' bee nucua' luhua.

⁶Chenu ulaxu nú ungache' yebee nucua' chequie ye bichia riu'u bee ule'ya liñi indu ze'e pero riu'utsia beella luhuaire elu necachi ze'e rri'ibeella lunú rqui'ña ri'ibeella. ⁷Pero stucu luhuaire liñi indu ze'e elu uchiu'ulee luhuaire elu máse necachi ze'e riu'u tucutsia ule'ya enu máse neca equie lubeelá bee ule'ya tucutsia bese liñi tucu lana. Nu leca modo chu'ulla luhuaire ze'e tunu la uya'lla rene' bee nañi para nú ri'i Diose perdona stulalla nu cuna dula nu rri'i bee bene sin nú ri'illa beya'. ⁸Equie cuenda' bee nucua' rlu'be' Espíritu Santo lua'ahua nú diquila nú sibi'sca' luhuaire elu necachi liñi indu cua', nu leca modo achu'u bee bene stucu luhuaire elu lee luhuaire elu máse necachi. ⁹Ye beenú unga cua' necatsia tucu ejemplu lua'ahua bee bichia quie' xne bee u'na cuna bee nañi enu udete' bee bene u'na lu Diose, lá zibi' nucua' ache'e elliebacu' bee bene para nú leca xinaa beella lu Diose. ¹⁰Ye bee costumbre nú ulu'cu beella, cuna

lunú udacubeella, nu ungue'beella cuna ye beela beenú uri'ibeella para nú leca xinabeella lu Diose, nucua' neca nú unibiya' ley nú uri'i beella, hasta bichia chenu uche'e Diose yeene.

¹¹Xne nee ube'tala Jesucristo lu iliulabe quie' nu li'inu necanu ule'ya enu máse neca equie lua'ahua, nu equie cuenda' li'inu rlu'cula'ahua nu ucuauqui u'na Diose nú liqui'nu lua'ahua. Nu liñi indu nú uyu'unu máse neca equie, nu máse neca nze'cae, xne lecane lu iliulabe quie' nu lá ureche' bee benene. ¹²Uyu'ula Jesucristo liñi indu nú máse necachi, pero lá chu'ununu rene' bee becerro cuna rene' bee chipa, sino que cuna rene' e'cunu. Nu tucutsia bese uyu'unu nu lá qui'ña nú ri'inu scua stucu bese nu equie cuenda' li'inu utsila'ali'la'ahua lu dula. ¹³Tiambu nú udetela, rene' bee chipa cuna bee u'na cuna bee tii nú ubiqui ternera bee nucua' utiqui ule'ya equie bee bene, para nú seca beella nú lecaxi naabeella lu Diose. Nu tunu seca beella nú scua leca xinabeella lu Diose. ¹⁴Xaquie núla ri'i rene' Jesucristo nú lecaxi na'ahua lu Diose, para nú ria'ahua tucu nú niarqui' Diose enu nehuañi, xne equie nú reca Espíritu Santo, udete' cuenda Jesucristo li'inu xi neca u'na nú lecaxi na lu Diose para nú ungutinu equie cuenda'ahua.

¹⁵Enze'e equie cuenda' Jesucristo rlu'cula'ahua tucu inziu cuqui para nú riña'ahua lu Diose. Xne equie cuenda' nú ungutí Jesucristo uri'ilanu perdona stula'ahua cuna stula bee bene enu uyanala

ley, nu atia'ahua lunú ucuaqui u'na Diose lua'ahua nú la laxua'.
¹⁶Xne chenu reche' tucu bene ichi' nú ti bee enu ya'nanu bee stene'lla, la zibi' ichi' quie' mientras nú nehuañilla, ¹⁷hasta chenu ungutillalla zibi' ichi' quie' nu la zibii tunu nehuañisca'lla. ¹⁸Enze'e, hasta hua'tu chenu uquixie nú uzibi' ley nú utsa'na Diose lu Moisés, li'ibeella udiñibeella bee nañi para nú chiu'u rene. ¹⁹Xne chenu ulaxu nú udixiule'e Moisés luye bee bene yebeenú enta lu ley' Diose, che una'tsella ichia' sanchi nú netsuu tinda nelu uzucu'lla lli'i tucu xiu' aca nú lee hisopo. Che utse'ellae lu inza nú nucha rene' becerro cuna rene' chipa, nu ucua'sallae equie libro ley cuna equie ye bee bene. ²⁰Nu unilla: "Rene quie' neca tucu seña nú uliqui'la Diose ley'nu luhua para nú zucu'huane."

²¹Le'ca ucua'salla rene cua' liñi indu nu equie yebee nú rqui'ña bee ule'ya liñi indu ze'e. ²²Ley cua' rnibiya' nú casi yebee nú aca le'ya cuna rene para nú leca' xi nae lu Diose, xne tunu leca rene leca modo aca perdona stula bee bene.

Rene' Jesucristo xila stula bee bene

²³Enze'e, para nú aca ahee nú leca' xina beenú uqui'ña bee ule'ya liñi indu ze'e, rqui'ña nú udiñi beella bee nañi para nú ri'ile'ya beella bee nucua'. Pero bee nucua' necatsiae xi neca tucu seña equie beenú nu' liñibe, xne equie cuenda' bee nú nu' liñibe rqui'ña rene' tucu enu máse seca luquela bee nañi. ²⁴Nu néchu'u Jesucristo liñi indu nú ureche'e bee

bene, nú necatsia tucu seña nú xa neca liñibe, sino que li'inu uyu'unu liñibe elu rnacu'nu lu Diose equie cuenda'ahua. ²⁵Jesucristo la qui'ña nú atinu huaxi bese equie cuenda' stula'ahua, lá ri'inu tucu nú urli' bee ule'ya enu máse neca equie nú za'lana riu'unu beella rene' bee nañi liñi indu, luhuare elu máse necachi neca. ²⁶Xne tunu scua necane huaxi bese aqui'ña nú unguti Jesucristo hasta chenu uquixie iliulabe. Pero chenu uri'ña bichia nú uri'ña Jesucristo lu iliulabe tucutsia bese ungutinu equie cuenda' stula'ahua. ²⁷Tucu nú tucutsia bese rati bene, nu chela chiulue lu cuenda' bee bene. ²⁸Le'ca scua tucutsia bese unguti Jesucristo para nú chilanu stula bee bene. Nu chenu nze'tanu stucu bese, la ye'ta'nu para nú chilanu stula bee bene, sino que nze'tanu para nú uya'nu bee bene enu nucua'aqueie li'inu.

10 Xne ley nú udete' Diose lu Moisés necatsiae tucu seña lunú nzu nú aca, pero la necane nú ungalane lunú nzu nú aca xne mase za'lana rati bee nañi xi neca u'na lu Diose tucu nú rnibiya' ley nú ri'i bee bene, pero leca xunga uri'ña bichia nú ulle'ca beella nú leca' xina beella lu Diose. ²Xne tunu equie cuenda' ley leca' xi naa beella, cuna tucutsia bese nú udiñi beella nañi xi neca u'na lu Diose, che la qui'ña' nú ri'i beella scua stucu bese, xne nediya'la' beella nú urilala stula beella. ³Pero la tsi'beella scua sino que za'lana ullu'cu arqui'beella stula beella chenu udiñi beella nañi xi neca u'na lu Diose. ⁴Xne rene'

bee u'na' cuna bee chipa la acane
chilae stula bee bene.

⁵Enze'e, chenu ube'ta Jesucristo
lu iliulabe, che uninu lu Diose:

Li'ilu la niarqui'lu rene' bee
nañi,

ni' ye beela bee u'na nú entayu
bee bene lulu,

enze'e lia uliqui'lu cuerpo nú
rlu'cua.

⁶La nia' arqui'lu nú tsiqui' bee
bene nañi xi neca u'na
lulu, ni' rene' bee nañi nú
entayuu beella lulu equie
cuenda' stula beella.

⁷Enze'e unia: "Ca'a nzua, Pa
Diose,

uriña para nú ri'á tucu nú
niarqui'lu,

tucu nú nequie lu ichi' stichia'lu
equie cuenda' li'á."

⁸Rluti uni Jesucristo nú la niarqui'
Diose rene' bee nañi, ni' bee nañi
enu siqui' bee bene xi neca u'na
lunu, equie cuenda' bee stula bee
bene, tucu nú rnibiya' ley nú ri'i
bee bene. ⁹Chenu ulaxu nú uni
Jesucristo scua, che le'ca uninu:

"Ca'a nzua Pa Diose uriña para nú
ri'á tucu nú niarqui'lu." Scua uri'i
Jesucristo nú ulaxu nú rnibiya' ley
nu uxa'lanu stucu inziu cuqui' nú xa
riña bene lu Diose. ¹⁰Nu nee leca'
xi na'ahua lu Diose equie nú uri'i
Jesucristo tucu nú niarqui' Diose,
nu tucutsia bese ungutinu equie
cuenda' stula bee bene nu leca'
xunga atinu stucu bese.

¹¹Yebee ule'ya Israel yeye'e la
tsuxe beella nú sibi' beella liñi indu
tucu nú rnibiya' ley nú ri'ibeella nu
ye bee bichia riñi beella bee nañi
rdete' beella u'na lu Diose. Nu mase

huaxi bese rri'ibeella scua pero la
ri'i nú riñi beella bee nañi u'na lu
Diose ana nú laxu stula bee bene.

¹²Pero Jesucristo tucutsia bese
ungutinu equie stula bee bene, nu
la qui'ña nú ri'inu scua stucu bese.
Nu uzucunu cue'tse Diose chúbe.

¹³Nu ze'e nzuquienu hasta chenu
ri'i Diose nú nibiya'nu luyebese bene
enu rle lunu. ¹⁴Xne equie cuenda'
nú ungutinu tucutsia bese equie
stula bee bene, che leca' xina bee
bene enu nzeli arqui' li'inu diqui
tiembu. ¹⁵Nu lia'ahua nediya'ahua
nú neli neca bee nucua' xne equie
cuenda' Espíritu Santo nze'ta
bedichia' nú nequie lu ichi' Stichia'
Diose nú uni Diose:

¹⁶Scua utsa'nalanu bedichia' nú
xi zeca bee bene chenu riña
bichia ze'e,

elliebacu' beella du'a ley.

Nu ria'á nú quiene liñi
arqui'beella.

¹⁷Nu le'ca uni Diose:

Leca' xunga ellucu' arquia
stulabeella nu yebeelá
beenú necha neca
uri'ibeella.

¹⁸Nu lunú neca perdonala stula bee
bene la qui'ña' nú uti bee bene nañi
dete' bee bene u'na lu Diose equie
cuenda' stula bee bene

**Rqui'ña nú tsuta' arqui' bee bene
lunú nzeli arqui' bee bene**

¹⁹Enze'e, bee sa'a enu nzeli
arquia'ahua Jesucristo la
lliquia'ahua chua'ahua elu máse
necachi neca nzucu Diose equie
cuenda' rene' Jesucristo. ²⁰Xne
chenu udete' cuendanu li'inu nú
ungutinu, uxa'lanu tucu inziu

cuqui nú rliqui' nú huañili bee bene elu nzucu Diose. ²¹Nu tucu nú rnibiya' Jesucristo lua'ahua, li'inu enu neca ule'ya enu máse rnibiya' liñibe. ²²Enze'e rqui'ña nú diquinu' arquia'ahua chebica'ahua lu Diose cuna lunú neli nzeli arquia'ahua li'inu, cuna lunú lecaxi necha nchiñi elliebacua'ahua nu cuna cuerpo'ahua nú leca' xinaa nú la lu'cua' dula, xi neca chenu apenatsia unguitsa'ahua cuna inza nú leca xina. ²³Enze'e rqui'ña nú tsuta'la arquia'ahua lunú nzeli arquia'ahua Diose, xne li'inu itaa tsa'alunu stichia'nu nú ucuauqi u'nanu lua'ahua. ²⁴Rqui'ña nu cua'na'ahua xa modo ria'ahua elietsa lubee sa'ahua nu zecala'ahua bee sa'ahua nu cuna nú ri'i nze'ca'ahua. ²⁵Le'ca la yala nú tsana' arquia'ahua nú riete'sa'ahua para nú yene'ahua Stichia' Diose la ria'ahua tucu nú rri'i textcua' bee sa'ahua enu sana' arqui' nú riete'sa' cuna beelá bee sa'ahua, sino que rqui'ña nú dua'ahua ana arqui' bee sa'ahua, xne nediya'ahua nú nze'ta riñala bichia nú riña zeca Jesucristo stucu bese.

²⁶Xne tunu nediya'la'ahua lunú neli neca nu rri'isca'la'ahua dula leca' ti stucu enu ati equie cuenda' stula'ahua. ²⁷Lunú nzuquietsia lua'ahua neca elu usticia' Diose nú chiqui' fuerte, lu tucu quii elu riala chue bee bene enu la zucu' nú rninu. ²⁸Chenu la zucu' tucu bene nú rni ley nú udete' Diose lu Moisés, nu nu' chiucu chuna bee bene enu neca testigo nú la zucu'lla nú rni ley cua', che leca' modo nú tsila'alla lu eluti nú riala zecalla. ²⁹Nee uri'ihua

elliebacu', únú masesca'lá castiya riala bee bene enu rri'i elliebacu' nú lecaxi zibi' lli'ñi Diose? Nu rni nú la zibi' rene'nu nú rlube' nú aca tucu nú utsa'nala Diose nú aca, nu rene nú rri'i nú la lu'cua' bee bene dula, nu rnichi'qui' beei Espiritu Santo. ³⁰Lia'ahua nediya'ahua nú uni Diose: “Li'á detea castiya bee bene nu detea castiya nú riala beei.” Nu le'ca uninu: “Li'á hualune lu cuenda' bee bene enu neca bee benea.” ³¹Chiqui' juerte nú zana' bene lu castiya' Diose. Li'inu enu neca Diose enu nehuañi.

³²Pero ullu'cu' arqui'hua xneca ulle'cahua chenu apenatsia udu'llie'le stichia' Jesucristo arqui'hua. Li'ihua uriqui'hua lunú chiqui' nehuana ulle'cahua. ³³Nu'hua enu udiquichi'qui' bee bene nu chiqui' nehuana ulle'ca, nu utsequichia' beei li'ihua ante lubee bene, nu nu'hua lá tsana' arqui' bee sa'hua enu ulle'ca scua. ³⁴Le'ca lá tsana' arqui'hua bee sa'hua enu uyu'u ni'cu', nu mase nú unguxi bee bene stene'hua lá tsu nehuana arqui'hua xne nediya'hua nú máse seca nú rlu'cuhua liñibe nú leca xunga laxu. ³⁵La tsana' arqui'hua lunú nzuta' arqui'hua Jesucristo, xne lunú nzeli arqui'hua scua che ati'hua lunú huaxi seca. ³⁶La lla'ca'hua lunú nehuana secagua para nú ri'ihua lunú niarqui' Diose nú ri'ihua, che ati'hua lunú ucuauqi u'nala Diose luhua nú ati'hua. ³⁷Xne lu ichi' Stichia' Diose rni:

Yamerotsia nze'ta enu
necadichia' nú nze'ta.

Chu nze'tanu la lea'nu.

³⁸Pero bene enu rri'i tucu nú rialane lua huañili nze'e,

lunú nzeli arqui' nze'e li'á,
pero enu sana' arqui' nú nzeli
arqui' li'á la tsu nze'ca
arquia lu nze'e.

³⁹Pero lia'ahua la neca'ahua xi neca
bee bene enu sana' arqui' nú nzeli
arqui' Jesucristo xne bee benecua'
riala beella castiya' beella, sino que
lia'ahua neca'ahua bee bene enu
neli nzeli arqui' Jesucristo, para
nú lu'cua'ahua elunehuañi nú leca
xunga laxu liñibe.

Bee bene enu neli nzeli arqui' Diose

11 Nu nee lunú nzeli arqui'
bene Diose, necane nú
nediya' nze'ca'ahua nú neli aca tucu
nú nellua'aque'ahua nú aca, nu neli
nzeli arquia'ahua lunú aca, mase
nú la ñia'ahuane. ²Bee bene'ahua
enu udetela uya'na nze'ca beella lu
Diose equie nú uchili arqui'beella
li'inu.

³Equie nú nzeli arquia'ahua Diose
rria'ahua beya' nú cuna stichianu
ureche'nu iliulabe cuna liñibe cuna
ye nú nu' lue, nu lecaxi uqui'ñianu
nú ureche'nue.

⁴Nu Abel lunú diquinu' arqui'lla
uchili arqui'lla Diose enze'e máse
neca nze'ca u'na nú udete'lla lu
Diose, luquela nú udeté' Caín,
enze'e uya'na nze'calla lu Diose
xne uyucunu u'na nú udeté'lla
nu máse nú ungu'tila Abel pero
riene'sca'ahua nú xa uchili arqui'lla
Diose.

⁵Equie nú uchili arqui' Enoc
Diose enze'e nzia nehuañilla liñibe
nu lá atilla, nu lá llela' bee bene
li'illa xne unguya'la Diose li'illa
liñibe. Nu lu ichi' Stichia' Diose
rni: “Nú ante nú uya' Diose Enoc

uyu' arqui'nu xneca uhuañilla.”

⁶Lecati huañi tucu nú riu' arqui'
Diose tunu la chili arqui'lla li'inu.
Titse bene enu niarquí' chebica lu
Diose, rqui'ña nú chili arqui'lla nú
nu' Diose nu le'ca rqui'ña nú chili
arqui'lla nú dete' Diose nú uninu nú
dete'nu lubee bene enu rla'na li'inu.

⁷Equie nú uchili arqui' Noe Diose
enze'e chenu uni Diose lulla nú aca
lunú lasca lañi'lla aca, che uzucu'lla
nú uninu, nu ureche'lla tucu barco
nú tsila'lla cuna bee bene'lla equie
cuenda' nú uni Diose lulla nú nze'ta
aca. Nu lunú uchili arqui' Noe
Diose unga ahee nú zeca bee bene
enu lá chili arqui' Diose castiya.

⁸Le'ca scua lunú uchili arqui'
Abraham Diose, enze'e uzucu'lla
nú uni Diose chenu uninu lulla nú
uchiu'ulla lachilla nu challa lu yuu
elu uni Diose nú dete'nu lulla, nu
uchiu'ulla lachilla nzalla sin nú
ri'illa beya' cae. ⁹Nu lunú uchili
arqui'lla Diose, uzuculla lu iliu nú
uni Diose nú dete'nu lulla xi neca
tucu bene rene, nu uzuculla liñi
carpa le'ca scua uhuañi Isaac cuna
Jacob li'ibeella enu le'ca riala yucu
yuu ze'e. ¹⁰Scua uhuañi Abraham
xne nediya' nze'ca'lla nú nzialla
huañilla eyeche nú ureche' Diose,
eyeche nú leca xunga enta bichia
nú nitilu.

¹¹Le'ca scua Sara, lunú uchili
arqui'lla añinzuca nú leca modo
lu'culla endu', nu le'ca ungu'xulalla
para nú lu'culla endu', pero udu'
Diose fuerza'lla para nú acalla naa
lu iliulabe nu ulu'culla tucu endu'
lunú uchili arqui'lla nú Diose neli
sa'alunu stichia'nu. ¹²Scua ungae
añinzuca nú ungu'xula Abraham nu

ulu'culla endu', nu ulu'culla huaxi bee familia'lla xi huaxi bee belaa liñibe, cuna xi huaxi bee eyuxi ru'u inzatu' nú leca modo bacu'.

¹³Ye bee benecua' uchili arqui'beella Diose hasta nú ungui beella nu añinzuca nú lá lañi' beella lunú ucuaqui u'na Diose lubeella pero lunú uchili arqui'beella enze'e nediya' beella nú aca tucu nú uni Diose lubeella nú aca, nu ñia nzu arqui'beella. Nu nediya' nze'ca' beella nú chiucu chuna tsia bichia nze'ta beella lu iliulabe quie' nu la ye'ta beella para nú huañili beella. ¹⁴Nu bee enu rni scua. Scua ahee nze'ca rube' nú rcua'na beella nú camero aca lachi beella. ¹⁵Xne tunu rri'isca' beella elliebacu' lachi beella elu uchiu'u beella che nu' modo nú abenchila' zeca beella eyeche ze'e. ¹⁶Pero máse rri'ibeella elliebacu' tucu luhuare elu máse neca nze'ca nú neca liñibe. Enze'e la tu' Diose nú necanu Diose' beella, nu utsuche'lanu elu cua'a beella liñibe.

¹⁷Equie nú uchili arqui' Abraham Diose enze'e chenu udete' Diose preu Abraham nú nze utilla endu'lla Isaac xi neca u'na lu Diose, uzela Abraham añinzuca nú tuculi' Isaac neca endu'lla, nu añinzuca nú nediya'lla nú uni Diose lulla: ¹⁸“Equie cuenda' endu'lu Isaac dala huaxi bee familia'lu.” ¹⁹Pero nediya' Abraham nú rlu'cu Diose poder para nú ri'inu nú huañi zeca bee benenguti chenu udete Abraham preu scua neca xi neca nú ungui endu'lla nu uhuañi zeca endu'lla lu eluti.

²⁰Le'ca esquie lunú uchili arqui' Isaac Diose, unilla nú cha nze'cae

lu cuenda' endu'lla Jacob nu Esau, nu unilla nú xi enta zeca cada tucu beella.

²¹Le'ca scua lunú uchili arqui' Jacob Diose, le'ca unilla nú cha nze'ca lu cuenda' rucu bee endu' José, chenu yamerotsia atilla. Che uricu'lla yalla equie xcalla nu unacu'lla lu Diose.

²²Le'ca scua, lunú uchili arqui' José Diose, chenu yamero atilla, che unilla nú chiu'u bee bene Israel Egipto, nu unilla lubee bene ze'e nú xneca ri'inubeella bee arta'lla.

²³Equie nú uchili arqui' pa' Moisés cuna na'lla Diose, chenu ungulalla che ucachi' beella li'illa diqui chuna guu equie nú ñia rnalla, nu lá lliqui beella chenu uni arre nú ati ye bee endu' me' enu neca endu' niyu.

²⁴Nu chenu uru'cu Moisés, equie nú uchili arqui'lla Diose, lá niarqui'lla nú acalla endu' xinchiu'cu arre Egipto. ²⁵Para Moisés, máse neca nze'ca nú nehuana zecalla cuna bee bene sa'lla enu neca bee bene Israel, luhuare nú ri'illa dula nú tsana' arqui'lla bee sa'lla para nú lu'culla lunú niarqui'lla nu ri'illa bee nú la zibi'. ²⁶Para li'illa máse neca nze'ca nú nehuana ulle'calla tucu nú ulle'ca Jesucristo, luhuare nú lu'culla ye bee eluxene nú nu' Egipto xne máse nzu arqui'lla lu eluxene nú ati'lla lu Diose.

²⁷Le'ca esquie lunú uchili arqui' Moisés Diose, uchiu'ulla eyeche Egipto nu lá lliquilla mase ulee arre Egipto lulla. Nu utsuta' arqui'lla lu Diose xi neca nú rlañi'lla Diose, li'inu enu la lañi' bee bene. ²⁸Equie

nú uchili arqui' Moisés Diose, uri'illa eliñi baxcu, nu unibiya'lla nú ucuatsa bee bene Israel rene' bee sanchi ru'u bee ni'i beella para nú chenu dete ángele enu ruuti la úti nze'e bee endu' rlu' bee bene Israel.

²⁹Le'ca esquie lunú uchili arqui' bee bene Israel Diose. Enze'e uya'lla labe inzatu' nú lee nelu udete beella xi neca tucu yuu bichi. Pero chenu nzedete bee bene Egipto luhuare ze'e, hora ze'e udete zeca inzatu' luhuare ze'e nu unguuti beei lue.

³⁰Le'ca esquie lunú uchili arqui' bee bene Israel Diose che chenu uza' achi bichia nú rdu' beella vuelta diqui abenchila' eyeche Jericó, che uluquie muro nú necache' abenchila' eyeche ze'e.

³¹Le'ca esquie lunú uchili arqui' una'a huexe enu lee Rahab Diose, utsila'anchu chenu unguuti bee bene lachinchu, bee enu né zucu' Stichia' Diose xne li'inchu uyucu nze'canchu bee bene Israel enu uya tsi'ña eyeche ze'e.

³²Nu huaxi nú niláa luhua, pero leca' tiempo nú ixiu'e luhua equie cuenda' beelá bee bene xi neca lu cuenda' Gedeón, Barac, Sansón, Jefté, David, Samuel nu bee profeta.

³³Ye beella uchili arqui'beella Diose nu uri'ibeella ana lu huaxi nación, nu uri'i beella elu usticia tucu nú necane, nu ulañi' beella nú uyalu tucu nú uni Diose lubeella nú aca, nu utsacu' beella ru'u bee bichiee.

³⁴Le'ca nu' beella enu utsi'qui bee bene lu quii nu lecaxi ulle'ca, nu nu' beella enu utsila'a lubee bene enu niarquiu' úti li'ibeella cuna espada, nu uyu'u juerza' beella nu utsu

naaqui arqui'beella, añinzuca nú nechula' nzu arqui'beella, nu uyu'u juerza' beella chenu uri'ibeella xuu. Nu utliaca' beella bee bene rene enu uliunu li'ibeella. ³⁵Nu le'ca nu' bee una'a enu unguuti bee familia', nu equie nú uchili arqui'beella Diose, che uhuañi zeca bee familia' beella stucu bese. Pero le'ca nu' bee bene enu mase unguuti, pero para li'ibeella máse neca nze'ca nú nehuana zeca beella nu mase nú unguuti bee bene li'ibeella, lá zela beella nú tsana' arqui' beella Diose, para nú lu'cu beella stucu elunehuañi nú necuqui nú máse seca. ³⁶Le'ca nu' beella enu nehuana ulle'ca, utsequichia' bee bene li'ibeella, nu udiñi bee bene li'ibeella, nu ullica'cu bee bene li'ibeella cuna cadena, nu udu' bee bene li'ibeella ni'cu'. ³⁷Le'ca nu' beella enu unguuti bee bene cuna quiee, le'ca nu'beella enu uchiecu' bee bene arli'tilluu cuna sierra, nu nu' beella enu unguuti bee bene cuna espada, le'ca nu' beella enu uyanze enzichiu' enzerquie, nu nehuana ulle'ca beella, nu ulle'ca beella elitsi, nu ungututsia beella iti' sanchi cuna iti' chipa nu nehuana uri'inu bee bene li'ibeella. ³⁸Uyanzee beella enza lu dañi achi, nu enza dañi nu uya'na beella liñi ye clasia' bee yube'. Bee bene ze'e lá yala nú ahuañi beella lu iliulabe quie' xne neca beella bee bene nze'ca.

³⁹Mase nú yebeella ahee nú neli uchili arqui'beella Diose, pero né yucubeella lunú ucuquiu' u'na Diose lubeella. ⁴⁰Xne Diose uri'inu elliebacu' tucu nú máse neca nze'ca

lua'ahua, nu lá acae luego tucu nú uninu lubeella xne niarqui'nu nú junto atia'ahua cuna li'ibeella lunú ucuaqui u'nanu lua'ahua.

La zañia'ahua Jesucristo

12 Enze'e lunú ubene'la'ahua equie cuenda' huaxi bee bene lunú xneca uchili arqui'beella Diose, rqui'ña nú tsana' arquia'ahua ye stula'ahua cuna ye beelá beenú rca nú ria'ahua tucu nú necane, nu la llaca'ahua nú chenala'ahua inziu nú ulube'la Diose lua'ahua. ²La yala nú zañia'ahua Jesucristo xne li'inu rri'inu elietsa lua'ahua lunú nzeli arquia'ahua, nu equie cuenda' li'inu nze'ta nú nzeli arquia'ahua tucu nú necane. Li'inu uriqui'nu lunú nehuana ulle'canu lu cruse nu lá tu'nu nú ungutinu scua xne nediya'nu nú chenu dete nú nehuana zecanu che nze'ta nú ñia tsu arqui'nu, nu nee nzuculanu cue'tse Diose chube liñibe.

³Enze'e uri'ihua elliebacu' xneca nehuana uri'inu bee bene enu rlu'cu dula Jesucristo para nú la llaca'hua, nu uriqui'hua luye nú secahua.

⁴Xne mase nú nehuana rri'inu bee bene li'ihua, nu rcua'nahua modo nú la ri'ihua nú necha neca pero ni' tucuhua lá uti bee bene. ⁵¿Xie' uzañi'la'hua xa uni Diose bezete luhua li'ihua enu neca xi neca lli'ñinu la? Lu ichi' stichia'nu rni:

Endua uri'i caso chenu rni
Diose bezete' lulu nu uriqui'
chenu rri'inu nú rri'ilu beya'
nú necha neca nú rri'ilu.

⁶Xne li'inu rninu bezete' luye bee bene enu neca bee lli'ñinu, nu rdete'nu castiya bee bene enu secanu.

⁷Enze'e uriqui'hua chenu rni Diose bezete' luhua xne neca nze'ca nucua' para li'ihua. Ri'inu luhua xi rri'i tucu uzana lu lli'ñilla. ¿Xne xie' nu' bee uzana enu la ni bezete' lubee lli'ñila? ⁸Pero nee tunu la ni Diose bezete' luhua tucu nú rri'inu luye beela bee lli'ñinu, che lacahua mero lli'ñinu nu lacanu pa'hua che. ⁹Li'ihua nediya'hua nú lu iliulabequie' chenu unga'ahua endu', uni bee uzana'ahua bezete' lua'ahua para nú zucua'ahua nú uni beella. ¹⁰Bee uzana'ahua lu iliulabequie' rni bezete' lua'ahua lle'na tiambu nú nehuañia'ahua para nú ria'ahua nú neca nze'ca. Pero Diose rninu bezete' nú máse neca nze'ca lua'ahua para nú huañia'ahua nú lecaxi na'ahua ante lunu tucu nú lecaxi nanu. ¹¹Neli nú ni'tucua'ahua la yu' arquia'ahua nú zeca'ahua castiya hora nú se'ca'ahua scua sino que rcuee, pero bee enu rri'i ana nú sucu' nucua' che nehuañi nze'ca nze'e lu Diose nu ñia nzu arqui' nze'e.

La luachuhua Stichia' Diose

¹²Enze'e udu'hua ana arqui'hua nu ude'te'hua baluro tucu nú riu'tu zeca juerza' tucu bene chenu chiqui' nellacalla. ¹³Ucua'nahua nú huañi nze'cahua tucu nú riala nú huañi bene. Para nú bee bene enu nzu chiucu arqui' lubee nú rri'i la tsana' arqui'bee inziu' Diose sino que du' bee ana arqui'bee chenala bee inziu'nu.

¹⁴Ucua'nahua nú huañihua sin xuu cuna ye bee bene nu la ri'ihua dula xne bee bene enu rri'i dula leca modo lañi' bee nze'e Pa'ahua

Diose. ¹⁵Ubi'yahua li'ihua para nú leca ta tucuhua enu huachu elietsa nú niarqui' Diose ri'i luhua para nú leca ta tucuhua enu neca xi neca tucu huañi nú nelá nú rri'i dañu nú rri'i nú rnitilu beelá bee sa'ahua. ¹⁶Ni'tucuhua la yala nú ri'ihua eluhuexe nu la luachuhua beenú neca nze'ca nú nze'ta lu cuenda' Diose para nú la zecahua xi ulle'ca Esaú, equie cuenda' tucutsia pliatu entsa' ungiitilla elurnibiya' nú rialalla xi neca endu' rlu nú necalla. ¹⁷Nu li'ihua nediya'hua nú chenu uniarqui' Esaú nú ri'ile'ya pa'lla li'illa, chequie leca' modo nú ari'ile'ya pa'lla li'illa xi neca endu' rlu nú necalla, mase nú chiqui' unguna'lla pero leca modo nú ache'e lunú uri'illa.

¹⁸Li'ihua lá riñahua dañi elu leca modo na'tsehua, tucu nú uyabica bee bene Israel tiambu ze'e e'ya dañi nú lee Sinaí elu ulañi' beella nú riqui dañi ze'e, nu ulañi' beella tucu llene nú natsacabe utsacu' equie dañi ze'e nu reca tucu biduna nú fuerte equie dañi ze'e. ¹⁹Chequie ubene' beella tucu chii trompeta, nu ubene' beella chii Diose nú rnilubeella. Pero lunú chiqui' xiqui beella nú riene' beella chii Diose, che chiqui' uzequie beella nú la nia'nu lubeella. ²⁰Xne li'ibeella nediya' beella nú chiqui' juerte nú unibiya' Diose lubeella chenu uninu: "Titse bee bene urre bee nañi enu riña nu di' tetsu' dañi quie' rqui'ña nú ati nze'e cuna quiee urre cuna lanza." ²¹Chiqui' nelliqui rna nú ulañi' beella enze'e hasta Moisés unii: "Recatse'tsea xne chiqui' xiquia."

²²Pero li'ihua lá alle'cahua scua sinoque uyabicalahua lu Diose. Nu nu'la modo nú xa rñiahua dañi Sión, nú neca Jerusalén liñibe lachi Diose enu nehuañi, elu nucua'a huaxi bee ángele. ²³Ñia nzu arqui'beenu rni beenu bedichia' nze'ca lu Diose elu yetesa' bee bene' Diose bee enu nequiela nombre' lu libro nú nchiucu' liñibe. Ze'e nzucu Diose nu li'inu enu hualue lu cuenda' ye bee bene, le'ca ze'e nzu espíritu' bee bene enu uhuañi tucu nú necane, li'ibeella enu leca xina lu Diose. ²⁴Le'ca ze'e nzucu Jesucristo, li'inu enu uxa'la tucu inziu cuqui para nú riña'ahua lu Diose. Chenu ungutí Abel unacu' quiya rene'lla nu aca elu usticia, pero cuna rene' Jesucristo la acae scua sino que li'inu uti'chianu rene'nu chenu ungutinu para nú lu'cua'ahua perdona equie stula'ahua.

²⁵Enze'e ubi'yahua li'ihua nu la luachuhua Diose enu rni lua'ahua. Xne bee bene enu né ri'i caso nú uni Moises enu udetel' Stichia' Diose lubee bene enu udetela lá tsila'a beella lu castiya nu riala beella xne né zucu' beella nú uni Moisés. Enze'e enzalaquie' lia'ahua nu la yala'ahua castiya tunu la ria'ahua caso stichia' Jesucristo, li'inu enu ube'ta enza liñibe para nú ninu lua'ahua. ²⁶Chenu uni Diose lubee bene'ahua enu udetela equie dañi Sinaí, ucuñi luyuu ze'e. Pero nee unizeca'lanu: "Enta bichia nú cuñi zeca luyuu, nu la necane nú luyuu quietsia sino que nuu liñibe." ²⁷Chenu uni Diose nú ri'inu scua stucu bese, nucua' rni nú nitilu Diose yebee nú rcuñi ureche'nu lu

iliulabe quie' nu ria'na beenú leca' modo cuñi. ²⁸Ze'e neca elu liqui' Diose lua'ahua elu rnibiya'nu nú leca xunga nitilu, enze'e rqui'ña nú dete'ahua che'tsa lu Diose. Nu lu'cua'ahua ula'na lunu diquinu' arquia'ahua tucu nú riu' arqui'nu, nu la yala nú zaña'ahua nú li'itsianu neca equienu. ²⁹Xne Diose neca xi neca tucu quii llene nú siqui' yeene.

Lunú riala ri'i bee bene enu nzeli arqui' Jesucristo

13 La tsana'hua nú secahua bee sa'hua enu nzeli arqui' Jesucristo. ²La zañi'hua nú ri'i nze'cahua lubee bene enu rriña ni'hua, xne scua nu' bee bene enu uriña bee ángele' Diose ni'i sin nú ari'i beella beya' nú neca bee bene ze'e ángele' Diose.

³Ullu'cu arqui'hua bee bene enu nchiñi ni'cu', nu utsi'hua xi neca nú le'ca nuuhua netsehua ni'cu' cuna li'ibeella. Uri'ihua elliebacu' equie cuenda' bee bene enu nehuana seca, nu le'ca utsi'hua xi neca nú le'ca nuuhua nehuana secahua.

⁴Li'ihua enu nechia la tsi'hua nú neca nucua' xi neca güita, la zequienuhua una'hua urre niyu'hua xne Diose dete' castiya lubee bene enu rlu'cu stucu una'a urre stucu niyu cuna luyee bee bene enu rri'i eluhuexe.

⁵Latsu arqui'hua lu dimi, ñia utsu arqui'hua cuna lunú rlu'cuhua xne unila Diose: “Ye bichia nzua cuna li'ilu, nu leca bichia nu tsana arquia li'ilu.” ⁶Enze'e diquinu' arquia'ahua nia'ahua:

Diose Pa neca enu rri'i elietsa lua,

la lliquia lu xitse nú ri'inu bee bene li'á.

⁷Ullu'cu arqui'hua bee bene enu unibiya' luhua, li'ibeella enu uzete' li'ihua Stichia' Diose. Ullu'cu' arqui'hua xneca uhuañi beella, nú diquinu' arqui'beella uchili arqui' beella Diose tucu nú uyali arqui'hua Jesucristo.

⁸Jesucristo leca xunga che'e nú ti necanu tucu nú necanu neca' necanu nee nu le'ca necanu diqui tiambu. ⁹La zelahua núti zequienu li'ihua luye beenú sete' bee bene enu la zete' stichia' Jesucristo tucu nú necane. Mejora uzelahua nú ri'i Diose elietsa luhua para nú huañihua tucu nú necane luhuare nú chenalahua bee costumbre nú xi nu' modo nú acu bee bene nu xi leca modo nú acu bee bene, xne bee nucua' lecaxi rri'i elietsa lubee bene ante Diose.

¹⁰Lia'ahua rlu'cua'ahua tucu enu unguuti equie cuenda'ahua, li'inu necanu xi neca u'na nú rdetel' bene equie cuenda' stula bene tucu u'na nú leca modo acu bee ule'ya enu nzenalasca' ley. ¹¹Sino que ule'ya enu máse neca equie lubeelá bee ule'ya li'illa ruya'lla rene' bee nañi rdetella u'na liñi indu luhuare elu máse necachi para nú lecaxi naa bee bene equie cuenda' stula bee bene. Chequie bee nañi enu unguuti ze'e riqui beel' ru'u eyeche elu la nucua'a bee bene. ¹²Le'ca scua ulle'ca Jesucristo, ru'u eyeche Jerusalén, unguuti bee bene li'inu para nú lecaxi naa bee bene equie cuenda' rene'nu. ¹³Enze'e rqui'ña nú chenala'ahua Jesucristo mase nú ulua bee bene li'inu ru'u

eyeche Jerusalén, nu mase huaxi nú nehuana se'ca'ahua tucu nú ulle'canu. ¹⁴Xne lu iliulabe quie' la necane elu nehuañilia'ahua, sino que lia'ahua nellua'a quie'ahua tucu luhuare elu huañilia'ahua. ¹⁵Enze'e cuna elietsa' Jesucristo la tsana' arquia'ahua nú nia'ahua bedichia' nze'ca lu Diose xne nuacua' neca xi neca u'na nú rdete'ahua lunu, nu scua xucu' rua'ahua nú li'inu necanu Diose'ahua. ¹⁶La zañi'hua nú ri'i nze'cahua lube sa'hua nu ri'ihua elietsa lubeella lunú rlu'cuhua, xne nucua' neca xi neca u'na nú riu' arqui' Diose nú ri'i bene.

¹⁷Uzu'cu'hua nú rni bee bene enu rnibiya' luhua, nu sete' Stichia' Diose li'ihua ulu'cuhua ula'na lubeella xne li'ibeella ri'ya beella li'ihua nú la tsana' arqui'hua Stichia' Diose, xne li'ibeella dete'beella cuenda lu Diose nú xa uri'i beella luhua. Uri'ihua lunú ri'i nú ñia nzu arqui'beella, nu la ri'ihua lunú la yu' arqui' beella, xne lecaxi zibi' nú la zucu'hua nú rnibeella.

¹⁸Una'cuhua lu Diose equie cuenda'ru. Li'iru nediya'ru nú lecaxi nú necha neca rri'iru, nu niarqui'ru nú ye nú rri'iru, ri'irune tucu nú necane. ¹⁹Nacua nu zequiaea luhua nú nacu'hua lu Diose para nú la lea' liqui'nu nú nzelabi'ya li'ihua stucu bese.

**Uni Pablo nú cha nze'ca
lu cuenda' bee bene**

²⁰Diose enu rliqui' nú nzuxe arquia'ahua li'inu enu uri'i nú uhuañi Jesucristo lu eluti, Jesucristo enu rri'i ucu lia'ahua tucu nú rriucu tucu bene bee sanchi nu equie cuenda' nú ungutinu rlu'cula'ahua tucu inziu para nú riña'ahua lu Diose nu ze'e la atia'ahua. ²¹Li'inu ri'inu elietsa luhua lu yebeenú neca nze'ca para nú acahua ri'ihua tucu nú niarqui'nu. Li'inu ri'inu elietsa lua'ahua para nú aca'ahua tucu nú niarqui'nu equie nú neca tucu necatsela'ahua cuna Jesucristo, nu iLu Jesucristo riala nú lu'cu bee bene ula'na diqui tiambu! Amén.

²²Bee sa'a enu nzeli arquia'ahua Jesucristo la aca llene carta quie', pero nacua luhua nú la leehua equie cuenda' nú unia bezete' luhua lu carta quie'. ²³Nu le'ca ixiule'a luhua nú uchiu'ula sa'ahua Timoteo ni'cu', nu tunu chu riñalla ca'a che nzelabi'yarú li'ihua.

²⁴Uri'ihua saludar ye bee bene enu rnibiya' luhua li'ibeella enu sete' li'ihua Stichia' Diose cuna ye beelá bee sa'ahua enu nzeli arquia'ahua Jesucristo. Nu le'ca xe'la bee bene Italia saludo luhua. ²⁵Diose ri'i nú chanze'cae lu cuenda' yehua. Amén.

Carta nú uquie'e Santiago

1 Li'á Santiago, enu sibi' lu Diose cuna lu Jesucristo enu rnibiya', xe'laa saludo lu yehua enu nze'ta lu familia' bee bene Israel li'ihua enu uri'chia letse diqui lu iliulabe.

Elliebacu' nú nze'ta lu Diose

²Bee sa'a enu nzeli arquia'ahua Jesucristo, nialuhua nú ñia utsu arqui'hua añinzuca nú nu' huaxi nú secahua. ³Xne li'ihua nediya'hua chenu secahua xitse beenú secahua equie nú nzeli arqui'hua Jesucristo, scua acahua tsuta' arqui'hua nu riqui'hua lu beenú secahua. ⁴Pero ubi'yahua lunú utsuta' arqui'hua scua, nu zibi' nucua' para nú ri'ihua tucu nú rialane, che scua neza' lunú neca elliebacu'hua para nú lecaxi ri'i falta elliebacu'hua.

⁵Tunu nu' tátucuhua enu rri'i falta elliebacu', nacu' nze'ene lu Diose, xne siempre rdete' Diose elliebacu' lu ye bee bene nu la cánue. ⁶Pero rqui'ña nú nacu'llae lu Diose diquinu' arqui'lla nu la za' arqui'lla, xne bene enu sa' arqui' li'illa necalla xi neca inzatu' nú rri'i bii nú nza nze'ta. ⁷Nu bene enu neca scua, la ri'illa elliebacu' nú yuculla lunú unacu'lla lu Diose. ⁸Xne bene enu sa' arqui' scua, la

ri'illa tucutsia elliebacu' nu la challa tucutsia inziu.

⁹Bee sa'a enu nzeli arquia'ahua Jesucristo, li'ihua enu neca bee bene elitsi, ñia utsu arqui'hua equie nú nediya'hua nú huaxi secahua lu Diose. ¹⁰Pero li'ihua enu neca bee bene xene, ñia utsu arqui'hua nu aca lle'na arqui'hua lu Diose. Xne bee eluxene la di'yae tucu nú la di'ya bee quiee. ¹¹Li'ihua nediya'hua nú chenu rliñi bichia nu chiqui' nelee siqui' be' bichia huañi dañi, che sana' bee quie lue, scua unitilu nú ñia rnae. Le'ca esquie bene xene atilla añinzuca nú necalla xene, nu che scua ulaxu nú neca eluxene'lla.

Chenu rriqui' bee bene prueba nú seca beella

¹²Ñia nza lu cuenda' bene enu nzuta' arqui' nu rriqui'lla lunú nehuana secalla equie nú nzeli arqui'lla Jesucristo. Xne equie nú uriqui'lla scua yuculla premio nú rialalla, nu premio cua' neca elunehuañi nú leca xunga laxu tucu nú ucuaqui u'na Diose nú dete'nu lubee bene enu seca li'inu. ¹³Chenu rri'i taa tucuhua elliebacu' nú ri'illa nú necha neca, la ri'illa elliebacu'

nú Diose rdete' elliebacu' cua' lulla, xne Diose leca bichia nú rri'inu nú necha neca, nú le'ca la dete'nu elliebacu' lubee bene para nú ri'i bee bene nú necha neca. ¹⁴Xne le'ca li'i elliebacu' nú necha neca rri'i bee bene, ze'e nze'ta nú riu'u ana arqui' bee bene nú rri'i bee bene lunú necha neca. ¹⁵Nu equie bee elliebacu' nú necha neca cua' rri'i bee bene dula, nu chenu rnibiya'la dula cua' lubee bene, nzuquietsialla castiya'lla.

¹⁶Enze'e la zequienuhua le'catsia li'ihua bee sa'a enu nzeli arquia'ahua Jesucristo, enu chiqui' se'ca. ¹⁷Xne ye elliebacu' nze'ca nu ye beenú neca nze'ca nze'ta lu Diose, li'inu enu ureche'e ye nú nu' liñibe. Diose leca bichia nú che'enu lunú necanu, ye bichia rri'inu tucu nú rialane. ¹⁸Nu equie nú scua niarqui' Diose, uliqui'lanu lua'ahua elunehuañi nú leca xunga laxu lunu, xne nzelila arquia'ahua bedichia' nze'ca'nu, scua neca'ahua xi neca ebichi rlu lu beelá bee bene enu chili arqui' li'inu.

**Tunu neli rri'i bee bene
lunú niarqui' Diose**

¹⁹Nee lunú nediya'ahua bee nucua', bee sa'a enu nzeli arquia'ahua Jesucristo enu chiqui' se'caa, utsu tsiñahua para nú yene'hua chenu rni bee bene, nu la liala'hua nú chu nihua cuna nú chu leehua. ²⁰Xne bene enu rlee leca modo ri'illa lunú riu' arqui' Diose. ²¹Enze'e utsana' arqui'hua ye beenú lecaxi zibi', cuna ye beenú necha neca nu' lu iliulabe quie', nu uri'i lle'nahua arqui'hua uquia quiehua

Stichia' Diose nú ubenela'hua, xne equie cuenda'tsia bedichia' cua' nu' modo nú tsila'ahua.

²²Pero la yene' tsiahua Stichia' Diose uri'ihua tucu nú rnii, xne tunu la ri'ihua scua sequienuhua le'catsia li'ihua. ²³Xne bee bene enu riene'tsia Stichia' Diose nu la zucu'lla tucu nú rnii, li'illa necalla xi neca tucu bene enu ri'ya lu huana nú xa rnaalla. ²⁴Nu chenu nzalla uzañi'lla xa rnaalla. ²⁵Pero bene enu la zañi' lunú ubene'la'lla, máselá rcua'nalla nú ri'illa lunú rni Stichia' Diose nu lecaxi ri'i falta, xne bedichia' cua' neca nú sila'a lia'ahua lu dula. Benecua' nzuta' arqui'lla rri'illa lunú rnibiya' Diose, nu ñia tsu arqui'lla ri'illa bee nucua'.

²⁶Tunu nu'hua enu rri'i elliebacu' nú neli nzequiee inziu' Diose, pero ni'teme' la bi'yalla lunú rnilla, sequienulla le'ca tsia li'illa nu lecaxi zibi' nú rri'illa elliebacu' nú nzequiella inziu' Diose che. ²⁷Xne para Diose, enu neli nzequie inziu'nu nu la ria'lla ni' tucu nú necha neca, li'illa rri'illa elietsa lubee endu' zaqui, cuna lubee una'a enu unguti niyu' chenu nu' nú seca la'cha' beella, nu ri'yalla li'illa lu beenú necha neca, nú nu' lu iliulabequie'.

**La cañi bee bene xa rri'i
bee bene lu sa' bene**

2 Nee, bee sa'a enu nzeli arquia'ahua Jesucristo enu rnibiya', la cañihua xa ri'ihua lubee bene. ²Te zucua'ahua, chenu neyete'sa'hua liñi indu elu riete'sa'hua, nu riña tucu bene xene

enu nutu laquie fiñu luhua nu nu' bi'i oro yaalla, nu che riña tucu bene elitsi enu nutu laquie uxu luhua. ³Chequie máse ri'i casohua bene xene enu nutu laquie fiñu nu nihua lulla: "Uzucu ca'a elu neca nze'ca." Nu nihua lu bene elitsi ze'e: "Uzucu lu'tsia urre uzucu lu yuu cua'." ⁴¿Xie' la cañihua nú rri'ihua lubee bene chenu rri'ihua scua la? Chenu rri'ihua scua se'tahua bee bene cuna elliebacu'hua nú necha neca.

⁵Uri'ihua beya' bee sa'a enu nzeli arquia'ahua Jesucristo enu chiqui' se'ca. Diose ucañi bee bene elitsi lu iliulabe quie' para nú chiqui' tsu teneli arqui'beella lunu, nu riña beella elu rnibiya'nu, tucu nú ucuaqui u'nanu nú dete'nu lubee bene enu seca li'inu. ⁶Nu li'ihua lle'natsia rri'ihua caso bee bene elitsi. ¿Xie' la neca bee bene xene enu máse rri'i nú nehuana secahua nu ruya' beei li'ihua lubee usticia la? ⁷Nu ¿xie' la neca bee bene xene enu máse rni bedichia' nú necha neca equie cuenda' Jesucristo la?, nu equie cuenda' li'inu neca'ahua bene' Diose.

⁸Nee quie tunu li'ihua rri'ihua tucu nú rnibiya' ley Diose, tucu nú niquie lu ichi' stichia'nu elu rni: "Uzeca bee bene tucu nú secalu li'ilu rri'i nze'calu che." ⁹Pero tunu la ri'ihua tucu necatse lubee bene, rri'ihua dula che, xne la zucu'hua tucu nú rni ley' Diose. ¹⁰Xne tatse bene enu sucu' yee nú rni ley' Diose, pero nu' tucu nú la zucu'lla lu cuenda' ley cua', uri'illa fallo lu yeene che. ¹¹Le'ca li'i Diose enu uni: "La lu'cu niyu stucu una'a, nu

la lu'cu una'a stucu niyu", le'ca uninu: "La úti bee bene sa' bene." Nu tunu la lu'cu niyu stucu una'a nu la lu'cu una'a stucu niyu, pero ruutilla bee bene, scua la zucu'lla lunú rni ley. ¹²Enze'e uni'hua nu uri'ihua xi neca bee bene enu neli dete' cuenda lu Diose, tucu nú rni stichia'nu nú sila'a lia'ahua lu dula. ¹³Xne bee bene enu la hua'a arqui' bee sa', le'ca lahua'a arqui' Diose li'ibeella chenu hualunue lu cuenda' bee bene, pero bee bene enu rua'a arqui' sa' lecaxi lliquilla chenu riña bichia ze'e.

Rqui'ña nú ri'i bee bene tucu nú nzeli arqui'lla Diose

¹⁴Bee sa'a enu nzeli arquia'ahua Jesucristo enu chiqui' se'ca, nee nia luhua lecaxi zibi' tunu rni tucu bene nú nzeli arqui'lla Diose nu la ri'illa tucu nú rninu, ¿xie' nu' modo tsila'alla equie nú rnilla nú nzeli arqui'lla scua la? ¹⁵Te zucu'ahua tunu nu' taa tucu'ahua sia niyu urre sia una'a rri'i falta xuculla, urre beenú aculla tucu bichia.

¹⁶Chequie ni tucuhua lubeella: "Uquia nze'cahua nu la tsi'hua nú nucuaa nu la lia'na'hua", pero tunu la dete'hua nú secala'cha' beella; ¿lecaxi zibi' nú unihua scua lubeella che? ¹⁷Le'ca esquie tunu rni tucu bene nú nzeli arqui'lla Diose nu la ri'illa tucu nú rninu, lecaxi zibi' nú rnilla nú nzeli arqui'lla Diose che.

¹⁸Hasta nu' bene enu ni: "Li'ilu rnilu nú nzeli arqui'lu Diose, nu li'á rri'á tucu nu niarqui'nu." Nee ulube' tucu nú nzeli arqui'lu Diose sin nú ri'ilu tucu nú rninu, che lubea tucu nú nzeli arquia li'inu xne rri'a tucu

nú rninu. ¹⁹Rri'i nze'calu nú nzeli arqui'lu nú nu' tucutsia Diose. Pero hasta bee beze'lu nzeli arqui' nú nu' tucutsia Diose nu hasta recatse'tse' beei xiqui beei. ²⁰Enze'e la aca netundulu, uri'i beya' tunu nzeli arqui' bene Diose nu la ri'illa tucu nú niarqui'nu, lecaxi zibi' nú nzeli arqui'lla scua che. ²¹Benea'ahua enu udetela tuxie Abraham, uri'i Diose nú necalla xi neca tucu bene enu la lu'cu dula, xne uzucu'lla nú rni Diose chenu uninu lulla nú nze utilla endu'lla Isaac para dete'lla li'i xi neca tucu u'na lunu. ²²Ulañi'hua nee, equie nú uyali arqui' Abraham Diose, nu equie nú uri'illa tucu nú niarqui'nu, scua unga achee nú diquinu' arqui'lla uyalí arqui'lla li'inu. ²³Scua uyalu tucu nú niquie lu ichi' Stichia' Diose elu rni: “Uchili arqui' Abraham Diose, enze'e uyucu arqui' Diose li'illa xi neca tucu bene enu né ri'i dula.” Nu scua uyulu bee bene li'illa nu necalla xi neca tucu enu rquiete' Diose. ²⁴Ulañi'hua nee, nú rri'i Diose nú neca bee bene xi neca tucu bene enu la lu'cu dula equie nú rri'i bene tucu nú niarqui'nu, nu lacane equie nú nzelitsia arqui'lla li'inu. ²⁵Tucu nú unga lu una'a huexe enu lee Rahab uri'i Diose nú necanchu xi neca tucu bene enu la lu'cu dula, xne uri'inchu tucu nú niarqui'nu chenu udete'nchu ni'nchu ucachi'lu chiucu bene Israel enu uyatsi'ña lachinchu, nu uri'inchu elietsa lubeella nú ubenchila' beella stucu inziu rene. ²⁶Xne xi neca tucu bene enu la lu'cu espíritu la nehuañilla, le'ca scua necane tunu nzelitsia arqui'

bene Diose, nu la ri'illa tucu nú niarqui'nu lecaxi zibi' nú rni bene nú nzeli arqui'lla li'inu che.

Lu cuenda' nú xa rri'i lu'chi bene

3 Bee sa'a enu nzeli arquia'ahua Jesucristo, le'ca nia luhua nú la aca huaxihua enu niarqui' nú aca bee ulaxcuela enu zete' Stichia' Diose lubee bene, xne rri'ihua beya' nú lia'ahua enu sete'ahua Stichia' Diose lubee bene másela juerte chiu'ulue lu cuenda'ahua tunu la ria'ahua tucu nú rialane. ²Ye'ahua nu' chenu rri'i dula ana lua'ahua, neequie tunu nu' enu lá ni ni' tucu bedichia' nú necha neca li'illa necalla tucu bene enu chiqui' neca nze'ca lu Diose, nu le'ca recalla rnibiya'lla lulla. ³Li'ihua nediya'hua nú chenu rdu'ahua freno ru'u bee huayu para nú zucu' beé lunú niarquia'ahua, scua aca'ahua nibiya'ahua lubeé. ⁴Le'ca esquie necane lu cuenda' bee barco, añinzuca nú llenee nu añinzuca nú juerte si'ña bii, pero cuna tucu icu' me' nú nzucu rqui' barco, icu' quie' lee timón, cuna icu' quie' senu bene barco catse elu niarqui'lla. ⁵Le'ca scua neca lu cuenda' lu'chi bene, me'tsiae pero hasta bee bedichia' nú máse necha neca xiu'ru ru'u bene. Lu'chi bene neca xi neca tucu xila me', pero cuna tucu xila me'tsia nu'modo quiee quii diqui' neca tucu dañi. ⁶Lu'chi bene neca xi neca tucu quii, necane xi neca tucu elu nu' bee nú necha neca, nu tunu la bi'ya'ahua lu'chia'ahua rnitilue lia'ahua, che diqui' lunú nehuañia'ahua chiu'u bee bedichia' nú necha neca rua'ahua nú nze'ta ebila.

⁷Lia'ahua nediya'ahua nú ye clasia' bee nañi xi neca bee iñi, bee serpiente, cuna bee nañi enu nu' lu inzatu' nu' modo reca maxu beef, nu rri'i maxula bene iliulabe beé.
⁸Pero lecati aca ri'i maxu lu'chi. Lu'chi bene neca xi neca tucu nú leca modo aca maxu, necane xi neca tucu nú chee nu' veneno nú ruuti bene.
⁹Cuna lu'chia'ahua rnia'ahua bedichia' nze'ca lu Diose Pa liñibe, nu le'ca li'i rnia'ahua bedichia' chi'qui' lu sa'ahua enu ureche' Diose tucu nú rnanu.
¹⁰Nu ru'ahua xiu'u bedichia' nze'ca cuna bee bedichia' chi'qui', bee sa'a enu nzeli arquia'ahua Jesucristo, la yala nú ria'ahua scua.
¹¹Li'ihua nediya'hua nú elu rliñi inza, leca modo nú liñi inza nze'ca cuna inza nú neribi.
¹²Le'ca scua la ayu aceituna lu aca higuera, nu la ayu higo lu aca uva, nu le'ca la liñi inza nze'ca elu rliñi inza nú neribi.

**Elliebacu' nú neli neca
nze'ta lu Diose**

¹³Tunu nu' tatucuhua enu si' nú reca nu rri'i beya' ye nú neca Stichia' Diose, rqui'ña nú aca lle'na arqu'i'lla tucu nu rialane, scua lube'lla lunú reca elliebacu'lla.
¹⁴Pero tunu chiqui' ria arqu'i'hua lubee sa'hua nu ye nú niarqui'hua para li'itsiahua, lecaxi zibi' nú nelliñahua nú recahua Stichia' Diose, sino que sequienhua bee bene che.
¹⁵Nu bee clasia' bee elliebacu' cua' la ye'ta bee nucua' lu Diose, nze'tatsia bee nucua' lubee bene iliulabe quie', cuna lu beze'lu.
¹⁶Xne elu nu' beenú ria arqu'i' bee bene lusa' bene cuna nú niarqui'tsia

bee bene stene'lla para li'itsialla, ze'e nu' xuu cuna ye beenú necha neca.
¹⁷Pero bee bene enu reca elliebacu' nú nze'ta lu Diose, rluti rcua'nalla nú huañi nze'calla lu Diose, cuna nú nzuxe arqu'i'lla lubee bene, cuna nú nze'calla lubee bene, cuna nú ñia nzuquie arqu'i'lla bee bene, nu rua'a arqu'i'lla bee bene, nu rri'illa nú neca nze'ca lu ye bee bene, nu ri'illa tucu necatse lu ye bee bene. Nu le'ca sa'alulla lunú rrnilla.
¹⁸Bee bene enu rcua'na nú la liu bee bene rcua'na beella nú huañi nze'ca beella cuna bee bene, scua nehuañi beella tucu nú niarqui' Diose nú huañi beella.

**Rqui'ña nú aca lle'na
arquia'hua lu Diose**

4 ¿Cá nze'ta nú rlehua lubee sa'hua cuna nú rliuhua? ¿Xie' la ye'ta nucua' lu elliebacu' nú necha neca rri'ihuala? ²Li'ihua rle'hua nú lu'cuhua lunú la lu'cuhua, nu hasta ruuti sa'hua para nú lu'cuhua lunú niarqui'hua, le'ca ríaa arqu'i'hua lubee sa'hua, nu tunu la lu'cuhua lunú rlu'cu bee sa'hua, chequie rquixie nú rlehua lubee sa'hua, cuna nú rliuhua, pero neli nú la lu'cuhua lunú niarqui'hua, xne la nac'u'huane lu Diose.
³Nu tunu rnacu'hua lunú niarqui'hua lu Diose, la yucuhuane xne la nac'u'huane lunu tucu nú neca nze'ca, rnacu' tsiahuane lunu para nú huañitsiahua tucu nú neca elliebacu'hua nú necha neca.
⁴Li'ihua la aca neli nú secahua Diose. ¿Xie' la ri'ihua beya' nú tunu nzequiehua lunú necha neca nu' lu iliulabe quie', sucu' ru'uhua

lu Diose la? Enze'e enu niarqui' nú chequie beenú necha necha nu' lu iliulabe quie', che le'ca li'illa rri'illa nú sucu' ru'ulla lu Diose. ⁵Xne la lianitsia lu ichi' Stichia' Diose elu rni: “Espíritu Santo nú udu' Diose arquia'ahua, chiqui' niarqui'nu nú zeca'ahua Diose.” ⁶Nu chiqui' huaxi seca elietsa nú rliqui' Diose lua'ahua, tucu nú nequie lu ichi' stichia'nu elu rni: “Diose rri'i elietsa lubee bene enu lle'na arqui' lunu.” Pero la ri'i casonu bee bene enu nelliña. ⁷Enze'e uzu'cu'hua Stichia' Diose. Utsuta' arqui'hua para nú la ri'i beze'lu ana luhua, nu scua tsana' arqui' li'ihua. ⁸Uquiabicahua lu Pa'ahua Diose, nu che ri'i casonu li'ihua. Utsana' arqui'hua stulahua, li'ihua bee bene enu rlu'cu dula, li'ihua enu sa' arqui' nú nzequie inziu' Diose, diquinu' arqui'hua uquia quiehua inziu'nu. ⁹Uquianu arqui'hua nu utsu nehuana arqui'hua, nu una'hua equie cuenda' stulahua. Luhuafe nú xi'chihua una'hua, nu luhuafe nú ñia nzu arqui'hua utsu nehuana arqui'hua. ¹⁰Aca lle'na arqui'hua lu Pa'ahua Diose, nu li'inu zucu' ayanu li'ihua.

La qui'ña nú ze'tahua bee sa'hua

¹¹Bee sa'a enu nzeli arquia'ahua Jesucristo, la ze'tahua bee sa'hua, xne bee bene enu se'ta bee sa' nu rlualulla lu cuenda' bee sa'lla, li'illa se'talla bee sa'lla cuna nú rlualulla lunú necha ley' Diose. Nu tunu li'ihua rlualuhua nú necha ley' Diose, li'ihua rnibiya'hua lu ley' cua', luhuafe nú zucu'hua lunú rnii. ¹²Tucutsia Diose udu' ley' nu li'inu necanu enu rlu'cu nú rnibiya'

para nú tsila'anu bee bene, cuna nú dete'nu castiya bee bene. Pero li'ilu, ¿ti necalu nú rlualulu lu cuenda' bee sa'lu?

La uti'lliña bene lunú ri'illa ye'e

¹³Nee uquie'e diacahua li'ihua bee enu rni: “Nee urre ye'e cha'ahua tucu ciudad urre stucu ciudad, nu ze'e llua'ahua tucu lana nu ria'ahua bee berexe, cuna nú ria'ahua ana huaxi dimi”, ¹⁴nu ni' teme' la ri'ihua beya' xi nzu aca ye'e. Xne elunehuañi nú rlu'cua'ahua necha xi necha gú, nú nu'e terratu nu sterratutsia rnitilue. ¹⁵Lunú riala nihua: “Tunu liqui' Diose nú nehuaña'ahua ri'ahua ninguie' urre ri'ahua ninguie.” ¹⁶Pero li'ihua máse nzequiehua stichia'hua nú nelliña, nu ye bee clasia' bee elulliña cua' necha necha. ¹⁷Enze'e bene enu nediya' nú xi riala ri'illa nu la ri'illae, rri'illa dula che.

Equie nú xa zeca bee bene xene

5 Nee, iuquie'e diacahua li'ihua bee bene xene! ¡Una'hua nu ubixialihua equie nú nehuana zecahua nu cuna nú tsi'hua! ²Bee eluxene'hua rlxulane, nu bee xucuhua racula bee belala'. ³Bee oro cuna bee plata nú rlu'cuhua ruchila bee. Ye bee nucua' rlube' lunú necha rri'ihua, nu le'ca li'ibee nucua' la'xue li'ihua tucu nú rri'i quii. Lecaxi zibi' nú uduche' tsiahua eluxene cua' para bichia chenu hualu Diose lu cuenda' bee bene. ⁴Ubi'yacuruhua, bee moso' enu uri'i riña'hua, rnacu' beella luhua nú ixihua beella, nu hasta Diose enu rlu'cu ye nú rnibiya' ubene'la'

lunú xanabitsi beella. ⁵Li'ihua nehuañihua lu iliulabe quie' tucu nú niarquí'tsiahua nu rri'ihua tucu nú riu' arqui'hua, pero rri'itsiahua nú rru'cu nucua' arqui'hua lunú lecaxi zibi' para bichia nú hualu Diose lu cuenda' bee bene. ⁶Nu hasta ucua'nahua xa modo ungu' bee bene enu lecaxi uri'i sin nú azucu' ru'u beella luhua chenu ungu' beella.

Rqui'ña nú lu'cu bee bene paciencia chenu rnacu' beella lu Diose

⁷Nee, bee sa'a enu nzeli arquia'ahua Jesucristo, ulu'cuhua paciencia hasta bichia chenu riña Jesucristo enu rnibiya' lua'ahua. Tucu nú rlu'cu bene enu rri'i riña' lu yuu paciencia desde chenu rquixie rluca quiu nu hasta nú rdete ru'u quiu para nú riuculla ula'cu'lla. ⁸Le'ca scua li'ihua ulu'cuhua paciencia nu la llaca'hua, xne la lea' nú nze'ta zeca Jesucristo enu rnibiya' lua'ahua.

⁹Le'ca nia luhua nú la xana bitsia'hua lu cuenda' bee sa'hua para nú la yalahua ni' tucu castiya, xne axula nzu nú riña li'inu enu hualue lu cuenda' bee bene. ¹⁰Uquia quiehua tucu nú uri'i bee profeta enu udiixiule'e tucu nú uní Diose lubeella, ulu'cu beella paciencia nu uriqui' beella lunú nehuana ulle'ca beella. ¹¹Li'ihua nediya'hua nú ñia nza lu cuenda' bee bene enu rriqui' lunú nehuana seca. Ubene'la'hua xa uriqui' Job lunú nehuana ulle'calla, nu le'ca nediya'hua xa uri'i Diose lulla chenu ulaxu nú ulle'calla scua, xne

rua'a arqui' Diose bee bene cuna nú rlu'cu arqui'nu bee bene.

¹²Pero ubi'yahua chenu rdichia'hua urre chenu rri'ihua tucu compromiso cuna bee bene, la yala nú quie'ehua Diose, urre stucu nú rene para nú la zecahua castiya'hua, mejora uni'hua nú esquie necane tunu esquie necane, nu uni'hua nú la acane esquie tunu lacane esquie.

¹³Tunu nu'hua enu nehuana seca, rqui'ña nú nacu'lla lu Diose para nú ri'inu elietsa lulla. Nu tunu ñia nzu arqui' tatse tucuhua ula nze'e canto lu Diose. ¹⁴Nu tunu nu'hua enu riti, bixia nze'e bee sa'ahua enu rnibiya' leta bee sa'ahua enu nzeli arquia'ahua Jesucristo, para nú nacu' beella lu Diose equie cuenda' bene ze'e nu du' beella aceite equie bene ze'e lunú lee Jesucristo. ¹⁵Chenu rnacu' beella lu Diose equie cuenda' bene enu riti ze'e nu nzu teneli arqui'beella lunu, che yeca' bene enu riti ze'e, nu ri'iyeca Diose li'illa, nu tunu nu' dula nú uri'illa ri'i Diose perdona li'illa. ¹⁶Enze'e utsiru'uhua bee dula nú uri'ihua lubee sa'hua, nu una'cu'hua lu Diose lu cuenda' bee sa'hua para nú yeca'hua. Xne bene enu neca nze'ca arqui' lu Diose chenu rnacu'lla lunu, rri'inu caso li'illa. ¹⁷Tucu nú ulle'ca profeta Elías ungalla tucu bene tucu nú neca'ahua, chenu uziquiella nu unacu'lla lu Diose nú la laca quiu, che né laca quiu chuna lana arula'. ¹⁸Nu chenu unacu' zecalla lu Diose nú laca quiu, che uquixie nú ulaca quiu nu unguyu' zeca beenú unguyu' luyuu.

¹⁹Bee sa'a enu nzeli arquia'ahua
 Jesucristo, tunu nu' ta tucuhua enu
 xiu'uchu inziu' Diose, nu stucuhua
 ri'i nú benchila' zecalla inziu' Diose.
²⁰Uri'ihua beya' nú tatse tucuhua

enu rri'i nú benchila' zeca tucuhua
 inziu' Diose para nú la chequia'lla
 inziu nú necha neca, utsila'alla
 nze'e lu castiya' nze'e nu uri'illa nú
 unga perdona huaxi stula nze'e che.

Carta tucu nú uquie'e San Pedro

Uxe'la San Pedro saludo

1 Li'á Pedro neca tucu apóstol Jesucristo, rquie'a carta quie' luhua enu uri'chia letse diqui bee luhuare, nu nucua'a lubee iliu Ponto, Galacia, Capadocia, Asia nu Bitinia, ²li'ihua enu ucañi Diose Pa'ahua desde hua'tu tucu nu niarquí'nu nú acane. Equie cuenda' Espíritu Santo'nu uri'inu nú aca'ahua bee bene'nu para nú zucu'hua nú rninu para nú lecaxi nahua lunu equie cuenda rene' Jesucristo. Chiqui' ri'i Diose nú cha nze'ca lu cuenda'hua cuna nu liqui'nu nú nzuxe arqui'hua.

Elunehuañi nú nellua'a quia'ahua lu Diose

³Che'tsa Diose pa' Jesucristo enu rnibiya' lua'ahua nú equie nu ulu'cu arqui'nu lia'ahua rlu'cula'ahua elu nehuañi nú necuqui neca equie cuenda' nú uhuañi zeca Jesucristo, nu chiqui' llene neca lunú nzuquie arquia'ahua lu Diose, ⁴nú yucua'ahua rencia nú nuche'e Diose para lia'ahua liñibe, nu neca rencia quie' nú lecaxi na diqui tiambu, nu la uchune nu leca bichia nú nitilue. ⁵Equie nu nzeli arqui'hua

Diose, li'inu rriucunu li'ihua cuna poder'nu para bichia chenu riña nú laxu iliulabe, che ri'i ye bee bene beya' nú uri'ilanu perdona stulahua.

⁶Enze'e ñia utsu arqui'hua, añinzuca nú zecahua huaxilu beenú nehuana zecahua lle'na tiambu.

⁷Xne equie beenú nehuana zecahua scua acachee nú neli nzeli arqui'hua Diose tucu nú rri'inu bene oro nú rdu' benene luquii para nú bi'yalla tunu neli nú necane puro oro. Oro cua' necahua' nú nitilu, pero máse seca nú chili arqui' bene Diose mase secalla lunú secalla xne leca bichia nú laxu nucua'. Nu lunú nzu tenelí arqui'hua scua, rialane ula'na cuna nú aca neca equiee bichia chenu riña Jesucristo.

⁸Li'ihua la lañi'hua Jesucristo pero secahua li'inu, nu nee nzeli arqui'hua li'inu añinzuca nú la lañi'hua li'inu, nu chiqui' llene neca nu ñia neca lunú ñia nzu arqui'hua hasta nú la llela'hua xa nihua, ⁹xne nediya'hua nú equie nú nzeli arqui'hua Jesucristo scua, utsila'la Diose li'ihua lu dula.

¹⁰Hasta hua'tu ucua'na bee profeta cuna nú uzete' beella xa ri'i beella beya' nú tsila'a Diose bee bene, nu uni beella ta nú ri'i Diose

cuna li'ihua equie nú ñia necanu.

¹¹Equie cuenda' Espíritu' Cristo ungabiya' bee profeta hasta hua'tu nú nehuana zecanu, nu lu'cunu nú rnibiya'nu, che ucua'na beella nú ri'i beella beya' ta bene enu zeca scua nu xunga aca ye bee nucua'.

¹²Pero uri'i Diose nú ungabiya' beella nu la neca nú uni beella para li'itsia beella, necane para lia'ahua. Nu nee rri'ilahua beya' nucua' equie cuenda' bee enu rixiule'e bedichia' nze'ca' Jesucristo cuna equie nú rnibiya' Espíritu Santo nú nze'ta enza liñibe. Bee nucua' neca nú chiqui' niarqui' bee ángele nú ri'i beenu beya' nú xa mero necane.

Diose niarqui' nú huañi nze'cahua

¹³Enze'e ucua'atsiñahua nu ri'ihua elliebacu' nú sibi', uzu'cu'luhua lunú liqui' Diose luhua equie nú nze'canu bichia chenu nze'ta zeca Jesucristo. ¹⁴Tucu nú neca bee Lli'ñi Diose enu sucu' nú rninu, la huañia'hua tucu nú uhuañihua hua'tu ante nú chuluhua Diose. ¹⁵Diqiu tiambu nú nehuañihua ucua'nahua nú huañihua nú lecaxi natsa arqui'hua lu Diose, xne li'inu necanu enu leca xi natsa, nu la lu'cunu dula. ¹⁶Nu lu ichi' Stichia' Diose rni: “Uhuañihua nú lecaxi natsa arqui'hua lua, xne li'á neca enu lecaxi natsa arqui'.”

¹⁷Nee tunu rlualeehua “Paa” Diose, li'inu enu la cañi chenu rlualunue lu cuenda' bee bene tucu nú rri'i beei, enze'e rqui'ña nú lu'cuhua ula'na lunu diqiu tiambu nú nehuañihua lu iliulabe quie'.

¹⁸Xne li'ihua nediya'hua nú utsila'a Diose li'ihua lubee costumbre nú

utsa'na bee bene'hua enu udetela luhua, neca costumbre cua' nú lecaxi zibi', nu li'ihua nediya' nze'ca'hua nú né yaxu ni' cuna oro nu ni' cuna plata nú utsila'a Diose li'ihua. ¹⁹Unga nucua' equie cuenda' rene' Jesucristo nú ñia neca, nú uri'chia chenu ungutinu xi neca tucu sanchi lla'na enu unguuti bene equie cuenda' dula, nu lecaxi naí nu leca cá nedi'quí. ²⁰Hasta hua'tu chenu lasca' quixie iliulabe udu' Diose Jesucristo para nú zecanu scua, nu scua ulle'calanu, xne secanu li'ihua. ²¹Equie cuenda' Cristo nzeli arqui'hua Diose, li'inu enu uri'i nú uhuañi zeca Cristo, nu udete'nu nú rnibiya'nu, nu nee itá nzeli arqui'hua Diose nu nzu arqui'hua lunu.

²²Nee lunú rri'ihua tucu nú rni Stichia' Diose nú neli neca, lecaxi natsa arqui'hua lunu para nú zecahua bee sa'hua tucu nú riala nú zecahua beella, Enze'e rqui'ña nú diqinu' arqui'hua uzecahua bee sa'hua. ²³Xne rlu'culahua elu nehuañi nú necuqui neca nu elunehuañi cua' la ye'ta nucua' por tucu bene enu laxu, nze'ta nucua' equie cuenda' Stichia' Diose nú nehuañi nu leca bichia nú laxu.

²⁴Xne lu ichi' Stichia' Diose rni:

Ye bee bene iliulabe neca xi
neca bee huañi dañi,
nu eluxene' beei neca xi neca
quiee nú nu' lue.

Ribichi huañicua' nu sana' quiee
nú nu' lue;

²⁵pero Stichia' Diose leca bichia
nú laxue.

Nu ningüie' neca bedichia' nze'ca'
Jesucristo nú ubene'la'hua.

2 Enze'e, utsana' arqui'hua ye beenú necha neca, cuna ye beenú sequienuhua bee bene, nu la lube'tsiahua lunú la necahua, utsana' arqui'hua nú ría arqui'hua lubee sa'hua, cuna beenú niquichia'hua lubee sa'hua. ²Tucu nú neca bee endu' e'ne' enu chiqui' rlia'na' hue' chi', scua ucua'nahua nú ri'ihua beya' Stichia' Diose bichia por bichia para nú scua tsila'a Diose li'ihua, ³tunu neli nú nediya'hua nú chiqui' nze'ca Diose.

**Cristo neca xi neca tucu
quiee nú nehuañi**

⁴Uquiaquiehua Jesucristo, li'inu enu neca xi neca quiee nú nehuañi. Nú uhuachú bee bene iliulabe, pero para Diose li'inu necanu enu máse seca, nu ucañi Diose li'inu. ⁵Nu nee, equie nú necalahua bee bene' Jesucristo, lu Diose necahua xi neca bee quiee nú nehuañi para nú recache' indu'nu, li'ihua necahua ule'ya Santo'nu, xne añinzuca nú nehuaana secagua equie cuenda' Jesucristo pero rri'ihua tucu nú riu' arqui' Diose.

⁶Lu ichi' Stichia' Diose rni:

Li'á sucua tucu quiee eyeche

Sión,

neca quiee quie' nú mase sibi',
nú uyañila nú chiqui' huaxi seca,
nu enu chili arqui' li'i leca

bichia nú tu' nze'e.

⁷Para li'ihua enu nzeli arqui'hua Jesucristo, li'inu necanu xi neca tucu quiee nú mase seca; pero para bee bene enu la chili arqui' li'inu lecaxi seca nucua', scua uyalu tucu nú nequie lu ichi' Stichia' Diose elu rni:

Quiee nu ulua u'na bee bene
enu rreche'e ni'i,
quiee ze'e neca nú máse uzibi'
nú ungache'e simiendo' ni'i
ze'e.

⁸Nu le'ca scua uyalu tucu nú niquie stucu luhua lu ichi' Stichia' Diose elu rni:

Li'inu necanu xi neca quiee nu
xica cuchiu' bene nu rri'i nú
rle bene.

Seca beei scua xne la zucu' beei stichia'nu, nu scua rialu nu rni Diose nú seca beei.

⁹Pero li'ihua ucañila Diose li'ihua para nú acahua bene'nu, nu li'ihua necalahua ule'ya enu sibi' lunu, li'inu enu neca arre lua'ahua. Li'ihua lecaxi nahua lu Diose, nu ucañinu li'ihua para nú chetixiule'ehua lunú chiqui' ñia rri'i nze'canu, li'inu enu uhua li'ihua lu inziu nú necha neca para nú chequiehua inziu'nu nú chiqui' ñia neca. ¹⁰Hua'tu chenu lasca' chuluhua Diose nu lá acahua bene'nu, pero nee necalahua bene'nu, le'ca lá chuluhua nú rlu'cu arqui' Diose li'ihua hua'tu, pero nee nediya'hua nú rlu'cu arqui' Diose li'ihua.

**Xa rqui'ña nú huañi bee bene
enu nzeli arqui' Diose**

¹¹Bee sa'a enu nzeli arquia'ahua Jesucristo enu chiqui' se'ca, ziquia luhua tucu nú nzela'ahua lu iliulabe quie' chiucu bichia, la tsana'hua nu ri'i elliebacu' nú necha neca ana luhua, xne bee elliebacu' nú necha neca cua' chiqui' rri'i nucua' nú tsana' arqui' bene inziu' Diose. ¹²Uhuañi nze'cahua lubee

bene enu la chulu Diose. Nu scua añinzuca nú nee se'ta beei li'ihua nú necahua enu necha rri'i, pero chenu lañi'beei nu neca nze'ca lunú rri'ihua che dete' beei ula'na lu Diose bichia chenu dete' bee bene cuenda lu Diose.

¹³Equie nú nzeli arqui'hua Jesucristo uzu'cu'hua lunú rni ye bee usticia lu iliulabe quie'. Uzu'cu'hua lunú rni presidente enu rnibiyá' lu nación'hua, ¹⁴cuna stichia' gobernador enu uxe'lalla para nú dete' beella castiya bee enu necha rri'i nu zucu' aya beella bee bene enu rri'i nú neca nze'ca. ¹⁵Xne Diose niarqui' nú ri'ihua nú neca nze'ca para nú bee enu lacali cuna bee enu la ri'i beya' leca modo nú ze'ta beei li'ihua.

¹⁶Li'ihua nu' modo ri'ihua tucu nú niarqui'hua, pero la aca equie cuenda' nucua' nú ri'ihua nú necha neca sino que uri'ihua tucu nú riala rri'i bee bene enu neca bee bene' Diose. ¹⁷Ulu'cuhua ula'na lu ye bee bene tucu nu rialane. Uzecahua bee sa'ahua enu nzeli arqui' Jesucristo, ulliquihua Diose, nu ulu'cuhua ula'na lu presidente enu rnibiyá' lu nación'hua.

Uriqui'hua lunú nehuana secahua

¹⁸Li'ihua bee mozo', uzu'cu'hua ye beenú rni patron'hua, nu la ri'ihua scua lubee patron enu rri'i nze'catsia luhua nu ru'a arqui' li'ihua, sino que le'ca uri'ihua scua lubee patrón enu necha rri'i luhua. ¹⁹Xne neca nze'ca tunu riqui' tucu bene lunú zecalla añinzuca nu la yala nu zecalla scua, sino que equie nú rri'illa lunú niarqui'

Diose. ²⁰Lecaxi zibi' tunu nehuana zecahua lunú necha rri'ihua, pero tunu nehuana zecahua equie nú rri'ihua nú neca nze'ca nu rriqui'hua lunú nehuana secahua scua, nucua' riu' arqui' Diose. ²¹Xne para nucua' ubixia Diose li'ihua, nu le'ca chiqui' nehuana ulle'ca Jesucristo equie cuenda' li'ihua, nu scua uzete'nu li'ihua nú xa riala huañihua para nú chequiehua inziu'nu. ²²Li'inu leca xunga uri'inu dula, nu ni' tucu eluquichia' lá ninu. ²³Chenu uni bee bene bedichia' nu necha neca lunu, né cuaquinu ni'tucu bedichia' nú necha neca, chenu uri'i beei nú nehuana ulle'canu, nu né ninu nú a ixiu beei lunú rri'inu beei li'inu, sino que utsa'nanu yeene lu Diose, li'inu enu rri'i elu usticia tucu nú rialane. ²⁴Jesucristo nehuana ulle'canu lu cruse equie cuenda' stula'ahua para nú tsila'anu lia'ahua lu dula para nú huañia'ahua tucu nú niarqui' Diose nu equie nú udi'qui Jesucristo lu cruse, lecaxi na'ahua lu Diose. ²⁵Hua'tu li'ihua unghua xi neca bee sanchi enu uniti, pero nee ubenchila'hua lu Jesucristo, li'inu enu seca li'ihua nu rriucunu li'ihua xi neca tucu bene enu rriucu bee sanchi.

Xa rqui'ña nú huañi bee bene enu nechiala

3 ¹⁻²Le'ca scua li'ihua bee una'a enu nechiala, uzu'cu'hua nu rni bee niyu'hua para nú tunu tucu bee niyu'hua enu la niarqui' chili arqui' Stichia' Diose, pero chenu lañi'beei nú xa nehuañihua, nu rlu'cuhua ula'na lubei. Che

chili arqui'beeí Stichia' Diose sin nu nihua lubeei. ³Equie nú suche'hua la dete xe'ta'hua, la tsuche' xe'ta'hua equiehua, nu la ri'itsiahua elliebacu' nú qui'ñahua puro nú neca bee oro urre utuhua puro laquie nú huaxi seca. ⁴Mejora ucuahua nú aca nze'ca arqui'hua lu Diose cuna nu aca nze'cahua nu aca lle'na arqui'hua bee nucua' leca bichia nú nitilu, xne nucua' neca nú máse seca lu Diose. ⁵Xne scua uhuañi bee una'a enu uyaquie inziu' Diose hasta hua'tu, nu uchili arqui'beella Diose nu uzucu' beella nu rni niyu' beella. ⁶Scua uri'i Sara, uzucu'lla nu rni niyu'lla Abraham nu cuna ula'na unilla lu niyu'lla "Detá". Nee necahua xi neca xinchiu'cu Sara, tunu rri'ihua nú neca nze'ca sin nu lliquihua.

Xa rqui'ña ri'ihua chenu nu' xi rri'inu bee bene li'ihua

⁷Le'ca scua li'ihua bee niyu, uhuañi nze'cahua cuna bee una'hua. Xne mase necachi beenchu lubee niyu, nu le'ca riala beenchu elunehuañi nú leca xunga laxu nú lia rliqui' Diose equie nú nze'canu. Scua uhuañihua para nú ri'i caso Diose stichia'hua chenu rncu'hua lunu.

Xa rqui'ña ri'ihua chenu nu' xi rri'inu bee bene li'ihua

⁸Enze'e nia luhua nee, uhuañi nze'ca yehua cuna bee sa'hua aca tucu necatsehua, nu uri'ihua tucutsia elliebacu', uzecahua bee sa'hua xi neca bichihua. Aca nze'cahua nu aca lle'na arqui'hua. ⁹La guse'ehua tucu nú necha neca

uri'inu bee bene li'ihua, nu la quiexuhua bee bene enu rquiexu li'ihua. A'la unacu'hua lu Diose para nú ri'inu elietsa lubeei, xne para enze'e ucañi Diose li'ihua para nu rialahua elietsa nu rliquinu. ¹⁰Xne lu ichi' Stichia' Diose rni:

Enu niarquí' nú huañi nze'ca cuna nu ñia neca, rqui'ña nú bi'yalla nú la nilla bedichia' nu necha neca cuna nú la nilla eluquichia'.

¹¹Rqui'ña nu tsana' arqui'lla beenú necha neca, nú ri'illa nú neca nze'ca, nu cua'nalla nú huañi nze'calla cuna bee sa'lla nu chequieella nú huañilla scua.

¹²Xne rriucu Pa'ahua Diose bee bene enu neli rri'i tucu nú niarquí'nu, nu rri'i casonu stichia' beella chenu rncu' beella lunu, pero rleenu lubee bene enu rri'i nú necha neca.

¹³Lecati ri'i nu necha neca luhua, tunu rcua'nahua nú ri'ihua lunú neca nze'ca. ¹⁴Pero ñia nza lu cuenda'hua tunu rri'i bee bene nú nehuana secahua, xne rri'ihua tucu nú rialane. La qui'ña nú chenu arqui'hua nu lliquihua equie cuenda' nucua', ¹⁵sino que ulu'cuhua ula'na nu uzu'cu'luhua lunú rni Jesucristo. Utsutsiñahua para nú cuaquihua lubee bene enu rnidichia' luhua equie cuenda' nú nzeli arqui'hua Jesucristo, pero ucuqui nze'cahua cuna bedichia' nze'ca lubeei. ¹⁶Uhuañi nze'cahua para nu acahee nu la nchiñi nú necha neca elliebacu'hua para nú

tu' bee bene enu se'ta li'ihua equie nú nzeli arqui'hua Jesucristo, cuna nú nehuañihua tucu nu rialane.

¹⁷Xne máse neca nze'ca tunu nehuana zeca bene equie nú rri'illa nú neca nze'ca tunu tsana' Diose nu acane scua, luhuare nú nehuana zecalla equie nu rri'illa nú necha neca. ¹⁸Xne hasta li'i Cristo nehuana ulle'canu, nu ungutinu tucutsia bese equie cuenda' stula'ahua, añinzuca nú né ri'inu dula, pero ungutinu equie cuenda'ahua lia'ahua enu neca bee bene enu rlu'cu dula para nu neca nze'ca arquia'ahua lu Diose. Ungutinu xi neca tucu bene iliulabe, pero uhuañi zecanu equie cuenda' Espíritu'nu. ¹⁹Pero ante nú huañi zecanu, uyaní' Espíritu'nu lu espíritu' bee benenguti elu nchiñiche'beei. ²⁰Bee espíritu' cua' neca bee bene enu né zucu' nu uni Diose, tiambu nu uhuañi Noé lu iliulabe quie', nu uriqui' Diose li'ibeei diqui tiambu nu ureche'e Noé barco. Nu xunu tsia neca bee bene enu utsila'a lu inza bichia ze'e.

²¹Inza ze'e neca tucu seña equie cuenda' elu rrinza nú rluca'ahua nee, nu rlube' nucua' nú utsila'a Diose lia'ahua. Nu la ni nucua' nu neca elu rrinza nú quiee lunú neca cuerpo'ahua, sino para nu nacua'ahua lu Diose nu lá llutse nu necha neca elliebacua'ahua lunu, equie nu rlu'cua'ahua elunehuañi nú necuqui neca, equie cuenda' nú uhuañi zeca Jesucristo. ²²Li'inu enu uquie liñibe nu nzucunu cue'tse Diose chubee elurnibiya' bee ángele, cuna bee espíritu' nu rlu'cu elu usticia cuna nú rnibiya'.

Rqui'ña nú zibi' bene lu Diose lunú udete'nu nú recalla

4 Enze'e tucu nú nehuana ulle'ca Jesucristo, le'ca scua rqui'ña nú nehuana zecahua. Xne equie nú nehuana zeca bene scua sana' arqui' bene bee dula, ²para nú ri'illa tucu nú riu' arqui' Diose diqui lunú nehuañilla, luhuare nú ri'illa lunú necha neca rle'lla. ³Li'ihua huaxi tiambu uhuañihua tucu nú uhuañi bee bene enu la chulu Diose. Uhuañitsiahua tucu nú niarquitsiahua cuna tucu nú necha neca rle'hua, ulluchi'hua nu uri'ihua eliñi nú lecaxi zibi', ulluchitsiahua hasta elu niarquihua, nu udete'hua ula'na lu beenú la neca diose nú xiña arqui' Diose. ⁴Pero nee lunú la chequiehua nú huañihua tucu nú uhuañi bee bene enu rri'i scua, chequie nzenu arqui'beei lu cuenda'hua nu se'ta beei li'ihua. ⁵Pero li'ibeei rqui'ña nú dete'beei cuenda lu Diose lunú uri'ibeei, li'inu enu nzu para nú hualue lu cuenda' bee bene enu nehuañi cuna lu cuenda' bee bene enu ungutí. ⁶Xne le'ca ubene' bee bene enu ungutí Stichia' Diose chenu uhuañi beella lu iliulabe quie', añinzuca nú ungutí beella xi ungutí beelá bee bene iliulabe, pero para Diose nehuañi beella equie cuenda' espíritu' beella.

⁷Nee nze'ta axula nú laxu iliulabe. Enze'e ude'te' llie'ehua elliebacu'hua nu ucua'a tsñiahua para nú acahua nacu'hua lu Diose diquinu' arqui'hua. ⁸Nu la zañi'hua nú zecahua bee sa'hua tucu nú rialane, xne eluseca cua' neca

nú rri'i elietsa nu la duche'hua liñi arqui'hua nú rlehua lubee bene añinzuca nú huaxi beenú necha neca rri'ínu beei li'ihua. ⁹Ude'tehua elu ya'na bee sa'hua enu rriña ni'hua sin nú leehua lubeella. ¹⁰Cada tucuhua lia uliqui' Diose lunú recahua para nú ri'ihua lunú rqui'ña ri'ihua, enze'e uri'ihua elietsa lubee sa'hua lunú acahua ri'ihua para nú acachee nú rri'icahua tucu nú riala nú ri'ihua cuna lunú lia uliqui' Diose lunú recahua. ¹¹Tunu nu' tucuhua enu rlu'cu nú lia udete' Diose nú recalla para nú zete'lla bee sa'lla, rqui'ña nú zete'lla tucu nú neca Stichia' Diose. Le'ca enu rlu'cu lunú lia udete' Diose lunú recalla para nú ri'illa elietsa lubee sa'lla, rqui'ña nú du'lla juerza'lla lunú lia udete' Diose lulla para nú ri'illa elietsa lubee sa'lla. Ye nú rri'ihua uri'i nze'cahua para nú ni nze'ca bee bene lu Diose equie cuenda' Jesucristo, li'ínu enu riala ula'na cuna elurnibiya' diqui tiambu. Amén.

**Li'ihua bee bene' Diose
uriqui'hua lunú secahua**

¹²Bee sa'a enu nzeli arquia'ahua Jesucristo enu chiqui' se'ca, la lliquihua equie nú chiqui' nehuana secahua xne nucua' neca tucu prueba para li'ihua, la chenu arqui'hua equie nú secahua scua. ¹³A'la ñia utsu arqui'hua chenu nu' nú nehuana secahua tucu nú nehuana ulle'ca Jesucristo para nú le'ca ñia tsu arqui'hua lañi'hua ellie' Jesucristo bichia nú riña zecanu stucu bese. ¹⁴Ñia nza lu cuenda'hua

chenu rquiexu bee bene li'ihua equie nú nzequiehua Jesucristo, xne ye bichia nzu Espiritu Santo' Diose cuna li'ihua. Li'ínu enu rlu'cu nú rnibiya'. ¹⁵Lecaxi zibi' nú nehuana secahua, tunu unguutihua bene urre rri'ihua eluhuana', urre rri'ihua nú necha neca, urre riu'uhua elu la yala nú chu'uhua. ¹⁶Pero tunu nu' bene enu nehuana seca equie nú nzequiella Jesucristo, la yala nú tu'lla sino que a'la dete'lla che'tsa lu Diose equie nú necalalla bene'nu.

¹⁷Uri'ihua beya' nú sela Diose nú nehuana seca bee bene'nu para nú ninu lubeella, tunu lia'ahua nú neca'ahua bene'nu nu se'ca'ahua scua, ¿xa zeca bee bene enu la niarqui' zucu' bedichia' nze'ca' Diose che? ¹⁸Tunu li'i bee bene enu neli nzequie inziu' Diose chiqui' huaxi nú nehuana zeca beella para nú riña beella lu Diose, ¿xa zeca bee bene enu rri'i dula cuna bee enu la du' equie nú rni Diose che? ¹⁹Enze'e bee bene enu sana' arqui' Diose lunú nehuana seca beella, rqui'ña nú che ri'ilá beella lunú neca nze'ca, nu tsa'na beella espíritu' beella ya Diose, li'ínu enu ureche'e lia'ahua nu siempre sa'alunu stichia'nu.

**Bezete' para bee bene enu
nzeli arqui' Jesucristo**

5 Nee nia bezete' quie lubee bene enu rnibiya' letahua, li'á enu rlu'cu nú rnibiya' tucu nú rnibiya' beella, nu le'ca li'á neca enu ulañi' xa nehuana ulle'ca Jesucristo. Chequie le'ca tucutse laña'ahua nú chiqui' ñia neca

equie Jesucristo bichia chenu riña zecanu stucu bese, nu bedichia'quie' neca para li'ibeella. ²Li'ihua bee enu rnibiya' nia luhua tucu nú rriucu bene enu rriucu bee sanchi scua ri'i ucuhua bee bene' Jesucristo, lunú neca cuenda'hua nú zete'hua li'ibeella para nú chequieelá beella inziu' Diose. La ri'ihua riña' cua' lunú nediya'hua nú neca cuenda'hua nú ri'ihuane, sino que uri'ihuane equie nú nu' ana arqui'hua ri'ihuane, diquinu' arqui'hua uri'ihua riña' cua' tucu nú niarqui' Diose, nu la ri'ihuane equie nú niarqui'hua dimi. ³La necane equie nú rlu'cuhua nú rnibiya'hua lubee bene enu nzeli arqui' Jesucristo, nú nibiya'hua lubeella tucu nú niarqui' tsiahua sino que li'ihua rqui'ña nu acahua tucu ejemplu lubeella. ⁴Nu chenu riña Jesucristo stucu bese, li'inu enu rnibiya' lua'ahua che ati'hua premio nú chiqui' ñia neca nú leca bichia nú laxu.

⁵Le'ca esquie li'ihua bee bene enu nere'ne', uzu'cu'hua nú rni bee bene uxu. Yehua masia bee niyu e'ne' urre bee bene uxu aca lle'na rqui'hua, uzu'cu'hua nú rni bee sa'hua:

Xne la ri'i Diose caso bee bene enu reca nellíña,
pero rri'i nze'canu lubee bene enu reca lle'na arqui'.

⁶Enze'e aca lle'na arqui'hua lu Diose, li'ihua enu rlu'cu ye nú rnibiya' para nú ri'inu nú aca neca equiehua nu zucu' ayanu li'ihua chenu riña bichia ze'e. ⁷Utsa'nahua ye nú nzenu arqui'hua lu Diose, xne li'inu la tsana' arqui'nu li'ihua.

⁸Ucua'a tsiñiahua nu ubi'yahua li'ihua, xne beze'lu enu rlee luhua neca tucu nú neca bichiee enu rlia'na' nu rcua'na nú acu, scua enzee beze'lu rcua'nai ti ri'i ana lu. ⁹Enze'e la tsana'hua nu ri'i beze'lu ana luhua utsuta' arqui'hua lunú nzeli arqui'hua, xne li'ihua nediya'hua nú diqui lu iliulabe le'ca scua nehuana seca beelá bee sa'hua enu nzeli arqui' Jesucristo. ¹⁰Pero chenu udete nu nehuana secahua scua lle'na tiambu, chequie equie beenú nehuana secahua scua ri'i Diose elietsa luhua para nú nzequieehua nu rcua'nahua nú huañihua tucu nú niarqui'nu, nu chiuca tsu arqui'hua cuna nú tsuta' arqui'hua, sin nú za' arqui'hua chequiehua inziu'nu, nu le'ca li'inu necanu Diose enu rri'i elietsa lua'ahua lu ye nú se'ca'ahua, nu ucañilanu lia'ahua para nú chu'uhua elu chiqui' ñia rnaa nzucunu nu leca bichia nú laxue xne neca tucutsia'ahua cuna Jesucristo. ¹¹Nu chiqui' neli neca nú lu'cua'ahua ula'na lunu, xne li'itsianu necanu enu rlu'cu nú rnibiya' diqui tiambu. Amén.

Último bedichia' nú niquie lu ichi' quie'

¹²Silvano enu neca sa'ahua enu nediya' nú nehuañi tucu nú niarqui' Diose, li'illa uri'illa faura nú uquie'ella carta quie' para nú nia luhua chiucu chuna bedichia' nu nia bezete' luhua, cuna nú le'ca ixiule'a luhua nú chiqui' seca Diose lia'ahua. Enze'e le'ca scua uzecahua Diose cuna bee sa'hua. ¹³Bee bene enu nzeli arqui'

Jesucristo cuna bee bene enu ucañi
Diose tucu nú ucañinu li'ihua,
li'ibeella enu nucua'a ca'a elu
le'ca rniru Babilonia, xe'la beella
saludo luhua, le'ca esquie Marcos
enu rluca xi neca tucu endua,

xe'lalla saludo luhua. ¹⁴Uri'ihua
saludar bee sa'hua cuna eluseca nú
rlu'cuhua.

Diose liqui' nú nzuxe arqui'hua,
li'ihua enu neca tucutsia cuna
Jesucristo. Amén.

Carta rrucu nú uquie'e San Pedro

Uxe'la Pedro saludo

1 Li'á Simón Pedro, neca tucu apóstol' Jesucristo nu sibi'a lunu. Rquie'a carta quie' luhua li'ihua enu rlu'cu nú nzu teneli arqui' lu Jesucristo nú chiqui' ñia neca tucu nú nzu teneli arqui'ru lunu. Xne utsila'la Diose lia'ahua equie cuenda' Jesucristo enu neli rri'i tucu nú necane. ²Diose ri'i nú chiqui' cha nze'ca lu cuenda'hua cuna nú lia liqui'nu nú chiqui' nzuxe arqui'hua, xne nu'luhua Diose cuna Jesucristo enu rnibiya' lua'ahua.

Xa rqui'ña ri'i bee bene' Jesucristo

³Diose equie nú rlu'cunu poder uliqui'lanu ye nú se'ca la'cha'ahua para nú rlu'cua'ahua elunehuañi nú leca xunga laxu, nu para nú huañia'ahua nú lecaxi natsa arquia'ahua lunu. Xne nu'lula'ahua enu ucañi lia'ahua para nú yala'ahua elu rnibiya'nu cuna eluxene'nu. ⁴Enze'e chiqui' llene neca lunú ucaqui u'nanu lua'ahua nu huaxi secae, nu equie cuenda' nú ucaqui' u'nanu scua rcua'nahua nú huañihua tucu nu niarqui' Diose, nu scua utsana' arqui'hua ye beenú

lecaxi zibi' cuna beenú necha neca nu' lu iliulabe quie'. ⁵Enze'e rqui'ña nú cua'nahua nú huañi nze'cahua equie nú rlu'cuhua lunú nzeli arqui'hua Jesucristo, nu equie nú nehuañi nze'cahua scua che ri'iláhua beya' xa neca stichia'nu; ⁶nu equie nu nediya'hua xa necanu, che rri'ihua ana lubee elliebacu'hua nú necha neca, nu lunú rri'ihua ana lubee elliebacu'hua nu necha neca, ché acahua lu'cuhua nú tsuquie arqui'hua, nu equie nú rlu'cuhua nú nzuquie arqui'hua nu' modo huañihua nú lecaxi naa arqui'hua lu Diose; ⁷nu equie nú nehuañihua nú lecaxi naa arqui'hua lu Diose, scua acahua ri'ihua nú neca nze'ca lu beelá bee sa'hua, nu equie nu nze'cahua nu' modo nú zecahua bee sa'hua.

⁸Tunu sucu'luhua bee nucua', nu nzequiehua nu rcua'nahua nu nehuañihua scua, chequie la nehuañitsiahua lunú nehuañihua, nu la nehuañi xle'ehua, sino que máse nzequiehua nú nu'luhua Jesucristo enu rnibiya' lua'ahua. ⁹Pero bene enu la cua'na nú huañi scua, li'illa necalla xi neca tucu bene enu niquie'lu urre xi neca tucu enu la bi'ya istu. Uzañila'lla nú

uri'ila Diose perdona li'illa bee dula nú uri'illa hua'tu. ¹⁰Enze'e bee sa'a enu nzeli arquia'ahua Jesucristo, tucu nu ubixia Diose li'ihua nu tucu nú ucañinu li'ihua, cua'nahua nú tsuta' arqui'hua lu Diose, xne tunu nzuta' arqui'hua scua, che la zana'hua lu dula. ¹¹Nu scua itá lu'cuhua nú chu'uhua elurnibiya' Jesucristo enu rnibiya' lua'ahua, li'inu enu uhua lia'ahua lu dula.

¹²Enze'e la tsanaa nú rellu'cu' arquia li'ihua ye bee nu unia luhua nee, añinzuca nú nediya'ahua bee nucua' nu añinzuca nu le'ca neli nzequiehua lunú neli neca nú ubene'la'hua. ¹³Diqui nú nehuaña lu iliulabe quie', li'á nediya nú rqui'ña nú dua'a ana arqui'hua cuna bee bedichia' quie'. ¹⁴Xne equie cuenda' Jesucristo enu rnibiya' lua'ahua uri'ilá beya' nú lacaxea' nehuaña lu iliulabe quie'. ¹⁵Enze'e chiqui' rcua'na nu nia luhua para nú leca xunga zañi'hua bee stichia'a, mase nú ungutia.

**Bee enu ulañi' lunú
rnibiya' Jesucristo**

¹⁶Chenu udixiule'eru luhua nu xa neca lunú rnibiya' Jesucristo, nu xa neca nu nze'ta zecanu stucu bese, lá llela arqui'ru nú rniru luhua xne ulañi' nze'ca'ru nú chiqui' neca equie ellie'nu. ¹⁷Chenu ubene chi Diose enza liñibe, nu uni chi ze'e bedichia' nze'ca lunu: “Benequie' neca lli'ña nu chiqui' neca equienu nu ñia nzu arquia lunu.” ¹⁸Nu li'iru necaru enu ubene' chi Diose hasta liñibe, chenu ullua'aru equie dañi ze'e cuna Jesuse elu ulube'lu ellie'nu.

¹⁹Nu scua másela uyali arqui'ru nú uni bee profeta' Diose. Enze'e, neca nze'ca tunu sucu'luhua lunú uni beella, xne stichia' beella neca xi neca quii nú rdu'llie'e elu necabe nzu hasta nú ye'e luyuu. Nee le'ca scua lle'naa, lle'naa nze ri'ihua beya' lu cuenda' Diose hasta chenu riña Jesucristo stucu bese li'inu enu neca ellie'e lua'ahua, che itá ri'ihua beya' yeene. ²⁰Pero uri'ihua beya' nú ni' tucu Stichia' Diose la aca bee bene ri'illa beya' tucu nú necatsia elliebacu'lla, ²¹xne bee profeta' Diose né ni beella stichia'nu tucu nú necatsia elliebacu' beella, li'ibeella uni beella nucua' equie nú udu' Espíritu Santo arqui'beella nu ni beella scua.

Bee bene enu la zete' lunú neli neca

2 Nu le'ca scua tucu nú ucua'a bee profeta enu lixiu uri'i leta bee bene Israel hua'tu. Le'ca scua nucua'a bee bene enu lixiu rri'ni nu sete'beei lunú la neli neca. Li'ibeei cua'na beei nú xa zete'beei li'ihua lunú la neli neca para nú nu' nu za' arqui'hua, scua la zela beei nu nibiya' Jesucristo enu rnibiya' lua'ahua lubeei, li'inu enu udixiu stula beei nu la lea' nú nitilu Diose li'ibeei. ²Pero huaxi bee bene chequie lunú necha neca rri'i beei nu ri'i nucua' nú ze'ta bee bene Stichia' Diose. ³Nu equie nú máse niarqu' beei dimi, li'ibeei cua'na beei xa zequienu beei li'ihua para nu yucu beei dimi'hua, pero la la'a beei lu castiya nú nzuquie li'ibeei, xne hasta hua'tu nu'la castiya nú riala zeca bee bene enu rri'i scua.

⁴Diose né ri'i perdona bee ángele enu né zucu' stichia'nu, sino

que uxe'lanu li'ibeei ebila, nu nchiñiche'bee elu máse natsacabe nzu para bichia chenu ri'inu elu usticia'nu. ⁵Le'ca né ri'i Diose perdona bee bene enu necha uri'i enu uhuañi hua'tu, sino que ula'xunu li'ibeei cuna inza, utsila'atsianu Noé enu udixiule'e lubee bene tucu nu neli neca Stichia' Diose cuna se achi bene. ⁶Le'ca chenu uri'i Diose elu usticia'nu lubee bene eyeche Sodoma cuna Gomorra, li'inu utsiqui'nu eyeche ze'e hasta nú ungae tii, nucua' neca tucu ejemplu para lubee bene enu entalá, bee bene enu huañi nu necha ri'i, tucu nu uri'i bee bene bee eyeche ze'e. ⁷Pero utsila'a Diose bene enu lee Lot, li'illa enu uhuañi tucu nú niarqui' Diose nú huañilla, nu chiqui' uyanu arqui'lla lunú necha nehuañi bee bene eyeche ze'e.

⁸Nu lunú neca Lot enu uhuañi tucu nú niarqui' Diose leta bee bene ze'e, chequie bichia por bichia chiqui' nehuañi nzu arqui'lla chenu rlañi'lla cuna nú riene'lla lunú necha rri'i bee bene ze'e. ⁹Diose siempre rri'i elietsa lubee bene enu sucu' stichia'nu lu xitse prueba nú seca beella, nu le'ca nediya'nu xa ri'inunu bee bene enu necha rri'i bichia chenu ri'inu elu usticia'nu.

¹⁰Nu nucua' neca nu nzuquie li'i bee bene enu nehuañi tucu nu niarqui'tsia beei nu la niarqui'beeí nú nibiya' Diose lubeei. Chiqui' la yu'beeí resuna nu la tu'beeí sin nu lliqui beei rnibeei bedichia' nu necha neca, lu cuenda' bee enu rlu'cu nú rnibiya' liñibe, ¹¹nu ni' bee ángele' Diose añinzuca nú máse

nu' juerza' beenu cuna elurnibiya', pero lecaxi uni beenu lu Diose equie cuenda' beei.

¹²Bee clasia' bee benequie' li'ibeei nehuañi beei tucu nú nehuañi bee nañi, la lu'cu beei nu ri'i beei beya', nu se'ta beei lunú la ri'i beei beya', nu rri'itsia beei lunú niarqui' tsia beei sin nu ri'i beei elliebacu', tucu nú neca bee nañi enu nze'tatsia lu iliulabe quie' para nu úti bee bene li'ibeeí. Le'ca scua bee benecua' equie nu rri'i beei beenú necha neca, chequie le'catsia li'ibeei rnitilu beei li'ibeei, ¹³Nu ixiu beei tucu nu rri'inu beei bee bene. Li'ibeei chiqui' ñia nzu arqui'beeí rri'i beei beenú necha neca nú terratutsia laxu lu iliulabe quie', li'ibeei neca beei xi neca tucu nu necha neca, nú rnitilu lu eliñi nú rri'ihua chenu racu juntuhua, nu chiqui' ñia nzu arqui'beeí sequienubeei li'ihua.

¹⁴Lacala lañi'beeí tucu una'a chu rri'ibeei elliebacu' nu necha neca lunchu; la tsuxe beei nú rri'i beei dula. Nu sequienu beei bee bene enu lle'nalá nzeli arqui' Stichia' Diose, para nu ri'ibeella dula, nu chiqui' netsiña beei para nú ri'ibeei ana lunú niarqui'beeí. Chequie nzu quietisia nú zeca beei castiya' Diose. ¹⁵La chequiea' beei inziu' Diose uche'e xa nehuañibeei. Li'ibeei nehuañibeei tucu nú uri'i profeta Balaam lliana' bene enu lee Beor, chenu niarqui'lla nú ri'illa ana dimi equie nú uri'illa nu necha neca. ¹⁶Pero uqui'ya' Balaam equie cuenda' dula nú uri'illa, uri'i Diose nu uni burro'lla xi rni tucu bene nu hora ze'e lá ria'lla elliebacu' nu necha neca.

¹⁷Nee bee bene enu lixiu rri'i cua' enu rnia luhua li'ibeei neca beei xi neca tsu nú leca inza, cuna xi neca xcabe nu la uya' quiu, enze'e riala chabeei elu máse natsacabe nzu nu leca bichia nú chiu'u beei ze'e.

¹⁸Puro bee bedichia' nú nelliña rnibeei nú lecaxi sibi', nu li'ibeei rnibeei nú lecaxi ri'i nu ri'i bee bene nu necha neca, scua sequienu beei bee bene enu apenatsia rla'na nú tsana' arqui' inziu nu necha neca para nu che ri'ilá beella nu necha neca. ¹⁹Rnibeei nu lecati nibiya' lubee bene, nu le'ca li'ibeei neca beei xi neca enu neiqui lubee nu necha neca rri'ibeei, xne ye beenú la tsana' arqui'bee bene nú necha neca rri'i beei, nucua' neca nú rnibiya' lubee bene. ²⁰Lunú necane chenu uyu'ulula bee bene nu utsila'la Jesucristo enu rnibiya' lua'ahua li'ibeella lu dula nú utsana' arqui'la beella lunú necha neca nu' lu iliulabe quie', nu stucua'la bese uzela beella nu rnibiya' nucua' lubeella, scua masesca'lá necha nehuañi beella lunú uhuañi beella hua'tu. ²¹Máse neca nze'cae lu cuenda' beei nú né chuluxu beei Stichia' Diose, nu uyulu beei nu chu utsana' arqui'beei bedichia' nze'ca'nu nú ubene'beei. ²²Equie cuenda' beei rialu tucu parte lu ichi' Stichia' Diose elu rni: “Nicu racu zecaí lunú uridi'cuí, nu cuchi enu unguetsa inza lu inza nze'ca, riu'u zecaí lu inzabenu.”

**Xa aca chenu nze'ta
Jesucristo stucu bese**

3 Bee sa'a enu nzeli arquia'ahua Jesucristo chiqui' se'ca

li'ihua, ninguei' neca carta rruca nú xe'la luhua. Nu lu rucu carta quie' rcua'na para nu nia luhua nú ri'ihua elliebacu' tucu nú rialane. ²Ullu'cu' arqui'hua lunú uni bee profeta' Diose hua'tu cuna stichia' Jesucristo enu rnibiya' nú uzete' bee apóstol'nu li'ihua, li'inu enu utsila'a lia'ahua lu dula.

³Uri'ihua beya' chenu yamero nze'ta nú laxu iliulabe, chu'u bee bene enu tsequichia' li'ihua, nu huañi beei tucu nu niarqui' tsiabeei, ⁴nu nibeei luhua: “¿Ma nu unii Cristo nú nze'ta zecanu stucu bese? Ungutila ye bee benea'ahua enu udetela, nu ye beenú nu' lu iliulabe neca tucu necane hasta chenu uquixie iliulabe.” ⁵Li'ibeei nibeei scua xne la du' equie beei nú hasta hua'tu nu'la liñibe cuna lu yuu, nu lu cuenda' inza ungache' yuu cuna poder' Diose. ⁶Le'ca equie cuenda' inza unitilu Diose bee bene enu uhuañi hua'tu. ⁷Pero liñibe cuna lu yuu nú rlañia'ahua nee, nzula nú nitilu Diose nucua' cuna quii equie nú rnibiya'nu, bichia nú dete'nu castiya bee bene enu la zucu' stichia'nu.

⁸Enze'e bee sa'a enu nzeli arquia'ahua Jesucristo, la zañi'hua nú para Pa'ahua Diose tucu bichia neca xi neca tucu mili lana, nu tucu mili lana neca xi neca tucu bichia para li'inu. ⁹La necane nu rle'la' Diose nu tsa'alunu lunú ucuquiu u'nanu tucu nú nu' bee bene enu rri'i elliebacu' nú rle'la'nu nú ri'inu nucua' sino que nzuquienu. Xne la niarqui'nu nú nitilu ni'tucu bee bene, lunú niarqui'nu nú ye bee bene tsana' arqui'beei stula beei.

¹⁰Nu tucu nu la ria'ahua beya' chenu rriña tucu huana'. Scua aca bichia chenu riña zeca Jesucristo stucu bese, nu lliqui bee bene chenu yene' bee bene nú llichí nitilu liñibe, nu ye beenú nu' liñibe nitilu Diose nucua' cuna quii, le'ca esquie nitilunu iliulabe cuna ye nú nu' lue cuna quii.

¹¹Nee lunú nediya'la'hua nú laxu iliulabe, rqui'ña nú huañihua nu lecaxi natsa arqui'hua sin nu lu'cuhua dula tucu nu niarqui' Diose. ¹²Chequie chiqui' nu' ana arqui'hua nzuquiehua nú riña bichia nu ucañi Diose nú aca bee nucua', bichia ze'e tsiqui' Diose liñibe cuna ye beenú nu' liñibe. Le'ca esquie lu yuu cuna ye nú nu'lue nitilu Diose bee nucua', cuna quii. ¹³Pero lia'ahua nellua'a quia'ahua tucu liñibe cuqui cuna tucu yuu cuqui, tucu nú ucuaqui u'na Diose, tucu elusticia nú neli neca liñibe.

¹⁴Enze'e bee sa'a enu nzeli arquia'ahua Jesucristo, diquila nú nucua'aquiehua nu aca nucua', ucua'nahua nú lluna' Diose li'ihua nú lecaxi nahua nu la lu'cuhua dula, cuna nú nehuañihua nu nzuxe arqui'hua cuna bee sa'hua.

¹⁵Uri'ihua beya' nú Pa'ahua Diose nzu quie arqui'nu lia'ahua para nú tsana' arquia'ahua stula'ahua. Nu sa'ahua Pablo enu chiqui' se'ca'ahua, le'ca scua unilla lu carta'lla nú uquie'ella luhua tucu nú lia udete' Diose lunú reca elliebacu'lla. ¹⁶Lu ye carta nú uquie'e Pablo li'illa unilla luhua lunú rnia luhua. Pero nu'bee luhua lu carta'lla elu neriña' nú ri'i bee bene beya', chequie bee bene enu la ri'ili beya' Stichia' Diose cuna bee enu la tsuta' arqui' lu stichia'nu xe'e beei lunú rni stichia' Pablo, le'ca scua rri'i beei lu beelá bee bedichia' nú nze'ta lu ichi' Stichia' Diose, enze'e le'catsia li'ibeei rnitilu beei li'ibeei.

¹⁷Bee sa'a enu nzeli arquia'ahua Jesucristo, chiqui' se'ca li'ihua, nee lunú nediya'la'hua bee nucua' ubi'yahua li'ihua para nú la zana'hua letaya bee enu niarqui' nú zequienu li'ihua para nú tsana' arqui'hua lunú nzuta' arqui'hua lu Stichia' Diose. ¹⁸Mejora ucua'nahua nú másela chululáhua Jesucristo cuna eluseca'nu, li'inu enu udixiu stula'ahua. ¡Nu chiqui' neca equie nú lu'cu bee bene ula'na lunu diqui tiembu! Amén.

Carta tucu nú uquie'e San Juan

Bedichia' nú rliqui' elunehuañi

1 Carta quie' neca para nú
ixiule'a luhua equie cuenda'
tucu bene enu nzula hasta chenu
lasca' quixie iliulabe, ubene'la'ru
lunú rninu nu ulañi'la'ru li'inu,
ulañi' nze'caru li'inu nu uti'ru yaru
li'inu. Li'inu necanu enu rliqui'
elunehuañi, ²nu ube'talanu lu
iliulabe. Ulañi'la'ru li'inu nu li'iru
necaru testigo, enze'e rixiule'eru
luhua equie cuenda' li'inu enu
rliqui' elunehuañi nú leca xunga
laxu. Li'inu necanu enu nzula cuna
Diose liñibe nu ube'tanu lu iliulabe.
³Enze'e lunú ulañi'ru, cuna lunú
ubene'la'ru, rixiule'eru luhua para
nú aca tucutsiahua cuna li'iru, tucu
nú neca tucutsiaru cuna Dios
Pa'ahua cuna Lli'ñinu Jesucristo.
⁴Rixiule'eru bedichia' cua' luhua
equie cuenda' carta quie' para nú
chiqui' ñia tsu arqui'hua tucu nú
ñia nzu arqui'ru.

Diose neca ellie'e

⁵Ninguie' neca bedichia' nú uzete'
Jesucristo li'iru, nu nee rixiule'eru
nucua' luhua, nú Dios neca ellie'e
nu la lu'cunu ni' tucu dula. ⁶Tunu
rnia'ahua nú neca tucutsia'ahua

cuna Dios, nu nzequie'sca'ahua
inziu nú necha neca, scua
neca'ahua enu niquichia' sia lunú
rnia'ahua urre lunú rria'ahua. ⁷Pero
tunu nzequie'ahua ellie' Dios,
tucu nu necanu enu la lu'cu dula,
che neca tucutsia'ahua cuna bee
sa'ahua, nu rene' Lli'ñinu Jesucristo
quieenu lia'ahua lu ye dula nú
rlu'cua'ahua.

⁸Tunu rnia'ahua nú la lu'cua'ahua
dula sequienua'ahua le'catsia
lia'ahua, nu la nia'ahua lunú neli
neca. ⁹Pero tunu xucu' dula'ahua
stula'ahua lu Dios, nediya'
nze'ca'ahua nú rri'inu lunú rninu,
li'inu nze'canu para nú ri'inu
perdona lia'ahua lu stula'ahua nu
quieenu lia'ahua lu ye beenú necha
neca uria'ahua. ¹⁰Tunu rnia'ahua
nú la ria'ahua dula, nucua' rni
nú rnia'ahua nu neca Dios enu
niquichia' nu rlu'cua'ahua dula nu
la zucua'ahua nú rni stichia'nu.

Jesucristo neca enu rni lu cuenda'hua lu Dios

2 Bee lli'ña, rquie'a bee
bedichia' quie' luhua para nú
la ri'ihua dula. Pero tunu nu'hua
enu rri'i dula, rlu'cua'ahua tucu
enu rni lu cuenda'ahua lu Dios,

nu li'inu necanu Jesucristo enu leca xunga uri'i dula. ²Equie nú ungutí Jesucristo, nu' nú rri'i Diose perdona stula'ahua. Nu la acane equie cuenda' stula'tsia'ahua, le'ca necane lu cuenda' stula ye bee bene iliulabe.

³Lia'ahua nediya' nze'ca'ahua tunu sucua'ahua Stichia' Diose, che nzu arquia'ahua nú itá nulu'la'ahua li'inu. ⁴Pero tunu nu' enu rni: "Li'á nu'lua Diose", nu la zucu'lla stichia'nu, necalla enu niquichia', xne la chequieella lunú neli neca. ⁵Pero enu sucu' Stichia' Diose diquinu' arqui' neli secalla li'inu. Scua nediya'ahua nú neca'ahua bene'nu. ⁶Tatse bene enu rni nú neca bene' Diose, rqui'ña nú huañilla tucu nú uhuañi Jesucristo.

Mandamiento nú necuqui neca

⁷Bee sa'a enu nzeli arquia'ahua Jesucristo, bee bedichia' nú rnia luhua nee la necuqui necane, le'ca li'i bedichia' quie' neca stichia' Jesucristo nú ubene'la'hua hasta hua'tu. Le'ca li'i bedichia' quie' neca nú rnia luhua nee. ⁸Pero rnia bee bedichia' quie' luhua xi neca tucu nú necuqui neca, xne sianu necane equie cuenda' Jesucristo urre necane equie cuenda' li'ihua, rlube' nucua' nu neli necane xne nze tsana' arqui'lahua inziu nú necha neca nu nzequiehua lunú neca nze'ca.

⁹Tunu nu' enu rni nú nzequieella inziu' Diose nu rana arqui'lla bee sa'lla, li'illa nzequiesca'lla inziu nú necha neca. ¹⁰Enu seca bee sa' li'i silla neli nzequieella inziu' Diose, scua leca modo nú ri'i dula ana

lulla. ¹¹Pero bene enu rana arqui' bee sa' li'illa nehuañilla lunú necha neca, nu nzequiella nú necha neca cua', sin nú ri'illa beya' cá enza nzalla, xne utsa'na nú necha neca cua' li'illa leta rula' xi neca tucu bene enu la bi'ya.

¹²Rquie'a carta quie' luhua bee lli'ñaia, xne unga perdonala stulahua equie nú rlu'cuhua ula'na lu Jesucristo.

¹³Rquie'a carta quie' luhua li'ihua bee uzana, xne nu'lulahua Jesucristo enu nzula hasta chenu lasca' quixie iliulabe. Le'ca rquie'a carta quie' luhua li'ihua bee bene enu nere'ne xne uri'ihua ana nú la ria'hua nú necha neca nze'ta lu beze'lu.

Rquie'a bedichia' quie' luhua li'ihua bee endu', xne nu'lulahua Pa'ahua Diose.

¹⁴Rquie'a bedichia' quie' luhua li'ihua bee uzana, xne nu'lulahua Jesucristo enu nzula hasta chenu lasca' quixie iliulabe, nu le'ca rquie'a bedichia' quie' luhua li'ihua bee enu nere'ne', xne rdu'hua ana arqui'hua nu neli nzequieehua Stichia' Diose, nu uri'ihua ana nú la ria'hua nú necha neca nze'ta lu beze'lu.

¹⁵La le'hua nú ri'ihua lunú necha neca rri'i bee bene lu iliulabe quie' ni'bee nú nu' lu iliulabe. Tunu nu' enu máse seca lunú nu' lu iliulabe, nu la zeca nze'e Pa'ahua Diose.

¹⁶Xne ni' tucu nú necha neca nu' lu iliulabe quie' la ye'ta nucua' lu Diose, nze'ta tsia nucua' le'ca lubee bene iliulabe. Nu ninguie' neca lunú necha neca rri'i bee bene

iliulabe. Ri'illa tucu nú necatsia elliebacu'lla, nu rle'lla nú lu'culla ye lunú rlañi'lla cuna nú reca nelliñalla lunú rlu'culla. ¹⁷Pero iliulabe tucu bichia laxue cuna ye beenú necha neca rri'i bee bene. Pero enu nehuañi tucu nú niarquí' Diose, lu'culla elunehuañi nú leca xunga laxu cuna li'inu.

**Lunú neli neca cuna
lunú la neli neca**

¹⁸Bee lli'ñia, li'á nia luhua nú lacaxea' nzu nú laxu iliulabe. Xne ubene'la'hua nú rqui'ña nú riña tucu enu rri'i condra Cristo, nu ni nze'e lubee bene nú neca nze'e Cristo, nu nee nucua'ala huaxi enu rri'i condra Cristo, enze'e nediya'ahua nú lacaxea' nú laxu iliulabe. ¹⁹Bee enu rri'i condra Jesucristo, uchiu'u beei le'ca leta bee sa'ahua enu nzeli arquia'ahua Jesucristo, pero laca beei mero bee sa'ahua, xne tunu neca beei bee sa'ahua aya'na beei leta bee sa'ahua enu nzeli arquia'ahua Jesucristo. Pero unga nucua' para nú lañi' bee bene nú laca beei bene leta'ahua.

²⁰Uliqui'la Jesucristo Espíritu Santo luhua, nu equie cuenda' Espíritu Santo yehua nediya'hua lunú neli neca. ²¹Rquie'a bee bedichia' quie' luhua, nu la necane lunú la nediya'hua ta lunú neli neca, sino que lunú nediya'la'huane, xne li'ihua nediya'hua nú la ye'ta ni' tucu bee eluquichia' lunú neli neca.

²²Nee, ¿ti neca bene enu niquichia'? Bene ze'e neca enu rni nú la neca Jesuse li'i Cristo. Nucua' rri'i condra Cristo xne la chili arqui' nucua' Pa'ahua Diose, nu

ni' Lli'ñinu Jesucristo. ²³Xne tatse bene enu rni nú la neca Jesucristo Lli'ñi Diose, li'illa la chululla Diose Pa'ahua. Pero enu rni nú neca Jesucristo Lli'ñi Diose, li'isilla nu'lulla Pa'ahua Diose.

²⁴Enze'e la tsana' arqui'hua bedichia' nú ubene'hua desde nú uquixiehua nú uyali arqui'hua Jesucristo, nu tunu nzequiehua bedichia' nú ubene'hua desde chenu uquixie nú uyali arqui'huane, che si nzequiehua nú nehuañihua cuna Pa'ahua Diose cuna Lli'ñinu Jesucristo. ²⁵Nu ningüie' neca nú ucuaqui u'na Jesucristo, nú liqui'nu lua'ahua elunehuañi nú leca xunga laxu lu Diose.

²⁶Rquie'a bee bedichia' quie' luhua, equie cuenda' bee bene enu rcua'na nú zequienu li'ihua. ²⁷Pero li'ihua nehuañihua cuna Espíritu Santo nú uliqui' Jesucristo luhua, nu la qui'ña nú nu' ti zete' li'ihua, xne le'ca li'i Espíritu Santo neca enu zete' yeene li'ihua, nu puro nú neli zete'nu nu la zete'nu eluquichia'. Enze'e uhuañihua tucu nú rnibiya' Espíritu Santo para nú chequiehua nú neca tucutsiahua cuna Jesucristo.

²⁸Nee bee lli'ñia, li'á nia luhua nú uquia quieehua inziu' Jesucristo, para nú la lliquia'ahua chenu riñanu, nu ni' nú tua'ahua li'inu. ²⁹Li'ihua nediya'hua nú rri'i Diose tucu nú neli neca, nu rqui'ña nú ri'ihua beya' nú ye bee bene enu rri'i tucu nú neli neca, li'ibeella neca beella Lli'ñi Diose.

**Lu cuenda' bee bene enu
neca Lli'ñi Diose**

3 Ubi'yacuruhua chiqui' llene neca nú seca Diose

Pa'ahua lia'ahua. Enze'e nu' modo nú chiu'ulea'ahua lli'ñinu, nu neca'ahua lli'ñinu. Pero bee bene enu la chequie inziu' Diose la chulu beei lia'ahua xi neca Lli'ñi Diose, xne la chulu beei li'ínu. ²Bee sa'a enu nzeli arquia'ahua Jesucristo enu chiqui' se'ca, li'á nia luhua nú necala'ahua Lli'ñi Diose. Añinzuca nú la ria'ahua beya' xa aca'ahua chenu nze'ta Jesucristo stucu bese, pero nzuta' arquia'ahua nú aca'ahua tucu nú necanu xne bichia ze'e neli lañia'ahua li'ínu tucu nú rnaanú. ³Nu ye bee bene enu nzeli arqui' nú scua acane, sucu'lu beella nú huañi beella nú la lu'cu beella dula, tucu nú necanu enu la lu'cu dula.

⁴Pero ye bee bene enu la ri'i tucu nú rnibiya' Diose li'ibeei rri'ibeei dula, xne dula neca tunu la ri'i bee bene tucu nú rnibiya' Diose. ⁵Li'ihua nediya'hua nú ube'ta Jesucristo lu iliulabe para nú huanu dula arqui' bee bene, nu la lu'cunu ni' tucu dula. ⁶Enze'e bee bene enu neca tucutsia cuna Jesucristo, rla'na beella nú la ri'i beella dula. Pero ye bee bene enu siempre rri'i dula, la ri'ibeei beya' ti necanu nu la chulu beei li'ínu. ⁷Bee lli'ñia li'á nia luhua nú la zelahua nú titse zequienú li'ihua, xne enu rri'i lunú niarqui' Diose la nzu elliebacu'lla nú ri'illa dula, tucu nú neca Jesucristo enu la lu'cu dula. ⁸Pero bene enu siempre rri'i dula neca nze'e bene' beze'lu, xne tucutsia beze'lu neca enu rri'i dula hasta chenu uquixie iliulabe, nu Jesucristo Lli'ñi Diose ube'ta lu iliulabe para nu uri'ínu ana lunú rri'i beze'lu.

⁹Enze'e ni' tucu bene enu nzequie inziu' Diose la zucu'lulla nú ri'illa dula, xne nehuañila Espíritu' Diose cuna li'illa, nu la yala' nú ri'illa dula xne necalalla Lli'ñi Diose.

¹⁰Chee rlube' nú ti neca bee Lli'ñi Diose nu ti neca bee lli'ñi beze'lu, xne tatse enu la ri'i tucu nú niarqui' Diose urre la zecalla bee sa'lla la aca nze'e Lli'ñi Diose.

Rqui'ña nú zeca bee bene sa'lla

¹¹Nu li'ihua desde chenu uyalí arqui'hua Jesucristo, ubene'la'hua nú rqui'ña nú zeca'ahua bee sa'ahua. ¹²La yala nú ria'ahua tucu nú uri'i Caín, uzelai nú unibiya' beze'lu lui nú unguuti bichi. Uri'i scua xne uri'itsiai puro nú necha neca, nu bichii uri'i nú neca nze'ca.

¹³Enze'e bee sa'a enu nzeli arquia'ahua Jesucristo, la chenu arqui'hua tunu rana arqui' bee bene iliulabe li'ihua equie nú nzequieehua inziu' Diose. ¹⁴Lia'ahua nediya'ahua nú la neca'ahua xi neca bene enu unguuti para Diose xne rlucula'ahua elunehuañi lunu, equie nú se'ca'ahua bee sa'ahua. Pero bene enu la zeca beesa' li'illa necasca'lla xi neca bene enu unguuti lu Diose. ¹⁵Ye bee bene enu rana arqui' bee sa' neca nze'e xi neca tucu enu ruuti bene, nu li'ihua nediya'hua nú enu ruuti bene li'illa la lu'culla elunehuañi nú leca xunga laxu lu Diose. ¹⁶Lia'ahua nediya'ahua nú seca Jesucristo lia'ahua xne unguatinu equie cuenda'ahua; nee le'ca scua equie nú se'ca'ahua bee sa'ahua lecaxi ri'i mase atia'ahua equie cuenda' bee sa'ahua. ¹⁷Pero tunu nu' tatucuhua enu neca xene lu iliulabe queie' nu lañi'lla tucu sa'lla

enu seca elitsi, nu la ri'lla elietsa lu bene ze'e, ¿xa modo nilla nú rlu'culla eluseca' Diose che? ¹⁸Enze'e bee lli'ñaia, li'á nia luhua nú la ni'tsiahua nu rnia'ahua nú se'ca'ahua bee sa'ahua, rqui'ña nú lubea'ahua nú se'ca'ahua bee sa'ahua cuna lunú rria'ahua.

Rqui'ña nú nzu arquia'ahua lu Diose

¹⁹Xne tunu se'ca'ahua bee sa'ahua che ria'ahua beya' nú sucua'ahua nú rni Stichia' Diose, nu nzuta' arquia'ahua nú rria'ahua tucu nú rialane lunu. ²⁰Pero tunu rri'ila'ahua tucu nu rialane scua nu si'sca'ahua nu lasca' ria'ahua tucu nú neli neca, rqui'ña nú ria'ahua beya' nú llenela neca Diose lua'ahua, nu li'inu nediya'nu yeene. ²¹Enze'e tucu nú se'ca li'ihua, li'á nia luhua tunu si'ahua nú rria'ahua nu neca nze'ca, che nzu ta' arquia'ahua nú rria'ahua tucu nú neli neca lu Diose. ²²Scua liqui'nu ye nú rnacua'ahua lunu, equie nú sucua'ahua nu rria'ahua lunú rnibiya'nu cuna nú rria'ahua lunú riu' arqui'nu. ²³Nu lunú rnibiya' Diose nú ria'ahua necane nú chili arquia'ahua Jesucristo Lli'ñaia Diose, nu zeca'ahua bee sa'ahua tucu nú unibiya'nu nú ria'ahua. ²⁴Bee bene enu suctu' tucu nú rnibiya' Diose nu rri'i beellae, li'ibeella nehuañi beella cuna Diose nu li'inu nehuañinu cuna li'ibeella. Nu nediya'ahua nú nehuañinu cuna lia'ahua, equie cuenda' Espíritu Santo nú uliqui'lanu lua'ahua.

Equie cuenda' Espíritu' Diose cuna espíritu enu rri'i condra Jesucristo

4 Bee sa'a enu chiqui' se'ca, li'á nia luhua nú la chili arqui'hua

titse bee bene enu rni nú rni Stichia' Diose, rluti uri'inze'cahua beya' tunu neli nú rnilla Stichia' Diose urre lia rnilla, xne lu iliulabe enzee huaxi bee bene enu niquichia', nu rnibeei nú rnibeei Stichia' Diose. ²Nee, para nú ri'ihua beya' ta enu neli rni Stichia' Diose: neca beella enu neli nzeli arqui' nú ube'ta Jesucristo lu iliulabe xi neca tucu bene, enu nzeli arqui' scua nzu Espíritu Santo' Diose cuna li'illa. ³Pero bee bene enu la chili arqui' nú neca Jesucristo Lli'ñaia Diose enu ube'ta lu iliulabe, la nzu Espíritu Santo' Diose cuna li'ibeei, nu li'ibeei neca beei enu rlee lu Jesucristo. Li'ihua ubene'hua nú rqui'ña nu nze'ta tucu enu rlee lu Jesucristo lu iliulabe quie', nu desde nee nucua'ala huaxi enu rana arqui' Jesucristo lu iliulabe quie'.

⁴Pero li'ihua bee lli'ñaia, necalahua Lli'ñaia Diose, nu bee enu rana arqui' Jesucristo la ria' bee nze'e ana luhua, xne máse llene neca lunú rnibiya' li'inu enu nzu cuna li'ihua luquela nú rnibiya' bee enu nchiñi lu inziu nú necha neca. ⁵Bee enu rlee lu Jesucristo rri'itsia beei elliebacu' lunú nu' lu iliulabe, nu puro beenú nu' lu iliulabe rnibeei nu bee enu la chili arqui' Jesucristo rri'i caso lunú rnibeei. ⁶Pero lia'ahua necala'ahua bee bene' Diose. Nu bee bene enu nu'lu Diose riene' lunú rnia'ahua; nu bee bene enu la chulu Diose ni teme' la ri'ibeei caso lunú rnia'ahua. Scua rria'ahua beya' nú ta enu nehuañi cuna Espíritu Santo nu sete' nú neli neca, cuna enu nehuañi cuna espíritu nú sete' puro lunú la neli neca.

Diose seca bee bene

⁷Bee sa'a enu chiqui' se'ca, rqui'ña nú zeca'ahua bee sa'ahua, xne eluseca quie' nze'ta lu Diose. Ye bee bene enu seca bee sa' li'ibeella neca beella Lli'ñi Diose nu nu'lu beella li'inu. ⁸Nu bee bene enu la zeca bee sa' la chululla Diose, xne lu Diose nze'ta eluseca. ⁹Ulube' Diose nú secanu lia'ahua, enze'e añinzuca nú tucutsia Lli'ñinu Jesucristo pero uxe'lanu Lli'ñinu lu iliulabe para nú lu'cua'ahua elunehuañi lunu equie cuenda' Lli'ñinu. ¹⁰Diose seca lia'ahua: nu la necane nú rlutia'ahua se'ca'ahua Diose, li'inu rlutinu secanu lia'ahua enze'e uxe'lanu Lli'ñinu Jesucristo para nú ungutinu equie cuenda' stula'ahua, nu scua nu' nú rri'i Diose perdona lia'ahua.

¹¹Bee sa'a enu chiqui' se'ca, li'á nia luhua tucu nú seca Diose lia'ahua, le'ca scua rqui'ña nú zeca'ahua bee sa'ahua. ¹²Añinzuca nú lecati lañi' Diose, pero tunu se'ca'ahua bee sa'ahua rlube' nucua' nú nehuañia'ahua cuna Diose, nu neli se'ca'ahua li'inu. ¹³Lia'ahua nediya'ahua nú nehuañia'ahua cuna Diose nu li'inu nzunu cuna lia'ahua, xne uliqui'lanu Espíritu Santo'nu lua'ahua. ¹⁴Nu li'iru bee apóstol ulañi'ru Jesucristo Lli'ñi Diose, nu rixiule'eru luhua nú Diose Pa'ahua uxe'lanu Lli'ñinu para nú tsila'anu ye bee bene. ¹⁵Tatse bee enu rni nu nzeli arqui' nú Jesucristo neca Lli'ñi Diose nehuañilla cuna Diose, nu nehuañinu cuna li'illa.

¹⁶Lia'ahua rria'ahua beya' nu nzeli arquia'ahua nú seca Diose

lia'ahua. Nu equie cuenda' li'inu nze'ta nú se'ca'ahua bee sa'ahua nu enu nehuañi cuna eluseca cua' nehuañilla cuna Diose, nu nehuañinu cuna li'illa. ¹⁷Tunu neli nú nediya'ahua nú seca Diose lia'ahua lu iliulabe quie', la lu'cua'ahua ni' tucu nú lliquia'ahua para bichia chenu hualunue lu cuenda' bee bene equie nú neca tucutsia'ahua cuna Diose, tucu nú neca tucutsia Jesucristo cuna Diose. ¹⁸Elu nu' eluseca' Diose leca' nú lliqui bee bene. Xne enu neli nzequiee eluseca' Diose lecaxi lliquilla, pero enu la chequiee eluseca cua' xiquilla, xne rri'itsialla elliebacu' xi castiya riala nú zecalla. Enze'e tunu nu' enu xiqui rlube' nucua' nu neli la chequiella eluseca' Diose. ¹⁹Lia'ahua se'ca'ahua Diose xne li'inu rlutinu secanu lia'ahua. ²⁰Tunu nu' bene enu rni: “Nu secalla Diose”, nu rana arqui'lla bee sa'lla, necatsialla tucu enu niquichia'. Xne tunu la zecalla bee sa'lla enu rlañi'lla, ¿xa modo zecalla Diose enu la lañi'lla? ²¹Le'ca li'i Jesucristo uninu: nú enu seca Diose rqui'ña nú le'ca zecalla bee sa'lla.

Equie nú nzu teneli arquia'ahua lu Jesucristo sana' arquia'ahua lunú necha neca

5 Ye bee bene enu nzeli arqui' nú neca Jesuse Cristo enu uxe'la Diose, neca beella lli'ñi Diose; nu bee bene enu seca Diose Pa'ahua le'ca seca beella bee lli'ñinu. ²Chenu se'ca'ahua Diose nu rria'ahua lunú rnibiya'nu nú ria'ahua, che rria'ahua beya' nú

se'ca'ahua bee lli'ñinu. ³Equie nú seca bene Diose neca nú rri'i bene tucu nú rnibiya'nu; nu laca neriña' nu ri'i bene tucu nú rnibiya'nu. ⁴Xne ye bee bene enu neca Lli'ñi Diose nu' modo nú ri'i beella ana lu beenú necha neca nu' lu iliulabe quie'. Nu equie nú nzeli arquia'ahua Jesuse enu neca Cristo scua rria'ahua ana nú la ria'ahua beenú necha neca nu' lu iliulabe quie'. ⁵Xne enu nzeli'sia arqui' nú neca Jesuse Lli'ñi Diose, li'illa nu' modo nú rri'illa ana lubee nú necha neca nu' lu iliulabe quie'.

**Lunú uni Diose equie
cuenda' Jesucristo**

⁶Nu Jesucristo ube'tanu lu iliulabe nu urinzanu cuna nú uri'chia rene'nu; lá rinza tsianu le'ca uri'chia rene'nu lu cruse. Nu le'ca li'i Espíritu Santo neca testigo lu cuenda' bee nucua', nu li'inu rninu puro nú neli neca. ⁷Xne nu' chuna enu neca testigo liñibe: Diose Pa'ahua, Jesucristo, nu Espíritu Santo; nu lu yuna beenu neca tucutsia Diose. ⁸Nu le'ca nu' chuna testigo lu yuu: Espíritu Santo, cuna nú urinza Jesucristo, cuna nú uri'chia rene'nu lu cruse; nu lu yunanu neca tucu necatse beenu. ⁹Nee tunu nzeli arquia'ahua lunú rni bee bene lua'ahua; máse rqui'ña nú chili arquia'ahua lunú rni Diose equie cuenda' Lli'ñinu Jesucristo, xne másela seca stichia'nu. ¹⁰Bene enu nzeli arqui' Jesucristo Lli'ñi Diose, li'isilla nzeli arqui'lla lunú uni Diose lu cuenda'nu, pero bene enu la chili arqui' Diose, rni stichia' nze'e nú neca Diose enu

niquichia' xne la chili arqui' nze'e lunú uni Diose lu cuenda' Lli'ñinu Jesucristo. ¹¹Nu lunú uni Diose neca nú uliqui'lanu elunehuañi nú leca xunga laxu, nu elunehuañi cua' nze'ta equie cuenda' Lli'ñinu Jesucristo. ¹²Bene enu neca tucutsia cuna Jesucristo Lli'ñi Diose, li'isilla rlu'culla elunehuañi nú leca xunga laxu lu Diose; pero bene enu la neca tucutsia cuna li'inu, la lu'cu nze'e elunehuañi cua'.

Último bedichia' nú rni lu carta quie'

¹³Rquie'a ye bee nucua' luhua li'ihua enu nzeli arqui' Jesucristo Lli'ñi Diose, para nú ri'ihua beya' nú rlu'cuhua elunehuañi nú leca xunga laxu lu Diose.

¹⁴Nzu arquia'ahua nú riene' Diose tunu nacua'ahua lunu tucu nú riu' arqui'nu. ¹⁵Nu lunú nediya'ahua nu rri'i Diose caso stichia'ahua chenu nu' nú rnacua'ahua lunu, le'ca nzuta' arquia'ahua nu li'inu liqui'nu lunú unacua'ahua lunu.

¹⁶Tunu nu' tátucua'ahua enu nediya' nú rri'i tucua'ahua dula nu la yala nú atilla, rqui'ña nú nacu'hua lu Diose equie cuenda'lla, nu scua dete' Diose elunehuañi nú leca xunga laxu lulla tunu la ri'illa dula nú riala nú atilla. Xne nu' dula nú riala nú ati bene, nu la nia luhua nú nacu'hua lu Diose equie cunda' bene enu rri'i dula cua'. ¹⁷Ye beenú necha neca, neca dula, pero nu' dula nú la yala nú ati bene.

¹⁸Lia'ahua nediya'ahua nu bee bene enu neca Lli'ñi Diose, la chequia' beella nú rri'i beella dula; xne Jesucristo Lli'ñi Diose neca enu rriucu li'ibeella, nu la nibiya' beze'lu lubeella.

¹⁹Nediya'ahua nú neca'ahua bene' Diose, pero beelá bee bene iliulabe enu la neca bee bene' Diose beze'lu neca enu rnibiyá' lubeei.

²⁰Nu le'ca nediya'ahua nú Jesucristo neca Lli'ñi Diose, nu ube'talanu lu iliulabe nu uxa'lanu lunú neca elliebacua'ahua para nú

chulua'ahua enu mero neca Diose. Lia'ahua nehuañia'ahua cuna li'inu nu cuna Lli'ñinu Jesucristo. Nu li'inu necanu mero Diose, nu equie cuenda' li'inu nu' elunehuañi nú leca xunga laxu. ²¹Bee lli'ñia ubi'yahua li'ihua lu xitse nú nzeli arqui' bee bene nú rnibeei neca diose. Amén.

Carta chiucu nú uquie'e San Juan

Uxe'la Juan saludo

¹Li'á enu rnibiya' lube sa'ahua enu nzeli arquia'ahua Jesucristo, rquie'a carta quie' luhua li'ihua enu ucañila Diose, li'ihua enu nzeli arqui' Jesucristo enu rni nu neli neca. Li'á neli se'ca li'ihua nu laca tucutsia li'á se'ca li'ihua, le'ca seca ye bee bene enu nzeli arqui' Diose li'ihua. ²Li'á se'ca li'ihua xne nchiñi Stichia' Diose arquia'ahua nu siempre nehuañine cuna lia'ahua. ³Pa'ahua Diose cuna Lli'ñinu Jesucristo, ri'inu nu cha nze'ca lu cuenda'hua nu hua'a arqui'nu li'ihua cuna nu liqui'nu nú nzuxee arqui'hua, xne nzequieehua stichia'nu, nu li'inu secanu li'ihua. Diose rnibiya' nú zeca'ahua bee sa'ahua. ⁴Chiqui' ñia utsu arquia chenu ungabiya nu nu' bee sa'lu enu neli nzequie Stichia' Diose, nu nehuañi beella tucu nu rnibiya' Pa'ahua Diose. ⁵Tucu nú se'ca li'ihua, ye bee enu neca sa'ahua ziquia luhua nu rqui'ña nu zecahua bee sa'ahua. Nu lunú rnia luhua nee la necuqui necane, le'ca li'i mandamiento quie' neca nú ubene'la'hua hasta chenu uquixie nú ubene'hua Stichia' Diose. ⁶Tunu

se'ca'ahua Diose rria'ahua tucu nu rnibiya'nu; nu lunú rnibiya' Diose nú ubene'ahua desde chenu uquixie nú ubene'ahuane necane nu rqui'ña nú zeca'ahua bee sa'ahua

Equie cuenda' bee bene enu zequienu arqui' bee bene

⁷Rquie'a bee nucua' luhua xne diqui lu iliulabe enzee huaxi bee bene enu sequienu bee bene, nu la chili arqui'bee nú ube'ta Jesucristo lu iliulabe xi neca tucu bene. Nu bee enu rri'i scua sequienu bee bee bene, nu li'ibeei neca bee enu rri'i condra Jesucristo. ⁸Ubi'yahua li'ihua para nu la nitihua lunú rialahua, equie nu rri'ihua lunú niarqui' Diose. ⁹Tatse bene enu sucu' equielá tucu nu uzete' Jesucristo bee bene, li'illa la nehuañilla cuna Diose, pero enu nzequie stichia' Jesucristo tucu nu uzete'nu bee bene, li'illa nehuañilla cuna Diose nu cuna Lli'ñinu. ¹⁰Tunu nu' enu rri'ña ni'hua para nu zete' nze'e li'ihua tucu nu nzeli arqui' nze'e nu la necane tucu nu uzete' Jesucristo bee bene, la du'hua nze'e li'ni ni'hua nu la ri'ihua caso lunú rni nze'e. ¹¹Xne bee bene enu rri'i caso stichia' bene cua' neca

conformella lunú sequienu bene
cua' bee bene. Último bedichia' nú
rni lu carta quie'.

¹²Huaxi beenú niarquía nia
luhua, pero la niarquía nu
quie'ene lu carta. Nzuquia nú
nzela bi'ya li'ihua para nú li'i

e'cua nia luhua, nu scua junto ñia
tsu arquía'ahua.

¹³Bee bene enu ucañi Diose,
li'ihua bee sa'a enu nzeli
arquía'ahua Jesucristo enu nucua'a
ca'a, xe'la beella saludo luhua.
Amén.

Carta rriuna nú uquie'e San Juan

Rni Juan nu rri'i nze'ca Gayo

¹Li'á enu rnibiya' lubee sa'ahua enu nzeli arquia'ahua Jesucristo, rquie'a carta quie' lulu Gayo enu rquietea, li'ilu enu chiqui' se'ca. ²Tucu nu se'ca li'ilu, scua rnaqua lu Diose lu cuenda'lu nu tucu nú nzequiee nze'calu inziu' Diose, le'ca scua chiu'u nze'calu lunú rri'ilu nu lu'culu elunaaqui. ³Chiqui' ñia utsu arquia chenu ube'ta chiucu chuna bee sa'ahua enu uni lua nú nehuañilu tucu nú rni Stichia' Diose. ⁴Leca ni' tucu nú ri'i nu máse ñia nzu arquia chenu ubenea nu neli nehuañi bee sa'ahua tucu nú rni Stichia' Diose. ⁵Tucu nú se'ca li'ilu Gayo, li'á nia lulu nú chiqui' neca nze'ca nú rri'ilu lubee sa'ahua enu nzeli arquia'ahua Jesucristo, nu máse neca nze'ca nu rri'ilu lubee sa'ahua enu nze'ta stucu luhua. ⁶Xne li'ibeella uni beella ante lu ye bee sa'ahua enu nzeli arquia'ahua Jesucristo nu uri'i nze'calu lubeella. Enze'e rri'i nze'calu tunu rri'ilu elietsa lubeella para nu cheri'i beella seidu viaji nú nzuebeella, xne nucua' riu' arqui' Diose nú ri'ilu. ⁷Xne li'ibeella uchui'u beella para nú nzetixiule'e

beella stichia' Jesucristo lubee bene, nu né nacu' beella ni' tucu elietsa lubee bene enu la chili arqui' Jesucristo. ⁸Enze'e lia'ahua enu nzeli arquia'ahua Jesucristo rqui'ña nú ria'ahua elietsa lubee bene enu rixule'e stichia'nu, xne scua rria'ahua elietsa lubeella para nú ri'i bee bene beya' lunú neli neca.

Lunú necha uri'i Diótrufes

⁹Li'á uquie'ela tucu carta lubee sa'ahua enu nzeli arquia'ahua Jesucristo, pero Diótrufes riu' arqui'i nú nibiya'i, enze'e la ri'i casoi stichia'a. ¹⁰Enze'e, tunu nzelabi'ya li'ihua, che nia lui xne se'tai lia'ahua nu rni eluquichia' equie cuenda' lia'ahua. Nu la ri'i nucua'tsia, le'ca la dete'i ni'i ya'na bee sa'ahua enu nze'ta stucu luhua, nu le'ca la zelai nú dete' bee sa'ahua ni'i beella para nú ya'na bee sa'ahua enu nze'ta stucu luhua, nu li'ibeella enu rdete' ni'i nú ria'na bee sa'ahua la zelai nu chu'u beella liñi indu. ¹¹Sa'a enu nzeli arquia'a Jesucristo enu chiqui' se'ca, la chequieelu nu necha neca, uri'i tucu nu neca nze'ca. Xne bene enu rri'i nu neca nze'ca li'illa

necalla bene' Diose, pero bene enu nzequie inziu nu necha neca la chululla Diose.

Lunu neca nze'ca uri'i Demetrio

¹²Nu equie cuenda' Demetrio ye bee bene rni nu nehuañilla tucu nu rni Stichia' Diose, nu chee rlube' nu xa nehuañilla. Hasta li'iru rniru nú ñia rri'illa, nu li'ilu nediya'lu nu neli nú rniru.

Último bedichia' nu uni Juan

¹³Huaxi nu niarquía nú nia lulu, pero la niarquía nu quie'ene lu carta. ¹⁴Xne nzuquia nú la lea' nzelabi'ya li'ilu, che bedichia'la'a.

¹⁵Diose liqui' nú nzuxe arqui'hua. Bee enu rquiete' lia'ahua enu nucua'a ca'a xe'la beella saludo lulu, le'ca uri'i saludar ye bee enu rquiete'ahua.

Carta nú uquie'e San Judas

Uxe'la Judas saludo

¹Li'á Judas, bichi Jacobo, li'á enu sibi' lu Jesucristo, rquie'a carta quie' luhua li'ihua enu ucañi Diose Pa'ahua, xne secanu li'ihua, nu Jesucristo enu rnibiya' lua'ahua rri'i ucunu li'ihua. ²Diose chiqui' rlu'cu arqui' li'ihua cuna nú liqui'nu nú nzuxe arqui'hua cuna eluseca'nu.

Bee enu la zete' lunú la neli neca

(2 Pedro 2:1-17)

³Bee sa'a enu nzeli arquia'ahua Jesucristo, hasta hua'tu niarquía nú quie'a tucu carta luhua equie cuenda' nú rlu'cua'ahua nú tsila'a Diose lia'ahua. Pero nee uriña bichia nú rqui'ña nú rquie'a carta quie' luhua para nú nia luhua nú bi'yahua lunú nzeli arqui'hua nú uyucu arqui'hua tucutsia bese li'ihua enu neca bene! Jesucristo. ⁴Xne nu' bene enu rri'itsia nú neca beei enu nzeli arqui' Diose para nú cua'atsia beei letahua, li'ibeei enu nediya' nze'ca' Diose nú rialabeei castiya'bee, xne la lliquibeei li'inu. Li'ibeei subeei tucu pretexto nú chiqui' neca nze'ca Diose, che nehuañibeei tucu nú niarqu'i'tsia beei, nu la zelabeei nú nibiya'

Jesucristo lubeei, li'inu enu neca tucutsia cuna Pa'ahua enu rnibiya' lua'ahua.

⁵Añinzuca nú nediya'la'hua lunú nia luhua, pero ellu'cu' zecaa arqui'hua nucua', añinzuca nú uhua Diose bee bene Israel Egipto, pero luze'elá utsana'nu nú unguti bee bene Israel enu lá chilí arqui' li'inu. ⁶Le'ca esquie bee ángele enu né zucu' nú uni Diose nú nibiya' beei elu udete' Diose nú nibiya' beei, li'inu uduche'nu li'ibeei elu máse natsacabe nzu, hasta bichia nu hualunue lu cuenda' bee bene. ⁷Nu le'ca bee bene Sodoma cuna Gomorra cuna beelá bee bene eyeche enza ze'e, li'ibeei chiqui' necha uhuañibeei nu uri'ibeei ye clasia' bee eluhuexe tucu nú niarqu'i'tsia beei. Enze'e nehuañ ulle'ca beei chenu unitilu Diose li'ibeei nu utsiqui'nu li'ibeei, nucua' neca tucu ejemplu para lu yea'ahua.

⁸Añinzuca nú ungae scua, nee le'ca scua rri'i bee bene ze'e rla'nabeei nú cua'atsiabeei letahua, li'ibeei enu seca nú acabeei ri'ibeei tucu nú necatsia elliebacu'bee, nu rnitilubeei le'catsia li'ibeei, la zela beei nú nibiya' Cristo lubeei nu le'ca rnibeei bedichia' nú nechá

neca equie cuenda' bee ángele' Diose. ⁹Pero chenu unixuu arcangel Miguel cuna beze'lu, equie cuenda' cuerpo' Moisés, ni' tucu bedichia' nú necha necha né laca arqui'lla anilla lu beze'lu, unitsialla: “Leta ya Diose tsa'na li'ilu.” ¹⁰Nu bee bene ze'e enu rri'itsia nú nucua'a beei letahua rni beei bedichia' nú chiqui' necha necha, equie nú la ri'ibeei beya', pero equie beenú necha necha cua' rri'ibeei, rri'ibeei nucua' sin nú ri'ibeei elliebacu' xi necha tucu ña'ni, nu enze'e nzenitilu beei li'ibeei lu Diose.

¹¹iCue'bee!, xne nzequie beei inziu' Caín. Cuna nú niarqu'i'tsia beei ri'i beei ana dimi, tucu nú uri'i Balaam, nu zeca beei tucu nú ulle'ca Coré, chenu niarqu'i'i nibiya'i lu Moisés. ¹²Nu le'ca li'ibeei necha beei enu rnitilu eliñi nú rri'ihua chenu riete' sa'hua nu racu juntuhua, racutsia beei sin nú tu'bee! nu la chenu arqui'bee! beelá bee bene, neela'tsia beei nzuebee!, li'ibeei necha beei xi necha xcabe nú la uya' quiu nú ruya' bii cuna xi necha bee aca nú rietsu cuna lue xne la ayune. ¹³Li'ibeei necha beei xi necha inzatu' chenu nelachii tucu nú necha chenu xiu'u lliña lu inzatu', le'ca scua sin nu tu'bee! rri'ibeei beenú nechá necha. Nu le'ca li'ibeei necha beei xi necha quii nú rlaca enza liñibe xne uniti beei inziu' beei; scua para siempre riala beei elu natsacabe nzu.

¹⁴Nu Enoc, enu unga lu achi texcua'a bee bene lulá Adán, li'illa unilla equie cuenda' bee bene cua': “Li'á ulaña Pa'ahua Diose nú nze'tayunu huaxi bee

ángele'nu. ¹⁵Para nú hualunue lu cuenda' ye bee bene, nu ninu xi castiya riala bee bene enu necha rri'i equie cuenda' ye beenú necha necha nú rri'i beei, cuna equie cuenda' bedichia' nú nechá necha nú uni condra beei li'inu, equie nú necha beei bene enu rlu'cu dula.” ¹⁶Bee clasia' bee benequie' leca xi yu' arqui'bee! ye nú se'ta beei, nu rri'itsia beei lunú nze'ta ana arqui'bee! nú ri'ibeei. Le'ca siempre sucu' aya beei le'catsia li'ibeei nu rni nze'ca beei lu cuenda' bee bene para nú riucubeei lunú niarqu'i'bee!.

Xa rqui'ña nú huañi bee bene enu nzeli arqui' Diose

¹⁷Pero li'ihua bee sa'a enu nzeli arquia'ahua Jesucristo, chiqui' se'ca li'ihua. Enze'e ullu'cu' arqui'hua nu bee apóstol' Jesucristo, ¹⁸li'ibeella unibeella: “Chenu nze'ta axula nú láxu iliulabe chu'u bee bene enu tsequichia' lu ye nú nze'ta lu Diose, nu ri'ibeei tucu nú niarqu'i'tsiabee!” ¹⁹Bee clasia' bee benecua' necha enu rri'i nu rle'e sa' bee bene enu nzequie inziu' Diose, nu li'ibeei nehuañi beei tucu nú niarqu'i'tsiabee!, la nehuañibeei cuna Espíritu Santo' Diose.

²⁰Pero li'ihua bee sa'a enu nzeli arquia'ahua Jesucristo enu chiqui' se'ca, utsuta' arqui'hua lunú nzeli arqui'hua, xne lunú nzeli arqui'hua Jesucristo. Nucua' chiqui' lecaxi ná, nu una'cu'hua lu Diose cuna elietsa' Espíritu Santo. ²¹Uquia quiehua eluseca' Diose diqui nú nucua'a quieehua nú riña bichia nú lu'cu arqui' Jesucristo lia'ahua, nu liqui'nu lua'ahua elunehuañi nú leca xunga laxu.

²²Uhua'a arqui'hua bee bene enu sa'sca' arqui'. ²³Uri'ihua elietsa lubee bene enu nza lu inziu nú necha neca, tucu nú rri'i bene enu rri'i elietsa lu bene enu nze zana' lu quii, uzecahua li'ibeei, pero la ri'ihua tucu nú rri'i beei, ubi'yahua para nú la zana'hua lu dula nú rri'ibeei.

Último bedichia nú rni lu carta quie'

²⁴Nu' tucutsia Diose enu rlu'cu nú rnibiya', para nú acanu'nu

li'ihua nú la zana'hua lu dula, para nú ñia nzu arqui'hua nu leca xi nahua riñahua liñibe elu nzucunu. ²⁵Enze'e li'inu enu neca tucutsia Diose, li'inu enu utsila'a lia'ahua lu dula equie cuenda' Jesucristo enu rnibiya' lua'ahua, li'inu rialanu ula'na xne yeene necane para li'inu, nu tucutsia li'inu rlu'cunu poder cuna elu usticia desde hua'tu, nu hasta nee nu diqui tiambu. Amén.

Beenú ulube' Jesucristo lu apóstol San Juan

Ca'a enta bedichia' nú udixiule'e
Diose lu Jesucristo

1 Bee ninguie' neca nú ulube'
Diose lu Jesucristo para nú
le'ca scua lube'nue lube'e bene'nu,
para nú ri'i beella beya' lube'e nú
yamero nzu aca. Nu Jesucristo
uxe'llanu tucu ángele'nu para
nú lube'nu bee nucua' lua, li'á
Juan enu sibi' lunu, ²nu li'á rniá
ye nú neli neca equie cuenda'
Stichia' Diose, cuna equie cuenda'
Jesucristo nu equie cuenda' ye nú
ulañilaa.

³Nza nze'cae equie cuenda' bene
enu rula ichi' quie' nu equie cuenda'
bee bene enu riene' nú xi rnii nu
cuna equie cuenda' bee bene enu
rri'i casoe, nu rixiule'e nú xi nzu
aca, xne nze'ta riñala tiambu nú
aca bee nucua'.

Lunú uquie'e Juan lu achi xcua'a
bee bene' Jesucristo lu iliu Asia

⁴Li'á Juan rquie'a carta quie'
luhua li'ihua bee enu neca bee
bene' Jesucristo, li'ihua bee enu
nucua'a lu achi eyeche nú nchiucu'
lu iliu Asia. Pa'ahua Diose, li'inu
enu neca Diose hasta chenu uquixie

iliulabe, nu nee nu diqui tiambu.
Nu lu achi espíritu enu nucua'a
elu rnibiya'nu nu Jesucristo cuna
bee espíritu cua' ri'i beenu nú cha
nze'cae lu cuenda'hua nu ri'inu nú
nzuxe archi'hua. ⁵Nu Jesucristo
enu neli uni nú neli neca, li'inu
enu rluti uhuañi lu eluti nu li'inu
rnibiya'nu lube'e bene enu rnibiya'
lu iliulabequie'. Li'inu secanu
lia'ahua nu cuna rene'nu uchilanu
stula'ahua, ⁶nu uri'inu nú unga
tucu necatse'ahua cuna poder
nú rlu'cunu, nu le'ca uri'inu nú
neca'ahua ule'ya enu sibi' lu Pa'nu
Diose. iNu lunu riala lu'cu bee bene
ula'na, li'inu enu rlu'cu elurnibiya'
diqui tiambu! Amén.

⁷iUbi'yacuruhua nú nze'tanu leta
xcabe! Ye bee bene lañi' li'inu hasta
bee bene enu utse'e lanza cue'tsenu nú
ungutinu lañi' zeca' beei li'inu, nu ye
bee bene iliulabe chiqui' una' chenu lañi'
beella li'inu, neli nucua' scua acane.

⁸Pa'ahua Diose enu rlu'cu ye
elurnibiya', li'inu enu neca Diose
hasta chenu uquixie iliulabe nu
nee, nu nze'tanu, li'inu uninu equie
cuenda'nu: "Li'á neca xi neca letra
A nu Z", nú rquixie nu rlxu, xne
tucutsia li'á rnibiya'a.

Ulube'lu Jesucristo lu Juan

⁹Li'á Juan neca tucu bene enu nzeli arqui' Jesucristo tucu nú nzeli arqui'hua. Nu tucutse rnibiya' Jesucristo lua'ahua, nu tucutse nehuana se'ca'ahua nu rriquia'ahua equie cuenda'nu. Li'á unga preso equie nú rixiule'a stichia' Jesucristo cuna ye lunú nediya' equie cuenda'nu, lu tucu yuu nú lee Patmos netse lu inzatu'. ¹⁰Chenu necaa preso lu yuu inzatu' ze'e, tucu domingo diquila nú rncua lu Diose ulle'ca xi neca nú rni xcala'a equie cuenda' poder' Espíritu Santo, nu enza di'chia ubenea tucu chii nú neca xi neca chii tucu trompeta nú chiqui' fuerte urixia, ¹¹nú uni:

—Li'á neca xi neca letra A nu Z nú rquixie nú rlxu uquie'e ye beenú rlañi'lu lu tucu ichi' nu uxe'la ichi' quie' lu achi xcua'a bee benea enu nucua'a lu iliu Asia, lu eyeche

Efeso,
Esmirna,
Pérgamo,
Tiatira,
Sardis,
Filadelfia,
nu Laodicea.

¹²Nu chenu ubelletaa nú ri'ya nú ti rni lua, che ulaña achi candelero de oro, ¹³nu labe bee candelero ze'e ulaña tucu bene enu rna xi rna bene enu uxe'la Diose lu iliulabe, nu nutunu tucu laquie nú stuñi nú rriña hasta e'yanu, nu nu' tucu sinchiu latsanu. ¹⁴Niquichiu ichia equienú tucu nú niquichiu ichia tetsu' sanchi nu xi niquichiu iqui, nu rulu siqui' i'culunu xi rulu quii. ¹⁵Nu cuchiu'nu rulusiqui' xi

rulu icu' nú lee bronce chenu netse lu quii, nu fuerte chinu xi fuerte nú rula inza nú huaxi rluca ru'u quiee. ¹⁶Yanu chube nzenenu achi belaa, nu ru'unu xiu'u tucu espada nú chiqui' nelatsa rucu ru'u, nu lunu rulusiqui' tucu nú rnaa bichia chenu juerte rulusiqui' bichia.

¹⁷Chenu ulañianu uyecata e'yanu xi uyecata tucu bene enu ungu'ti. Pero uricu'nu yanu chube equia nu uninu:

—La lliquilu, li'á neca enu rnibiya' hasta chenu uquixie iliulabe nu lalaxu nú rnibiya'a. ¹⁸Li'á ungu'tia, pero nee nehuaña, nu nehuaña diqui tiambu, nu li'á rnibiya'a lu eluti cuna lu ebila. ¹⁹Nee uquie'e, lunú ulañi'la'lu nu lunú rlañi'lu nee nu lunú nze'ta lañi'lu. ²⁰Rluti ixiule'a lunú neca equie cuenda' achi bee belaa enu ulañi'lu yaa chube nu xi rni lu cuenda' achi candelero nú necache' oro: Equie cuenda' achi bee bela cua' rni equie cuenda' achi bene enu rnibiya' lu achi xcua'a bee benea lu iliu Asia, nu lu achi candelero rni equie cuenda' achi xcua'a bee benea.

Bedichia' nú uni Jesucristo lubee bene'nu enu nucua'a eyeche Efeso

2 'Nee uquie'e bee bedichia' nú xe'lalu lu bene enu rnibiya' lubee benea enu nucua'a eyeche Efeso: “Ninguie' uni li'inu enu see labe achi bee candelero de oro, nu enu nzene achi belaa ya chube, li'inu rninu luhua:

²Li'á nediya' ye lunú rri'ihua, nu nediya' nú chiqui' fuerte riña' nú rri'ihua, nu le'ca nediya' nú la

llaca'hua lunú rri'ihua. Nu le'ca esquie nediyaá nú la riqui'hua bee bene enu necha rri'i. Le'ca udete'hua preo bee bene enu rni nú neca apóstol pero laca beei apóstol, nu uri'ihua beya' nú puro eluquichia' rnibeei. ³Li'á nediyaá nú rlu'cu arqui'hua nu nehuana ulle'cahua equie cuendaa nu lá llaca'hua. ⁴Pero nu' tucu nú la yu' arquia rri'ihua, nú la zeca'hua li'á tucu nú secahua li'á hasta hua'tu. ⁵Ullu'cu arqui'hua xneca uzecahua li'á hasta hua'tu nu xneca rri'ihua nee. Uche'ehua arqui'hua lunú rri'ihua, uri'ihua tucu nú rri'ihua hasta hua'tu, xne canu chu liquia castiya luhua nu che la aca'hua tucu ejemplu lubeelá bee bene, tunu la che'ehua arqui'hua lunú necha rri'ihua. ⁶Pero nu' tucu nú neli rri'ihua tucu nú rialane, nú rana arqui'hua nú rri'i bee bene nicolaítas, tucu nú le'ca rana arquia nú rri'ibeei. ⁷Bee bene enu niarqui' yene', uyene'hua lunú rni Espíritu Santo lubee benea: “Bee bene enu rri'i ana lu dula, li'á detea nú aculla ndixi nú rayu lu aca nú rliqui' nú nehuañi bene nzucu liñibe elu nzucu Diose. Bedichia' nú uni Jesucristo lubee bene'nu enu nucua'a.”

Eyeche Esmirna

⁸Nee uquie'e bee bedichia' nú xe'lalu lu bene enu rnibiya' lubee benea enu nucua'a eyeche Esmirna. Nu singuie quie'elu: “Enu rnibiya' desde chenu uquixie iliulabe, nu la laxu nú rnibiya'nu, enu unguti nu uhuañi zeca, li'inu

rninu luhua: ⁹Li'á nediyaá xneca nehuana secahua equie nú nu' xi rri'inu bee bene li'ihua, nu le'ca nediyaá nú secahua elitsi añinzuca nú li'ihua necahua xene equie nú nu'lulahua inziu' Diose. Nu le'ca nediyaá xneca se'ta bee bene li'ihua, li'ibeella enu rni nú neca bee bene Israel nu neca bee bene' Diose, añinzuca nú li'ibeella neca beella bee bene' beze'lu. ¹⁰La lliquihua lunú nehuana secahua, xne beze'lu ri'i nú du' bee bene chiucu chunahua ni'cu' para nú scua aca ahee tunu neli nú nzenalahua inziu' Diose. Nu chi'i bichia nehuana zecahua, nu utsuta' arqui'hua lua hasta chenu atihua che liquia elunehuañi nú leca xunga laxu luhua. ¹¹Bee bene enu niarqui' yene' uyene'hua lunú rni Espíritu Santo lubee bene enu neca bee benea: Bene enu ri'i ana nú la ria' dula la zeca' nze'e castiya nú neca xi neca eluti rruca, nú zeca bee bene.”

Bedichia' nú uni Jesucristo lubee bene'nu enu nucua'a eyeche Pérgamo

¹²Nee uquie'e bee bedichia' nú xe'lalu lu bene enu rnibiya' lubee benea enu nucua'a eyeche llene Pérgamo. Uquie'e: “Li'inu enu nzene espada nú chiqui' nelatsa rucu ru'u, Li'inu rminu luhua:

¹³Li'á nediyaá nú eyeche elu nucua'ahua beze'lu neca enu rnibiya' ze'e. Pero mase nú scua necane li'ihua nzuta' arqui'hua lua nu la tsana' arqui'hua nú nzeli arqui'hua li'á ni' bee bichia nú unguuti bee bene tucu bene enu

lee Antipas, tucu bee sa'hua enu lá tsana' arqui' nú nzeli arqui' li'á, li'illa enu unguuti bee bene eyeche'hua elurnibiya' beze'lu. ¹⁴Pero nu' chiucu chuna beenú la yu' arquia rri'ihua. Nu necane nú le'catsia letahua nucua'a bee bene enu la tsana' arqui' bedichia' nú uzete' Balaam bee bene, nu Balaam udu' arqui' Balac nú xneca du'lla arqui' bee bene Israel para nú acubeella elubacu nú rdete' bee bene u'na lubee enu laca diose enu nehuañi nu para nú ri'ibeella xitse clasia' eluhuexe. ¹⁵Le'ca letahua nucua'a bee bene enu la tsana' arqui' nú rri'i tucu nú rri'i bee bene enu lee nicolaítas. ¹⁶Enze'e tsana' arqui'hua beenú rri'ihua, xne tunu la che'ehua nú xneca nehuañihua, la lea' detea castiyahua cuna espada nú xiu'ru' a. ¹⁷iBee bene enu niarquí' yene' uyene'hua lunú rni Espíritu Santo lubee benea! Bee bene enu uri'i ana lu dula, li'á detea maná aculla, elubacu nú nu' liñibe, nú nu'che' a'chi'. Nu le'ca detea yalla tucu quiee me' nú niquichi elu nequie nombre'lla nú necuqui nú lecati ri'i beya', sino que enu ati'tsia quiee cua' ri'i beya' nucua'."

Bee bedichia' nú uni Jesucristo lubee bene'nu enu nucua'a eyeche Tiatira

¹⁸Nee uquie'e bee bedichia' nú xe'lalu lu bene enu rnibiya' lubee benea enu nucua'a eyeche Tiatira: "Ninguie' neca nú rni Lli'ñi Dióse, enu rulu siqui' i'culu xi rulu icu' nú lee bronce chenu netsee lu quii:

¹⁹Li'á nediya luye nú rri'ihua, nu nediyaa xneca secagua li'á,

nu xneca nzeli arqui'hua li'á, nu nediyaa lu ye beenú rri'ihua por li'á, nu nediyaa nú la llaca'hua xne másela rri'i nze'cahua nee luquela hua'tu. ²⁰Pero nu' tucu nú la yu' arquia rri'ihua nú rriqui'hua Jezabel, una'a enu rni nú rixiule'e Stichia' Dióse. Nu selahua nú sequienunchu bee benea nu rdu'nchu arqui'beella nú ri'ibeella eluhuexe, nu racubeella bee elubacu nú udete' bee bene u'na lubee diose enu la nehuañi. ²¹Li'á udetela tiempo para nú chiecu' arqui'nchu stulanchu nu chili arqui'nchu Dióse, pero la zelanchu. ²²Enze'e nee ri'á nú aca ritinchu nu utanchu lu luna. Nu utia bee lli'ñincho, cuna bee bene enu nehuañi tucu nú nehuañincho, tunu la tsana' arqui'beeí nú nehuañibeeí tucu nú nehuañincho, ²³nu ri'á nú chiqui' nehuaña zecabeeí. Scua ye bee benea ri'i beya' nú li'á nu'lua elliebacu' bee bene cuna xi sa' arqui'beella. Nu li'á liquia lu cada tucuhua equie nu xa uri'i cada tucuhua. ²⁴Pero beelá bee benea enu nucua'a eyeche Tiatira, bee enu la chenala lunú uzete' Jezabel bee bene, li'ihua enu rni nú la chululi lunú a'chi' neca lu cuenda' beze'lu, equie nú la ri'i casohua nucua' la lu'cua'a stucu nú nia luhua. ²⁵Tucutsia nú nia luhua, utsuta' arqui'hua lunú nzelila arqui'hua Dióse hasta bichia nú riña zecaa stucu bese lu iliulabe. ²⁶Bene enu la ria' dula nu sucu' nú rnia ye tiambu nú nehuañilla, li'á detea nú rnibiya'a lulla para nú nibiya'lla lubee

bene iliulabe chenu riña bichia ze'e. ²⁷Scua tucu nú uliqui' Paa lua nú rnibiya'a, le'ca scua liquia nú nibiya'hua lubee bene xi neca tucu bene enu nzene tucu vara nú neca hierro, xi neca chenu rle'e bene tucu etsu scua ri'inunu bee bene enu lá niarqui' azucu' nú rniru, ²⁸nu le'ca detea belaa enu lee lucero rliñi sila' lubeella. ²⁹Bee bene enu niarqui' yene', yene'hua lunú rni Espíritu Santo lubee bene enu neca bee benea."

Bedichia' nú uni Jesucristo lubee bene'nu enu nucua'a eyeche Sardis

3 'Nee uquie'e bee bedichia' nú xe'lalu lu bene enu rnibiya' lubee benea enu nucua'a eyeche Sardis. Uquie'e: "Li'inu enu nzu cuna achi Espíritu' Diose nu nzenenu achi belaa, Li'inu rninu luhua:

Li'á nediya luye nú rri'ihua. Mase nú lubee bene li'ihua nehuañihua, pero para lua neca xi neca nú unguilahua. ²Enze'e netsiña ucuahua. Nu ucuahua nu la nitiluli lu lle'na nú nu'luhua, xne li'á rlaña nú la ri'ihua tucu nú necane ante Pa'ahua Diose. ³Ullu'cu' arqui'hua bedichia' nú ubene'la'hua nu ungalahua, nu scua uri'ihua, nu uche'ehua arqui'hua lunú necha rri'ihua. Xne tunu la nucua'a tsiñiahua che zecahua xi neca chenu tu'natsia rriña tucu huana', scua tu'natsia zecahua castiya. ⁴Pero eyeche Sardis ze'e nucua'a chiucu chuna bee bene enu lecaxi naa nu la lu'cu dula, nu li'ibeella utu beella laquie niquichi cuna

li'á che chenzenu beella li'á xne scua riala nú acane. ⁵Bee bene enu ri'i ana lu dula scua utu beella laquie niquichi, nu la chilaa nombre' beella lu libro elu nzucu ichi nombre' bee bene enu lu'cu elunehuañi nú la laxu liñibe. Nu ante Diose nu ante bee ángele'nu nia nú neca beella bee benea. ⁶Bee bene enu niarqui' yene', uyene'hua lunú rni Espíritu Santo lubee bene enu neca bee benea."

Bee bedichia' nú uni Jesucristo lubee bene enu nucua'a eyeche Filadelfia

⁷'Nee uquie'e bee bedichia' nú xe'lalu lu bene enu rnibiya' lubee benea eyeche Filadelfia: "Uquie'e li'inu enu la lu'cu dula nu li'inu enu rni nú neli neca nu rlu'cu poder tucu nú ulu'cu arre David poder, li'itsianu rlu'cunu poder para nú xa'lanu tucu inziu nú lecati aca tsacu', urre tsacu' tucu inziu nú lecati aca xa'la li'inu rninu luhua:

⁸Li'á nediya luye nú rri'ihua. Nu uxa'lala tucu inziu para nú ixiule'ehua stichia'a lubee bene sin nú caa bee bene nú ri'ihua scua, xne mase nú la lu'cuhua huaxi elurnibiya' pero sucu'hua stichia'a, nu leca bichia nú ucachi'hua nú necahua bee benea. ⁹Nu li'á xe'la li'ihua lubee bene enu nequichia' enu neca bee bene Israel, nu rni nú neca bee bene' Diose, nu bee bene' beze'lu beei nu ri'á nú ye'tabeei tsulliqui beei luhua che ri'i beei beya' nú xneca se'ca li'ihua. ¹⁰Nu scua tucu nú uriqui'hua nú uzucu'hua stichia'a nu lá tsana' arqui'huane, le'ca

scua ri'iuquia li'ihua chenu riña bichia nú nehuana zeca yebee bene lu iliulabe, nú aca xi neca tucu prueba para ye bee bene iliulabe. ¹¹La lea' nú nzela zeca lu iliulabe stucu bese. La tsana' arqui'hua lunú recahua equie cuenda' Diose para nú la ati' stucu bene lunú rialahua. ¹²Bene enu ri'i ana lu dula li'á ri'á nú ati'lla tucu luhuare liñi indu liñibe elu nzucu Diose, ze'e huañili nze'e. Nu tucu parte cuerpo' nze'e quie'a nombre' Pa Diose, nu nombrea nú necuqui neca, nu nombre' eyeche' Diose nú lee Jerusalén nú necuqui neca nu nze'tae enza liñibe elu nzucu Diose. ¹³Bee bene enu niarqui' yene' uyene'hua lunú rni Espíritu Santo lubee bene enu neca bee benea.”

Bee bedichia' nú uni Jesucristo lubee bene enu nucua'a eyeche Laodicea

¹⁴’Nee uquie'e bee bedichia' nú xe'lalu lu bene enu rnibiyá' lubee benea enu nucua'a eyeche Laodicea: “Uquie'e, Li'inu enu sa'alu stichia', Li'inu enu uri'i ye lunú riala ri'inu, Li'inu enu rni nú neli neca, Li'inu enu nzula cuna Diose ante nú quixie iliulabe, li'inu rninu luhua:

¹⁵Li'á nedyaa ye nú rri'ihua. La cua'nahua nú neli chenalahua inziua, pero le'ca lá tsana' arqui'huane, ala' nú neli chenalahuane, iurre tucutse bese chiecu' arqui'huane! ¹⁶Pero li'ihua necahua xi neca inza lle'e, ni' nú aca nelene nu ni' nú aca nucuae, scua tucu nú chu ruahua inza lle'e ze'e ru'uhua, scua la yu' arquia li'ihua. ¹⁷Li'ihua rnhua nú necahua bene xene, ye nú rlu'cuhua nu lecaxi

zeca la'cha'hua. Pero la ri'ihua beya' nú lecaxi lu'cuhua nu necahua bene elitsí, nu lecaxi sibi'hua, nu ni' nú utuhua la lu'cuhua, nu necahua xi neca enu nequie'lu ante lua. ¹⁸Enze'e nia luhua, tucu nú sii bene puro oro, scua ula'nahua nú lu'cuhua ye elietsaa, para nú acahua xene ante lua. Nu tucu nú si bene laquie niquichi rutulla para nú aca achee nú lecaxi nalla, scua uche'ehua arqui'hua para nú tsacu'hua elu netu'hua che aca achee nú lecaxi nahua ante lua. Nu le'ca scua tucu nú sii bene cuana' nú riu'u i'culu bene para nú lañi' nze'ca'lla, scua uri'ihua para nú lu'cuhua poder nú rlu'cua para nú ya'la elliebacu'hua nu lañi'hua xneca nehuañihua. ¹⁹Li'á rnia lubee bene enu se'caa, nu rqui'ya' beella rri'á. Enze'e udu'hua ana arqui'hua, nu uche'ehua arqui'hua lunú necha nehuañihua. ²⁰Ulu'cu cuendahua nú li'á rixia li'ihua, scua tucu nú rixia tucu bene ru'u puerta ni'i stucu bene. Nzuquietsia bi'ya ti ri'i caso Li'á. Tucu nú sene' tucu bene stucu bene para nú chu'u nze'e ni'lla nu acu junto beella. Nu bene enu ri'i caso Li'á, Li'á nzua cuna nze'e, nu bene ze'e nzu cuna Li'á. ²¹Nu bene enu ri'i ana lu dula, Li'á zela nú zucu nze'e cue'tsea elu rnibiyá'a, tucu nú uzucua'a cue'tse Diose Pa liñibe elu rnibiyá'nu chenu uri'á ana lu dula. ²²Bee bene enu niarqui' yene' uyene'hua lunú rni Espíritu Santo lubee bene enu neca bee benea.”

Rlu'cu bee bene ula'na lu Diose liñibe

4 Chenu ulaxu nú uquie'a bee bedichia' quie' uletsa lua nu

ulañia nú na'la ru'u tucu puerta liñibe. Nu le'ca Li'inu enu uni rluti lua enu rlu'cu tucu chii nú xi neca tucu chi trompeta, Li'inu uninu lua:
—Uquie ca'a para nú lubea lulu beenú nzu nú aca, chenu uyalula beenú unila lulu.

²Nu hora ze'e equie poder nú rlu'cu Espíritu Santo, uri'á beya' nú nzula liñibe nu ze'e ulañia tucu xleta nú rnaa xi rnaa xleta' arre rna nu lu xleta ze'e nzucu tucu enu nzucu. ³Nu enu nzucu lu xleta ze'e chiqui' rulusiqui' xi rulu quiee nú chiqui' huaxi seca, nú lee jaspe nu cornalina. Nu equie xleta ze'e nzu tucu litaa, nú rulu siqui' xi rulu tucu quiee nú chiqui' huaxi seca, nú lee esmeralda. ⁴Nu abenchila' xleta ze'e ulañia se ala cheta'cu xleta nú rnaa xi rnaa xleta' arre, nu ze'e nucua'a ala cheta'cu bee bene uxu enu nutu laquie niquichi nu nzucu corona de oro equie beella. ⁵Nu elu nzu xleta nú nzu labe beelá bee xleta ze'e rulu ria'la lee nu rachu beziyu' nu ante xleta nú nzu labe ze'e rulu achi quii, nucua' neca achi Espíritu' Diose. ⁶Nu le'ca ante xleta ze'e ulañia tucu nú rnaa xi rnaa inzatu' nu nebii rnae xi rnaa huana. Nu cue'tse xleta ze'e nucua'a tacu nañi, tucuí cada tucu squiñia xleta ze'e nu lu di'chi cuerpo' beei nzucu chiqui' huaxi i'culubeeí. ⁷Tucu bee nañi ze'e rnaa xi rnaa bichie, stucu nañi rruca ze'e rna xi rnaa u'na', nu stucu nañi rriuna ze'e reca lu xi reca lu bene, nu nañi tacu rnaa xi rna tucu betsiya enu rcuecu'. ⁸Cada tucu lu dacu bee nañi cua' rlu'cu beei xu'cu cuaca beei, nu di'chi bee cuaca beei, nu liñi bee cuaca beei

nchiucu' chiqui' huaxi i'culu beei. Nu bichia si rula' la tsuxe beei nú rni beei:

Santo, santo, santo,
Li'inu necanu Pa'ahua Diose,
nu li'inu rlu'cunu ye poder,
Li'inu enu neca Diose hasta
hua'tu,
nu nee, nu nze'tanu.

⁹Cada chenu rlu'cu bee nañi cua' ula'na lunu, Li'inu enu nzucu lu xleta ze'e, Li'inu enu nehuañi diqui tiambu, cada chenu rnibeeí bedichia' nze'ca lu cuenda'nu nu rdete'beei che'tsa lunu, ¹⁰che ye lu ala cheta'cu bee bene uxu ze'e uzuculliqui beella lu Li'inu enu nzucu lu xleta ze'e, Li'inu enu nehuañi diqui tiambu, nu rlu'cu beella ula'na lunu, nu rricu' beella corona' beella lunu, rnibeella:

¹¹Pa'ru Diose li'ilu riala lu'cu bee bene ula'na lulu,
nu riala ni bee bene bedichia'
nze'ca lulu,
li'itsialu rnibiya'lu,
xne li'ilu ureche'lu ye beenú nu'
lu iliulabe,
Li'ilu unibiya'lu nú chu'u ye nú
nu', nu nu'e.

Ichi' nu Cordero

5 Chenu ulañia li'inu nú nzucunu lu xleta'nu, nzenenu tucu ichi' yanu chube. Nu neyu'chine nu lu di'chii nequie letra, nu neyela'e cuna achi sello. ²Nu hora ze'e ulañia tucu ángele enu naaqui, enu fuerte rni:
—¿Ti riala axi bee sello cua' nu xa'la lu ichi' cua'?

³Pero ni' liñibe, nu ni' luyuu iliulabe, ni' liñi yuu né llela enu

riala xa'la lu ichi' cua', ni' para nú lañi' lunú niquie lue. ⁴Nu Li'á chiqui' runaa xne lecati ulla axe'che ichi' ze'e ni' nú alañi'lla nú xi nequie lue. ⁵Chequie tucu bee bene uxu ze'e uni lua:

—La una'lu. Ubi'yacuru nee lañi'lu nú ullelala bene enu riala xa'la lu ichi' cua' nu axilla achi sello ze'e xne uri'ilalla ana lu yeene, enu neca xi neca bichie lu familia' Judá, equie elurnibiya' nú rlu'culla nu li'illa nze'talla lu familia' arre David.

⁶Nu chenu ri'ya ulañaia, nú labe elu nzu xleta nú ñia rnaa nú rnaa xi rnaa xleta' arre, ze'e nucua'a tacu bee nañi, nu le'ca ze'e nucua'a bee bene uxu, nu elu nucua'a bee bene uxu ze'e nzu tucu Cordero, nu huaxi seña nequie cuerpo'í chenu unguuti bee bene li'í, nu rlu'cuí achi arta equie'í nu achi i'culuí. Nu lu achi i'culuí nucua' neca lu achi Espíritu' Diose nú xe'lanu diqui lu iliulabe. ⁷Che bene enu neca xi neca Cordero uyabicanu nu una'tsenu ichi' ze'e ya bene enu nzucu lu xleta ze'e. ⁸Chenu una'tsenu ichi' nú neyu'chi ze'e, che dacu bee nañi enu nucua'a axu cue'tse xleta'nu ze'e cuna ye ala cheta'cu bee bene uxu ze'e utsulliqui beella lunu. Ye beella nzene beella arpa, nu le'ca nzene beella copa de oro nu liñi xiu'u llene nú ñia rlia, nu llenecua' neca bedichia' nú rnacu' bee bene' Jesucristo lu Diose. ⁹Bee bene uxu cua' rula beella tucu canto cuqui nú rni:

Li'ilu riala na'tselu ichi' cua' nu axilu sello nú neyela'e,

xne li'ilu unguutilu lu cuenda'ru nu cuna rene nú uti'chialu udixiulu para nú tsila'a ye bee bene para nú aca beella bee bene' Diose,

nu lecaxi ri'i tunu xi dialu rni beella o xi familia beella nu xi eyeche nucua'a beella, nu xi nación neca beella.

¹⁰Li'ilu uri'ilu nú unga tucunecatse bee bene lu elurnibiya' nú rlu'culu nu uri'ilu nú unga beella ule'ya enu sibi' lu Pa'ahua Diose, nu nibiya' beella lu iliulabe.

¹¹Che chu ulañaia nu ubenea chi huaxi bee ángele abenchila' xleta elu nzucu li'inu enu rnibiya' cuna bee enu nehuañi cuna bee bene uxu. Nu huaxi añi millón neca beella.

¹²Nu chiqui' fuerte rni beenu: Benecua' enu neca xi neca Cordero li'inu enu unguuti riala nú lu'cunu elurnibiya', nu eluxene; nu lu'cunu elliebacu' nu elunaaqui, nu ula'na, nu zucu' aya bee bene li'inu nu nii bee bene bedichia' nze'ca lunu.

¹³Chequie ubenea chii ye beenú ureche' Diose, beenú nu' liñibe, beenú nu' lu iliulabe, beenú nu' liñi yuu, beenú nu' lu inzatu', rnibee: iLi'inu enu rnibiya' nzucu lu xleta, nu bene'nu enu neca xi neca Cordero, li'ibeenu riala beenu elurnibiya', nu riala nibee bene bedichia' nze'ca lubeenu, nu ni nze'ca bee bene lu cuenda' beenu diqui tiambu, nu leca xunga laxu nú ri'i bee bene scua!

¹⁴Nu uni dacu bee enu nehuañi ze'e:

—iAmén!

Nu ye alacheta'cu bee bene uxu ze'e utsulliqui beella para nú lu'cu beella ula'na lunu, Li'inu enu leca xunga laxu nú nehuañi.

Equie cuenda' achi sello

6 Che ulaña nú unguxi bene enu neca xi neca Cordero tucu lu achi sello ze'e, nu ubenea chi tucu bee nañi ze'e, fuerte xi neca chenu rachu beziyu' nu uninu:

—iUtee ca'a!

²Nu che ri'ya nu ulaña nú ulube'lu tucu huayu niquichi ze'e, nu enu nchiucu' equieí nuya' tucu hua'tse. Nu ungu'ti'lla tucu corona lunú uri'illa ana, nu uchiu'ulla para nú nze ri'illa ana.

³Chenu unguxi Cordero ze'e sello rrucu, che ubenea nú uni enu rrucu nehuañi ze'e:

—iUtee ca'a!

⁴Nu che ulube'lu tucu huayu nelu, nu enu nchiucu' equieí ungu'ti' tucu espada llene cuna poder para nú liu bee bene nu útisa' bee bene.

⁵Chenu unguxi Cordero ze'e sello rriuna, che ubenea nú uni enu rriuna nehuañi ze'e:

—iUtee ca'a!

Che ulaña nú ulube'lu tucu huayu natsa, nu enu nchiucu' equieí nzene tucu llica beya'. ⁶Nu labé dacu bee enu nehuañi ze'e ubenea tucu chii enu uni: —Tucu kilo trigo zeca tucu bichia riña' bene, nu chuna kilo cebada zeca tucu bichia riña' bee bene, pero la nitilulu aceite cuna viño.

⁷Chenu unguxi Cordero ze'e sello tacu, che ubenea nú uni enu tacu nehuañi ze'e:

—iUtee ca'a!

⁸Che ulaña nú ulube'lu tucu huayu nachí lua, nu enu nchiucu' equieí lee eluti, nu enu nze'tanala li'í lee ebila. Unguti' bee nucua' poder para nú úti bee nucua' tucu lu tacu parte bee bene iliulabe. Texcua'a beella ati equie nú liunu sa'beella, nu texcua'a beella ati ichia biña, nu elichia, nu úti bee nañi dañi li'ibeella.

⁹Chenu unguxi Cordero ze'e sello ayu', ulaña e'ya altar ze'e bee espíritu' bee bene enu ungu'ti' bee benequie' bee enu udixiule'e Stichia' Diose nu utsuta' arquibeella lu stichia'nu. ¹⁰Nu fuerte ubixiali beella nú unibeella:

—Diose enu rlu'cu ye poder, li'ilu enu la lu'cu dula nu rri'ilu tucu nú necane, ¿se xala tiembu rle'e para nú ri'ilu elu usticia'lu lubee bene enu udiñi li'iru lu iliulabe para nú ixiu beella lunú uri'inu beella li'iru?

¹¹Che cada tucu beella ungu'ti' beella laquie niquichi ungu'tu beella nu uni Cordero ze'e lubeella nú cua'aquiesca' beella lle'na tiembu, hasta nú za' beela sa' beella enu nzeli arquí' Jesucristo, xne rri'isca'la nú ati beela bee sa' beella tucu nú ungu'ti' beella, li'ibeella enu le'ca sibi' lu Diose.

¹²Chenu ulaña nú unguxi Cordero ze'e sello xu'cu, che fuerte uxuu, nu bichia unga natsa xi natsa tucu laquie nú natsahua, nu guu unga neluu xi neluu rene, ¹³nu bee belaa enu nu' liñibe uzana' lu yuu iliulabe xi sana' bee higos nú niye' nu' lu aca'e chenu reca tucu bi fuerte. ¹⁴Nu liñibe unitilu xi richi tucu rollo ichi', nu yeebe dañi

nu bee yuu nú nchiucu' lu inzatu' uche'e bee luhuare'e. ¹⁵Che ye bee arre lu iliulabe cuna beelá bee usticia, nu bee enu rnibiya' lubebe sundado, nu bee bene xene, nu bee enu rlu'cu elurnibiya' lu yeene, nu bee esclavo, nu bee enu laca esclavo ye beella ucachi'lu beella liñi bee yube' nu liñi bee quielaa nú nu' dañi. ¹⁶Nu unibeella lu dañi nu lubebe quiee:

—Utsa'cu'hua equieru, nu uca'chi' li'iru lu bene enu rnibiya' nzucu lu xleta nú neca equie, nu lu castiya nú dete' Cordero li'iru.

¹⁷Xne uriñala bichia nú chiqui' dete' Diose castiya bee bene, ¿nu lecati riqui' castiya cua'?

Equie cuenda' 144 mil bee bene Israel enu nequie sello

7 Chenu ulaxu nú ulañia bee nucua', che ulañia tacu bee ángele bee enu nucua'a tacu squiñia iliulabe para nú la zela beenu nú aca bi enu enta dacu squiñia iliulabe, para nú la aca bi lu iliulabe, ni' lu inzatu', ni' lu ni' tucu bee aca. ²Che ulañia stucu ángele enu nze'ta enza rliñi bichia, nzenenu sello' Diose enu nehuañi. Nu che fuerte uni ángele quie' lu dacu bee ángele enu ungutí' poder para nú la ri'i bee ángele cua' equiya lu iliulabe nu lu inzatu':

³—La ri'ihua equiya lu iliulabe, ni' lu inzatu', ni' lubebe aca, hasta nú la'xuru quie'eru sello' Diose'ru tequiee bee bene'nu.

⁴Nu ubenea nú calu neca bee bene Israel enu nequietsia sello tequiee. Nu luye beella, neca ciento cuarenta y cuatro mil bee bene

enu nequie sello tequiee. ⁵Xne chi'chiucu mili bee bene enu nze'ta lu familia' Judá bee enu uquie sello cua'.

Nu le'ca chi'chiucu mili bee bene enu nze'ta lu familia' Rubén, nu le'ca chi'chiucu mili bee bene enu nze'ta lu familia' Gad.

⁶Nu le'ca chi'chiucu mili bee enu nze'ta lu familia' Aser, nu le'ca chi'chiucu mili bee enu nze'ta lu familia' Neftalí, nu chi'chiucu mili bee enu nze'ta lu familia' Manasés,

⁷nu le'ca chi'chiucu mili bee enu nze'ta lu familia' Simeón, nu le'ca chi'chiucu mili bee enu nze'ta lu familia' Leví, nu chi'chiucu mili bee enu nze'ta lu familia' Isacar,

⁸nu chi'chiucu mili bee enu nze'ta lu familia' Zabulón, nu chi'chiucu mili bee enu nze'ta lu familia' José, nu chi'chiucu mili bee enu nze'ta lu familia' Benjamín ye bee familia quie' uquie sello tequie beella.

Huaxi añi bee bene nutu laquie niquichi

⁹Lu ze'ela ulañia huaxi añi bee bene, enu enta lubebe nación nu lubebe eyeche, nu bee bene enu enta leta yelu bee familia nu yelu clasia' dialu rni beella. Nucua'a beella enza lu xleta' bene enu rnibiya' nu lu Cordero, nu huaxi añi beella hasta nú leca' ti ri'i ana lacu' beella, nu nutu beella laquie niquichi, nu nzene beella iñia. ¹⁰Ye beella ubixiali beella nu unibeella:

Pa'ru Diose neca enu utsila'a
li'iru nu nzucunu lu xleta,
nu chiqui' rnibiya'nu cuna
Cordero'nu.

¹¹Nu ye bee ángele enu nucua'a
abenchila' xleta'nu cuna ye bee ala
cheta'cu bee bene uxu nu dacu bee
enu nehuañi, nucua'a abenchila'
xleta'nu ze'e, che utsulliqui bee
ángele ze'e elu nzucunu hasta nú
udi' tiquiee beella lu yuu para nú ni
beella bedichia' nze'ca lunu, ¹²nu
uni beenu:

iAmén! Li'inu enu rlu'cu ye
poder nu juerza
nu elliebacu' nu riala nú lu'cu
bee bene ula'na lunu,
nu zucu' aya bee bene li'inu
nu dete' bee bene che'tsa lunu,
nu ni bee bene bedichia' nze'ca
lunu,
ye tiambu li'inu enu neca
Pa'ahua Diose. Amén.

¹³Hora ze'e tucu lu alacheta'cu
bee bene uxu ze'e unedichia' lua:
—¿Ti neca bee bene enu nutu
laquie niquichi cua', nu ca bene
beella?

¹⁴—Nu ucuauia, la ri'á beya'
Detá, li'ilu nediya'lu.

Che uni nze'e:

—Li'ibeella neca beella bee bene
enu chiqui' nehuaana ulle'ca, nu nee
nequichiuu xucu beella equie nú
utsana' arquibeella stula beella,
equie cuenda' rene' Cordero' Diose.

¹⁵Enze'e nucua'a beella lu xleta'
Diose nú neca equie nu bichia
si rula' sibi' beella liñi indu elu
nzucunu, nu li'inu enu nzucu lu
xleta nú neca equie ze'e, nzunu
cuna li'ibeella, nu li'inu rriucunu
li'ibeella. ¹⁶Nu leca' bichia nú

lia'na' beella, nu bichi' beella, le'ca
la tsiquia' be'bichia li'ibeella nu
ni' la aca nelea' zeca beella, ¹⁷xne
Cordero enu nzu elu nzucu Diose.
Li'inu bi'yanu li'ibeella tucu nú
rriucu tucu bene bee sanchi, nu
uya'nu li'ibeella elu rliñi inza nú
rliqui' elunehuañi, che Diose ñie'e
ye inza nú unguna' beella lubeella.

Sello achi

8 Chenu unguxi Cordero sello
achi ze'e, che chistete unga
liñibe casi arula' hora. ²Che ulaña
achi bee ángele enu nucua'a lu
Diose, nu una'tse beenu tucua
trompeta tucu beenu. ³Che uriña
stucu ángele utsu ru'u ecu'cu ze'e
nuya' icu' nú rdu' llene quiendixi
nu necache'le oro, che udeté' tucu
enu udeté' huaxi quiendixi yanu
para nú du'nue liñi icu' ze'e, nú
nzu elu nzu xleta nú neca equie nú
rnaa xi rnaa xleta' arre, para nú
quienuu llene quiendixi ze'e ye bee
bedichia' nú rnacu' bee bene' Diose
lu Diose. ⁴Nu bee llene quiendixi nú
uchiu'u desde ya ángele cuna bee
bedichia' nú unacu' bee bene' Diose
lunu, uriñae hasta lu Diose. ⁵Che
ángele ze'e uriche liñi icu' nú riu'u
quiendixi cuna huaa nú nucua'a
ru'u ecu'cu ze'e nu utsi'quinu
bee huaa ze'e lu iliulabe. Nu che
unguchu beziyu', nu ungula, nu
uya'la lee, nu unga tucu xuu fuerte.

Bee trompeta

⁶Lu achi bee ángele enu nzene
trompeta ze'e, utsu tsiña beella
para nú bixia beella trompeta.

⁷Chenu ubixia ángele rluti
trompeta'nu, che ulaca quiuquiee

lu iliulabe nu quiié nú nucha rene, nu ulacae lu iliulabe. Nu casi arli'ti' iliulabe ubiqui cuna casi arli'ti' bee aca ubiqui.

⁸Chenu ubixia ángele rruçu trompeta'nu che uyecata tucu nú rnaa xi rnaa dañi llene nú rulue xi rulu quii nu uzana'e lu inzatu' nu casi arli'ti' inzatu' ze'e unga rene.

⁹Nu unguți casi arli'ti' bee nañi enu nehuañi lu inzatu', nu le'ca casi arli'ti' bee barco nú nucua'a lu inzatu' ze'e ulaxu.

¹⁰Chenu ubixia ángele rriuna trompeta'nu, che uyecata tucu belaa llene enu rulu xi rulu tucu antorchia, equie bee chuna parte re'cu nú rliñi inza. ¹¹Nu belaa cua' lee Ajenjo; nu casi arli'ti' bee inza iliulabe unga nelaa, nu equie cuenda' bee inza cua' huaxi bee bene unguți equie nú unga nelaa bee inza cua'.

¹²Nu chenu ubixia ángele tacu trompeta'nu, che unga necabe casi arli'ti' bichia, nu le'ca esquie guu nu le'ca esquie casi arli'ti' bee belaa unga necabe. Nu lunú lá du'lliea' bee belaa cua' che casi arli'ti' bichia nú rulu lá chua'a ellie'e.

¹³Diquila nú ri'ya bee nucua', che ulañia tucu betsiya enu rcuecu' enza liñibe: Nu chiqui' fuerte unii:

—iCue'curu', cue'curu', nu cue'curu'! iBee enu nucua'a lu yuu iliulabe, chenu bixia xuna bee trompeta nú rri'i falta nú bixia xuna bee ángele!

9 Chenu ubixia ángele ayu' trompeta'nu che ulañia nú uyecata tucu belaa enu enta enza liñibe luyuu iliulabe, nu belaa ze'e unguți' liabe nú xa'la ru'u tucu

i'chiu llene nú leca resuna cá neca rqui'. ²Nu chenu uxa'la ángele ze'e ru'u i'chiu ebila uchiu'u huaxi llene ru'e xi xiu'u llene liñi tucu horno llene, hasta nú utsacu' bee llenecua' lu bichia nu lubee bii.

³Leta llene ze'e uchiu'u bee culucha enu uri'chialetse diqui lu iliulabe nu unguți' beé poder para nú unga nelachi beé, xi nelachi bee nañi lliqui. ⁴Pero lá alu'cubeé permiso nú ari'i beé equiya lubee ixixata nu lubee aca nu ni' lubee huañi niye', sino que ri'itsia beé equiya lubee bene enu la nequie sello' Diose tequiee. ⁵Pero lá ati'beé permiso nú úti beé bee bene, sino que ri'itsia beé nú nehuaña zeca bee bene diqui ayu' guu. Nu xi rana elu rutu bee nañilliqui chana elu utubeé bee bene.

⁶Bee bichia ze'e la'na bee bene xneca modo atibeella, pero la llela' beella xneca modo atibeella, niarquibella nú atibeella, pero leca modo nú atibeella.

⁷Bee culucha ze'e rnaa beé xi rnaa bee huayu enu nucua'a tsiñiala para nú cha lu xuu, nu equie beé nzucu tucu nú rnaa xi rnaa corona de oro, nu lubeeé rnaa xi rnaa lu bene. ⁸Nu ichia equie beé rnaa xi rnaa ichia equie bee una'a, nu laya beé rnaa xi rnaa laya bichie. ⁹Diqui latsa beé nu' tucu nú rnaa xi rnaa icu', nu cuaca beé xichi xi xichi chenu riecaxu'u huaxi bee huayu cuna aca reta'beé lu xuu. ¹⁰Nu lluaña' beé rnaa xi rnaa lluaña' bee nañi lliqui, nu lu pundo' lluaña' beé nzucu xcuchuí nú rutu bee bene nu rri'i nú nehuaña seca bee bene diqui lu ayu' guu. ¹¹Nu bee culucha ze'e nu' tucu

enu rnibiya' lubeéi, nu nze'e neca tucu ángele' beze'lu, ángele ze'e lee Abadón dialu hebreo, nu dialu griego lee ángele ze'e Apolión nu bedichia' cua' rni enu rla'xulí.

¹²Scua ulaxu primero nú nehuana zeca bee bene, pero neelá enta xiu'cu nú nehuana zeca bee bene.

¹³Chenu ubixia ángele xu'cu trompeta'nu, chequie ubenea tucu chi nú uchiu'u labe dacu squiña ecu'cu nú necache' oro nú nchiucu' lu Diöse. ¹⁴Nu chii ze'e nú ubenea uni lu ángele xu'cu enu nzene trompeta:

—Ula'a dacu bee ángele enu naca'cuu ru'u re'cu llene nú nu' inza nú lee Eufrates.

¹⁵Che scua ula'a dacu bee ángele ze'e para nú uti bee nze'e casi arli'ti' bee bene iliulabe xne para enze'e nucua'a bee ángele ze'e para bee bichia nu guu nu lana nú aca bee nucua'. ¹⁶Nu li'á ubenea nú calu neca bee sundado, nu neca chiucu ayu'u millón bee sondado enu nchiucu' equie bee huayu ze'e.

¹⁷Scua ulaña bee huayu ze'e cuna bee sundado enu nchiucu' equie beéi. Nu bee sundado enu nchiucu' equie beéi diqui latsabeei nu' tucu icu' nú neluu, nu azul, nu naachi, nu lluca equie bee huayu ze'e rnaa xi rnaa lluca equie bee bechiee nu ru'u beéi xiu'u quii, nu llene, nu azufre. ¹⁸Nu casi arli'ti' bee bene iliulabe ungti cuna quii nu llene nu azufre nú xiu'u ru'u bee huayu ze'e. ¹⁹Nu cuna poder nú rlu'cu bee huayu ze'e nu cuna ru'u beéi nu lu pundo' lluana' beéi ruuti beéi bee bene nu rri'i beéi nú nehuana seca bee bene, xne lu pundo' lluana' beéi rnaa xi rnaa lluca equie be'la.

²⁰Pero beelá bee bene enu lá ati, equie cuenda' nú nehuana ulle'ca beella, lá tsana' arqui'beella nú uri'ibeella nú necha neca, nu ulu'cu beella ula'na lubee benechiqui' nu lubee diöse enu necache' oro, plata, bronce, quiee nu aca, nú la ye'e lu, nú la yene' nu la tsee. ²¹Nu le'ca lá tsana' arqui'beeí nú ruuti beei bee bene. Nu la tsana' arqui'beeí nú rdu'ixiu beei bee bene, nu la tsana' arqui'beeí nú rri'i beei eluhuexe, cuna nú rri'ibeei eluhuana' Le'ca né tsana' arqui'beeí nú rri'i beei eluti, cuna nú rri'i beei elu uliñi, cuna nu rri'i beei eluhueexe cuna nu rri'i beei eluhuana'.

Ángele enu nzene tucu ichi'

10 Chela ulaña stucu ángele enu chiqui' naaqui, enu nze'ta enza liñibe leta xcabe nu equienu nzu tucu lítaa. Nu lunu rulusiqui' xi rulu bichia nu cuchiu'nu rnaa xi rnaa quii nú sulí luu, ²nu nzenenu tucu ichi' nú neyu'chi nu na'la lue. Nu utsunu cuchiu'nu chube lu inzatu', nu cuchiu'nu chubeca utsunu lu yuu iliulabe. ³Che fuerte urixialinu xi neca chenu rluhua tucu bichiee nu chenu ubixianu che uni achi beziu'. ⁴Chenu ulaxu nú uni achi beziu' ze'e, che nzequie'a lunú uni bee beziu' ze'e, che ubenea tucu chi nú uni lua desde liñibe, nú uni:

—La quie'elu lunú uni achi bee beziu' cua', xne la yala nú acabiya' bee bene nucua'.

⁵Nu ángele enu ulaña nú nzulí lu inzatu' nu luyuu iliulabe uletsanu yanu chube enza liñibe, ⁶nu uquie'e ángele ze'e Diöse'lla li'inu enu neca

Diose enu nehuañi, enu ureche' liñibe, nu iliulabe, nu inzatu' nu ye beenú nu' liñibe nu lu iliulabe nu lu inzatu':

—Nu la lea' nú nzu nú aca bee nucua'. ⁷Xne bichia chenu bixia ángele achi trompeta'nu, bichia ze'e aca tucu nú rri'i Diöse elliebacu', elliebacu' nú lasca' chulu bee bene tucu nu udixiule'elanu lubee profeta enu sibi' lunu.

⁸Chequie uni zeca'la chi nú unila lua desde liñibe, nu uni:

—Uquia na'tse ichi' nú neyu'chi nu na'la lu ya ángele enu nzu lu inzatu' nu luyu iliulabe.

⁹Che uya'a elu nzu ángele ze'e, nu unia lunu nú liqui'nu ichi' nú neyu'chi ze'e ya nu uninu lua:

—Una'tse nu udacue. Nu liñi ru'ulu tsi'lu nú ndixi xi ndixi lliñia, pero chenu lacae xla'culu chiqui' aca nelae.

¹⁰Chequie una'tsea rollo ichi' ze'e ya ángele ze'e, nu udacune. Nu ru'a utsi'a nú ndixi xi ndixi lliñia, pero chenu ulaxu nú udacune utsu nelá xla'cua. ¹¹Chequie uni ángele ze'e lua rqui'ña nú ixíule'e zecalu lubee bene lunú rni Diöse nú aca lu huaxi bee nación, nu lubee arre nu lubee eyeche, cuna lubee bene enu rni yelu clasia' dialu.

Chiucu bene enu rixiule'e Stichia' Diöse

11 Che ungtia tucu bara nú rtexe nú rnaa xi rnaa etaa. Nu uni tucu chi lua:

—Utsuli uquia texe indu' Diöse nu cuna ecu'cu nú nzucu liñi indu ze'e, nu ula'cu' calu neca bee bene enu rdete' ula'na lu Diöse liñi indu

ze'e. ²Pero la texelu labe ele'ya' indu ze'e xne necane nú udete'la Diöse lubee bene enu laca bee bene Israel, nu nibiya' beei lu eyeche Jerusalén xatse modo nú niarqui' beei diqui chuna lana arula'. ³Nu li'á xe'la chiucu bee benea bee enu ni equie cuendaa. Rucu beella utu beella laquie natsa nú nelatsa. Nu li'ibeella ixíule'e beella stichia'a diqui chuna lana arula'.

⁴Rucu bee bene cua' neca rucu bee aca olivo nu rucu bee candelero nú nchiucu' lu Pa'ahua Diöse enu rnibiya' lu iliulabe. ⁵Tunu nu' bee bene enu niarqui' xi ri'inu li'ibeella, ru'u beella chiu'u quii para nú útibeella bee bene enu rlee lubeella. Scua ati bee bene enu niarqui' xi ri'inu li'ibeella. ⁶Rucu bee bene quie' rlu'cu poder para nú tsacu' beella liñibe para nula laca' quii diqui neca tiambu nú ixíule'e beella Stichia' Diöse lubee bene, nu le'ca rlu'cu beella poder para nú ri'i beella nú aca inza rene, nu le'ca ri'i beella nú zeca bee bene huaxi castiya lu iliulabe xalatse tiambu nú niarqui' beella.

⁷Pero chenu ulaxu tiambu nú udixiule'e beella Stichia' Diöse lubee bene, chequie tucu nañi enu necha rnaa nu nelachi chiu'u ebila, liñi tucu i'chiu llene nú leca resuna ca neca rqui', nu liunú li'ibeella nu ri'f ana lubeella nu úti' li'ibeella.

⁸Che ya'na cuerpo' beella labe calle Jerusalén elu ungti Jesucristo lu cruse, li'inu enu rnibiya' lubeella, nu eyeche quie' iguale necha nehuañi bee bene xi uhuañi bee bene Sodoma nu Egipto. ⁹Nu ye clasia' bee bene enu rni yelu clasia'

dialu, bee enu nze'ta lubeelá bee eyeche, nu bee bene enu nze'ta stucu bee nación lañi' nú nuxu cuerpo' bee benecua' labe calle Jerusalén chuna bichia arula', nu la zela bee bene enu enta enza istu cua' nú achi' cuerpo' bee bene ze'e. ¹⁰Nu bee bene enu nucua'a lu iliulabe chiqui' xila'beeí nú ungui bee benecua', nu equie nú chiqui' ñia nzu arquí'beeí nú ungui bee benecua', lia udeté' beeí nú udeté' beeí ya sa'beeí, xne li'íbeeí ulle'ca beeí nú bee benecua' uri'i nú nehuana ulle'ca beeí.

¹¹Chenu dete chuna bichia arula', ri'i Diose nú huañi zeca bee bene cua' nu zetebeella, nu ye bee bene enu lañi' nú aca bee nucua' chiqui' lliqui beeí. ¹²Chequie hora ze'e rucu bee bene ze'e ubene' tucu chi enza liñibe nú uni:

—Uquieehua ca'a.

Nu che uquie beella liñibe liñi tucu xcabe ante lubee bene enu ulee lubeella. ¹³Nu hora nú uquie bee benecua' liñibe unga tucu xuu fuerte nu uluquie tucu parte eyeche ze'e, nu achi mili bee bene ungui. Nu ye bee bene enu né ati chiqui' ulliqui beeí nu unibeeí bee bedichia' nze'ca lu Diose enu nzucu liñibe.

¹⁴Scua udetela chiucu bese nú nehuana ulle'ca bee bene, pero nee nze'ta bese rriuna nú nehuana zeca bee bene.

Equie cuenda' trompeta achi

¹⁵Chenu ubixia ángele achi trompeta'nu, che fuerte ubene bee chii enza liñibe nú uni:

Uriñala bichia nú ya'na ye poder nú nu' lu

iliulabe ya Pa'ahua Diose cuna Jesucristo,
nu li'inu nibiya'nu ye tiambu nu diqui tiambu,
uni chi ze'e.

¹⁶Nu che ala cheta'cu bee bene uxu enu nucua'a lu xleta ante lu Diose, utsulliqui beella lunu, hasta nú udi' tequie beella hasta lu yuu, nu ulu'cu beella ula'na lunu, ¹⁷nu unibeella:

Pa'ru Diose, li'ilu enu rlu'cu ye poder,

li'ilu enu neca Diose nee, nu hasta hua'tu nu nze'ta, che'tsalálu xne rlu'be'lu nú chiqui' rlu'culu poder, nu uquixie nú rnibiya'lálu.

¹⁸Bee bene iliulabe ulee, pero uriñala bichia nú dete'lu castiya bee bene, nu uriñala bichia nú hualulue lu cuenda' bee bene enu ungutilla para nú dete'lu lunú riala ati'

bee bene'lu bee profeta, enu sibi' lulu nu bee bene enu uchili arquí' stichia'lu, uriñala bichia nú bee bene uxu nu bee bene enu nere'ne', enu rlu'cu ula'na lulu riala nú ati'beella lunú riala ati' beella, nu nitilulu bee bene enu necha rri'i lu yuu iliulabe.

Unibeella.

¹⁹Chenu ulaxu nú uni chii ze'e scua, uya'la Indu' Diose nú nzucu liñibe, nu unga achee iñia nú nu'che' nú ucuaqui u'na Diose hasta hua'tu. Che uquixie nú uya'la lee, nu uyene huaxi bee chi nú fuerte, nu uni bezíu', nu uxuu, nu ulaca tucu quiu quiee nú chiqui' fuerte.

Una'a nu nañi enu lee dragón

12 Luze'ela uyu'u tucu seña llene enza liñibe. Chequie ulube'lu tucu una'a nu vestido'nchu neca bichia nu nzucunchu equie guu, nu equienchu nzucu tucu corona nú necache' chi'chiucu belaa. ²Nu nu' endu' xla'cu una'a cua' nu chiqui' fuerte rixialinchu equie nú rlachi xla'cunchu nú ala endu'nchu. ³Pero unga achee stucu seña liñibe. Nu ulube'lu tucu nañi enu neluu nu nelliqi rnaa lee dragón nu achi lluca quieí, nu chi' arta equieí nu nzucu tucu corona cada tucua lluca equieí. ⁴Cuna lluana'í utsi'quí casi arli'ti' bee belaa lu yuu iliulabe. Nu nzuí lu una'a ze'e para nú acuí endu'nchu chenu alanu. ⁵Nu una'a ze'e unganu tucu endu' niyu, nu li'ínu rqui'ña nú nibiya'nu luye bee bene iliulabe, cuna tucu vara nú neca icu'. Nu chenu ungula endu' me' ze'e uyetsu xu'unu ya na'nu, nu uriñanu ante Diose elu nzucu Diose rnibiya'. ⁶Nu una'a ze'e uyecaxu'u nza enza lu yuu achi elu utsuche' Diose tucu luhuare elu zucunchu nu dete' bee bene nú acunchu diqui mil dociento sesenta bichia.

⁷Che unga xuu liñibe, nu arcángel Miguel cuna bee ángele'lla uliunu beella dragón cuna bee ángele' dragón. ⁸Pero lá ri'i bee ángele cua' ana lubee arcángel Miguel, nu leca' modo ahuañi beelí liñibe cuna beesa'í. ⁹Nu che scua utsi'qui bee ángel' Miguel dragón cuna bee ángele'í lu iliulabe. Dragón cua' neca be'la enu lee serpiente enu nehuañi hasta hua'tu enu

lee beze'lu nu benechiqui', enu sequienu ye bee bene iliulabe.

¹⁰Che ubenea tucu chi fuerte enza liñibe nú rni:

—Uriñala bichia nú utsila'a Diose lia'ahua, nu uriñala elurnibiya'nu, nu nibiya'nu cuna Jesucristo lua'ahua xne uchiu'uchula enu xanabitsi lu cuenda' bee sa'ahua, li'i enu la tsuxe nza xanabitsi lu cuenda' bee sa'ahua ante lu Pa Diose bichia si rula'. ¹¹Nu bee sa'ahua enu nzeli arqui' Jesucristo uri'i beella ana equie cuenda' rene' Cordero' Diose nú uti'chianu chenu ungutinu, nu cuna nú xneca udixiule'e beella Stichia' Diose, nu la lliqi beella mase nú atibeella. ¹²Enze'e ñiatsu arqui' yehua, enu nucua'a liñibe, pero icue' bee bene enu nucua'a lu iliulabe nu lu inzatu'! Xne ulacala beze'lu elu nucua'ahua nu chiqui' rlei, xne nediya'la'i nú lle'natsia tiambu nebiya'lai.

¹³Chenu ulañi' dragón ze'e nú uzana'í luyuu iliulabe, chequie uyanalaí na' endume' ze'e. ¹⁴Nu chequie uzucu chiucu cuaca una'a ze'e nu rnaa cuacanchu xi rnaa cuaca bitsiya enu llene, para nú aca cuecu'nchu para nú cachi'lunchu lu dragón ze'e hasta luyuu achi, elu rqui'ña nú huañinchu durante chuna lana arula' nu ze'e ati'nchu nú acunchu. ¹⁵Nu ru'u dragón ze'e uchiu'u huaxi inza xi neca tucu re'cu para nú uya' una'a ze'e. ¹⁶Pero uya'la luyuu nu uguatse' ye inza nu uchiu' ru'u dragón ze'e luyuu. Scua uri'i yuu elietsa lu una'a ze'e. ¹⁷Che chiqui' ulee

dragón lu una'a ze'e, nu uyaliunuí beelá bee familia' una'a ze'e, bee enu sucu' Stichia' Diose nu rixiule'e stichia' Jesucristo.

Chiucu nañi enu necha rnaa

13 Chequie utsuli dragón ze'e ru'u inzatu', nu che ulañia nú uchiu'u tucu nañi enu necha rnaa lu inzatu', nu monstruo leeí nu achi lluca equieí, nu chi'i arta equieí nu cada arta equieí nzucu tucu corona, nu equie achi lluca equieí nequie tucu bedichia' chi'qui' nú rni contra Diose. ²Nu monstruo enu ulañia rnaa xi rnaa bichitu', pero cuchiu'í rnaa xi rnaa cuchiu' oso nu ru'í rnaa xi rnaa ru'u bichiee. Chequie dragón enu uya taxu ru'u inzatu', nze'e udete' poder lu monstruo para nú nibiya'í. ³Chequie tucu lluca equie monstruo ze'e ulañia nú chiqui' fuerte nedi'qui nu rnae xi rna nu atíí, pero uyeca'í nu ye bee bene iliulabe nzenu arqui', nu uyanala beella monstruo ze'e. ⁴Nu che ulu'cu bee bene ula'na lu dragón enu udete' poder lu monstruo, nu le'ca ulu'cu beella ula'na lu monstruo, nu unibeella:

—¿Lecati neca tucu nú neca monstruo cua', nu lecati aca liunu nucua'?

⁵Nu le'ca ulu'cu monstruo ze'e permiso nú uzucu' ayai li'í, nu uníí bedichia' nú necha necha contra Diose. Nu ulu'cuí poder nú unibiya'í diqui cuarenta y dos guu. ⁶Nu scua uníí bedichia' nú necha necha contra Diose, cuna lunú leenu nu cuna lu Santuario'nu, nu cuna luye bee enu nucua'a liñibe. ⁷Nu le'ca unguti'

monstruo ze'e permiso nú liunuí bee bene' Diose nu ri'i ana lubeella. Nu le'ca ulu'cuí poder para nú nibiya'í lu yeebe bene, cuna lubee bene enu rni yelu clasia' dialu, nu lubee bene ye bee eyeche, nu lu yeebe nación. ⁸Nu bee bene iliulabe lu'cu ula'na lu monstruo cua' bee enu la nequie nombre' lu libro nú rliqui' elunehuañi hasta ante nú quixie iliulabe, lu libro' Cordero enu unguti lu cruse, equie cuenda' bee bene.

⁹Bee bene enu niarqui' yene', ubene'hua. ¹⁰Bee bene enu si'quisa' ni'cu' le'ca rqui'ña nú cha nze'e ni'cu', nu bene enu ruuti bene cuna espada cuna espada ati nze'e. Enze'e bee bene' Diose rqui'ña nú riqui' beella lunú nzeli arqui' beella Diose, nu la llaca' beella lunú nzeli arqui' beella li'inu.

¹¹Luze'elá ulañia stucu monstruo enu uchiu'u lu yuu iliulabe. Nzucu chiucu arta equieí nu xi rna arta equie sanchi rna arta equieí pero chií enta xi enta chi dragón ¹²Nu tucu nú rlu'cu monstruo rluti enu uchiu'u lu inzatu' poder, le'ca mismo poder' monstruo enu uchiu'u lu inzatu' rlu'cuí, nu equie cuenda' poder cua' ulu'cu bee bene iliulabe ula'na lu monstruo enu uchiu'u lu inzatu', monstruo enu uyeca' lunú unganedi'qui enu yamero ati. ¹³Nu monstruo enu uchiu'u luyuu iliulabe le'ca rri'i milagro nú chiqui' llene, hasta nú rnibiya'í nú laca quii enza liñibe hasta luyuu iliulabe ante lubee bene iliulabe. ¹⁴Scua uzequienuí bee bene iliulabe equie milagro nú uri'í ante lu monstruo enu uchiu'u

lu inzatu', nu unibiya' monstruo enu uchiu'u lu iliulabe nú reche' bee bene imagen' monstruo ze'e enu uchiu'u lu inzatu', monstruo enu né ati añinzuca nú udi'quí' cuna espada. ¹⁵Nu monstruo enu uchiu'u luyuu iliulabe ulu'cuí poder para nú dete'í elunehuañi' imagen' monstruo enu ureche' bee bene enu uchiu'u lu inzatu', para nú nii monstruo cua' nu nibiya'í nú ati ye bee enu la lu'cu ula'na luí. ¹⁶Le'ca unibiya'í lu monstruo enu uchiu'u luyuu iliulabe cuna lu ye bee bene, lubee bene uxu, cuna lubee endu' lla'na, cuna lubee bene xene, cuna lubee bene enu seca elitsi, cuna lubee bene enu laca esclavo para nú uya' beella tucu seña ya beella chube urre tequie beella. ¹⁷Nu leca modo tsi bene urre uti bene tunu la uya' bene seña'cua', nu seña'cua' neca nombre' monstruo cua' nu número'í.

¹⁸Ca'ra rqui'ña nú ri'i bee bene beya', bee bene enu rlu'cu elliebacu', lualla cuenda cuna número' monstruo cua', xne nombre' bene iliulabe neca número cua', nu número cua' neca seicientos sesenta y seis nu cuna número cua' chiu'u nú lee tucu bene lu iliulabe.

Canto' ciento cuarenta y cuatro mil bee bene enu ucañi Diose

14 Le'ca ulaña nú nzu Cordero' Diose equie dañi nú lee Sión. Li'inu nzununu ciento cuarenta y cuatro mil bee bene, nu yebeella nequie nombre' Cordero cua' nu cuna nombre' Pa'nu tequie beella. ²Nu ubenea nú rula enza liñibe xi neca chenu rula rluca

huaxi inza o xi rula chenu rluca beziu' o xi neca chenu rula huaxi bene huaxi bee arpas. ³Nu ungula beella tucu canto cuqui lu bene enu rnibiya' nzucu lu xleta ante lu dacu bee enu nehuañi nucua'a ze'e nu ante lu ala cheta'cu bee bene uxu. Nu lecati unga canto ze'e, yetsia lu cuarenta y cuatro mil bee bene enu utsila'a lubee bene iliulabe ungula canto ze'e. ⁴Nu bee niyu cua' neca bee enu lá ri'ilí eluhuexe, nu uhuañi beella sin nú ri'ibeella dula, nu li'ibeella neca beella enu nzenala Cordero' Diose catse elu nzanu. Le'ca li'ibeella neca beella enu utsila'a lubee bene iliulabe, nu neca beella xi neca primero u'na rlu para Diose nu para lu Cordero'nu. ⁵Nu leca xunga uni beella eluquichia' nu la lu'cu beella dula lu Diose.

Bee bedichia' nú uni yuna bee ángele

⁶Che ulaña stucu ángele enu rcuecu' enza liñibe nuya' bedichia' nze'ca nú leca xunga laxu, para nú ixiule'enu lu ye bee bene enu nucua'a luyuu iliulabe, nu lecaxi ri'i tunu xi dialu rni beella, nu xi familia neca beella, nu xi eyeche enta beella nu xi nación enta beella. ⁷Nu che chiqui' fuerte uni ángele ze'e:

—Ulliquihua Diose, nu uni'hua bedichia' nze'ca lunu, xne uriñala hora nú hualunue lu cuenda' bee bene. Ulu'cuhua ula'na lu enu ureche' iliulabe, liñibe, inzatu' nu elu rliñi bee inza.

⁸Nu che uni stucu ángele ze'e:
—Unitilula, unitilula eyeche llene Babilonia xne xi neca chenu rdu' niqui bee bene sa' bene, scua

uzequienu eyeche llenecua' ye bee bene iliulabe para nú ri'ibeei ye clasia' eluhuexe.

⁹Che chu nzenala stucu ángele rriuna enu fuerte uni:

—Tunu nu' tá tucu bene cha lu'cu ula'na lu monstruo cua' nu lu imagen'í nu zela nú quie seña'í tequiee urre ya, ¹⁰bene ze'e dete' Diose castiya nú chiqui' fuerte, nu chiqui' nehuana zecalla luquii, nu lu azufre ante lubee ángele' Diose nu ante lu Cordero' Diose. ¹¹Nu leca xunga yala quii elu nehuana zeca bee bene. Nu ni' bichia nu ni' rula' la tsulachi bee bene enu lu'cu ula'na lu monstruo nu lu imagen'í enu quiee seña'í tequiee. ¹²Enze'e bee enu neca bee bene' Diose bee enu sucu' stichia'nu nu nzeli arqui' Jesucristo. Rqui'ña nú riqui' beella lunú xi seca beella.

¹³Che ubenea tucu chi enu uni lua enza liñibe, nu uni:

—Uquie'e nú nia lulu: “Desde nee nza nze'cae lu cuenda' bee bene enu unguiti nu uyali arqui' Jesucristo.” Che uni Espíritu Santo, neli nucua', xne nze tsulachila beella equie nú nehuana ulle'ca beella, xne ye lunú neca nze'ca uri'ibeella rlu'cu cuenda Diose.

Ula'cu nú aca luyuu iliulabe

¹⁴Che ulaña tucu xcabe nequichi nu equie xcabe ze'e nzucu tucu bene enu rnaa xi rnaa bene enu uxe'la Diose lu iliulabe. Nu equiella nzucu tucu corona nú neca oro, nu nzenella tucu sierra nú nelatsa. ¹⁵Nu che uchiu'u stucu ángele liñi indu nu fuerte ininu lu enu nzucu equie xcabe ze'e, nu uninu lulla:

—Udu' sierra cua' leta bee ula'cu nú nu' lu iliulabe, nu uchie'cu'e, xne necala tiambu para nú yete' sa'e.

¹⁶Nu enu nzucu equie xcabe ze'e udete'lla sierra'lla luyuu iliulabe, nu che uquiete' sa'lla ye ula'cu nú nu' lu iliulabe.

¹⁷Che uchiu'u stucu ángele liñi indu nú nzucu liñibe, nu le'ca nzene ángele ze'e tucu sierra nú chiqui' nelatsa. ¹⁸Nu che uchiu'u stucu ángele ru'u ecu'cu liñi indu ze'e enu rlu'cu poder lu quii, nu fuerte uni ángele quie' lu ángele enu nzene sierra nú nelatsa ze'e: —Uchie'cu' bee uva nú nu' lu yuu iliulabe xne unguye'elane.

¹⁹Che uchiecu' ángele ze'e uva lu iliulabe cuna sierra ze'e. Nu udu' ángele ze'e bee uva liñi tucu tanque llene elu tsi'i bee uva. Le'ca scua neca castiya llene nú xe'la Diose nú zeca bee bene. ²⁰Nu ru'u eyeche ze'e utsi'i bee uva ze'e nu chenu utsi'i bee uva ze'e uchiu'u rene. Nu rene cua' uri'chia luyuu ze'e tucu trecientos kilómetros, nu uliquine aya hasta elu nzi'qui artaru'u tucu huayu.

Lu achi bee ángele nu lu achi nú nehuana enta zeca bee bene

15 Luze'elá ulaña stucu seña nú llene liñibe, tucu seña nú chiqui' uyanu arquia: Ulaña achi bee ángele cuna achi bee castiya nú chiqui' nehuana zeca bee bene, scua neca bee último castiya nú zeca bee bene xne cuna bee nucua' utsa'alu Diose castiya nú zeca bee bene.

²Le'ca ulaña tucu inzatu' nú rna xi rna huana, nú nucha quii. Nu

equie ze'e nucua'a bee bene enu la lu'cu ula'na lu monstruo, cuna lu imagen'í nu cuna numero nú neca nombre'í. Nu nzene beella arpa nú udete' Diose lubeella nucua'a beella ze'e. ³Nu ungula beella canto nú ungula Moisés enu neca bene' Diose nu cuna nú neca canto' Cordero' Diose, canto ze'e rni:

Chiqui' llene nu ñia neca luye
nú uri'ilu,

Li'ilu necalu Diose'ru enu rlu'cu
ye poder.

Ye nú rri'ilu neca nze'cae, nu
neli neca inziu'lu,
nu li'ilu rnibiya'lu luye bee bene
iliulabe.

⁴¿Ta bee bene enu la lliqui li'ilu?
¿Nu ta bee bene enu la nii
bedichia' nze'ca lucuenda'lu,
li'ilu enu neca Diose'ru?
Tucutsia li'ilu necalu enu la
lu'cu dula,
nu ye bee bene iliulabe enta
lu'cu ula'na lulu,
xne ulañila' bee bene nú neli
neca nú rri'ilu.
Uni canto nú ungula beella lu
Diose.

⁵Chenu ulaxu nú ulañia bee
nucua', che ulañia nú uya'lla
liñi indu' Diose liñibe elu nzucu
santuario. ⁶Nu liñi indu ze'e
uchiu'u achi bee ángele bee enu
nuya' achi bee castiya nú nehuana
zeca bee bene. Nu nutu beella
laquie niquichi nú rulusiqui', nu
nu' sinchiu nú necache' oro latsa
bee ángele ze'e. ⁷Chequie tucu lu
tacu bee enu nehuañi nucua'a elu
nzucu Diose, udete' bee nucua' lu
cada tucu bee ángele tucu copa de
oro nú achechicu nu'che' castiya

nú dete' Diose lubee bene. Nu li'inu
necanu enu nehuañi diqui tiambu.
⁸Nu ache liñi indu ze'e uyu'u llene
lunú reca poder' Diose rri'i, nu
rulusiqui' lunú neca poder'nu. Nu
lecati uyu'u liñi indu ze'e hasta nú
laxu za' achi castiya nú dete' Diose
lubee bene, castiya nú nuya' achi
bee ángele ze'e liñi bee copa.

Achi copa nú nu' castiya' Diose

16 Che ubenea tucu chi fuerte
nú uni desde liñi indu lu
achi bee ángele ze'e:

—Uquia ti'chiahua castiya' Diose
nú nu' liñi achi bee copa cua' lu
iliulabe.

²Che uya ti'chia ángele rluti nú
nu' liñi copa'nu luyuu iliulabe.
Nu ye bee bene enu nequie seña'
monstruo ze'e nu ulu'cu ula'na lu
imagen'í, uchiu'u bee bechu' nú
ruchu cuerpo' bee bene ze'e, nu
necha rnae nu chiqui' rcue.

³Nu ángele rruccu uti'chianu nú
nu' liñi copa'nu lu inzatu'. Nu che
inza ze'e ungae rene nú rna xi rna
rene' benenguti, nu ye bee nañi enu
nehuañi nu' lu inzatu' unguti.

⁴Chequie uti'chia ángele rriuna
nú nu' liñi copa'nu lubee inza re'cu
cuna elu rliñi bee inza, nu unga bee
inza ze'e rene. ⁵Chequie ubenea nú
uni ángele enu rnibiya' lubee inza:
—Diose chiqui' neli rri'ilu elu
ustichia'lu tucu nú necane, li'ilu
enu la lu'cu ni'tucu dula, nu li'ilu
necalu Diose hasta hua'tu nu hasta
nee. ⁶Xne bee bene iliulabecua'
unguuti beei bee bene'lu, nu bee
profeta'lu nu uri'chia rene' beella,
enze'e uri'ilu scua para nú hue'beei
rene, inu scua riala nú aca beei!

⁷Nu le'ca enza ru'u ecu'cu ubenea tucu chi nú uni:

—Neli nú rri'ilu Diose, xne li'ilu rlu'culu ye poder. Nu neli rri'ilu elu usticia'lu tucu nú rialane.

⁸Nu ángele tacu uti'chia nú nu' liñi copa' lubichia, nu che ulu'cu bichia poder para nú utsiqui' bichia bee bene xi siqui' quii. ⁹Nu ye beei ubiquibeei lunú chiqui' nelee bichia pero ni' scua lá tsana' arqui'beei stulabeei, nu lá nibeei bedichia' nze'ca lu Diose, a'la unibeei bedichia' chi'qui' lunu, lunú nehuana seca beei, nu li'inu rnibiya'nu.

¹⁰Chequie ángele ayu' ze'e uti'chia nú nu' liñi copa'nu elu nzu monstruo enu rnibiya', nu che ucabelí luyuu iliulabe nu hasta udacuquie' bee bene ze'e lu'chibeei equie nú chiqui' nehuana seca beei. ¹¹Pero ni' scua lá tsana' arqui'beei lunú necha rri'i beei, sino que equie nú chiqui' nehuana ulle'ca beei nú uricu bechu' cuerpo' beei, a'la unibeei bedichia' chi'qui' lu Diose enu nzucu liñibe.

¹²Ángele xu'cu uti'chianu nú nu' liñi copa'nu lu inza re'cu llene nú lee Eufrates nu che ubichi inza re'cu ze'e para nú aca dete bee arre enu nze'ta enza rliñi bichia.

¹³Che ulañia nú uchiu'u ru'u dragón cuna ru'u monstruo nu ru'u profeta enu sequienu arqui' bee bene, nu uchiu'u chuna espíritu nú necha rnaa xi rnaa huaa. ¹⁴Yuna espíritu'ca' neca espíritu' beze'lu, nu rri'i beei espíritu'ca' milagro nu nza bee espíritu'ca' lu ye bee arre iliulabe para nú quiete'sa'beei bee arre nu che liunu beei Diose enu

rlu'cu ye poder, bichia nú rri'i Diose ana lu ye bee nucua'.

¹⁵Chequie uni Jesucristo:

“Li'á nia luhua nú tu'natsia riña, tucu nú tu'natsia rriña huana'. Nu chiqui' ñia neca lu cuenda' bene enu nzu tsiñala nzuquie li'á chenu riña para nú la tu'lla xi rtu' tucu bene chenu rlañi' bene li'illa nú e'cuetulla.”

¹⁶Chequie uquiete'sa' espíritu' nú necha rri'i ze'e ye bee arre enu nucua'a luyuu iliulabe tucu luhuare nú lee Armagedón dialu hebreo.

¹⁷Nu chequie chu uti'chia ángele achi ze'e nú nu' liñi copa'nu enza lu bi, nu desde liñi indu nú nzucu liñibe elu nzucu enu rnibiya' ubene tucu chi fuerte enu uni:

—Uyalula tucu nú nzu nú aca.

¹⁸Chequie uya'la lee, nu chiqui' ullichí nú unguchu beziu', nu unga tucu xuu nú chiqui' fuerte, tucu xuu nú lasca'li aca desde chenu uquixie nucua'a bee bene lu iliulabe, xne xuu cua' neca nú chiqui' máse fuerte unga. ¹⁹Nu che ule'e eyeche llene ze'e chuna pedazo nu uluquie ye bee eyeche lu iliulabe. Nu lá zañi' Diose eyeche llene Babilonia para nú chiqui' fuerte dete'nu castiya lubee bene ze'e. ²⁰Nu che unitilu ye bee dañi cuna yuu nú netse labe inzatu'. ²¹Le'ca ulaca quii quiee equie bee bene iliulabe nu cada tucu quii quiee ze'e nzi'i tucu cuarenta kilo, nu che uni bee bene bedichia' chi'qui' lu Diose, equie cuenda' nú nehuana ulle'cabeei nú chiqui' ulaca quiuquiee cua'.

Castiya nú zeca una'a huexe

17 Nu che tucu lu achi bee ángele enu nzene tucu lu

achi bee copa ze'e, tucu bee ángele cua' ube'ta ni'lua:

—Utee ca'a para nú lubea lulu castiya nú ati' una'a huexe enu nzucu equie inza añi. ²Li'inchu unganchu stu'u bee arre lu iliulabe, tucu nú rri'i tucu bene enu rte'niqui stucu bene, scua uzequienulanchu ye bee bene lu iliulabe equie cuenda' eluhuexe nú rri'inchu.

³Che equie cuenda' Espíritu Santo unguya' ángele cua' li'á lu yuu achi, ze'e ulaña tucu una'a enu nchiucu' equie tucu monstruo neluu nu diqui tetsu' monstruo ze'e nequie huaxi bee bedichia' chi'qui' nú rni contra Diose, nzucu achi lluca equieí nu chi'i arta equieí. ⁴Nu una'a ze'e nutunchu tucu laquie nú morado neluu, nu nzuche'nchu puro oro nu cuna bee quiee nú ñia rnaa nu perla nú huaxi seca, nu nzenenchiu tucu copa de oro nú ahee nu'huaxi beenú necha necha nu necha naa rri'inchu. ⁵Nu tequienchiu nequie tucu letrero nú lecati ri'i beya' xi rni, nu rni bee letra ze'e:

“Babilonia, eyeche llenecua' necha na' bee una'a huexe nu na' ye beenú necha necha rri'i bee bene lu iliulabe.”

⁶Che ulaña nú xuchi' una'a ze'e equie cuenda' rene' bee bene' Diose, nu equie cuenda' bee bene enu ungti enu udixiule'e stichia' Jesucristo. Nu chiqui' uyanu arquia chenu ulaña bee nucua'. ⁷Che uni ángele ze'e lua:

—¿Xinu chiqui' nzenu arqui'lu? Li'á ixiule'a lulu xi rni equie cuenda' una'a enu ulañi'lu nu cuna equie cuenda' monstruo enu nchiucu'nchu

equie, nu nzucu achi lluca equie nu chi'i arta equieí. ⁸Monstruo ze'e enu ulañi'lu, nehuañi nze'e hasta hua'tu, pero nee la nehuaña'í, pero enta bichia nú chiu'u zecaí liñi i'chiu llene nú aquie nu leca' rqui', ante nú atilí. Nu bee bene enu nucua'a lu yuu iliulabe, bee enu la nzucu ichi nombre' lu libro nú rliqui' elunehuañi' bee bene desde chenu uquixie iliulabe, chenu arqui' beei chenu lañi' beei monstruo ze'e enu uhuañi hua'tu nula nehuaña'í nee, nu enta bichia nú huañi zecaí. ⁹Ca'a rqui'ña nú lu'cu bee bene elliebacu'. Achi lluca equie monstruo ze'e necha achi dañi nú nzucu una'a ze'e equie. ¹⁰Nu le'ca necane achi bee arre. Nu ayu' bee arre ze'e udetela nú unibiya' beei, nu enu necha arre xu'cu nze'e necha enu rnibiya' nee. Nu cheelá nibiya' enu necha arre achi, pero la nibiya' nze'e huaxi tiembu. ¹¹Nu monstruo enu uhuañi hasta hua'tu nu la nehuaña' nee, monstruo cua' aca arre xunu, pero tucu lu achi bee arre cua' aca arre xunu, chequie chu zeca monstruo cua' castiya nú leca xunga laxu.

¹²Lu chi'i arta equie monstruo nú ulañi'lu ze'e necha lu chi'i arre bee enu lasca' nibiya'. Pero chenu nibiya' bee arre ze'e, la nibiya' nze'e huaxi tiembu cuna monstruo ze'e. ¹³Nu lu ye chi'i bee arre cua' aca tucunecatse beei nu dete' cuenda beei elu usticia cuna elurnibiya' nú rlu'cu beei lu monstruo cua'. ¹⁴Nu liunu bee nucua' Cordero' Diose, pero ri'i Cordero ana lubeei, xne li'inu necanu enu rnibiya' lu ye bee enu

rnibiya' nu li'inu necanu arre lu ye bee arre. Nu bee bene enu nzu chu' Cordero ze'e, li'ibeella neca beella enu uri'i caso Stichia' Diose. Nu bee bene ze'e neca bee bene'nu bee enu neli nzenala inziu' Diose.

¹⁵Le'ca uni ángele ze'e lua:

—Bee inza nú ulañi'lu elu nzucu una'a huexe, nucua' neca ye clasia' bee bene, enu rni urene urene bee dialu, bee bene ye bee luhuare, bee bene diqui lu iliulabe. ¹⁶Nu monstruo nu cuna lu chi'i arta equieí nú ulañi'lu neca bee arre enu lee lu una'a huexe ze'e, nu tsana' arqui' bee nucua' li'inchu, nu tsa'na e'cuetubeei li'inchu, nu acubeei be'la'nchu, nu tsiqui'beeí li'inchu para nú laxu linchu. ¹⁷Diose dete' elliebacu' lu chi'i bee arre cua' para nú ri'ibeei tucu nú niarqui' Diose, nu dete' cuenda beei elurnibiya' nú rlu'cu beei lu monstruo cua', hasta nú yalu tucu nú uni Diose. ¹⁸Nu una'a enu ulañi'lu, li'inchu necanchu eyeche llene nú rnibiya' lubee arre iliulabe.

Unitilu eyeche Babilonia

18 Chenu ulaxu nú ulaña bee nucua', cheela ulaña stucu ángele enu nze'ta laca enza liñibe nu chiqui' rlu'cu ángele quie' poder, nu ellie'nu udu'llie'e diqui lu iliulabe, ²nu chiqui' fuerte uninu:

—Unitilula, unitilula eyeche llene Babilonia nu nee necatsiae xi neca ni' bee beze'lu, nu le'ca necatsiae xi neca ni' ye clasia' bee benechiqui', nu xi neca ni' ye bee iñi enu rcuecu' bee enu necha rna xiña arqui' bee bene. ³Xne xi neca chenu rdu'niqui sa' bee bene, scua uri'inu eyeche

llene ze'e ye bee bene iliulabe para nú ri'i beei ye clasia' eluhuexe, nu bee arre enu nucua'a lu yu iliulabe uri'i eluhuexe cuna eyeche ze'e, nu bee bene enu rri'i berexe lu yu iliulabe unga beella xene equie cuenda' ye clasia' eluhuexe nú reca eyeche ze'e.

⁴Luze'elá ubenea stucu chi nú uni enza liñibe:

—Uchiu'uhua eyeche cua', li'ihua enu neca bee benea para nú la ri'ihua sa' bee dula nú rri'i bee benecua', nu para nú la nehuana zecahua tucu nú nehuana zeca eyeche llenecua'. ⁵Xne huaxi añi stula beei nu hasta liñibe riñae, nu la zañi' Diose stulabeei. ⁶Uri'inuhua bee benecua' tucu nú uri'inubeei beelá bee bene, nu uri'ihua nú ixiubeei chiucu bese másela lunú uri'inu beei beelá bee bene, nu uri'ihua nú chiucu bese másela nehuana zeca beei tucu nú uri'inubeei bee bene. ⁷Uri'ihua nú nehuana zeca bee bene eyeche llenecua' nu ucuna'hua beei, scua tucu nú ñia nzu arqui'beeí uri'i beei nú necha neca, nu tucu nú uri'i bee eyeche cua' elliebacu' chenu unii: “Li'á nzucua'a ca'a xi nzucu tucu reyna, laca una'a zaqui, nu le'ca leca' bichia nú nehuana zecaa.” ⁸Nu tucutsia bichia tucutse riña nú nehuana zeca bee bene eyeche cua', atibeei, una'beeí, zeca beei biña, nu bichi' beei, chiquibeei xne chiqui' llene neca poder' Diose nú dete' castiya lubee bene eyeche llene cua'.

⁹Nu bee arre lu iliulabe bee enu uri'i lunú niarqui'tsia, bee enu uri'i eluhuexe, cuna eyeche llenecua',

li'ibeei nehuana zeca beei, nu una'beei, chenu lañi'beei llene nú riqui eyeche cua'. ¹⁰Nu istu cua'a bee arre cua' equie nú xiquibeei castiya nú reca eyeche cua', nu rri'beei:

—iCue'curulu, cue'curulu Babilonia, eyeche llene nú chiqui' unga neca equie! Xne terratuinza uriña castiya'lu.

¹¹Nu bee bene enu rri'i berexe nehuana zeca beei nu una'beei equie cuenda' eyeche llenecua' xne leca' bee bene enu tsi ye nú rutibeei: ¹²xi neca bee oro, plata, quiee nú ñia rnaa, perla, laquie fiño, nu laquie seda nú neluu morado, nu ye clasia' bee aca nú ñia rlia nu ye beenú ungache' cuna bee aca fiño, nu beenú ungache bronce, icu', nu mármol nu marfil. ¹³Le'ca esquie laca' utibeei canela cuna ye clasia' bee cuana' nú ñia rlia, leca' modo utibeei quiendixi, mirra, perfume, aceite de oliva, harina nú fiño, trigo, u'na', sanchi, huayu, acareta, nu le'ca la aca' utibeei bee bene. ¹⁴Nu le'ca nibeei lu eyeche ze'e:

—iLa lu'cua'lu ye bee elulle'ca nú chiqui' uyu'u arqu'lu, nu ulaxulí ye eluxene'lu cuna ye beenú chiqui' ñia rnaa ulu'culu!

¹⁵Bee berexecua' uril'i nú unga xene beei equie cuenda' eyeche llene Babilonia cua', istu cua'a beei equie nú xiquibeei castiya nú zeca eyeche cua', una'beei nu nehuana tsu arqu'beei. ¹⁶Nu nibeei:

—iCue' eyeche llene cua', cue' eyeche llene cua'! Elu utsuche'e bee bene cuna laquie fiño, nú neluu nu morado, li'ibeei enu utsuche' cuna

oro, cuna perla cuna quiee nú ñia rnaa. ¹⁷iXne terratuinza ulaxu ye bee eluxenecua'!

Ye bee bene enu nza liñi barco, cuna ye bee capitán' barco, cuna yebee marinero nu bee bene enu rri'i riña' lu inzatu', istu ucua'a beei. ¹⁸Chenu ulañi'beei llene nú riqui eyeche llene cua', che ubixiali beei nú unibeei:

—¿Leca xunga ulaña'ahua tucu eyeche llene tucu nú neca eyeche quie'?

¹⁹Nu che udu'beei yube'cha' equie beei nu runa'beei, nú nehuana seca beei, nu unibeei:

—iCue'e! iCue' eyeche llene! Xne equie cuenda' eluxene'e unga xene ye bee bene enu rlu'cu barco, inu terratuinza ulaxu eyeche cua'!

²⁰Che uyene tucu chii liñibe nú uni:

—Pero li'ihua enu nucua'a liñibe, nu li'ihua bee bene' Diose, nu li'ihua bee apóstol nu bee profeta, ñia utsu arqu'hua lunú seca eyeche cua' xne scua rri'i Diose elu usticia'nu equie nú uri'inu bee bene eyeche cua' cuna li'ihua.

²¹Nu tucu ángele enu chiqui' naaqui uletsa tucu quiee llene, nú rnaa xi rnaa quiee molino nu utsi'quinue lu inzatu', nu uninu:

—Scua tucu nú chiqui' fuerte utsi'quia quiee quie', scua chiqui' fuerte nehuana zeca eyeche llene Babilonia, nu leca'ti lañi' li'i stucu bese. ²²La yenea' nú rula bee arpas, ni' bee musica, ni' flauta, ni' bee trompeta bee calle eyeche Babilonia cua'. Nu ni' stucu bee bene leca' ti rri'i riña' eyeche ze'e, nu ni' nú xichi bee molino rri'i riña' la yenea'

eyeche ze'e. ²³Nu leca' bee bichia nú aca ahee nú nu' quii eyeche ze'e, nu la chia' bee bene eyeche llene ze'e, ni' tsa'a chia la ria'a beei, ni' berexe la ria'beei, añinzuca nú chiqui' neca equie bee berexe eyeche cua' lu iliulabe hua'tu, nu uzequienu eyeche llene cua' ye bee bene iliulabe cuna elu uliñi.

²⁴Nu le'ca eyeche cua' udiñi bee bene bee profeta' Diose, cuna bee bene enu nzeli arqui' Diose, no por equie cuenda' eyeche cua' udiñi bee bene beelá bee bene enu ungti lu iliulabe.

19 Luze'ela chenu ulaña nu ubenea bee nucua', che fuerte ubenea huaxi bee chi nú uni enza liñibe:

iChe'tsa Diose!

Xne equie cuenda'nu tsila'a bee bene xne rlu'cunu poder.

Li'inu riala lu'cu bee bene ula'na lunu nu nii bee bene bedichia' nze'ca lunu.

²Nu li'inu neli neca nú rri'inu nu neli rri'inu elu usticia'nu, nu udete'lanu castiya lu una'a huexe

enu uzequienu arqui' bee bene iliulabe

cuna equie nú necha rri'inchu, nu uri'ila Diose elu usticia'nu cuna li'inchu

para nú ixiunchu nú udiñi bee bene bee bene'nu.

³Nu ubene zecaa nú uni bee chi ze'e:

—iChe'tsala Diose!

Leca' bichia nú laxu llene nú riqi eyeche cua'.

⁴Nu ye lu alacheta'cu bee bene uxu ze'e nu dacu bee enu nehuañi

ze'e, utsulliqui beella ante lu xleta elu nzucu Diose rnibiya' para nú lu'cu beella ula'na lunu, nu unibeella:

—iChe'tsalá Diose! iBee bedichia' nze'ca neca para li'inu!

⁵Che ubenea tucu chi enza lu xleta enza nzucu Diose nú uni:

Yehua sia bee bene uxu nu sia bee endu'

uni'hua bedichia' nze'ca lu Diose,

li'ihua enu sibi' lunu, nu rlu'cu ula'na lunu.

Eluchia Cordero' Diose

⁶Nu ubenea xi neca chenu rni huaxi chi bee bene, urre xi neca chenu rula huaxi inza, urre xi neca chenu rachu huaxi beziyu', rni:

iChe'tsalá Diose! Xne rnibiya'lanu Li'inu enu neca Diose'ahua, nu rlu'cu ye elurnibiya'.

⁷Ñiatsu arquia'ahua, nu llila'ahua nu riala nia'ahua bedichia' nze'ca lunu, xne uriñala bichia nú chia enu neca Cordero' Diose.

Nu enu aca una'nu ñia nzuche'la.

⁸Nu nutulla laquie fiñio nú necache' lino nú lecaxi naa nu rulusiqui'.

Nu laquie cua' neca beenú neca nze'ca uri'i bee bene! Diose.

⁹Chequie uni ángele lua:

—Uquie'e: “Chiqui' ñia neca lu cuenda' bee bene enu nezene' lu tsa'a Cordero' Diose.”

Le'ca uni ángele ze'e lua:

—Ninguie' neca Stichia' Diose nú neli neca.

¹⁰Che utsulliquia lu ángele ze'e para nú lu'cua ula'na lunu, pero uninu lua:

—La ri'ilu scua xne necatsia tucu nú necalu, xne necatsia enu sibi' lu Diose, tucu nú rri'li beelá bee sa'lu bee enu neli nzenala stichia' Jesucristo. Ulu'cu ula'na lu Diose la ri'ilu scua lua.

Xne equie cuenda' Jesucristo nze'ta bee bedichia' nú rni bee profeta.

Bene enu nchiucu' huayu niquichi

¹¹Che ulaña nú na'la liñibe nu ulaña tucu huayu niquichi, nu enu nchiucu' equieí lee enu neli sa'alu ye nú rni, nu enu neli neca, nu rri'ínu elu usticia'nu tucu nú necane, nu rri'ínu xuu tucu nú rialane. ¹²Nu bee i'culunu rulusiqui' xi rulu quii, nu huaxi corona nzucu equienu, nu tucu parte cuerpo'nu nequie tucu nombre nú lecati ri'li beya' xi rni, tucutsia li'ínu nediya'nu xi rni nombre cua'. ¹³Nu laquie nú nutunu chiqui' nu' rene, nu Stichia' Diose leenu. ¹⁴Nu bee sundado'nu enu nucua'a liñibe nzenala li'ínu nchiucu' equie bee huayu niquichi, nu nutu bee nze'e laquie fiño nú niquichi nu leca xinaa. ¹⁵Nu ru'unu xiu'u tucu espada nú chiqui' nelatsa, para nú dete'nu castiya bee bene iliulabe, nu cuna bara nú neca hierro nibiya'nu lubee benecua'. Xi neca chenu rta' bee bene equie uva para nú tsi'i, scua dete'nu castiya li'ibeella, castiya nú nze'ta lu Diose, li'ínu enu rlu'cu ye poder. ¹⁶Nu tetsu' copa'nu nu tetsu' cuchiu'nu nequie bedichia' nú rni: “Arre enu rnibiya' luye bee arre, nu rnibiya'nu luye bee enu rnibiya'nu.”

¹⁷Che ulaña tucu ángele enu nzu lu bichia, chiqui' fuerte urixialinu, nu ubixianu bee iñi enu rcuecu' liñibe, nu uni ángele cua' lubeéí:

—Utehua nu uyetesa'hua elu liqui' Diose huaxi nú acuhua, ¹⁸para nú acuhua mi' bee arre nu mi' bee bene enu rnibiya' lubee sundado nu mi' bee bene enu nelachi, cuna mi' bee huayu, cuna mi' bee bene enu nchiucu' equie bee huayu, cuna mi' ye bee bene, tanto bee bene enu neca esclavo cuna bee bene enu la aca esclavo, cuna mi' bee bene uxu cuna mi' bee bene enu nere'ne'.

¹⁹Che ulaña monstruo cuna bee arre lu iliulabe cuna bee sundado' beei neyete'sa'la beei para nú liunubeei li'ínu enu nchiucu' equie huayu niquichi cuna bee sundado'nu. ²⁰Pero che una'tse beenu monstruo ze'e cuna profeta enu uzequienu arqui' bee bene, enu uri'li milagro ante lu monstruo ze'e. Nu equie cuenda' milagro ze'e uzequienu profeta cua' arqui' bee bene enu uzela uquie seña' monstruo cua', nu ulu'cu beei ula'na lu imagen' monstruo cua'. Nu profeta enu uzequienu arqui' bee bene cuna monstruo cua' rucuaa bee nucua' utsi'qui nehuañi beenu lu eyela elu nu' quii nu azufre. ²¹Nu cuna ye beelá bee bene enu uzucu' nú uni monstruo cua', ungtuti beei cuna espada nú uchiu'u ru'u bene enu nchiucu' equie huayu ze'e, nu ye clasia' bee iñi ze'e udacubeeí mi' bee nucua' hasta nú ubela'beeí.

Tucu mili lana

20 Chequie ulaña nú enta laca tucu ángele enza liñibe nu nzenenu liave ebila, nu le'ca nzenenu tucu cadena llene.

²Nu una'tse ángele ze'e dragón enu neca serpiente hua'tu lee beze'lu nu benechiqui' ullica'cuu ángele ze'e li'i cuna cadena diqui neca tucu mili lana. ³Che utsi'qui ángele cua' beze'lu ebila nu utsacu'ta'nu ru'u ebila ze'e para nu la chiu'a' beze'lu zequienu arqui' bee bene iliulabe hasta nú za' tucu mili lana, che chiu'u zecai ebila lle'na tiambu.

⁴Nu ulaña bee xleta nú rnaa xi rnaa xleta' arre, lu xleta ze'e nucua'a bee bene enu ungutí' poder para nú lualue lu cuenda' bee bene. Le'ca ulaña espíritu' bee bene enu uchiecu' bee bene lluca equie, equie nú udixiule'e beella Stichia' Diose nu cuna equie cuenda' Jesucristo. Nu li'ibeella né lu'cu beella ula'na lu monstruo ze'e ni'lu imagen'í nu lá zela beella nú aqueie seña' monstruo ze'e tequie beella urre yabeella. Nu ulaña nú uhuañi zeca beella lu eluti stucu bese, nu unibiya' beella cuna Jesucristo tucu mili lana. ⁵Bese quie' neca bese rluti nú uhuañi bee benenguti, pero texcua'a bee benenguti la huañi hasta nú yalu tucu mili lana ze'e.

⁶iNza nze'cae equie cuenda' bee bene enu rluti huañi zeca lu eluti! Li'ibeella leca' xinaa beella ante Diose, nu la atia' beella bese rrucu sino que li'ibeella aca beella ule'ya' Diose cuna Jesucristo nu nibiya' beella cuna li'inu lu tucu mili lana.

⁷Chenu uza'la tucu mili lana, che la'a zeca beze'lu ebila elu netsei, ⁸para nú zequienui arqui' ye bee bene iliulabe. Zequienui arqui' Gog cuna Magog, para nú quiete'sa' beella bee bene' beella nu rri'ibeella xuu. Nu chiqui' huaxi

neca beella xi huaxi eyuxi ru'u inzatu'.

⁹Nu nze'ta bee benequie' enza huaxi bee luhuare, nu yete'sa'beeí abenchila' elu nucua'a bee bene' Diose, cuna abenchila' eyeche nú chiqui' secanu. Pero desde liñibe xe'la Diose quii para nú chiquilixu ye bee benecua'. ¹⁰Nu beze'lu enu uzequienu li'ibeei uyu'u luquii elu nu' azufre, elu le'ca netsela monstruo cuna profeta enu uzequienu bee bene, nu ze'e leca' bichia nú chiu'u beeí, nu chiqui' zeca beeí castiya nú leca xunga laxu bichia si rula'.

Rualu Diose lu cuenda' bee bene

¹¹Che ulaña tucu xleta nú rnaa xi rnaa xleta' arre, llenee nu niquichi. Nu lu xleta ze'e nzucu tucu enu nzucu. Nu ante lu nze'le ulaxulí iliulabe nu liñibe. ¹²Che ulaña nú ante lu xleta elu nzucu Diose, ze'e nucua'a bee bene enu uhuañi lu eluti bee bene uxu cuna bee enu me'e. Nu uya'la lubee libro nú nequie nombre' beella, nu le'ca uya'la lu stucu libro nú nequie nombre' bee bene enu huañi liñibe. Che ulualu Diose lucuenda' bee benenguti ze'e, lunú xi uri'í cada tucu beella nequie lu libro ze'e. ¹³Inzatu' udete' cuendae bee bene enu ungutí lue, le'ca esquie eluti udete' cuendae ye bee bene enu ungutí, uriña bee benequie' lu Diose para nú lualunue lu cuenda' cada tucu beeí lunú xi uri'ibeeí. ¹⁴Che eluti, nu luhuare' bee benenguti, rucuaa bee nucua' uyu'u luquii, lu quii cua' neca eluti rrucu' bee bene. ¹⁵Nu luquii ze'e uyu'u

bee bene enu la nzucu ichi nombre' lu libro nú rliqui' elunehuañi' bee bene.

Liñibe cuqui nu iliulabe cuqui

21 Chenu ulaxu nú ulañia bee nucua', che ulañia tucu liñibe cuqui nu tucu iliulabe cuqui, xne liñibe cuna luyuu iliulabe nú ungache' chenu uquixie iliulabe quie' ulaxuli bee nucua' cuna inzatu'. ²Nu ulañia Jerusalén nú necuqui eyeche llene nú neca stene Diose nze'ta laca enza liñibe elu nzucu Diose. Nzuche'e xi nzuche' tucu una'a enu nzula nú chiaa cuna bene enu chialla. ³Nu fuerte ubenea tucu chi enza nzu xleta' Diose, nú uni:

—Nehuañila Diose leta bee bene. Li'inu huañinu cuna li'ibeella, nu li'ibeella aca beella bee bene'nu, nu li'inu nzunu cuna li'ibeella nu li'inu acanu Diose' beella. ⁴Nu li'inu ñie'enu ye inza nú unguna' beella lubeella, nu la atia'beella nu la una'beella, nu la nehuana' tsu arqui'beella nu la nehuana' zeca beella, xne ye beenú nehuana ulle'ca beella udetela bee nucua'.

⁵Nu enu nzucu lu xleta ze'e uni:
—Ye beenú rria'a necuqui neca bee.

Le'ca uninu lua:

—Uquie'e bee bedichia' quie', xne bee bedichia' quie' neli necane nu riala nú chili arqui' bee benene.

⁶Nu le'ca uninu lua:

—Ungala beenú riala nú aca. Li'á neca xi neca letra A nu Z xne tucutsia li'á rnibiya'a hasta chenu uquixie iliulabe nu diqui tiambu. Nu bene enu rrebichi' li'á detea

inza nú rliñi elu rliñi inza nú rliqui' elunehuañi' bene hue'lla nu lia hue'llae. ⁷Bene enu ri'i ana lu dula, li'illa ati'lla ye bee nucua'. Nu li'á aca Diose'lla nu li'illa acalla endua. ⁸Pero bee bene enu xiqui tsuta' arqui' lunú nzeli arqui' li'á, nu bee enu la chili arqui' li'á, nu bee bene enu riu' arqui' ri'i puro beenú necha neca, nu bee bene enu ruuti bee bene, nu bee bene enu rri'i eluhuexe, nu bee bene enu rri'i elu uliñi, nu bee bene enu rlu'cu ula'na lubee nú seca beei nú neca diose, nu ye bee bene enu rni eluquichia' li'ibeei riala chu'ubeei lu quii elu riqui azufre nu quii ze'e neca eluti rruclu.

Jerusalén cuqui

⁹Chequie tucu lu achi bee ángele ze'e bee enu nzene achi bee copa nú achechicu nu'che' achi bee último castiya nú zeca bee bene, tucu bee ángele ze'e ube'ta elu nzua, nu uninu lua:

—Utee ne lubea lulu novia enu chiaa Cordero' Diose.

¹⁰Nu equie cuenda' Espíritu Santo unguya' ángele cua' li'á equie tucu dañi llene, nú ayaa. Ze'e ulube'nu lua Jerusalén eyeche llene nú neca stene' Diose nze'ta lacae liñibe elu nzucu Diose. ¹¹Nu rulu eyeche ze'e cuna ellie' Diose. Nu ellie'e ze'e rulu xi rulu ellie' tucu quiee nú chiqui' huaxi seca nú lee jaspe, nu achee xi achee huana. ¹²Nu abenchila' eyeche ze'e nu' tucu muralla nú llene nu aya nu nuya'e chi'chiucu puerta, nu cada tucu ru'u puerta cua' nzucu tucu ángele, nu cada ru'u bee puerta

cua' nequie nombre nú xneca lee
 chi'chiucu grupo bee bene Israel.
¹³Nu rlu'cune chuna puerta enza
 rliñi bichia, nu xuna bee nchiucu'
 enza ratse' bichia, nu le'ca chuna
 bee puerta cua' nchiucu' enza norte,
 nu xunane nchiucu' enza sur. ¹⁴Nu
 simiendo' muralla ze'e necache'
 chi'chiucu quiee. Nu lubee quiee
 ze'e nequie nombre' za' chi'chiucu
 bee apóstol' Cordero' Diose.

¹⁵Nu ángele enu uni lua nzene
 tucu vara nú neca oro para nú
 texenu eyeche ze'e, cuna puerta'e
 nu cuna muralla'e. ¹⁶Nu cuadrado
 eyeche ze'e, nu tucu nú stuñii
 le'ca esquie xexee. Nu ángele ze'e
 utexene cuna bara'nu nú necache'
 oro, nu medida' eyeche ze'e neca
 chiucu mili chiucu ayu'u kilometro
 nú stuñii, nu xexee, nu cuna nú
 ayane. ¹⁷Che chu utexenu muralla
 ze'e, nu neru'cue sesenta y cuatro
 metros tucu nú neca medida nú
 rtxe bene iliulabe, scua utexe
 ángele ze'e.

¹⁸Nu muralla ze'e necache'
 quiee nú lee jaspe, nu eyeche
 ze'e necache' puro oro, xi neca
 tucu huana nú leca xinaa. ¹⁹Nu
 bee quiee nú necache' simiendu'
 muralla ze'e nzuche'e cuna huaxi
 clasia' bee quiee fiñio nú huaxi seca.

Nu quiee rluti nzuche' cuna
 quiee nú lee jaspe,
 nu quiee rruca nzuche' cuna
 quiee nú lee zafiro,
 nu quiee rriuna nzuche' cuna
 quiee nú lee ágata,
 nu quiee tacu nzuche' cuna
 quiee nú lee esmeralda.

²⁰Nu quiee ayu' nzuche' cuna
 quiee nú lee ónice,

nu quiee xu'cu nzuche' cuna
 quiee nú lee cornalina,
 nu quiee achi nzuche' cuna
 quiee nú lee crisólito,
 nu quiee xunu nzuche' cuna
 quiee nú lee berilo,
 nu quiee quie' nzuche' cuna
 quiee nú lee topacio,
 nu quiee chi'i nzuche' cuna
 quiee nú lee crisoprasa,
 nu quiee chetu'cu nzuche' cuna
 quiee nú lee jacinto,
 nu quiee chi'chiucu nzuche'
 cuna quiee nú lee amatista.

²¹Nu ye lu chi'chiucu bee
 puerta' eyeche ze'e necache' bee
 cuna chi'chiucu perla, cada perla
 necache' tucu puerta. Nu calle nú
 rdete labe eyeche ze'e necache'e
 puro oro, xi ahee tucu vidrio nú
 rlañi' bene tucu lue nu hasta stucu
 lue.

²²Ni' tucu indu né lañia eyeche
 ze'e, xne Pa'ahua Diose enu rlu'cu
 ye poder cuna Cordero'nu li'ibeenu
 neca beenu indu eyeche ze'e. ²³Nu
 eyeche ze'e la qui'ñia nú du'llie'e
 bichia ni' guu, xne ellie' Diose nu
 ellie' Cordero'nu neca nú rdu'llie'e
 eyeche ze'e. ²⁴Ye bee bene lu iliulabe
 bee enu utsila'ala huañi lu ellie'e
 cua', nu bee arre lu iliulabe quie'
 riñayuu beella bee elu nze'ca nú
 ñia neca eyeche cua'. ²⁵Bee puerta
 eyeche cua' leca xunga yacue'e, nu
 ze'e leca xunga chu'u rula'. ²⁶Ye bee
 elu nze'ca nú ñia neca uri'i bee bene
 iliulabe riña eyeche cua'. ²⁷Pero leca
 xunga riña bichia nú chu'u nú necha
 neca eyeche cua', le'ca la chu'u bee
 bene enu rri'i nú necha neca cuna
 bee bene enu sequienu, sino que

chu'utsia bee bene enu nzucu ichi nombre' lu libro nú nzene Cordero' Diose elu nzucu ichi nombre' bee bene enu lu'cu elunehuañi, bee bene cua'tsia chu'u eyeche cua'.

22 Le'ca ulube' ángele ze'e lua tucu re'cu nú rliqui' inza nú nehuañi bee bene nú rulu siqui' xi rulu tucu huana. Inza ze'e xiu'u elu nzucu Diose lu xleta'nu nu Cordero'nu. ²Nu rdete re'cucua labe calle nú rdete labe eyeche ze'e. Nu rucuchu re'cu ze'e nzucu aca nú rliqui' elu nehuañi' bee bene, nú rliqui' chi'chiucu clasia' ndixi, nu cada guu rliqui'i yelu clasia' dixi. Nu leca' aca cua' sibi' para nú rri'i yeca bee bene iliulabe. ³Ze'e leca' beenú necha necha, Diose nu Cordero'nu cua'a beella lu xleta' beella eyeche ze'e, nu bee bene'nu lu'cu ula'na lunu. ⁴Nu ze'e lañi' beella Diose, nu nequie nombre'nu tequiee beella. ⁵Ze'e la chua' rula' nu la qui'ñaia' bee bene quii nu ni' ellie' bichia xne Pa'ahua Diose du'llie'ze ze'e, nu ze'e nibiya' beella cuna li'inu diqui tiambu.

**La lea' nze'ta zeca
Jesucristo stucu bese**

⁶Che uni ángele ze'e lua:
—Bee bedichia' quie' necha bee bedichia' nú neli necha nu riala nú chili arqui' bee benene. Nu Diose Pa'ahua enu rdete' bedichia' lubee profeta para nú nibeella lubee bene, Li'inu uxe'lanu ángele'nu para nú lube' ángele cua' lubee bene'nu lunú yamero nze'ta nú aca.

⁷Nu Jesucristo uni:

—Yamero nzela iÑia necha lu cuenda' bee bene enu rri'i caso

Stichia' Diose nú nequie lu libro quie' nu rixiule'e nú xi nzu aca!

⁸Li'á Juan, ulañaia nu ubenea bee nucua', nu chenu ulaxu nú ubenea nu ulañaia bee nucua', che utsulliquia para nú lu'cua ula'na lu ángele enu ulube' bee nucua' lua. ⁹Pero uni ángele cua' lua:

—La ri'ilu scua. Xne li'á cuna li'ilu iguale sibi'a lu Diose, cuna bee profeta nu cuna bee bene enu rri'i caso nú nequie lu libro quie'. Enze'e ulu'cu ula'na lu Diose.

¹⁰Le'ca uni ángele ze'e lua.
—La tsacu' arqui'hua bee bedichia' nú nze'ta lu libro quie', bee bedichia' nú rixiule'e nú xi enta aca, xne yamerotsia nze'ta beenú aca. ¹¹Uzela nú ri'ila bee bene enu necha rri'i lunú necha rri'i beei, nu bee bene enu necha nehuañi huañila'beei lunú necha nehuañibeei lunú la zibi' rri'i beei. Pero bee bene enu rri'i tucu nú rialane rqui'ñaia nú cheri'ilálala tucu nú riala ri'illa, nu bee bene enu nehuañi tucu nú niarqui' Diose rqui'ñaia nú chenlalálala nú huañilla tucu nú niarqui'nu.

¹²Jesucristo uni:

—La lea' nú nzela zecaa nu nzelayua nú liquia lu cada tucuhua lunú uri'i cada tucuhua. ¹³Li'á necha xi necha letra A nu letra Z. Letra nú rquixie alfabeto, nu rlaxue, xne tucutsia li'á rnibiya'a desde chenu uquixie iliulabe nu ye tiambu.

¹⁴Ñia necha lu cuenda' bee bene enu necha xi necha nú uquieela xucu equie nú rri'i caso beella Stichia' Diose, para nú nu' modo chu'u beella enza ru'u puerta eyeche ze'e

nu para nú nu' modo nú acu beella
 indixi nú rayu lu aca nú rliqui'
 elunehuañi' bee bene. ¹⁵Nu ele'ya'
 eyeche ze'e ria'na bee bene enu
 riu' arqui' ri'i puro beenú necha
 neca, bee uliñi, bee bene enu rri'i
 eluhuexe, bee bene enu ruutisa',
 bee bene enu rlu'cu ula'na lubeenú
 seca bee bene nú neca diose, nu
 ye bee bene enu riu' arqui' nii
 eluquichia' nu sequienu arqui' bee
 bene.

¹⁶—Li'á, Jesuse, uxe'la ángelea
 luhua para nú ixiu'e'enu ye
 bee nucua' luhua para nú le'ca
 ixiu'e'ehuane lu ye bee bene enu
 nzeli arqui' li'á. Li'á neca mero
 lli'ñi aca tuxie David, leta bee
 familia'lla nzela. Nu li'á neca xi
 neca lucero enu rliñi sila'

¹⁷Espíritu Santo cuna enu neca
 novia' Cordero' Diose rni:

—Utee.

Nu bene enu riene' nú rni bee
 nucua' scua rnilla:

—Utee.

Titse bee enu rrebichi', ye'ta nze'e,
 nu enu niarqui' nu' modo nú hue'
 nze'e inza nú rliqui' elunehuañi sin
 nu ixiu nze'e.

¹⁸Ye bee bene enu riene' bedichia'
 nú nequie lu libro quie' lunú nze'ta
 aca, li'á nia luhua nú tunu nu' tucu
 bene enu sucu' equie sa'la bedichia'
 lunú nequie lu ichi' quie', le'ca scua
 zucu' equie sa'la Diose castiya nú
 zeca bene ze'e lunú nequie lu libro
 quie'. ¹⁹Le'ca esquie tunu nu' bene
 enu axi bee bedichia' nú nequie lu
 libro quie' lunú nze'ta aca, le'ca axi
 Diose nú rialalla lu aca nú rliqui'
 elu nehuañi nú rni lu libro quie',
 nu le'ca la chu'u bene ze'e eyeche'
 Diose elu rni lu libro quie'.

²⁰Enu nediya' nú neli ye bee
 nucua', rni:

—Neli nú la lea' nzela. Scua acane
 niarquia.

iDetá Jesucristo, utee!

²¹Jesucristo ri'i nú cha nze'cae lu
 cuenda' yehua.

Amén.